

Holy Bible

Aionian Edition®

भटियाली नोआ नियम
Bhattiyali Bible

AionianBible.org
The world's first Holy Bible untranslation
100% free to copy and print
also known as “ The Purple Bible ”

Holy Bible Aionian Edition ®

भटियाली नोआ नियम

Bhattiyali Bible

Language: Bhattiyali

India (Himachal Pradesh)

Creative Commons Attribution ShareAlike 4.0 International, 2018-2026

Source text: eBible.org

Source version: 8/7/2026

Source copyright: Creative Commons Attribution ShareAlike 4.0

The Love Fellowship, 2022

Formatted by Speedata Publisher 5.9.2 (Pro) on 8/31/2026

100% Free to Copy and Print

TOR Anonymously and <https://AionianBible.org>

Published by Nainoia Inc, <https://Nainoia-Inc.signedon.net>

All profits are given to <https://CoolCup.org>

We pray for a modern Creative Commons translation in every language
Translator resources at <https://AionianBible.org/Third-Party-Publisher-Resources>
Volunteer help and comments are welcome and appreciated!

Celebrate Jesus Christ's victory of grace!

Preface

भटियाली at AionianBible.org/Preface

The *Holy Bible Aionian Edition* ® is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Please understand these eleven words. The original translation is unaltered and a highlighted note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by/4.0, allowing 100% freedom to copy and print, if respecting source copyrights. Check the Reader's Guide and read at AionianBible.org, with Android, and with TOR network. Why purple? King Jesus' Word is royal and purple is the color of royalty! All profits are given to CoolCup.org.

History

भटियाली at AionianBible.org/History

06/21/75 - Two boys, P. and J., wonder if Jesus saves all and pray.
04/15/85 - Aionian Bible conceived as B. and J. pray.
12/18/13 - Aionian Bible announced as J. and J. pray.
06/21/15 - Aionian Bible birthed as G. and J. pray.
01/11/16 - AionianBible.org domain registered.
06/21/16 - 30 translations available in 12 languages.
12/07/16 - Nainoia Inc established as non-profit corporation.
01/01/17 - Creative Commons Attribution No Derivatives 4.0 license added.
01/16/17 - Aionian Bible Google Play Store App published.
07/01/17 - 'The Purple Bible' nickname begins.
07/30/17 - 42 translations now available in 22 languages.
02/01/18 - Holy Bible Aionian Edition® trademark registered.
03/06/18 - Aionian Bibles available in print at Amazon.com.
09/15/18 - Aionian Bible dedicated as J. and J. pray again.
10/20/18 - 70 translations now available in 33 languages.
11/17/18 - 104 translations now available in 57 languages.
03/24/19 - 135 translations now available in 67 languages.
10/28/19 - Aionian Bible nursed as another J. and J. pray.
10/31/19 - 174 translations now available in 74 languages.
02/22/20 - Aionian Bibles available in print at Lulu.com.
05/25/20 - Illustrations by Gustave Doré, La Grande Bible de Tours, Felix Just.
08/29/20 - Aionian Bibles now available in ePub format.
12/01/20 - Right to left and Hindic languages now available in PDF format.
03/31/21 - 214 translations now available in 99 languages.
11/17/21 - Aionian Bible Branded Leather Bible Covers now available.
12/20/21 - Social media presence on Facebook, Twitter, LinkedIn, YouTube, etc.
01/01/22 - 216 translations now available in 99 languages.
01/09/22 - StudyPack resources for Bible translation study.
01/23/22 - Volunteers celebrate with pie and prayer.
02/14/22 - Strong's Concordance from Open Scriptures and STEP Bible.
02/14/23 - Aionian Bible published on the TOR Network.
12/04/23 - Eleēsē added to the Aionian Glossary.
02/04/24 - 352 translations now available in 142 languages.
05/01/24 - 370 translations now available in 164 languages.
08/05/24 - 378 translations now available in 165 languages.
08/18/24 - Creative Commons Attribution 4.0 International, if source allows.
10/20/24 - Gospel Primer handout format.
11/24/24 - Progressive Web Application off-line format.
01/28/25 - All profits are given to CoolCup.org.
03/12/25 - 382 translations now available in 166 languages.
06/21/25 - 468 translations now available in 230 languages.
09/01/25 - 538 translations now available in 291 languages.
08/31/26 - 539 translations in 291 languages with 9,609,899 verses.

Table of Contents

NEW TESTAMENT

मत्ती	11
मरकुस	36
लूका	54
यूहन्ना	80
प्रेरितां दे कम्म	100
रोमियो	127
1 कुरिन्थियो	139
2 कुरिन्थियो	152
गलातियो	160
इफिसियो	165
फिलिप्पियो	170
कुलस्सियो	173
1 थिस्सलुनीकियो	176
2 थिस्सलुनीकियो	179
1 तीमुथियुस	181
2 तीमुथियुस	185
तीतुस	188
फिलेमोन	190
इब्रानिया	191
याकूब	201
1 पतरस	204
2 पतरस	208
1 यूहन्ना	211
2 यूहन्ना	214
3 यूहन्ना	215
यहूदा	216
प्रकाशितवाक्य	218

APPENDIX

Reader's Guide


Glossary

Maps

Destiny

Illustrations, Doré

NEW TESTAMENT



तालू यीशुऐ बोलया, “हे पिता, इना जो माफ कर, क्योकि ऐ जाणदे नी न की ऐ क्या करा दे न?”
कने उना पर्चियां पाई करी उदे कपडे बंडी ले।
लूका 23:34

1 ऐ यीशु मसीह दे पूर्वजां दे ना दी सूची है, सै राजा दाऊद दा बंशज था, जडा अब्राहम दा बंशज था। 2 अब्राहम ला इसहाक पैदा होया, इसहाक ला याकूब पैदा होया, कने याकूब ला यहूदा कने उदे भाई पैदा होये। 3 यहूदा कने तामार ला पेरस कने जेरह पैदा होया, कने पेरस ला हिस्त्रोन पैदा होया, कने हिस्त्रोन ला एराम पैदा होया। 4 एराम ला अम्मीनादाब पैदा होया, कने अम्मीनादाब ला नहशोन, कने नहशोन ला सलमोन पैदा होया। 5 सलमोन कने राहब ला बोअज पैदा होया, कने बोअज कने स्त ला ओबेद पैदा होया, कने ओबेद ला यिशै पैदा होया। 6 कने यिशै ला दाऊद राजा पैदा होया। कने दाऊदे ला सुलैमान, से उसा जनानिया ला पैदा होया जडी पेहले ऊरिय्याह दी घरे बाली थी। 7 सुलैमान ला रहबाम पैदा होया, कने रहबाम ला अबिय्याह पैदा होया, कने अबिय्याह ला आसा पैदा होया। 8 आसा ला यहोशाफात पैदा होया, कने यहोशाफात ला योराम पैदा होया, कने योराम ला उज्जियाह पैदा होया। 9 उज्जियाह ला योताम पैदा होया, योताम ला आहाज पैदा होया, कने आहाज ला हिजकिय्याह पैदा होया। 10 हिजकिय्याह ला मनश्शे पैदा होया, मनश्शे ला आमोन पैदा होया, कने आमोन ला योशिय्याह पैदा होया। 11 योशिय्याह ला यकुन्याह, कने उदे भाई पैदा होये। यकुन्याह कने उदे भाई इस्त्राएलियां जो कैदी बणाई करी बाबेल देशे जो लेई जाणे ला पेहले पैदा होये थे। 12 कैदी होईकरी बाबेल पुजाणे बाद यकुन्याह ला शालतियेल पैदा होया, कने शालतियेल ला जर्स्बाबेल पैदा होया। 13 जर्स्बाबेल ला अबीहूद पैदा होया, अबीहूद ला एलयाकीम पैदा होया, एलयाकीम ला अजोर पैदा होया। 14 अजोर ला सादोक पैदा होया, सादोके ला अखीम पैदा होया, कने अखीम ला एलीहूद पैदा होया। 15 एलीहूद ला एलीआजार पैदा होया, एलीआजार ला मत्तान पैदा होया, कने मत्ताने ला याकूब पैदा होया। 16 याकूब ला यूसुफ पैदा होया, जडा मरियमा दा घरेबाला था, कने मरियम ला यीशु पैदा होया जिसयो मसीह बोलदे न। 17 अब्राहम ला लेईकरी दाऊदे दीकर सारियां चौदा पीडियां होईयां, राजा दाऊदे ला बेबीलोन जो कैदी बणाई करी पुजाणे दीकर चौदा पीडियां, कने कैदी बणी करी बाबेल पुजाणे दे बकते ला लेईकरी मसीह दीकर चौदा पीडियां होईयां। 18 यीशु मसीह दा जन्म होणे ला पेहले इयां होया, कि जालू उदी माता मरियम दी मंगणी यूसुफे सोगी होई गेई, तां उना दा बियाह होणे ला पेहले हीं सै पबित्र आत्मा दिया शक्तिया ला गर्भवती होई गेई। 19 उसा दा होणेबाला घरेबाला यूसुफ बडा ही धर्मी था, कने उसा जो बदनाम नी करणा चांदा था, इस ताईं उनी उसा जो डोल करी छडी देणे दे बारे च मने च सोचया। 20 जालू सै इना गल्लां दे बारे च सोचा दा था, तालू प्रभु दे स्वर्गदूते उदे सुपने च आई करी बोलया, “हे यूसुफ! राजा दाऊदे दे बंशज, तू मरियम जो अपणी घरे बाली बणाणे ला मत डर क्योंकि जडा उसा दे पेटे च है, सै पबित्र आत्मा दिया शक्तिया ने है। 21 कने उना इक जागत जमणा है, कने तू उदा ना यीशु रखया, क्योंकि उनी अपने लोकां जो उना दे पापां ला छुटकारा देणा है।” 22 ऐ सारा कुछ इस ताईं होया कि जडा बचन परमेस्वर दे दा संदेश देणेबाले यशायाह बोलया था, सै पूरा होऐ, 23 “दिख,

इकी कुआरिया गर्भवती होणा कने उना इक जागत जमणा है, कने उदा ना इम्मानुएल रखणा है,” जिसदा मतलब ऐ है, की परमेस्वर साडे सोगी है। 24 तालू यूसुफ निद्रा ला उठया, कने जियां स्वर्गदूते उसयो बोलया था, उनी मरियम ने बियाह किता, कने उसा जो अपने घरे लेई आया। 25 जालू दीकर उना पुत्र नी जमया तालू दीकर उनी उसा ने कोई वैवाहिक संबंध नी रखया: कने यूसुफे उदा ना यीशु रखया।

2 जालू राजा हेरोदेस यहूदिया प्रदेश च शासन करा दा था, तालू यीशु दा जन्म उस प्रदेश दे बैतलहम शेहरे च होया। तालू तारयां दा ज्ञान रखणेबाले केई ज्योतिषी पूर्व दिशा ला यरूशलेम शेहरे च आई करी पछणा लग्गे, 2 “कि सै बच्चा कुथु है? जडा यहूदियां दा राजा बणने ताईं पैदा होया है। क्योंकि असां पूर्व दिशा च उदे जन्म दे बारे च दसणे बाला तारा दिखया है, कने उसयो नमस्ते करणा आयो ना।” 3 हेरोदेस राजा यहूदियां दे राजे दे जन्म दे बारे च सुणीकरी डरी गया। कने मते सारे यरूशलेम शेहर दे बासी भी डरी गे। 4 कने तालू उनी लोकां दे सारे बड़े याजकां कने व्यवस्था जो सिखाणे बालयां जो सदया कने उना ला पुछया, कि मसीह दा जन्म कुथु होणा है? 5 उना राजा हेरोदेस जो बोलया, कि मसीह दा जन्म यहूदिया प्रदेश दे बैतलहम शेहरे च होणा है। क्योंकि परमेस्वर दे संदेश देणेबालयां इयां ही लिखया है: 6 “हे यहूदिया प्रदेश दे बैतलहम शेहरे दे लोको, तू कुसी भी तरीके ला यहूदा दे अधिकारियां च सबते छोटा नी है; क्योंकि तिजो च इक माणु निकलना है, जिनी मेरी प्रजा इस्त्राएले दी रखबाली करणी है।” 7 तालू राजा हेरोदेसे ज्योतिषियां जो डोल करी सदीकरी उना ला पुछया, कि तारा कुस बेले दिखया था, क्योंकि राजा उस बच्चे दी उम्र जाणना चांदा था। 8 कने उनी उना जो ऐ बोली करी बैतलहम शेहर च भेजया, “जा” कने उस बच्चे दे बारे च ठीक ढंगे ने पता करा, कने जालू सै मिली जांगा तां मिजो खबर भेजनयो ताकि मै भी उसयो नमस्ते करे। 9 सै राजे दी गल्ल सुणीकरी चली गे, कने जडा तारा उना पूर्व दिशा च दिखया था, सै तारा उना दे अग्गे-अग्गे चलया, कने उस घरे उपर स्की गया, जिथू सै बच्चा था। 10 कने सै उस तारे जो दिखीकरी बडे खुश होये। 11 कने उस घरे जाई करी उस बच्चे जो कने उदिया माता मरियम जो सोगी दिखया, कने झुकी करी बच्चे जो नमस्ते किता, कने अपना-अपणा थैला खोली करी उसयो सोना, कने लोबान, कने गंधरस दी भेंट चढाई। 12 कने उना जो सुपने च परमेस्वर ला चेतावनी मिल्ली कि राजा हेरोदेस बाल मुडी करी मत जांदे, कने ज्योतिषियां हेरोदेस जो खबर नी दिती कने होर रस्ते ला होईकरी अपने देशे जो चली गे। 13 उना दे जाणे बाद दिखा, प्रभु दे इकी स्वर्गदूते यूसुफे दे सुपने च आई करी बोलया, “उठ! कने उस बच्चे जो कने उदिया माता जो लेईकरी मिस्र देशे जो चली जा; कने जालू दीकर मै तिजो नी बोलगा तालू दीकर ओथु ही रियां, क्योंकि राजा हेरोदेस इस बच्चे जो तोपा दा है, ताकि उसयो मारी दे।” 14 कने सै तालू ही राती उठी करी बच्चे जो कने उदिया माता जो लेईकरी मिस्र देशे जो चली गया। 15 कने राजा हेरोदेस दे मरणे दीकर सै ओथु ही रिया। इस ताईं कि सै बचन पूरा हो जडा परमेस्वर दे संदेश देणेबाले होसे बडा पहले बोलया था: “कि मै अपने पुत्रे जो मिस्र देश ला सदया।” 16 जालू हेरोदेस जो पता

लगा कि ज्योतिषियां मिंजो धोखा देता है। तालू उसयो बड़ा गुस्सा आया, कने उनी सिपाईयां जो भेजी करी ज्योतिषियां दे ठीक-ठीक दसयो बकते दे मुताविक बैतलहम शेहे च कने उस दे अखे-बखे दे सारे बचयां जो जडे दो सालां दे या उसला भी लोके थे, सै सारे मारवाई दिते। 17 तालू जडा बचन परमेश्वरे दा संदेश देणेबाले यिर्मयाह दे जरिये बोलया गया था, सै पूरा होई गया 18 “रामाह शेहर च लोकां जो कुसकी दी बडे जौरे ला रोणे दी अबाज सुणोया दी थी, राहेल अपने बचयां तांई रोआ दी थी; कने चुप नी होणा चांहदी थी, क्योंकि सै हुण मरी गियो थे।” 19 यूसुफ मरियम कने बच्चा यीशु हल्ले दीकर मिस्र देशे च ही थे। राजा हेरोदेस दे मरणे बाद तां प्रभु दे स्वर्गदूते यूसुफे दे सुपने च आई करी बोलया, 20 “उठ, कने बच्चे कने उदिया माता मरियम जो लेईकरी इस्राएल देशे जो चली जा, क्योंकि राजा हेरोदेस कने सै लोक जडे बच्चे जो मारणा चांदे थे, सै सब मरी गियो न।” 21 सै उठया, कने बच्चे कने उदिया माता जो लेईकरी मिस्र देशे ला इस्राएल देशे जो बापिस आई गया। 22 पर जालू यूसुफे ऐ सुणया कि अरखिलाउस अपने पिता राजा हेरोदेस दिया जगा पर यहूदिया प्रदेश च राज करा दा है, तां सै ओथु जांणे ला डरया, कने उसयो परमेश्वरे सुपने च चेतावनी दिती, कने सै गलील प्रदेशे जो चली गया। 23 कने यूसुफ नासरत नाए दे इक गांए च जाई बसया, ताकि सै बचन पूरा हो, जडा परमेश्वरे दा संदेश देणेबालयां यीशु दे बारे च बोलया था: “कि यीशु मसीह जडा नासरत ला है कने इसी नाए ने जाणया जाणा।”

3 उना दिना च यहून्ना बपतिस्मा देणेबाला यहूदिया प्रदेश दी इक सुनसान जगा च आई करी ये प्रचार करदा था कि: 2 अपने पापां जो मनी लिया कने गलत कम्मा जो छडी दिया, क्योंकि स्वर्गे दा राज्य नेडे ओआ दा है। 3 ऐ सै ही है, जिदी चर्चा परमेश्वरे दा संदेश देणेबाले यशायाह किती थी, “सुनसान जगा ला इक हक्का पांणे बाले दी अबाज सुणाआ दी है, परमेश्वरे ओणे तांई, अपने आपे जो तैयार करा, कने अपने मने दी सोच समझा जो खरा रखा, उनी ओणा है।” 4 यहून्ना ऊंटे दे बालां दे बणयो कपडे पांदा था, कने अपने लके च चमडे दा पटा बनदा था, कने टिड्डे कने मखिर खांदा था। 5 तालू यरूशलेम शहरे दे कने सारे यहूदिया प्रदेशे दे, कने यरदन खड्डा दे अखे-बखे दे सारे इलाके दे लोक उदे बाल आये। 6 कने उना लोकां अपने पापां जो मनया, कने यहून्ना उना सारयां जो यरदन खड्डा च बपतिस्मा दिता। 7 कने जालू उनी मते फरीसियां कने सद्कियां जो बपतिस्मा लेणे तांई अपने बाल ओदा दिखया, तां उनी उना जो बोलया, तुसां लोक जहरीले सांपा सांई बुरे न, तुहाडा ऐ सोचणा गलत है, कि सिर्फ तुसां बपतिस्मा लेणे ने अपने पापां दी सजा ला बची जाणा जडी परमेश्वरे तुसां जो देणी है। 8 इस तांई अपने पापां जो मन्नी करी बुरे कम्मा जो छडी करी अपने पश्चाताप जो साबित करा। 9 कने अपने-अपने मना च ऐ मत सोचा, कि साडा पिता अब्राहम है; क्योंकि मैं तुहांजो बोला दा है, कि परमेश्वर इना पथरां ला भी अब्राहमे तांई ओलाद पैदा करी सकदा है। 10 कने हुण कुहाडी स्वां दिया जडा च रखियो है, इस तांई की जडा-जडा स्ख खरा फल नी दिंगा, सै बड़ी करी अग्गी च फूकी देणा है। 11 “तुसां पापां दा पश्चाताप करिके मन बदला, इस तांई मैं तुहांजो पांणिये

ने बपतिस्मा दिन्दा है, पर जडा मेरे बाद ओणे बाला है, सै मिंजो ला भी शक्तिशाली है; मैं तां उदे जुते चुकणे जोगा भी नी है, उनी तुहांजो पबित्र आत्मा कने अग्गी ने बपतिस्मा देणा है। 12 उदा सूप उदे हथे च है, कने उनी अपनी कणक गांणे बाली जगा ढंगे ने साफ करणी, कने कणक पेडुआं च गठेरी रखणी, पर भूए जो उसा अग्गी च फुकणा जडी कदी बुझदी ही नी।” 13 उस बेले यीशु गलील प्रदेशे दिया यरदन खड्डा कंडे पर यहून्ना बाल उसला बपतिस्मा लेणे तांई आया। 14 पर यहून्ना उसयो ऐ बोली करी रोकणा लगा, कि मिंजो तां तेरे हथे ला बपतिस्मा लेणे दी जरूरत है, कने तू मेरे बाल आया है? 15 यीशुऐ उसयो ऐ जबाब दिता, “हुण तां इयां ही होणा दे, क्योंकि सांझो इस तरीके ने सै सब कुछ करणा चाईदा जडा परमेश्वर चांदा है।” तां यहून्ना उदी गल्ल मनी लेई। 16 कने यीशु बपतिस्मा लेईकरी झट पांणिए ला बाहर आया, कने दिखया, उदे तांई अम्बर खुली गया, कने उनी परमेश्वरे दिया आत्मा जो कबूतरे सांई उतरदे कने अपने उपर ओदे दिखया। 17 कने दिखा, स्वर्गे ला ऐ अबाज सुणोई की, “ऐ मेरा प्यारा पुत्र है, कने तिजो ला मैं खुश है।”

4 तालू पबित्र आत्मा यीशुऐ जो सुनसान जगा च लेई गेई ताकि शैतान उसयो लालच देई सके। 2 यीशु चाली दिन, कने चाली रात, बिना कुछ खादयो ओथु रिया, कने जालू उसयो भूख लगगी। 3 तालू शैताने उदे बखे आई करी उसयो बोलया, “अगर तू परमेश्वरे दा पुत्र है, तां बोल, कि ऐ पथर रोटियां बणी जान, ताकि तू इना जो खाई सके।” 4 यीशुऐ जबाब दिता, “कि पबित्र शास्त्र च लिखया है, कि माणु सिर्फ रोटियां ला ही नी, पर परमेश्वरे दे बोलयो बचना जो मन्नी करी जिन्दा रेंदा है।” 5 तालू शैतान यीशुऐ जो पबित्र यरूशलेम शहर च लेई गया कने परमेश्वरे दे मंदरे दिया चुंडिया पर खरेडी दिता। 6 कने उसयो बोलया, अगर तू परमेश्वरे दा पुत्र है, तां ऐथु ला छाल मारी करी दस कने तिजो कुथी भी चोट नी लगणी है; क्योंकि पबित्र शास्त्र च लिखया है, कि उनी स्वर्गदूतां जो हुकम देणा; कने उना तिजो हथो हथ सभांली लेणा है; कुथी इयां ना होए कि तेरे पैरां च पथरे ला चोट लगगी जा। 7 यीशुऐ उसयो बोलया, “कि पबित्र शास्त्र च ऐ भी लिखया है, कि लोकां जो अपने प्रभु परमेश्वरे जो नी परखणा चाईदा।” 8 फिरी शैतान उसयो इक बडे उच्चे पहाडे पर लेई गया, कने सारे संसारे दे राज्य कने उना दी धन दौलत दस्सी करी, 9 उनी बोलया, कि अगर तू मेरे पैरां पेईकरी मिंजो नमस्ते करगा, तां मैं ऐ सब कुछ तिजो देई दिंगा। 10 तालू यीशुऐ उसयो बोलया, शैतान दूर होई जा, क्योंकि पबित्र शास्त्र च लिखया है: “तू सिर्फ अपने प्रभु परमेश्वरे जो नमस्ते कने सिर्फ उदी ही भक्ति कर।” 11 तालू शैतान उदे बखे ला चली गया, कने स्वर्गदूत आई करी यीशुऐ दी सेवा करणा लग्यो। 12 जालू उनी ऐ सुणाया कि यहून्ना जो पकडी करी जेला च बन्द करी लिया है, तां सै यहूदिया प्रदेश जो छडी करी गलील प्रदेशे जो चली गया। 13 कने सै नासरते जो छडी करी कफरनहम शेहे च जडा गलील झिला दे कंडे था, जिथू जबलून कने नमाली दे गोत्र रेंदे थे, ओथु जाई करी रेणा लग्या। 14 ताकि जडा परमेश्वरे दा संदेश देणेबाले यशायाह बोलया था, सै पूरा हो। 15 “तुसां लोक जडे जबलून कने नमाली गोत्र दे इलाके च रेंदे न, ऐ इलाके उस रस्ते पर न

जडे गलील दरियाये दे बखे कने यरदन खड्डा दे पूर्वी कंडे पर है, ऐ गलील प्रदेशे दे ऐसे इलाके न जिथु होर जातियां दे लोक रेंदे ना।” 16 परमेश्वरे जो जाणयो बिना नेहरे च रेणेबाले लोकां इक बडी ज्योति दिखणी; इना ज्योतिया उना लोकां जो मुक्ति दा रस्ता दसणा, जडे परमेश्वरे जो जाणयो बिना जिन्दगी जिंदे न कने हमेशा दिया मौता दे रस्ते पर चलयो न। 17 उस बेले ला यीशुए प्रचार करणा कने ऐ बोलणा शुरू किता, “कि मन बदला क्योंकि स्वर्गे दा राज्य बखे आई रिया है।” 18 इक दिन जालू यीशु गलील झिला दे बखे-बखे चलाया था, तां दो मछवारे भाईयां जो झिला च जाल पांदे दिखया, उना चे इक शमौन था जिसयो पतरस बोलदे न कने उदा भाई अन्दिआस था। 19 यीशुए उना जो बोलया, “ओआ कने मेरे चेले बणा; मै तुहांजो सिखांगा कि लोकां जो मेरे बाल कियां लोणा कने कियां मेरे चेले बणणा है।” 20 उना झट जाल छडया कने उदे पिच्छे चली पे। 21 जालू यीशु थोडा अग्रे चलाया, उनी होर दो भाईयां जो दिखया जिना दे ना याकूब कने यहून्ना थे, कने सै जब्दी दे पुत्र थे, सै किस्तिया पर जाले जो ठीक करा दे थे, कने यीशुए उना जो भी सदया। 22 सै झट किस्तिया कने अपने पिता जो छडी करी उदे पीछे चली पे। 23 यीशु सारे गलील प्रदेशे च गुमदा रेंदा कने उना दे यहूदी जंज घरां च उपदेश दिन्दा कने राज्य दा शुभसमाचार दा प्रचार, कने लोकां दियां सारियां बिमारियां कने कमजोरियां जो ठीक करदा जांदा था। 24 कने सारे सीरिया प्रदेश च यीशुए दे कम्मा दी खबर फैली गेई कने लोक सारे बिमारां जो, जिना जो केई किस्मा दियां बिमारियां कने दुखां जकडया था, कने जिना च बुरियां आत्मा थियां, कने मिर्गिया दे दौरे बाले, कने लकवे दे रोगियां जो उस बाल लेईकरी आऐ कने यीशुए उना सारयां जो ठीक करी दिता। 25 कने गलील प्रदेश कने दिकापुलिस शेहरे कने यरुशलैम शेहर कने यहूदिया प्रदेशे ला कने यरदन खड्डा दे पारे ला भिडा दी भीड उदे पिच्छे चली पेई।

5 यीशु भिडा जो दिखीकरी, पाहडे पर थोडा उपर चली गया, कने उना जो शिक्षा देणे ताई ओथु बेई गया तां उदे चेले उदे बाल आये। 2 कने उना जो शिक्षा देणी शुरू किती: 3 “धन्य न सै लोक, जडे मने दे दीन न जिना जो परमेश्वर दी जस्ततां दा ऐहसास है, क्योंकि स्वर्गे दा राज्य उना दा ही है। 4 धन्य न सै लोक, जडे शोक करदे न, क्योंकि परमेश्वरे उना जो शांती देणी। 5 धन्य न सै लोक, जडे नम्र न, क्योंकि धरती उना दी होणी है। 6 धन्य न सै लोक, जडे धार्मिकता ने जिन्दगी जिणे दी सच्ची भूख प्यास रखदे न, क्योंकि परमेश्वरे उना जो रजाणा है। 7 धन्य न सै लोक जडे दयालु न, क्योंकि परमेश्वरे उना पर दया करणी। 8 धन्य न सै लोक, जिना दे मन साफ न, क्योंकि उना परमेश्वरे जो दिखणा। 9 धन्य न सै लोक, जडे इकी दुज्जे दा मेल कराणे बाले न, क्योंकि उना जो परमेश्वरे दा पुत्र बोलया जाणा। 10 धन्य न सै लोक, जडे धर्मे दे कम्म करणे दिया बजा ने सताऐ जांदे न, क्योंकि स्वर्गे दा राज्य उना दा ही है। 11 धन्य न तुसां, जालू माणुए मेरिया बजा ने तुहाडी निन्दा करणी कने तुसां जो सताणा क्योंकि तुसां मेरे चेले न कने झूठ बोली-बोली करी तुहाडे खिलाफ हर तरां दियां बुरियां गल्लां बोलगे। 12 तालू तुसां खुश कने मगन होनयो क्योंकि तुहाडे ताई स्वर्गे च बडा इनाम है। इस ताई

कि जडे बडे बकते पहले परमेश्वरे दा संदेश देणेबाले थे उना जो भी इयां ही सताया था। 13 तुसां धरतिया पर लोकां ताई लूँगे साई न; पर अगर लूँगे दा स्वाद बिगडी जा, तां फिरी सै कुसा चिजा ने लूँका करणा? फिरी सै कुसी कम्मे दा नी है, सिर्फ इसी ताई कि इसयो बार सुटी दिया ताकि माणुआं दे पैरा हेठ ओए। 14 तुसां पुरे संसारे ताई ज्योति न। जडा शेहर पाहडे पर बस्या है, सै कदी छुपी नी सकदा। 15 कने लोक दिया बाली करी टोकसे हेठ नी रखदे न, पर उसयो उपर धारिया पर रखदे न, ताकि घरे दे सारे लोकां जो लौ होऐ। 16 तियां ही तुहाडी लौ भी माणुआं सामणे चमके तां सै तुहाडे भले कम्मा जो दिखीकरी तुहाडे पिता दी बडाई करन, जडा स्वर्गे च है। 17 ऐ मत समझा कि, मै मूसा दी व्यवस्था या परमेश्वरे दा संदेश देणेबालयां दिया गल्लां जो खत्म करणा आया है, मै उना जो खत्म करणा नी, पर उना जो पूरा करणा आया है। 18 क्योंकि मै तुसां ने सच्च बोलदा है, कि अम्बर कने धरती खत्म होई जांगे, पर परमेश्वरे दिया व्यवस्था ला कुछ भी, ऐथू दीकर इक बिंदु या मात्रा भी पूरा होयो बिना नी टलनी है। व्यवस्था दियां सारियां भविष्यवाणियां पुरियां होणियां न। 19 इस ताई जडा कोई छोटे ला छोटे हुकम चे कुसकी इकी जो भी नी मनगा, कने तियां ही लोकां जो सिखांगा, तां उसयो स्वर्गे दे राज्य च सारयां ला छोटा बोलणा, पर जडा कोई उना दा पालन करणा कने उना जो सिखांगा, सिर्फ उसयो ही स्वर्गे च महान बोलणा है। 20 मै तुसां ने बोलदा है, कि अगर तुसां चे कोई स्वर्ग दे राज्य च जाणा चांदा है, तां तुसां जो व्यवस्था जो सिखाणे बाले कने फरीसियां ला बदीकरी परमेश्वरे दी व्यवस्था दा पालन करणा चाईदा। 21 तुसां सुणया होणा, व्यवस्था जो सिखाणे बालयां साडे पूर्वजां जो दसया कि ‘हत्या मत करदे’, कने जडा कोई हत्या करणा उसयो यहूदी सभा च सजा मिलणी है। 22 पर मै तुसां जो ऐ बोलदा है, कि जडा कोई अपने भाईऐ पर गुस्सा करणा, उसयो यहूदी सभा च सजा मिलणी: कने जडा कोई अपने भाईऐ जो नकम्मा बोलणा उसयो महासभा च परमेश्वरे सजा देणी; जडा कोई अपने भाईऐ जो निकम्मा कने मुख बोले; उसयो नरके दी अग्नी दी सजा मिलणी। (Geenna g1067) 23 इस ताई अगर तू अपनी भेंट चढाणे ताई मंदरे जो लोए, कने ओथु तिजो याद ओए, कि मेरे भाईऐ दे मने च मेरे ताई कोई शिकायत है, 24 तां अपनी भेंट ओथु ही मंदरे दे सामणे छडी दे, कने पेहले जाई करी अपने भाईये ने मेल मिलाप कर, तां फिरी आई करी अपनी भेंट चढा। 25 कचेरी जांदे बकते रस्ते च ही तू अपने बिरोधी ने राजीनामा करी ले, ताकि तेरा बिरोधी तिजो न्याय करणे बाले दे हथे ना देई दे, कने न्याय करणे बाला तिजो जेला च पाई दे। 26 मै तुसां ने सच्च बोलदा है जालू दीकर तू इक-इक पैसा नी भरी दिगा तालू दीकर तू जेलखाने ला नी छुटी सकदा है।” 27 तुसां सुणी बैठयो न कि परमेश्वरे हुकम दितया था, कि व्यभिचार मत करदे। 28 पर मै तुसां ने ऐ बोलदा है, जडा कोई कुसा जनानिया जो बुरिया नजरा ने दिखे तां सै अपने मने च उसा ने व्यभिचार करी बैठा है। 29 अगर तेरी सजी हथ तेरे पाप दी बजा बणे, तां उसा जो कडी करी सटी दे; क्योंकि तेरे ताई ऐ ही खरा है कि तेरे अंगा चे इकी दा नाश होई जाऐ ताकि तेरा बाकी शरीर नरक जाणे ला बची जा। (Geenna g1067) 30 कने अगर तेरा सज्जा हथ तेरे पाप करणे दी बजा बणे, तां तू उसयो बडी करी सुटी

दे, क्योंकि तेरे ताँई ऐ ही खरा है कि तेरे अंगा चे इक हिसा नाश होई जा, ताकि तेरा बाकी शरीर नरक जाणे ला बची जा। (Geenna g1067) 31 मूसा दिया व्यवस्था च ऐ भी बोलया था, कि जडा कोई अपणिया घरे बालिया जो तलाक देणा चांदा है, तां उसा जो तलाकनामा दे। 32 पर मैं तुसां जो ऐ बोलदा है, कि जडा कोई अपणिया घरे बालिया जो व्यभिचार दे सिवा कुसी होरसी बजा ने छडी दे, तां सै उसा ला व्यभिचार करवांदा है; कने जडा उसा छडिया ने बियाह करे, सै व्यभिचार करदा है। 33 फिरी तुसां सुणी बैठयो न, कि व्यवस्था जो सिखाणे बालयां साडे पूर्वजां बोलया था, झुठियां कसमां मत खांदे, पर परमेश्वरे दे सामणे खादियां अपणियां कसमां जो पुरियां करनयो। 34 पर मैं तुसां ने ऐ बोलदा है, कि कदी कसम मत खांदे; ना ही स्वर्गे दी, क्योंकि स्वर्ग परमेश्वरे दा सिंहासन है। 35 ना ही धरतिया दी, क्योंकि सै उदे पैरां दी चौकी है; कने ना ही यरूशलेम शहर दी क्योंकि सै महान राजा परमेश्वरे दा शहर है। 36 कने अपने सरे दी भी कसम मत खांदा क्योंकि तू अपने इक बाले जो भी ना चिट्ठा, कने ना काला करी सकदा है। 37 पर तुहाड़ी गल्ल हां दी हां, कने ना दी ना हो; क्योंकि जडा कुछ इसला जादा होंदा है, सै शैतान ला होंदा है। 38 फिरी तुसां सुणी बैठयो न कि मूसा दिया व्यवस्था च लिखया है, कि अगर कोई तेरी हखी जो फोडी दे तां तुमी उदे बदले च उदी हख फोडी दे, कने इयां ही दंद दे बदले दंद तोडी दिया। 39 पर मैं तुसां ने ऐ बोलदा है, कि तुसां बदला मत लेंदे; पर जडा तेरिया सजिया खाडिया पर थपड़ मोरे, तां उदे सामणे दुई खाडी भी करी दिया। 40 कने अगर कोई तिजो पर मुकद्मा करी के जबरदस्ती तेरा कुरता लेणा चांदा है, तां उसयो अपणिया धोतिया भी लेणा दिया। 41 कने कोई रोमी सिपाई तिजो जबरदस्ती ही इक मील भर लेई जांदा है, तां उदे सोगी दो मील चली जा। 42 कने जडा कोई तिजो ला कुछ मंगे, तां उसयो देई दे; कने जडा तिजो ला उधार लैणा चांदा है, उसयो मना मत करदे। 43 तुसां सुणी बैठयो न कि व्यवस्था च लिखया है; कि अपने पडोसियां ने प्यार रखा, कने दुश्मणा ने दुश्मणी रखा। 44 पर मैं तुसां ने ऐ बोलदा है, कि अपने दुश्मणा ने प्यार रखा, कने जडा तुसां जो सतांदा है उस ताँई प्रार्थना करा। 45 जिसने तुसां अपने स्वर्गीय पिता दी ओलाद बणना है, क्योंकि सै खरे लोकां कने बुरे लोकां दोना उपर अपना सूरज निकालदा है, कने धर्मियां कने अधर्मियां दोनो पर बरखा बरसांदा है। 46 क्योंकि अगर तुसां अपने चाहणे बालयां ने ही प्यार रखन, तां परमेश्वरे तुसां जो फल नी देणा, क्योंकि चुंगी लेणे बाले भी इयां ही करदे न? 47 कने अगर तुसां सिर्फ अपने मसीह भाईयां जो ही नमस्ते करदे न, तां तुसां दुज्जे लोकां दे बदले कोई बडा कम्म नी करदे न। क्योंकि होर जातियां जडियां परमेश्वरे दे हुकमा दा पालन नी करदियां न, सै भी तां इयां ही करदे न? 48 इस ताँई तुहांजो उना जो प्यार करणा चाईदा जडे तुहांजो प्यार नी करदे इस तरीके ने तुसां सिद्ध बणा, जियां तुहाडा स्वर्गीय पिता सिद्ध है।

6 ध्यान रखा तुसां माणुआं जो दसणे ताँई अपने भले कम्म मत करा, नी तां तुहांजो अपने स्वर्गीय पिता परमेश्वरे ला कोई इनाम नी मिलणा। 2 इस ताँई जालू तू दान करे, तां इदा दिखावा मत करदा, जियां डोंगी लोक यहदी

जंज घरे च कने गलियां च करदे न, ताकि लोक उना दी बडाई करन, मैं तुसां ने सच्च बोलदा है, कि उना जो लोकां ला अपना इनाम मिली गया है। 3 पर जालू तू दान करे, तां तेरा दान गुप्त हो जडा लोकां च कुसी जो भी पता ना चले। 4 ताकि तेरा दान गुप्त रे, कने तालू तेरा पिता परमेश्वरे जडा गुप्त च दिखदा है, उनी तिजो उदा इनाम देणा। 5 जालू तू प्रार्थना करे, तां कपटियां साँई मत करदा क्योंकि सै लोकां जो दसणे ताँई यहदी जंज घरे च कने सडकां दे मोडा पर खडोई करी प्रार्थना करदे न, सै इस ताँई करदे न ताकि लोक उना जो दीखन कने प्रशंसा करन। मैं तुसां ने सच्च बोलदा है, कि उना जो अपना इनाम मिली गया है। 6 पर जालू तू प्रार्थना करणा, तां अपने कमरे अंदर जा, कने दरबाजा बंद करिके अपने पिता परमेश्वरे ने प्रार्थना कर जिसयो कुनी नी दिखया है, तालू तेरे पिता परमेश्वरे जडा गुप्त च दिखदा है, उनी तिजो इदा इनाम देणा। 7 पर प्रार्थना करदे बेले होर जातियां साँई बेकार च बड़बडा मत करा, क्योंकि सै समझदे न कि उना दे बड़बडाणे ने परमेश्वरे उना दी सुणी लेणी है। 8 इस ताँई तुसां उना साँई मत बणा, क्योंकि तुहाडा पिता परमेश्वरे तुहाडे मंगणे ला पैहले ही जाणदा है, कि तुहाडियां क्या-क्या जुस्ततां न। 9 इस ताँई तुसां जो इस तरीके ने प्रार्थना करणा चाईदी की: है साडे पिता परमेश्वर, जडा तू स्वर्ग च है; तुहाडा ना पबित्र मनया जाये। 10 सारे माणुआं पर तू राज्य करे। जियां तेरी इच्छा स्वर्ग च पुरी होंदी है, तियां ही धरतिया च भी पूरी होऐ। 11 सांझो हर रोज सै खाना दे जडा सांझो उस दिने ताँई चाईदा है। 12 कने जियां असां अपने गुनागारां जो माफ कितया है, तियां ही तू भी साडे पापां जो माफ कर। 13 कने साडी परख ना ले, पर सांझो शैताने ला बचा। क्योंकि राज्य कने पराक्रम कने महिमा सदा तेरी है। आमीन। 14 इस ताँई अगर तुसां माणुआं दे गुनां जो माफ करगे जडे उना तुहाडे खिलाफ कितयो, तां तुहाडे स्वर्गीय पिता परमेश्वरे भी तुहाडे गुनां माफ करणे। 15 कने अगर तुसां माणुआं दे गुनां जो माफ नी करगे, तां तुहाडे पिता परमेश्वरे तुहाडे गुनां भी माफ नी करणे। 16 जालू तुसां बरत रखन, तां कपटियां साँई तुहाडे मुऐ पर उदासी नी होणा चाईदी क्योंकि सै अपना मु उदास बणाई रखदे न, ताकि लोकां जो पता लग्गे कि उना बरत रख्या है। मैं तुसां ने सच्च बोलदा है, कि उना जो अपना इनाम मिली गया है। 17 पर जालू तू बरत रखे तां अपने सिरे पर तेल मल कने मुऐ जो धोई ले। 18 ताकि लोकां जो नी, पर तेरे पिता परमेश्वरे जो पता लग्गे जिसयो कुनी नी दिखया है, उनी तिजो इदा इनाम देणा। 19 अपने ताँई धरतिया च धन दौलत मत गठेरा, जिथू कीडा कने भुथी खराब करदी है, कने जिथू चोर नजर रखदे न कने ताले तोडी करी चोरी लेई जांदे न। 20 पर भलाई करी के अपने ताँई स्वर्ग च धन दौलत गठेरा, जिथू ना तां कीडा लगदा है, ना भुथी खराब करदी है, कने जिथू ना कोई नजर रखदा कने ना कोई चोरदा है। 21 क्योंकि तेरा मन हमेशा ओथु लग्गी रेणा जिथू तेरी धन दौलत है। 22 हखी शरीर ताँई इक दिव्ये साँई न, इस ताँई अगर तेरियां हखी साफ न, तां तेरे सारे शरीर च भी लौ होंणी। 23 पर अगर तेरियां हखी बुरियां न, तां तेरा सारा शरीर भी नेहरे च होणा; इसा बजा ने जडी लौ तिजो च है, अगर सै नेहरा होऐ तां सै नेहरा कितणा जादा होणा! 24 कोई माणु इक ही बकते दो मालकां दी सेवा नी करी सकदा, क्योंकि उनी इकी ने

दुश्मनी कने दुरे ने प्यार रखणा, या इकी ने मिली के रेणा कने दुरे जो घटिया समझणा। तुसां परमेश्वर कने धन दौलत दोनो दी सेबा नी करी सकदे। 25 इस ताई मै तुसां ने बोलदा है, कि अपणी रोजे दी जिनंदगी जिणे ताई ऐ चिंता मत करदे असां क्या खांणा, कने क्या पिणा, कने ना अपने शरीर ताई कि क्या पेनणा, क्या अपने प्राण खाणे ला कने शरीर कपडे ला बदीकरी नी है? 26 अम्बरे दे पंछियां जो दिखा। सै ना कुछ रांदे न, ना बडदे न, ना खेतरां च बटोलदे न, तमी तुहाडा स्वर्गीय पिता परमेश्वर उना जो खुआंदा है। तुसां क्या इना पंछियां ला जादा कीमती नी न? 27 तुसां चे ऐसा कुण है, जडा चिंता करणे ने अपणिया जिनंदगिया च इक घडी भी बधाई सकदा है? 28 कने कपडयां ताई कजो चिंता करदे न? जंगली फुलां पासे ध्यान दिया, कि सै कियां बडुं दे न, सै ना तां मेहनत करदे न, कने ना ही कपडे बाणदे न। 29 तमी मै तुसां ने बोलदा है, कि जालू राजा सुलैमान बाल बडा भरी धन दौलत थी, तालू भी उनी उना चे कुसी साईं भी कपडे नी पायो थे। 30 इस ताई अगर परमेश्वर बणे दे घाए जो, जडा अज है, कने कल अग्गी च फुकया जांणा, तमी परमेश्वर घाए जो इतणी सुन्दरता दिन्दा है, तां हे अल्पविश्वासियों, तां उनी पक्का तुसां दी देखभाल करणी है, पर परमेश्वरे पर तुहाडा भरोसा इतणा घट कजो है? 31 इस ताई तुसां चिंता करिके ऐ मत बोलदे, कि असां क्या खांगे, या क्या पींगे, या क्या पेनेंगे? 32 क्योंकि होर जातियां इना सारियां चीजा दियां तोपा च रेंदियां न, कने तुहाडा स्वर्गीय पिता परमेश्वर जाणदा है, कि तुसां जो ऐ सारियां चिजा चाईदियां न, इना दी चिंता मत करा। 33 इस ताई पेहले तुसां परमेश्वरे दे राज्य कने धार्मिकता दी जिनंदगी जिणे दी कोशिश करा, तां तुसां जो ऐ सारियां चिजा मिली जाणियां। 34 इस ताई कल्ले ताई चिंता मत करा, क्योंकि कल दा दिन अपणी चिंता अपु करी लेंदा है; अज्जे ताई अज्जे दा दुख ही बतेहरा है।

7 दुजय्यो पर दोष मत ला, ताकि परमेश्वर तुहांजो पर भी कोई दोष ना लाये। 2 क्योंकि जियां तुसां कुसी पर दोष लांदे न, तियां ही परमेश्वरे तुहांजो पर भी दोष लगाणा; कने जियां तुसां दुजयां ने व्यवहार करदे न, तियां ही परमेश्वरे तुहाडे सोगी करणा। 3 तू कजो अपने विश्वासी भाईऐ दियां छोटियां-छोटियां गलतियां जो दिखदा है, जडियां उदिया हखी च पियो छोटे दे कखे साईं न, अगर तेरिया जिनंदगिया च मते पाप न, जडा तेरिया अपणी हखी च इक लठे साईं है, तां सै तिजो कनी नी मिलदा? 4 जालू तेरे अंदर ही मते पाप न, तां तू खुद ला घट पाप बाले कुसी भाईये दी मदद कियां करी सकदा है। 5 कपटियों, पेहले तां अपने आपे दे पापां जो सुधारी ले, तां तू अपने भाईये दिया हखी दे कखे जो ढंगे ने दिखीकरी कडी सकदा है, कने तां दुजयां जो उना दे छोटे पापां जो सुधारणे च मदद करी सकणा। 6 उना लोकां जो परमेश्वरे दा संदेश मत सुणा जडे बचना जो सुणना नी चांदे। अगर तुसां ऐसा करदे न, तां ऐ ऐसा होणा जियां पबित्र चिजां जो कुतयां अग्रे फेंकी देणा, या जियां सूअरां दे अग्रे हीर मोती फेंकणा, उना तां सै पैरां हेठ गेरेचणे कने फिरी करी तुसां पर ही हमला करणा। 7 तुसां जो जडा चाईदा सै परमेश्वरे ला मंगा कने उनी तुसां जो देणा; अगर तुसां तोपगे, तां तुसां जो मिलणा; अगर

खटखटांगे, तां तुहाडे ताई खुलणा। 8 क्योंकि जडा कोई मंगदा है, उसयो मिलदा है; जडा तोपदा है, उसयो मिलदा है; कने जडा दरबाजा खटखटांदा है, उदे ताई खोलया जाणा। 9 तुसां चे कोई भी ऐसा माणू नी है, जडा अपने पुत्रे दे रोटी मंगणे पर उसयो पथर दिन्दा है। 10 इयां ही अगर तुहाडा जागत तुसां ला खांणे जो मछी मंगे तां क्या तुसां उसयो जरिला सप्प दिन्दे न? 11 जालू तुसां बुरे होईकरी, अपने बचयां जो खरियाँ चिजा देणा जाणदे न, तां तुहाडे स्वर्गीय पिता परमेश्वरे अपने मंगणे बालयां जो खरियाँ चिजा कनी दिगा? 12 इसा बजा ने जडा कुछ तुसां चांदे न, कि माणू तुहाडे सोगी करे, तां तुसां तियां ही उना सोगी करा; क्योंकि मूसा दी व्यवस्था कने परमेश्वरे दा संदेश देणेबाले दी शिक्षा दा मतलब ऐई है। 13 तुसां सिर्फ सुंगडे फाटके ला परमेश्वरे दे राज्य अंदर जा, क्योंकि जडा फाटक चौडा कने असान रस्ता है, सै बरबादिया पासे लेई जांदा है; कने मते भरी लोक न जडे इस रस्ते ला जांदे न। 14 क्योंकि सुंगडा सै फाटक है, कने औरखा है सै रस्ता जडा अनन्त जिनंदगी बाल पुजांदा है, सै लोक थोडे ही न जिना जो ऐ रस्ता मिलदा है। 15 असां परमेश्वरे दे संदेश देणेबाले लोक न, ऐसा अपने आपे जो बोलणे बाले झूठे लोकां ला चौकने रिया। सै उना भेडियां साईं न जिना अपने आपे जो भेडा दियां खल्ली ने ढक्या है, लोकां जो यकीन दिलाणे ताई कि सै सच्ची च भेडां न, पर सै असल च भेडिये न जडे लोकां पर हमले करदे न। 16 उना दे कम्मा ने तुसां उना जो पछेणी लेणा है। लोक क्या झिल्लां ला अंगूर, या कंडे बाले झिल्लां ला अंजीर तोडदे न? 17 इयां ही इक खरा सख खरा फल दिन्दा है, कने बेकार सख बुरा फल दिन्दा है। 18 खरा सख बुरा फल नी देई सकदा, कने ना बेकार सख खरा फल देई सकदा है। 19 जडा-जडा सख खरा फल नी दिन्दा है, सै बडी देणा है, असां परमेश्वरे दे संदेश देणेबाले लोक न ऐसा अपने आपे जो बोलणे बाले झूठे लोकां जो ऐई सजा मिलणी है। 20 तुसां उना दे कम्मा ने जडे सै करदे न उना जो पछेणी लेणा है। 21 जडा मिजो ने, हे प्रभु, हे प्रभु बोलदा है, उना सारयां ही स्वर्गे दे राज्य च प्रवेश नी करणा है, सिर्फ उना ही जडे मेरे स्वर्गीया पिता परमेश्वरे दिया मरजिया पर चलदे न। 22 न्याये दे रोजे मतयां लोकां मिजो ने बोलणा; प्रभु जी, प्रभु जी, क्या असां तेरे नाए दी भविष्यवाणी नी कीती, कने तेरे नाए ने बुरियां आत्मा जो नी कडया, कने तेरे नाए ने कितणे ही चमत्कारी कम्म नी किते? 23 तालू मै उना ने खुली करी बोली देणा है, कि मै तां तुसां जो जाणदा ही नी, बुरे कम्म करणे बाले लोको, ऐयू ला चली जा। 24 इस ताई जडा कोई मेरियां गल्लां सुणीकरी उना जो मनदा है, सै उस अकला बाले माणुऐ साईं है, जिनी अपना घर चटान पर बणाया है। 25 कने अम्बर बरया कने बाढ आई, कने तूफान चलया, कने सै उस घरे ने टकराया, पर सै घर नी डेहा, क्योंकि उस दी नीव चटाना पर बणईयो थी। 26 पर जडा कोई मेरियां इना गल्लां जो सुणदा है, कने उना पर नी चलदा है, सै उस मुख माणुऐ साईं है जिनी अपना घर रेटा पर बणाया है। 27 कने अम्बर बरया, कने बाढ आई, तूफान चले, कने उस घरे ने टकराए कने सै घर डेई करी सारा भजी टूटी गया। 28 जालू यीशु ऐ गल्लां बोली बैठा, तां इयां होया कि सारी भीड उस दे उपदेशे ने हेरान होई। 29 क्योंकि सै

उना जो व्यवस्था जो सिखाणे बालयां सांई नी, पर अधिकारियां सांई उना जो उपदेश दिन्दा था।

8 जालू यीशु उस पाहडे ला थल्ले उतरया, तां इक बडी बडी भीड उदे पिच्छे चली पेई। **2** इकी कोढिये यीशुए बाल आई करी उसयो नमस्ते किते कने बोलया, “कि प्रभु जी अगर तू चाआं, तां मिंजो ठीक करी सकदा है।” **3** यीशुए हथ अग्रे करी के उसयो छुता, कने बोलया, “मै चांदा है कि तू ठीक होई जा” कने तालू ही उस कोढिये दा कोढ ठीक होई गया। **4** यीशुए उसयो बोलया, “दिख, कुसी ने कुछ मत बोलदा, पर जाई करी अपने आपे जो याजकां ने दस, कि तू खरा होईया कने परमेस्वरे जो भेंट चढा जिदे बारे च मूसा व्यवस्था च लिखया है, ताकि लोक जाणी सकन कि तू खरा होई गया।” **5** यीशु जालू कफरनहम शहर च आया तां इकी रोमी सुबेदारे उस बाल आई करी बिनती कीती, **6** “प्रभु जी, मेरे नोकरे जो लकवे दी बिमारी होई गियो है, कने सै हिली-जुली नी सकदा है, कने बड़ा दुखी है।” **7** यीशुए उसयो बोलया, “मै आई करी उसयो ठीक करगा।” **8** सुबेदारे जबाब दिता, कि प्रभु जी, मै इस लाइक नी है कि, कि तू मेरे घरे ओए, पर तू सिर्फ हुकम करी दे, तां ही मेरे नोकरे ठीक होई जाणा। **9** मै ऐ समझदा है क्योंकि मै भी अधिकारियां दे थल्ले कम्म करणे बाला माणु है। कने मेरे अधीन सपाई कम्म करदे न, कने जालू इकी सपाईए जो बोलदा है कि, तू जा, तां सै चली जांदा है; कने दुऐ जो बोलदा है कि, तू ऐथू आ, तां सै आई जांदा है; कने जालू मै अपने नोकरे जो बोलदा, कि ऐ कर, तां सै करी दिन्दा है। **10** ऐ सुणीकरी यीशुए हेरानी होई, कने जडे उदे पिच्छे ओआ दे थे उना ने बोलया, “मै तुसां ने सच्च बोलदा है, कि मै इस्राएल देशे च इक भी ऐसा माणु नी दिखया, जडा इस गैर-यहूदी माणुए सांई मिंजो पर भरोसा करदा है। **11** कने मै तुसां ने बोलदा है, कि मतयां होर जाति दे लोकां पूर्व कने पशचमें ला आई करी अब्राहम कने इसहाक कने याकूबे सोगी स्वर्ग राज्य दे भोज च शामिल होणा है। **12** पर इस्राएलियां जो बाहर नेहरे च पाई देणा है, ओथु उना रोणा कने दंद पीणे न।” **13** कने यीशुए सुबेदारे जो बोलया, “घरे जा, जदेया तेरा भरोसा है, तदेया ही तेरे तांई हो। कने उदा सेवक तालू ही ठीक होई गया।” **14** कने यीशु जालू पतरसे दे घरे पुज्जा, तां उनी उदिया ससु जो बिस्तरे च पिया दिखया कने उसा जो बुखार चढया था। **15** कने उनी उसा दा हथ छुता कने उसा दा बुखार उतरी गया, कने सै उठी करी उदी सेवा करणा लगी पेई। **16** कने जालू संज होई तालू सै यीशुए बाल मते सारे लोकां जो लेईकरी आये जिना च बुरियां आत्मा थियां, कने उनी उना आत्मा जो अपने बचने ने कडी दिता, कने सारे मरिजां जो ठीक करी दिता। **17** ताकि जडा बचन यशायाह परमेस्वरे दा संदेश देणेबाले बोलया था, सै पूरा हो: उनी अपु साडियां कमजोरियां लेई लियां, कने साडियां बिमारियां जो हटाई दिता। **18** यीशुए जालू अपने चारो पासे मती भरी भीड दिखीकरी, यीशुए अपने चेलयां जो बोलया, तां “ओआ असां गलील झीला दे पारले पासे चलदे।” **19** कने जियां ही सै जाणे जो तैयार होऐ, तां इकी व्यवस्था जो सिखाणे बाले उस बखे आई करी बोलया, “गुरु जी, मै तुहाडा चेला बणने तांई जिथू कुथी तू जांगा, मै भी तेरे पिच्छे-पिच्छे चली पोणा है।” **20** यीशुए उसयो बोलया,

“लोमडियां जो रेहणे तांई कुडी न, कने अम्बरे दे पछियां दे आले होंदे न; पर मिंजो, माणुए दे पुत्रे बाल इक भी घर नहीं है, जिथू मै सोई सकें।” **21** इक होर चले उसने बोलया, “प्रभु जी, मिंजो पेहले घर बापस जाणा दे। मेरे पिता दे मरणे बाद, मै उसयो दफनाणा, कने तां फिरी मै आई करी तेरा चेला बणगा।” **22** यीशुए उसयो बोलया, “मेरा चेला बणने तांई मेरे पिच्छे आई जा; कने जडे लोक आत्मिक स्ते ने मरयो न, उना जो मुर्दयां जो दफनाणा दे।” **23** जालू सै किस्तिआ पर चढया, तां उदे चले उदे पिच्छे चली आए। **24** कने इकदम झीला च तूफान चलणा लगी पिया कने किस्ति लैहरां ने डूबणा लगी पेई, कने यीशु सुतया था। **25** तालू चेलयां बखे आई करी उसयो जगाया, कने बोलया, “प्रभु जी, सांझो बचाई ले, असां डूबी करी मरणे बाले न।” **26** यीशुए उना जो बोलया, “हे अल्पविश्वासियों, कजो डरा दे न?” तालू उनी उठी करी पाणिऐ कने तुफाने जो झिडकया, कने सब कुछ शान्त होई गया। **27** कने सै सारे हेरान होए कने बोलणा लग्गे, “कि ऐ कदिया माणु है? ऐथू दीकर कि तुफान कने लैहरां भी इदा हुकम मंदे न।” **28** जालू सै उस पार गदरेनियों जगा च पुज्जे, तां उसयो दो माणु मिल्ले जिना च बुरियां आत्मा थियां, सै कब्रिस्तान ला निकलदे बेले यीशुए मिल्ले, सै आत्मा बडियां खतरनाख थियां, कि कोई भी उस रस्ते ला नी जाई सकदा था। **29** कने दिखा, उना जोरे ने बोलया, “परमेस्वरे दे पुत्र, साडा तिजो ने क्या कम्म है? तू क्या बकते ला पेहले ही सांझो दुख देणा आया है?” **30** उना ला थोड़ी दूर इक सूअरां दा झुण्ड चुग्गा दा था। **31** बुरियां आत्मा उसने ऐ बोली करी बिनती कीती, अगर तू सांझो कडणा है, तां इना सूअरां बिच भेजी दे। **32** यीशुए उना जो बोलया, “जा!” सै निकली करी सूअरां च चली गियां, कने सारे सूअर भेठी ला रीडकी करी पाणिऐ च जाई पे कने डूबी करी मरी गे। **33** उना दे रखबाले नटी करी शहर च ऐ खबर सुणाई, कने जीना च बुरियां आत्मा थियां उना दे बारे च भी दसया। **34** तालू जडे लोक दिखणा आयो थे, सै यीशुए ने बिनती करिके बोलणा लग्गे, कि साडे इलाके ला चली जा।

9 फिरी सै किस्तिआ पर चढी करी पारले पासे गिया, कने अपने शहर कफरनहम जो आया। **2** कने कुछ लोक इकी धरंगे दे मरीजे जो मंझे पर रखीकरी उस दे बाल लेई आये। यीशुए उना दा भरोसा दिखीकरी, उस लकवे दे मरिजे ने बोलया, “हे पुत्र, हौसला रख; तेरे पाप माफ होइ गे।” **3** कने, इसा गल्ला पर केई व्यवस्था जो सिखाणे बालयां ऐ सोचया, कि ऐ तां परमेस्वरे दी निंदा करा दा है। **4** यीशुए उना दे मने दी गल्ल जाणी करी बोलया, “तुसां अपने-अपने मने च बुरा बिचार कजो करा दे न?” **5** असान क्या है, ऐ बोलणा कि, तेरे पाप माफ होये, या ऐ बोलणा कि उठ कने चल फिर। **6** पर इस तांई कि तुसां जाणी सकन कि मिंजो माणुए दे पुत्रे जो धरतिया पर पाप माफ करणे दा हक है। तालू उनी धरंगे दे मरीजे जो बोलया: उठ, कने अपने मंझे जो चुक, कने अपने घरे जो चली जा। **7** कने सै उठी करी अपने घरे जो चली गिया। **8** लोक ऐ दिखीकरी हेरान होई गे कने परमेस्वरे दी महिमा करणा लग्गे, जिनी आदमियां जो ऐदिया हक दितया है। **9** ओथु ला अग्रे जाई करी यीशुए मती नापे दे इक माणुए जो कर लेणे दिया चौकिया पर बैठयो दिखया, कने उसयो बोलया, “मेरे चेले बणा।” सै उठी करी उस दे

पिच्छे चली पिया। 10 कने जालू यीशु घरे रोटियां खांणा बैठा, तां मते चुंगी लेणेबाले कने पापी आई करी उस दे चेलयां सोगी रोटि खांणा बैठे। 11 ऐ दिखीकरी फरीसियां उदे चेलयां ने बोलया, “तुहाडा गुरू चुंगी लेणे बाले कने पापियां सोगी कजो खांदा है?” 12 जालू यीशुऐ ऐ सुणया तां उना जो बोलया, “जडे लोक खरे न उना जो वेधे दी जरूरत नी होंदी है, पर जडे बिमार न उना जो है। 13 इस ताई तुसां जाई करी इदा मतलब सीखी लिया, कि मैं बलिदान नी पर दया चांदा है; क्योंकि मैं धर्मियां जो नी पर पापियां जो सदणा आया है।” 14 तालू यहूना दे चेलयां उस बाल आई करी बोलया, “क्या बजा है कि असां कने फरीसी बरत रखदे न, पर तैरे चेले तां बरत नी रखदे?” 15 यीशुऐ उना ने बोलया, “क्या बराती, जालू दीकर लाडा उना सोगी है, दुखी होई सकदे न? पर सै दिन ओणे ने जालू लाडे उना ला बख कितया जाणा, उस बेले उना बरत रखणा। 16 लोक नोऐ कपडे दा रफु पराणे कपडयां च कोई नी लांदा है, नी तां उनी रफुये धोणे ने सुकडी जाणा, कने पुराणा कपडा होर जादा फटी जाणा। 17 नोऐ अंगरा दे रसे जो पराणिआ खलडिया च कोई नी भरदा है नी तां नोआ अंगूर रस खलडिया जो फाडी दिन्दा है, कने अंगूरा दा रस निकली जांदा ऐ, ताई तां नोआ अंगूर रस नोईयां खलडिया च भरदे न।” 18 सै उना ने ऐ गल्लां बोला दा ही था, इकी यहूदी जंज घर दे सरदारे आई करी उसयो नमस्ते किते कने बोलया, “मेरी कुडी हूणी मरी है, पर ओथु आई करी उसा पर हथ रख, तां उना जिंदिया होई जाणा।” 19 यीशु उठी करी अपने चेलयां समेत उदे पिच्छे चली पिया। 20 कने इक जनानी थी जिसा जो बाहरां सालां ला खून निकलने दी बिमारी थी, उना पिच्छे ला आई करी यीशुऐ दे कपडयां जो छुई लिया। 21 क्योंकि सै अपने मने च बोला दी थी कि, अगर मैं उस दे कपडे जो छुई लेंगी तां मैं ठीक होई जांणा। 22 यीशुऐ फिरी करी उसा जो दिखया कने बोलया, “पुत्री हौंसला रख; तेरा भरोसा जडा मिजों पर था उनी भरोसे तिजो खरा कितया है।” कने सै जनानी उसी बेले ठीक होई गई। 23 यीशु जालू उस सरदारे दे घरे पुज्जा, कने बंसरी बजाणे बाले कने भिडा जो रोंदे दिखया, 24 तालू बोलया, “हटी जा, कुडी मरियो नी है, पर सुतियो है”, इसा गल्ला पर सारे हंसणा लग्ये। 25 पर जालू भीड कडी दिती, तां उनी अंदर जाई करी कुडिया दा हथ पकडया, कने सै जिन्दी होई पेई। 26 कने इसा गल्ला दी चर्चा सारे देशे च फेली गई। 27 जालू यीशु ओथु ला थोडा अग्ये गया, तां दो अन्ने उदे पिच्छे ऐ बोलदे आये, कि हे दाऊदे दे बंशज, सांझो पर दया कर। 28 जालू सै घरे च पुज्जा, तां सै अन्ने उस बाल आये, कने यीशुऐ उना जो बोलया, “क्या तुहांजो भरोसा है कि मैं ऐ करी सकदा है?” उना उसने बोलया, “हां प्रभु।” 29 तालू यीशुऐ उना दियां हखी जो छुई करी बोलया, “तुहाडे भरोसे दे अनुसार तुहाडे ताई होई जा।” 30 कने उना जो मिलणा लग्यी पिया, कने यीशुऐ उना जो समझाई करी बोलया, “ध्यान रे, तुसां कुस्यो भी मत दसदे, कि मैं तुहाडे ताई क्या कितया है।” 31 पर उना निकली करी सारे देशे च उदी खबर फैलाई दिता। 32 जालू सै दो अन्ने माणू बाहर जा दे थे, तां कुछ लोक इकी माणुये जो यीशुऐ बाल लेई आये कने सै बोली नी सकदा था, क्योंकि उदे च बुरी आत्मा थी। 33 जालू यीशुऐ बुरिया आत्मा जो उस माणुये ला कडी दिता, तां सै बोलणा लग्यी

पिया। कने भीड हेरान होई गई कने बोलणा लग्यी, कि इस्राएल देशे च ऐसा कदी नी दिखया। 34 पर फरीसियां बोलया, बुरियां आत्मा दा सरदार उसयो शक्ति दिन्दा है कने बुरियां आत्मा जो कडदा है। 35 यीशु कने उदे चेले गलील प्रदेश दे केई शहरां कने गां च होईकरी गे, कने यीशु यहूदी जंज घरां च उपदेश दिन्दा, कने परमेश्वरे दे राज्य दा शुभसमाचार प्रचार करदा, कने हर तरा दियां बिमारियां कने कमजोरियां जो ठीक करदा गया। 36 यीशु किस्तिआ ला उतरया कने उनी मती भरी भीड दिखी, कने उसयो उना पर तरस आया, क्योंकि उना दा कोई अगुवा नी था जडा उना दी रखबाली करी सके, जियां भेडां बिना ग्वाले होंदियां न, सै बेचेन कने भटकयो होयो थे। 37 तालू उनी अपने चेलयां ने बोलया, “जियां खेतरां च मती फसल होंदी है, तियां ही मते भरी लोक न जडे परमेश्वरे दा संदेश सुणने ताई तैयार न, पर परमेश्वरे दे राज्य दे बारे च दसणे ताई लोक घट न। 38 इस ताई फसला दे मालिके ने प्राथना करा कि सै फसला ताई होर मजदूर भेजे।”

10 फिरी उनी अपने बाहरां चेलयां जो अपने बाल सदया, कने उना जो बुरियां आत्मा पर हक दिता, कि उना जो कडन कने हर तरा दियां बिमारियां कने, हर तरा दियां कमजोरियां जो दूर करन। 2 इना बाहरां प्रेरितां दे ना ऐ न: पेहला शमौन, जिसयो पतरस बोलदे न, कने उदा भाई अन्धियास; जब्दी दा पुत्र याकूब, कने उदा भाई यहून्ना; 3 फिलिप्पुस कने बरतुल्लै, थोमा, कने चुंगी लेणे बाला मती, हलफई दा पुत्र याकूब कने तै। 4 शमौन कनानी, कने यहूदा इस्करियोती, जिनी यीशुऐ जो पकड़ाई भी दिता। 5 इना बाहरां चेलयां जो यीशुऐ ऐ हुकम देईकरी भेजया, “कि होर जातियां बाल मत जांदे, कने सामरियां दे कुसी भी शहरे दे अंदर मत जांदे। 6 इस्राएले दे लोकां बाल जा, जडे परमेश्वरे ला दूर होई गियो न, जियां भेडां गवाची करी अपने रखबाले ला दूर चली जांदियां न। 7 कने चलदे-चलदे ऐ प्रचार करा कि, स्वर्ग दा राज्य नेडे आई रिया है। 8 बिमारां जो ठीक करा: मरयां जो जिन्दा करा, कने कोठियां जो शुद्ध करा: बुरियां आत्मा जो निकाला: तुसां लोकां दी मदद करणे दा कुछ भी मत लेंदे, क्योंकि परमेश्वर भी तुहाडी मदद करणे दा कुछ नी लेंदा है। 9 कने अपने थेलयां च सोना, चांदी, कने तांबे दे सिक्के मत गठेरदे। 10 रस्ते ताई ना कोई थेली रखा, ना दो कुरते, ना जुते, ना सोठी लेणी, क्योंकि मजदूर जो खाणा कने रेणे दी जगा मिलणी चाईदी। 11 जिस कुसी शहरे या गांऐ जांगे तां ओथु पता करा कि कुण काबील माणू है कने जालू दीकर गांऐ ला नी निकलगे, तालू दीकर उदे घरे ही रिया। 12 घरे अंदर जांदे बेले उस घरे जो आशीष दिनयो। 13 अगर उस घरे दे लोक काबील होंगे, तां तुहाडी शांति उना बाल पूजणी, पर अगर सै तुहाडा स्वागत नी करगे तां तुहाडी शांति तुहाडे बाल बापस आई जांणी। 14 जिसा जगा दे लोक तुहांजो अपनांगे नी कने तुहाडे उपदेश नी सुणगे, ओथु ला जांदे बेले अपने पैरां दी धुड जाडी दिनयो, इयां करणे ने तुसां उना जो चेताबनी दिन्दे न कि, परमेश्वरे तुसां जो सजा देणी क्योंकि तुसां उपदेश नी मनया। 15 मैं तुसां ने सच्च बोलदा है, कि न्याय बाले रोजे सै शहरे जिथु दे लोक परमेश्वर दा बचन नी मंदे, उना दी हालत सदोम कने अमोरा शहरां दे लोकां दी हालत ला भी जादा भयानक होणी है।” 16 दिखा, मैं तुहांजो भेडां सांई भेडियां बिच भेजदा

है। तूसां सप्पां सांई चलाक बणा, कने कबुतरां सांई भोले बणा। 17 “पर तूसां लोकां ला हमेशा चौकने रेणा। क्योंकि लोकां तूहांजो कैदी बणाना कने यहदी जंज घरे च पेश करणा कने तूहांजो कोडे मारणे, कने मेरिया बजा ने तूहांजो हाकिमा कने राजयां दे सामणे न्याय तांई महासभा च पेश करणा। 18 तूसां मेरे तांई हाकिमा कने राजयां दे सामणे उना पर, कने होर जातियां पर गबाह बणने तांई पेश किते जाणे न। 19 जालू सै तूहांजो पकडागें तां चिंता मत करदे, कि असां कियां; कने क्या बोलणा है: क्योंकि जडा कुछ तूसां बोलणा है सै तूहांजो उसी बेले पता लग्गी जाणा। 20 क्योंकि बोलणे बाले तूसां नी न, पर तूहाडे पिता परमेस्वरे दी पबित्र आत्मा तूसां च बोलदी है। 21 उसी बेले, जडे लोक मिजों पर भरोसा नी करदे न, उना अपने भाईयां जो अधिकारियां दे हथे मारणे तांई देई देणा, क्योंकि सै मिंजो पर भरोसा करदे न। पिता अपने बचयां सोगी इयां ही करणा है कने बचयां माता-पिता दे खिलाफ होईकरी उना जो मारी देणा है। 22 क्योंकि तूसां मेरे चेले न उदिया बजा ने सारे लोकां तूसां ने बैर करणा है, पर जडा आखरी दीकर सबर रखगा उदा ही उद्धार होणा। 23 जालू सै तूहांजो इकी शेहरे च तंग करगे, तां तूसां दुऐ शेहरे जो चली जानयो। मैं तूसां ने सच्च बोलदा है, तूहाडी इसाएले देशे दे इकी शेहरे ला दुज्जे शेहरे दी यात्रा पूरी भी नी होणी है, कने मैं, माणुए दे पुत्रे आई जाणा है। 24 चेला अपने गुप्ते ला, कने नौकर अपने मालिके ला बडा नी होंदा है। 25 काफी है कि चेले दा गुप्ते दे बराबर, कने नौकरे दा मालिके दे बराबर होणा; अगर सै मिंजो घरे दे मालिके जो शैतान बोलदे न, तां उना मेरे घरे दे लोकां जो कितणे बुरे ना ने बोलणा है। 26 पर उना लोकां ला मत डरदे जडे तूसां जो धमकांदे न, क्योंकि सै बकत ओणे बाला है जालू जडा कुछ भी ढक्या है, सै खोलया जाणा है; कने सै सारा कुछ जडा छुपया है, सै लोकां दे सामणे ओणा है। 27 जडा कुछ मै तूसां ने नेहरे च बोलदा है, उसयो चेले सारे सामणे बिना कुसी डरे दे बोली सकदे न, कने जडा तूसां बल्ले-बल्ले सुणदे न, उसयो छती पर चढी करी प्रचार करा। 28 सै जडे शरीर जो मारी सकदे न, पर सै आत्मा जो नी मारी सकदे न, उना ला डरदे मत, पर परमेस्वर ला डरा, जडा आत्मा कने शरीर दोनो जो नरके च मारी सकदा है। (Geenna g1067) 29 क्या बडी घट कीमता च दो चिडियाँ नी बिकदियां? तमी तूहाडे पिता परमेस्वरे दिया मरजिया बिना उना चे इक भी मरी करी धरतिया पर नी पेई सकदी। 30 परमेस्वर तूहाडी जिन्दगिया दी हर गल्ला दी परवाह करदा है। सै ऐ भी जाणदा है कि तूहाडे सिरे पर कितणे बाल न। 31 इस तांई डरा मत, क्योंकि तूसां चिडियाँ ला भी जादा किमती न। 32 जडा कोई लोकां दे सामणे मिंजो परमेस्वर मन्नी लेंगा, उसयो मै भी अपने स्वर्गीय पिता दे सामणे अपने चेले मन्नी लेंगा। 33 पर अगर सै दूजयां दे सामणे ऐ बोलणे ला डरदे न, कि असां यीशुए दे चेले न, तां मै अपने पिता परमेस्वरे जो जडा स्वर्ग च, दसी देणा कि, सै मेरे चेले न। 34 ऐ मत सोचा कि मैं धरतिया पर लोकां बिच शांती लोणे तांई आया है; मैं तां लोकां च लड़ाई करवाणा आया है।” 35 मै तां इस तांई आया है, ताकि माणुए जो उस दे पिता परमेस्वरे ला, कने कुडिया जो उसा दिया माता ला, कने नुंआ जो उसा दिया ससु दे खिलाफ भडकाणा है। 36 माणुए दे दुश्मन उस दे घरे दे ही लोक होणे न। 37 जडा अपने माता पिता जो

मिंजो ला जादा प्यार करदा है, सै मेरा चेला बणने दे लायक नी है, कने जडा कुडिया या जागते जो मिंजो ला जादा प्यारा करदा है, सै भी मेरा चेला बणने लायक नी। 38 जडा मेरिया बजा ने दुख सेहन कने मरणे तांई तैयार नी है, सै मेरा चेला बणने दे लायक नी है। 39 कोई माणु ऐसा नी करगा कने अपने प्राणा जो बचाणा चांहगा, उनी परमेस्वरे सोगी आत्मिक जिन्दगी जिणे दा मोका गबाई देणा है। पर जडा माणु मिजों पर भरोसा करगा कने मेरे शुभसमाचार दिया बजा ने मरगा उस माणुए जो परमेस्वरे सोगी सदा तांई दी जिन्दगी मिलणी। 40 जडा तूहांजो अपनांदा है, सै मिंजो भी अपनांदा है; कने जडा मिंजो अपनांदा है, सै मेरे भेजणे बालयां जो अपनांदा है। 41 जडा परमेस्वरे दा संदेश देणेबालयां जो परमेस्वरे दा संदेश देणेबाला समझीकरी अपनाए, उसयो परमेस्वरे दा संदेश देणेबालयां सांई इनाम मिलणा; कने जडा धर्मी माणुए जो धर्मी माणु समझीकरी अपनाए, उसयो धर्मिये सांई इनाम मिलणा है। 42 जडा कोई इना लोकर्यां चे इकी जो भी मेरा चेला समझीकरी सिर्फ इक कटोरा ठंडे पाणिऐ दा पिया, उसयो पक्का ही इनाम मिलणा है।

11 जालू यीशु अपने बाहरां चेलयां जो हुकम देई बेठा, तां सै उना दे गलील जिले दे नगरां च उपदेश कने प्रचार करणे तांई ओथु ला चली गया। 2 यूहन्ने जेला च मसीह दे कम्मा दी खबर सुणीकरी, अपने चेलयां जो उसला ऐ पछणे जो भेजया। 3 “क्या तू ही मसीह है जिसयो भेजणे दा बायदा परमेस्वरे कितया था, या असां कुसी दुजे दी नियाल रखन?” 4 यीशुए जबाब दिता, “जडा कुछ तूसां दिखदे कने सुणदे न, सै सारा कुछ जाई करी यूहन्ना ने बोली दिया। 5 कि अन्नयां जो मिलदा है, कने लंगडे चलदे न, कोढियां दा कोढ ठीक होआ दा, कने टोंणे सुणदे न, मुर्दे जिंदे किते जांदे न, कने गरीबां जो शुभसमाचार सुणाया जांदा है। 6 कने धन्य न सै, जडे मिंजो पर शक नी करदे।” 7 यूहन्ना दे चेले जालू ओथु ला चली गे, तां यीशु यूहन्ना दे बारे च लोकां जो बोलणा लग्गा, “तूसां सुनसान जगा च क्या दिखणा गियो थे? क्या होआ ने हिलदे होऐ सरकंडे जो? इदा मतलब ऐ है कि जडा बडी असांनी ने अपने बिचार बदली दे, सै ऐसा माणु है जडा डरदा है कि दुज्जे लोक उदे बारे च क्या सोचगे कने बोलगे। 8 तां फिरी तूसां क्या दिखणा गियो थे? क्या इक माणुये जो जिनी बडे मेहगे कपडे पायो थे? दिखा जडे लोक मेगे कपडे पांदे न सै मेहलां च रेंदे न। 9 तां फिरी कजो गियो थे? कि क्या कुसी परमेस्वरे दा संदेश देणेबाले जो दिखणे तांई? हों, मै तूसां ने बोलदा है, कि परमेस्वरे ला भी बड़े जो? 10 यूहन्ना सेई माणु है जिंदे बारे च पबित्र शास्त्र च दसया, कि दिख, मै अपने संदेश देणेबाले दूते जो तेरे अग्रे भेजदा है, जिनी तेरे ओणे तांई लोकां जो तैयार करणा है। 11 मै तूसां ने सच्च बोलदा है, कि जडे लोक जनानिया ला पैदा होयो न, उना चे यूहन्ना बपतिस्मा देणेबाले ला बडा कोई नी होया; पर स्वर्ग दे राज्य च जडा सारयां ला छोटा है, सै उसला बडा है। 12 जालू ला यूहन्ना बपतिस्मा देणेबाले प्रचार करणा शुरू कितया है, उस बकते ला लोईकरी हुणे दीकर स्वर्ग दा राज्य जबरदस्ती ने अग्रे बदा दा है, कने हिसक लोक उस हमला करा दे न। 13 क्योंकि सारे परमेस्वरे दा संदेश देणेबालयां दियां कताबां च कने मूसा दिया व्यवस्था च यूहन्ना बपतिस्मा देणेबाले दे ओणे दीकर परमेस्वर दे राज्य दे बारे च लिखया है। 14 कने तूसां मेरी गल्ल मनणा

चांदे न, कि एलिय्याह जिदे ओणे दी भविष्यवाणी कितियो थी, सै एलिय्याह ही है। 15 जिस बाल सुणने दा मन हो, सै ध्यान देईकरी इना गल्लां जो सुणे, कने समझी ले।” 16 मै इस युगे दे लोकां दी तुलना कुसने दे? सै उना जागतां सांई न, जडे बजारां च बेईकरी इकी दुजे जो पुकारी करी बोलदे न। 17 “कि असां तुहाड़े तांई खुशिया दे गाणे गाए, कने तुसां नचे नी; असां शोक दे गीत भी गाए, फिरी भी तुसां रोए नी।” 18 क्योंकि यहून्ना बार-बार बरत रखदा कने ना शराब पिन्दा था, कने सै बोलदे न कि उदे च बुरी आत्मा है। 19 पर मै माणुए दा पुत्र खांदा पिंदा है, कने सै बोलदे न, “कि पेटू कने शराबी माणु है, कने चुंगी लेंगे बाले कने पापियां दा मित्र है। पर इक माणुए दे कम्मा ए साबित करणा कि अकला बाला कुण है।” 20 तालू यीशुए उना शेहरां च रेणेबाले लोकां जो फटकार लगाई, जिथू उनी बडे भरी चमत्कार दे कम्म कितयो थे; क्योंकि उना अपने पापां दा पञ्चाताप नी कितया था। 21 हाय, खुराजीन शेहर दे कने बैतसैदा शेहर दे लोको! जडे चमत्कारी कम्म तुहाड़े शेहर च कितयो न, अगर सै कम्म सूर कने सैदा च कितयो होंदे, तां ओथु दे लोक बडे पेहले टाट ओढी लेंदे, कने धुड अपने उपर छिड़की लेंदे ए दसणे तांई कि उना अपने पापां ला पञ्चाताप करी लिया है। 22 पर मै तुसां ने बोलदा है; कि न्याय दे रोज जड़ी सजा सूर कने सैदा जो देणी है, सै सजा तुहाड़िया सजा ला बडी घट होणी है। 23 हे कफरनहम शेहरे दे लोको, तुसां क्या स्वर्ग दीकर उच्चे करणे न? तुसां तां पताले दीकर थले करणे न; जडे अनोखे कम्म तुहाड़े च कितयो न, अगर सै सदोम शेहर च होंदे, तां उनी अजे दीकर बणी रेणा था। (Hadēs g86) 24 पर मै तुसां ने बोलदा है; कि न्याय दे रोज जड़ी सजा सदोम शेहरे दे लोकां जो देणी है, सै सजा तुहाड़िया सजा ला बडी घट होंणी है। 25 तिस्सी बेले यीशुए बोलया, “हे पिता, स्वर्ग कने धरतिया दे प्रभु, मै तेरा धन्यावाद करदा है, तू इना गल्लां जो ज्ञानियां कने समझदारां लोकां ला लुकाई रखया, कने लोक बचयां सांई न उना पर प्रगट किता है। 26 हाँ, पिता जी, क्योंकि तिजे ए ही ठीक लग्गा।” 27 मेरे पिते मिजो सब कुछ दितया है, कने पिता दे बिना कोई पुत्रे जो नी जाणदा है, कने ना ही कोई पिता जो जाणदा है सिर्फ पुत्र ही है जडा पिता जो जाणदा है। कने जिना लोकां जो पुत्र चुणदा है उना लोकां ही पिता जो जाणना है। 28 “सारे मेहनत करणे बालयो कने भोज हेठ दबूयो लोको, मेरे बाल ओआ; मै तुहांजो अराम देणा। 29 मेरा जुआ अपने उपर चुकी लिया; कने मिजो ला सिखा; क्योंकि मै मने ला नरम कने दयालु है; कने तुसां जो अपने मने च अराम मिलणा। 30 क्योंकि जडा करणे दा हुकम मै तुहांजो दिन्दा है, सै करणा मुशकिल नी है।”

12 उस बेले यीशु सन्ते दे रोजे खेतारां चे होईकरी चलया था, कने उस दे चेलयां जो भूख लग्गी, कने सै बेलां तोड़ी-तोड़ी करी खाणां लग्गी पे। 2 फरीसियां ए दिखीकरी उसयो बोलया, “दिख, तेरे चले सै कम्म करा दे न, जडा सन्ते दे रोज करणा ठीक नी।” 3 यीशुए उना जो बोलया, “क्या तुसां परमेश्वरे दे बचन च कदी नी पढया, कि राजा दाऊदे तालू क्या किता, जालू उसयो कने उस दे मित्रां जो भूख लग्गी थी? 4 सै कियां परमेश्वरे दे घरे च गया, कने परमेश्वर जो चढाईयां रोटियां खादियां, जिना जो खाणां ना उस तांई कने ना उदे मित्रां तांई व्यवस्था दे अनुसार ठीक था, पर सिर्फ याजकां

तांई ठीक था? 5 या क्या तुसां मूसा दी व्यवस्था च नी पडया है, कि याजक सन्ते दे रोज मंदरे च सन्ते दे रोजे दिया विधिया जो तोड़ने पर भी निर्दोष होंदे न?” 6 पर मै तुसां जो बोलदा है, इदा मतलब है, कि मै तुहाड़े बाल आया है कने मै मंदरे ला भी जादा बहुमूल्य है। 7 अगर तुसां जाणदे न कि पबित्र शास्त्र च इना अखरां दा मतलब क्या है, मेरे तांई बलियां चढाणे दी बजाए, तुसां दुजयां तांई दयालु बना कने मेरे इना निर्दोष चेलयां दी निंदा नी करदे। 8 “मै माणुए दा पुत्र ए बोलणे दा हक रखदा है, कि लोकां जो सन्ते बाले रोजे जो क्या करणे दी अनुमति है।” 9 ओथु ला चलीकरी करी सै यहूदी जंज घर च आया। 10 ओथु इक माणु था जिदा इक हथ सुक्की कने बेकार होई गया था, कने फरीसियां यीशुए पर दोष लाणे तांई उसला पुछया, कि क्या सन्ते दे रोज चंगा करणा ठीक गल्ल है? 11 यीशुए उना जो बोलया, “मन्नी लिया कि तुसां चे कुसकी दी इक ही भेड है। कने सै सन्ते दे रोजे खुडे च पेई जा, कने सै उसा जो पकड़ी करी खुडे ला नी कडे? 12 भला, माणुए दी कीमत भेडां ला कितणी जादा बदीकरी है। इस तांई सन्ते दे रोजे लोकां जो खरा करणा ठीक गल्ल।” 13 कने यीशुए उस माणुए जो बोलया, “अपणा हथ कर रूआं।” उनी अपना हथ किता, कने उदा हथ दुए हथे सांई ठीक होई गया। 14 तालू फरीसी झट बाहर आई करी कुछ लोकां कने मिलिकरी यीशुए दे खिलाफ सलाह करणा लग्गे, कि उसयो कियां मारणा है। 15 ए जे जांणी करी यीशु ओथु ला चली गया। कने मते सारे लोक उदे पिच्छे चली पै, कने उनी सारयां जो ठीक किता। 16 कने यीशुए चेतावनी देईकरी उना जो हुकम दिता, “कि मेरे बारे च कुसी ने भी मत दसदे कि मै परमेश्वर दा पुत्र है।” 17 ताकि जडा बचन यशयाह परमेश्वरे दा संदेश देणेबाले बोलया था सै पूरा हो: 18 “दिखा, ए मेरा सेवक है, जिसयो मै चूंया है, मेरा प्यारा, जिसते मेरा मन खुश है, मै अपनी आत्मा उस पर पांणी है, कने उनी होरनी जातियां जो न्याय दा संदेश देणा। 19 ना उनी कोई लड़ाई करणी, कने ना उनी कोई हल्ला पाणा, कने ना ही सै लोकां बिच घमंडी सांई जौरे ने कोई भाषण नी देणा। 20 उनी कुसदा भी नुकसान नी करणा जडा भजयो टुटयो सरकंडे सांई कमजोर न, कने जिसयो भी कोई समस्या है सै सुलगती बतिया सांई न, उनी इसा जो कोई नुकसान नी करणा, पर उनी पक्का करणा कि न्याय किता जाए। 21 कने होरनी जातियां उदे नाए पर आस रखणी है।” 22 तालू लोक इक अन्ने कने गूगे जो जिदे च बुरी आत्मा थी, उसयो उदे बाल लेई आये, कने उनी उसयो ठीक किता कने सै गूंगा बोलणा कने उसयो मिलणा लग्गी पिया। 23 इसा गल्ला पर सारे लोक हेरान होए, कने बोलणा लग्गे, “क्या ए माणु मसीहा होई सकदा है, जडा राजा दाऊदे दे बंशे ला है, जिसयो असां नियाला दे न।” 24 पर फरीसियां ए गल्ल सुणीकरी बोलया, ए तां बुरियां आत्मा दे सरदार शैताने दिया सहायता लेईकरी बुरियां आत्मा जो कडदा है। 25 उनी उना दे मने दी गल्ल सुणीकरी उना ने बोलया, “अगर कुसी राज्य च लोक अपु च ही लडदे रेंगे तां सै राज्य बडे बकते तक नी टिकी सकदा है। कने अगर कुसी घरे दे माणु अपु च ही लडी पोंगे तां सै घर नी बणी सकदा।” 26 अगर शैतान ही शैताने जो कहे, तां उनी अपना ही बैरी होई जाणा, तां उनी अपना ही नाश करी लेणा है, तां फिरी उस दा राज्य कियां बदी सकदा है, 27 अगर

मैं शैताने दिया मददा ने बुरियां आत्मा जो कडदा है, तां तुहाडे चेले कुसदिया मददा ने बुरियाँ आत्मा जो कडदे न? इस ताई उना ही तुहाडा न्याय करणा है। 28 पर अगर मैं परमेश्वरे दिया आत्मा दिया सहायता ने बुरियां आत्मा जो कडदा है, तां परमेश्वरे दा राज्य तुहाडे बाल आई पुज्जा है। 29 जालू दीकर तुसां जौरे बाले माणुए जो नी बनगे, तां तुसां उदे घरे च नी बडी सकदे कने उदियां चीजां जो नी चोरी सकदे न। 30 “जडा मेरे सोगी नी है, सै मेरे खिलाफ है, कने जडा मेरे सोगी नी बटोलदा है, सै खलारदा है। 31 इस ताई तां मैं तुसां ने बोलदा है, कि माणुए दी ओलादी दे सारे पाप कने निंदा जडा सै परमेश्वर या कुसी दे खिलाफ करदे न, परमेश्वरे उना दे पाप माफ करी देणे न, पर जडा कोई पबित्र आत्मा दे खिलाफ निंदा करगा, तां सै परमेश्वरे कदी भी माफ नी करणा है। 32 पर जडा कोई माणुए दे पुजे दे बारे च कोई बुरी गल्ल बोलगा, उदा ऐ अपराध माफ होई जाणा, पर जडा कोई पबित्र आत्मा दे बारे च बुरा बोलगा, उदी ऐ गलती ना तां इस लोक च ना ही ओणे बाले युग च माफ होणी।” (aiōn g165) 33 “अगर सख खरा है, तां उदे फले जो भी खरा होणा, अगर सख बेकार है, तां उदे फल भी बेकार होणे न, क्योंकि सख फले ने ही पछेणया जांदा है।” 34 “तुसां जहरीले सपां दे बचयां साईं न, तुसां बुरे होईकरी कियां खरियां गल्लां बोली सकदे न? क्योंकि जडा मने च भरया है सै ही मुए च ओदा है। 35 इक भला माणु मने दे भले भंडारे ला भलियाँ गल्लां कडदा है, कने इक बुरा माणु मने दे बुरे भंडारे ला बुरियाँ गल्लां कडदा है। 36 कने मैं तुसां ने बोलदा है, कि जडियां-जडियां बेकार गल्लां माणुए बोलणियां न, उना सारियां गल्लां दा लेखा न्याय दे रोजे देणा है। 37 क्योंकि परमेश्वरे न्याय करणा है कने हर इक माणुए जो उदियां बोलियां गल्लां दिया बजा ने दोषी या निर्दोषी ठहराया जाणा है।” 38 इसा गल्ला पर मते व्यवस्था जो सिखाणे बालयां कने फरीसियां उसयो बोलया, “गुरू जी, असां तिजो ला इक स्वर्ग दा कोई चमत्कार दिखणा चांदे न, जिसने पता लग्गे कि तिजो परमेश्वरे भेजया है।” 39 पर यीशुए उना जो जबाब दिता, तुसां चमत्कार इस ताई मंगदे न क्योंकि तुसां बुरे लोक न कने भरोसा नी करदे न, पर परमेश्वरे दा संदेश देणेबाले योना ने जडा होया उस जो छडी करी होर कोई तुसां जो चमत्कार नी मिलणा है। 40 योना तिन्न रात दिन पाणिऐ दे इकी बडी बडिया मच्छिया दे पेटे च रिया, तियां ही, मैं माणुए दे पुजे भी तिन्न रात दिन धरतिया दे अंदर रेणा। 41 नीनवे शेहरे दे लोकां न्याय दे रोजे इस युगे दे लोका सोगी उठी करी उना जो दोषी ठेहराणा, क्योंकि उना योना दा प्रचार सुणीकरी मन बदलया, पर तुसां तां पश्चाताप करणे मना करदे न; कने दिखा, ऐथू तां सै है जडा योना ला भी बडा है। 42 दक्षिणे दिया राणिया न्याय दे रोजे इस युगे दे लोकां सोगी उठी करी उना जो दोषी ठेहराणा, क्योंकि सै सुलैमान दा ज्ञान सुणने ताई बडी दुरे ला आयियो थी; कने दिखा, ऐथू सै है जडा सुलेमाने ला भी बडा है, पर तुसां पश्चाताप करणे मना करदे न। 43 “जालू बुरी आत्मा माणुए ला निकली जांदी है, तां सै सुकियां जगा च अराम तोपदी फिरदी है, पर उसा जो अराम नी मिलदा है। 44 तां सै अपने आपे ने बोलदी है, कि जिस माणुए ला मैं आई है उसी माणुए दे अंदर चली जां कने बापस आई करी उस माणुए जो उस खाली घरे सांई पांदी है, जिसयो छेल करी साफ कने सजाया

हो।” 45 तालू बुरी आत्मा जाई करी अपने ला होर बुरियाँ सत्त आत्मा जो अपने सोगी लेई ओदी है, कने सै उस माणुए दे अंदर जाई करी रेणा लगदी है, कने उस माणुए दी हालत पहले ला भी बुरी होई जांदी है। इस युगे दे बुरे लोकां ने भी इयां ही होणा है। 46 जालू सै भिडा ने गल्लां करा दा ही था, तां उस दी माता कने भाई बाहर खडुतयो थे, कने उसने गल्लां करणा चांदे थे। 47 कुनकी उसने बोलया, “दिख, तेरी माता कने तेरे भाई बाहर खडुतयो न, कने तिजो ने गल्लां करणा चांदे न।” 48 ऐ सुणीकरी उनी बोलणे बाले जो जबाब दिता, “कुण है मेरी माता? कने कुण न मेरे भाई?” 49 कने अपने चेलयां पासे हथ करिके बोलया, दिखा, “मेरी मां कने मेरे भाई ऐ न। 50 क्योंकि जडा कोई मेरे स्वर्गीय पिता दिया मरजिया पर चले, सै ही मेरा भाई, कने बेहन, कने माता है।”

13 तिस्सी रोजे यीशु घरे ला निकली करी दरियाये दे बखे जाई बैठा।

2 कने उस बाल मती भरी भीड़ गिठी होई गेई, कने सै किस्तिया पर चडी गया, कने सारी भीड़ दरियाये दे बखे खडोई रेई। 3 कने उनी उना ने कहाणियां च मतियां सारियां गल्लां बोलियां, “दिखा, इक बी राणे बाला बी राणा निकलया। 4 रांदे बेले थोडे बी रस्ते दे बखे पेई गे कने सै तां पछियां आई करी चुगी ले। 5 कने थोडे बी पथरलिया जमिना पर पे जिथू उसयो जादा मिटी नी मिली, कने जादा मिटी नी होणे दिया बजा ला तौली लूगी पे। 6 कने जालू खडी धूप पेई, तां सै फकुई गे, क्योंकि उना दियां जडा डुगियां नी थियां तां सै सुकी गे। 7 कने थोडे बी झिल्लां च पै, कने जालू झिल्ल बडुए तां उना से बी डकी ले। 8 पर थोडे बी खरिया जमिना पर पे, कने सै बी लुगे, कने मते सारे फल देणेबाले होए; केईयां सौ गुणा, केईयां सठ गुणा, केईयां ती गुणा।” 9 जिस बाल सुणने ताई कन्न न सै ध्यान लाईकरी गल्ला जो सुणे, कने इसा गल्ला जो समझी ले। 10 कने चेलयां यीशुए बखे आई करी पुछया, “तू उना ने कहाणिया च कजो गल्लां करदा है?” 11 उनी जबाब दिता, “तुहांजो स्वर्ग दे राज्य दे भेदां जो समझणे दी समझ दितियो है, पर उना जो नी। 12 जिस कुसी बाल सै समझणे दी इच्छा है, जडा परमेश्वर सिखांदा है, उसयो होर देणा, पर जडा समझणे दी इच्छा नी रखदा, कि मैं क्या सिखांदा, तां सै जडा समझया है, परमेश्वरे से भी उसला लेई लेणा।” 13 मैं उना ने कहाणिया च गल्लां इस ताई करदा है, कि सै दिखदे होए भी, नी दिखदे; कने सुणदे होए भी, नी सुणदे न; कने ना समझदे न। 14 कने उना दे बारे च यशायाह दी ऐ भविष्यवाणी पुरी होंदी है: “तुसां कन्ना ला सुणना तां है, पर समझणा नी है; कने हखी ला दिखणा ता है, पर कुछ मिलणा नी है।” 15 “क्योंकि इना लोकां दा मन कठोर होई गया है, कने सै कन्ना ला उच्चा सुणदे न, कने उना अपणिया हखी बंद करी लियां न; कुथी इयां ना हो कि सै हखी ला दिखन, कने कना ला सुणन कने मने ला समझन, कने अपने पापां दा पश्चाताप करगे, कने मैं उना जो ठीक करे।” 16 “पर धन्य न तुहाडियां हखी, क्योंकि सै दिखदियां न; कने तुहाडे कन्न, कि सै सुणदे न। 17 क्योंकि मैं तुसां ने सच्च बोलदा है, कि मते परमेश्वरे दा संदेश देणेबाले कने धर्मी चांदे थे कि जडियां गल्लां तुसां दिखदे न, दिखन, पर दिखियां नी; कने जडियां गल्लां तुसां सुणदे न, सुणन, पर सुणियां नी।” 18 हुण तुसां बी

राणे बाले दी कहाणिया दा मतलब सुणा: 19 “जडा कोई राज्य दा बचन सुणीकरी नी समझदा, उदे मने च जडा कुछ राया था, उसयो शैतान झट पट जादां कने उना दे मने ला बचन कडी दिन्दा है जडा उना सुणया था; ऐ सै ही बी है, जडा रस्ते दे बखे राया था। 20 कने जडा पथरिलिया जमिना च राया था, ऐ सै माणु न, जडे बचना जो सुणीकरी उना जो झट खुशिया ने ग्रहण करी लेंदे न। 21 पर परमेश्वर दे बचना जो मने दिया गहराईया च बढणा नी दिन्दे, उदे बाद जालू बचने दिया बजा ने उना पर कला क्लेश या परेशानी होंदी है, तां सै बचना ला पिच्छे हटी जांदे न। 22 जडे बी झिल्लां च पियो न, ऐ सै माणु न जिना बचन सुणया, पर सै संसारे दियां चिंता जो लेईकरी दुखी, कने संसारिक चिंजा दा लालच उना दे मने च रेंदा है, ऐ सब परमेश्वर दे बचन च स्कावट पांदा है। कने सै बचन उना तांई फायदेमंद नी होंदा। (aiōn g165) 23 कने जडे बी खरिया जमिना पर रायो थे, ऐ सै माणु न, जडे बचन सुणीकरी ग्रहण करदे न, कने फल दिन्दे न, कोई सौ गुणा, कोई सठ गुणा, कने कोई ती गुणा।” 24 यीशुऐ उना जो इक होर कहाणी सुणई, “स्वर्गें दा राज्य उस माणुऐ सांई है जिनी अपने खेते च खरा भी राया। 25 पर जालू लोक सोआ दे थे तां उना दे दुशमण आई करी कणका बिच जंगली भी राई करी चली गे। 26 जालू लूंगा निकलियां कने बेलां लगियां, तां जंगली दांणयां दियां लूंगा भी मिलणा लगियां।” 27 इस गल्ला पर घरे दे नौकरां आई करी उसला बोलया, हे मालिक, तू क्या अपने खेतरां च खरा भी नी लाया था? फिरी खेते च जंगली दांणे दे बूटे कुथु ला आए? 28 उनी उना जो बोलया, ऐ कुसी दुशमणे दा कम्म है। नोकरां उसला बोलया, तेरी क्या मजीं है, कि असां जाई करी जंगली बूटयां जो जडा ला पुटी देन? 29 उनी बोलया, नी, ऐसा मत करा इयां ना होऐ कि जंगली दांणे दे बूटयां जो जडा ला पुटदे बेले उना सोगी कणका दे बूटे भी पुटई जान। 30 बढणे दीकर दोनो जो बढणा दिया, कने बढणे दे बेले मैं बढणे बालयां ने बोलणा है, कि पेहले जंगली दांणे दे बूटयां जो बटोली करी फूकणे तांई गढियां बन्नी लियां, कने कणका जो मेरे खेते च गठेरा। 31 उनी उना जो इक होर कहाणी सुणई, “स्वर्गें दा राज्य इक राई दे दांणे सांई है, जिसयो कुनी माणुऐ लेईकरी अपने खेतरां च राई दिता। 32 सै सारे बियां ला छोटा होंदा है, पर जालू सै बडा होई जांदा है तालू सै सारे साग पतयां ला भी बडा होंदा है; कने ऐसा स्रब बणी जांदा है, कि अम्बरे दे पंछी आई करी उदिया डालियां पर घोंसले बणादे न।” 33 उनी इक होर कहाणी उना जो सुणई, “स्वर्गें दा राज्य खमिरे (तराक) सांई है, जिसयो कुनी जनानिया लेईकरी तीन पसेरी आटे च मलाई दिता कने होंदे-होंदे सै सारा खमीर बणी गया।” 34 ऐ सारियां गल्लां यीशुऐ कहाणिया दे जरिये लोकां ने बोल्यां, कने जडा कुछ सै सिखांदा, सै कहाणिया ने ही सिखांदा था। 35 कि जडा बचन परमेश्वरें दा संदेश देणेबाले बोलया था, सै पूरा होऐ: “मैं कहाणी बोलणे तांई अपना मु खोलणा है: मैं उना गल्लां जो जडियां संसारे दे शुरू होणें ला गुप्त न उना जो सामणे लोंगा।” 36 तालू यीशु भिडा जो छडी करी घरे च आया, कने उदे चेलायां उदे बाल आई करी बोलया, “खतेरे दे जंगली दांणे दी कहाणी समझाई दे।” 37 उनी उना जो जबाब दिता, “खरे भी रांणे बाला मैं माणुऐ दा पुत्र है।” 38 खेतर संसारे दे लोक न, खरा बी राज्य दे लोक न, कने

जंगली भी शैताने दे लोक न। 39 जिनी दुशमणे उना जो राया सै शैतान है; बढणा संसारे दा खात्मा हे: कने बढणे बाला स्वर्गदूत है। (aiōn g165) 40 जियां जंगली दांणे दे बीऐ दे बूटे फुकणे तांई गठेरे दे न, तियां ही संसारे दे खात्मे च होणा है। (aiōn g165) 41 मैं माणुऐ दे पुत्रे अपने स्वर्गदूते जो भेजणा, कने उना उदे राज्य च सारियां पाप दियां बजां जो, कने बुरे कम्म करणे बालयां जो उखाडी देणा है। 42 कने स्वर्गदूतां उना जो अग्गी दे कुण्डे च पांणा, कने उना ओथु रोंणा कने दंद पीणे न। 43 उस बेले धर्मियां अपने पिता दे राज्य च सूरजे सांई चमकणा है। जिस बाल सुणने तांई कन्न न सै ध्यान लाईकरी गल्ला जो सुणे, कने इसा गल्ला जो समझी ले। 44 “स्वर्गें दा राज्य खतेरे च लुकयो खजाने सांई है, जडा कुसी माणुऐ जो मिलया है, कने उनी लुकाई रखया, खुशिया दे मारयो जाई करी उनी अपना सारा कुछ बेची करी, कने उस खेतेरे जो खरदी लिया।” 45 “फिरि स्वर्गें दा राज्य इक व्यपारिये सांई है, जडा खरे मोतियां दिया तोपा च था। 46 जालू उसयो इक बडा भरी मेहंगा मोती मिला, तां उनी अपना सारा कुछ बेची दिता, कने सै मोती खरीदी लिया।” 47 “फिरि स्वर्गें दा राज्य उस मच्छियां पकडने बाले बड़े जाल्ले सांई है, जिसयो समुद्रे च पाया, कने सै हर तरा दियां मच्छियां जो बटोली लेई आया। 48 कने जालू जाल्ल भर्गई गया, तां मछवारे जाल्ले जो खिज्जी करी किनारे जो लेई आये, कने बेईकरी खरियाँ-खरियाँ मच्छियां जो भांडयां च पाया कने बेकार-बेकार सुटी दितियां। 49 संसारे दे अंत च इयां ही होणा है; स्वर्गदूते आई करी बुरे लोकां कने धर्मियां जो लग करणा, (aiōn g165) 50 कने बुरे लोकां जो अग्गी दे कुण्डे च पांणा। ओथु उना रोंणा कने दंद पीणे न।” 51 “तुसां क्या ऐ सारियां गल्लां समझी गे?” उना उसला बोलया, “हाँ।” 52 उनी उना ने बोलया, “तांई तां हर इक व्यवस्था जो सिखाणे बाला जडा स्वर्गें दे राज्य दा चेला बंणया है, उस ग्रहस्थ दे सांई है जडा अपनी पराणियां कने नोइयां चिजां जो अपने भंडारे ला कडदा है जित्थू सै दुजयां दिया मदद करणे तांई उना जो गठेरा।” 53 जालू यीशु सारी कहाणी बोली बैठा, तां ओथु ला चली गया। 54 कने अपने देशे च आई करी उना दे यहूदी जंज घर च उना जो ऐसा उपदेश देणा लगा; कने सै हेरान होईकरी बोलणा लग्ये, “कि इसयो ऐ अकल कने चमत्कारी कम्म करणे दी शक्ति कुथु ला मिली? 55 क्या ऐ तरखाणे दा जागत नी है? कने क्या इदिया माता दा ना मरियम कने इदे भाईयां दे ना याकूब कने यूसुफ कने शमौन कने यहूदा नी न? 56 कने क्या इदियां सारियां बेहणा साडे बिच नी रेंदिया न? फिरी इनी ऐ सारा कुछ कुथु ला सिखया?” 57 इयां उना उदिया बजा ला ठोकर खादी, पर यीशुऐ उना जो बोलया, “परमेश्वरे दा संदेश देणेबालयां दा अपने ग्रां कने घरे छडी करी, उसयो हर कुथी इज्जत मिलदी है।” 58 कने उनी ओथु उना दे भरोसा नी करणे दिया बजा ला जादा अनोखे कम्म नी किते।

14 कने हुण राजा हेरोदेसे यीशुऐ दे कम्मा दी चर्चा सुणी जडे यीशु करा दा था। 2 कने अपने सेवकां ने बोलया, “ऐ सेई यहून्ना बपतिस्मा देणेबाला यहून्ना है। सै मरयां च जिन्दा होई गया है, ये ही बजा है कि उदे बाल इना चमत्कारां जो करणे तांई परमेश्वर दी शक्ति है।” 3 क्योंकि हेरोदेसे अपने भाई फिलिप्पुस दी घरे बाली हेरोदियास दिया बजा ला, यहून्ना जो

पकड़ी करी बन्या, कने जेला च पाई दिता था। 4 क्योंकि यहुन्ने उसयो बोलया था, कि इसा जो रखणा तिजो तांई ठीक नी है। 5 कने सै उसयो मारी देणा चांदा था, पर सै लोकां ला डरदा था, क्योंकि सै उसयो परमेख्वरे दा संदेश देणेबाला मंदे थे। 6 पर जालू हेरोदेस दा जन्म दिन आया, तां हेरोदियास दिया कुडिया त्योहारे च नची करी हेरोदेसे जो खुश किता। 7 इसा गल्ला पर उनी कसम खाई करी बचन दिता, कि जडा कुछ तू मंगगी, सै मैं तिजो दिगा। 8 उना अपणिया माता दे बहकावे च आई करी बोलया, “यहुन्ना बपतिस्मा देणेबाले दा सिर थालिया च रखीकरी मिंजो ऐथू मंगबाई दे।” 9 ऐ सुणीकरी राजा बडा उदास होया, पर अपणिया कसमां, कने सोगी बोणे बालयां दिया बजा ने, हुकम दिता, कि यहुन्ना दा सर इसा जो देई दिया। 10 राजे इक सिपाइऐ जो हुकम दिता, कि जेला च जा, कने यहुन्ना दा मुंड बड्डी करी उदे बाल लेईकर आ। 11 सिपाईऐ जेला च जाई करी उदा सिर कटया, कने इक थालिया च रखीकरी लेई आया कने उसा कुडिया जो देई दिता, कने कुडिया अपणिया माता जो देई दिता। 12 तालू यहुन्ना दे चेलयां उदिया लाशा जो ले जाई करी दबाई दिता, कने जाई करी यीशुऐ जो खबर दिती। 13 जालू यीशुऐ ऐ सुणा, तां किस्तिआ च चढी करी ओथू ला कुसी सुन्सान जगा जो, एकांत च चली गया; कने लोक ऐ सुणीकरी शेहरे-शेहरे ला पैदल चली करी उदे पिच्छे चली गे। 14 उनी निकली करी मते भरे लोकां दी भीड़ दिखी, कने उना पर तरस खादा, कने उनी उना चे जडे मरीजां जो ठीक किता। 15 जालू संज होई, तां उदे चेलयां उदे बाल आई करी बोलया, “ऐ तां सुन्सान जगा है, कने देर होआ दी है; कने लोकां जो भेजी दिया ताकि सै गां च जाई करी अपने तांई खांणा खरीदी लेन।” 16 पर यीशुऐ उना जो बोलया, “उना दा जाणा जरूरी नी है। तुसां ही इना जो खाणे जो दिया।” 17 उना उसला बोलया, “साडे बाल ऐथू पंज रोटियां कने दो मछियां जो छडी करी होर कुछ नी है।” 18 उनी बोलया, “उना जो ऐथू मेरे बाल लेई ओआ।” 19 तालू उनी लोकां जो घाए पर बोणे जो बोलया, कने उनी सै पंज रोटियां कने दो मछियां लियां; कने स्वर्ग पासे दिखीकरी धन्यावाद किता, कने रोटियां तोड़ी-तोड़ी करी चेलयां जो दितियां, कने चेलयां लोकां जो। 20 सारे खाई करी रजी गे। कने जालू रोटी खायी बैठे तालू चेलयां बाकी बचियाँ रोटियां कने मछियां गिठेइयां कने उसला बाहरा टोकरीयाँ भरई गियां। 21 कने खांणे बाले चे जनानिया कने बचयां जो छडी करी लगभग पंज हजार मर्द थे। 22 कने उनी तोले-तोले अपने चेलयां जो किस्तिआ पर चढने तांई बोलया, ताकि सै उसला पेहले पार पुज्जी जान, तालू दीकर कि मैं लोकां जो भेजी करे। 23 सारे लोकां जो भेजणे बाद, यीशू पहाडे पर प्रार्थना करणे तांई गया; संज्ञा जो सै ओथू किल्ला था। 24 उस बेले किस्ति झिल्ला बिच लेहरां ने डगमगा दी थी, क्योंकि होआ सामणे ला ओआ दी थी। 25 कने तां भयागा तडके यीशू झिल्ला पर चली करी उना बाल आया। 26 पर जालू चेलयां उसयो झिला पर चलदे दिखया, तां से घबराई गे, कने बोलणा लग्गे कि, “भुत है ऐ!” 27 पर यीशुऐ उना ने झट गल्लां कितियां कने बोलया, “हिम्मत रखा, डरा मत, मैं यीशू है।” 28 पतरसे उसयो जबाब दिता, “हे प्रभु, अगर तू है, तां तू मिंजो अपने बाल पांणिऐ पर चली करी ओणे दा हुकम दे।” 29 उनी बोलया,

“आ।” तालू पतरस किस्तिआ ला उतरी करी यीशुऐ पासे चलणा लग्गा। 30 पर होआ जो महसूस करी डरी गया, कने जालू डूबणा लगा तां चिलाई करी बोलया, “हे प्रभु, मिंजो बचा।” 31 यीशुऐ झट हथ गां करी के उसयो थमी लिया, कने उसला बोलया, “हे घटबिश्वासी, तू कजो शक किता?” 32 जालू सै किस्तिआ पर चढी गया, तां होआ भी स्की गई। 33 इसा गल्ला पर जडे किस्तिआ पर थे, उना उसयो झुकी करी नमस्ते करी के बोलया, “सच्ची, तू परमेख्वरे दा पुत्र है।” 34 सै पार उतरी करी गन्नेसरत प्रदेश दे कन्डे पुज्जे। 35 कने ओथू दे लोकां उसयो पछेणी लिया कने अखे-बखे दे सारे देशे च बोली भेजया, कने सारे बिमारां जो उदे बाल लेई आये। 36 कने उसने बिनती करणा लग्गे कि सै सिर्फ अपने कपडयां जो छुणा दे, कने जितणे भी छुंदे थे, सै सारे ठीक होई जांदे थे।

15 तालू यरूशलेम ला कुछ फरीसी कने व्यवस्था जो सिखाणे बाले यीशुऐ बाल आई करी बोलणा लग्गे, 2 “तैरे चेले पूर्वजां दे रीती रिबाजां जो कजो टालदे न, कि बिना हथ धोतयो रोटी खांदे न?” 3 यीशुऐ उना जो जबाब दिता, “तुसां अपने बणायो नियमा दिया बजा ला कजो परमेख्वरे दे हुकमे जो टालदे न?” 4 क्योंकि परमेख्वरे बोलया है, “कि अपने माता पिता दा आदर करा, कने जडा कोई अपने माता पिता जो श्राप दिगा, सै पक्का मारी देणा।” 5 “पर तुसां लोकां जो इजाजत दिन्दे न की, अपने माता-पिता जो ऐ बोली दिया कि जडा कुछ मैं तुहांजो देणा था, सै मैं परमेख्वर जो देणे दी कसम खादियो है।” 6 तां सै अपने पिता दा आदर नी करदा है, इयां ही तुसां भी अपने रीती रिबाजा दिया बजा ला परमेख्वरे दा हुकम तोड़ी दितया है। 7 यशायाह तुहाडे बारे च ठीक बोलया था, जिनी पबित्र शास्त्र च तुसां कपटियां दे बारे च लिखया है, 8 “कि ऐसे लोक गल्लां ने तां मेरा आदर करदे न, पर इना दे मन मिंजो ला बडे दूर न। 9 कने ऐ बेकार ही मेरी भक्ति करदे न, क्योंकि माणुऐ दे तरीकियां जो धर्म उपदेश बणाई करी सिखांदे न।” 10 कने यीशुऐ लोकां जो अपने बाल सदीकरी उना ने बोलया, “सुणा, कने समझ। 11 जडा मुऐ च जांदा है, सै माणुऐ जो अशुद्ध नी करदा है, पर जडा मुऐ ला निकलदा है, सै माणुऐ जो अशुद्ध करदा है।” 12 तालू चेलयां आई करी बोलया, “क्या तिजो ऐ पता है कि फरीसियां ऐ बचन सुणीकरी ठोकर खादी?” 13 उनी जबाब दिता, “हर इक बूटा जडा मेरे स्वर्गीय पिता नी लाया है, सै पुटई जाणा है।” 14 “उना जो जाणा दिया; सै रस्ता दसणे बाले अन्ने न, कने अगर अन्ना अन्ने जो रस्ता दसे, तां दोनो खड्डे च पोणा है।” 15 ऐ सुणीकरी पतरसे उसला बोलया, “ऐ कहाणी सांझो समझाई दे।” 16 उनी बोलया, “क्या तुसां भी हले दीकर नी समझे?” 17 “क्या तुहांजो पता नी है, कि जडा कुछ मुऐ च जांदा है सै पेते च पौंदा है, कने संडास ने बाहर निकली जांदा है? 18 पर जडा कुछ मुऐ ला निकलदा है, सै मेने ला निकलदा है, सै ही माणुऐ जो अशुद्ध करदा है। 19 क्योंकि बुरे बिचार, मारणा, परस्त्रीगमन, व्यभिचार, चोरी, झूठी गबाई कने निंदा मने ला ही निकलदे न। 20 ऐ ही है जडे माणुऐ जो अशुद्ध करदे न, पर बिना हथ धोतयो खांणा खाणां माणुऐ जो अशुद्ध नी करदा है।” 21 यीशू ओथू ला निकली करी, सर कने सैदा दे देशां जो चली गया। 22 उस देशे ला इक कनानी जनानी आई, कने जौरे-जौरे

ने बोलणा लगी, “है प्रभु। दाऊदे दी ओलाद, मिंजो पर दया कर, मेरिया कुडिया जो बुरी आत्मा बड़ी भरी सतांटी है।” 23 पर उनी उसा जो कोई जबाब नी दिता, कने उदे चेलयां आई करी उसने बिनती करिके बोलया, “इसा जो भेजी दे; क्योंकि सै साडे पिच्छे डडदी ओआ दी है।” 24 यीशुए जबाब दिता, “इस्राएले दे घराने दियां गवाचियां भेडां जो छडी करी मिंजो होर कुसी बाल नी भेजया है।” 25 पर सै आई, कने उसयो नमस्ते करिके बोलणा लगी, “है प्रभु, मेरी मदद कर।” 26 उनी जबाब दिता, “बचयां दी रोटी लेईकरी कुतयां दे अग्रे पाणा ठीक नी है।” 27 उनी बोलया, “सच्च है प्रभु; पर कुते भी सै ही टुकडे खांदे न, जडा उना दे मालिकां दे मजे ला हेठ पोंदे न।” 28 इसा गल्लां पर यीशुए उसा जो जबाब दिता, “हे जनानी, तेरा भरोसा बडा है; जियां तू चांदी है, तेरे ताई तियां ही हो।” कने उसा दी कुडी उसी बेले ठीक होई गई। 29 यीशु ओथु ला गलील झिला बखे आया, कने पाहडे पर चढी करी ओथु बेई गया। 30 तालू भिडा दी भीड़ उदे बखे आई। कने अपने सोगी केई लंगडे, अन्ने, जल्ले, टुंडे, कने होर मते सारयां जो लेईकरी उदे बाल आये; कने उना जो उदे पैरा च रखी दिता, कने उनी उना सारयां जो ठीक किता। 31 जालू लोकां दिखया कि, जल्ले बोलणा, कने टुंडे ठीक होंणा, कने लट्टे चलंदे, कने अन्नयां जो मिलदा है, तां हेरान होऐ कने इस्राएले दे परमेश्वरे दी बडाई करणा लग्गे। 32 यीशुए अपने चेलयां जो सदीकरी बोलया, “ऐ लोक मिजों सोगी तिन्ना रोजां ला रे दे न। उना बाल खाणे ताई कुछ नी है कने मिंजो इसा गल्ला पर तरस ओआ दा है; कने मै इना जो भूखा नी भेजणा चांदा है; कुथी इयां ना हो कि सै रस्ते च थकी करी रेई ना जाना।” 33 चेलयां उसयो बोलया, “सांझो ऐथु सुनसान जगा च कुथु ला इतणियां रोटीयां मिलगियां कि असां इतणियां बडिया भिडा जो खुआन?” 34 यीशुए उना ला पछया, “कि तुहाडे बाल कितणियां रोटीयां न?” उना बोलया, “सत रोटीयां कने थोडियां दियां छोटियां मछियां न।” 35 तालू यीशुए लोकां जो धरतिया पर बोंणे दा हुकम दिता कने सै बेई गे, 36 कने उदे बाद उनी सै सत रोटीयां कने मछियां लियां, कने परमेश्वरे दा धन्यबाद करिके तोडियां, कने अपने चेलयां जो रोटीयां तोडी करी दिन्दा गया ताकि सै उना जो लोकां च बंडी देन। 37 फिरी बादे च सारे लोक खाई करी रजी गे कने उदे बाद चेलयां बाकी बचयो टुकडयां जो सत टोकरियां च भरी लिया। 38 कने खांणे बालयां चे जनानिया कने बचयां जो छडी करी चार हजार मर्द थे। 39 तालू सै भिडा जो भेजी करी किस्तिया पर चढया, कने मगदन देशे दिया सीमा पर आया।

16 फरीसियां कने सदूकियां यीशुए बाल आई करी उसयो परखणे ताई बोलया, “कि सांझो स्वर्गे दा कोई चमत्कार दसा।” 2 उनी उना जो जबाब दिता, “संझा जो तुसां बोलंदे न, कि मौसम खरा रेंणा है, क्योंकि अम्बर लाल है।” 3 कने ब्यागा जो बोलंदे न, कि अज तूफान ओणा क्योंकि अम्बर लाल कने धूधला है तुसां अम्बरे दे लछण दिखीकरी फरक दसी सकंदे न, पर बकंदे दे निशाणा दा फरक कनी दसी सकंदे न? 4 “इस युगे दे बुरे कने व्यभिचारी लोक निशाण तोपंदे न, पर योना दे निशाणे जो छडी करी उना जो कोई होर निशाण नी मिलणा।” कने सै उना जो छडी करी चली गया। 5 कने चेले झीला दे पार जांदे बेले रोटीयां लेणा भूली गियो थे। 6 कने यीशुए उना

जो चेतावनी दिती कि, “फरीसियां कने सदूकियां दे खमिरे ला बचणे ताई चौकने रेनयो।” 7 सै अपु चे बिचार करिके बोलणा लग्गे, कि यीशुए ऐ इस ताई बोलया क्योंकि “असां रोटीयां नी लोदियां।” 8 ऐ जाणी करी, यीशुए उना ने बोलया, “हे घटबिश्वासियों, तुसां कजो अपु चे बिचार करा दे कि साडे बाल रोटीया नी न?” 9 तुसां क्या हले दीकर नी समझे? कने उना पंजा हजारों दियां पंज रोटीया याद नी न, कने ना ही ऐ कि कितणियां टोकरियां चुकियां थियां? 10 कने ना ही उना चार हजार दियां सत रोटीयां, कने ना ही ऐ कि तुसां कितणियां टोकरियां चुकियां थियां? 11 “तुसां कनी समझे कि मै तुसां ने रोटीयां दे बारे च नी बोलया? पर फरीसियां कने सदूकियां दे बचना ला चौकने रेणे दे बारे च बोलया है।” 12 तालू उना जो समझ आया, कि उनी रोटीया दे खमिरे ताई नी, पर फरीसियां कने सदूकियां दिया शिक्षा ला चौकने रेणे ताई बोलया था। 13 यीशु कैसरिया फिलिप्पी दे प्रदेशे च आया कने उनी अपने चेलयां ला पछया, “लोक मिंजो, माणुए दे पुत्रे जो क्या बोलंदे न?” 14 चेलयां जबाब दिता कुछ लोक बोलंदे न कि तुसां यहन्ना बपतिस्मादाता न; पर कोई-कोई एलियाह, कने कोई-कोई बोलंदे न कि पुराणे जमाने दे परमेश्वरे दा संदेश सुनाणे बालयां चे कोई इक है। 15 यीशुए उना जो बोलया, “पर तुसां मिंजो क्या बोलंदे न?” 16 शमौन पतरसे जबाब दिता, “तू जिंदे परमेश्वरे दा पुत्र मसीह है।” 17 यीशुए उसयो जबाब दिता, “हे शमौन, योना दे पुत्र, तू धन्य है; क्योंकि मासे या खने नी, पर मेरा पिता परमेश्वर जडा स्वर्गे च है, उनी ऐ गल्ल तिजो पर प्रगट कितियो है। 18 कने मै भी तिजो ने बोलदा है, कि तू पतरस है, कने मै इसी पथरे पर अपनी कलीसिया बणाणी, कने अधोलोक दे फाटक उदे पर प्रबल नी होणे।” (Hades 986) 19 “मै तिजो स्वर्गे दे राज्य दियां चाबियां दिंगा: कने जडा कुछ तू धरतिया पर बणांगा; सै स्वर्गे च भी बणना, कने जडा कुछ तू धरतिया पर खोलगा, सै स्वर्गे पर भी खुलणा।” 20 तालू उनी चेलयां जो समझाया कि, “कुसी ने भी मत बोलंदे कि, मै मसीह है।” 21 उस बेले यीशु चेलयां जो दसणा लगा, “मिंजो जरूरी है कि मै यरूशलेम जां, कने यहूदी अगुवे, बड़े याजकां, कने यहूदी व्यवस्था जो सिखाणे बालयां दे हथां ला मते दुख डेलें, कने सै मिंजो मारी देन, कने फिरी मै तिन्ना रोजां बाद मरयां चे जिन्दा होई जां।” 22 पतरस यीशुए जो बखिया लेई गया कने इसा गल्ला पर झिडकणा लग्गा, “है प्रभु, परमेश्वर ना करे। कि तिजो पर कदी ऐसा होऐ।” 23 उनी मुडी करी पतरसे जो बोलया, “शैताने साईं कम्म करणा बंद कर! मेरे सामणे ला दूर होई जा! क्योंकि तू परमेश्वरे साईं नी, पर तू माणुए साईं सोचा दा है।” 24 यीशुए भिडा जो अपने चेलयां समेत अपने बाल सदीकरी बोलया, “जडा कोई मेरा चेला बनणा चांदा है, उसयो अपणिया शरीर दियां इच्छां कने जडियां तरकिबां बणाईयां उना जो छडी करी! मिजों ताई मरणे जो तैयार रेंणा पोणा, सेई मेरा चेला बणी करी मिजों पिच्छे चली सकदा है।” 25 कोई माणु ऐसा नी करगा कने अपने प्राणा जो बचाणा चांहगा, उनी परमेश्वर सोगी आत्मिक जिन्दगी जिणे दा मोका गबाई देणा है। पर जडा माणु मिजों पर भरोसा करगा कने मेरे श्भसमाचार दिया बजा ने मरगा उस माणुए जो परमेश्वरे सोगी सदा ताई दी जिन्दगी मिलणी। 26 अगर तुसां संसारे दा सब कुछ पाई लेंगे कने परमेश्वरे

सोगी सदा दी जिन्दगी जिणे दा मोका गबाई दिगे, तां उदा क्या फायदा? इक माणु परमेखरे जो क्या देई सकदा है, जडा उदी सदा दी जिन्दगी खरिदगा? कुछ नी! 27 मै, माणुए दे पुत्रे अपने स्वर्गदूते सोगी अपने पिता दिया महिमा च ओणा है, कने उस बेले उनी हर इकी जो उदे कम्मा दे अनुसार उसयो फल देणा है। 28 मै तुसां ने सच्च बोलदा है, “कि जडे ऐथू खडोतयो न, उना चे केई ऐसे न, कि जालू दीकर मिजो, माणुए दे पुत्रे जो उदे राज्य च ओदे नी दिखी लेन, तालू दीकर मौता दा स्वाद नी चखणा है।”

17 छे रोजां बाद यीशुए पतरस कने याकूब कने उदे भाई यहून्ना जो सोगी लिया, कने उना जो एकांत च कुसकी उच्चे पहाडे पर लेई गया। 2 कने उना दे सामणे यीशुए दा रूप बदलई गया। कने उदे कपडे चमकदार सफेद होई गे, 3 तालू उना तिन्ना चेलयां, परमेखरे दा संदेश देणेवाले मूसा कने एलिय्याह जो, जडे बडे पेहले जिन्दा थे उना जो यीशुए सोगी गल्लां करदे दिखया। 4 इसा गल्ला पर पतरसे यीशुए जो बोलया, “प्रभु जी, साडा ऐथू रेंगा ठीक है, इस ताई असां ऐथू तीन तम्बू बणां दे, इक तेरे ताई, इक मूसा ताई, इक एलिय्याह ताई।” 5 पतरस बोला दा ही था, तालू इक चमकीला बदल आया कने उना जो अपनी छाया ने ढकी लिया, बदले च परमेखरे जो बोलदे सुण्या, “कि ऐ मेरा प्यारा पुत्र है, कने मै इसला खुश है, कने जडा ऐ बोलदा है उसयो ध्याने ला सुणा।” 6 चेले ऐ सुणी के मुए भार पेई गे, कने बडे डरी गे। 7 यीशुए उना जो बखे आई करी छुता, कने बोलया, “उठा कने डरा मत।” 8 तालू उना अपने चारो पासे नजर मारी, तां मूसा कने एलिय्याह ओथू नी थे, कने उना जो सिर्फ यीशू ही मिल्ला। 9 जालू यीशू कने उदे तिन्न चेले पहाडे ला उतरा दे थे, तालू यीशुए उना जो हुकम दिता कि, “कुसी जो भी मत दसदे कि तुसां क्या दिखया जालू दीकर मै, माणुए दा पुत्र मरयां चे जिन्दा ना होई जा।” 10 कने चेलयां उसला पुछया, “मूसा दी व्यवस्था जो सिखाणे बाले यहूदी गुरू कजो बोलदे थे मसीहा ला पेहले एलिय्याह ओणा था? अगर ओणा था, तां हाली दिकर कजो नी आया सै?” 11 यीशुए उना जो जबाब दिता, “ऐ तां सच्च है कि एलिय्याह पेहले आई करी सब कुछ सुधारणा है।” 12 पर मै तुसां ने बोलदा है, “एलिय्याह ता पेहले ही आई चुकया था, कने लोकां उसयो नी पछेणया; पर जियां सै करणा चांदे थे तियां ही उदे सोगी किता। इसी तरीके ने ही माणुए दे पुत्रे जो भी उना दे हथे ला दुख होणे न।” 13 तालू चेलयां समझया कि उनी सांझो ने यहून्ना बपतिस्मा देणेवाले दे बारे च बोलया है। 14 जालू सै भिडा बखे पुज्जे, तां इक माणु उना बाल आया, कने गोडे भार बेईकरी बोलणा लग्गा। 15 “प्रभु जी, मेरे पुत्रे पर दया कर। क्योंकि उसयो मिर्गिं दे दौरे पोंदे न, उसयो बडी तकलीफ होंदी है, कने बार-बार अग्गी च, कने बार-बार पाणिए च पेई जांदा है। 16 कने मै उसयो तेरे चेलयां बाल लांदा था, पर सै उसयो ठीक नी करी सके।” 17 ऐ सुणीकरी यीशुए उना जो जबाब दिता, “हे अविश्वासी लोकों, मै कालू दीकर तुहाडे सोगी रेंगा, कने कालू दीकर तुहाडे अविश्वास जो सेहन करगा? उसी जागते जो मेरे बाल लोआ।” 18 तालू यीशुए उसयो झिडकया, कने बुरी आत्मा उसला निकली गई; कने जागत उसी बेले ठीक होई गया। 19

जालू यीशू किला था, तां उदे चेले उस बाल आए कने उसयो पुछया कि, “असां उसा बुरी आत्मा जो कजो नी कडी सके?” 20 यीशुए उना ने बोलया, “अपणे भरोसे दिया कमिया दिया बजा ला। क्योंकि मै तुसां ने सच्च बोलदा है, अगर तुहाडा भरोसा राईया दे दांणे बराबर भी होंदा, तां इसी पाहडे ने बोली सकदे न, कि ऐथू ला खिसकी करी ओथू चली जा, तां उनी चली जाणा; कने कोई भी गल्लत तुहाडे तांई मुश्किल नी होणी। 21 (पर ऐ जात बिना प्राथना कने बिना बरते दे नी निकलदी।)” 22 जालू चेले गलील प्रदेशे च थे, तां यीशुए उना ने बोलया, “मै, माणुए दा पुत्र माणुआं दे हथे पकड़ाया जाणा है। 23 कने उना मिजो मारी देणा, कने मै तीजे रोजे मरयां चे जिंदा होई जाणा।” इना गल्लां जो सुणीकरी चेले बडे उदास होए। 24 जालू सै कफरनहम शेहरे च पुज्जे, तां मंदरे दा कर लेणे बालयां, पतरसे बाल आई करी पुछया, कि क्या तुहाडा गुरू मंदरे दा कर नी दिन्दा है? 25 उनी बोलया, “हाँ, दिन्दा है।” जालू सै घरे आया, तां यीशुए पतरसे दे पूछणे ला पेहले ही उसयो बोलया, “हे शमौन तू क्या समझदा है? धरतिया दे राजे महसूल या कर कुसला लेंदे न? अपने पुत्रां ला कि परायां ला?” 26 पतरसे उना ने बोलया, “परायां ला।” यीशुए उसला बोलया, “तां पुत्र बची गे।” 27 तमी असां उना जो ठोकर ना खुआन, तू झिला दे बखे जाई करी बीडी पा, कने जडी मछी पेहले निकलगी, उसा जो पकड़यां; उसा दा मुउ खोलणे पर इक सिक्का मिलणा है, उसयो लेईकरी मेरे कने अपने बदले उना जो कर देई दियां।

18 उस बेले चेले यीशुए बाल आई करी पूछणा लग्गे, “स्वर्ग दे राज्य च बडा कुण है?” 2 इस गल्लां पर उनी इक जागते जो अपने बाल सदीकरी उना बिच खरेडया, 3 कने बोलया, “मै तुसां ने सच्च बोलदा है, कि तुसां अपना मन बदला, कने बचयां सांई बणा, तां तुसां स्वर्ग दे राज्य च जाई सकदे न। 4 जडा कोई अपने आपयो बचयां सांई छोटा करगा, उनी स्वर्ग दे राज्य च बडा होणा। 5 कने जडा कोई मेरे नाए ला इक ऐसे बच्चे जो अपनांदा है सै मिजो भी अपनांदा है।” 6 पर जडा कोई इना छोटयां चे कुसी इकी जो भी भरोसे ला भटकांदा है या उना दे पाप करणे दी बजा बणदा है, उदे ताई तां खरा होंदा, कि उदे गले च बहू घराटे दा पथर लटकई करी उसयो डुगे समुंद्रे च डोबी दिन्दे। 7 “ठोकरां दियां बजा ने संसारे पर हाय! ठोकर लगणा जरूरी है; पर हाय उस माणुए पर जिदे जरिये ठोकर लगदी है।” 8 “अगर तेरा हथ या पैर तेरे पापां दी बजा बणा दा, तां उना जो बडी करी फेंकी दे; तेरे ताई ऐ ही ठीक है कि तू टुंडा या लंगडा होईकरी हमेशा दिया जिन्दगिया च प्रवेश करे, कि दो हथ पैर होंदे होए भी तू कदी नी बुझणे बालिया अग्गी च जा। (aiōnios g166) 9 अगर तेरी हख तेरे पाप दी बजा बणे, तां उसा जो कडी करी फेंकी दे। तेरे ताई ऐ ही ठीक है कि काणा होईकरी हमेशा दिया जिन्दगिया च प्रवेश करे, कि दो हखी दे होंदे होए भी तू कदी नी बुझणे बालिया नरके दिया अग्गी च जा।” (Geenna g1067) 10 “दिखा, तुसां इना छोटयां चे कुसयो भी घटिया मत समझदे; क्योंकि मै तुसां ने बोलदा है कि स्वर्ग च उना दे स्वर्गदूत हमेशा मेरे स्वर्गीय पिता दे सोगी रेंदे न।” 11 (क्योंकि मै, माणुए दा पुत्र गवाचयां जो बचाणा आया है।) 12 “तुसां क्या सोचदे न? अगर कुसी माणुए दियां सौ भेडां न, कने उना चे इक

गवाची जा, तां क्या सै उना निन्यानबे जो बाकी रखबालयां बाल छडी करी, पाहडे पर जाई करी, उसा गवाचिया जो नी तोपगा?" 13 "कने अगर ऐसा हो कि सै भेड उसयो मिली जाए, तां मैं तुसां ने सच्च बोलदा है, कि उनी निन्यानबे भेडां ताई इतणा खुश नी होणा, जितणा कि इसा भेडां ताई होणा। 14 तियां ही तुहाडा पिता जडा स्वर्गे च है उदी इच्छा नी है, कि इना छोटयां चे इक भी खत्म होऐ।" 15 "अगर तेरा मसीह भाई तिजो ने कोई जुल्म करे, तां जा कने उस सोगी किल्ले च गल्ल बात करिके समझा; अगर सै तेरी सुणे ले कने अपणी गलती मन्नी ले, तां तू अपने मसीह भाईऐ जो बापिस पाई लिया।" 16 कने अगर सै नी सुणे, तां इक दो जणे होर लेई जा सोगी, क्योंकि मूसा दिया व्यवस्था दे अनुसार, "हर इक आरोप जो दो या उसला जादा गबाह ला सही साबित करणा चाईदा।" 17 अगर सै उना दी भी नी मन्ने, तां तू कलीसिया ने बोली दे, पर अगर सै कलीसिया ने भी नी मन्ने, तां तू उसयो जियां तुसां होर जातियां सोगी व्यवहार करदे न, तियां ही उसयो कलीसिया ला कडी दिया। 18 "मैं तुसां ने सच्च बोलदा है, जडा कुछ तुसां धरतिया पर बणाणा है, उनी सै स्वर्गे च भी बणाणा है कने जडा कुछ तुसां धरतिया पर खोलणा है, सै स्वर्गे च भी खोलणा है।" 19 मैं तुसां ने फिरी बोलदा है, अगर धरतिया पर तुसां चे दो जणे कुसा गल्लां ताई इक मन होईकरी मंगे, तां सै उना ताई मेरे पिता दिया तरफा ला जडा स्वर्गे च है होई जाणी। 20 "क्योंकि जिथू दो या तीन मेरे नाऐ ने गिटे होंदे न ओथु मैं उना बिच होंदा है।" 21 तालू पतरसे बखे आई करी, उसयो बोलया, "प्रभु जी, अगर मेरा मसीह भाई जुल्म करदा रे, तां मैं उसयो कितणी बरी माफ करे, क्या सत बरी दीकर?" 22 यीशुऐ उसयो बोलया, "मैं तिजो ने ऐ नी बोलदा, कि सत बरी नी, पर तिजो उसयो माफ करी देणा चाईदा।" 23 "इस ताई स्वर्गे दे राज्य उस राजे साई न, जडा अपने सेवकां ला लेखा लेणा चांदा था। 24 जालू सै लेखा लेणा लग्गा, तां इकी बंदे जो उदे सामणे लांदा सै दस हजार सोने दे सिकयां दे बोरे दा कर्जदार था। 25 कने उदे बाल बापस करणे ताई कुछ भी नी था, तां उदे मालिके बोलया, कि ऐ कने इदी घरे बाली कने बाल-बच्चे कने जडा कुछ भी इदा है सै सब कुछ बेची दिया, कने कर्ज चुकाई दिया। 26 इसा गल्ला पर उनी सेवके पैरां च पेईकरी नमस्ते किते, कने बोलया, हे मालिक, सबर रख, मैं सारा कुछ भरी दिगा। 27 तालू उदे मालिके उस पर तरस खाई करी उसयो छडी दिता, कने उदा कर्ज भी माफ करी दिता। 28 पर जालू सै सेवक बाहर निकलया, तां उसयो इक सोगी कम्म करणे बाला साथी मिला, जिनी उसला सो दीनारां (सो दीनार: सो चांदी दे सिक्के) दा कर्ज लिया था; उनी उदा गला पकडी करी उसयो बोलया, जडा कुछ तरे पर कर्ज है उसयो भरी दे। 29 उदे साथी सेवके उदे पैरां पेईकरी, उसने बिनती करणा लगा; कि सबर रख मैं सारा भरी दिगा। 30 पर सै नी मनया, कने उनी जाई करी उसयो जेला च पाई दिता, ताकि जालू दीकर सै कर्ज नी भरगा, तालू दीकर ओथु ही रे। 31 कने उदे साथी सेवक ऐ दिखीकरी बडे उदास होऐ, कने जाई करी ऐ सारा हाल अपने मालिके ने सुणाई दिता।" 32 तालू उदे मालिके उसयो सदीकरी बोलया, "हे दुष्ट सेवक, तू जडी मिजो ने बिनती किती थी, तां मैं तेरा सारा कर्ज माफ करी दिता। 33 इस ताई जियां मैं तिजो

पर दया किती थी, तियां ही तिजो भी अपने साथी सेवके दा कर्ज माफ करी देणा चाईदा था?" 34 कने उदे मालिके गुस्से च आई करी उसयो सजा देणे बालें दे हथे देई दिता, ताकि जालू दीकर सै सारा कर्ज नी भरगा, तालू दीकर उना दे हवाले रे। 35 "इयां ही अगर तुसां चे हर कोई अपने मसीह भाई जो मने ला माफ नी करगा, तां मेरा पिता जडा स्वर्गे च है, उनी तुसां जो भी माफ नी करणा।"

19 जालू यीशु ऐ गल्लां बोली बैठा, तां गलील प्रदेशे ला चली गया; सै यहूदिया प्रदेशे ला निकले कने यरदन खड्डा दे दुज्जे पासे चली गे। 2 कने मते भरी लोक उदे पिच्छे चली पे, कने ओथु यीशुऐ उना सारयां जो ठीक किता। 3 तालू फरीसी उदे बाल आए कने उसयो परखणे ताई उसला पुछया, "क्या हर इक छोटिया बजा ला अपणिया घरे बाली जो छडी देणा ठीक है?" 4 उनी जबाब दिता, "तुसां क्या पढया नी है, कि जिनी उना जो बणाया है, उनी शुरू ला ही नर कने नारी बणाई करी, बोलया। 5 इस बजा ला माणुऐ अपने माता-पिता ला लग होईकरी अपणिया घरे बालिया सोगी रेणा, कने इना दोनो इक तन होणा? 6 कने सै दोनो हुण इक तन न, क्योंकि हुण सै दो जणे नी, पर इक माणुऐ साई न। इस ताई उसा जनानिया कने मर्दे जो बख नी करणा चाईदा जिना जो परमेख्वरे बियाह दे बंधना च बनया है।" 7 उना यीशुऐ ने बोलया, "फिरी मूसा ऐ कजो बणाया, कि उसा जो तलाक देईकरी छडी दिया?" 8 यीशुऐ उना ने बोलया, "मूसा तुहाडे मने दिया कठोरता दिया बजा ला तुहांजो अपणिया घरे बालिया जो छडी देणे दा हुकम दिता, पर शुरू च ऐसा नी था। 9 मैं तुसां ने बोलदा है, कि जडा कोई व्यभिचार जो छडी करी कुसा होरसी बजा ने अपणिया घरे बालिया जो छडी करी दुईया ने बियाह करे, तां सै व्यभिचार करदा है।" 10 चेलयां उसने बोलया, "अगर मरदे दा जनानिया सोगी ऐसा रिशता है, तां बियाह नी करणा ही ठीक है।" 11 उनी उना ने बोलया, "सारे ऐ बचन ग्रहण नी करी सकदे, सिर्फ सै ही जिना जो परमेख्वरे इस तरीके ने जिन्दगी जिणे दी शक्ति दितयो है। 12 क्योंकि कुछ नपुंसक ऐसे न जडे माऊ दे पेटे ला ही ऐसे न; कने कुछ नपुंसक ऐसे न, जिना जो माणुआं नपुंसक बणाया है: कने कुछ नपुंसक ऐसे न, जिना अपने आपे जो स्वर्गे दे राज्य ताई नपुंसक बणाया है, जडे इसयो समझी सकदे न, सै समझी लिया।" 13 तालू लोक बचयां जो उदे बाल लेईकरी आए, ताकि सै उना पर हथ रखे कने प्रार्थना करे; पर चेलयां उना जो झिडकां दीतियां। 14 यीशुऐ बोलया, "बचयां जो मना मत करा कने इना जो मेरे बाल ओणा दिया, जडे इना बचयां साई भरोसेमंद न उना स्वर्गे दे राज्य च रेणा।" 15 कने सै उना पर हथ रखीकरी, ओथु ला चली गया। 16 इक माणुऐ यीशुऐ बाल आई करी बोलया, "गुरू जी, मैं कुण दिया भला कम्म करे, ताकि मिंजो हमेशा दी जिन्दगी मिल्ले?" (aiōnios g166) 17 यीशुऐ उसयो बोलया, "तू मिंजो ला भलाईया दे बारे च कजो पूछा दा है? भला ता इक ही है; पर अगर तू हमेशा दिया जिन्दगिया च प्रवेश करणा चांदा है, तां तू हुकमा जो मना कर।" 18 उनी उसला पुछया, "कुण दे हुकम?" यीशुऐ बोलया, "ऐ कि हत्या नी करणी, व्यभिचार नी करणा, चोरी नी करणी, झूठी गबाई नी देणी; 19 अपने माता पिता दी इज्जत करणी, कने अपने पडोसियां सोगी अपणयां साई प्यार

रखणा।” 20 उनी मुंडे यीशुए जो बोलया, “इना सारियां गल्लां जो तां मैं मनदा है, हुण मिजो च कुसा गल्लां दी कमी है?” 21 यीशुए उसयो बोलया, “अगर तू सिद्ध होणा चांदा है, तां जा कने जड़ा कुछ तेरा है उसयो बेची करी गरीबां जो देई दे, तां तिजो स्वर्ग दा धन मिलणा, इयां करणे बाद आ कने मेरा चेला बणिआ।” 22 पर ऐ गल्ल सुणीकरी उस जवान मुंडे दे चेहे पर उदासी छाई गेई, कने सै दुखी होइ करी चली गया, क्योंकि सै बड़ा भरी अमीर था। 23 तालू यीशुए अपने चेलयां जो बोलया, “मैं तुसां ने सच्च बोलदा है, कि अमीरां दा स्वर्ग दे राज्य च जाणा बड़ा मुशकिल है। 24 ऊंटे दा सुइया दे नके चे निकलना असान है, पर अमीरां दा परमेश्वरे दे राज्य च जाणा बड़ा भरी मुशकिल है। 25 ऐ सुणीकरी चले बड़े हेरान होईकरी बोलया, तां कुण अपने पापां दी सजा मिलणे ला बची सकदा है?” 26 यीशुए उना दे पासे दिखीकरी बोलया, “जड़ा माणु नी करी सकदे, पर परमेश्वरे सब कुछ करी सकदा है।” 27 तालू पतरसे यीशुए जो बोलया, “दिख, असां तां सारा कुछ छडी करी तैरे पिच्छे आयो न: तां सांझो क्या मिलणा है?” 28 यीशुए उना जो बोलया, “मैं तुसां ने सच्च बोलदा है, कि नोए संसारे च जालू माणुए दे पुत्रे अपणिया महिमा दे सिंहासने पर बोंगा है, तां तुसां भी जडे मेरे पिच्छे आयो न, बाहरां सिंहासना पर बेईकरी इस्माएले दे बाहरां गोत्रों दा नयाय करणा है।” 29 “कने जिनी घरां जो या भाई, बेहणा जो या माता-पिता जो या बाल-बच्चां जो या खेतरां जो मेरे नाए तांई छडी दितया है, उसयो सो गुणा मिलणा, कने सै हमेशा दिया जिन्दगिया दा अधिकारी होणा। (aiōnios g166) 30 पर मते लोक जडे हुण महान कने अग्रे न, उसी बकते सै पीच्छे होणे, कने जडे पीच्छे न, सै उसी बकते पेहले होणे न।”

20 स्वर्ग दा राज्य इसा कहाणिया सांई है, इक जमींदार था, सै ब्यागा निकलया, ताकि अपने अंगूरा दे बागे च कम्म करणे तांई मजदुरां जो लगा। 2 कने उनी मजदुरां ने इक रोज कम्म करणे तांई इक मजदूरी रखी, अपने अंगूरा दे बागे च कम्म करणे तांई भेजया। 3 फिरी कोई नौ कि बजे ब्यागा निकली करी, होर लोकां जो बजारे च बेकार खडुतयो दिखया, 4 कने उना जो बोलया, “तुसां भी अंगूरा दे बागे च जा, कने जड़ा ठीक है, सै तुहांजो दिगा।” तां सै भी कम्म करणे तांई गे। 5 फिरी उनी दोपहर कने संझा तिन्न बजे भी निकली करी तियां ही किता। 6 कने लगभग पंज कि बजे निकली करी होरां जो खडुतया दिखया, कने उना जो बोलया, “तुसां कजो ऐशु दिन भर बेकार खडोई रेंदे?” उना उसया बोलया, “इस तांई, कि कुनी भी सांझो मजदूरिया च नी लाया।” 7 उनी उना जो बोलया, “तुसां भी अंगूरा दे बागे च कम्म करणा जा।” 8 संझा जो अंगूरा दे बागे दे मालिके अपने भण्डारिये जो बोलया, “मजदुरां जो सदीकरी जडे सारयां ला आखिर च आयो उना ला लेईकरी जडे सारयां ला पेहले कम्म करणा आयो मजदुरां जो उना दी मजदूरी देई दे।” 9 जालू सै आये जडे पंज बजे कम्मे पर लगयो थे, तां उना जो इक दिने दी दिहाड़ी इक दीनार मिली। 10 जडे पेहले आयो थे उना ऐ समझया, कि सांझो जादा मिलणा पर उना जो भी इक दिने दी दिहाड़ी इक दीनार ही मिली। 11 जालू उना जो इक दिनार मिला, तां सै घरे दे मालिके उपर बुडबुडणे लग्यो। 12 कि जडे संझा दे पंज बजे आये कने इक

ही घंटा कम्म किता, तू उना जो भी उतनी ही दिहाड़ी दिती जितनी तू सांझो दिती, असां दिन भर भार चुक्या कने धुप खादी? 13 तालू बगीचे दे मालिके उना चे इकी जो जबाब दिता, “कि हे मित्र, मैं तिजो ने कोई गलत नी करा दा। क्या मैं तिजो पुरे दिन कम्म करणे दा इक दीनार नी बोलया था? 14 जडी दिहाड़ी तेरी है, से ले कने चली जा; मेरी मजी ऐ है कि जितणा मैं तिजो दे, उतणा ही इस इक घंटा कम्म करणे बाले जो भी दें। 15 मिजो हक है कि मैं अपने पैसे जो अपणिया मरजिया ने खचीं सके। तिजो जलन नी होणा चाईदी कि मैं दुजयों तांई दयालू है। 16 पर मते लोक जडे हुण महान कने अग्रे न, उसी बकते सै पीच्छे होणे, कने जडे पीच्छे न, सै उसी बकते पेहले होणे न।” 17 यीशु यस्शलेम शहरे जो जांटे बेले बाहरां चेलयां जो एकांत च लेई गया, कने रस्ते च उना ने बोलणा लगा। 18 “दिखा, ध्याने ने सुणा, असां यस्शलेम चलयो न, कने मैं माणुए दा पुत्र बड़े याजकां कने यहूदी व्यवस्था जो सिखाणे बालयां दे हथे पकड़ाया जाणा है, कने उना मिजो मौत दी सजा देणी है। 19 कने होर जातियां दे हथे देई देणा है। कने उना मेरा मजाक उडाना है, मिजो पर थुकणा, कने मिजो कोड़े मारणे, कने मिजो सूली पर चढ़ाई करी मारी देणा है, कने मैं तिजे दिने मरयां चे जिदे होई जाणा है।” 20 तालू जब्दी दे पुत्रां दिया माऊ अपने बचयां सोगी उदे बाल आई करी उसयो नमस्ते किते, कने उसला कुछ मंगणा लग्यो। 21 यीशुए उसा जो बोलया, “तू क्या चांही है?” उना उसयो बोलया, “ऐ बचन दे, कि मेरे ऐ दोनो पुत्र तैरे राज्य च, इक तैरे सजे पासे कने इक खबे पासे बेई सकन।” 22 यीशुए जबाब दिता, “तुसां जो नी पता कि तुसां क्या मंगा दे? हुण जडे दुख मैं सेहणे न, क्या तुसां उना दुखां जो सेहन करी सकदे न?” उना उसने बोलया, “हाँ करी सकदे न।” 23 यीशुए उना जो बोलया, “तुसां भी सारे दुख सेहणे न, जियां मैं सेहणे। पर अपने सजे कने खबे पासे बैठेलना मेरा कम्म नी है, पर जिना तांई मेरे पिता दिया तरफा ला तैयार कितया है, उना तांई ही न।” 24 ऐ सुणीकरी बाकी दसो चले याकूब कने यहून्ना पर गुस्सा करणा लग्यो। 25 तां यीशुए उना जो अपने बाल सदीकरी बोलया, “तुहांजो पता है ना, कि जडे लोक प्रधान मने जांदे थे, सै अपने अधिकारां दा इस्तेमाल अपने अधीन लोकां दे उपर हक जमाणे तांई करदे न। उना दे आग्वे लोक अपणी गल्ल मनाणे तांई हक जतांदे न। 26 तुसां चे जड़ा महान बणना चांदा है, उसयो बाकियां दी सेवा करणी चाईदी। 27 कने जड़ा कोई तुसां चे प्रधान बणना चांदा हो, सै सारायां दा नौकर बणे। 28 मैं ऐ इस तांई बोलदा है क्योंकि मैं माणुए दा पुत्र, इस संसारे च सारयां दी सेवा करणे तांई आया है, मैं इस तांई नी आया कि लोकां ला अपणी सेवा करां। मैं तां लोकां जो पापां ला छुटकारा करणे तांई अपने प्राण कीमत च देणा आया है।” 29 जालू सै यरीहो शहरे ला निकला दे थे, तां इक बड़ी बडी भीड़ उदे पिच्छे चली पेई। 30 दो अन्ने, जडे सड़का बखे बैठयो थे, ऐ सुणीकरी कि यीशु जा दा है, पुकारी करी बोलणा लग्यो, “हे प्रभु, दाऊदे दे बंशज, सांझो पर दया करा।” 31 लोकां उना जो झिड़कां दितियां, कि चुप रिया, पर सै होर भी जोरे ने चीलाई करी बोलणा लग्यो, “हे प्रभु, दाऊदे दी ओलाद, सांझो पर दया करा।” 32 तालू यीशुए खडोई करी, उना जो सदया, कने बोलया, “तुसां क्या चांदे न कि मैं तुहाडे तांई करे?” 33 उना उसने बोलया, “प्रभु जी, ऐ कि

साड़ियां हखी खूली जान।” 34 यीशुए तरस खाई करी उना दियां हखी छूतियां, कने उना जो झट मिलणा लग्गी पिया, कने सै उदे पिच्छे चली पै।

21 जालू सै यरूशलेम दे बखे पुज्जे कने जैतून सखां दे पाहडे पर बैतफगे जगा च आए, तां यीशुए दो चेलयां जो ऐ बोली करी भेजया, 2 “अपणे सामणे बाले गां च जा, ओथु पुजदे ही इक गधी बनियो होणी कने सोगी उसा दा बच्चा भी बनया होंगा। उना जो खोली करी मेरे बाल लेई ओआ। 3 अगर कोई तुहांजो ला पुच्छे, कि ऐ क्या करा दे न? तां बोलनयो, कि साडे प्रभु जो इदी जरूरत है, कने उनी माणुऐ तुसां जो लेई जाणा देणा है।” 4 ऐ इस ताई होया, कि जडा बचन परमेस्वरे दा संदेश देणेबाले बोलया था, सै पूरा हो: 5 “सियोन दिया कुडिया ने बोला, दिख, तेरा राजा तैरे बाल ओआ दा है, सै नम्र है, कने गधे पर बैठया है, मतलब कि लादूऐ दे बच्चे पर बेईकरी ओआ दा है।” 6 चेलयां जाई करी, तियां ही किता, जियां यीशुए उना ने बोलया था। 7 गधी कने उसा दा बच्चा लांदा कने उना पर अपने कपडे बछाई दिते, कने यीशु उस पर बेई गया। 8 कने मते लोकां अपने कपडे रस्ते च बछाऐ, कने केई लोकां सखा जो छांगी करी डालियौं रस्ते च बछाईयां। 9 कने थोडे लोक यीशु दे अगगे-अगगे चलयो थे, कने थोडे लोक पिच्छे चलयो थे, सै सारे खुशिया ने बोला दे थे, “दाऊदे दे बंशज दी होशाना; धन्य सै जडा प्रभु दे नाऐ ने ओदा है, स्वर्ग च होशाना।” 10 जालू यीशु यरूशलेम शहरे च पुज्जा, तां सारे नगरे च हिल पेई गेई, कने लोक बोलणा लग्गे, “ऐ कुण है?” 11 लोकां बोलया, “ऐ गलीले प्रदेश दे नासरते गां दा परमेस्वरे दा संदेश देणेबाला यीशु है।” 12 यीशुए परमेस्वरे दे मंदरे च जाई करी व्यापारी लोकां जो मंदरे ला कडी दिता, जडे ओथु जानवर कने चिजां खरीदणे बचने दा कम्म करा दे थे। कने पेसे बदलने बाले साहकारां दे मेज पलटी दिते, कने कबुरां जो बेचणे बालयां दियां चौकियां जो बाहर सुटी दिता। 13 कने यीशुए उना जो बोलया, पबित्र शास्त्र ऐ बोलदा है कि, “लोक मेरे घरे जो प्राथना दा घर बोलदे न, जिथु सारे लोक प्राथना ताई ओदे न? पर तुसां तां इसयो डाकुआं ने भरईयो गुफा सांई बणाई दितया है।” 14 तालू अन्ने कने लंगडे, मंदरे च उदे बाल आये, कने यीशुए उना जो खरा करी दिता। 15 पर जालू बड़े याजकां कने व्यवस्था जो सिखाणे बालयां इना अनोखे कम्मा जो दिखया, जडे यीशुए किते कने मंदरे च जागतां जो दाऊदे दे बंशजे जो होशाना बोलदे सुणया, तां सै गुस्सा होई गे, 16 कने उसयो बोलणा लग्गे, “तू क्या सुणा दा है कि ऐ क्या बोला दे न?” यीशुए उना ने बोलया, “हाँ, तुसां क्या ऐ कदी नी पढया की: जागतां कने दूध पिंदे बचयां दे मुऐ ला तू स्तुति कराई?” 17 तालू सै उना जो छडी करी नगरे दे बाहर बैतनिय्याह गां जो गया, कने ओथु रात बिताई। 18 ब्यागा जालू सै नगरे जो बापस ओआ दा था, तालू यीशुए जो भूख लग्गी। 19 सडका बखे अंजीर दा इक सख दिखया, कने सै उस बाल गया, कने उस सखे च पतयां जो छडी करी होर कुछ नी था, उनी उसयो बोलया, “हण तिजो पर कदी फल नी लगणे ना।” कने अंजीर दा सख झट सुकी गया। (aiōn g165) 20 ऐ दिखीकरी चले बडे हेरान होए, कने बोलणा लग्गे, “ऐ अंजीर दा सख झट कियां सुकी गया?” 21 यीशुए उना जो जबाब दिता, “मैं तुसां ने सच्च बोलदा है; अगर तुसां भरोसा रखन, कने शक नी करन; तां सिर्फ तुसां ऐ

नी करणा जडा इस अंजीर दे सखे ने किता है, अगर तुसां इस पाहडे जो भी बोलगे कि ऐथू ला पुटुई जा, कने समुंद्रे च जाई पो, तां ऐ होई जाणा।” 22 “कने जडे कुछ तुसां प्राथना च भरोसे ने मंगगे सै सारा कुछ तुसां जो मिलणा।” 23 सै मंदरे च जाई करी उपदेश करा दा था, तां बड़े याजकां कने यहदी व्यवस्था जो सिखाणे बालयां कने यहदी अमुवे उदे बाल आये कने उसयो पुछणा लग्गे, “तू ऐ कम्म कुसदे अधिकारे ला करता है? कने तिजो ऐ हक कुनी दितया है?” 24 यीशुए उना जो जबाब दिता, “मैं भी तुहांजो ला इक गल्ल पछदा है, अगर तुसां मिजो जबाब दिगे, तां मैं दसगा कि ऐ कम्म मैं कुसी हके ने करता है। 25 यहन्ना जो लोकां जो बपतिस्मा देणे ताई कुनी भेजया था? क्या सै परमेस्वरे भेजया था या माणुऐ? मिजो दसा।” तालू सै अपु चे बोलणा लग्गे कि अगर असां बोलया कि, “परमेस्वर जडा स्वर्ग च है उनी भेजया है, तां यीशुए सांझो ला पुछणा, कि तुसां यहन्ना पर भरोसा कन्नी किता?” 26 कने अगर बोलन माणुऐ दिया तरफा ला तां सांझो भीडा दा डर है, क्योंकि सै उना लोकां ला डरदे थे, जडे यहन्ना जो परमेस्वर दे पासे ला आया इक सच्चा परमेस्वरे दा संदेश देणेबाला मंदे थे। 27 उना यीशुए जो जबाब दिता, “असां नी जाणदे।” यीशुए भी उना जो बोलया, “तां मैं भी तुहांजो नी दसणा, कि ऐ कम्म मैं कुस हके ने करता है।” 28 “तुसां इसा कहाणिया ला क्या सोचदे कने समझदे न? कुसी माणुऐ दे दो जागत थे; उनी पेहले बाल जाई करी बोलया, अज अंगरा दे बागे च जाई करी कम्म कर।” 29 उनी जबाब दिता, मैं नी जाणा, पर बादे च उसयो पछताबा होया कने फिरी चली गया। 30 फिरी दुज्जे बाल जाई करी इयां ही बोलया, उनी जबाब दिता, जी हाँ मैं जांदा है, पर सै गया नी। 31 इना दोना चे कुनी परमेस्वरे दी इच्छा पुरी किती है? उना बोलया, “पेहले बाले।” यीशुए उना ने बोलया, “मैं तुसां ने सच्च बोलदा है, कि कर लेणेबाले कने वेश्यां तुहांजो ला पेहले परमेस्वरे दे राज्य च प्रवेश करणा है। 32 मैं ऐ इस ताई बोलया क्योंकि जालू यहन्ना बपतिस्मा देणेबाले तुहांजो दसया कि कियां सही तरीके ने जीणा है, कने तुसां उदा भरोसा नी किता। पर कर लेंगे बालयां कने वेश्यां अपने पापां जो छडी दिता कने उदा भरोसा किता: कने तुसां ऐ दिखीकरी बादे च भी नी पछताय कि उदा भरोसा करी लेंदे।” 33 “इक होर कहाणी सुणा: इक माणुऐ बागे च अंगर लाये। उनी बागे दे चारों पासे बाड लगवाया, कने इक जगा अंगरा दे रसे जो निचोडने ताई बणाई, कने निगरानी रखणे ताई इक उचिया जगा पर कमरा बनाया। फिरी उनी बागे जो कुछ किसाना जो ठेके पर देई दिता, कने परदेस जो चली गया। 34 फिरी जालू अंगर पक्की गे, तां उनी अपने नोकरां जो ठेकेदारे बाल अपना अंगरा दे बागे दा हिस्सा लोंगे ताई भेजया। 35 पर ठेकेदारां उदे नोकरां जो पकडी करी, कोई कूटया, कोई मारी दिता; कने केईयां जो पथरा ने मारया। 36 फिरी उनी पेहले ला भी जादा होर नोकरां जो भेजया, कने उना ठेकेदारां उना सोगी भी तियां ही किता। 37 आखरी च उनी अपने पुत्रे जो उना बाल ऐ सोची करी भेजया, कि उना मेरे पुत्रे दी इज्जत करणी। 38 पर ठेकेदारां पुत्रे जो दिखीकरी अपु चे बोलया कि, ऐ तां वारिस है, ओआ असां इसयो मारी दिन्दे न, कने इदी सारी जगा जमीन साडी होई जाणी। 39 कने उना उसयो पकडया कने अंगरा दे बागे ला बार

कडी करी मारी दिता। 40 इस ताई कि जालू अंगरा दे बागे दा मालिक ओगा तां, तां सै ठेकेदारां सोगी क्या करगा?" 41 उना उसने बोलया, "उनी उना बुरे लोकां जो बुरे तरीके ने खत्म करी देणा; कने अंगरा दे बागे दा ठेका होर किसाना जो देई देणा, जडे उसयो बकते पर फल दिगे।" 42 यीशुए उना ने बोलया, "तुसां क्या कदी पबित्र शास्त्रां च ऐ नी पढया: जिस पथरे जो राजमिस्त्रियां बेकार बोलया था, सै ही पथर कुंणे च सिरे दा पथर बनया? ऐ प्रभु दिया तरफा ला होया, पर साडिया नजरा च अनोखा है।" 43 इस ताई मै तुसां ने बोलदा है, कि परमेश्वरे दा राज्य तुहांजो ला लेई लेंणा है, कने ऐसे लोका जो देई देणा है जडे सै ही करगे जडा परमेश्वर चांदा है। 44 "जडा इस पथरे पर पोंगा, उदा चूर भुर होई जाणा; जिदे पर सै पथर पोंगा, उसयो पि सडना उनी।" 45 बड़े याजकां कने फरीसी उदिया इसा कहाणिया जो सुणीकरी समझी गे, कि सै साडे बारे च बोला दा है। 46 कने सै उसयो पकडना चांदे थे पर लोकां ला डरी गे क्योंकि सै उसयो परमेश्वरे दा संदेश देणेबाला मंदे थे।

22 यीशुए फिरि उना जो कहाणी सुणाई, 2 "स्वर्गे दा राज्य इक कहाणिया सांई है, इक राजा था जिनी अपने पुत्रे दा बियाह किता।" 3 उनी अपने नोकरां जो भेजया कि जिना जो नियुद्ध दितियो उना लोकां जो बियाह दिया धामा च सदा; पर सै कोई ओणा नी चांदे थे। 4 "फिरि उनी होर नोकरां जो ऐ बोली करी भेजया, कि नियुद्ध दितियो लोकां ने बोला: दिखा मै धाम तैयार करी दितियो है, कने सारा कुछ तैयार है; कने तुसां बियाये दिया धामा च ओआ। 5 पर सै बहाना लाइ करी चली गे: कोई अपने खेतारां जो, कोई अपने कम्म धंधे जो। 6 बाकी लोक जडे बचा थे उना नोकरां जो पकडी करी उना दा अनादर किता कने मारी दिता। 7 जालू राजे ऐ सुणया तालू राजे जो गुस्सा आया, कने उनी अपनी सेना भेजी करी उना हत्यारां जो मरवाया, कने उना दे शेहरे जो फुकी दिता। 8 तालू उनी अपने नोकरां ने बोलया, बियाये दी धाम तां तैयार है, पर सदयो लोक खांणे जोगे नी न। 9 इस ताई तुसां हर जगा जा, कने जितणे भी लोक तुसां जो मिलन, सबना जो बियाये दिया धामा ताई सदी लोआ। 10 उना नोकरां हर जगा पर जाई करी क्या बुरे, क्या भले, जितणे भी मिल्ले, सब गठेरे; कने बियाये बाला घर परोंणया ने भरई गया। 11 जालू राजा परोंणया जो दिखणे ताई अंदर आया, तां उनी ओथु इक माणुए जो दिखया, जिनी बियाये ताई खरे कपडे नी पायो थे। 12 राजे उसला पुछया, है मित्र, तू बिना बियाये दे नोए कपडे पाई करी ऐथु कजो आया? कने सै चुप होई गया। 13 तालू राजे नोकरां ने बोलया, इदे हथ-पैर बन्नी करी इसयो काल कोठडी च पाई दिया, ओथु उनी रोणा कने, दंद पीणे। 14 क्योंकि परमेश्वरे मते लोकां जो अपने बाल सदया है पर थोडे ही न जडे चुणयो न।" 15 तालू फरीसियां जाई करी अपु चे बिचार किता, कि उसयो कुस तरीके ने गल्लां च फसान। 16 उना अपने चेलयां जो हेरोदियां सोगी उदे बाल ऐ बोलणे जो भेजया, "गुरु जी, असां जो पता है कि तुसां हमेशा सच्च बोलदे न, कने परमेश्वरे दा रस्ता सच्चाईया ने दसदा है, कने कुदी भी परवाह नी करदे न, क्योंकि तू माणुए दा मुए दिखीकरी गल्ल नी करदा है। 17 इस ताई सांझो दस कि तू क्या सोचदा है? महाराजा जो कर देणा ठीक है, कि गलत है।" 18 यीशुए उना दी बुराई जाणी करी बोलया, "है कपटियों, मिंजो

कजो परखदे न?" 19 करे दा सिक्का मिंजो दसा। "तालू सै उदे बाल इक दीनार लेई आये।" 20 उनी, उना ला पुछया, "ऐ आकृति कने ना कुसदा है?" 21 उना उसने बोलया, महाराजा दा। तालू उनी उना जो बोलया, "जडा महाराजा दा है, सै महाराजा जो, कने जडा परमेश्वरे दा है, सै परमेश्वरे जो दिया।" 22 ऐ सुणीकरी सै हेरान होये, कने उसयो छडी करी चली गे। 23 उसी रोजे सदूकी जडे बोलदे थे कि मरयां दा जिन्दा होणा है ही नी सै यीशुए बाल आप्णे, कने उसला पुछया, 24 "गुरु जी, मूसा बोलया था, कि अगर कोई बिना ओलादी मरी जा, तां उदा भाई उदिया घरे बालिया ने बियाह करी के अपने भाई ताई बंश पैदा करे। 25 हुण साडे ऐथु सत भाई थे; पेहला भाई बियाह करिके मरी गया; कने ओलाद नी होणे दिया बजा ने अपणिया घरे बालिया जो अपने भाईऐ ताई छडी गया। 26 तां दुए भाईऐ उसा ने ही बियाह करी लिया कने से भी बिना ओलादी मरी गया, कने इयां ही तिजे भाई ने होया कने सतां भाईयां उसा ने बियाह किता कने सतो भाई बिना ओलादी मरी गे। 27 सबना दे बाद सै जनानी भी मरी गई। 28 हुण, सांझो दस सतां भाईयां उसा जनानिया ने बियाह किताया था, जालू सै मरणे दे बाद फिरि जिन्दे होंगे, तां सै जनानी कुदी घरे बाली होणी?" 29 यीशुए उना जो बोलया, "तुसां दो बजा ने गलत न, तुसां पबित्र शास्त्र जो नी जाणदे ने जडा मरणे दे बाद लोकां जो जिन्दा रेणे दे बारे च दसदा है। तुसां ऐ नी जाणदे कि परमेश्वर बाल मरे होये लोकां जो जिन्दा करणे दी शक्ति है।" 30 क्योंकि जालू उना मरयां चे जिन्दा होणा, तां उना लोका दे बियाह नी होणे; जियां स्वर्गे च रेणेबाले स्वर्गदूत बियाह नी करदे। 31 "मरयां चे जिन्दा होणे दे बारे तुसां क्या मूसा दिया कताबां च नी पढया जडा परमेश्वरे तुसां जो बोलया: 32 मै अब्राहम दा परमेश्वर, कने इसहाक दा परमेश्वर, कने याकूब दा परमेश्वर है? सै मरयां दा नी, पर जिन्दया दा परमेश्वर है।" 33 ऐ सुणीकरी लोक उदे उपदेशे ला हेरान होए। 34 जालू फरीसियां सुणया कि यीशुए सदूकियां दा मु बंद करी दितया है, तां सै गिठे होए। 35 उना चे इकी यहूदी मूसा दी व्यवस्था जो सिखाणे बाले परखणे ताई, यीशुए ला पुछया, 36 "गुरु जी, परमेश्वरे जडे भी हुकम दितयो न, उना सारयां चे सारयां ला बडा हुकम कुण दिया है?" 37 उनी उना जो बोलया, "तू अपने प्रभु परमेश्वर ने अपने सारे तन मन कने सारे प्राण कने अपणिया सारिया अकला सोगी प्यार कर।" 38 सारयां ला बडा कने मुख्य हुकम तां ऐ ही है। 39 कने उस सांई ऐ दूजा हुकम भी है, कि तू अपने पडोसियां सोगी अपने सांई प्यार रख। 40 "इना दो हुकमा पर ही सारी व्यवस्था कने भविष्यवाणियां आधारित न।" 41 जालू फरीसी गिठे थे, तां यीशुए उना ला पुछया, 42 "मसीह दे बारे च तुसां क्या सोचदे न? सै कुदा पुत्र है?" उना यीशुए ने बोलया, "दाऊदे दा बंशज।" 43 यीशुए उना ला पुछया, "तां दाऊद आत्मा च होईकरी उसयो प्रभु कजो बोलदा है?" 44 "प्रभुऐ, मेरे प्रभु ने बोलया, मेर सजे पासे बो, जालू दीकर मै तेरे दुशमणा जो तेरे पैरां हेठ नी करी दें।" 45 "भला, जालू दाऊद ही उसयो प्रभु बोलदा है, तां सै उदा पुत्र कियां होया?" 46 उदे जबाबे च कोई भी कुछ नी बोली सकया। पर उस रोजे ला कुसयो भी फिरि उसला पुछणे दी हिम्मत नी होई।

23 ताल् यीशुऐ भिडा कने अपने चेलयां जो बोलया, 2 “फरीसियां कने व्यवस्था जो सिखाणे बालयां जो मूसा दिया व्यवस्था दी व्याख्या करणे दा हक है।” 3 इस ताई सै तुसां ने जडा कुछ बोलगे सै तुसां करणा कने मनणा, पर जडा सै करदे न सै मत करदे; क्योंकि सै उपदेश दा दिन्दे न पर उना दा पालन नी करदे। 4 सै अपु अपनी व्यवस्था दा पालन करणे दी कोशिश भी नी करदे। कने ऐसे नियम बणादे न जिना दा पालन करणा बडा मुशकिल है। 5 सै अपने सारे कम्म लोकां जो दसणे ताई करदे न: सै अपनीया बाई कने मथे पर पटियां बनदे न जिना च पबित्र शाब्ब दे बचन लिखयो होंदे न, कने अपने कपडयां दियां झालरां बंदेदे न। 6 धामा च समानित जगा च बोणा चांदे न, कने यहूदी जंज घर च भी खास-खास आसना पर बोणा पंसद करदे न, 7 बजारां च सारे लोक उना जो नमस्ते कने सारे उना जो गुरू जी बोलन सै उना जो खरा लगदा है। 8 पर तुसां गुरू मत बण्दे, क्योंकि तुहाडा इक ही गुरू है: कने तुसां सारे भाई-बेहणा साईं न। 9 कने अपने पिता जो छडी करी कुसयो भी धरतिया पर अपने पिता परमेश्वरे दा आदर मत दिन्दे क्योंकि तुहाडा इक ही पिता है, जडा स्वर्ग च है। 10 कने कुसी दे गुरू भी मत बण्दे, क्योंकि तुहाडा इक ही गुरू है, मतलब कि यीशु मसीह। 11 जडा तुसां चे बडा है, सै तुहाडा सेवक बणे। 12 जडा कोई अपने आपे जो बडा बणांगा, सै नम्र करी देणा: कने जडा कोई अपने आपे जो छोटा बणांगा, सै बडा करी देणा। 13 “हे कपटी व्यवस्था जो सिखाणे बाले कने फरीसियों, तुहांजो ताई बडा बुरा होणा है। तुसां लोकां जो स्वर्ग दे राज्य च जाणे दी इजाजत नी दिन्दे, ना तां अपु स्वर्ग च जाणा, कने ना तां स्वर्ग जाणे बालयां जो जाणा दिन्दे न।” 14 “हे कपटी व्यवस्था जो सिखाणे बालयो कने फरीसियां, तुहांजो ताई बडा बुरा होणा है। तुसां धोखे कने वेईमानिया ने विधवां दे घरां दी चिजां पर कब्जा करी लेंदे है। कने लोकां जो दसणे ताई बडी देरा दीकर प्रार्थना करदे न, परमेश्वरे इना जो बडी बुरी सजा देणी है।” 15 “हे कपटी यहूदी व्यवस्था जो सिखाणे बाले कने फरीसियों, तुहांजो ताई बडा बुरा होणा है। तुसां इक जणे जो अपने भरोसे च लोंगे ताई सारियां जगा च दुः-दुः दीकर गुमदे फिरदे रेंदे न, कने जालू सै भरोसे च आई जांदा है, तां उसयो अपने ला दुगणा नरक जाणे जोगा बणाई दिन्दे न।” (Geenna g1067) 16 हे अन्ने अगुवाई करणे बालयो, तुहांजो ताई बडा बुरा होणा है, कि तुसां सिखांदे न कि अगर कोई मंदरे दी कसम खा तां कोई फरक नी है, पर अगर कोई मंदरे दे सोने दी कसम खा तां उदे ताई कसम पूरी करणा जरूरी होई जांदा है। 17 है मूर्खो, कने अन्नयो कुण बडा है, मंदरे दा सोना या सै मंदर जिसला सै सोना पबित्र होंदा है? 18 कने फिरी तुसां ऐ भी सिखांदे न कि अगर कोई वेदी दी कसम खा तां कुछ फर्क नी है, पर जडी भेंट उस पर चढाई है, अगर कोई उसा दी कसम खा तां फर्क पोंदा है। 19 हे अन्नयो, कुण बडा है, भेंट या वेदी जिसने भेंट पबित्र होंदी है? 20 इस ताई जडा वेदी दी कसम खांदा है, सै उदी कने जडा कुछ उसा पर है, उदी भी कसम खांदा है। 21 कने जडा मंदरे दी कसम खांदा है, सै उदी कने उदे च रेणेबाले परमेश्वरे दी भी कसम खांदा है। 22 कने जडा स्वर्ग दी कसम खांदा है, सै परमेश्वरे दे सिहांसने दी भी कने उस पर बोणे बाले दी भी कसम खांदा है। 23 यहूदी व्यवस्था जो सिखाणे

बाले कने फरीसियों, तुहांजो ताई बडा बुरा होणा है। तुसां पुदीने, कने सौफ, कने जरि, दा तां दसमां हिंसा दिन्दे न, पर तुसां व्यवस्था दियां जरूरी गल्लां जो मतलब कि न्याय, कने दया, कने इमानदार होणा छडी दिता है; तुहांजो दशमांश तां दिन्दे रेणा चाईदा था, पर इना गल्लां जो भी नी छडणा चाईदा था। 24 हे अन्ने यहूदी अगुवो, (अगुवाई करणे बाले) तुसां जडे नियम जरूरी नी न उना जो तां बडिया साबधानिया ने मंदे न, जियां कि पिंदे बेले माखियां जो दूर करदे पर परमेश्वरे दी जरूरी गल्लां जो मंदे नी न! ऐ ऊंटे जो निगलने साईं है। 25 “यहूदी व्यवस्था जो सिखाणे बाले कने फरीसियों, तुहांजो ताई बडा बुरा होणा है। तुसां ऐसे कटोरे कने भांडे साईं न जडे तां उपरे-उपरे ला तां साफ न, पर अंदरे ला अजे भी गंदे न। सै ऐ कि, तुसां अपने आपे जो भले लोकां साईं दसदे न, पर तुहाडे मन लालची कने मतलबी न।” 26 हे अन्ने फरीसी, पेहले तुसां जो लालची कने मतलबी होणा रोकी देणा चाईदा तां तुसां से ही करी सकणा जडा धर्म है। 27 “यहूदी व्यवस्था जो सिखाणे बाले कने फरीसियों, तुहांजो ताई बडा बुरा होणा है। तुसां तां उना सफेदी कितियां कबरां साईं न जडियां उपरे ला तां छेल मिलदियां न, पर अंदर मुर्दयां दियां हडियां कने हर तरा दियां गंदगिया ने भरइयां न।” 28 इना कबरां साईं तुसां भी उपरे ला तां माणुऐ जो धर्मी लगदे न, पर तुसां अंदरे ला कपट कने पापां ने भरयो न। 29 “यहूदी व्यवस्था जो सिखाणे बाले कने फरीसियों, तुहांजो ताई बडा बुरा होणा है। तुहाडे पूर्वजां जिना परमेश्वरे दा संदेश देणेबालयां जो मारया था उना दियां कबरां जो सजांदे न कने धर्मी लोकां दियां कबरां जो सम्मानित करदे न।” 30 कने बोलदे न कि, अगर असां अपने बाप दादयां दे बकते च होंदे तां असां परमेश्वरे दा संदेश देणेबालयां दिया हत्या च हिस्सेदार नी होंदे। 31 इसला तां तुसां अपु ही साबित करदे न कि तुसां उना लोकां दे बंशज न जिना परमेश्वरे दा संदेश देणेबालयां दी हत्या कितियो। 32 तुसां उस बुराईया जो पूरा करणे बाले न जिसयो तुहाडे पूर्वजां शुरू कितया था। 33 हे जहरीले सपां दे बचयां साईं लोको कने कैतों दे बच्चयों, तुसां नरके दिया सजा ला नी बचणा है। (Geenna g1067) 34 इस ताई मैं तुहाडे बाल परमेश्वरे दा संदेश देणेबालयां जो भेजदा है। कने, बुद्धिमान, कने व्यवस्था जो सिखाणे बालयां जो भेजदा है; तुसां इना चे थोडयां जो मारी देणा हे, कने केईयां जो सूली पर चढाना कने केईयां जो अपने यहूदी जंज घर च कोडे मारणे, कने इकी शेहरे ला दुजे शेहरे जो नठाने न। 35 धर्मी हाबिल ला लेईकरी बिरिक्याह दे पुत्रे जकयाह दीकर, जिसयो तुसां मंदरे कने वेदिया दे बिच मारया था, जितणया धर्मियां दी हत्या इसा धरतिया च होईयो है, उना सारयां ताई तुसां जो दोषी बोलणा। 36 “मैं तुसां ने सच्च बोलदा है, इना सारियां हत्या दी सजा इस बकते दे लोकां पर आई पोणी है।” 37 “यस्शलेम शेहरे दे लोको, हे यस्शलेम दे लोको! तुसां जडे परमेश्वरे दा संदेश देणेबालयां जो मारी दिन्दे न, कने जीना जो तुहांजो बाल भेजदे न, उना जो पथरा ने मारदे न, कितणी बरी मैं चाया कि जियां मुर्गी अपने बचयां जो बचाणे ताई फंगा हेठ गिठे करी लेंदी है, तियां ही मैं भी तुसां जो गिठे करी लेणा, पर तुसां नी चांदे कि ऐसा हो।” 38 दिखा, तुहाडा मंदर तुहाडे ताई उजाडी छडया है। 39 “क्योंकि मैं तुसां ने बोलदा है, हुणी ला

जालू दीकर तुसां नी बोलगे, कि धन्य है सै, जडा प्रभु दे अधिकारे ने ओंदा है, तालू दीकर तुसां मिंजो फिरी कदी नी दिखणा है।”

24 जालू यीशु मंदरे ला निकली करी जा दा था, तां उदे चेले उसयो मंदरे दी बनावटा जो दसणे ताई उदे बाल आये। 2 उनी उना जो बोलया, “क्या तुसां ऐ सारा कुछ दिखा दे ना। मैं तुसां ने सचच बोलदा है, ऐथू इक भी पथरे पर पथर नी रेंणा है, जडा ढाया नी जाणा है।” 3 जालू सै जैतून खांडे पाहडे पर बैठया था, तां चेलयां उदे बाल आई करी उसला पुछया, “सांझो दस ऐ सब कुछ काल होणा है? कने जालू ऐ सब कुछ पूरा होणेबाला होंगा तां उदा क्या निशाण होणा है?” (aion g165) 4 यीशुऐ उना जो जबाब दिता, “ध्यान रख्यो कि तूहांजो कोई भटकाई न दे।” 5 क्योकिं मते सारे लोकां मेरे नाए ने दाबा करिके ओणा है। उना बोलणा है, मैं मसीहा हूँ कने उना मतयां लोकां जो भटकाणा है। 6 जालू तुसां लडाईयां, कने लडाईयां दियां गल्लां सुणगे तां डरदे मत; क्योकिं इना दा होणा जरूरी है, पर तालू संसारे दा खात्मा नी होणा है। 7 क्योकिं जातियां ने जातियां कने राज्य ने राज्यां ने इक दुजे ने लडाईयां करणियां न। कने हर कुथी हिलण होणे न कने अकाल पोणे न। 8 ऐ तकलीफ कने दुख इयां होणा जियां इक माँ जो बच्चे दे जन्म देणे दिया शुरूआत च होंदा है। 9 “तालू सै लोक जडे तुहाडे खिलाफ न, उना तूहांजो दुख देणे ताई पकडाई देणा है, कने तूहांजो मारी देणा है, कने सारियां जातियां दे लोकां तुसां ने दुशमणी रखणी है क्योकिं तुसां मिंजो पर भरोसा रखदे न।” 10 तालू मतयां मिंजो पर भरोसा करणा बंद करी देणा, कने इक दुज्जे जो पकडाणा कने इक दुजे ने दुशमणी रखणी। 11 मतयां परमेस्वरे दे संदेश देणेबालयां झूठे लोकां ओणा है, कने उना मतयां जो भटकाणा। 12 पाप बरणे दिया बजा ने मतयां इक दुज्जे ला प्यार करणा बंद करी देणा है। 13 पर जडा जिंदगी दे अंत दीकर मिंजो पर भरोसा रखगा सै ही बचाया जाणा है। 14 कने स्वर्गे दे राज्य दा ऐ शुभसमाचार दा प्रचार सारे संसारे च करणा है, ताकि सारे देशां दियां सारियां जातियां जो इसयो मनणे दा मोका मिल्ले, तालू अंत होई जाणा है। 15 “इस ताई जालू तुसां इक उजाड़ने बाली बडी बुरी चिजा जो यरूशलेम मंदिर च खडोतयो दिखगे, जिदी चर्चा परमेस्वरे दा संदेश देणेबाले दानियेले किती थी, (जडे पढन, सै समझन)।” 16 तालू यहूदिया प्रदेशे दे लोकां जो जान बचाणे ताई पहाडा जो नसणा पोणा। 17 जडे छती पर होंगे, सै अपने घरे चे समान लेणे ताई थले मत उतरदे। 18 कने जडे खेतयां च होंगे, सै अपने कपडे लेणे ताई बापस मत जांदे। 19 उना रोजां च उना जनानिया ताई बडा बुरा बकत होणा जडियां लैरथियां होणियां न, कने उना जनानियां ताई जडियां नियाणे जो दूध पियादियां होंगियां। 20 इस ताई प्रार्थना करा कि ऐ बुरा बकत सर्दियां दे दिना च या सब्ते दे दिना ना हो, जालू सफर करणा मुशकिल हो। 21 क्योकिं उना दिना लोकां जो बडे दुख होणे न, जदिया संसार दे शुरू ला हुणे दीकर कदी नी होया कने ना कदी होणा। 22 “अगर परमेस्वरे उसी बुरे बकते जो नी घटायां, तां कोई भी माणु नी बचदा। पर उना चुणयो होए लोकां दिया बजा ला, जिना जो परमेस्वरे चुणयां है, बकत घटना है।” 23 “उस बेले तुसां जो कोई बोले, कि दिखा, मसीह ऐथू है! या ओथु है! तां भरोसा मत करदे।” 24 क्योकिं झूठे मसीह कने परमेस्वरे

दा संदेश देणेबाले झूठे लोकां मतयां ओणा है, कने उना बडे चमत्कार कने अनोखे कम्म दसणे न, ताकि होई सके तां जडे चुणयो न उना जो भटकाई दें। 25 मैं पेहले ला ही तुसां ने ऐ सब कुछ बोली दिता है। 26 इस ताई अगर सै तुसां ने बोलन, कि दिखा, सै सुनसान जगा च है, तां बाहर मत निकलदे; दिखा, सै कोठडियां च है, तां भरोसा मत करदे। 27 क्योकिं जियां बिजली पूर्व ला निकली करी पन्थिम दीकर चमकदी जांदी है, तियां ही माणुऐ दे पुत्रे भी ओणा है। 28 “जिथू लाश होऐ, ओथु ही इल्लां गिठियां होणा है।” 29 “उना दिना च, बुरा कने दुखे बाल बकत मुकी जाणे दे बाद, सरजे च अंधेरा होई जाणा, कने चद्रमं रौशनी नी देणी। अम्बरे ला तारायां पेई जाणा, कने अम्बरे दियां शक्तियां हिलाईयां जाणियां।” 30 “तालू मैं, माणुऐ दे पुत्रे दा निशाण अम्बरे च मिलणा, तालू धरतिया दे सारे कुलां दे लोकां छाती पिटणी; कने माणुऐ दे पुत्रे जो बडे सामर्थ्य कने महिमा सोगी बदलां पर ओंदे दिखणा।” 31 “उनी तुरही दी जोरे दिया अबजा ने अपने स्वर्गदूतां जो भेजणा है, ताकि सै उना सारे लोकां जो गठेरी करी, जिना जो मैं चुणयां है कने उना संसारे दे चारों पासयां ला लोका जो गठेरणा है।” 32 “अंजीर दे स्खे दिया कहाणिया ला ऐ सिखा: जालू उदिया डालियाँ नरम होई जांदियां न कने पते निकलना लगदे न, तां तूहांजो पता लगी जांदा है कि गर्मियां ओणे बालियां न। 33 इयां ही जालू तुसां इना सारियां गल्लां जो होंदे दिखदे न, तां समझी जा कि मैं, माणुऐ दे पुत्रे दा ओणा नेडे ही है, मतलब कि दरबाजे पर ही है।” 34 मैं तुसां ने सचच बोलदा है, कि जालू दीकर ऐ सारियां गल्लां पुरियां नी होई जांदियां न, तालू दीकर इसा पीढिया दा अंत नी होणा है। 35 अम्बर कने धरती खत्म होई जाणे, पर मेरियां बोलियां गल्लां कदी नी टलनिया न, सै हमेशा रेंणियां न। 36 ऐ गल्लां कुसी रोजे या कुसा घडिया होणिया न कोई भी नी जाणदा है, ना स्वर्गदूत कने ना ही मैं माणुऐ दा पुत्र, पर सिर्फ पिता ही उसी रोजे कने घडिया जो जाणदा है। 37 “जियां नूह दे रोज थे, तियां ही माणुऐ दे पुत्रे दा ओण भी होणा है।” 38 क्योकिं जियां जल-प्रलय ला पेहले दे दिना च, जिस रोजे दीकर नूह जहाजे पर नी चढया था, तालू दीकर लोक खांदे पिंदे थे, कने उना चे बियाह होंदे थे। 39 कने जालू दीकर जल-प्रलय आई करी उना जो रूडाई नी लेई गेई, तालू दीकर उना जो कुछ भी पता नी था, तियां ही मैं माणुऐ दे पुत्रे भी ओणा है। 40 उस बेले दो जणे खेतरे च होणे न, इक लेई लेंणा है कने दूजा छडी जाणा है। 41 दो जनानिया चक्की पिसा दियां होणिया, इक लेई जाणी, कने दूई छडी देंणी है। 42 “इस ताई जागदे रिया, क्योकिं तूहांजो नी पता है कि तुहाडे प्रभुये कुस रोजे ओणा है।” 43 पर ऐ जाणी लिया कि अगर घरे दे मालिके जो पता होंदा कि चोरे कालू ओणा है, तां सै जागदा रेंदा, कने अपने घरे चोरी नी होणा दिन्दा। 44 इस ताई तुसां भी तैयार रिया, क्योकिं जिसा घडिया दे बारे च सोचदे भी नी न, उसा घडिया माणुऐ दे पुत्रे आई जाणा है। 45 सै भरोसे जोगा कने अकला बाला नोकर कुण है, जिसयो मालिके अपने नोकरां चाकरां दा सरदार बणाया है, ताकि बकते पर उना जो खांणा खाणे दे? 46 धन्य है सै दास, जिसयो उदा मालिक आई करी उसयो ऐदिया करदा दिखे। 47 मैं तुसां ने सचच बोलदा है; सै उसयो अपणिया सारिया संपतिया दा अधिकारी बणाणा है। 48 “पर अगर सै बुरा

नोकर सोचणा लग्गे, कि मेरे मालिके जो ओणे जो देर है।” 49 कने अपने सोगी नोकरां जो कूटणा लग्गे, कने शराबियां सोगी खा पिए। 50 तां उस नोकरे दे मालिके ऐसे रोजे बापस ओणा है, जिस रोजे सै उदी राह नी दिखा दा हो, कने ऐसी घडी कि उसयो पता ना हो, 51 कने उसयो सकत सजा देईकरी, उदा हिस्सा कपटियां सोगी जोड़े, तालू उनी रौणा कने दंद पिणे।

25 फिरी यीशुए अपने चेलयां ने बोलया, जालू मै, माणुए दे पुत्रे बापस ओणा है, तालू स्वर्गे दा राज्य ऐसा होणा है: दसां कुआरियां अपणिया मशालां लेईकरी लाडे जो मिलने तांई उदे बियाये जो जाणा। 2 उना चे पंज जणियां मुख कने पंज समझदार थियां। 3 उना मुख कुआरियां अपणिया मशालां तां लियां, पर अपने सोगी जादा तेल नी लांदा। 4 पर समझदार कुआरियां अपणियां मशालां सोगी अपणिया-अपणिया कुपियां च तेल भी भरी लांदा। 5 जालू लाडे जो ओणे च देर होई, तां सै बोर होणा लगियां, कने सै सोई गियां। 6 पर अधिया राती रोल्ला पिया, कि दिखा, लाडा ओआ दा है, उसला मिलने तांई चला। 7 तालू सै सारियां कुंवारियां उठी करी अपणिया-अपणिया मशालां ठीक करणा लगियां। 8 कने मुखी समझदारां ने बोलया, अपने तेले च थोडा सांझो भी दिया, क्योंकि सांझां मशालां बुझी जा दियां ना। 9 पर समझदारां जबाब दिता, कि ऐ साडे कने तुहाडे तांई कदी पूरा नी होणा; ठीक तां ऐ है, कि तुसां बेचने बाले बाल जाई करी अपने तांई खरदी लिया। 10 जालू सै खरीदणा जा दियां थियां, तां लाडा आई रिया, कने जडियां तैयार थियां, सै उदे सोगी बियाह बाले घरे जो चली गियां कने घरे दा दरबाजा बंद करी दिता। 11 “इदे बाद सै दुईयां कुआरियां भी वापिस आई करी रौंदे होऐ लाडे जो सदणा लगियां, है स्वामी, है स्वामी, साडे तांई दरबाजा खोली दिया।” 12 “उनी जबाब दिता, कि मै तुसां ने सच्च बोलदा है कि, मै तुहांजो नी जाणदा है।” 13 “इस तांई जागदे रिया, क्योंकि तुसां नी जाणदे मेरे बापस ओणा दा रोज, कने सेह बकत कालू ओणा है।” 14 “फिर यीशु ने इक होर कहाणी दसी कि मै जालू बापस ओणा है, तालू स्वर्गे दा राज्य ऐसा होणा: इक माणु था जिनी परदेस जांंदे बेले अपने नोकरां जो सदीकरी अपनी सारी जमीन जयादात उना जो देई दिती।” 15 उनी इकी जो पंज तोड़े, दुज्जे जो दो, कने तरिये जो इक, हर इकी जो उदिया शक्तिया दे अनुसार दिता, कने फिरी परदेस चली गया। 16 तालू जिसयो पंज तोड़े मिलयो थे, उनी झट जाई करी उना ने लैन-दैन किता, कने पंज तोड़े होर कमाई ले। 17 इसी तरीके ने जिसयो दो मिलयो थे, उनी भी दो होर कमाई ले। 18 पर जिसयो इक ही तोडा मिलया था, उनी जाई करी मिटी खूणी, कने अपने मालिके दे पेसे लुकाई दिते। 19 मते रोजां बाद मालिके आई करी उना नोकरां जो गिटे सदया कि उना उदे पैसयां ने क्या किता। 20 जिसयो पंज तोड़े मिलयो थे, उनी पंज तोड़े होर आंणी करी बोलया, है मालिक, तू मिजो पंज तोड़े दिते थे, दिख मै पंज तोड़े होर कमायो ना। 21 उदे मालिके उसयो बोलया, धन्य, तू खरा कने भरोसे दे लाइक नोकर है, तू थोड़े पैसयां जो सम्भालने कने भरोसे दे लाइक रिया है; मै तिजो होर मतियां चिजा दा अधिकारी बणाणा है। अपने मालिके सोगी खुश हो। 22 कने जिसयो दो तोड़े मिलयो थे, उनी भी आई करी बोलया, है मालिक तू मिजो दो तोड़े दिते थे,

दिख, मै दो तोड़े होर कमायो ना। 23 उदे मालिके उसयो बोलया, धन्य, तू खरा कने भरोसे दे लाइक नोकर है, तू थोड़े पैसयां जो सम्भालने कने भरोसे दे लाइक रिया, मै तिजो मतियां चिजा दा अधिकारी बणांगा। अपने मालिके सोगी खुश हो। 24 तालू जिसयो इक तोडा मिलया था, उनी आई करी बोलया, है मालिक, मै तिजो जाणदा था कि तू बडा सकत माणु है: तू दुजे लोका दे कम्मे ला फायदा कमाणे दी आस रखदा है, कने जिथू तू नी खलारदा है ओथु तू बटोलदा है। 25 तांई तां मै डरी गया कि अगर मै तेरा पैसा गवाई दिता तां तू मिजो सजा देणी, इस तांई जाई करी मै तेरा तोडा मिटिया च लुकाई दिता; दिख, जडा तेरा है, सै ऐ है। 26 उदे मालिके उसयो जबाब दिता, हे दुष्ट कने आलसी नोकर; तिजो पता था कि, मै दुजे लोका दे कम्मे ला फायदा कमाणे दी आस रखदा है। 27 तां तिजो ऐसा करणा चाईदा था कि, मेरा पैसा सर्राफों जो देई दिन्दा, फिरी मै आई करी अपना पैसा उना ला ब्याजे समेत लेई लेंदा। 28 तालू मालिके बाकी नोकरां जो बोलया, “तोड़े जो इसला लेई लिया, कने जिदे बाल दस तोड़े न, उसयो देई दिया। 29 जिना बाल समझणे दी इच्छा है जडा परमेस्वर सिखांदा है, उसयो परमेस्वर होर समझ देणी, पर जडा समझणे दी इच्छा नी रखदा, कि मै क्या सिखांदा, तां सै जडा समझया है, परमेस्वर सै भी उसला लेई लेणा।” 30 कने इस नकमे नोकरे जो मेरे च पाई दिया, जिथू उनी रौणा कने दंद पीणे। 31 “जालू मै, माणुए दे पुत्रे अपणिया महिमा च ओणा है, कने स्वर्गदूते उदे सोगी ओणा, तालू लोकां दा न्याय करणे तांई उनी अपने महिमा दे सिहांसने पर विराजमान होणा।” 32 कने सारियां जातियां मेरे सामणे गिटियां करणियां न; जियां पुहाल भेडां जो बकरियां ला लग करी दिन्दा है, तियां ही उनी भी उना जो इक दुजे ला लग करणा है। 33 कने मै धर्मी लोका जो अपने सजे पासे कने अधर्मियां लोका जो खबे पासे खरेडना है। 34 “तालू मै राजे अपने सजे पासे बोणे बालयां ने बोलणा कि, हे मेरे पिता दे धन्य लोको, ओआ, कने उस राज्य दे अधिकारी बणी जा, जडा संसारे दे शुरू होणे ला तुहाडे तांई तैयार कितया है।” 35 क्योंकि मै जालू भूखा था, तां तुसां मिजो खांणे जो खाणा दिता, जालू मै प्यासा था, तां तुसां मिजो पांणी पियाया, मै इक परदेसी था, तुसां मिजो अपने घरे रियाया। 36 जालू मै नंगां था, तुसां मिजो कपडे दिते, मै बिमार था, तुसां मेरा हाल चाल पुछया, मै जेला च था, तां तुसां मिजो ने मिलणा आये। 37 “तालू धर्मियां उसयो जबाब देणा, कि प्रभु जी, असां कालू तिजो भूखा दिखया कने खुआया? या प्यासा दिखया, कने पांणी पियाया?” 38 असां कालू तिजो परदेसी दिखया कने अपने घरे रियाया या नंगा दिखया, कने कपडे दिते? 39 असां तिजो कालू बिमार कने जेला च दिखया, कने तिजो ने मिलणा आये? 40 “तालू मै राजे उना जो जबाब देणा, मै तुसां ने सच्च बोलदा है, कि जडा तुसां मेरे इना छोटे ला छोटे चले चे कुसी इकी दे सोगी कितया है, सै ही मेरे सोगी कितया है।” 41 “तालू उनी खबे पासे बालयां ने बोलणा है, हे श्रापित लोको मेरे सामणे ला इसा कदी नी बुझणे बालिया अग्गी च चली जा, जडी शैताने कने उदे दूतां तांई परमेस्वर तैयार कितया है।” (aiōnios g166) 42 क्योंकि मै भूखा था, तुसां मिजो खांणे जो नी दिता, मै प्यासा था, कने तुसां मिजो पांणी नी पियाया; 43 मै परदेसी था, कने

तुसां मिंजो अपने घरे नी रियाया; मैं नंगा था, कने तुसां मिंजो कपडे नी दिते; कने मैं बिमार कने जेलां च था, तां तुसां मेरा हाल चाल नी पुछया। 44 “तालू उना जबाब देणा, कि प्रभु जी, असां तिजो कालू भूखा, या प्यासा, या परदेसी, या नंगा, या बिमार, या जेला च दिखया, कने तेरी सेवा या टहल नी किती?” 45 “तालू मैं उना जो जबाब देणा, मैं तुसां ने सच्च बोलदा है कि तुसां जडा इना छोटे ला छोटे चेले चे कुसी इकी दे सोगी नी कितया है, से मेरे सोगी भी नी किता है।” 46 कने सै जडे खबे पासे न इना जो हमेशा दी सजा मिलणी है पर धर्मी लोका हमेशा दिया जिन्दगिया च प्रवेश करणा है। (aiōnios g166)

26 जालू यीशु ऐ सारियां गल्लां बोली बैठा, तां अपने चेलयां ने बोलणा लग्गा। 2 “तुहांजो पता है, कि दो दिना बाद फसह दा त्योहार होणेबाला है, कने माणुऐ दा पुत्र सूली पर चढ़णे तांई पकड़ाया जाणा है।” 3 तालू बड़े याजक कने प्रजा दे यहूदी अगुवे कैफा नाऐ दे महायाजक दे अंगणे च गिठे होऐ, 4 कने अपु चे बिचार करणा लगे कि यीशुऐ जो धोखे ने पकड़ी करी मारी दें। 5 पर सै बोलदे थे, कि त्योहारे दे बकत नी, कुथी इयां ना होऐ कि लोकां च रोल्ला पेई जा। 6 जालू सै बैतनिय्याह ग्रां च शमौन कोढ़ी दे घरे था, जिसयो यीशुऐ ठीक कितया था। 7 जालू यीशु खाणा खाणे तांई बैठया था तां इक जनानी संगमरमरे दे भांडे च बड़ा मेंहगा इन्न लेईकरी उदे बाल आई कने, तां उना सै इन्न उदे सिरे पर नियोरी दिता। 8 ऐ दिखीकरी उदे चेले हेरान होऐ कने बोलणा लगे, “इस इत्णे मेंगे इन्ने जो सत्यानाश नी करणा चाईदा? 9 इसयो तां खरे दामे च बेची करी कंगालां जो बंडी सकदे थे।” 10 ऐ जाणी करी यीशुऐ उना ने बोलया, जनानिया जो कजो तंग करा दे न? उना मिंजो ने खरा किता है। 11 कंगालां तां तुहाडे सोगी हमेशा रेंणा है, पर मैं तुहाडे सोगी हमेशा नी रेंणा है। 12 इना जडा इन्न मेरे शरीर पर नियोरया है, सै इना मिंजो मरणे ला पहले ही दफनाणे दी तैयारी किती है। 13 “मैं तुसां ने सच्च बोलदा है, कि सारे संसार च जिथू कुथु भी ऐ शुभसमाचार सुणाया जांगा, ओथु इसा दे इस कम्मे दी चर्चा भी इसा दिया यादा च होणी।” 14 यहूदा इस्करियोती, जडा बाहरां चेलयां चे इक था, उनी बड़े याजकां बाल जाई करी बोलया, 15 अगर मैं उसयो तुहाडे हथे पकड़ाई दे, “तां मिंजो क्या दिगे? उना उसयो ती चांदिये दे सिक्के तोली करी देई दिते।” 16 कने सै तालू ला ही उसयो पकड़ाने दा मोका तोपणा लगी पिया। 17 अखमीरी रोटिया दे त्योहारे दे पेहले रोजे, चेले यीशुऐ बाल जाई करी पछणा लगे, “तू कुथु फसह खाणा चांदा है, ओथु असां जाई करी तेरे तांई फसह खाणे दी तैयारी करन?” 18 उनी बोलया, “शेहरे च जा कने अमुक नाऐ दे माणुऐ बाल जाई करी बोला, कि गुरू बोला दा है, कि मेरा बकत नेडे है, कने मैं अपने चेलयां सोगी तेरे ऐथु फसह दा त्योहारे मनाणा है।” 19 चेलयां यीशुऐ दा हुकम मनया, कने फसह तैयार किता। 20 जालू संज होई तां सै चेलयां सोगी खाणा खाणे तांई बैठा। 21 कने जालू सै रोटी खाणां बैठयो थे, तां यीशुऐ बोलया, “मैं तुसां ने सच्च बोला दा है, कि तुसां चे इकी जणे मिंजो पकड़ाणा है।” 22 इसा गल्ला पर सै बडे उदास होई गे, कने सारे उसयो पछणा लगे, “हे गुरू, क्या सै मैं है?” 23 उनी जबाब दिता, “जिनी मिंजो सोगी थालिया च हथ पाया है, उनी ही मिंजो पकड़ाणा है।” 24 “माणुऐ दे पुत्रे मरी जाणा है, क्योंकि ऐ सब कुछ पबित्र

शास्त्रां च लिखया है, पर उस माणुऐ जो बडी बुरी सजा होणी है जडा मिंजो धोखा दिन्दा है जिनी मिंजो पकड़वाणे च सहायता करणी है! अगर उस माणुऐ दा जन्म ही नी होया होंदा तां ही उदे तांई खरा होंदा।” 25 तालू उसयो पकड़णे बाले यहूदे बोलया, “गुरू जी, क्या सै मैं है?” उनी उसयो बोलया, “तू बोली बैठा।” 26 जालू सै खा दे थे तां यीशुऐ रोटी लेई, कने परमेष्ठ्वरे दा धन्यवाद करी के तोड़ी, कने चेलयां जो दिती कने बोलया, “लिया, खाई लिया; ऐ मेरा शरीर है।” 27 फिरी उनी दाखरस दे कटोरे जो चुकी करी परमेष्ठ्वरे दा धन्यवाद किता, कने चेलयां जो दिता कने बोलया, “तुसां सारे इस कटोरे चे पिया, 28 क्योंकि ऐ बाचा दा मेरा सै खून है, जडा मतयां लोकां दिया भलाईया तांई बहाया जाणा है।” 29 “मैं तुहांजो ने सच्च बोलदा है, मैं दाखा दा ऐ रस उस दिने दीकर नी पीणा, जालू दीकर पिता दे राज्य च नोआ दाखरस नी पी लेंगा।” 30 फिरी यीशुऐ कने उदे चेलयां फसह दे त्योहारे दे भजन गाई करी यरूशलेम शहरे दे बाहर जेतून रखां दे पाहडे पर चली गे। 31 तालू यीशुऐ उना ने बोलया, “तुसां सारयां ही अज राती अपने भरोसे ला भटकी जाणा है; क्योंकि पबित्र शास्त्र च लिखया है कि मैं पुहाल मारी देणा है; कने झुंडे दियां भेडां तितर-बितर होई जाणा।” 32 पर मैं मरी के जिन्दा होणे ला बाद तुहांजो ला पेहले गलील प्रदेश च पूजणा है। 33 पर पतरसे यीशुऐ जो बोलया, “चाहे सारे छडी करी नसी जांगे पर मैं नी नसगा।” 34 यीशुऐ उसयो बोलया, “मैं तिजो ने सच्च बोलदा है, कि अज ही इसा राती मुर्गे जो दो बार बांग देणे ला पेहले तू मिंजो तीन बरी बोलणा है, कि मिंजो नी जाणदा है।” 35 पतरसे यीशुऐ ने बोलया, अगर मिंजो तेरे सोगी मरणा भी पौंगा, तमी मैं तिजो ला कदी नी मना करगा। कने इयां ही सारयां चेलयां भी बोलया। 36 तालू यीशु अपने चेलयां सोगी गतसमनी नाऐ दिया इक जगा च आया कने अपने चेलयां ने बोलणा लग्गा, “ऐथु बेई रिया, जालू दीकर मैं प्रार्थना करें।” 37 सै पतरस कने जब्दी दे दोनो पुत्रां जो सोगी लेई गया, कने उदास कने रोणा लग्गा। 38 तालू उनी उना जो बोलया, “मेरा मन बडा उदास है, ऐथु दीकर कि मेरे प्राण निकली चलयो न। तुसां ऐथु ही स्का, कने मेरे सोगी जागदे रिया।” 39 फिरी यीशु थोडा अगे गया, कने गोडे भार पेई गया कने मुह धरतिया पर करी प्रार्थना करणा लग्गा, “हे मेरे पिता, अगर होई सके तां ऐ कटोरा मिंजो ला टली जाऐ, तमि जियां मैं चांदा है तियां नी हो, पर जियां तू चांदा है, तियां ही हो।” 40 फिरी जालू यीशु बापस आया कने उना चेलयां जो सुतया दिखीकरी उनी पतरसे जो बोलया, “हे शमौन, तू सुतया है? तुसां इक घंटा भी मेरे सोगी जागदे नी रेई सके? 41 जागदे कने प्रार्थना करदे रिया ताकि मिजों पर भरोसा रखणा नी छडन। आत्मा तां खरा करणा चांहदी है पर शरीर च जोरे दी कमी है।” 42 फिरी उनी दुजी बरी जाई करी ऐ प्रार्थना किती, कि, “हे मेरे पिता, अगर ऐ मेरे पित्यो बिना नी हटी सकदा है, तां तेरी इच्छा पुरी होऐ।” 43 तालू उनी आई करी उना जो फिरी सुत्या दिखया, क्योंकि उना दियां हखी निन्दा ने भरइयां थियां। 44 उना जो छडी करी सै फिरी चली गया, कने सेई गल्ल देवारा बोली करी, तिजी बरी प्रार्थना किती। 45 तालू उनी चेलयां बाल आई करी उना जो बोलया, हण सोंदे रिया कने अराम करा: दिखा, सै घड़ी आई गई है, कने माणुऐ दा पुत्र पापियां दे हथे पकड़ाया जाणा

है। 46 “उठा कने चला। दिखा, जिनी माणुए मिजों पकडवाणा है सै बखे आई रिया है।” 47 जालू यीशुए ऐ बोला दा ही था, यहदा जडा बाहरां चेलयां चे इक था, सै अपने सोगी मते सारे लोकां जो लेईकरी आया जिना तलवारां कने डंडे लियो थे, ऐ सारे लोक बडे याजकां, यहदी व्यवस्था दे गुरूआं कने यहदी अगुवां भेजयो थे। 48 उनी यीशुए जो पकडवने बालयां जो ऐ बोलया था कि: “जिदी मै चूमी लेंगा, सै ही यीशु है, उसयो तुसां पकडी लेनयो।” 49 उनी झट यीशुए बाल आई करी बोलया, “गुरू जी, नमस्ते!” कने उदी चूमी लेई। 50 यीशुए उसयो बोलया, “हे मित्र, जिसी कम्मे ताई तू आया है, उसयो करी ले।” तालू उना बखे आई करी यीशुए जो पकडी लिया। 51 यीशुए दे साथियां चे इकी अपणी तलवार कडी कने महायाजके दे इकी नोकरे पर चलाई करी उदा कन बडी दिता। 52 तालू यीशुए उसला बोलया, अपणिया तलवारा मयाना च रख क्योंकि जडे तलवारां चलादे न सै तलवारा ने ही खत्म करणे न। 53 तिजो क्या पता नी है कि मै अपने पिता ने विनती करी सकदा है, कने उनी स्वर्गदूते दियां बाहरां पलटना ला भी जादा स्वर्गदूत मेरे बाल हुण हाजिर करी देणे? 54 “पर पबित्र शास्त्रां दियां सै गल्लां कि इयां ही होणा जरूरी है कियां पुरियां होणियां?” 55 यीशुए उना जो बोलया, तुसां क्या तलवारां कने डांगा लेईकरी मिंजो डाकुआं सांई पकडना आयो न? पर मै जालू हर रोज मंदरे च बेईकरी उपदेश दिन्दा था, तालू तां तुसां मिंजो नी पकडया। 56 “पर ऐ इस तांई होया कि पबित्र शास्त्रां दियां गल्लां पुरियां होना।” जालू ऐ होया तां उदे सारे चेले उसयो छडी करी नसी गे। 57 तालू यीशुए जो पकडने बाले उसयो कैफा नाऐ दे महायाजक बाल लेई आऐ, जिथू यहदी व्यवस्था जो सिखाणे कने यहदी अगुवे गिठे होयो थे। 58 कने पतरस दुः-दुः ला उना दे पिच्छे-पिच्छे महायाजक दे अंगणे दीकर गया, कने अंत दिखणे तांई अंदर जाई करी पयादायां बखे बेई गया। 59 बडे याजक कने यहदी महासभा दे सदस्य यीशुए जो मारी देणे तांई उदे खिलाफ च गबाई तोपा दे थे, 60 पर मते झुठे गबाह ओणे पर उना जो कोई गबाई नी मिली। आखरी च दो जणे आऐ, 61 कने बोलया, “कि इनी बोलया था कि मै परमेश्वरे दे मंदरे जो ढाई सकदा है, कने फिरी उसयो तिन्ना रोजां च बणाई सकदा है।” 62 तालू महायाजके बिच खडोई करी यीशुए जो बोलया, “तू क्या कोई जबाब नी देणा? ऐ लोक तेरे खिलाफ क्या गबाई देद न?” 63 पर यीशु चुप ही रिया। तालू महायाजके उसयो बोलया “मै तिजो जिंदे परमेश्वरे दी कसम दिन्दा है, कि अगर तू परमेश्वरे दा पुत्र मसीह है, तां सांझो ने बोली दे।” 64 यीशुए उसयो बोलया, “उनी अपु मन्नी लिया; कने मै, माणुए दा पुत्र तुसां ने ऐ भी बोलदा है, कि हुण तुसां माणुए दे पुत्रे जो सर्वशक्तिमान दे सजे पासे बैठया, कने अम्बरे दे बदला पर ओदे दिखणा है।” 65 जालू महायाजके यीशुए जो ऐ बोलदे सुणया तां उनी गुस्से च अपने कपडे फाडी दिते, कने बोलया, “हुण सांझो कुसी गबाह दी जरूरत नी है। तुसां परमेश्वर नी निंदा करदे सुणया, तुहाडी क्या सलाह है इसा गल्ला पर?” उना सारायां फेसला किता कि यीशुए परमेश्वरे दी निंदा किती है। 66 तुसां क्या सोचदे न? उना जबाब दिता, ऐ तां मारी देंगे जोगा है। 67 तालू उना उदे मुऐ पर थक्या कने उसयो मुक्के मारे, कने बाकियां थप्पड़ मारी करी बोलया, 68 हे मसीह,

अगर तू परमेश्वरे दा संदेश देणेबाला है! तां सांझो दस कुनी तिजो मारया, 69 पतरस बाहर अंगणे च बैठया था तां इकी दासिया उदे बाल आई करी बोलया, “तू भी तां यीशु गलीली सोगी था।” 70 उनी सारायां दे सामणे ऐ बोली करी मना किता कि, “मै नी जाणदा कि तू क्या बोला दी है।” 71 जालू सै बाहर डेवढिया पर गया, तां दुईया नोकराणिया उसयो दिखीकरी उना ने बोलया जडे ओथू बैठयो थे कि, “ऐ भी तां यीशु नासरिये सोगी था।” 72 उनी कसम खाई करी फिरी मना किता, “मै इस माणुए जो नी जाणदा है।” 73 थोडिया देरा बाद जडे लोक ओथू खडुतयो थे, उना पतरसे बाल आई करी उसयो बोलया, “सच्ची तू भी इना चे इक है; क्योंकि तेरी बोली तेरा सच्च दसा दी है।” 74 पतरस अपु जो कोसणा लग्गा, कसम खाणा लग्गा, मै इस माणुए जो नी जाणदा। कने झट मुर्गे बांग देई दिती। 75 तालू पतरसे जो यीशुए दियां बोलियां गल्लां याद आईयां, मुर्गे दिया बांगा देणे ला पेहले तू मिंजो तिन्न बरी मना करणा है। कने सै बाहर जाई करी जौरे-जौरे ने रोणा लग्गा।

27 कने ब्यागा तडके होंदे ही झट उना बडे याजकां, कने यहदी अगुवां, कने व्यवस्था जो सिखाणे बालयां कने महासभा दे सारे लोकां यीशुए जो मारी देणे दी सलाह किती। 2 कने उना यीशुए जो बन्नया, कने न्याय करणे तांई यहूदिया प्रदेश दे राज्यपाल पिलातुस दे हबाले करी दिता। 3 जालू यीशुए जो पकडाणे बाले यहदा जो पता चला कि सै मरवाणे तांई दोषी ठेहराया गया है तां सै बडा पछताया कने उना ती चांदिये दे सिक्कयां जो बडे याजकां कने यहदी अगुवां जो बापस देई आया। 4 कने बोलया, मै बेकसूर जो मारणे तांई पकडाणे दा पाप किता है, उना बोलया, “सांझो क्या है? इस तांई तू ही जिम्मेवार है।” 5 तालू सै उना सिक्कयां जो मंदरे दे अंगणे च फेंकी करी बाहर चली गया, कने जाई करी उनी अपु फा लेई लिया। 6 बडे याजकां उना सिक्कयां जो लेईकरी बोलया, “साडे नियम दे हिसावे ने इना पैसया जो मंदिर दे भंडारे च रखणा ठीक रैणा है, क्योंकि ऐ इक माणुए जो मरवाणे तांई दितया दाम है।” 7 उना सलाह करिके उना सिक्कयां ने परदेशियां जो दबाणे तांई कुम्हारे ला खेतर खरीदी लिया। 8 इसा बजा ने उस खेतेर जो अजे दीकर खूने दा खेतर बोलंदे न। 9 तालू जडा बचन यिर्मयाह परमेश्वरे दा संदेश देणेबाले बोलया था सै पूरा होया: “उना सै ती सिक्के जडे इझाएल दे लोकां यहदा जो दितयो थे लेई ले। 10 कने जियां प्रभुऐ मिंजो हुकम दितया था तियां ही उना जो कुम्हारे दे खेतेर दे दामे च देई दिता।” 11 जालू यीशु राज्यपाले दे सामणे खडोतया था, तां हाकिमे उसयो पुछया, तू क्या यहूदियां दा राजा है? यीशुए उसयो बोलया, “तू अपु ही बोला दा है।” 12 जालू बडे याजक कने यहदी अगुवे उस पर दोष ला दे थे, तां उनी कोई जबाब नी दिता। 13 इस पर पिलातुसे उसयो बोलया, “तू क्या सुणा दा नी है कि, ऐ तेरे खिलाफ च कितणियां गबाईयां देद न?” 14 पर उनी उसयो इकी भी गल्ला दा जबाब नी दिता, ऐथू दीकर कि राज्यपाल जो बडी हेरानी होई। 15 हर साले फसह दे त्योहारे च, राज्यपाल पिलातुस इक केदिये जो छडी दिन्दा था, जिसयो लोक चांदे थे कि सै छूटे। 16 उस बेले बरअब्बा नाऐ दा इक मनया नामी कैदी था। 17 जालू सै गिठे होए तां पिलातुसे उना जो बोलया, “तुसां कुस्यो छुडणा चांदे न, ताकि मै तुहाडे तांई उसयो छडी दें? बरअब्बे जो या यीशुए जो जिसयो

मसीह बोलते न?" 18 क्योंकि मैं जानता था कि उना उसयो जलनिया ने पकड़ाया है। 19 जालू मैं न्याय दिया कुर्सिया पर बैठया था तां उदिया घरे बालिया उसयो बोली भेजया था कि, "तू उस धर्मिये दे मामले च हथ मत पांदा; क्योंकि मिंजो अज राती सूपने च उदिया बजा ने बड़ा दुख होया है।" 20 पर बहु याजकां लोकां दिया भिडा जो भडकाया, कि पिलातुस ला यीशुए जो छडणे दी बजाये बरअब्बा जो छडणे दी माँग करा, कने यीशुए जो मारणे ताई बोला। 21 राज्यपाले उना ला पुछया, इना दोना चे कुस्यो चांदे न, ताकि मैं तुहाडे ताई छडी दे? उना बोलया, "बरअब्बा" जो। 22 पिलातुसे उना ला पुछया, फिरी यीशुए दा क्या करणा, जिसयो मसीह बोलते न? "सबना बोलया, इसयो सूली पर चढ़ाई दिया।" 23 पिलातुसे उना जो बोलया, "कजो इनी क्या बुरा कितया है?" पर भीड़ होर भी जौरे ने चिलाणा लगगी कि, "इसयो सूली पर चढ़ाई करी मारी दिया।" 24 जालू पिलातुसे दिखया, कि कुछ नी बणा दा है कने उल्टा होर जादा रोल्ला होंदा जादा है, तां उनी पांणी लेईकरी भिडा दे सामणे अपने हथ धोते कने बोलया, "मैं इस धर्मिये दे खूने ला निर्दोष है; हुण तुसां ही जाणा।" 25 सबना लोकां जबाब दिता, "इदे खूने दा इल्जाम सांझो पर कने साडिया ओलादी पर होऐ।" 26 बरअब्बा जो उना ताई छडी दिता, कने यीशुए जो कोडे लगबाई करी सूली पर चढ़ाणे ताई रोमी सिपाईयां दे हबाले देई दिता। 27 तालू राज्यपाले दे सिपाईयां यीशुए जो किले च लेईजाई करी उदे चोरो पासे सारी पलटन खरेडी दिती। 28 उदे सारे कपडे उतारी करी उसयो बैगणी रंगे दे कपडे पेहनाई दिते, 29 कने कंडयां दा मुकुट बणाई करी उदे सिरे पर रखया; कने उदे सजे हथे च सरकंडा दिता। कने यीशुए दे सामणे झुकी करी उदा मजाक उड़ाणा लगगे कने बोलया, "हे यहूदियां दे राजा नमस्ते।" 30 कने उस पर थक्या कने सेई सरकंडा लेईकरी उदे सिरे च मारणा लगगे। 31 जालू मैं उदा मजाक उड़ाई बैठे, तां उना मैं कपडे उतारी करी उदे अपने कपडे उसयो पेहनाए, फिरी उसयो सूली पर चढ़ाणे ताई शेहरे ला बाहर लेई गे। 32 बाहर जांदे बेले उना जो शमौन नाए दा इक कुरेनी माणू मिल्ला, उना उसयो बेकार च ही पकड़या ताकि मैं उदिया सूलिया जो चुकी करी लेई चले। 33 कने उसयो गुलगुता नाए दिया जगा च मतलब जिसयो खोपडी दी जगा बोलते न, ओथु पुज्जी करी, 34 उना उसयो कोडा रस मिलाई करी दाखरस पीणे जो दिता, पर उनी चखी करी नी पिता। 35 तालू उना उसयो सूली पर चढ़ाया, कने चिठियां पाई करी उदे कपडे बंडी ले। 36 कने ओथु बेईकरी उदा पेहरा देणा लगगे। 37 कने उदा दोष उदे सिरे पर लाई दिता कि "ऐ यहूदियां दा राजा यीशु है।" 38 तालू उदे सोगी दो डाकू इक सजे पासे कने इक खबे पासे सूली पर चढ़ाए। 39 कने ओणे-जाणे बाले लोक सिरे हिलाई-हिलाई करी उदी निंदा करते थे। 40 कने बोलते थे कि, "ओ मंदरे जो ढांणे बाल्या कने उसयो तिन्ना रोजां च बणाणे बाल्या, अपने आपे जो तां बचा। अगर तू परमेश्वरे दा पुत्र है, तां सूली ला उतरी आ।" 41 इसी तरीके ने ही बहु याजक, व्यवस्था जो सिखाणे बाले कने यहूदी अणुवे समेत सारे उदा मजाक उड़ाई करी बोला दे थे कि, 42 इनी होरना जो तां बचाया पर अपने आपे जो नी बचाई सकदा है। ऐ तां इस्राएले दा राजा है। अगर तू हुण सूली ला उतरी ओऐ, तां असां तिजो पर भरोसा करणा। 43 इनी

परमेश्वरे पर भरोसा रखया है, अगर मैं इसयो चांदा है, तां हुण इसयो छुड़ाई ले, क्योंकि इनी बोलया था कि, मैं परमेश्वरे दा पुत्र है। 44 इयां ही मैं डाकू भी उदी बुराई करते थे जडे उदे सोगी सूली पर चढ़ाये थे। 45 उस रोजे दोपेरा ला लेईकरी तिजे पहर दीकर सारे देशे च नेहेरा होई गया। 46 तिजे पहर दे बखे यीशुए बडे जौरे ने पुकारी बोलया, "एली, एली, लमा शबत्तनी?" मतलब "हे मेरे परमेश्वर, तू मिंजो कजो छडी दिता?" 47 जडे ओथु थे, उना चे कितणयां ऐ सुणीकरी बोलया, "सैं तां एलियाह जो पुकारा दा है।" 48 उना चे इक बन्दा झट दोडया, कने उनी स्पंज लेईकरी सिरके च डुबोई, कने सरकंडे पर रखीकरी उसयो चुसाया। 49 होरनी बोलया, "स्की जा, दिखदे न कि, एलियाह इसयो बचाणा ओंदा है कि नी।" 50 तालू यीशुए फिरी बडे जौरे ने चिलाई करी अपने प्राण छडी दिते। 51 कने दिखा, मंदरे दा परदा उपरे ला लेईकरी थले दीकर फटी करी उदे दो टुकडे होई गे, कने धरती कमी पेई कने पथर तिडकी गे। 52 कने कबरां खुली गियां, कने मेरे हुय मते पबित्र लोकां दे शव जिन्दा होई गे, 53 कने जिन्दा होणे बाद सैं कबरां ला निकली करी पबित्र शेहरां च गे, कने मत्यां जणया उना जो दिखया। 54 तालू सूबेदार कने जडे उदे सोगी यीशुए दा पेहरा देदे थे, सैं भूकम्प कने जडा कुछ ओथु होया था, उसयो दिखीकरी बहु भरी डरी गे, कने बोलणा लगगे, "ऐ तां सच्ची ही परमेश्वरे दा पुत्र था।" 55 ओथु मतियां जनानिया जडियां गलील प्रदेशे ला ही यीशुए दी सेवा करदियां उदे सोगी आइयां थियां, सैं दुरे ला ही दिखा दियां थियां। 56 उना चे मरियम मगदलीनी, कने याकूब कने योसेस दी माता मरियम कने जब्दीये दे पुत्रां दी माता भी थी। 57 जालू संज होई तां यूसुफ नाए दा अरिमतिया शेहरे दा इक अमीर माणू जडा अपु भी यीशुए दा चेला था, ओथु आया। 58 उनी पिलातुस बाल जाई करी यीशुए दी लाश मंगी। कने पिलातुसे देणे दा हुकम देई दिता। 59 यूसुफे लाश लेई कने उसयो चीटिया चादरा च लपेटया, 60 कने उसयो अपणिया नौईया कबरां च रखया, जडी उनी चटाना च बंणबाइयो थी, कने कबरां दे दरबाजे पर बडा पथर रखीकरी चली गया। 61 कने मरियम मगदलीनी कने दुई मरियम ओथु कबरां दे सामणे बेठियां थियां। 62 दुरे रोजे जडा तैयारिया दे रोजे ला अगला दिन था, उस रोजे बहु याजकां कने फरीसियां पिलातुसे बाल गिठे होईकरी बोलया, 63 "हे महाराजा, सांझो याद है, कि उनी भटकाणे बाले जालू जिंदे बेले बोलया था कि, मैं उना रोजां बाद फिरी जिन्दा होई जाणा है। 64 हुकम दे कि तिन्ना रोजां दीकर सिपाई कबरां दी रखवाली करन, कुथी इयां ना हो कि उदे चेले आई करी उसयो कडी नी लेई जान, कने लोकां जो बोलन कि मैं मरयां चे जिन्दा होई गया है। तालू पिछला धोखा पेहले ला भी बुरा होणा है।" 65 पिलातुसे उना जो बोलया, "तुहाडे बाल सिपाई तां हेन जा कने अपणिया समझा दे अनुसार रखवाली करा।" 66 इस ताई उना जाई करी कबरा पर अपने निशाणे सोगी प्रवेश दरबाजे जो बंद करिरी सुरक्षित बणाई दिता ताकि कोई इसयो अपणिया जगा ला नी हटाए।

28 सब्ते दे रोजे बाद हफ्ते दे पेहले रोजे पौ फटदे ही मरियम मगदलीनी कने दुई मरियम कबरां जो दिखणा आइयां। 2 कने दिखा इक बडा हिलण होया, क्योंकि प्रभुए दा इक स्वर्गदूत स्वर्ग ला उतरया था, कने बखे

आई करी उनी पथरे जो हटाई दिता, कने उस पर बेई गया। 3 उदा रूप बिजा सांई था कने उदे कपड़े बर्फा सांई चिट्टे थे। 4 उदे डरे ने पेहरेदार कम्मी पे, कने मुर्दयाँ सांई होई गे। 5 स्वर्गदूते जनानिया जो बोलया, “डरा मत, मिजो पता है कि तुसां यीशुए जो तोपा दियां न जिसयो सूली पर चढ़ाया था। 6 सै ऐथू नी है, सै तां अपने बचने दे अनुसार जिन्दा होई गया है। ओआ इसा जगा जो दिखा जिथू प्रभु रखया था, 7 झट जाई करी उदे चेलयां ने बोला कि, सै मरयां चे जिन्दा होई गया है; सै तुसां ला पेहले गलील प्रदेश जाई रिया है, ओथु तहांजो उदे दर्शन होणे! दिखा, मै तुसां ने बोली दिता है।” 8 कने सै डर कने बडिया खुशिया ने कबरा ला बापस जाई करी उदे चेलयां जो खबर देंगे तांई दोड़ी गयां। 9 तालू यीशु उना जो मिला। कने बोलया, “नमस्ते।” कने उना बखे आई करी उदे पैरां जो पकड़ी करी उसयो दण्डवत किता। 10 तालू यीशुए उना ने बोलया, “डरा मत; मेरे चेलयां जो जाई करी बोला, कि गलील प्रदेशे जो चली जा ओथु मिजो दिखणा है।” 11 सै जनानियां चेलयां जो ऐ खबर देणा ही चलियां थियां कि, सिपाइयां जडे कबरा दी रखबाली करा दे थे उना शेहरे च आई करी सारा हाल बड्डे याजकां जो सुणाया। 12 तालू बड्डे याजकां, यहूदी अगुवे सोगी गिठे होईकरी सलाह बणाई। उना सिपाइयां जो रिशवत दे रूप च मता सारा धन देणे दा फेसला किता, कने उना जो बोलया। 13 तुसां सारे लोकां ने ऐ बोलनयो कि राती जालू असां सुतयो थे, तां उदे चेले आई करी उसयो चोरी लेई गे। 14 कने अगर ऐ गल्ल राज्यपाले दे कना दीकर पुजगी कि तुसां रखबाली दे बकते सोई गियो थे, तां असां उसयो समझाई लेंगे कने तुसां जो चिंता करणे दी जरूरत नी है असां बचाई लेंगे। 15 उना पेसा लेईकरी जियां उना जो सिखया था, तियां ही किता। ऐ गल्ल अजे दीकर यहूदियां च प्रचलित है। 16 कने गयारा चेले गलील प्रदेशे दे उस पाहडे पर गे, जड्डा यीशुए उना जो दसया था। 17 कने उना उदे दर्शन पाई करी उसयो नमस्ते किते, पर कुसी-कुसी जो शक होया की यीशु जिन्दा होया है। 18 यीशुए उना बाल आई करी बोलया, स्वर्ग कने धरतिया दा सारा हक मिजो दितया है। 19 इस तांई तुसां जाई करी सारियां जातियां दे लोकां जो चेले बणा; कने उना जो पिता, पुत्र, कने पबित्र आत्मा दे नाए ने बपतिस्मा दीया। 20 “कने उना जो सारियां गल्लां जिना दा मै तहांजो हुकम दितया है, उना जो मनणा सिखा: कने दिखा, मै संसारे दे अंत दीकर हमेशा तुहाडे सोगी है।”

(aiōn g165)

मरकुस

1 परमेश्वरे दे पुत्र यीशु मसीह दा शुभसमाचार इयां शुरू होया। **2** जियां परमेश्वरे दा संदेश देणेबाले यशायाह दिया कताबा च लिखया है: परमेश्वरे अपने पुत्र, मसीह जो बोलया, “दिख, मैं अपने संदेश देणेबाले दूते जो तेरे अगे भेजदा है, जिनी तेरे ताई रस्ता ठीक करणा है। **3** उसा सुनसान जगा च अब्राज सुणुआ दी है कि परमेश्वर दे ओणे ताई, अपने आपे जो तैयार करा, कने अपने मने दी सोच समझा जो खरा रखा उनी ओणा है।” **4** यूहन्ना जडा संदेश देणा आया था, सै सुनसान जगा च रेंदा था कने ऐ प्रचार करता था की, अपने पापां जो मन्नी लिया कने गलत कम्मा जो छडी दिया तां तुहांजो परमेश्वरे माफ करणा कने बपतिस्मा लिया। **5** मते सारे यहूदिया प्रदेश दे लोक, कने यरूशलेम शहर दे रेणेबाले लोक निकली करी उदे बाल आये, कने अपने पापां जो मन्नी लिया कने यूहन्ने उना लोकां जो यरदन खड्डा च बपतिस्मा दिता। **6** यूहन्ना ऊंटे दे बालां दे बणयो कपडे पांदा था, कने अपने लके च चमडे दा पट्टा बनी रखदा था कने टिड्डे कने मखिर खांदा था। **7** जालू यूहन्ना ऐ प्रचार करता था की, “जडा मेरे बाद ओणे बाला है, सै मिजो ला भी शक्तिशाली है, मैं तां उदे ज़तयां दे तस्मे खोलणे दे काबिल भी नी है। **8** मैं तां तुहांजो पाणिऐ ने बपतिस्मा दिता है, पर उनी तुहांजो पबित्र आत्मा ने बपतिस्मा देणा है।” **9** उना दिना जालू यूहन्ना बपतिस्मा दिन्दा था तालू यीशु नासरत गांऐ ला गलील प्रदेशे च आया, जिथू यरदन खड्डा च यीशुऐ यूहन्ना ला बपतिस्मा लिया। **10** जालू यीशु पाणिऐ ला निकली करी बाहर आया तां यूहन्ने स्वर्गे जो खुलदे दिखया कने स्वर्ग ला इक पबित्र आत्मा जो कबुतरे दे स्मे च अपने उपर ओंदे दिखया। **11** कने परमेश्वरे स्वर्ग ला ऐ आकाशवाणी कीती, “की तू मेरा प्यारा पुत्र है, कने तिजो ला मैं खुश है।” **12** यीशुऐ दे बपतिस्मा लेणे बाद पबित्र आत्मा उसयो झट सुनसान जगा पासे भेजी दिता। **13** यीशु उसा सुनसान जगा च चालियां रोजां दीकर रिया, ओथु शैताने उदी परख लेई। सै बणे दे जानवरां सोगी रिया, कने स्वर्गदूत यीशुऐ दी सेवा करदे थे। **14** कुछ बकत बीतणे बाद राजा हेरोदेसे यूहन्ना जो पकडी लिया कने उसयो जेला च पाई दिता, तालू यीशु गलील प्रदेश च गया कने उना लोकां जो परमेश्वरे दे राज्य दा शुभसमाचार सुणाया। **15** कने बोलया, “परमेश्वरे जडा बकत दसया था सै आई गया है, स्वर्ग दा राज्य बखे आई रिया है, अपना मन बदला कने अपने पापां ला पछाताप करा, कने परमेश्वर दे शुभसमाचारे पर भरोसा करा।” **16** इक दिन जालू यीशु गलील झिला दे बखे चलया था, तां उनी शमौन कने उदे छोटे भाई अन्द्रियास जो झिला च जाल पांदे दिखया: क्योंकि सै मच्छियां पकणने दा कम्म करदे थे। **17** यीशुऐ उना जो बोलया, “ओआ कने मेरे चले बणा; मैं तुहांजो सिखांगा कि लोकां जो मेरे बाल क्रियां लोणा कने क्रियां मेरे चले बणणा है।” **18** उना झट जाल छडया कने उदे पिच्छे चली पे। **19** जालू यीशु थोडा अगे चलया, उनी होर दो भाईयां जो दिखया जिना दे ना याकूब कने यूहन्ना थे, कने सै जब्दी दे पुत्र थे, सै किस्तिआ पर जाले जो ठीक करा दे थे। **20** यीशुऐ उना जो दिखया कने उना जो बोलया मेरे सोगी चला कने मेरे चले बणा; कने सै अपने पिता

जब्दी कने मजदूरां जो किस्तिआ पर छडी करी, उदे चले वणने ताई उदे पीच्छे चली पे। **21** यीशु कने उदे चले कफरनहम शहरे च आये, कने सै सब्ब दे रोजे यहूदी जंज घरे च जाई करी उपदेश करणा लगा। **22** कने लोक उदे उपदेश सुणीकरी बडे हेरान होए; क्योंकि सै उना जो यहूदी व्यवस्था जो सिखाणे बालयां सांई नी, पर अधिकारे ने उपदेश दिन्दा था। **23** जालू यीशु उपदेश दे दा था, तालू यहूदी जंज घर च इक माणु था, जिदे बिच इक बुरी आत्मा थी। **24** उनी जोरे ने बोलया, “हे नासरत दे यीशु मसीह, तू सांझो कजो तंग करता है? तू क्या सांझो खत्म करणा आया है? मिजो पता है की, तू कुण है? तू ही परमेश्वर दा पबित्र पुत्र मसिहा है, जडा परमेश्वरे ला आया है।” **25** यीशुऐ बुरिया आत्मा जो झिडकया कने बोलया, “चुप रे; कने इस माणुऐ ला निकली जा।” **26** तालू सै बुरी आत्मा उसयो मरोडी करी, कने जोरे ला चिलाई करी उदे चे निकली गेई। **27** यहूदी जंज घरे च आयो सारे लोक हेरान होइ गे, कने इसा गल्ला जो इकी दुजे ला पुछणा लग्गे, “ऐ कदिया उपदेश है? असां कदी भी इतणे हके ला उपदेश दिन्दे नी सुणया है।” कने बुरी आत्मा इदियां गल्लां जो मदियां भी हेन। **28** कने उदे बाद यीशुऐ जडा भी किता, उदे बारे च लोक इकी दुज्जे जो दसदे रे कने झट सारे गलील प्रदेशे दे लोकां ने यीशुऐ दे बारे च सुणी लिया। **29** जियां ही यीशु कने उदे चले यहूदी जंज घर ला निकले, तां सै शमौन कने अन्द्रियास दे घरे जो गे कने याकूब कने यूहन्ना उदे सोगी थे। **30** उस बकत शमौने दिया ससु जो बडा भरी बुखार था कने सै बिस्तरे च पियो थी, जालू यीशु घरे पुज्जा तालू उसयो कुनकी चले दसया कि शमौने दिया ससु जो बुखार है। **31** तालू यीशुऐ उसा दे बखे जाई करी उसा दा हथ पकडी करी उसा जो जगाया, कने उसा दा बुखार खरा होई गया, कने सै उना दी सेवा करणा लगी पेई। **32** उसी रोजे संझा दे बकते जालू सब्बे दा दिन मुकी गया, उदे नगरे च मते लोक बिमार थे कने जिना च बुरियां आत्मा थियां, उना सारयां जो यीशुऐ बाल लेई आये। **33** मते सारे लोक घरे दे दरबाजे सामणे गिटे होई गये। **34** उनी मतयां जो जिना जो बडे प्रकार दियां बिमारियां थियां, उना जो ठीक किता, कने मतियां बुरियां आत्मा कडी दितियां, कने बुरियां आत्मा जाणदियां थियां की ऐ परमेश्वर दा पुत्र है, उना जो बोलणे दा हुकम नी था। **35** ब्यागा ध्याडा निकलने ला पेहले, यीशु उठया कने निकली करी इक सुनसान जगा पर जाई करी ओथु प्राथना करणा लगा। **36** तालू शमौन कने उदे सोगियां जो पता लगा, की सै चली गया, तां सै उसयो तोपणा गे। **37** जालू सै मिल्ला, तां उना उसयो दसया, “की मते सारे लोक तिजो तोपा दे थे।” **38** यीशुऐ उना जो बोलया, “चला; असां अखे बखे दे गांऐ च चलदे न ताकि ओथु भी परमेश्वर दे संदेश दा प्रचार करी सकन, क्योंकि मैं इसी ताई इसी संसारे च आया है।” **39** कने यीशु सारे गलील प्रदेश दे यहूदी जंज घरां च जाई-जाई करी उपदेश दिन्दा, कने बुरियां आत्मा जो कडदा था। **40** इक कोढी माणु था, सै यीशुऐ बाल आया, कने उदे सामणे गोडे भार बेईकरी, उसयो बिनती कीती कने बोलया, “मैं जाणदा है कि तू चाआं तां मिजो ठीक करी सकदा है।” **41** यीशुऐ उस पर तरस खाई करी अपना हथ गां किता जिसयो कोढ था, कने उसयो छुता कने बोलया, “मैं चांदा है की तू ठीक होई जा।” **42** कने झट उदा कोढ ठीक होणा लगी पिया,

कने सै ठीक होई गया। 43 तालू यीशुए उसी माणुए जो सकत चेतावनी देईकरी भेजया, 44 कने उसयो बोलया, “दिख, कुसी ने कुछ मत बोलदा, पर जाई करी अपने आपे जो याजकां ने दस, की तु खरा होईया कने परमेस्वर जो भेंट चढा जिदे बारे च मूसा बडी पेहले लिखया था, ताकि लोक जाणी सकन की तु खरा होई गया।” 45 पर सै बाहर जाई करी इसा गल्ला दा बडा भरी प्रचार करणा लग्गा कने उनी ऐ ऐशु दीकर फेलाई दिती, कि यीशुए उसयो खरा करी दिता कने यीशु शेराम बाहर शेहरे च नी जाई सकदा था, फिरी सै बाहर सुनसान जगा च रिया; कने चारो पासे दे लोक उदे बाल ओंदे रे।

2 मतयां रोजां बाद जालू यीशु कफरनहम शेहरे च मुडी करी आया कने तां ओथु दे लोकां जो पता चली गया कि सै घरे आया है। 2 फिरी मते सारे लोक गिठे होए, उस बजा ने घरे मती भीड़ होई गेई, ऐथु दिकर की दरबाजे बाल भी जगा नी रेई; कने सै उना जो परमेस्वर दे बचने चे प्रचार करा दा था। 3 कने इक धरंग होयो मरीजे जो चार माणु मंझे पर चुकी करी उदे बाल लेई आये। 4 पर जालू सै भीडा दिया बजा ला यीशुए बखे नी जाई सके, तां उसा छती जो जिसा हेठ से बैठया था, उना से पुटी करी रस्ता बणाई दिता, कने जालू सै पुटी बैठे, तां उना उसयो मंझे समेत छती ला थले लटकई दिता। 5 यीशुए उना दा भरोसा अपने उपर दिखीकरी, उस धरंग होयो मरीजे जो बोलया, हे पुत्र, “मैं तेरे पापां जो माफ किता।” 6 तालू केई यहूदी व्यवस्था जो सिखाणे बाले ओथु बैठयो थे, सै अपने-अपने मने च सोचना लग्गे, 7 “ऐ माणु ऐसियां गल्लां कजो बोला दा है? ऐ तां परमेस्वर दी निंदा करा दा है। परमेस्वर जो छडी करी होर कुण पापां जो माफ करी सकदा है?” 8 यीशुए अपनी आत्मा च झट जाणी लिया, की सै अपने मने च ऐसा सोचा दे न, कने उनी यहूदी गुरूआं जो बोलया, “तुसां ऐसा कजो सोचा दे न। 9 क्या धरंग होयो मरीजे जो ऐ बोलणा सोखा है, की तेरे पाप माफ होये, या ऐ बोलणा की, उठ अपने मंजे जो चुकी करी हंड फिर? 10 पर मैं तुहांजो दसणा चांदा है की मैं, माणुए दा पुत्र जिसयो धरतिया पर पाप माफ करणे दा हक है।” कने उस धरंग होयो मरीजे जो बोलया, 11 “मैं तिजो बोलदा है की, उठ, कने अपने मंजे जो चुक कने अपने घरे जो चली जा।” 12 सै झट उठया कने मंझा चुक्या कने चली गया, सारे लोक जडे दिखा दे थे सै हेरान होए, कने सारे लोक परमेस्वर दी बडाई करिके बोलणा लग्गे, “असां इयोदिया कदी नी दिखया।” 13 इक बरी फिरी यीशु निकली करी झिला बखे गया, कने मते सारे लोक उदे बाल आए, कने सै उना जो परमेस्वर दे बचना दा उपदेश देणा लग्गा। 14 यीशु जियां ही अग्गे निकलया, तालू उनी लेवी नाये दे कर लेणेबाले माणुए जो दिखया, जिदा दुज्जा ना मती था। उदे पिता दा ना हलफईस था। जडा अपणिया चौकियां पर बैठया था, जिथू से कर लेंदा था। कने यीशुए उसयो बोलया, “मेरे चेले बणा।” कने सै उठी करी सारा कम्म कार छडी करी यीशु पिच्छे चली पिया, कने उदा चेला बणी गया। 15 उदे बाद यीशु कने उदे चेले लेवी दे घरे राती रोटीयां खाणा बैठयो थे। तालू मते भरी चुंगी लेणेबाले कने पापी भी चेलयां सोगी रोटीयां खाणे तांई बैठयो थे। सै मते भरी थे जडे यीशुए पिच्छे चलयो थे। 16 मूसा दिया व्यवस्था जो सिखाणे बाले कने फरीसियां जालू ऐ दिखया, की जिना जो लोक पापी बोलदे थे, सै

उना सोगी रोटीयां खा दा है, तां उना लोका यीशुए दे चेलयां जो बोलया, “ऐ तां चुंगी लेणेबाले कने पापियां सोगी खांदा पिंदा है।” 17 जालू यीशुए ऐ सुणया तां उना जो बोलया, “जडे लोक खरे न उना जो वैधे दी जरूरत नी होंदी है, पर जडे बिमार न उना जो है। मैं उना लोकां जो सटणे जो नी आया जडे अपने आपे जो धर्मी मंदे न, पर की जडे लोक अपने आपे जो पापी मंदे न, मैं उना तांई आया है।” 18 यहून्ना दे चेले, कने फरीसी बरत रखदे थे सै बिना कुछ खादयो रेदे थे; इक दिन उना चे कुछ चेले यीशुए बाल आये कने पुछया की, “यहून्ना दे चेले कने फरीसियां दे चेले बरत कजो रखदे न, पर तेरे चेले तां बरत रखदे नी न?” 19 यीशुए उना जो बोलया, “मेरे चेले कने मैं, लाडा कने उदे मित्रां सांई न। क्या लाडे दे मित्र तालू दीकर बरत रखी सकदे ने जालू दिकर पुरे बियाये च उदे सोगी न? जालू दीकर लाडा उना सोगी है तालू दीकर सै बरत नी करी सकदे न। 20 पर सै दिन ओणे न, जालू लाडा उना ला लग कितया जाणा है, तालू इना बरत रखणे न। 21 लोक नोए कपडे दा रफु पराणे कपडयां च कोई नी पांदा है, नी तां उनी रफुये धोणे ने सुकडी जाणा, कने पुराणा कपडा होर जादा फटी जाणा। मेरियां गल्लां भी पुराणे रिती रिबाजां सोगी जोडगे तां इसी कपडे सांई से भी बेकार होई जाणियां। 22 नोए अंगूर दे रसे जो पारणिया खलडिया दे झोले च कोई नी रखदा है, नी तां नोआ अंगूर रस खलडिया जो फाडी दिन्दा है, कने अंगूर रस खलडिया जो खत्म करी दिन्दा है; तांई तां नोआ अंगूर रस नोईयां खलडिया च नी रखदे न।” 23 इयां होया की यीशु कने उदे चेले सब्ते दे रोजे खेतयां च होईकरी जा दे थे; कने उदे चेले चलदे-चलदे बेलां जो तोडी करी खाणा लग्गी पे। 24 तालू फरीसियां बोलया, “की तेरे चेले इयोदे कम्म कजो करदे न जडे नियमा दे अनुसार सब्ते दे दिने करणा ठीक नी होंदे न?” 25 यीशुए उना जो बोलया, “तुसां क्या कदी नी पढया की जालू साडे महान राजा दाऊदे जो जरूरत पेई, कने जालू सै कने उदे साथी भूखे थे तां उनी क्या किता था? 26 कि इक अबियातार नाए दा महायाजक था, जालू दाऊद कने उदे सोगी मित्र भूखे थे, तालू उना परमेस्वर दे तम्बू च जाई करी रोटीयां खादियां जडियां परमेस्वर जो चढाईयां थियां, कने अपने सोगियां जो भी खुआईयां, इना रोटीयां जो खाणे दा हक याजकां जो छडी करी होर कुसयो नी था।” 27 तालू यीशुए उना जो बोलया, “परमेस्वर लोकां दिया भलाईया वास्ते सब्ते दा रोज बणाया है, उनी सब्ते बाले रोजे उना उपर भार पाणे तांई नी बणाया है। 28 मैं, माणुए दा पुत्र ऐ बोलणे दा हक रखदा है कि लोकां जो सब्ते बाले रोजे जो क्या करणे दी अनुमति है।”

3 इक होर सब्ते बाले रोजे यीशु यहूदी जंज घर च आया; ओथु इक माणु था, जिदा इक हथ सुक्की कने बेकार होई गया था। 2 कने फरीसी यीशुए उपर कोई दोष लाणे तांई बहाना तोपा दे थे, तालू कुछ माणु यीशुए जो बडिया गोरा ने दिखणा लग्गे, की यीशु उसया सब्ते बाले रोजे खरा करगा की नी। 3 यीशुए उस सुक्यो हथे बाले जो बोलया, “सारयां लोका दे बिच खडोई जा।” 4 कने उना ने बोलया, “क्या परमेस्वर सांझो सब्ते दे रोजे लोकां जो खरा कम्म करणे दा हुकम दिन्दा है, कि नीच कम्म करणे दा? क्या सांझो सै कुसी माणुए दे प्राण बचाणे दा हुकम दिन्दा कि मारणे दा?” पर सै सारे चुप रे।

5 यीशुए जो जालू गुस्सा आया तालू उनी उना लोकां दे चारों पासे दिखया। कने यीशु बड़ा उदास होया की सै बड़े कठोर कने जिद्दी माणु न। कने उस माणुए जो बोलया, “अपणा हथ कर रुआं।” उनी किता, कने उदा हथ खरा होई गया। 6 तालू फरीसी झट बाहर आई करी राजा हेरोदियां दे गिरोह दे कुछ लोकां कने मिली करी उदे खिलाफ सलाह करणा लगगे, की उसयो कियों मारणा है। 7 कने उदे बाद यीशु अपने चेलयां सोगी झिल्ला दे पासे चली गया: कने गलील प्रदेशे ला बड़ी भरी भीड़ उदे पिच्छे चली पेई। 8 कने यहूदिया जिले, कने यरूशलेम शहर कने इदूमिया जिले ला, कने यरदन खड्डा दे पारे ला, कने सूर कने सैदा शेहरे दे अखे बखे लोक ए सुणीकरी यीशु वाली आये, कि यीशु बड़े हेरान कने चकित करणे बाले कम्म करदा है। 9 यीशुए अपने चेलयां जो बोलया, “मिजों बोणे ताई इक छोटी किस्ती लेईकरी ओआ, ताकि लोक मिजो वाली भीड़ नी लगाई सकन।” 10 उनी उसी रोजे मतयां जो ठीक किता। उदिया बजा ला, मते सारे लोक जडे बिमार थे, सै यीशुए जो छुंणे दी कोशिश करा दे थे। 11 कने बुरियां आत्मा ला जकड़यो लोक, जालू यीशुए जो दिखदे थे, तां यीशुए जो इज्जत देणे ताई उदे पैरां अगगे डेई पोंदे थे, कने ज़ोर-ज़ोर ने बकदे थे, “की तू परमेस्वर दा पुत्र है।” 12 कने यीशुए चेतावनी देईकरी बुरी आत्मां जो बोलया, “कि मेरे बारे च कुसी ने भी मत दसदे कि मै परमेस्वर दा पुत्र है।” 13 उदे बाद यीशु इक धारा पर चढ़ी गया, कने उना जो अपने बाल सदया जिना जो सै चांदा था, कने सै उदे बाल आये। 14 तालू उनी बाहरां माणुए जो चुणयां। जडे उदे खास चले बणे, उनी उना जो प्रेरित दा ना दिता, कने सै चांदा की सै उदे सोगी-सोगी रैन, कने यीशु उना जो भेजे की सै प्रचार करन, 15 कने बुरियां आत्मा जो कडणे दा हक दिता। 16 ए सै बाहरा चले न, जिना जो यीशुए चुणया था: शमौन जिदा ना उनी पतरस रखया; 17 ए दे भाई जिना दा ना याकूब कने यहूना है, सै जब्दी दे पुत्र थे, जिसयो यीशु ने बुअनरगिस बोलया, कने उदा मतलब गड़कने बाले माणु। 18 कने अन्दियास, कने फिलिप्पुस, कने बरतुल्यै, कने मर्ती, कने थोमा, कने हलफइये दा पुत्र याकूब, कने तैद, कने शमौन कनानी जडे क्रांति लयोणे बाले थे, 19 कने यहूदा इस्करियोती, जिनी उसयो दुशमणा दे हथे पकड़ाई भी दिता था। 20 कने यीशु गांए दे कुसी घरे च आया, कने ओथु इतणी भीड़ गिठी होई गई, की उसयो रोटी खाणे दा भी बकत नी मिला। 21 जालू उदे रिशतेदारां ए सुणया, तां सै उसयो घरे जो लेई जाणे ताई आये, क्योंकि सै बोलदे थे, की इहे होस ठीक होणे च नी है। 22 कने सै जडे मूसा दी व्यवस्था जो सिखाणे बाले थे, सै यरूशलेम शेहरे ला आयो थे, सै भी ए बोलदे थे की, “इदे च शैतान है,” कने “सै बुरियां आत्मा दा सरदार है, कने शैताने दिया मददा ने बुरियां आत्मा जो कडदा है।” 23 इस ताई सै उना जो बखे सदीकरी, उना जो कहाणिया च बोलणा लग्गा, “क्या शैतान अपणी ही बुरी आत्मां जो लोकां ला बार कडणे ताई जोर पांगा? नी, जरा भी नी!” 24 अगर कुसी राज्य च लोक अपु च ही लडदे रेंगे तां सै राज्य बडे बकते तक नी टिकी सकदा है। 25 कने अगर कुसी घरे दे माणु अपु च ही लडी पोंगे तां सै घर नी चली सकदा। 26 अगर शैतान अपना ही बैरी बणिया कने अपु ने ही लडगा, तां उनी अपना ही नाश करी लेणा है। 27 कोई भी माणु जोरे बाले

माणुए दे घरे जो नी लुटी सकदा, जालू दीकर सै पेहले, उस माणुए जो बनी नी ले; तां जाई करी सै उदे घरे जो लुटी सकदा है। 28 “मै तुसां ने सच्च बोलदा है, की माणुए दी ओलादी दे सारे पाप कने निंदा जडा सै परमेस्वर या कुसी दे खिलाफ करदे न, परमेस्वर उना दे पाप माफ करी देणे न; 29 पर जडा कोई पबित्र आत्मा दे खिलाफ निंदा करगा, तां सै परमेस्वर कदी भी माफ नी करणा है। कने परमेस्वर इसी पापे ताई उस माणुए जो हमेशा ताई दोषी मनणा है।” (aion g165, aionios g166) 30 यीशुए ए इस ताई बोलया क्योंकि सै ए बोलदे थे, की उसयो बुरिया आत्मा जकड़या है। 31 तालू यीशु दी मां कने उदे भाई आये, कने उना बाहर खडोई करी उसयो बुलाबा भेजया। 32 भीड़ उदे अखे बखे बैठयो थी, कने उना उसला बोलया, “दिख, तेरी माता कने तेरे भाई तिजो तोपा दे ना।” 33 यीशुए उना जो जबाब दिता, “मेरी माता कने मेरे भाई कुण न?” 34 कने उनी उना पासे नजर दिती जडे उदे अखे बखे बैठयो थे कने बोलया, “दिखा, मेरी माता कने मेरे भाई न। 35 सै सेई ही करदे न जडा परमेस्वर चांदा है, सै ही मेरे भाई, बेहण कने माता पिता न।”

4 यीशु फिरी गलील झिला दे बखे उपदेश देणा लग्गा, कने ओथु इतणी भी भीड़ गिठी होई गई, की सै झिला च इक किस्ति या पर चढ़ी करी बेई गया, कने सारे लोक झिला दे बखे खडोई रे। 2 कने सै उना जो कहाणी सुणाणा लग्गा, कने अपने उपदेश च उना ने बोलया, 3 “सुणा इक किसान अपने खेतरे च बी राणे ताई गया। 4 रांदे बेले थोडे बी रस्ते दे बखे पेई गे कने सै तां पछियां आई करी चुगी ले। 5 कने थोडे बी पथरलिया जमिना पर पे जिथू उसयो जादा मिटी नी मिली, कने जादा मिटी नी होणे दिया बजा ने तौली लंगी पै। 6 कने जालू खडी धुप पेई, तां सै फकुई गे, क्योंकि उना दियां जडा डुगियां नी थियां तां सै सुकी गे। 7 कने थोडे बी झिल्लां च पे, कने जालू झिल्ल बदे तां उना सै बी डकी ले, कने उना फल नी दिता। 8 पर थोडे बी खरिया जमिना पर पे, कने सै बी लुंगे, कने मते सारे फल देणेबाले होए; केईयां ती गुणा, केईयां सठ गुणा, केईयां सौ गुणा।” 9 तालू उनी बोलया, “जिस बाल सुणने ताई कन्न न सै ध्यान लाईकरी गल्लां जो सुणे, कने इसा गल्ला जो समझी ले।” 10 जालू यीशु किल्ला रेई गया, तां बाहरा चले कने जडे सोगी थे सै उसला इसा कहाणिया दा मतलब पछणा लगगे। 11 उनी उना जो बोलया, “तुसां तां परमेस्वर दे राज्य दियां छुपियां होईयां सच्चियां गल्लां दसियां न, पर ए कहाणी बाहरे बाले लोकां ताई थी, सै जडे मिजों पर भरोसा नी रखदे। 12 जियां कि पवित्रशास्त्र च लिखया है, सै तिजां जो मिलदे होए भी नी मिलदा कन्ना ने सुणदे होए भी सै नी सुणदे कने समझदे; इयां नी होए की सै अपने बुरे कम्मा जो छडी देन, कने उना जो माफ करणा पोए।” 13 फिरी यीशुए उना जो बोलया, “तुसां इना गल्लां जो नी समझगे, तां फिरी तुसां होरा कहाणियां जो कियों समझगे। 14 इसा कहाणिया दा ए मतलब है, बी राणे बाला इयोदिया है जियां कोई परमेस्वर दे बचना दा प्रचार लोकां च करदा है। 15 जडा बी रस्ते च पिया उदी तुलना उना लोकां ने कितियो है, जडा परमेस्वर दे बचन सुणदे न। पर शैतान झट पट जादां कने उना दे मने ला बचन कडी दिन्दा है जडा उना सुणया था। 16 कने थोडे लोक उस पथरे वालिया जमिना साईं न जिथू बी पिया था, ए सै माणु न, जडे बचना जो सुणीकरी उना

जो झट खुशिया ने ग्रहण करी लेंदे न। 17 पर परमेश्वर दे बचना जो मने दिया गहराईया च बढणा नी दिन्दे, उदे बाद जालू बचने दिया बजा ने उना पर कला क्लेश या परेशानी होंदी है, तां सै बचना ला पिच्छे हट्टी जांदे न। 18 जडे बी झिल्लां च पियो न, ऐ सै माणु न जिना बचन सुणया, 19 पर सै संसारे दियां चिंता जो लेईकरी दुखी, कने संसारिक चिंजा दिया मोहमाया च फसी जांदे न, ऐ सब कुछ परमेश्वरे दे बचन च स्कावट पांदा है। कने सै बचन उना तांई फायदेमंद नी होंदा। (aion g165) 20 कने जडे बी खरिया जमिना पर रायो थे, ऐ सै माणु न, जडे बचन सुणीकरी ग्रहण करदे न, कने फल दिन्दे न, कोई ती गुणा, कोई सठ गुणा, कने कोई सौ गुणा।” 21 यीशुऐ उना जो बोलया, “क्या कोई दिये जो जल्लाई करी उसयो इक टोकरू या मंजोलिया दे जिक इस तांई रखदा है की उदिया लौई जो लुकाई सके? ना जरा भी नी। दिये जो ताके उपर रखदे न, जिथू ला उदी लोअ चमकी सके।” 22 क्योंकि जडा कुछ भी लुकया है, सै सामणे करणा; कने हर इक गुप्त गल्ल सामणे आई जाणी है। 23 “जिस बाल सुणने तांई कन्न न सै ध्यान लाईकरी गल्ला जो सुणे, कने इसा गल्ला जो समझी ले।” 24 यीशुऐ उना जो बोलया, “ध्यान रखा, की जितणा तुसां ध्याने ने बचना जो सुणे, तुसां जो उतणा ही जादा समझ ओणा है, उदे साबे ने परमेश्वरे तुहांजो देणा है। जिस नापे ने तुसां नापदे न उसी नापे ने तुहाडे तांई नापया जाणा है, कने तुसां जो जादा दितया जाणा है। 25 जिना बाल जडा परमेश्वर सिखांदा है उसयो समझणे दी इच्छा है, उना जो परमेश्वरे होर समझ देणी, पर जडा समझणे दी इच्छा नी रखदा, की मै क्या सिखांदा, तां सै जडा समझया है, परमेश्वरे उसला सै भी लेई लेणा।” 26 यीशुऐ उना जो बोलया, “परमेश्वरे दा राज्य ऐसा है, जियां कोई किसान खेतेर च बी रांदा है, 27 जालू उनी बी राई दिते उनी फिरी दुबारा मुडी करी बी नी दिखया कने अपने रोजाने बाले कम्मा करदा रिया। पर जडा उनी बी राऐ थे, सै बी लुगे कने बड़े होए, कने सै जाणदा भी नी की ऐ किया होया। 28 धरती अपु ही फल दिन्दी है, पेहले लूंगा, फिरी सिल्ले, फिरी सिल्यां च तैयार दांणा। 29 पर जालू सै दाणे पकी जांदे न, तालू सै किसान ओंदा कने दराटिया ने बडणा लगदा, क्योंकि बडणे दा बकत आई गया था।” 30 फिरी यीशुऐ कहाणी सुणाई, “असां परमेश्वरे दे राज्य दी तुलना इयां करी सकदे न, जियां तुसां जो मै कहाणी दसदा। 31 कने परमेश्वर दा राज्य धरती दे सारे बियां ला सबला छोटे बी राईऐ दे बियां सांई है। 32 पर जालू जमिना च रांदे न, तां सै उगी करी सारे साग पतरां ला बडा होई जांदा है, कने उदियां इतणियां बडियां डालियां निकलदियां न की अम्बरे दे पंछी भी उदिया छोआं च रेहणे तांई डालियां च घोंसले बणाई सकदे न।” 33 कने सै लोकां जो परमेश्वरे दे राज्य दे बारे च दसणे तांई हरबरी कहाणिया दा इस्तेमाल करदा था, जडियां उना जो समझ आई जान। 34 कने सै हमेशा परमेश्वरे दे राज्य दियां गल्लां कहाणिया च बोलदा था, पर जालू सै किल्ला होंदा था, तां सै अपने चेलयां जो सारियां गल्लां दसदा था। 35 उसी दिने सझां दे बेले, उनी अपने चेलयां ने बोलया, “ओआ, असां गलील झीला दे पार चलंदे न।” 36 कने चेले भी भिडा जो छडी करी उसा किस्तिया पर चढी गे, जिसा पर यीशु बैठया था। कने सै यीशुऐ जो अपने कने लेई गे। ओथु उना सोगी होर भी किस्तियां

थियां। 37 तालू सै झीला जो पार करा दे थे, तां बडा भरी तूफान आया कने लेहरां किस्ती ने बजियां, किस्तिया च पाणी भरईया कने किस्ती डुबणे वाली थी। 38 कने यीशु पिछले हिस्से च सुतया था, तालू उना उसयो जगाई करी बोलया, “गुरु जी, तिजो क्या साडी कोई फिकर नी है, की असां मरणे बाले न?” 39 तालू उनी उठी करी तूफाने जो डांटया, कने लेरां जो बोलया, “शांत रिया, स्की जा!” कने हवा स्की गई कने झील शांत होई गई। 40 कने उनी तालू चेलयां ला पुछया, “तुसां कजो डरदे न? क्या तुहांजो हले दीकर मिंजो पर भरोसा नी है?” 41 सै बडे भरी डरी गे कने अपु चे बोलणा लगगे, “ऐ कदिया माणु है? ऐथू तक की तूफान कने लैहरां भी इदा हुकम मंदे न।”

5 यीशु कने उदे चेले गलील झिला दे पार गिरासे दे लोकां दिया जगा च पुज्जे, 2 जालू यीशु किस्तिया ला थले उतरया तालू इक माणु जिसयो बुरिया आत्मा जकडया था, सै कब्रिस्तान ला निकलया कने यीशुऐ बाल आया। 3 सै कब्रिस्तान च रेंदा था कने लोक उसयो बन्नी करी नी रखी पांदे थे, ऐथू दिकर की लोहे दे सुंगला ने भी नी। 4 क्योंकि उसयो बडी बरी बेडियां कने सुंगला ने बनया था, पर सै उना सुंगला जो तोड़ी दिन्दा, कने बेडियां दे टोटे-टोटे करी दिन्दा था, कने उसयो कोई भी काबू च नी करी सकदा था। 5 सै रात दिन कब्रिस्तान कने पाहडा च ज़ोरे-जोरे बकदा रेंदा, कने अपने आपे जो पथरा ने जखमी करदा रेंदा था। 6 सै यीशुऐ जो दुहे ला ही दिखीकरी दोडया, कने यीशुऐ जो इज्जत देणे तांई उदे पैरां अग्रे डेई पिया। 7 उनी ज़ोरे ने चिलाई करी बोलया, “यीशु जी, परमपिता परमेश्वरे दे पुत्र, तु मिंजो कजो सता दा है? तु परमेश्वरे दे ना लेईकर कसम खा की तु मिंजो नी सतांगा।” 8 उनी ऐ बोलया क्योंकि यीशुऐ उसयो पेहले ही हुकम देई दितया था, “हे बुरी आत्मा, इस माणुऐ ला तु निकली जा।” 9 यीशुऐ उसा बुरिया आत्मा जो पुछया, “तेरा क्या ना है?” उनी बोलया, “मेरा ना सेना है, क्योंकि असां मते सारे न।” 10 कने उना बुरियां आत्मा उसला बडी बिनती किती, “की सांझो गिरासे दे इलाके ला बाहर मत भेजा।” 11 ओथु धारा पर इक सूअरां दा झण्ड चुंगा दा था। 12 कने बुरियां आत्मा यीशुऐ ने बिनती करिके बोलया, “की सांझो इना सूअरां च भेजी दे ताकि असां इना दे अंदर जाई सकन।” 13 यीशुऐ उना जो हुकम दिता कने सै बुरियां आत्मा उसी माणु ला निकली करी सूअरां दे अंदर समाई गियां, कने उसी झण्डे च कोई दो हजार सूअर थे, कने खडे डडे पासे दौड़े कने रिडकी करी झिला च जाई पे कने डूबी करी मरी गे। 14 उना दे पुहालां नठी करी शेहर कने ग्रांऐ च ऐ खबर सुणाई, कने जडा होया था लोक उसयो दिखणा आये। 15 यीशुऐ बाल आई करी, उना उसयो दिखया जिदे च बुरियां आत्मा थियां, उसयो कपडे पाई करी कने खरा बैठया दिखीकरी सै डरी गे। 16 दिखणे बालयां उदा जिदे बिच बुरियां आत्मा थियां, कने सूअरां दा पूरा हाल, बाकियां जो दसया। 17 तालू जडे लोक दिखणा आये थे, सै यीशुऐ ने बिनती करिके बोलणा लगगे, कि साडे इलाके ला चली जा। 18 जालू यीशु किस्तिया पर जाणे तांई चढया, तां सै जिदे च पेहले बुरियां आत्मा थियां, सै यीशुऐ ने बिनती करणा लग्गा, “की मिंजो भी अपु सोगी रेंणे दे जियां बाहरा चेले उदे सोगी रेंदे थे।” 19 पर यीशुऐ उसयो अपने सोगी चलणे तांई मना करी दिता, कने उसयो बोलया,

“अपने घरे जाई करी अपने लोकां जो दस, की प्रभुए तिजो पर दया करिके तेरे ताई कदेया कम्म किता है।” 20 तालू सै माणु अपने घरे दे इलाके च चली गया। फिरि उनी सारे दिकापुलिस जिदा मतलब “दस शेर” च ऐ प्रचार करणा शरू किता, कि यीशुए मेरे ताई बड़ा कुछ कितया है, कने उसयो सुणनेबाले सारे लोक हेरान होऐ। 21 जालू यीशु दोबारा किस्तिया च गलील झिला पारे जो गया, कने बड़े भरी लोक उस बाल गिठे होई गे। सै झिला बखे ही था, 22 यहूदी जंज घरे दे सरदारों च इक याईर नाये दा सरदार आया, सै यीशुए दी इज्जत मान ताई यीशुए दे पैरां अगगे डेई पिया, 23 कने उनी ऐ बोली करी बडी बिनती कीती, “की मेरी लोकी कुडी मरणा लगियो है, कने तू साडे घरे आई करी उसा जो छु, ताकि सै ठीक होई जा कने मरणे ला बची जा।” 24 तालू ही यीशु उस सोगी चली पिया, कने मते भरे लोक उदे पिच्छे चली पे, सै यीशुए दे उपर डेई पोंदे थे। 25 भिडा च इक जनानी थी जिसा जो बाहरां सालां ला खून निकलने दी बिमारी थी। 26 उना मते वेघां हथा ला दुख झेलया था कने अपने सारे पेसे खर्चणे बाद भी सै खरी नी होई। कने उसा दा हाल बड़ा बुरा होई गया था। 27 जालू उना सुणया यीशुए लोकां जो खरा कितया है, तां उना सोचया, “कि मैं उदे कपडयां जो छुई लें, तां मैं खरिया होई जाणा।” ताई तां उना भिडा च यीशु दे पिच्छे आईके उदे कपडयां जो छुता। 28 कयोँकि सै बोलती थी, “अगर मैं उदे कपडयां जो भी छुई लेंगी, तां ही मैं ठीक होई जाणा।” 29 कने झट उसा दा खून चलणा बंद होई गया, उना अपने शरीर ला मेहसूस करी लिया की मैं इसा बिमारिया ला ठीक होई गियो है। 30 यीशु भिडा च पिच्छे मुडया कने पुछया, “मेरे कपडयां जो कुनी छुता?” उनी ऐसा इस ताई पुछया कयोँकि उसयो पता लगी गया की उदे चे सामर्थ्य निकली, कने कोई माणु खरा होया है। 31 उदे चेलयां उसयो बोलया, “तू दिखा दा है, की तेरे अखे बखे इतणी भरी भीड है, कने तू पुछदा है, की कुनी मिजो छुता?” 32 तालू यीशुए उसी माणुए जो दिखणे ताई जिनी ऐ कम्म कितया था, चारो पासे नजर दौड़ाई। 33 तालू सै जनानी जाणी गया की मैं खरी होई गियो, तालू सै आई कने यीशुए दे पैरां च पेई गेई कने पैर बंदे। कने यीशुए जो दसया की मैं तिजो छुतया था। उना सोचया कि उनी उसा पर गुस्सा होणा उसा गल्ला दिया वजा ला सै डरी कने कम्मी पियो थी। 34 यीशुए उसा जो बोलया, “कुडिये, तेरा भरोसा जडा मिजों पर था उनी भरोसे तिजो खरा कितया है, शांति ने चली जा, हुण तु अपणिया इसा बिमारिया ला बची करी रिया।” 35 यीशु हले उसा ने गल्ल करा दा ही था, यहूदी जंज घरे दे सरदारो दे घरे ला कुछ लोकां आई करी बोलया, “की तेरी कुडी तां मरी गेई है” हुण गुप्पे जो कजो तकलीफ दे दा है? 36 जडी गल्ल सै बोला दे थे, उसा गल्ला जो यीशुए अणसुणी करिके यहूदी जंज घरे दे सरदारो जो बोलया, “डर मत, सिर्फ मिजों पर भरोसा रख।” 37 तालू यीशुए सिर्फ पतरस, याकूब कने याकूब दे भाई यहून्ना कने याईर जो ही अपने कने ओणा दा हुकम दिता, होर कुसयो भी अपने सोगी ओणा नी दिता। 38 कने यहूदी जंज घरे दे सरदारो दे घरे च पुज्जी करी, उनी लोकां जो रोंदे कने डडदे दिखया। 39 तालू यीशुए कमे अंदर जाई करी उना जो बोलया, “तुसां इयां डडा कने रोआ मत? कुडी मरियो नी है पर सुतियो है।” 40 सै सुणीकरी, सारे लोक यीशुए पर हसणा

लगे, तालू उनी सारयां जो बाहर कडी दिता। कने कुडिया दे माता पिता कने अपने चेलयां जो सोगी लेईकरी कमे अंदर गया जिथू कुडी पियो थी। 41 कने यीशुए कुडिया दा हथ पकडी करी उसा जो बोलया, “तलिता कूमी,” जिसदा मतलब है की, “हे छोटी कुडिये, मैं तिजो बोलदा है, उठ।” 42 कने कुडी झट उठी करी हंडणा लग्गी पेई, सै बाहरां सालां दी थी। जालू इयां होया तां सारे लोक कुडिया जो दिखीकरी हेरान होई गे। 43 फिरि यीशुए उसा दे माता पिता जो समझाई करी हुकम दिता की इसा गल्ला दा कुसयो पता नी लगे की उनी मरियो कुडियो जो जिन्दा कितया है। कने इसा कुडिया जो खांणे जो दिया कुछ।

6 तालू यीशु कफरनहम शेहरे ला चली गया, सै अपने ग्रां नासरत जो आया, कने उदे चेले भी उदे सोगी आये। 2 यीशु सब्ते बाले रोजे यहूदी जंज घर च परमेस्वरे दे बचना दा उपदेश देणा लग्गा, कने मते लोक सुणीकरी हेरान होई गे कने बोलणा लगे, “इनी माणुए ऐ गल्लां कुथु ला सिखियां न? कने इसयो ऐ सारा ज्ञान कने चमत्कार करणे दी शक्तियां कुनी दितियां? कने सामर्थ्य दे कम्म कियां इदे ला होंदे न? 3 ऐ सिर्फ तरखाणे दा पुत्र है, जडा मरियम दा पुत्र, कने याकूब, योसेस, यहूदा कने शमीन दा भाई है। कने इदिया बेंहणा भी ऐथू साडे सोगी न” कने उना यीशुए पर भरोसा करणे जो मना करी दिता। 4 यीशुए उना जो बोलया, की परमेस्वरे दे संदेश देणेबालयां दा अपने ग्रां कने अपने रिशतेदारां अपने घरे छडी करी, हर कुथी उदी इज्जत मान होंदा है। 5 कने ओथु उसी पर कुनी भरोसा नी किता, इसा बजा ला उनी ओथु थोडे बिमारां पर हथ रखीकरी खरा किता उदे अलावा ओथु होर कोई चमत्कार नी करी सकया। 6 कने यीशु उना दे अविश्वास ने बड़ा हेरान होया कने उदे बाद यीशु अखे बखे दे ग्रांए च गया कने परमेस्वर दे बचना दा उपदेश दिता। 7 थोडे बकते बाद यीशुए बाहरां चेलयां जो अपने बाल सदया कने उना जो बुरी आत्मा कडणे दा हक दिता। उना जो दो-दो करिके लग-लग ग्रांए भेजणा लग्गा, कने उना जो बुरियां आत्मा जो लोकां चे कडणे दा हक दिता। 8 कने यीशुए उना जो हुकम दिता, की अपने रस्ते ताई सिर्फ इक सोठी लेनयो। ना तां खाणे ताई रोटी लेणी, ना तां झोला, ना ही बटुए च पेसे, 9 पर जुते पाई लेनयो कने होर कोई कपडे पाणे ताई मत लेंदे। 10 यीशुए उना जो बोलया, “की कोई तुहांजो अपने घरे रेहणे ताई सदगा, जालू दीकर तुसां उसी ग्रांए च रेंगे, तालू दीकर उसी दे घरे च परणे बणी करी रिया। 11 जिसा जगा दे लोक तुहांजो अपनांगे नी कने तुहाडी सुणगे नी, ओथु ला जांदे बेले अपने पैरां दी धुड जाडी दिनयो, ताकि उना लोकां जो पता लगे की परमेस्वरे दिया तरफा ला मिलणे बाली सजा दे सै अपु ही जिम्मेबार ना।” 12 तालू चेलयां जाई करी घोषणा कीती की अपणा मन बदला कने अपने पापां दा पन्नाताप करा, कने परमेस्वरे दे शुभसमाचार पर भरोसा करा, कने परमेस्वरे पासे मुडा। 13 कने उना मतियां बुरियां आत्मा जो कडया, कने मतयां बिमारां जो जैतुन दा तेल मली करी खरा किता। 14 कने हुण राजा हेरोदेसे यीशु दे कम्मा दी चर्चा सुणी जडे यीशु करा दा था, कयोँकि मते सारे लोक यीशुए जो जाणदे थे कने उदे बारे च चर्चा करा दे थे। कने बोला दे थे की ऐ सेई यहून्ना बपतिस्मा देणे वाला है, सै मरयां चे जिन्दा होई गया है, ऐई बजा है कि उदे बाल ऐ

चमत्कार करने ताई परमेश्वरे दी शक्ति है। 15 कने होरनी लोकां बोलया है, “परमेश्वरे दा संदेश दे बाला एलियाह है। कने बाकियां बोलया, ऐ सै परमेश्वरे दा संदेश देणेबाला है, जडे बडे जमाने पेहेले रेंदे थे।” 16 हेरोदेसे ऐ सुणीकरी बोलया, “ऐ यूहन्ना बपतिस्मा देणेबाला है, मैं अपु उदा मुंड बडबाया था, पर सै मरी करी फिरी जिन्दा होई गया है।” 17 हेरोदेस थोडे बकते पेहेले अपने भाई फिलिप्पस दी घरे बाली हेरोदियास ने बियाह करी लिया था। 18 तालू यूहन्ना उसयो बोलया, “ऐ तु खरा नी किता तु अपने भाईये दी लाडी लेई ली!” ताई तां हेरोदियास जो खुश करने ताई, हेरोदेसे यूहन्ना जो पकडी करी उसयो जेला च पाई दिता। 19 ताई तां हेरोदियास यूहन्ना ने दुशमणी रखदी थी कने सै चांहदी थी, की उसयो मरवाई दे, पर ऐसा होई नी सकया, 20 हरबरी जालू हेरोदेस यूहन्ना जो बोलेदे सुणदा था, तां सै डरदा था, क्योंकि यूहन्ना इक पबित्र कने धर्मी माणु था, पर तमी सै उसयो सुणना पसंद करदा था। कने सिपाहियां जो उदी रखबाली करणे ताई रखया, हेरोदेस उदियां गल्लां सुणीकरी डरी जांदा था, पर सै खुशिया ने सुणदा था। 21 थोडे बकते बाद, हेरोदेसे अपना जन्म दिन मनाया। उनी अपने बड़े प्रधान अधिकारियां, सेना दे बड़े खास अगुवां कने गलील प्रदेशे दे अगुवां जो धामा च सदया। इसा धामा च हेरोदियास जो यूहन्ना जो मरवाणे दा मोका मिली गया। 22 कने हेरोदियास दी कुडी अंदर आई, कने नची करी हेरोदेस कने उदे सोगी धाम खाणा आये परोणयां जो खुश किता, तालू राजे कुडिया जो बोलया, “तू जडा मजीं मिंजो ला मंग, मैं तिजो दिगा।” 23 कने हेरोदेसे उसा ला ऐ बायदा किता, “की मेरे अंधे राज्य दीकर जडा कुछ तू मिंजो ला मंगगी सै मैं तिजो दिगा।” 24 उना बाहर जाई करी अपणिया माता ला पुछया, की मैं क्या मंगे? माता बोलया की, “उसयो बोल की सै यूहन्ना बपतिस्मा देणेबाले दा मुंड बड्डी करी मिंजो दे।” 25 कने सै झट अंदर राजे बाल आई, कने उसने बिनती किती की, “मैं चांहदी है, की तू हुणी यूहन्ना बपतिस्मा देणेबाले दा मुंड बड्डी करी मिंजो इक थालिया च दे।” 26 ऐ सुणीकरी राजा बडा उदास होया, पर अपणिया कसमां, कने सोगी बोणे बालयां दिया बजा ला उसा दिया गल्ला जो टालना नी चांदा था। 27 राजे इक सिपाइऐ जो हुकम दिता, कि जेला च जा, कने यूहन्ना दा मुंड बड्डी करी उदे बाल लेईकर आ। 28 सिपाइऐ जेला च जाई करी उदा सिर कटया, कने इक थालिया च रखीकरी लेई आया कने उसा कुडिया जो देई दिता, कने कुडिया अपणिया माता जो देई दिता। 29 जालू यूहन्ना दे चेलयां जो पता चला की उसयो मारी दितया है, यूहन्ना दे चेले आये, कने उना उदिया लाशा जो चुकी करी कबरा च रखी आये। 30 जालू सै प्रेरित जिना जो यीशुऐ भेजया था, सै यीशु बाल बापस आये कने उदे चारों बखे खडोइ गे, कने जडा कुछ उना किता, कने सिखया था, सारा कुछ उसयो दसया। 31 मते सारे लोक ओदे जांदे थे कने इसा बजा ला यीशु कने उदे चेलयां जो रोटीयां खाणे दा बकत नी मिलदा था। तालू यीशुऐ चेलयां जो बोलया, “असां कुथी सुनसान जगा चलदे जिथू किल्ले रेई सकन कने थोडा बकत अराम करी सकन।” 32 इस ताई सै किस्तिया च बेईकरी सुनसान जगा च चली गे। 33 कने मतयां लोकां उना जो जांदे दिखया कने पछेणी लिया की सै कुथु जाणा लगयो न। कने अखे बखे दे नगरां दे लोक गिठे होईकरी

यीशु कने उदे चेलयां ला पेहेले ओथु पैदल दौडी करी पुज्जी गे। 34 यीशु किस्तिया ला उतरया कने उनी मती भरी भीड दिखी, कने उना पर तरस खादा, क्योंकि उना दा कोई अगुवा नी था, जडा उना दी रखबाली करी सके, जियां बिना गवाले भेडां होंदियां न, “फिरि सै उना जो परमेश्वर दे राज्य दियां मतियां गल्लां सिखाणा लग्गी।” 35 जालू संज होणा लग्गी, तां उदे चेले उदे बखे आई करी बोलणा लग्गे, “ऐ सुनसान जगा है, कने दिन बडा ढली गया है। 36 इना जो भेजी दे, ताकि ऐ अखे बखे दे गां कने बासियां च जाई करी, अपने ताई कुछ खाणे जो खरीदी लेन।” 37 यीशुऐ उना जो जबाब दिता, “तुसां ही इना जो खाणे जो दिया।” उना यीशुऐ जो बोलया, “की तू चांदा है की असां जान कने दो सौ दिना दी मजदुरिया बराबर दियां रोटीयां खरदी करी इना जो खुआन?” 38 यीशुऐ उना जो बोलया, “जाई करी दिखा तुहाडे बाल कितणियां रोटीयां न?” उना पता करी के बोलया, “पंज रोटीयां कने दो मछियां भी हेन।” 39 तालू यीशुऐ उना जो हुकम दिता की, सबना जो सेले घाए पर बैठआई दिया। 40 सै सौ-सौ करिके कने पंजा-पंजा करिके झण्डा च बेई गे। 41 कने यीशुऐ सै पंज रोटीयां कने दो मछियां लियां, कने स्वर्गे पासे दिखीकरी परमेश्वर दा धन्यवाद किता, कने रोटीयां तोडी करी दो टोटे किते कने चेलयां जो दिन्दा गया, ताकि सै लोकां जो परोसन, कने सै दो मछियां भी उना च बंडी दितियां। 42 सारे खाई करी रजी गे। 43 कने जालू रोटी खायी बैठे तालू चेलयां बाकी बचियां रोटीयां कने मछियां गिठेइयां कने उसला बाहरा टोकरियां भरई गियां। 44 जिना रोटीयां खादियां सै पंज हजार सिर्फ मर्द थे, उना बच्चे कने जणासा जो गणिया नी था। 45 तालू यीशुऐ झट पट अपने चेलयां जो बोलया की सै किस्तिया पर चढी जा कने झिला दे पारले पासे बैतसैदा शहरे जो चली जा, जालू दीकर की सै सारे लोकां जो भेजी नी ले। 46 सारे लोका जो भेजणे बाद, यीशु पहाडे पर प्राथना करणे ताई गया। 47 कने जालू संज होई, तालू किस्ति गलील झिला दे बिच थी, कने यीशु किला झिला बखे था। 48 जालू उनी दिखया की सै बडे घबराई गियो न, क्योंकि हवा उना दे खिलाफ चलियो थी, तां ब्यागा तडके यीशु झिला पर चली करी उना बाल आया, कने सै उना ला बखे ला निकलना चांदा था। 49 पर जालू उना उसयो झिला पर चलदे दिखया, तां से डडणा लग्गी पै, उना जो लगया की सै भूत है, तां सै दिखीकरी डरी गे, 50 क्योंकि सारे उसयो दिखीकरी घबराई गियो थे। पर यीशुऐ उना ने झट गल्लां कितियां कने बोलया, “हिम्मत रखा, डरा मत, मैं यीशु है।” 51 तालू सै उना बाल आया कने किस्तिया पर चढी गया, कने हवा स्की गई, कने सै बडे हेरान होणा लग्गे। 52 हाली उना दिखया भी था की पिछलिया धियाडिया यीशुऐ पंज रोटीयां ने पंज हजार ला जादा लोकां जो खाणा खुआया था, सै हाली भी उसयो नी समझयो थे, की यीशु कुण है। क्योंकि उना दे मन कठोर थे। 53 जालू यीशु कने उदे चेले इक किस्तिया च गलील दिया झिल्ला च गन्नेसरत प्रदेशे दे बखे पुज्जे, कने किस्ति घाटे पर बन्नी दीती। 54 कने जालू सै किस्तिया ला उतरे, तां लोकां उसयो झट पछेणी लिया, 55 सै झट पट ही सारे इलाके च गे, कने बिमारां जो मंझयां पर चुकी करी लेई गे जिथु उना जो खबर मिली की यीशु ओथु है। 56 कने जिथु कुथी सै गां, शहरां या बस्तियां

च जांदा था, तां लोक बिमारां जो बजारां च रखीकरी उसला बिनती करदे थे, की सै सिर्फ अपने कपड़यां जो छुणा दे, कने जितणे भी छुंदे थे, सै सारे ठीक होई जांदे थे।

7 तालू इक रोज फरीसी कने केई यहूदी व्यवस्था जो सिखाणे बाले जडे यरूशलेम शेहरे च आयो थे, उसयो सुणने तांई गिठे होऐ, 2 कने उना दिखया की उदे चेले बिना हथ धोते रोटी खा दे थे, जडा की यहूदी रिबाजे अनुसार अपबित्र था। 3 फरीसी कने सारे यहूदी खाणा खाणे ला पेहले अपने बजुर्गां दे रीती रिबाजे पर चलदे थे कने जालू दीकर सै ढंगे ने हथ नी धोई लेने खाणां नी खांदे थे, 4 कने बजारे ला ओणे दे बाद, जालू दीकर से अपने रिती रिबाजा दे अनुसार नोई नी लेने, साफ नी होंदे तालू दीकर खाणां नी खांदे, कने उना दे वजुर्गां दे होर भी बतरे रिबाज थे, जिना जो सै मंदे थे, जियां की कटोरे, लोटे, कने तांबे दे भांडयां जो धोणा कने मांजणा। 5 तांई तां उना फरीसियां कने व्यवस्था जो सिखाणे बालयां उसयो पुछया, “की तरे चेले साडे सियाणे दियां रिबाजां जो नी मंदे?” सै तां बिना हथ धोयो रोटी खांदे न? 6 यीशुऐ उना जो जबाब दिता, “यशायाहे ठीक था, जिनी पबित्र शास्त्र च तुहाडे सांई कपटियां दे बारे च लिखया है, की ऐसे लोक गल्लां ने तां मेरा आदर करदे न, पर इना दे मन मिजो ला बडे दूर न। 7 इना दी कितियो भक्ति मेरे तांई बेकार है, क्योंकि ऐ लोकां जो माणुऐ दियां दसियां गल्लां जो परमेश्वर दियां गल्लां दस्सी करी मनणे तांई बोलदे न। 8 क्योंकि तुसां परमेश्वरे दे हुक्मा जो मनणा बंद करी दितया है, कने माणुऐ दे रिबाजां जो मंदा दे न।” 9 कने यीशुऐ उना ने बोलया, “तुसां अपने बनायो नियमा जो मनणे तांई चलाकिया ने परमेश्वरे दे हुक्म जो टाली दिन्दे न। 10 उदाहरण तांई, मूसा ने बोलया है, की अपने माता पिता दा आदर करा, कने जडा कोई अपने माता पिता जो श्राप दिगा, सै पक्का मारी देणा। 11 पर तुसां लोकां जो ऐ दसदे न की, अपने माता पिता दी मदद नी करणा कने उना दे हिस्से दियां चिंजा उना जो छडी करी परमेश्वर जो देणा ठीक है। कने तुसां लोकां जो इजाजत दिन्दे अपने माता पिता जो ऐ बोलणे दी की जडा कुछ मै तुहांजो देणा था, सै मै परमेश्वर जो देणे दी कसम खादियो है, कने मै हुण तुसां दी मदद नी करी सकदा, इसला तुसां लोकां जो ऐ बोलदे की हुणे ला तुसां जो माता पिता दी सेवा करणे दी कोई जरूरत नही है। 13 इयां बोली करी, जिना रीती रिबाजां जो तुसां लोकां दीकर पुजाया है, सै परमेश्वरे दियां बोल्यां गल्लां जो बेकार होणे दी बजा बणी जांदा है।” 14 तालू यीशुऐ लोकां जो अपने बाल सदीकरी उना जो बोलया, “तुसां सारे मेरी सुणा, कने समझा। 15 ऐसी कोई चीज नी ऐ जडी माणुऐ च बाहर ला आई करी उसयो अशुद्ध करदी है, पर माणुऐ जो अशुद्ध सै करदा है जडा उदे अंदरे ला निकलदा है। 16 जिस बाल सुणने तांई कन्न न सै ध्यान लाईकरी गल्ला जो सुणे, कने इसा गल्ला जो समझी ले।” 17 जालू सै भीडा दे बखे ला घरे दे अंदर गया, तां उदे चेलयां यीशुऐ जडा बोलया था, उसा कहाणिया दा मतलब पुछया। 18 यीशुऐ उना ने बोलया, “क्या तुसां भी ऐसे ना समझन? क्या तुहांजो नी पता, की जडा भी खाणा माणु खांदा है, सै उसयो अशुद्ध नी करी सकदा। 19 क्योंकि सै उदे मने च नी, पर उदे पेटे च जांदी है, कने संडास च निकली जांदी है,”

यीशुऐ दा बोलणे दा मतलब ऐ था, की सारियां खांणे बालियां चीजा ठीक न। 20 लोक जडा बुरा सोचदे न, “सै ही बोलदे न कने करदे, सै ही उना जो परमेश्वर दे सामणे अशुद्ध करदा है। 21 क्योंकि अंदर ला, मतलब की माणुऐ दा मन ही बुरियां चिजा दी जड है। बुरे-बुरे बिचार, व्यभिचार, चोरी, हत्या, परस्त्रीगमन, 22 लालच, बुराई, धोखा, लुचापन, बुरी नजर, निंदा, धमंड, कने मुखता निकलदी है। 23 ऐ सारियां गल्लां मने ला निकलदियां न कने माणुऐ जो अशुद्ध करदियां न।” 24 इदे बाद यीशु कने उदे चेले ओथु ला उठी करी सर कने सैदा दे शेहरे दे अखे बखे बालिया जगा जो चली गे। ओथु सै इकी घरे च गया, कने सै चांदा था, की उसयो कोई नी जाणी सके की सै ओथु स्कया है। पर लोकां जो बडा तोला पता लग्गी गया था कि सै ओथु स्कया है। 25 कने इक जनानी उदी चर्चा सुणीकरी आई, जिसा दिया छोटिया कुडिया जो बुरिया आत्मा जकड़या था, सै झट उदे पैरां च पेई गई। 26 सै जनानी यहूदी नी थी। सै सूरिया ग्रांऐ दे सुफुनिकी नाये दे इलाके च जमियो थी। कने उना उसला बिनती कीती, की मेरिया कुडिया चे बुरिया आत्मा जो कडी दे। 27 यीशुऐ उसा जो बोलया, “पेहले बचयां जो रजणा दे, क्योंकि बचयां ला रोटियां लेईकरी कुतयां दे अगे पाणा ठीक नी है।” 28 उना जबाब दिता, प्रभु ऐ सच्च है, पर कुते भी तां बचयां दे मेजे हेठ रोटिया दे चुरे चारे जो खाई लेंदे न। 29 यीशुऐ उसा जो बोलया, “इसा गल्ला दा जबाब भरोसे ने दिता, उदिया बजा ने बुरी आत्मा तेरिया कुडिया चे निकली गियो है कने तु हुण घरे चली जा।” 30 कने उना अपने घरे आई करी दिखया कुडी मंजे पर पियो है, कने बुरी आत्मा कुडिया ला निकली गियो है। 31 फिरी यीशु कने उदे चेले अखे बखे दे इलाके जो छडी करी सिदोन शेहरे जो निकली गे। फिरी सै दिकापुलिस “दस शेहर” चे होईकरी गलील झिला बालिया जगा च पुज्जा। 32 कने लोक इक टोणे जो जडा थथलान्दा भी था, उसयो उस बाल लेईकरी आये कने बिनती कीती की, इसयो खरा करी दे। 33 तालू सै उसयो भिडा ला लग लेई गया, कने अपणियां उंगलियां उदे कना च पाईयां, कने अपना थुक अपणिया उंगलियां च लगाया कने उसी माणुऐ दी जीभा जो छूता। 34 कने स्वर्गे पासे दिखीकरी लम्बा साह लिया। फिरी उसी माणुऐ जो बोलया, “इफतह।” मतलब की “खुली जा” 35 कने इकदम ही सै साफ-साफ सुणना लग्गी पिया, कने बिना कुसी तंगिया ने सै साफ-साफ बोलणा लग्गी पिया। 36 तालू यीशुऐ उना जो समझाया की कुसी ने मत बोलदे, पर उनी जितना उना जो समझाया उतणा ही सै बोलणा लग्गी पिया। 37 सै बडे ही हेरान होईकरी बोलणा लग्गे, “यीशुऐ जडा कुछ किता सै सब कुछ खरा ही कितया है,” यीशु टोणयां जो सुणने दी, कने गुंगयां जो बोलणे दी शक्ति दिन्दा है।

8 उसी बक्ते दी गल्ल है जालू मते सारे लोक दिकापुलिस च यीशुऐ बाल गिठे होऐ, कने उना बाल खाणे तांई कुछ नी था, तां यीशुऐ अपने चेलयां जो सदीकरी उना जो बोलया, 2 ऐ लोक मिजों सोगी तिन्ना रोजां ला रह दे न। उना बाल खाणे तांई कुछ नी है कने मिजो इसा गल्ला पर तरस ओआ दा है। 3 कने इना च थोड़े लोक बडे दुरे ला आयो थे। अगर मै इना जो भूखा घरे भेजी दें, तां इना रस्ते च थकी जाणा कने बेहोश होई जाणा। 4 उदे चेलयां उसयो जबाब दिता की, ऐथु सुनसान जगा च इतणी रोटियां कुनी कतां ला

लौणियां, की ऐ सारे जणे रजी जान? 5 यीशुऐ उना जो पछया, “तुहाडे बाल कितणियां रोटियां न?” उना बोलया, “साडे वाली सत रोटियां न।” 6 तालू यीशुऐ लोकां जो धरतिया पर बोणे दा हुकम दिता कने सै बेई गे, कने उदे बाद सै सत रोटियां लियां, कने परमेश्वरे दा धन्यबाद करिके तोडियां, कने अपने चेलयां जो रोटीयां दे टुकड़े दिन्दा गया ताकि सै उना जो लोकां च बंडी देन। 7 उना बाल थोडियां छोटियां मछियां भी थियां, कने यीशुऐ परमेश्वरे दा धन्यबाद करिके सै अपने चेलयां जो दितियां, कने लोकां जो परोसणे दा हुकम देई दिता। 8 फिरी सारे लोक खाई करी रजी गे कने उदे बाद चेलयां बाकी बचियाँ रोटियां दे टुकडयां जो सत टोकरियां च भरी लिया। 9 कने सै लोक लगभग चार हजार थे, कने यीशुऐ उना लोकां जो विदा किता। 10 कने यीशु चेलयां सोगी किस्तिया पर चडी करी दलमनुता इलाके जो चली गया। 11 फिरी फरीसी आई करी यीशुऐ ने गल्ल बात करणा लग्गे, क्योंकि सै उसयो फसाणा चांदे थे इस ताई उना उसयो पछया स्वर्गे दा कोई चमत्कार दस। जिसने ऐ साबित होई जां की परमेश्वरे तिजो शक्ति दितियो है। 12 उनी उना दे अविश्वास ला नराज होई करी लम्बा साह लिया कने बोलया, “इस युगे दे लोक कजो चमत्कार तोपदे न? मै तुहांजो ने सच्च बोलदा है, की इस युगे दे लोकां जो कोई चमत्कार नी देणा है।” 13 फिरी सै फरीसियों जो छडी करी, अपने चेलयां सोगी किस्तिया पर चडी गया कने गलील झिला दे चारों पासयां ला होंदे होए चली गया। 14 यीशुऐ दे चेले रोटियां लेणा भूली गियो थे, कने उदिया वजा ने उना बाल किस्तिया च इक रोटिया जो छडी करी कख भी नी था। 15 कने यीशुऐ उना जो चेतावनी दीती कि, “फरीसियां कने हेरोदेस दे खमिरे ला बच्चे ताई चौकने रेनयो।” 16 सै अपु चे बिचार करिके बोलणा लग्गे, कि यीशुऐ ऐ इस ताई बोलया क्योंकि “साडे बाल रोटीयां घट न।” 17 ऐ जाणी करी यीशुऐ उना ने बोलया, “तुसां कजो अपु चे बिचार करा दे कि साडे बाल रोटिया नी न? क्या तुसां अपने मने जो इतना कठोर बणाई लिया, तुसां क्या हले दीकर समझे नी? 18 तुसां बाल हखी कने कन्न होंदे होए भी नी दिखी कने सुणी सकदे। कने क्या तुहांजो कुछ भी याद नी है? 19 की तालू तुसां बचियाँ रोटियां दे टुकडयां जो कितणियां टोकरियां च भरया था, जालू मै पंज हजार लोकां जो पंज रोटियां ला खुयाया था?” उना बोलया, “बाहरा टोकरियाँ।” 20 “कने जालू चार हजार लोकां ताई सत रोटियां थियां तां कितणे टोकरे भरी करी चुके थे?” उना बोलया, सत टोकरे। 21 यीशुऐ उना जो बोलया, “तुसां हाली दीकर कजो नी समझदे की मै कुण है?” 22 तालू यीशु कने उदे चेले बैसैदा शेहे च आए, कने लोक इक अन्ने जो उदे बाल लेई करी आए कने उसला बिनती कीती की इसी माणुऐ जो छु कने खरा करी दे। 23 तालू यीशुऐ उस अन्ने दा हथ पकडी करी उसयो ग्रां दे बाहर लेई गया। कने यीशुऐ अपना थुक उदिया हखी पराला लाया कने उस पर हथ रखे, कने उसयो पुछया, “क्या तिजो कुछ मिल्ला दा है?” 24 उनी नजरां उपर करी के बोलया, “मै माणुऐ जो दिखा दा है, पर सै साफ नी मिल्ला दे, सै मिजो सखां साईं चलदे मिला दे न।” 25 तालू यीशुऐ दोबारा उदियां हखी पर हथ रखे, कने अन्ने गोरा ने दिखया, कने उदियां हखी ठीक होई गियां, कने उसयो सब कुछ साफ-सुथरा मिलणा लगी पिया। 26 कने

यीशुऐ उसयो हुकम दिता कि अपने घरे जो मुडी जा, पर ऐथू जडा होया गांऐ बालयां जो दसणे ताई, गांऐ दे अंदर पैर भी मत रखदा। 27 यीशु कने उदे चेले बैतसैदा शेहेरे जो छडी करी कैसरिया फिलिप्पी शेहरां दे बखे आले गां च चली गे, कने रस्ते च उनी अपने चेलयां जो पुछया, “की लोक मेरे बारे च क्या बोलदे न, की मै कुण है? 28 चेलयां जबाब दिता कुछ लोक बोलदे ने कि तुसां यहून्ना बपतिस्मा देणेबाले न; पर कोई-कोई एलियाह बोलदा, कने कोई-कोई बोलदे न कि पुराणे जमाने दे परमेश्वरे दा संदेश देणेबालयां चे कोई इक है।” 29 फिरी यीशुऐ पुछया, “पर तुसां मिजो क्या बोलदे न?” पतरसे उसयो जबाब दिता, “तू मसीहा है, जडा परमेश्वरे दिया तरफा ला भेजया है।” 30 तालू यीशुऐ उना जो हुकम दिता की मेरे बारे च कुसी ने मत बोलदे की, मै मसीहा है कने परमेश्वरे मिजो भेजया है। 31 तालू यीशु अपने चेलयां जो सिखाणा लग्गा, कि मै, जडा माणुऐ दा पुत्र है, “मिजो मते दुख सेहणे पोणे न, कने यहूदी अगुवे, बड़े याजकां, कने यहूदी व्यवस्था जो सिखाणे बालयां मिजो अपनाणा नी है, कने मै मारी देणा है, कने फिरी मै तिन्ना रोजां बाद मरयां चे जिन्दा होई जाणा है।” 32 यीशुऐ उना जो ऐ गल्ल साफ तरिके ने बोली दीती। पतरस यीशुऐ जो बखिया लेई गया कने इसा गल्ला पर झिडकणा लग्गा। 33 तालू यीशु पिच्छे मुडया कने चेलयां जो दिखया कने पतरसे जो झिडकी करी बोलया, “शैताने साईं कम्म करणा बंद करा! मेरे सामणे ला दूर होई जा! क्योंकि तू परमेश्वरे दे साईं नी, पर तू माणुऐ साईं सोचदा है।” 34 यीशुऐ भिडा जो अपने चेलयां सोगी अपने बाल सदी करी बोलया, “जडा कोई मेरा चेला बणना चांदा है, उसयो अपणिया शरीर दियां इच्छां कने जडियां तरकिबां बणाईयां उना जो छडी करी कने जडा मिजों ताई मरणे जो तैयार रेंदा है, सेई मेरा चेला बणी करी मिजों पिच्छे चली सकदा है। 35 कोई माणु इयोदिया नी करगा कने अपने प्राणा जो बचाणा चांहगा, उनी परमेश्वरे सोगी आत्मिक जिन्दगी जिणे दा मोका गवाई देणा है। पर जडा माणु मिजों पर भरोसा करगा कने मेरे शुभसमाचार दिया बजा ने मरगा उस माणुऐ जो परमेश्वरे सोगी सदा ताई दी जिन्दगी मिलणी। 36 अगर तुसां संसारे दा सब कुछ पाई लेगे कने पर परमेश्वरे सोगी सदा दी जिन्दगी जिणे दा मोका गवाई दिगे, तां उदा क्या फायदा? 37 इक माणु परमेश्वरे जो क्या देई सकदा है, जडा उदी हमेशा दी जिन्दगी खरिदगा? कुछ नी! 38 तुहाडे च अगर कोई माणु मिजों अपना परमेश्वर कने मेरियां शिक्षा दा पालन करणे जो मना करदा है, क्योंकि तुसां डरदे न की गैर विश्वासी कने पापी लोकां तुहाडा मजाक उडाणा। फिरी जालू मै माणुऐ दे पुत्रे, पबित्र स्वर्गदूतां सोगी धरतिया पर ओणा है, तां मै उना लोकां जो भी अपना चेला मनणे ला मना करी देणा है। तालू सारयां लोकां मेरी महिमा दिखणी जडी मेरे पिता दी है।”

9 यीशुऐ भिडा कने अपने चेलयां जो बोलया, मै तुहांजो ने सच्च बोलदा है, “ऐथू खडोतयो लोकां चे कुछ लोक ऐसे न, उना तालू दीकर जिन्दे रेणा है जालू दीकर सै परमेश्वरे दे राज्य जो शक्तिशाली स्पे च अपने बिच ओदे नी दिखी लेना।” 2 इक हफ्ते बाद यीशु पतरस, याकूब कने यहून्ना जो इक उच्चे पहाडे पर लेई गया कने ओथु उना सिबा होर कोई नी था, कने

उना दे सामणे यीशुए दा रूप बदलई गया। 3 कने उदे कपडे चिट्टे होईकरी चमकणा लगे। धरतिया पर इयोदे चिट्टे कपडे कोई भी धोबी धोई करी नी करी सकदा। 4 तालू उना तिन्ना चेलयां, दो परमेखरे दे संदेश देणेवाले मूसा कने एलियाहा जो, जडे बडे पेहेले जिन्दा थे उना जो यीशुए सोगी गल्लां करदे दिखया। 5 ऐ सब दिखीकरी पतरसे यीशुए जो बोलया, “गुरू जी, साडा ऐथू रेंणा ठीक है, इस तांई असां ऐथू तीन तम्बू बणादे न, इक तैरे तांई, इक मूसा तांई, इक एलियाहा तांई।” 6 पतरसे ऐ इस तांई बोलया की, सै कने दुज्जे दो चले डरी गियो थे, कने नी जाणदे थे क्या बोलणा क्या करणा। 7 तालू इक बदल आया कने उनी उना जो अपणी छाया हेठ ढकी लिया, कने उना बदले च परमेखरे जो बोलदे सुणया, “कि ऐ मेरा प्यारा पुत्र है, कने मै इसला खुश है, कने जडा ऐ बोलदा है, उसयो ध्याने ने सुणा।” 8 तालू उना अपने चारो पासे नजर मारी, तां मूसा कने एलियाहा ओथु नी थे, कने उना जो सिर्फ यीशु ही मिल्ला। 9 जालू यीशु कने उदे तिन्न चले पहाडे ला उतरा दे थे, तालू यीशुए उना जो हुकम दिता कि, “कुसी जो भी मत दसदे कि तुसां क्या दिखया जालू दीकर मै, माणुए दा पुत्र मरयां चे जिन्दा ना होई जा।” 10 चेलयां जडा पहाडे पर होया उदे बारे च कुसी जो भी नी दसया, पर सै इसा गल्ला दे बारे चर्चा करणा लगे की, “मरयां चे जिन्दा होई जाणा” इदा क्या मतलब था। 11 कने चेलयां उसला पुछया, “मूसा दी व्यवस्था दे अनुसार व्यवस्था जो सिखाणे बाले बोलदे थे, मसिहा ला पेहेले एलियाहा ओणा था? अगर ओणा था, तां हाली दिकर कजो नी आया सै?” 12 यीशुए उना जो जबाब दिता, ऐ तां सच्च है कि एलियाहा पेहेले आई करी सब कुछ सुधारणा है। पर कजो माणुए दे पुत्रे दे बारे च ऐसा लिखया है, की उनी बडे दुख सेहणे न, कने उसयो निच समझणा है। 13 पर मै तुसां ने बोलदा है, एलियाहा ता पेहेले ही आई चुकया था, साडे अगुवां उदे कने बडा बुरा व्यवहार कितया। जियां सै करणा चांदे थे, जदिया की पबित्र शान्तां च बडी पेहेले ही बोलया था की उना करणा। 14 जालू यीशु कने तिन्न चले बाकी चेलयां बाल मुडी करी आये, तां दिखया की उना दे चारो पासे तां बडी भरी भीड लगियो है, कने व्यवस्था जो सिखाणे बाले उना सोगी बेहस करा दे थे। 15 कने जियां ही सारे लोकां यीशुए जो दिखया, दिखदे ही बडे हेरान होये, कने उदे बाल दौडी करी आये कने उसयो नमस्ते किते। 16 यीशुए उना ला पुछया, “तुसां इना सोगी बेहस कुसा गल्ला पर करा दे न?” 17 भिडा चे इकी माणुए उसयो जबाब दिता, “गुरू जी, मै अपने पुत्रे जो तैरे बाल लेईकरी आया था, इदे च बुरी आत्मा है, जिना इसयो गूंगा बणाई दितया है। 18 जालू भी बुरी आत्मा उदे अंदर ओदी है, तां सै उसयो गुस्से ने जमिना पर पटक दिन्दी, कने उदे मुए ला झाग निकलदा, कने दंदा पिंदा, सकत होई जांदा। मै तुहाडे चेलयां जो बोलया की बुरिया आत्मा जो बाहर कडी दिया पर सै उना ला नी होया।” 19 ऐ सुणीकरी यीशुए उना जो जबाब दिता, “हे अविश्वासी लोकों, मै कालू दीकर तुहाडे सोगी रेंगा, कने कालू दीकर तुहाडे अविश्वास जो सेहन करणा? उस जागते जो मेरे बाल लोआ।” 20 तालू सै जागते जो यीशुए बाल लेई आये कने जालू बुरिया आत्मा यीशुए जो दिखया, तां उना आत्मा जागते जो झट मरोडया, कने धरतिया पर फकोडी दिता, कने सै मुए ला झाग निकालदे-

निकालदे बिलटियां मारणा लग्गा। 21 यीशुए जागते दे पिता ला पुछया, “ऐ कालू ला होआ दा है?” कने उनी बोलया, “जालू ला ऐ लोका दिया नियाना होंदा था। 22 मती बरी बुरिया आत्मा इसयो मारणे तांई अग्गी कने पाणिये च सुटी दितया था, पर अगर तू कुछ करी सके, तां सांझो पर तरस खाई करी साडी सहायता कर।” 23 यीशुए उना जो बोलया, “अगर तू करी सकदा है, ऐ क्या गल्ल होई? जडा मिंजो पर भरोसा करदा है, उदे तांई सब कुछ होई सकदा है।” 24 बच्चे दे पिते झट पैरां च पेईकरी जोरे ने बोलया, “प्रभु जी, मेरी सहायता करा की मै तुसां पर भरोसा करे।” 25 जालू यीशुए दिखया, की मते सारे लोक उसयो दिखणे तांई गिठे होआ दे थे, तां उनी बुरिया आत्मा जो ऐ बोली करी झिडकां दितियां की, “हे बुरी आत्मा, जडी इसी जागते जो गूंगा कने बेहरा बणा दी कने बोलणा नी दे दी, मै तिजो हुकम दीदा है की, इसयो छडी दे, कने फिरी कदी मत ओदी।” 26 तालू बुरिया आत्मा चिलाई करी जागते जो मरोडी करी सटया, कने निकली गई कने सै जागत बिना हिल्ले ओथु लाशा सांई पेई रिया था, ऐथू दीकर की मते लोक बोलणा लगे की, ऐ तां मरी गया है। 27 पर यीशुए उदा हथ पकडी करी उसयो उठालया, कने सै खडोई गया। 28 बादे च जालू यीशु कने उदे चले घरे च किले थे, तालू उदे चेलयां पुछया कि, “असां बुरिया आत्मा जो कजो नी कडी सके?” 29 यीशुए उना जो जबाब दिता, “ऐसियां बुरियां आत्मा जो प्राथना कने बरत कितयो बिना माणुआं ला बाहर नी कडी सकदे।” 30 बादे च यीशु कने उदे चेलयां उना जगा जो छडी दिता कने गलील प्रदेशे ला निकले। कने यीशु नी चांदा था की कोई उसयो जाणे की सै कुथू है। 31 क्योंकि यीशु अपने चेलयां सोगी मता बकत बिताणा चांदा था कने उना जो सिखाणा चांदा था। कने उना ने बोला दा था की, “माणुए दा पुत्र, मेरे दुश्मना दे हथे पकड़ाया जाणा है, कने उना लोका मिंजो मारी देणा है, कने मरणे दे तरिये रोजे मरयां चे जिन्दा होई जाणा है।” 32 पर ऐ गल्ल उना दिया समझा च नी आई, कने चले पूछणे ला डरदे थे जडा यीशुए बोलया था। 33 यीशु कने उदे चले कफरनहम शेहरे च अपने घरे जो आये; कने जालू से घरे अंदर थे, तालू यीशु उना जो पुछणा लग्गा, “रस्ते च तुसां कुसा गल्ला पर बेहसा दे थे?” 34 सै चुप रे, क्योंकि उना रस्ते च ऐ बेहस कितियो थी कि, असां चे बडा कुण है। 35 तालू यीशु बेई गया कने बाहरां चेलयां जो अपने बाल गिठा होणे जो बोलया, कने उना जो बोलया, “जडा कोई सारयां ला महान बगना चांदा है, तां सै अपु जो सारयां ला निच समझे कने सारायां दा सेवक बणे।” 36 तालू यीशुए बखे इक बच्चा खुडोतया था, यीशुए बच्चे जो गल्ले लगाया कने चेलयां जो बोलया। 37 “जडा कोई माणु इयां ही इक बच्चे पर दया दसदा है, सै सच्ची मेरा इज्जत मान करदा है। कने कोई मेरी इज्जत मान करदा है, तां सै मेरा ही नी बल्कि मेरे परमेखरे दी इज्जत मान करदा है, जिनी मिजो भेजया है।” 38 तालू यहून्ना उसयो बोलया, “गुरू जी, असां इकी माणुए जो तैरे नाए दी शक्ति ने बुरियां आत्मा जो कडदे दिखया है, कने असां उसयो मना भी किता, क्योंकि सै साडे सांई तेरा चेला नी था।” 39 यीशुए बोलया, “उसयो मना मत करा अगर कोई मेरे नाये ने चमत्कार करदा है, क्योंकि ऐसा कोई नी है, जडा मेरे नाए ने सामर्थ्य दे कम्म करे, कने जल्दी मिंजो बुरा बोली सके, 40

क्योंकि जडे साडे बेरी नी है, सै साडे सोगी साथी न।” 41 जडा कोई इक कटोरा पाणिये दा तुहांजो इस ताई पियां, की तुसां जो मसीह दे चले बोलदे न, मै तुसां ने सच्च बोलदा हे की उनी अपना फल कुसा भी हालत च नी गवांणा है। 42 पर अगर कोई इना छोटयां चे, जडे मिंजो पर भरोसा करदे न, उना दे पापां दी बजा बणे तां उना ताई ऐई ही खरा है की अपने गले च पथर बन्नी करी दरियाये च छलांग लगाई दे। 43 सारियां बुराइयां जो छडी दिया जिना ने पाप होंदा है! बुराइयां जो पुरे तरीके ने छडी दिया, जियां की तुसां इक हथ बड़ा दे, जडा तुहाडे पापां दी बजा बणदा है। अगर तुसां स्वर्ग जो जांदे न, भले ही तुसां बाल इक ही हथ है, सै तुसां ताई खरा है। कने अगर तुसां बाल दोनो हथ न, कने तुसां नरके जान, तां इसला भयानक कुछ नी है। (Geenna g1067) 44 नरके दिया उसा जगा पर जिथ सारयां दे जिस्मा जो खाने बाले कीडे कदी नी मरदे कने बलियो अग्न कदी नी बुझदी। 45 सारियां बुराइयां जो छडी दिया जिना ने पाप होंदा है, बुराइयां जो पुरे तरीके ने छडी दिया जियां की तुसां इक पैर बड़ा दे, जडा तुहाडे पापां दी बजा बणदा है। अगर तुसां स्वर्ग जो जांदे न, भले ही तुसां बाल इक ही पैर है, सै तुसां ताई खरा है। कने अगर तुसां बाल दोनो पैर न, कने तुसां नरके जान, तां इसला भयानक कुछ नी है। (Geenna g1067) 46 नरके दिया उसा जगा पर जिथ सारयां दे जिस्मा जो खाने बाले कीडे कदी नी मरदे कने बलियो अग्न कदी नी बुझदी। 47 सारियां बुराइयां जो छडी दिया जिना ने पाप होंदा है, बुराइयां जो पुरी तरह छडी दिया जियां की तुसां इक हथी जो कडा दे, जडा तुहाडे पापां दी बजा बणदा है। अगर तुसां स्वर्ग राज्य जो जांदे न, भले ही तुसां बाल इक ही हथ है, सै तुसां ताई खरा है। कने अगर तुसां बाल दोनो हथी न, कने तुसां नरके जान, तां इसला भयानक कुछ नी है। (Geenna g1067) 48 नरके दी उसा जगा पर जिथ सारयां दे जिस्मा जो खाने बाले कीडे जडे कदी नी मरदे कने बलियो अग्न कदी नी बुझदी। 49 क्योंकि हर इक जणा अग्नो ने शुद्ध किता जाणा, जियां की बलिदान नुणे ने शुद्ध होंदा है। 50 नुण इक जरूरी चिज है, पर अगर उदा स्वाद चली जा, तां उदा स्वाद कियां वापिस लोणा? तुसां च लूँगे साईं खुबियां होणी चाईदियां, कने अपु चे मिली झूली कने शांतिया ने रिया।

10 यीशुए अपने चेलयां सोगी कपरनहम शहर छडी दिता, सै यहूदिया प्रदेशे ला निकले कने यरदन खड्डा दे दूरे पास्से चली गे। कने इक बरी फिरी भीड़ उदे बाल गिठी होई गई, कने सै उना जो हरबरी साईं उपदेश देणा लग्गा। 2 तालू फरीसी उदे बाल आये कने उसयो परखणे ताई उसला पुछ्या, “क्या मूसा दिया व्यवस्था च इक मरदे जो अपणिया घरे बालिया जो तलाक देणे दा हक है?” 3 यीशुए उना जो जबाब दिता, “मूसा तुहांजो तलाक दे बारे च क्या हुकम दितया है?” 4 उना बोलया, “मूसा हुकम दितया की त्याग पत्र लिखी करी अपणी घरे बालिया जो देई दिया कने उसा जो छडी दिया।” 5 यीशुए उना जो बोलया, “तुसां हरबरी परमेस्वरे दे हुकमों जो मनणे ताई मुकरी जांदे न, क्योंकि तुसां दा मन कठोर है, इस ताई मूसा ऐ लिखया था। 6 पर पबित्र शाब्दां च लिखया है कि जालू परमेस्वरे संसार बणया था, तालू उनी इक मर्द ताई इक जनानी बणाई। 7 जालू इक मर्द जनानिया ने बियाह करदा है, तां सै दोनो इक होई जानदे न, क्योंकि सै दोनो इक जान न। 8 कने सै दोनो हुण

इक तन न, क्योंकि हुण सै दो जणे नी, पर इक माणुए साईं न। 9 इस ताई उसा जनानिया कने मर्दे जो बख नी करणा चाईदा जिना जो परमेस्वरे बियाह दे बंधना च बनया है।” 10 कने बादे च, जालू सै चेलयां सोगी घरे च किल्ला था, तालू चेलयां तलाक दे बारे च उसला पुछ्या। 11 यीशुए उना जो जबाब दिता, “जडा अपणिया घरे बालिया जो छडी करी दुईया ने बियाह करे तां सै उसा पेहलिया दे खिलाफ च व्यभिचार करदा है। 12 कने अगर घरे बाली अपने घरे बाले जो छडी करी कुसी होरसी ने बियाह करे, तां सै व्यभिचार करदी है।” 13 फिरी लोक बचयां जो यीशुए बाल लोणा लग्गे ताकि सै उना पर हथ रखीकर उना जो आशीष दे, पर चेलयां उना लोकां जो डांटया। 14 यीशुए जो ऐ सब दिखीकरी गुस्सा आया कने उना जो बोलया, “बचयां जो मना मत करा कने इना जो मेरे बाल ओणा दिया, जडे इना बचयां साईं भरोसेमंद न उना परमेस्वरे दे राज्य च रेणा। 15 मै तुसां ने सच्च बोलदा है, परमेस्वरे अपने राज्य च सिर्फ उना लोकां जो ओणा देणा है जडे परमेस्वरे दे राज्य जो बचयां साईं अपनांदे न।” 16 कने यीशुए बचयां जो गल्ले ने लाया, कने उना पर हथ रखीकरी यीशुए आशीष दिती। 17 जालू यीशु कने उदे चेलयां यात्रा करणा शुरू किती थी, तां इक माणु उदे बाल दौडी करी आया कने इज्जत मान ताई उदे पैरां अग्रे डेई पिया कने उसला पूछणा लग्गा की, “हे उत्तम गुरु, मै क्या कम्म करां की परमेस्वर मिंजो हमेशा दी जिन्दगी दे? (aiōnios g166) 18 यीशुए उसयो बोलया, तुसां मिंजो कजो उत्तम बोलदे न, उत्तम तां सिर्फ इक ही है, सै परमेस्वर है।” 19 “तू परमेस्वर दे हुकमा जो तां जानदा है की: हत्या नी करणी, व्यभिचार नी करणा, चोरी नी करणी, झूठी गबाई नी देंगी, बेईमानी नी करणी, कने अपने माता पिता दा आदर करणा।” 20 उनी यीशुए बोलया, “गुरू जी, इना सबना हुकमा जो तां मै बचपने ला ही मनदा आया है।” 21 यीशुए उस पासे नजर करी के प्यारे ने दिखया कने उसयो बोलया, “इक कम्म है जडा तिजो हाली भी करणे दी जरूरत है। जा, कने जडा कुछ तेरा है उसयो बेची करी गरीबां जो देई दे, तां तिजो स्वर्ग दा धन मिलणा, इयां करणे बाद आ कने मेरा चेला बणिया।” 22 तालू माणुए यीशुए दी इसा गल्ला जो सुणया, कने उदे चेहेरे पर उदासी छाई गई, कने सै दुखी होईकरी चली गया, क्योंकि सै बडा भरी अमीर था। 23 यीशुए चारो पासे दिखीकरी अपने चेलयां जो बोलया, “अमीरां दा परमेस्वरे दे राज्य च जाणा बडा मुशकिल है।” 24 तालू चले यीशुए दियां गल्लां सुणी की हेरान होई गे, यीशुए बोलया मेरे भाईयो, जडा कोई अपने पैसयां उपर भरोसा करदा है, उना ताई परमेस्वरे दे राज्य जो जाणा बडा मुशकिल है। 25 ऊंटे दा सुइया दे नाके चे निकलना असान है, पर अमीरां दा परमेस्वरे दे राज्य च जाणा बडा भरी मुशकिल है। 26 जालू चेलयां ऐ सुणया, तां सै बडे हेरान होईकरी अपु चे बोलणा लग्गे, “तां कुण अपने पापां दी सजा मिलणे ला बची सकदा है?” 27 यीशुए उना दे पासे दिखीकरी बोलया, “जडा माणु नी करी सकदे, पर सै परमेस्वर करी सकदा है, क्योंकि परमेस्वरे सब कुछ करी सकदा है।” 28 पतरस यीशुए जो बोलणा लग्गा, सांझो क्या मिलणा? असां तां तुहाडे चेले बणने ताई अपना सारा कुछ छडी दितया है। 29 यीशुए चेलयां जो बोलया, “मै तुहांजो ने सच्च बोलदा है, मेरे चेले बणने ताई कने शुभसमाचार दा प्रचार

करणे ताईं तुसां च जिनी भी घरे जो छडया, या अपने भाई बेहण, माता-पिता, अपणिया जमिना जो छडया है। 30 उसयो इस बकते सौ गुणा ना मिल्ला हो, जिनी अपना टबर, भाई कने बेहणां, माता-पिता, बाल बचयां जो या खेतरां जो छडया हो। पर उसयो तकलिफां कने ओणे बाले बकते च हमेशा दी जिन्दगी मिलणी है। (aion g165, aionios g166) 31 पर मते लोक न जड़े हुण महान कने अगे न, उसी बकते सै पीछे होणे, कने जड़े पीछे न, सै उस बकते पेहले होणे न।” 32 सै यरूशलेम शहर जो जांदे बेले जालू रस्ते च थे, तां यीशु उना दे अगे-अगे चलया था, कने उदे चेले बड़े हेरान होऐ की जिथु सै चलयो थे, ओथु मते लोका उना दा बिरोध किता था, कने जड़े लोक उदे सोगी थे, सै इसा गल्ला ला डरयो थे, की यरूशलेम शहर च उना दा क्या होणा। तालू सै फिरी उना बाहरां चेलयां जो इकी तरफा लेईकरी उना ने गल्लां बोलणा लग्गा, जडियां उस सोगी होणे बालियां थियां। 33 “दिखा, ध्याने ने सुणा, असां यरूशलेम शेहरे जो चलयो न, कने मै माणुऐ दा पुत्र बड्डे याजकां कने यहूदी व्यवस्था जो सिखाणे बालयां दे हथे पकडायया जाणा है, कने उना मिजो मौत दी सजा देणी है, कने होर जातियां दे हथे देई देणा है। 34 कने उना मेरा मजाक उडायणा है, मिजो पर थुकणा, कने मिजो कोडे मारणे, कने मिजो मारी देणा है, कने मै तिजे दिने मरयां चे जिंदे होई जाणा है।” 35 याकूब कने यहून्ना दो भाई, जड़े जब्दी दे पुत्र थे उना यीशुऐ बाल आई करी बोलया, “गुरू जी, असां कुछ तिजो ला मंगणा चांदे न, सेई तू साडे ताईं कर।” 36 यीशुऐ उना ला पूछया, “तुसां क्या चांदे न की मै तुहाडे ताईं करे?” 37 उना यीशुऐ जो बोलया, “असां तुसां दे महिमामय राज्य च तुसां दे बखे इज्जत बाली जगा च बोणा चांदे न। असां चे इक तुहाडे खबे कने इक सज्जे हथे बखे बोणा चांदे न।” 38 यीशुऐ उना जो बोलया, “तुसां जो नी पता कि तुसां क्या मंगा दे? हुण जड़े दुख मै सेहणे न, क्या तुसां उना दुखां जो सेहन करी सकदे न? क्या तुसां मरणे ताईं तैयार न क्योंकि मै जल्दी ही मरणे बाला है?” 39 उना उसला बोलया, “असां करी सकदे न।” यीशुऐ उना ने बोलया, “तुसां भी सारे दुख सेहणे न, जियां मै सेहणे। तुसां जो भी मारया जाणा है, जियां मिजो मारणा है। 40 मिजो ऐ तय करणे दा हक नी है, की मेरे सज्जे कने खबे कुसयो सै जगा मिलणी है, सै जगा उना लोकां ताईं न, जिना जो परमेश्वर चुणयां है।” 41 ऐ सुणीकरी बाकी दसो चेले याकूब कने यहून्ना पर गुस्सा करणा लग्गे। 42 तां यीशुऐ उना जो अपने बाल सदीकरी उना जो बोलया, “तुहांजो पता है ना, कि जड़े लोक प्रधान मने जांदे थे, सै अपने अधिकारां दा इस्तेमाल अपने अधीन लोकां दे उपर हक जमाणे ताईं करदे न। उना दे आखे लोक अपणी गल्ल मनाणे ताईं हक जतांदे न। 43 पर तुहांजो उना साईं नी होणा चाईदा, तुहांजो चे जडा महान बणना चांदा है, उसयो बाकियां दी सेबा करणी चाईदी। 44 कने जडा कोई तुसां चे प्रधान बणना चांदा हो, सै सारायां दा नौकर बणे। 45 मै ऐ इस ताईं बोलदा है क्योंकि मै, माणुऐ दा पुत्र, इस संसारे च सारयां दी सेबा करणे ताईं आया है, मै इस ताईं नी आया कि लोकां ला अपणी सेबा करां। मै तां लोकां जो पापां ला छुटकारा करणे ताईं अपने प्राण कीमत च देणा आया है।” 46 यरूशलेम शहर दे रस्ते च जांदे, यीशु कने चेले येरीहो च आये, जालू सै कने उदे चेले कने इक बडी भीड़ यरीहो शेहरे

ला निकला दी थी, इक बरतिमाई नाऐ दा अन्ना भिखारी सडका दे बखे बैठया था। सै तिमाई दा जागत था। 47 सै ऐ सुणीकरी की यीशु नासरत शेहरे ला है, जडा रस्ते च चलया था, डडी-डडी करी बोलणा लग्गा, “हे यीशु, राजा दाऊदे दे बंशज, मिजो पर दया कर।” 48 उसयो मतयां झिडकां दीतियां की चुप रे, पर सै होर जोरे ने बोलणा लग्गा की, “हे यीशु, राजा दाऊदे दे बंशज, मिजो पर दया कर।” 49 तालू यीशुऐ ऐ सुणया कने स्की करी बोलया, “उसयो ऐथू लोआ।” कने लोकां उस अन्ने जो सदीकरी बोलया, “हिम्मत रख, उठ सै तिजो सदा दा है।” 50 कने अन्ने माणुऐ झट अपने उपर ओडियो चादर सूटी कने उठी करी यीशुऐ बाल आया। 51 यीशुऐ उसयो पूछया, “तू क्या चांदा है की मै तेरे ताईं करे?” अन्ने उसयो बोलया, “गुरू जी, ऐ की मिजो मिलणा लग्गी पोऐ।” 52 यीशुऐ उसयो बोलया, “मै तिजो ठीक करा दा क्योंकि तू मिजो पर भरोसा करदा है। हुण तू घरे जो जाई सकदा है” कने उसयो मिलणा लग्गी पिया, कने रस्ते च यीशुऐ पिछे चली पिया।

11 जियां यीशु कने उदे चेले यरूशलेम शेहरे दे बखे पुज्जे, सै जैतून स्वां दे पाहडे दे कंडे बैतफगे कने बैतनिय्याह गांऐ च आये, तां यीशुऐ अपने दो चेलयां जो ऐ बोली करी भेजया, 2 “सामणे दे गां च जा, कने ओथु पुज्जे ही तुहांजो इक गधिया दा बच्चा बननया मिलणा है, उदे उपर हली कोई नी बैठया था। सै खुंडे च बननया होणा उसयो खोली करी लेई ओआ। 3 अगर कोई तुहांजो ला पुछे, कि ऐ क्या करा दे न? तां बोलनयो, कि साडे प्रभु जो इदी जरूरत है। कने उनी जल्दी ही बापस करी देणा है।” 4 चेलयां गांऐ च जाई करी उस गधिया दे बच्चे जो इक घरे दे दरबाजे बखे खुंडे ने बनया दिखया, कने सै उसयो खोलणा लग्गे। 5 कने जड़े ओथु खडुतयो थे उना चे कोई-कोई बोलणा लग्गे की ऐ क्या करा दे न, इस गधी दे बच्चे जो कजो खोला दे न? 6 जियां यीशुऐ बोलया था, तियां ही चेलयां उना जो बोली दिता उना गधिया दे बच्चे जो जाणा दिता। 7 कने दो चेलयां उस गधिया दे बच्चे जो यीशुऐ बाल लांदा, कने उस पर अपने उपरे बाले कपडे उदिया पीठी पर पाई दिते कने यीशु उस पर बेई गया कने यरूशलेम शेहरे दी पास्से चलणा लग्गे। 8 तालू मतयां सारायां लोकां अपने कपडे रस्ते च बछाई दिते कने उदा आदर मान किता। कने केईयां रस्ते च पनां बालियां डालियाँ बडी-बडी करी बछाई करी उदा मान आदर किता। 9 कने थोडे लोक यीशु दे अगे-अगे चलयो थे, कने थोडे लोक पिछे चलयो थे, सै सारे खुशिया ने जोरे ने बोला दे थे, “होशाना; परमेश्वर इसला खुश है जडा उदे हके सोगी ओंदा है। 10 परमेश्वरे दा अनुग्रह ओणे बाले राज्य पर है, जड़े साडे सियाणे राजा दाऊद दे राज्य साईं है, धन्य है! परमेश्वर जडा स्वर्ग च रेंदा है, उदी होशाना हो।” 11 जालू यीशु यरूशलेम शेहरे च पुज्जा कने तां सै परमेश्वरे दे मंदरे दे अंदर गया, कने सारे पासे दिखया कने सै अपने बाहरां चेलयां सोगी बैतनिय्याह गांऐ जो मुडी गया, क्योंकि संज होई गियो थी। 12 दुज्जे दिने जालू यीशु कने उदे चेले बैतनिय्याह गांऐ ला यरूशलेम शेहरे जो चलयो थे, तालू यीशुऐ जो भूख लग्गी। 13 कने उनी पतयां ने भरया होया अंजरी दा स्ख दिखया कने सै उदे बखे गे, ताकि कुछ खाणे जो मिली जा, पर ओथु पतयां जो छडी करी होर कोई फल नी मिल्ला, क्योंकि फल देणे दी रित नी थी। 14 कने

यीशुए उस सखे जो बोलया, “अज्जे ला बाद तेरा फल कुनी नी खाणा। कने उदे चेले सुणा दे थे।” (aion g165) 15 “उदे बाद यीशु कने उदे चेले सै यरूशलेम शेहरे च आऐ,” उनी उना लोकां जो परमेश्वर दे मंदरे ला कडी दिता, जडे ओथु जानवर कने चिजां खरीदणे बचने दा कम्म करा दे थे। यीशुए पैसायां बदलने बाले मंजे जो, कने कबुतरां जो बेचणे बालयां दे पिंजरयां जो बाहर सुटी दिता। 16 “कने उनी लोकां जो हुकम दिता की मंदरे दे अंगणे ला होईकरी चिजां जो लिणा बंद करा। 17 कने यीशुए उना जो बोलया, पबित्र शास्त्र ऐ बोलदा की, लोक मेरे घरे जो प्राथना दा घर बोलदे न, जिथू सारे लोक प्राथना तांई ओदे न? पर तुसां तां इसयो डाकुआं ला भईयो गुफा सांई बणाई दितया है।” 18 बड़े याजकां कने यहूदियां दिया व्यवस्था जो सिखाणे बालयां ऐ सुणया, जडा यीशुए बोलया कने कितया, तां सै उसयो मारणे दा मौका तोपणा लग्गे, पर सै लोकां ला डरा दे थे, क्योंकि सारे लोक यीशुए दियां गल्लां ने हेरान थे। 19 जालू संझा दा बेला होया, तां यीशु कने उदे चेले शेहर छडी करी बैतनिय्याह गां जो मुडी गे। 20 फिरी ब्यागा तडके बेले यीशु कने उदे चेले यरूशलेम शेहरे जो ओआ दे थे, तालू उना अंजिर दे सखे जो दिखया तां सै सुकी गया था। 21 पतरसे जो सै गल्ल याद आई, कने उनी यीशुए जो बोलया, “गुरू जी, दिख। ऐ अंजिर दा सख जिसयो तू श्राप दितया था सै सारा सुकी गया है।” 22 यीशुए उसयो जबाब दिता की, “परमेश्वरे पर भरोसा रख जडा तुसां मंगे से सारा कुछ मिलणा। 23 मै तुसां ने सच्च बोलदा है, की अगर कोई इस पहाड़े जो बोले की, की ऐथू ला उठ कने समुंद्रे च जाई करी पेई जा, कने अपने मने च कोई शक नी रखे, पर भरोसा रखे, की जडा मै बोलदा है सै होई जा, तां उस तांई तदिया होई जाणा है। 24 इस तांई मै तुहांजो बोलदा है की जडा कुछ तुसां प्राथना करिके मंगा, तां भरोसा करी लिया की तुहांजो मिली गया है, तां सै तुहांजो मिली जाणा। 25 जालू कदी तुसां प्राथना करदे न, तां अगर तुहाड़े मने च कुसी तांई बैर है, तां उसयो माफ करी दिया, इस तांई की तुहाड़ा पिता परमेश्वर जडा स्वर्गे च रेंदा है, उनी तुसां दे पाप माफ करी देणे। 26 पर अगर तुसां माफ नी करगे, तां तुहाड़े पिता परमेश्वरे जडा स्वर्गे च है, उनी भी तुहाड़ा पाप माफ नी करणा।” 27 यीशु कने उदे चेले यरूशलेम शेहरे जो मुडी करी आये, जालू सै मंदरे च गुप्ता दा था तां बड़े याजक कने यहूदी व्यवस्था जो सिखाणे बालयां कने यहूदी अगुवे उदे बाल आये कने पृच्छा लग्गे, 28 “उना उसयो बोलया, ऐ कम्म तू कुसी हके ने करा दा है? कने तिजो ऐ हक कुनी दितया है?” 29 यीशुए उना जो बोलया, “मै भी तुहांजो ला इक गल्ल पछदा है, अगर तुसां मिंजो जबाब दिगे, तां मै दसगा कि ऐ कम्म मै कुसी हके ने करदा है। 30 यहून्ना जो लोकां जो बपतिस्मा देणे तांई कुनी भेजया था? क्या सै परमेश्वरे भेजया था या माणुऐ? मिंजो दसा।” 31 तालू सै अपु चे बोलणा लग्गे कि अगर असां बोलया कि, “परमेश्वर जडा स्वर्गे च है उनी भेजया है, तां यीशुए सांझो ला पुछणा, कि तुसां यहून्ना पर भरोसा कन्नी किता?” 32 अगर असां बोलया की, सै माणुऐ दे पाससे ला आया है, तां सै जबाब नी देई सके, क्योंकि सै उना लोकां ला डरदे थे, जडे ऐ मंदे थे की यहून्ना परमेश्वर दे पास आया इक सच्चा परमेश्वरे दा संदेश देणैबाला था। 33 उना यीशुए जो जबाब दिता, सांझो नी पता कुन्नी

यहून्ना बपतिस्मा देणेबाले जो भेजया। यीशुए उना जो जबाब दिता, “मै भी तुहांजो नी दसणा की मिंजो ऐसे कम्म करणे दा हक कुनी दितया है।”

12 इदे बाद, यीशु यहूदी अगुवां ने कहाण्यां च गल्लां करणा लग्गा, इक माणुऐ बागे च अंगूर लाये। उनी अंगूरा दे बागे दे चारों पासे बाड लगवाया, कने इक जगा अंगूरा दे रसे जो निचोडने तांई बणाई, कने निगरानी रखणे तांई इक उचिया जगा पर कमरा बणाया। फिरी उनी बागे जो कुछ किसाना जो ठेके पर देई दिता, कने परदेस चली गया। 2 फिरी जालू अंगूर पक्की गे, तां उनी अपना इक नोकर ठेकेदारे बाल अपना अंगूरे दे बागे दा हिस्सा लोणे तांई भेजया। 3 पर ठेकेदारां उसयो पकड़या कने मारी कुट्टी करी बिना कुछ दितयो खाली हथ भेजी दिता। 4 बागे दे मालिके इक होर नोकर भेजया, ठेकेदारां उदा सिर फोडया कने उदी बेस्ती किती। 5 फिरी बागे दे मालिके इक होर नोकरे जो भेजया, कने उना उसयो मारी दिता। तां उनी होर मतयां जो भेजया, पर ठेकेदारे उना चे केईयां जो कुटया, कने केईयां जो मारी दिता। 6 हुण बागे दे मालिके बाल भेजणे तांई सिर्फ इक ही माणु था। जडा उदा अपना प्यारा जागत था। उना बाल भेजया की सै मेरे जागते दी इज्जत करगे। 7 पर उना ठेकेदारां उदे जागते जो ओदे दिखया, कने उना अपु चे सलाह किती की, ऐई तां बारिस है, इनी तां अंगूरे दे बागे दा मालिक बणना, ओआ असां इसयो मारी दिन्दे न, तां सारी जयादात साडी होई जाणी। 8 कने उना उसयो पकड़ी करी मारी दिता, कने उदी लाशा जो अंगूरे दे बागे बाहर फेंकी दिता। 9 “तां हुण, अंगूर दे बागे दा मालिक क्या करगा? क्या उनी आई करी उना ठेकेदारां जो खत्म करी दिगां, कने दाखां दे बागे दा ठेका कुसी होरसी जो दिगा। 10 क्या तुसां पबित्र शास्त्रे दा ऐ हिस्सा नी पढ़या जिदे च मसीह दी तुलना इक खास पथरे ने करदा है? सै बोलदा है, जिस पथरे जो राजमिस्त्रिं बेंकार बोलया था कने सुटी दितया, सै ही पथर, सबना ला खास पथर बणी गया। 11 प्रभु परमेश्वरे इयोदिया किता, कने साडिया नजरा च ऐ बडा ही अनोखा है।” 12 तां उना उसयो पकड़ना चाया, क्योंकि सै समझी गियो थे, उनी साडे बरोध च ऐ कहाणी बोलियो है। पर सै यीशुए जो पकड़ी नी सके क्योंकि सै लोकां ला डरा दे थे, इस तांई सै यीशुए जो किल्ला छडी करी चली गे। 13 तालू उना उसयो गल्लां च फसाणे तांई केई फरीसियां कने राजा हेरोदियां दे दले दे लोकां जो उस बाली भेजया। 14 उना आई करी उसयो बोलया, “गुरू जी, सांझो पता है की, तुसां हमेशा सच्च बोलदे न, कने तुसां इसा गल्ला ला नी डरदे की दुज्जे लोक तुहाड़े बारे च क्या सोचदे न, कुसदी परबाह नी करदे न, क्योंकि तुसां सारयां कने इकोदिया व्यवहार करदे न, तू तां परमेश्वरे दा रस्ता सचाइया ने दसदा है। तां हुण सांझो दस। क्या महाराजा जो कर देणा साडिया व्यवस्था दे खिलाफ है या नहीं? 15 असां जो कर देणा चाईदा या नी देणा चाईदा?” यीशुए उना दा कपट जाणी करी उना जो बोलया, “तुसां मिंजो ला कुछ गलत बुलबाई करी फसाणे दी कोशिश कजो करा दे न? इक चांदी दा सिक्का मिंजो बाल लेईकरी ओआ, मै उसयो दिखें।” 16 सै लेई आऐ, कने यीशुए उना जो पुछया, “मिंजो दसा की इस चांदी दे सिक्के च कुसदा चित्र बणया कने कुसदी मोहर लगियो?” उना बोलया, “महाराजा दा।” 17 यीशुए उना जो बोलया, “जडा महाराजा दा है,

सै महाराजे जो दिया, कने जडा परमेस्वरे दा है, सै परमेस्वरे जो दिया।” तालू सै उस पर बडे हेरान होए। 18 यहदियां दे धर्मी दल दे थोडे लोक जिना जो सदुकी भी बोलदे न, तालू थोडे यहदी अगुवे यीशुए बाल आये। कने सै भरोसा नी करदे थे, कि लोक मरणे दे बाद फिरि जिन्दे होई सकदे ने। उना यीशुए ला पुछ्या, 19 “गुरू जी, मूसा साडे तांई लिख्या है, की अगर कुसी दा भाई बिना ओलादी मरी जा, कने उदी घरे बाली जिन्दा रे, तां उदा भाई उदिया घरे बालिया सोगी बियाह करिके अपने भाई तांई बंश पैदा करे। 20 स्दुकियां यीशुए जो इक कहाणी सुणाई की, इक घरे च सत भाई थे। सबते बडे भाईये इकी जनानिया ने बियाह किता, जालू सै मरी गया तां उदी कोई भी ओलाद नी थी। 21 तां दुऐ भाईए उसा सोगी ही बियाह करी लिया कने सै भी बिना ओलादी मरी गया, कने इयां ही तिजे भाईये किता, 22 कने सतां भाईयां उसा ने बियाह किता कने सतो भाई बिना ओलादी मरी गे। सबना दे बाद सै जनानी भी मरी गई। 23 हुण, सांझो दस सतां भाईयां उसा जनानिया ने बियाह कितया था, जालू सै मरणे दे बाद फिरि जिन्दे होंगे, तां सै जनानी कुदी घरे बाली होणी?” 24 यीशुए उना जो बोलया, “तुसां दो बजा ने गलत न, तुसां पबित्र शास्त्र जो नी जाणदे ने जडा मरणे दे बाद लोकां जो जिन्दा रेणे दे बारे च दसदा है। तुसां ऐ नी जाणदे न की परमेस्वरे बाल मरयो लोकां जो जिन्दा करणे दी शक्ति है। 25 क्योंकि जालू उना मरयां चे जिन्दा होणा, तां उना लोका दे बियाह नी होणे; जियां स्वर्ग च रेणेबाले स्वर्गदूत बियाह नी करदे। 26 मरयां चे जिन्दा होणे दे बारे च, तुसां क्या मूसा दिया कताबां च नी पढया जालू झाडिया जो अग लगियो थी, तां उसा जगा पर क्या होया था, परमेस्वरे मूसा ने गल्ल किती कने बोलया, मैं अब्राहम, इसहाक, कने याकूब दा परमेस्वर है, जिदी ऐ अराधना करदे थे। 27 तांई तां मरयो लोकां दा परमेस्वर नी है। पर जिन्दया दा परमेस्वर है, तुसां बडे गलत न।” 28 कने यहदी मूसा दी व्यवस्था जो सिखाणे बालयां चे इकी ऐ चर्चा सुणी, जडी यीशु कने सदुकी अपु चे करा दे थे, कने ऐ जाणी करी की यीशुए उना जो ठीक तरीके ने जबाब दिता, तां सै यीशुए बाल आया कने पुछ्या, “की परमेस्वरे जडे भी हुकम दितयो न, उना सारयां चे सारयां ला बडा हुकम कुण दिया है?” 29 यीशुए जबाब दिता, “सबना हुकमा ला बडा हुकम ऐ है: इस्राएल दे लोको तुसां सुणा। प्रभु साडा परमेस्वर जिसदी असां अराधना करदे न, सै इक ही प्रभु है। 30 कने तू अपने प्रभु परमेस्वर ने अपने सारे मने ने, कने अपने सारे प्राणा ने, कने अपणिया सारिया अकला ने, कने अपणिया सारिया शक्तियां ने प्यार रखनयो। 31 परमेस्वर दा दुज्जा हुकम ऐ है, की जितणा तुसां अपने आपे जो प्यार करदे न, दूजयां ने भी उतणा ही प्यार करा, परमेस्वरे इना दो हुकमा ला बड़े होर कोई हुकम नी दितया न।” 32 मूसा दिया व्यवस्था जो सिखाणे बालयां उसयो बोलया, “गुरू जी,” बिलकुल ठीक। तू सच्च बोलया है, सै ही परमेस्वर है, कने उसयो छडी करी होर कोई नी है। 33 कने उसला सारे मन, कने सारिया अकला ने, कने सारे प्राणा ने, कने सारिया ताकता ने प्यार रखणा, कने पड़ोसियां ने अपणयां सांई प्यार रखणा, ऐ सब परमेस्वरे जो जानवरां दियां बलियां चढाणे ला जादा जरूरी है। 34 जालू यीशुए दिखया की उनी सोची समझीकरी जबाब दिता, तां यीशुए उसयो बोलया, “तू परमेस्वरे दे राज्य च

प्रवेश करणे दे नेडे है।” कने फिरि होर कुसी जो उसला कुछ पुछणे दी हिम्मत नी होई। 35 फिरि यीशुए परमेस्वरे दे मंदरे च उपदेश दिन्दे होये बोलया की, व्यवस्था जो सिखाणे बाले कियां बोली सकदे न की मसीह राजा दाऊदे दा बंशज है? 36 ऐथू दिकर कि राजा दाऊद, जालू परमेस्वर दी पबित्र आत्मा उसयो बोलणे दी शक्ति दिती, तां उनी बोलया, “परमेस्वरे मेरे मसीह जो अपने बखे इज्जत मान कने हक दी पदवी च बोणे तांई बोलया था, हालांकि उनी उदे सारे दुशमणा जो पूरी तरहा उदे अधीन करी दिता।” 37 “ऐथू दिकर कि राजा दाऊदे भी मसीह जो प्रभु करी के बोलया, तां सै दाऊद दा बंशज कियां होया?” कने लोक उसयो बडे मजे ने सुणदे थे। 38 यीशुए अपने उपदेश च उना ने बोलया, “व्यवस्था जो सिखाणे बालयां ला साबधान रिया, जडे लोकां जो दसणे तांई लम्बे कने मंगे कपडे पाणा पसंद करदे, कने उना जो बडा पसंद है की लोक उना जो बजारां च नमस्ते करन, 39 कने यहदी जंज घरां च खास-खास आसना पर बोणा पसंद करदे न। कने खांदे बेले खास जगा चांदे न। 40 सै धोखे कने वेईमानिया ने विधवां दे घरां दी चिजां पर कब्जा करी लेंदे न। कने लोकां जो दसणे तांई बडी देरा दीकर प्राथना करदे न, परमेस्वरे ला इना जो बडी बुरी सजा मिलणी है।” 41 यीशु मंदरे दे भंडारे सामणे बेईकरी दिखा दा था की लोक परमेस्वरे दे मंदरे दे भंडारे च कियां पैसा पांदे न, कने मते अमीरां लोकां बडा सारा पैसा पाया। 42 इतणे च इक गरीब बिधवा आई करी दो तांबे दे सिक्के पाये, जिना दी कीमत बडी घट थी। 43 तालू उनी अपने चेलयां जो अपने बखे सदीकरी बोलया, “मैं तुसां ने सच्च बोलदा कि इस मंदरे दे भंडारे च जितणया भी दान पाया है, उना सबना ला बदीकरी इना गरीब बिधवा पाया है।” 44 क्योंकि सबना अपने भंडारे चे थोडा दिया दिता, पर इना गरीब बिधवा इसा बाल जितना भी था, सारा पाई दितया है।

13 जालू यीशु मंदरे ला निकला दा था, तां उदे चेलयां चे इकी उसयो बोलया, “गुरू जी, दिख, कितणियां छेल ईमारता न कने बड़े-बड़े पत्थरां ने बाणियां न कने कितणे-कितणे बड़े घर न।” 2 यीशुए उसयो बोलया, “तुसां इना बड़े-बड़े घरां जो दिखा दे न, इक दिन इना चे ऐथू इक भी घर नी बचणा है, ऐथू दीकर की इक पथरे उपर पथर नी रेंगा है, जडा डायी नी जाणा।” 3 जालू यीशु मंदरे ला जैतून रुखां दे पाहडे पर चली गया कने मंदरे दे सामणे बेई गया, तां पतरस, याकूब, यहन्ना कने अन्द्रियास यीशुए बाल आये कने तालू यीशुए बाल कोई नी था, कने उसला पुछ्या, 4 “सांझो दस ऐ सब कुछ कालू होणा है? कने जालू ऐ सब कुछ पूरा होणेबाला होंगा तां उदा क्या निशान होणा है?” 5 यीशुए उना ने बोलया, ध्यान रखयो की तुहांजो कोई धोखा न दे। 6 मते सारे लोकां मेरे नाए ने दाबा करिके ओणा है। उना बोलणा है, मैं मसीहा हूँ कने उना मतयां लोकां जो भटकाणा है। 7 जालू तुसां लडाईयां, कने लडाईयां दियां गल्लां सुणणे तां डरदे मत; क्योंकि इना दा होणा जरूरी है, पर तालू संसारे दा खात्मा नी होणा है। 8 क्योंकि जातियां ने जातियां कने राज्य ने राज्यां इक दुज्जे ने लडाईयां करणियां न। कने हर कुथी हिलण होणे न कने अकाल पोणे न। ऐ तकलीफ कने दुख ऐदिया होणा जदिया

की जालू माँ बच्चे जो जन्म देणा लगदी है। 9 “पर तुसां जो हमेशा चौकने रेणा चाईदा, क्योंकि लोकां तूहांजो कैदी बणाना कने यहदी जंज घरा च देणा कने तूहांजो मार पोणी, कने मेरिया बजा ने तूहांजो हाकिमा कने राजयां सामणे न्याय ताई महासभा च पेश करणा है, ताकि तुसां उना जो मेरे ताई गबाई देन। 10 कने सारे देशां च, तूहांजो कने होर जड़े मिजों उपर भरोसा करदे न, तूहांजो संसारे दे अंत होणे दे पहले सारयां लोकां जो शुभसमाचार सुणाणा है। 11 जालू तूहांजो कैदा च पाणा है, तां तुसां इदी चिंता मत करदे, की असां क्या बोलणा है। क्योंकि उस बेले पबित्र आत्मा तुसां दे जरिये गल्लां करणियां न। 12 उसी बेले, जड़े लोक मिजों पर भरोसा नी करदे न, उना अपने भाईयां जो जेला च करी लेणा, जड़े मिजों पर भरोसा करदे ने सै मरवाई देणे न। पिता अपने बचयां सोगी इयां ही करणा है, कने बचयां मां-प्यो दे खिलाफ होईकरी उना जो मारी देणा है। 13 क्योंकि तुसां मेरे चले न उदिया बजा ने सारे लोकां तुसां ने बैर करणा है, पर जड़े लोक मिजों पर भरोसा रखदे न कने आखरी दीकर सेहन करणा, उना दा ही उद्धार होणा है।” 14 जालू तुसां इक मसीह बिरोधी जो यस्शलेम मंदरे च खड्डोतयो दिखणा, जिथू उसयो नी होणा चाईदा। यहूदिया प्रदेशे दे लोकां जो जान बचाणे ताई पाडा पर नसणा पोणा। 15 जडा कोई अपनी घरे दिया छती पर हो, तां सै समान लेणे ताई थले ना उतरे, ना ही अंदरे जो जा। 16 कने जडा खेतरां च होए, सै अपने कपड़े लेणे ताई मुडी करी घरे ना ओए। 17 ऐ उना जनानिया ताई बडा बुरा बकत होणा जडियां लैरथियां न, कने उना जनानियां ताई जडियां नियाणे जो दूध पियादियां न, उना जो अपनी जान बचाणे ताई नसणा बडा मुशकिल होई जाणा। 18 इस ताई प्रार्थना करा की ऐ बुरा बकत सर्दियां च ना हो, जालू सफर करणा मुशकिल हो। 19 क्योंकि उना दिना लोकां जो बड़े दुख होणे न, उना लोकां कदी भी ऐसे दुखां दा सामणा नी कितया होणा, जालू ला परमेश्वरे संसार बणाया है। 20 अगर परमेश्वरे उस बुरे बकते जो नी घटादां, तां कोई भी माणू नी बचदा। पर उना चुणयो होए लोकां दिया बजा ला, जिना जो परमेश्वरे चुणयां है, बकत घटाणा है। 21 अगर उस बेले कोई तुसां जो बोले, की दिखा, मसीह ऐथू है। या दिखा, ओथु है। तां उदा भरोसा मत करदे। 22 क्योंकि झूठे मसीह कने झूठे परमेश्वरे दा संदेश देणेबालयां ओणा है, उना लोकां जो धोखा देणे ताई जिना जो परमेश्वरे चुणयां है, उना चमत्कार कने अनोखे कम्म दसणे न। 23 पर तुसां चौकने रिया, दिखा मै तूहांजो सारियां गल्लां होणे ला पहले ही बोली दितियां न। 24 “उना दिना च, बुरा कने दुखे बाल बकत मुकी जाणे दे बाद, सूजे च अधेरा होई जाणा, कने च चद्रमं लौ नी देणी। 25 अम्बरे ला तारायां पेई जाणा, कने अम्बरे दियां शक्तियाँ हिलाईयां जाणियां। 26 तालू लोकां मिजों, माणूऐ दे पुत्रे जो धरतिया पर बदलां उपर ओंदे कने उना मेरी शक्ति कने महिमा जो दिखणा। 27 मै अपने स्वर्गदूतां जो धरतिया पर भेजगा, ताकि सै उना सारे लोकां जो गठेरी करी, जिना जो मै चुणयां है, कने उना संसारे दे चारों पासयां ला लोकां जो गठेरणा है।” 28 “अंजीर दे स्खे ला ऐ सिखा, जालू उदियां डालियाँ निकलदियां न कने पत्ते निकलना लगदे न, तां तुसां जो पता लगी जांदा है, की गर्मियां दी रित नेडे ओआ दी है।” 29 जालू तुसां इना चिजां जो होंदे होये दिखगे, तां तुसां जाणी लेनयो, की सै माणूऐ दा

पुत्र ओणे बाला है, कने ऐ दूर नी है। 30 मै तुसां ने सच्च बोलदा है, इसा पीडिया दे सारे लोकां तालू दिकर नी मरणा है, जालू दिकर ऐ सब होई ना जा। 31 अम्बर कने धरती खत्म होई जाणे, पर मेरियां बोलियां गल्लां कदी नी टलनिया न, सै हमेशा रेणियां न। 32 “ऐ गल्लां कुसी रोजे या कुसा घडिया होणिया न कोई भी नी जाणदा है, ना स्वर्गदूत कने ना ही मै, माणूऐ दा पुत्र, पर सिर्फ पिता परमेश्वर ही उसी रोजे कने घडिया जो जाणदा है। 33 दिखा, जागदे कने प्रार्थना करदे रिया; क्योंकि तूहांजो नी पता की कालू मै मुडी करी ओणा। 34 मेरा धरती छडणा कने बापिस ओणा इयां होणा है, जियां परदेस जांदे बेले अपना घर छडी जाए, कने अपने नोकरां जो हक दे, कने सारयां जो अपना-अपना कम्म दसी दे, कने द्वार पालां जो पेहेरेदारी करणे दा हुकम दिता कने उदे वापिस ओणे ताई तैयार रे। 35 तुसां नी जाणदे न कि घरे दे मुखिया कालू मुडी के ओणा है, तां तुसां पेरादारी करनयो, क्योंकि मै घरे दा मुखिया संज्ञा जो या अधिया राती जो, या मुर्गे दिया बांगा देणे दे बेले या ब्यागा जो कालू भी आई सकदा है। 36 इयां नी होऐ की मै अचानक ओऐ कने मै इयां नी दिखणा चांदा की तुसां विना तयारी दे होन। 37 कने जडा मै तूहांजो बोलदा है, सै ही सारायां जो बोलदा है, की मेरे ओणे दीकर तैयार रिया।”

14 दो दिना बाद फसह कने अखमीरी रोटिया दा त्योहार होणेबाला था। कने बड़े याजक कने व्यवस्था जो सिखाणे बाले इसा गल्लां दिया तोपा च थे, की यीशुऐ जो कियां धोखे ने पकडी करी मारी देन। 2 पर बोलदे थे की, “सांझो त्योहारे दे बेले ऐ नी करणा चाईदा। कुधी इयां ना हो की लोकां च रोला नी पेई जा।” 3 जालू सै बैतनिय्याह ग्रां च शमौन कोडी दे घरे था, जिसयो यीशुऐ कोडे दिया बिमारिया ला खरा कितया था। सै ओथु रोटी खाणा बैठया था, तां इक जनानी उदे घरे जो आई कने उना इक बोतल लांदियो थी; जडी संगमरमर दी थी, उसा बोतला च जटामासी तेले ने बणाया बडा मेंहगा इत्र था, कने उना बोतला दा मुह तोडी करी सारा इत्र यीशुऐ दे सिरे पर नियोरी दिता। 4 पर केई लोक मने च बोलणा लगगे, “इस मेगे इत्रे जो सत्यानाश नी करणा चाईदा था। 5 क्योंकि ऐ इत्र इतणा मेंहगा था की, इस इत्र दी कीमत इक साले दिया मजदुरिया बराबर थी, कने इसयो बेचिकरी गरीबां जो बंडी सकते थे।” कने सै उसा जो बुरी हाले झिडकणा लगगे। 6 यीशुऐ बोलया, “इसा जो किली छडी दिया, इसा जो तंग करणा बंद करा, इयां तां मिजो पर इत्र पाणा खरी गल्ल है। 7 गरीब तां हमेशा तूहाडे सोगी रेंदे न, कने तुसां उना ने जालू मजी खरा करी सकदे न, पर मै तूहाडे सोगी सदा नी रेंणा है। 8 इना जनानिया मेरे ताई खरा कम्म कितया है, ऐ जडा कुछ करी सकदी थी, सै इना किता, इना मेरे शरीर पर इत्र मलया है, इना मिंजो मरणे ला पहले ही दफनाणे दी तैयारी कीती है। 9 मै तुसां ने सच्च बोलदा है, सारे संसार च जिथू भी शुभसमाचार दा प्रचार होंगा, इना जनानिया जडा कितया ओथु इसा दे इस कम्मे दी चर्चा भी उसा दिया यादा च कीती जाणी है।” 10 तालू यहदा इस्करियोती जडा बाहरां चेलयां च इक था, सै यीशुऐ जो पकडाणे च सहायता करणे ताई बड़े याजकां बाल गया। 11 सै ऐ सुणीकरी खुश होए, कने उसयो पैसे देणे जो मन्नी गे, कने सै यीशुऐ जो धोखे ने यहदी अगुवां दे हथे

पकड़ाणे दा तां मौका तोपा दे थे। 12 अखमीरी रोटिया दे त्योहारे दे पेहले दिने, जिस रोजे फसह दी बलि दिन्दे थे, उदे चेलयां उसयो पुछया, “तुसां सांझो कुथु भेजणा चांदे न की असां फसह दे त्योहारे दा खाणा बणाई करी खाई सकन?” 13 उनी अपने दो चेलयां जो ऐ बोली करी भेजया, “की यरूशलेमे शेहरे जो जा, कने ओथु तुहांजो इक माणु घडे चुकी करी चलया मिलणा, उदे पिच्छे चली जानयो। 14 कने सै जिस घरे जो जांगा, उस घरे दे मालिके जो बोलयो: की गुरु जी ने पूछया है, की मेरा कने मेरे चेलयां दा फसह दा खाणा खाने बाला कमरा कुथु है? 15 उनी तुहांजो इक उपरे आला सजया सजाया कने तैयार कितया बडा कमरा दर्सी देणा है, कने तुसां ओथु साडे तांई तैयारी करा।” 16 दो चेले निकली करी नगरे च आये कने जियां यीशुऐ उना जो बोलया था, तियां ही था, कने उना फसह त्योहारे दा खाणा तैयार किता। 17 जालू संज होई, तां यीशु बारां चेलयां सोगी उदे घरे जो आया। 18 कने जालू सै रोटी खाणां बैठयो थे, तां यीशुऐ बोलया, “मै तुसां ने सच्च बोलदा है, की तुहांजो चे इकी जणे, जडा मेरे सोगी रोटी खा दा है, मिजो पकड़ावणे तांई मेरयां दुशमणा दी सहायता करणी है।” 19 जालू उदे बाद उना ऐ गल्ला सुणिया तां उना पर उदासी छाई गेई कने सै इक-इक करी के उसने बोलणा लगे, “क्या सै मै है?” 20 यीशुऐ उना जो बोलया, “सै बाहरां चेलयां चे इक है, जडा मेरिया थालिया च डुबोई करी खा दा है। 21 क्योंकि मै, माणुऐ दे पुत्रे मरी जाणा है, ऐ सब कुछ पबित्र शास्त्रां च लिखया है, पर उस माणुऐ जो बड़ी बुरी सजा होणी है, जडा मिजो धोखा दिन्दा है जिनी मिजो पकड़ावणे च सहायता करणी है, अगर उस माणुऐ दा जन्म ही नी होया होंदा तां ही उदे तांई खरा होंदा।” 22 जालू सै खा दे थे, तां यीशुऐ रोटी लेई, कने परमेश्वरे दा धन्यवाद करी के तोड़ी, कने अपने चेलयां जो देईकरी बोलया, “खाई लिया, ऐ मेरा शरीर है।” 23 फिरी उनी दाखरस दे कटोरे जो चुकी करी परमेश्वरे दा धन्यवाद किता, कने चेलयां जो दिता, कने उना सारयां उस कटोरे च पीता। 24 कने यीशुऐ उना जो बोलया, “ऐ दाखरस मेरा खन है, मेरा खन केईयां लोकां दी भलाई तांई बहाया जाणा है, ऐ उसा बाचा जो साबित करगा, जडा परमेश्वरे अपने लोकां सोगी कितया है। 25 मै तुहांजो ने सच्च बोलदा है, मै उसी दिने बाद कदी भी धाखा दा रस नी पीणा, जालू दीकर परमेश्वरे दे राज्य च नोआ दाखरस नी पी लेंगा।” 26 फिरी यीशुऐ कने उदे चेलयां फसह दे त्योहारे दे भजन गाई करी यरूशलेम शहरे दे बाहर जैतून स्त्रां दे पाहडे पर चली गे। 27 तालू यीशु पहाडे दे पासे चलया था उनी चेलयां जो बोलया, तुसां सारयां मिजों छडी करी नसी जाणा है, क्योंकि पबित्र शास्त्रे च लिखया है, सै सच्च होणा है: “मै रखवाले जो मारणा कने भेडां तितर बितर होई जाणा है।” 28 पर मै मरी के जिन्दा होणे ला बाद तुहांजो ला पेहले गलील प्रदेश च पूजणा है, कने तुहांजो ने मिलणा है। 29 पर पतरसे यीशुऐ जो बोलया, “चाहे सारे छडी करी नसी जांगे पर मै नी नसगा।” 30 यीशुऐ उसयो बोलया, “मै तिजो ने सच्च बोलदा है, की अज ही इसा राती मुर्गे जो दो बार बांग देणे ला पेहले तू मिजो तीन बरी बोलणा है, की मिजो नी जाणदा है।” 31 पर उनी होर भी जोर देईकरी बोलया, “अगर मिजो तेरे सोगी मरणा भी पोंगा तमी मै कदी नी बोलणा की मै तिजो नी जाणदा।” इयां

ही बाकी सारयां चेलयां भी बोलया। 32 फिरी जालू यीशु कने उदे अनुयायी गतसमनी नाए दे इक बागे च आये, कने उनी अपने चेलयां जो बोलया, “ऐथू बेई रिया, जालू दीकर मै प्रार्थना करें। 33 कने यीशु पतरस, याकूब कने युहन्ना जो बागे च थोडा दिया अग्रे लेई गया, कने सै बडा ही दुखी कने बेचेन होणा लग्गा, 34 कने उना ने बोलया, ‘मेरा मन बडा उदास है, ऐथू दीकर कि मेरे प्राण निकली चलयो न, तुसां ऐथू स्का कने जागदे रिया।’” 35 फिरी यीशु थोडा अग्रे गया, कने गोडे भार बेई गया कने मुह धरतिया पाससे करी प्रार्थना करणा लग्गा, “की अगर होई सके तां ऐ घडी मिजो ला टली जा।” 36 कने बोलया, “पिता जी, तिजो ला सब कुछ होई सकदा है, ऐ जडा दुख ओणे बाला है, ऐ टली जाये पर जियां तुसां चांदे न तियां ही होऐ।” 37 फिरी जालू यीशु बापस आया कने तिन्न चेलयां जो सुतया दिखीकरी उनी पतरसे जो बोलया, “हे शमीन, तू सुतया है? तुसां इक घंटा भी मेरे सोगी जागदे नी रेई सके? 38 जागदे कने प्रार्थना करदे रिया ताकि मिजों पर भरोसा रखणा नी छडन। आत्मा तां खरा करणा चांदही है पर शरीर च जोरे दी कमी है।” 39 कने यीशु फिरी बापस चली गया, कने सै ही बोली करी प्रार्थना किती। 40 कने उनी फिरी आई करी उना जो सुतया दिखया, क्योंकि से जागते रेईकरी बडे थकी गियो थे, जालू यीशुऐ उना जो जगाया कने उना जो नी पता था की उसयो क्या बोलन। 41 फिरी तीजी बरी आई करी उना जो बोलया, “हण सोंदे रिया कने अराम करा, तुसां बडा सोई लिया हण से बकत आई गया है, जालू मै, माणुऐ दा पुत्र पापियां दे हथे पकड़ाया जाणा है। 42 उठा कने चला। दिखा, जिनी माणुऐ मिजों पकड़ावणा है, सै बखे आई रिया है।” 43 जालू यीशु ऐ बोला दा ही था, तां यहदा जडा बाहरां चेलयां चे इक था, सै ओथु आया, सै अपने सोगी मते सारे लोकां जो लेईकरी आया जिना तलवारां कने डंडे लियो थे, ऐ सारे लोक बड़े याजकां, यहदी व्यवस्था जो सिखाणे बाले कने यहदी अगुवां भेजयो थे। 44 कने यीशुऐ जो पकड़ाणे बाले यहदा उना दी सहायता किती, कने उना जो पेहले ही दर्सी दितया था, की जिसयो मै गुरु बोलगा कने गले लाईकरी चुम्मी लेंगा, तां उसयो पकडी करी ढगे ने लेई जानयो। 45 कने यहदा आया कने उनी झट यीशु दे बखे जाई करी बोलया, “गुरु जी।” कने गले लाईकरी उदी चुम्मी लेई। 46 तालू उना उसयो कस्सी करी पकडी लिया कने बन्दी बणाई लिया। 47 जडे उदे बखे खडोतयो थे, उना चे इकी जणे अपनी तलवार कडी कने महायाजके दे नोकरे पर चलाई दिती कने उदा इक कन बडी दिता। 48 यीशुऐ उना जो बोलया, “तुसां क्या मिजो डाकू समझीकरी तलवारां कने डांगा लेईकरी बन्दी बणाने तांई आयो? 49 मै तां रोज ही मंदरे च तुहाडे सोगी रेईकरी उपदेश दिन्दा था, तालू तां तुसां मिजो बन्दी नी बणाया पर ऐ इस तांई होया की पबित्र शास्त्रां च लिखया पुरा होऐ।” 50 जालू ऐ होया तां उदे सारे चेले उसयो छडी करी नसी गे। 51 इक जवान अपने नंगे शरीर पर चादर ओडी करी उदे पिच्छे चली पिया; कने लोक उसयो यीशुऐ दा चेला समझीकरी पकड़ना लग्गा। 52 पर सै चादरा छडी करी नंगा ही नदी गया। 53 फिरी सै यीशुऐ जो महायाजके दे घरे बाल लेई आये; कने सारे बड़े याजक, कने यहदी अगुवे कने व्यवस्था जो सिखाणे बाले ओथु गिठे होई गे। 54 पतरस भी उना दे पिच्छे-पिच्छे

महायाजके दे अंगणे च जाई रिया, कने मंदरे दे सिपाईयां सोगी बेईकरी अग्न तपणा लग्गी पिया। 55 बहू याजक कने यहदी महासभा दे सदस्य यीशुए जो मारी देंगे ताई उदे खिलाफ च गबाई तोपा दे थे, पर उना जो कोई गबाई नी मिली। 56 क्योंकि मते लोक उदे खिलाफ च झूठियां गबाईयां दिन्दे थे, पर उना दियां गबाईयां इक दियां नी थियां। 57 तां कितणयां ही लोकां उडी करी उदे खिलाफ ऐ झूठी गबाई दिती। 58 “असां इसयो ऐ बोलदे सुण्या है, की मैं माणुऐ दे बणायो मंदिर जो डाई करी तिन्ना रोजां च नोआ मंदिर बणाई लेणा, जडा हथा ने नी बणया होणा है।” 59 ऐ गबाई भी उना दी इक देई नी निकली। 60 तालू महायाजके बिच खडोई करी यीशुऐ ला पुछया, तू कोई जबाब कनी दिन्दा? ऐ लोक तेरे खिलाफ क्या गबाई दिन्दे न? 61 पर सै चुप ही रिया, कने उनी कोई जबाब नी दिता: महायाजके उसयो फिरी पुछया, “क्या तू उस परमधन्य परमेश्वरे दा पुत्र मसीह है, जिदी असां अराधना करदे न?” 62 यीशुऐ बोलया, “हां मैं है: कने तुसां मिजो माणुऐ दे पुत्रे जो सबते शक्तिशाली परमेश्वर दे सजे पासे हके कने बैठयो दिखणा, कने अम्बरे च बदलां सोगी ओदे दिखणा है।” 63 जालू महायाजके यीशुऐ जो ऐ बोलदे सुण्या तां उनी गुस्से च अपने कपडे फाडी दिते, कने बोलया, “हण सांझो कुसी गबाह दी जरूरत नी है। 64 तुसां इसयो परमेश्वरे दी मिंदा करदे सुण्या, तूहाडी क्या सलाह है इसा गल्ला पर?” उना सारायां फेसला किता की यीशुऐ परमेश्वर दी निन्दा कितियो, इस ताई इसयो मौत दी सजा मिल्ले। 65 तालू कोई तां उस पर थुकणा लग्गे, कने कोई उदा मु ढकणा कने मूके मारणा, कने मजाक उडाई करी बोलणा लग्गे, “गुरू जी, अगर तू परमेश्वरे दा संदेश देणेवाला है, तां सांझो दस कुनी तिजो मारया, कने सिपाईयां उसयो पकडी करी थप्पड मारे।” 66 जालू पतरस थल्ले अंगणे च अग्गी सेका दा था, तां महायाजक दिया नोकराणियां च इक ओथु आई, 67 कने उना पतरसे जो अग्न तपदे दिखया कने उसयो ध्याने ने दिखीकरी बोलणा लग्गी, “तू भी तां इस यीशु नासरत बाले दा सोगी था।” 68 सै मुकरी गया, कने बोलणा लग्गा, मैं नी जाणदा इसयो कने मिजो नी पता की तू क्या बोला दी है। फिरी सै बारले पासे चली गया, कने मुर्गे बांग देई दिती। 69 सै नोकराणी बखे खडोतयो बंदयां ने फिरी बोलणा लग्गी, की ऐ उदे चेलयां च इक है। 70 पर सै फिरी मुकरी गया। कने थोडिया देरा बाद उना जडे बखे खडोतया थे, उना पतरसे जो बोलया, “पक्का तू उना चे ही इक है, जियां तू बोलदा है इसला लगदा तू भी गलील प्रदेश ला है, तू उदे चेलयां च इक है।” 71 पतरस अपु जो कोसणा लग्गा, कसम खाणा लग्गा, की जिस माणुऐ दी तुसां गल्ल करा दे न उसयो मैं नी जाणदा। 72 तां तालू मुर्गे दुज्जी बरी बांग दिती: तालू पतरसे जो यीशुऐ दी गल्ल याद आई जडी उसयो बोलियो थी, “की मुर्गे जो दो बार बांग देंगे ला पेहले तू मिजो तिन्न बरी मुकरणा है।” तालू पतरस अपने दुखे जो नी संभाली पाया कने दुखी होईकरी जोर-जोर ने रोणा लग्गा।

15 कने ब्यागा तडके होंदे ही झट उना बहू याजकां, कने यहदी अगुवां, कने व्यवस्था जो सिखाणे बालयां कने महासभा दे सारे लोकां सलाह करिके के यीशुऐ जो बननया, कने न्याय करणे ताई यहदिया प्रदेश दे राज्यपाल पिलातुस दे हबाले करी दिता। 2 कने पिलातुसे उसयो पुछया, “क्या तू

यहदियां दा राजा है?” यीशुऐ उसयो जबाब दिता, “जडा तू बोला दा है, ऐ सही है।” 3 कने बहू याजक उस पर बडियां गल्लां दा दोष ला दे थे। 4 पिलातुसे उसयो फिरी पुछया, “तू क्या कोई जबाब नी देणा है, दिख ऐ तिजो पर कितणियां गल्लां दा दोष ला दे न?” 5 यीशु फिरी चुप रिया कने कोई जबाब नी दिता, ऐ दिखीकरी पिलातुस बडा हेरान होया। 6 हर साले फसह दे त्योहारे च, पिलातुस इक केदिये जो छडी दिन्दा था, जिसयो लोक चांदे थे की सै छूटे। 7 कने बरअब्बा नाऐ दा इक माणु बाकी क्रंतिकारियां सोगी कैदा च था, जिना रोम सरकार दे खिलाफ च लोकां दी हत्या कितियो थी। 8 कने भीड पीतालुस दे बखे आई कने उसने बिनती करणा लग्गी, कने साडे ताई इक कैदी जो छडी दे जियां तू हरबरी करदा है। 9 पिलातुसे उना जो जबाब दिता, क्या तुसां चांदे न की, मैं तूहाडे ताई यहदियां दे राजे जो छडी दें? 10 क्योंकि सै जाणदा था, की बहू याजकां यीशुऐ जो जलनिया ने पकडाया था। 11 पर बहू याजकां लोकां दिया भिडा जो भडकाया, कि पिलातुस ला यीशु जो छडणे दी बजाये बरअब्बा जो छडणे दी माँग करा। 12 ऐ सुणीकरी पिलातुसे उना ला फिरी पुछया, “तां जिसयो तुसां यहदियां दा राजा बोलदे न, उदा मैं क्या करे?” 13 भीडा दे लोक चिलाणा लग्गे, “उसयो सूली पर चडाई करी मारी दिया।” 14 पिलातुसे उना जो बोलया, “कजो इनी क्या बुरा कितया है?” पर भीड होर भी ज़ोर ने चिलाणा लग्गी की, “इसयो सूली पर चढाई करी मारी दिया।” 15 तालू पिलातुसे भिडा जो खुश करणे ताई बरअब्बा जो उना ताई छडी दिता, कने यीशुऐ जो कोडे लगबाई करी सूली पर चढाणे ताई रोमी सिपाईयां दे हबाले देई दिता। 16 सिपाई उसयो किले दे अंदरे बाले अंगणे च लेई गे जिसयो प्रीटोरियम बोलदे न, कने सारिया सिपाईयां दिया पलटना जो सदी लेई आये। 17 कने यीशुऐ दा मजाक उडाने ताई उना उसयो बैगणी रंगे दे कपडे पहनाये, कने कंडयां दा मुकट बणाई करी उदे सिरे पर रखया, 18 कने सै यीशुऐ दा मजाक उडाने ताई उसयो ऐ बोलदे थे की, “हे यहदियां दे राजा, नमस्ते।” 19 सै बार-बार उदे सिरे पर भारी सरकंडे ने मारदे थे, कने उदी बेजती करणे ताई उस पर थुका दे थे, कने उसयो इज्जत मान देणे ताई अराधना करणे जो गोडे भार बेईकरी उसयो नमस्ते करणे दा नाटक करा दे थे। 20 जालू सै उदा मजाक उडाई बैठे, तां उना सै बैगणी कपडे उतारी करी उदे अपने कपडे उसयो पहनाये, फिरी उसयो सूली पर चढाणे ताई शेहरे ला बाहर लेई गे। 21 जालू सै शेहरे बाहर चलयो थे, तां शमौन नाऐ दा माणु कुनेनी गांऐ ला ओआ दा था, उदे पुत्र सिकन्दर कने स्फुस थे। कने सिपाईयां शमोन जो हुकम दितया की सै सूली जो चुकी करी उसा जगा लेई जा जिथू उना यीशुऐ जो सूली पर चढाणा था। 22 सिपाई यीशुऐ जो गुलगुता नाए दिया जगा पर लेई आये, जिदा मतलब है खोपडी दी जगा। 23 तालू सिपाईयां यीशुऐ जो गन्धरस नाऐ दी दवा, दाखरस च मिलाई करी पीणे ताई यीशुऐ जो दिता ताकि उसयो पीडा दा असर नी होऐ, पर उनी पीणे जो मना करी दिता। 24 फिरी उना यीशुऐ जो हथां पैरां पर किल्लां ठोकी करी सूली पर चढाया, कने उदे कपडयां ताई पर्चियां पाईयां, ऐ दिखणे ताई की क्या कुसयो मिलदा है, कने कपडयां जो अपु चे बंडी लिया। 25 ब्यागा दे कोई नौ की बजे, जालू उना यीशुऐ जो सूली पर चढाया। 26 सिपाईयां यीशुऐ दिया सूलिया उपर लकडी

दी पट्टी लाई दिती। उदे च यीशुए दा दोष लिखया था, की ऐ “यहूदियां दा राजा।” 27 उना उदे सोगी दो डाक्, इक उदे सजे पासे कने इक उदे खबे पासे सूली पर चढाये। 28 तालू सै पबित्र शास्त्रे दा बचन सच्च होई गया जडा मसीह दे बारे च बोलया था, की सै अपराधियां सांई गिण्या जाणा, कने सै पुरा होया। 29 कने रस्ते च जाणे बाले सारे लोक सिर हिलाई-हिलाई करी, उदी ऐ बोली करी निंदा करते थे, “वाह रे। मंदरे जो ढाणे बाले, कने तिन्ना रोजां च बणाणे बाले। 30 सूली ला उतरी करी अपने आपे जो बचाई ले।” 31 इयां ही बड़े याजक कने मसा दी व्यवस्था जो सिखाणे बाले अपु चे मजाके च बोलदे थे, “की इनी होरनी जो बचाया, पर अपने आपे जो नी बचाई सकदा। 32 ऐ माणु जडा इस्त्राएल दा राजा, मसीह होणे दा दाबा करदा है, हुण सूली ला उतरी आऐ तां, असां दिखीकरी भरोसा करी लेणा कि ऐ साडा राजा है।” कने जडे उदे सोगी दो जणे सूलिया पर चढायो थे, सै भी उदी निंदा करा दे थे। 33 दोपहर बाहरा बजे ला तिन्न बजे दीकर सारे देशे च नेहेरा होई गया। 34 दोपेरा दे तिजे पेहर यीशुए बडे जोंरे ने पुकारी करी बोलया, “इलोई, इलोई, लमा शबक्तनी?” जिसदा मतलब है, “मेरे परमेश्वर, मेरे परमेश्वर, तू मिजो कजो छडी दिता?” 35 कने कुछ लोक जडे उदे बखे खडोतयो थे, उना सुण्या जडा यीशुए बोलया पर सै समझे नी कने बोलणा लग्ये, “दिखा, ऐ एलिय्याह जो सहायता तांई पुकारा दा है।” 36 कने उना लोकां च इक जणा दौडी करी गया कने उनी स्पंज लेईकरी सिरके च डुबाया, कने सरकंडे दे उपर बन्नी करी यीशुए जो चुसाया, कने बोलया, “स्की जा कुछ मत करा, दिखदे न की, एलिय्याह इसयो उतारणे तांई ओंदा है की नी।” 37 तालू यीशु बडे जोंरे ने बोली करी मरी गया। 38 कने सै मोटा परदा जडा मंदरे च टंगया होया था, जडा सारयां जो परमेश्वर दी मोजुदगी च अंदर ओणे जो रोकदा था, उपरे ला थले दीकर फटी गया कने उदे दो टुकडे होई गे। 39 जडा सबेदार उदे सामणे खडोतया था, उनी जालू यीशुए दी पुकार सुणी कने उसयो दिखया की सै कियां मरया, तां उनी बोलया, “सच्ची ऐ माणु, परमेश्वरे दा पुत्र था।” 40 कने केई जनानिया भी दुरे ला दिखा दियां थियां: उना चे इक मरियम भी थी जडी मगदल नाऐ दे शेहरे ला थी, सलोमी कने मरियम जडे छोटा याकूब कने योसेस दी मां थी। 41 जालू सै गलील प्रदेशे च था तां सै उदे पिच्छे चलदियां थियां, कने उदी सेवा करदियां थियां, कने होर भी मतियां जनानिया थियां, जडियां उदे सोगी यरूशलेम शहर च आईयां थियां कने सै उसयो दुरे ला दिखा दियां थियां। 42 जालू संज होई गई, तां इस तांई की सै तैयारिया दा दिन था, जडा सब्ते दे इक रोज पेहले होंदा है। 43 अरिमतिया शहेरे दा रेहणे बाला यूसुफ नाऐ दा इक माणु था, सै यहूदी सभा दा इक बडा मनया तनया मंत्री था, कने अपु भी परमेश्वरे दे राज्य दी नियाल रखदा था। सै हिम्मत करिके पिलातुस बाल गया कने उनी यीशुए दी लाश दफनाणे तांई मंगी। 44 पिलातुस जो भरोसा नी होया, की यीशु इतणी तोल्ली मरी गया, कने उनी सबेदारे जो सदीकरी पूछया, की क्या ऐ सच्च है, की यीशुए मरयो बडी देर होई गियो है? 45 जालू उनी सबेदारे ला हाल पता करी लिया, तां पिलातुसे यूसुफे जो लाश लेई जाणे दी अनुमति देई दिती। 46 तालू उनी इक मलमल दी चादर खरीदी, कने लाश उतारी करी यहूदी रिबाजां सांई मलमल दिया चादरा

च लपेटी लिया, कने दफनाणे तांई कबरां च रखया कने सै कबर चटाना जो कटी करी बणाईयो थी, कने उनी कबरां दा मु बंद करणे तांई इक गोल पथर लुडकाई करी रखी दिता। 47 मरियम जडी मगदलीनी शेहरे ला थी कने योसेस दी मां मरियम दिखा दियां थियां की, सै कुशु रखया है।

16 अगली संझा जालू सब्ते दे दा रोज होई गया, तां उना जनानियां जिना दे नां मरियम मगदलीनी, याकूबे दी मां मरियम, सलोमी उना सुगंध बालियां चिंजा खरीदियां, ताकि यीशुए दिया लाशा पर मलन, क्योंकि ऐ सारा यहूदियां दा रिती रिबाजा था। 2 ब्यागा तडके तूओरे बाले दिने, सै कबरां पर गियां, 3 कने अपु चे बोला दियां थियां की, “साडे तांई कबरां दे रखयो बडे कने भारी पथरे जो कुण हटांगा?” 4 पर जालू उना यीशुए दी कबरा पासे दिखया, तां दिखया की सै पथर तां पेहले ला ही हटया होया है। 5 कने जालू सै कबरा दे बखे पुजियां कने अंदर गियां, उना ओथु इक नौजवान जागते जो चिट्टे चमकदार कपडे पाई करी उदे सजे पासे बैठया दिखया, कने सै बडियां हेरान होईयां कने डरी गियां। 6 उनी जवान माणुए उना जनानियां जो बोलया, डरा मत, तुसां यीशु नासरत बाले जो तोपा दियां न, जिसयो सूली पर चढाया था। सै जिन्दा होई गया है, ऐथु नी है; दिखा ऐ सेई जगा है, जिथु उना उसयो रखया था। 7 पर हुण तुसां जा, कने ऐ गल्ल तुसां पतरस कने यीशुए दे बाकी चेलयां जो बोला की यीशुए तुहांजो ला पेहले गलील प्रदेशे जो जाणा है, जियां उनी तुहांजो ने बोलया था, तुसां उसयो ओथु दिखणा है। 8 जालू उना ऐ सुण्या, तालू सै कबरां ला निकली करी नटी गियां क्योंकि सै घबराई करी कमी पियां थियां। कने उना रस्ते च कुसी होरसी ने कुछ नी बोलया। 9 (note:

The most reliable and earliest manuscripts do not include Mark 16:9-20.)

हफ्ते दे पेहले तूओरे ब्याग होंदे ही सै जिन्दा होईकरी सबना ला पेहले यीशु मरियम मगदलीनी जो मिल्ला, जिसा चे उनी सत बुरियां आत्मा कडियां थियां। 10 सै यीशु दे चेलयां बाली गई, चले बडे भरी गमे च थे कने रोआ दे थे, उना जडा कुछ उना दिखया था, सै उना जो सुणाया। 11 पर जालू उना उसा ला सुण्या की यीशु जिन्दा है, कने उना उसयो दिखया है, उना भरोसा नी किता। 12 उदे बाद यीशु दुज्जे दो होर चेलयां सामणे आया, जडे यरूशलेमे शेहरे ला अपने घरे जो ओआ दे थे, पर पेहले उना उसयो नी पछाणा, क्योंकि उदी भेस भुशा पेहले ला लग थी। 13 जालू उना जाणी लिया सै कुण है, तालू सै दौडी करी दुज्जयां जो दसणा गे, पर उना भी भरोसा नी किता। 14 इदे बाद यीशु उना गयारां चेलयां जो भी मिल्ला, जालू सै रोटी खाणां बैठयो थे, तां यीशुए उना जो झिडकया, क्योंकि यीशुए जो जिन्दा होणे बाद दिखया, फिरी भी उना भरोसा नी कितया था। 15 कने यीशुए उना जो बोलया, “तुसां सारे संसार च जाई करी लोकां जो परमेश्वर दे शुभसमाचार दा प्रचार करा। 16 जडा कोई मिजों पर भरोसा करगा कने बपतिस्मा लेंगा परमेश्वरे उसयो उदे पापां दी सजा ला बचाणा, पर जडा मिजो पर भरोसा नी करगा तां उसयो सजा मिलणी है। 17 कने जडे लोक मिजों पर भरोसा करगे सै चमत्कारी निशाण उना दे बाली होणे न, उना मेरे नाए ने बुरियां आत्मा जो कडणा, कने मै उना जो नोईयां-नोईयां भाषा बोलणे दे काबील बणागां। 18 मै उना जो बचाणा है, जडे सप्पां जो भी चुकी लेंगे, कने जहरीली चीज भी पी लेंगे, मै तमी उना जो

मरणा नी दिगां, उना बिमारां पर हथ ररखणा कने उना जो मेरे नाऐ ला खरा करणा है।” 19 तालू उदे बाद प्रभु यीशु उना ने गल्लां करणे बाद परमेश्वरे यीशुऐ जो स्वर्गे च सदी लिया, कने यीशु परमेश्वरे दे सजे पासे इज्जत बाले सिहांसन पर बैठी गया। 20 तालू चेले सारयां पास्से गे कने हर जगा परमेश्वरे दा प्रचार किता, कने प्रभु उना सोगी कम्म करदा रिया, कने उना चमत्कारां दे जरिये जडे सोगी-सोगी होंदे थे, बचना जो पुरा करदा रिया। आमीन।

लूका

1 श्रीमान थियुफिलस ताई मतयां लोकां साडे बिच होइयां घटना दे बारे च इक दस्तावेज लिखणे दी कोशिश कितियो है। 2 उना बिलकुल सेई लिखया जडा सान्द्रो उना लोकां दसया था, जिना शुरू ला ही यीशुए दी सेबकाई जो अपनी हखी ने दिखया था कने जडे बादे च परमेश्वरे दे बचने दे सेवक बणे। 3 इस ताई श्रीमान थियुफिलस मै भी इना सारियां गल्लां दी जांच परख किती कने मिंजो ऐ ठीक लग्गा की तुहाडे ताई इना घटना जो क्रमानुसार लिखें। 4 मै ऐ इस ताई करा दा ताकि तुहांजो हर उसा गल्ला दा पता पुरिया सचाइया ने लग्गे जडियां लोकां तुहांजो दसियां न। 5 जालू हेरोदेस यहूदिया प्रदेश दा राजा था, अबिय्याह दी टोलिया च जकर्याह नाए दा इक याजक था, कने उदी घरे बालिया दा ना एलीशिबा था कने सै भी इस्राएल दे पेहेले याजक हासून दे बंशे ला थी। 6 सै दोयो ही परमेश्वरे दे सामणे धर्मी थे, कने सै प्रभु दे सारे हुकम कने नियम पर सच्चे चलणे बाले थे। 7 पर उना दी कोई ओलाद नी थी, क्योंकि एलीशिबा बच्चा पैदा नी करी सकदी थी, कने सै दोयो ही बुड़े थे। 8 इक दिन जालू जकर्याह यरूशलेम शेहरे दे मंदरे च परमेश्वरे दे सामणे याजके दे स्पे च सेवा करा दा था, क्योंकि उस हफ्ते उदिया टोलिया दी याजक सेवा दी बारी थी। 9 याजकां दे पचीं पाणे बाले रिबाजे दे हिसावे ने जकर्याह दे नाए दी पचीं निकली की प्रभु दे मंदरे च जाई करी धूप बाल्ले। 10 जालू सै धूप लगाणे दे बेले सारे लोक बाहर अंगणे च खडोई करी प्राथना करा दे थे। 11 तालू जकर्याह जो प्रभु दा स्वर्गदूत धुपे दिया बेदिया दे सजे पासे खडोतया दुसा। 12 कने जकर्याह उसयो दिखीकरी घबराई गया कने सै बडा भरी डरी गया। 13 पर स्वर्गदूते उसयो बोलया, “ओ जकर्याह डर मत क्योंकि परमेश्वरे तेरी प्राथना सुणी लिइयो है, तेरिया घरे बालिया एलीशिबा इक जागत जमणा है, कने तू उदा ना यहून्ना रखयां। 14 कने तिजो खुशी होणी: कने मते लोकां उदे पैदा होणे दिया बजा ने खुश होणा। 15 क्योंकि उनी परमेश्वरे दे सामने बडा महान होणा; कने उनी कदी भी कोई ऐसी चीज नी खाणी पिणी जिसने कोई नशा होदा है; कने उनी अपने पैदा होणे ला पेहले ही पबित्र आत्मा ने परिपूर्ण होई जाणा है। 16 कने उनी इस्राएलियां च मतयां लोकां जो उना दे प्रभु परमेश्वरे दे बाल बापस लोणा है। 17 यहून्ना इक ऐसा माणु होणा है उनी परमेश्वरे दा संदेश देणेबाले एलिय्याह सांई आत्मा च शक्तिया ने भरपूर होणा है कने प्रभु दा रस्ता तैयार करणा है। ताकि माता पिता दा मन बाल बचयां दे पासे फेरी दे, कने हुकम नी मनणे बालयां जो धर्मियां सांई जीणा सिखाणा; कने प्रभु ताई इक खरी प्रजा तैयार करे। 18 जकर्याह स्वर्गदूते ला पुछया, ऐ मै कियां यकीन करे की साडे ने ऐसा होणा? क्योंकि मै तां बुद्धा है, कने मेरी घरे बाली भी बुद्धी होई गियो है।” 19 स्वर्गदूते उसयो जबाब दिता, “मै जिब्राईल है, जडा परमेश्वरे दे सामने खडोई रेंदा है, कने मिंजो तेरे ने गल्लां करणा कने तिजो ऐ श्भसमाचार सुणाणें तांई भेजया है। 20 कने दिख जीस दिने दीकर ऐ बच्चा पैदा नी होणा कने मेरियां बोलियां गल्लां सही बकत पर पुरियां नी होंगिया उसी रोजे दीकर तिजो ला बोली नी होंगा, क्योंकि जडियां गल्लां मै तिजो बोलियां न तू उना गल्लां दा भरोसा नी

किता।” 21 लोक जकर्याह जो नियाला दे थे क्योंकि याजक मंदरे च धूप लगाणे बाद बाहर आई करी लोकां जो आशीर्वाद दिन्दा था, पर उसयो बडी देर होई गेई थी अंदर, तां लोक बडे हेरान होऐ? 22 जालू सै मंदरे ला बाहर आया, तालू सै उना ने बोली नी सकया, तालू सै समजी गे, की इसयो मंदरे च कोई दर्शन होया है, कने सै उना ने इशारे च गल्लां करा दा था, सै गूंगा होई गया। 23 जालू मंदरे च उदिया याजक सेवा दे दिन पूरे होई गे, तां सै यरूशलेम शेहरे ला अपने घरे जो चली गया। 24 कुछ दिना बाद उदी घरे बाली एलीशिबा लेरथी होई; कने पंज महीने दीकर अपने आपे जो लोकां ला लुकाई रखया। 25 की प्रभुऐ मेरे तांई भला कम्म किता है, माणुआं च मेरिया बांजपन दिया बदनामिया जो दुर करणे तांई इना दिना च प्रभुऐ मेरे उपर कृपा करिके मिंजो तांई ऐसा किता है। 26 जालू एलीशिबा जो छेमा मिना लगया था तालू परमेश्वरे दिया तरफा ला जिब्राईल स्वर्गदूत गलील प्रदेश दे नासरत शेहरे च इक कुवारिया बाल गया, 27 जिसा दी मंगणी राजा दाऊदे दे बंशे दे यूसुफ नाए दे इक मरदे ने होइयो थी; उसा कुवारिया दा ना मरियम था। 28 कने स्वर्गदूते अन्दर आई करी उसा जो बोलया, “खुशी कने तेरी जय हो, परमेश्वरे तिजो पर कृपा किती है! परमेश्वर तेरे सोगी है।” 29 सै इस बचने ला बडी घबराई गेई, कने सोचणा लग्गी की इसा गल्ला दा क्या मतलब है? 30 स्वर्गदूते उसा जो बोलया, “हे मरियम, डर मत, क्योंकि तिजो पर परमेश्वरे दी कृपा होइयो है। 31 कने दीख, तू लेरथिया होणा है, कने तिजो इक जागत पैदा होणा है; कने तू उदा ना यीशु रखयां। 32 कने उनी बडा महान होणा; कने उसयो परमेश्वरे दा पुत्र बोलया जाणा; कने प्रभु परमेश्वरे उसयो उदे पूर्वज दाऊदे सांई राजा बणाना है। 33 कने उनी इस्राएल दे लोकां पर हमेशा राज करणा; कने उदे राज्य दा कदी अंत नी होणा।” (aiōn g165) 34 मरियमा स्वर्गदूते जो बोलया, ऐ कियां होणा? मेरा तां अजे बियाह भी नी होया है। 35 स्वर्गदूते उसा जो जबाब दिता, पबित्र आत्मा तिजो पर उतरणा है, कने परमेश्वरे दिया शक्तिया तिजो पर छां करणी है, तांई तां तेरा जन्म लेणे बाला जागत पबित्र होणा है, सै परमेश्वरे दा पुत्र बोलया जाणा। 36 कने सुण तेरी रिशतेदार एलीशिबा दे भी बुडे बारे बच्चा होणेबाला है, ऐ इसा दा छेमा महिना है जिसा जो लोक बांज बोलदे थे। 37 क्योंकि परमेश्वर सब कुछ करी सकदा है। 38 मरियमा बोलया, “दीख, मै प्रभु दी दासी है, जियां तू बोलया है सेई मेरे सोगी हो।” तालू स्वर्गदूत ओथु ला चली गया। 39 कुछ दिना बाद मरियम उठी करी यहूदिया प्रदेश दे इक पाहडी इलाके दे इकी गां जो गेई। 40 कने जकर्याह दे घरे पुजिकरी एलीशिबा जो नमस्ते किते। 41 जियां ही एलीशिबा मरियमा दे नमस्ते सुणे, तियां ही बच्चा उसा दे पेटे च उछली पिया, कने इलीशिबा पबित्र आत्मा ने परिपूर्ण होई गेई। 42 कने तिन्ना बडे जोरे ने बोलया, “तू सारियां जनानिया चे बडी भरी धन्य है, कने जडा बच्चा तू जमणा है सै धन्य है। 43 कने मै बडी सोभाग्यशाली है, की मेरे प्रभु दी माँ मिंजो ने मिलणा आई है? 44 दिख जियां ही तेरे नमस्ते बोलणे दी अबाज मेरे कना च पेई तियां ही मेरे पेटे च बच्चा खुशिया ने उछली पिया। 45 कने तू धन्य है, क्योंकि तू भरोसा किता जडियां गल्ला प्रभुये दी तरफा ने बोलियां न, कने सै परमेश्वरे पुरियां करणियां न।” 46 तालू मरियमा बोलया, मै

परमेश्वरे दी स्तुति करदी है। 47 कने मैं अपने उद्धार करने वाले परमेश्वरे ला बड़ी खुश है। 48 क्योंकि उनी मिंजो अपणिया दासियाँ दिया दीनता पर नजर किती है; इस ताईं दिखा, हण सारे युगां-युगां दे लोकां मिंजो धन्य बोलणा है। 49 क्योंकि उनी अपणिया शक्तिया ने मिंजो ताईं बड़े-बड़े कम्म कितयो न, कने उदा ना पबित्र है। 50 जडे परमेश्वरे दा डर मंदे न, उना पर उदी दया पीढियाँ ला पीढियाँ दीकर बणी रेदी है। 51 उनी अपणी महान शक्ति ने बड़े-बड़े कम्म किते न, कने जडे बड़े घमंडी थे उना जो हराईं दिता। 52 परमेश्वरे राजयां ला राज करणे दा हक लेई लेणा है; कने गरीबां जो उच्चा करदा है। 53 उनी भुखयाँ जो खरियाँ-खरियाँ चीजा ने रजाया, कने अमीरां जो खाली हथ कडी दिता। 54 परमेश्वरे साडे पूर्वजां ने कितयो बायदे जो याद किता कने अपने सेवक इस्राएल दे लोकां दी मदद करणा आया है। 55 उनी अब्राहम जो कने उदे सारे बंशजा जो हमेशा ताईं दया दसणे ताईं याद कितया है! (aiōn g165) 56 मरियम पूरे तिन मिहने उसा सोगी रेईकरी घरे जो बापस गेई। 57 तालू एलीशिबा दा बच्चा पैदा करणे दा बकत पूरा होया, कने उना इक पुत्र जमया। 58 उसा दे पड़ोसियां कने रिश्तेदारां ऐ गल्ल सुणीकरी की प्रभुये उसा पर बड़ी बडी दया किती है, कने सै उसा सोगी बडे खुश होऐ। 59 कने जालू सै अठमे रोजे उदा खतना करणे ताईं आये। तालू सै उदा ना उदे पिता दे नाऐ पर जकर्याह रखणा लगे, 60 तां उदिया माता एलीशिबा बोलया, “नी; इदा ना यहून्ना रखा।” 61 उना उसा जो बोलया, “ऐ ना तां तेरिया रिश्तेदारिया च कुसी दा भी नी है।” 62 तालू उना उदे पिता जो इशारा करी के पूछया की तू इदा ना क्या रखणा चांदा है? 63 कने उनी लिखणे बाली पट्टी मंगाई करी लिख्या, इदा ना यहून्ना है, कने सारे हेरान होऐ। 64 तालू ही उदी अबाज बापस आई गेई; कने सै परमेश्वरे दा धन्यबाद करणा लग्गा। 65 कने उदे अखे-बखे दे लोकां पर डर बेठी गया; कने उना सारियां गल्लां दी चर्चा यहूदिया प्रदेशे दे पाहडी इलाक्यां च फेली गेई। 66 कने सारयां सुणने बालयां लोकां अपने मने च बिचार करिके बोलया, ऐ बच्चा कदिया होंगा? “क्योंकि इदे सोगी प्रभु दी शक्ति है। 67 कने उदा पिता जकर्याह पबित्र आत्मा ने परिपूर्ण होई गया, कने भविष्यवाणी करणा लग्गा। 68 प्रभु, इस्राएल दे परमेश्वर दी स्तुति करा, क्योंकि सै अपने लोकां जो मिलणा आया है, कने अपने लोकां जो छुड़ाया है। 69 जडा प्रभु दे सेवक, राजा दाऊद दा बंशज है उनी साडे ताईं इक शक्तिशाली उद्धार करने वाले जो भेजया है। 70 बडे पेहले प्रभुये अपने पबित्र परमेश्वरे दा संदेश देणेबाले दे जरिये बोलया, जडे संसार दे आदि ला होंदे आऐ न, मतलब की उनी सांझो साडे दुश्मणा ला कने उना सारियां शक्तियाँ ला बचाणा जडे सान्झो ने नफरत करदे न। (aiōn g165) 72 उनी अपने पबित्र बायदे जो याद करिके साडे पूर्वजां पर दया करणी, 73 उनी साडे पूर्वज अब्राहम ने कसम खाई करी बायदा किता, 74 की उनी सांझो साडे दुश्मणा ला बचाणा, 75 ताकि असां उदे सामणे पबित्रता, धार्मिकता कने बिना कुसी डरे जिन्दगी भर उदी सेवा करी सकन। 76 कने हे बच्चे, तिजो परम प्रधान परमेश्वरे दा संदेश देणेबाला बोलया जाणा है क्योंकि तू प्रभु दे अगे-अगे चलणा कने माणुआं जो तैयार करणा, 77 कने इनी अपने लोकां जो सिखाणा की पापा दी माफी दे जरिये छुटकारा पाई सकंदे न। 78 ऐ

साडे परमेश्वरे दिया उसा दया ने होणा है; जियां सूरज सांझो रोशनी देणे ताईं चमकदा है, तियां ही मसीह भी साडे बाल स्वर्ग ला ओणा है। 79 पाप च कने मौता दी छोआं च बोणे बालयाँ जो रोशनी देणी है, इना रोशनिया सान्झो जिन्दगी च मार्गदर्शन करणा, जडा सांझो परमेश्वर सोगी शांति दिन्दा है।” 80 कने सै जागत यहून्ना बडा होईकरी आत्मा च बलशाली होंदा गया, कने इस्राएल दे लोकां दे सामणे ओणे दीकर सै सुनसान जगा च रिया।

2 उना दिना च रोमी महाराजा औगुस्तस कैसरे सारे रोमी सम्राज्य दी जनगणना करणे दा हुकम दिता। 2 ऐ पैली जनगणना उस बेले होई, जालू क्विरिनियस सीरिया प्रदेश दा राज्यपाल था। 3 कने सारे लोक जनगणना च ना लिखाणे ताईं अपने-अपने शेहेरे जो गे जिथू उना दे पूर्वज थे। 4 यूसुफ भी ताईं तां गलील प्रदेश दे नासरत शेहेरे ला यहूदिया प्रदेशे दे राजा दाऊद दे शेहर बैतलहम शेहेरे जो गया था, क्योंकि सै राजा दाऊद दा बंशज कने परिवारे दा था। 5 ताकि अपणी मगैतर मरियम जडी लेरथी थी, उसा सोगी जाई करी ना लिखाइ दे। 6 जालू सै बैतलहम शेहेरे च थे तां उसा दे बच्चा जमणे दे दिन पुरे होई गे। 7 कने उना अपणा जेठा पुतर जमया कने उसयो कपडे च लपेटी करी खुरलिया च रख्या; क्योंकि उना ताईं सरां च जगा नी थी। 8 कने उस देशे च कुछ पुआल थे, जडे मैदाना च रेईकरी अपने धणे दा पैरा दिन्दे थे। 9 कने प्रभु दा इक स्वर्गदूत उना बखे आई खडोता; कने प्रभु दी चमक उना दे चारो पास्से चमकी, कने सै बडे डरी गे। 10 तालू स्वर्गदूते उना ने बोलया, “डरा मत; दिखा मैं तुहांजो इक बडी खुशिया दा शुभसमाचार सुणांदा है; जडा सारे लोकां ताईं होणा, 11 की अज राजा दाऊद दे शेहर बैतलहम च तुहाडे ताईं इक उद्धारकर्ता जमया है, सेई मसीह प्रभु है। 12 मैं तुहाडे ताईं उना दी ऐ पछेण दिन्दा की सै बच्चा कुण है, तुहांजो इक बच्चा फालडू च लपेटया कने खुरलिया च पिया मिलणा है।” 13 तालू उस स्वर्गदूते सोगी इक स्वर्गदूतां दी टोली परमेश्वरे दी स्तुति कने ऐ बोलदे होऐ प्रगत होई, 14 “स्वर्ग च परमेश्वरे दी महिमा कने धरतिया पर जिना लोकां ला सै खुश हे शांति हो।” 15 जालू स्वर्गदूत उना बखे ला स्वर्गें जो चली गे, तालू पुआलां अपु चे बोलया, “ओआ, असां बैतलहम शेहेरे च जाई करी ऐ गल्ल जडी होइयो है, कने जडा प्रभुये सांझो ने दसया है, उसयो दिखन।” 16 कने उना झट पट जाई करी मरियम कने यूसुफ जो कने खुरलिया च उस बच्चे जो पिया दिखया। 17 इना जो दिखीकरी उना सै गल्लां जडियां उस बच्चे दे बारे च स्वर्गदूतां ने बोलिया थी, सै सबना जो दसणा लग्गे। 18 कने सारे लोकां जालू ऐ गल्लां सुणियां जडियां गल्लां उना पुआलां बोलियां, तां सै बडे हेरान होऐ। 19 पर मरियम इना सारियां गल्लां जो मने च रखीकरी सोचदी रेई। 20 कने जियां उना स्वर्गदूतां पुआलां जो बोलया, तियां ही सारा सुणिंकरी कने दिखीकरी परमेश्वरे दी महिमा कने स्तुति करदे बापस चली गे। 21 जालू यीशुऐ जो पैदा होयो अठ रोज पुरे होऐ, कने उदे खतने दा बकत आया, तां उदा ना यीशु रख्या, जडा स्वर्गदूते उदे पेटे च ओणे ला पेहले बोलया था। 22 जालू मूसा दिया व्यवस्था दे अनुसार उना दे शुद्ध होणे दे दिन पुरे होऐ तां सै उसयो यरूशलेम शेहेरे दे मंदरे च लेई गे, ताकि उसयो प्रभु दे सामणे लेई ओन। 23 जियां की मूसा दिया व्यवस्था च लिखया है: “हर जेठा पुतर प्रभु ताईं

पबित्र होणा।” 24 मूसा दिया व्यवस्था दे बचना दे अनुसार, “पंडुकों दा इक जोडा, या कबुतरां दे दो बचयां दी बलि दिया।” 25 उस बकते यरूशलेम शेहरे च शमौन नाए दा इक माणु था। कने सै माणु बडा धर्मी कने भक्त था। कने बडिया बेसबरिया ने मसीह दे ओणे दी नियाल रखा था की सै आएं कने इस्राएल दे लोकां जो तसल्ली दे, कने पबित्र आत्मा उस सोगी थी। 26 कने उसयो पबित्र आत्मा दसया था कि, तू प्रभु दे मसीह जो दिखणे ला पेहेले मरणा नी है। 27 उस दिन उसयो आत्मा अगुवाई किती तां सै मंदरे च आया। कने जालू माता-पिता यीशुएं जो अंदर लेई आये, ताकि उस तांई व्यवस्था दे रीती रिबाजां दे अनुसार करन, 28 तां उनी बच्चा यीशु जो गोदा च लिया कने परमेश्वरे दा धन्यवाद करिके बोलया, 29 प्रभु जी, हुण तू मिंजो अपने सेवके जो अपने बायदे दे अनुसार शांतिया ने मरणा दे; 30 क्योंकि मैं उस उद्धारकर्ता जो दिखी लिया है। 31 जिसयो तू सारे लोकां जो बचाणे तांई भेजया है। 32 ताकि सै होर जातियां जो परमेश्वरे दा रस्ता दसणे तांई लौ बणे, कने तेरे अपने लोक इस्राएल दी महिमा करन। 33 कने यीशुएं दे माता पिता उना गल्लां जो जडियां शमौने उदे बारे च बोलियां, सै उना गल्लां ने बडे हेरान हुंदे थे। 34 तालू शमौने उना जो आशीष देईकरी, उदिया माता मरियम ने बोलया, दिख, सै तां इस्राएल च मतयां लोकां दे विनाश कने उद्धार तांई, इसयो परमेश्वरे दिया तरफा ला इक नशाण दे स्पे च भेजया है, जिदे खिलाफ च गल्लां कितियां जाणियां न। 35 इक भयंकर दुखे कने इक तलबारा सांई विनी देणा इसला मतयां लोकां दे दिले दे बिचार सामणै होणे न। 36 कने आशेर दे गोत्र ला हन्नाह नाए दी फनुएल दी इक कुडी परमेश्वरे दा संदेश देणेबाली थी: कने सै बडी बुडी थी, सै बियाह होणे ला सतां साला दीकर अपने घरे बाले ने रेई सकी थी। 37 सै चोरासियां सालां दी बिधवा थी: कने सै मंदरे जो नी छडती थी पर दिन रात बरत कने प्राथना करी-करी भक्ति करदी थी। 38 सै उस बेले ओथु आई करी परमेश्वर दा धन्यवाद करणा लग्गी, कने उना सारयां ने, जडे यरूशलेम शेहरे दे लोकां जो छुडाणे तांई मसीह जो भेजणे तांई परमेश्वरे दी राह दिखदे थे, उदे बारे च गल्लां करणा लग्गी। 39 कने जालू यूसुफ कने मरियम प्रभु दीया व्यवस्था दे अनुसार सारा कुछ करी बैठे तां सै गलील प्रदेश च अपने शेहर नासरत जो बापस चली गे। 40 बच्चा बडा कने जौरे बाला होंदा गया; कने अकला बाला होंदा गया; कने परमेश्वरे दा अनुग्रह उस पर था। 41 यीशुएं दे माता पिता हर साल फसह दा त्योहार मनाणे तांई यरूशलेम शेहरे जो जांदे थे। 42 जालू सै बाहरां सालां दा होया, तालू सै त्योहारे दे रिबाजे ने अनुसार यरूशलेम शेहरे जो गे। 43 जालू यीशुएं दे माता-पिता उना दिना जो पूरा करिके के बापस ओणा लग्गे, तां सै जागत ओथु यरूशलेम शेहरे च ही रेई पिया, कने उदे माता पिता जो इसा गल्ला दा पता नी था। 44 सै ऐ समझीकरी, की सै होर यात्रियां सोगी होंणा, कने इक दिन होई गया कने सै अपने रिश्तेदार कने जान पछेणा बालयां च तोपणा लग्गे। 45 पर जालू नी मिल्ला, तां सै तोपदे-तोपदे यरूशलेम शेहरे जो बापिस चली गे। 46 कने तिन्ना रोजां बाद उना उसयो यरूशलेम शेहरे दे मंदरे दे अंगणे च उपदेशकां दे बिच बैठया, कने उना जो सुणदे कने उना ला सबाल पुछदे दिखया। 47 कने जडे भी उसयो सुणा दे थे, सै उदिया समझा कने उदे जबाबा ला हेरान थे। 48 तालू

यीशुएं दे माता पिता उसयो दिखीकरी हेरान होऐ, कने उदिया माता उसयो बोलया, “पुत्र, तू सांझो ने इयोदिया व्यवहार कजो किता? दिख, तेरे पिता कने मैं, तिजो तोपा दे कने बेचेन थे।” 49 उनी उना ने बोलया, “तुसां मिंजो कजो तोपा दे थे? क्या तुहांजो पता नी था, की मिंजो अपने पिता दे घरे होना जरूरी है?” 50 पर जडी गल्ल उनी उना ने बोली, उना सै गल्ल समझी नी। 51 तालू सै उना कने गया, कने नासरत नगर च आया, कने उना दे कुले च रिया; कने उदिया माता ऐ सारियां गल्लां मने च रखियाँ। 52 कने यीशु अकला कने डील-डोल च कने परमेश्वर कने माणुएं दे अनुग्रह च अग्रे बददा गया।

3 रोमी महाराजा तिबिरियुस कैसर दे राज्य दे पदमें साले च, जालू पुन्तियुस पिलातुस यहूदिया प्रदेश दा राज्यपाल था, कने गलील प्रदेश च राजा हेरोदेस राज करा दा था कने इतुरैया कने त्रोनितिस दे इलाके च उदा भाई फिलिप्पुस, कने अबिलेने प्रदेश च राजा लिसानियास राज्य करा दे थे। 2 कने जालू हन्ना कने कैफा बड़े याजक थे, उस बकते परमेश्वरे दा बचन सुनसान जगा च जकर्याह दे पुत्र यूहन्ना बाल पुज्जा। 3 कने यूहन्ना यरदन खड्डा दे अखे-बखे दे सारे देशां च जाई करी प्रचार करदा था, की अपने पापां जो मन्नी लिया कने गलत कम्मा जो छडी दिया तां तुहांजो परमेश्वरे माफ करणा कने बपतिस्मा लिया। 4 जियां यशायाह परमेश्वरे दा संदेश देणेबाले दे बचना दीया कताबां च लिखया है, “सुनसान जगा च इक पुकारणे बाले दी अब्राज सुणुआ दी है की प्रभु दा रस्ता तैयार करा, कने उदियां सडकां सिदियां बणा।” 5 हर इक घाटी भरी दिती जाणी, कने हर इक पहाड कने टीला थले करी देणा; कने जडा डेरा है सै सीधा, कने जडा उच्चा सै नीठा है सै पढ़ा रस्ता बणाना। 6 कने सारे लोकां उसयो दिखणा है जिसयो परमेश्वरे उना जो बचाणे तांई भेजया है। 7 जडी भीडा दी भीड उसला बपतिस्मा लेणे तांई निकली करी ओदी थी, सै उना जो बोलदा था की, “तुसां लोक जहरीले सांपा सांई बुरे न, तुहाडा ऐ सोचना गलत है की सिर्फ तुसां बपतिस्मा लेणे ने अपने पापां दी सजा ला बची जाणा जडी परमेश्वरे तुसां जो देणी है। 8 सजा ला बचने तांई ऐसे कम्म करा जिना ने पता चले की तुसां सच्ची ही पछाताप किता है; कने अपने-अपने मने च ऐ मत सोचा, परमेश्वरे सान्झो सजा नी देणी क्योंकि साडा पिता अब्राहम है; क्योंकि मैं तुसां ने बोलदा है की, परमेश्वर तुहाडी जगा लेणे तांई इना पथरां ला भी अब्राहम तांई ओलाद पैदा करी सकदा है। 9 कने हुण कुहाडी स्त्रां दिया जडा च रखियो है, हर इक माणु उस स्त्रे सांई है जडा खरा फल नी दिन्दा है, उसयो परमेश्वरे दोषी बोलणा है कने सै स्त्र बड़ी करी अग्गी च फूकी देणा।” 10 कने लोकां उसला पुछया, “तां असां परमेश्वरे दिया सजा ला बचणे तांई क्या करन?” 11 यूहन्ना उना जो जबाब दिता, “जिसदे बाल दो कुरते न, सै उसयो बंडी दिया जिना बाल नी न, कने जिसदे बाल खाणां है, सै भी इयां करन।” 12 कने कर लेणेबाले भी बपतिस्मा लेणा आये, कने उसला पुछया, “गुरू जी, असां क्या करन?” 13 यूहन्ने उना जो बोलया, “जितणा तुहांजो अधिकारियां बोलया लेणे तांई, उसला जादा चुंगी मत लेंदे।” 14 कने सिपायां भी उसला पुछया, असां क्या करन? उनी उना जो बोलया, कुसी ने लडाई मत करदे, कने कुसी पर झूठा दोष मत लांदे, कने अपणिंया तनखाई पर खुश रेंणा। 15 जालू सारयां लोकां मसीह दे तोल्ली

ओणे दी आस लगाईयो थी, कने सारे अपणे-अपणे मने च यहन्ना दे बारे च सोचा दे थे, की सै ही मसीहा ता नी है। 16 तां यहन्ने उना सारयाँ जो जबाब दिता, “मैं तां तुहांजो पाणिये ने बपतिस्मा दिन्दा है, पर सै ओणेवाला है, सै मिंजो ला भी शक्तिशाली है; मैं तां उस जोगा भी नी है की उदे जुतयां दे तस्मे भी खोली सके, उनी तुहांजो पबित्र आत्मा ने कने अग्गी ने बपतिस्मा देणा है। 17 उदा सूप, उदे हथे च है; कने उनी अपणा खेतर ढंगे ने साफ करणा; कने कणका जो अपणे खेतेरे च गिठेरगा, पर भुऐ जो अग्गी च फुकी देणा है, सै अग कदी नी बुझदी है।” 18 सै बडियाँ सारियां शिक्षा देईकरी लोकां जो शुभसमाचार सुणांदा रिया। 19 पर जालू यहन्ना गलील प्रदेश दे इलाके दे राजा हेरोदेस जो उदे भाई फिलिप्पुस दिया घरे बाली हेरोदियास दे बारे च, कने उना दे सारे खुरे कम्मा दे बारे च जडे उनी कितयो थे, उना दी निंदा कीती। 20 तां ही तां राजा हेरोदेसे सारयां ला बडी करी बुरा कम्म किता, की यहन्ना जो जेला च पाई दिता। 21 जालू सारे लोकां बपतिस्मा लिया, कने यीशू भी बपतिस्मा लेईकरी प्राथना करा दा था, तां स्वर्ग खुली गया। 22 कने पबित्र आत्मा शरीर दे स्मे च कब्रुतर बणी करी उस पर उतरी, कने आकाशवाणी होई: तू मेरा प्यारा पुत्र है, तिजो ला मैं खुश है। 23 जालू यीशू अपु उपदेश करणा लग्गा तां सै लगबग तियां सालां दा था कने (जदिया समझया जांदा है) की यूसुफ दा पुत्र था; कने यूसुफ एली दा पुत्र, 24 कने एली मत्तात दा पुत्र, कने मतात लेवी दा पुत्र, कने लेवी मलकी दा पुत्र, कने मलाकी यन्ना दा, कने यन्ना यूसुफ दा पुत्र, 25 कने यूसुफ मत्तियाह दा, कने मत्तियाह आमोस दा पुत्र, कने आमोस नहम दा, कने नहम असल्याह दा पुत्र, कने असल्याह नोगह दा पुत्र, 26 कने नोगह मात दा पुत्र, कने मात मत्तियाह दा पुत्र, कने मत्तियाह शिमी दा, कने शिमी योसेख दा पुत्र, कने योसेस योदाह दा पुत्र, 27 कने योदाह यहन्ना दा पुत्र, कने यहन्ना रेसा दा पुत्र, कने रेसा जस्बूबाबेल दा, कने जस्बूबाबेल शालतियेल दा पुत्र, कने शालतियेल नेरी दा पुत्र, 28 कने नेरी मलकी दा पुत्र, कने मलकी अडी दा पुत्र, कने अडी कोसाम दा पुत्र, कने कोसाम इलमोदाम दा पुत्र, कने इलमोदाम एर दा पुत्र, 29 कने एर येशू दा पुत्र, कने येशू एलीएजर दा पुत्र, कने एलीएजर योरीम दा पुत्र, कने योरीम मत्तात दा पुत्र, कने मत्तात लेवी दा पुत्र, 30 कने लेवी शमौन दा पुत्र, कने शमौन यहदा दा पुत्र, कने यहदा यूसुफ दा पुत्र, कने यूसुफ योनान दा, कने योनान एलयाकीम दा पुत्र, 31 कने एलयाकीम मलेआह दा पुत्र, कने मलेआह मिन्नाह दा पुत्र, कने मिन्नाह मत्तात दा पुत्र, कने मत्तात नातान दा पुत्र, कने नातान दाऊद दा पुत्र, 32 कने दाऊद यिशै दा पुत्र, कने यिशै ओबेद दा पुत्र, कने ओबेद बोअज दा पुत्र, कने बोअज सलमोन दा पुत्र, कने सलमोन नहशोन दा पुत्र, 33 कने नहशोन अम्मीनादाब दा पुत्र, कने अम्मीनादाब अरनी दा पुत्र, कने अरनी हिस्मोन दा पुत्र, कने हिस्मोन पेरस दा पुत्र, कने पेरस यहदा दा पुत्र, 34 कने पेरस याकूब दा पुत्र, कने याकूब इसहाक दा पुत्र, कने इसहाक अब्राहम दा पुत्र, कने सै तेरह दा पुत्र, कने तेरह नाहोर दा पुत्र, 35 कने नाहोर सप्पा दा पुत्र, कने सप्पा रूऊ दा पुत्र, कने रूऊ फिलिग दा पुत्र, कने फिलिग एबिर दा पुत्र, कने एबिर शिलह दा पुत्र, 36 कने शिलह केनान दा पुत्र, कने केनान अरफक्षद दा पुत्र, कने अरफक्षद शेम दा पुत्र, कने सै नूह दा पुत्र,

कने नूह लेमेक दा पुत्र, 37 कने लेमेक मथशिलह दा पुत्र, कने मथशिलह हनोक दा पुत्र, कने हनोक यिरिद दा पुत्र, कने यिरिद महललेल दा पुत्र, कने महललेल केनान दा पुत्र, 38 कने केनान एनोश दा पुत्र, कने एनोश शेत दा पुत्र, कने शेत आदम दा पुत्र, कने शेत परमेस्वरे दा पुत्र था।

4 फिरी यीशू पबित्र आत्मा ने परिपूर्ण होईकरी यरदन खुड़ा ला बापस आया; कने आत्मा दी अगुवाई ने सुसनन जगा च रिया; 2 कने शैतान चालियां रोजां दीकर उदी परख करदा रिया। उना रोजां च उनी कुछ नी खादा कने जालू सै रोज पुरे होई गे, तालू उसयो भूख लग्गी। 3 कने शैताने उसयो बोलया, “अगर तू परमेस्वरे दा पुत्र है तां इसी पथरे जो बोल की, तू रोटी बणी जा।” 4 यीशूऐ उसयो जबाब दिता, “पबित्र शास्त्र च लिखया है: माणुऐ सिर्फ रोटियां ने ही जिंदि नी रेणा।” 5 तालू सै शैतान उसयो लेई गया कने पल भर च ही सारे संसारे दे राज्य उसयो दस्से। 6 कने उसयो बोलया, मैं ऐ सारे हक, कने सारा धन दौलत तिजो दिगा, क्योंकि सै मिंजो दितया है: कने जिसयो दिल करदा उसयो देई दिन्दा है। 7 इस तांई अगर तू मिंजो नमस्ते करगा, तां ऐ सारा तेरा होई जाणा। 8 यीशूऐ उसयो जबाब दिता, “पबित्र शास्त्र च इयां लिखया है: तू अपणे परमेस्वरे जो नमस्ते कर; कने उदी ही उपासना कर।” 9 तालू उनी उसयो यरूशलेम शहर च लेईजाई करी मंदरे दिया चुंडिया पर खडेरया, कने उसयो बोलया, “अगर तू परमेस्वरे दा पुत्र है, तां अपणे आपे जो ऐथू ला थले फेंकी दे। 10 क्योंकि पबित्र शास्त्र च लिखया है, उनी तैरे तांई अपणे स्वर्गादूतां जो हुकम देणा, की सै तिजो बचान। 11 कने उना तिजो हथो हथ सभाली लेणा पर इयां ना हो की तैरे पैरां च पथरे ने चोट लग्गी जा।” 12 यीशूऐ उसयो जबाब दिता, पबित्र शास्त्र च ऐ भी लिखया है: तू अपणे प्रभु परमेस्वरे दी परख मत करदा। 13 जालू शैतान सारियां परखां करी बैठा, तालू सै थोडी देरां तांई उदे बखे ला चली गया। 14 फिरी यीशू आत्मा दिया शक्तिया ने परिपूर्ण होईकरी गलील प्रदेश जो बापिस गया, कने उदी चर्चा अखे-बखे दे देशां च फैली गई। 15 कने सै उना ही यहदी जंज घरां च उपदेश करदा रिया, कने सारे उदी बडाई करदे थे। 16 कने सै नासरत च बापस आया; जिथू पलया बडोयो था; कने अपणे रिबाजे दे अनुसार सन्त दे रोजे पबित्र शास्त्र पढने तांई यहदी जंज घर च जाई करी खडोई गया। 17 परमेस्वरे दा संदेश देणेबाले यशायाह दी कताब पढने जो उसयो दिती। कने उनी कताब खोलिकरी सै जगा कडी जिथू ऐ लिखया था: 18 “प्रभु दी आत्मा मिंजो सोगी है, इस तांई उनी कंगालां जो शुभसमाचार सुनाणे तांई मेरा अभिषेक कितया है, कने मिंजो इस तांई भेजया है, की केदियां जो छुटकारे दा कने अन्नयां जो नजर मिलणे दा शुभसमाचार दा प्रचार करे कने कुचले होया जो छुडां। 19 कने प्रभु दे खुश रेणें दे साले दा प्रचार करे।” 20 तालू उनी कताब बंद करी के सेवके दे हथे च देई दिती, कने बैठी गया: कने यहदी जंज घर दे सारे लोकां दियां नजरां उस पर थियां। 21 तालू सै उना ने बोलणा लग्गा, “अज ही तुहाडे सुणने ने ऐ लेख पूरा होया है।” 22 कने सारयां लोकां उदी प्रशंसा कीती, जडियां अनुग्रह दियां गल्लां उदे मुऐ ला निकलदियां थियां, उना ला हेरान होऐ; कने बोलणा लग्गे, “कया ऐ यूसुफे दा पुत्र नी है?” 23 उनी उना जो बोलया, “तुसां मिंजो पर ऐ कहावत जस्स बोलणी है, की हे बैघ, अपणे आपे

जो खरा कर। जडा कुछ असां सुणाया है की तू कफरनहम शेहरे च कितया है, उसयो अपने देशे च भी कर।” 24 कने उनी बोलया, “मै तूहांजो ने सच्च बोलदा है, कुसी भी परमेश्वरे दा संदेश देणेबालयां जो अपने देशे च इज्जत नी मिलदी। 25 मेरी गल्ल सुणा। की परमेश्वरे दा संदेश देणेबाले एलिय्याह दे दिना च जालू साडे तिन्ना सालां दीकर कोई बरखा नी होई, ऐथू दीकर की सारे इस्त्राएल देशे च बडा भरी अकाल पिया, तां इस्त्राएल देशे च मतियां बिधबा थियां। 26 पर एलिय्याह जो इस्त्राएल च उना चे कुसी बाल भी नी भेजया गया, सिर्फ सिदोन शेहर दे बखे साफरत दे इलाके च इक होर जाति दी बिधवा बाल भेजया। 27 कने परमेश्वरे दा संदेश देणेबाले एलीशा दे बकते इस्त्राएल देशे च बतरे कोडी थे, पर सीरिया दा वासी नामान जो छडी करी उना चे कोई भी ठीक नी किता, नामान होर जाति दा था।” 28 ऐ सारियां गल्लां सुणिकरी जितणे भी यहूदी जंज घर च थे, सारे गुस्से होई गे। 29 कने उना उठी करी उसयो शेहरे ला बाहर कडया, कने जिस पाहडे पर उना दा शेहर बसया था, उसयो उदिया चुंडिया पर लेई चले, ताकि उसयो ओथू ला थले फेंक्री करी मारी देन। 30 पर सै उना दे बिचे ला निकली करी चली गया। 31 फिरी यीशु गलील प्रदेश दे कफरनहम शेहर च गया, कने सब्द दे रोजे लोकां जो उपदेश दिन्दा था। 32 सै उदे उपदेशे ने हेरान होई गे क्योंकि यीशु बचन अधिकारे ने बोलदा था। 33 तालू ही यहूदी जंज घर च इक माणू था, जिदे बिच इक बुरी आत्मा थी। 34 उनी जोंरे ने बोलया, “हे नासरत दे यीशु, तू सांझो कजो परेशान करदा है? तू क्या सांझो खत्म करणा आया है? मिजो पता है की, तू कुण है? तू ही परमेश्वर दा पबित्र पुत्र मसिहा है, जडा परमेश्वरे ला आया है।” 35 यीशुऐ बुरिया आत्मा जो झिडकया कने बोलया, चूप रे; कने इस माणूऐ ला निकली जा, तालू सै बुरी आत्मा उसयो बिच पटकरी करी बिना नुकसान कितयो उस बन्दे ला निकली गेई। 36 इस पर सबना जो हेरानी होई, कने सै अपु चे गल्लां करी के बोलाया लगे, “ऐ कदिया बचन है? की सै हक कने सामर्थ्य ने बुरियां आत्मा जो हुकम दिन्दा है, कने बुरी आत्मा इसदियां गल्लां जो मदियां भी ना।” 37 इदे बाद यीशुऐ दी चर्चा सारे पासे होणा लग्गी पेई। 38 सै यहूदी जंज घर ला उठी करी शमौने दे घरे जो गया कने शमौने दिया ससु जो बुखार चडया था, कने उना उसा ताई यीशुऐ ने बिनती किती। 39 उनी उसा बखे खडे होईकरी बुखारे जो डांटया कने बुखार उतरी गया कने सै झट पट उठी करी उदी सेवा करणा लग्गी पेई। 40 सूरजे डुबणे दे बेले जिना-जिना लोकां जो लग-लग तरा दियां बमारियां थियां उना सारयां लोका जो यीशुऐ बाल लेई आये, कने उनी इकी-इकी पर हथ रखीकरी सारयां जो ठीक किता। 41 कने बुरियां आत्मा चिखदियां कने बोलदियां होइयां मतयां लोकां ला निकली गियां की, “तू परमेश्वरे दा पुत्र है” पर सै उना जो डांटदा था, कने बोलणा नी दिन्दा था, क्योंकि उना जो पता था की ऐ मसीह है। 42 जालू दिन होया तां सै निकली करी इक सुनसान जगा पर चली गया, कने भिडा दी भीड उसयो तोपदे उस बाल आई, कने उसयो रोकणा लग्गी, की ऐथू ला ना जा। 43 पर यीशुऐ उना ने बोलया, “मिजो होर-होर शेहरां च भी परमेश्वरे दे राज्य दा शुभसमाचार सुणाणा जरूरी है, क्योंकि मै इसी ताई संसारे च भेजया है।” 44 कने सै गलील प्रदेश दे यहूदी जंज घर च प्रचार करदा रिया।

5 इक दिन जालू यीशु गलील दे झिला दे कंडे पर खडोतया था, तां भीड परमेश्वरे दा बचन सुणने ताई उस पर डेई पोआ दी थी। 2 की उनी झिला दे बखे दो किस्तिया लगियां दिखियां, कने मछबारे उना ला उतरी करी मच्छियां पकडणे बाले जाले जो धोआ दे थे। 3 उना किस्तिया चे इकी पर, जडी शमौने दी थी, चडी करी यीशुऐ उसला बिनती किती की, किनारे ला थोडी हटाई ले, तालू सै किस्तिया पर बेईकरी लोकां जो उपदेश देणा लग्गा। 4 जालू यीशु लोकां ने गल्लां करी बैठा, तां उनी शमौने जो बोलया, “डुगे पाणिणे च लेई चल, कने मच्छियां पकडने ताई अपने जाले जो फेंक।” 5 शमौने उसयो जबाब दिता, “हे मालिक, असां सारी रात मेहनत किती कने कुछ नी पकडया; पर तैरे बोलने ने असां जाल फेंका दे ना।” 6 जालू पतरस कने उदे साथियां जाल पाया, तां मतियां भरी मछियां जाले च फसी गियां, कने उना दे जाल फटणा लग्गी पिया थे। 7 इस पर उना अपने साथियां जो इशारा किता जडे दुईयां किस्तिया पर थे, ताकि आई करी साडी मदद करा: कने उना आई करी, दोनो किस्तिया मच्छियां ने इतनियां भरी लियां की सै डूबणा लग्गी पियां थियां। 8 ऐ दिखीकरी शमौन पतरस यीशुऐ दे पैरां च पेई गया, कने बोलया, “प्रभु जी, मेरे बखे ला चली जा, क्योंकि मै पापी माणू है।” 9 क्योंकि इतनियां मछियां पकडणे ने उसयो कने उदे साथियां जो बडी हेरानी होई; 10 कने तियां ही उदे साथी जब्दी दे पुत्र याकूब कने यूहन्ना भी बडे हेरान होऐ। तालू यीशुऐ शमौने ने बोलया, “डरा मत, हण ला तुसां माणुआं जो मेरे चेले बणना सिखाणा है।” 11 कने सै किस्तिया जो किनारे पर लेई आऐ, कने सब कुछ छडी करी उदे पिच्छे चली पे। 12 जालू यीशु कुसी शेहरे च था, तां दिखा, ओथू इक माणू था, जिसयो कोढ होया था कने सै यीशुऐ जो दिखीकरी मुऐ दे भार पेई गया, कने बिनती करणा लग्गा कि, “प्रभु जी अगर तू चां तां मिजो ठीक करी सकदा है।” 13 यीशुऐ हथ अग्रे करी के उसयो छुता कने बोलया, “मै चांदा है की तू ठीक होई जा” कने तालू ही उदा कोढ ठीक होई गया। 14 तालू उनी उसयो समझाया, “कुसी ने कुछ मत बोलदा, पर जाई करी अपने आपे जो याजकां जो दस, की तू खरा होईया कने परमेश्वरे जो भेंट चढा जिदे बारे च मूसा हुकम दितया है, ताकि लोक जाणी सकन की तू खरा होई गया।” 15 पर यीशु दे बारे च खबर होर भी जादा फेलदी गेई, कने भिडा दी भिड उसयो सुणने ताई कने अपनियां बिमारियां ला ठीक होणे ताई गिठी होई। 16 पर यीशु मसीह हमेशा सुनसान जगा च जाई करी किल्ला प्राथना करदा था। 17 कने इक रोज ऐसा होया की सै उपदेश दे दा था, कने फरीसी कने व्यवस्था जो सिखाणे बाले ओथू बैठथो थे, जडे गलील प्रदेश कने यहूदिया प्रदेशे दे इलाके दे हर इक गां ला कने यरूशलेम शेहरे ला आयो थे; कने ठीक करणे ताई प्रभु दी शक्ति उस सोगी थी। 18 कने दिखा लोक इक माणूऐ जो मंझे पर चुकी लेई आऐ, कने सै धरंगे दा मरीज था, कने सै उसयो अंदर लेई जाणे कने यीशुऐ दे सामणे रखणे दी तरकीब तोपा दे थे। 19 कने जालू भिडा दिया बजा ने अंदर नी लेईजाई सके तां उना छती पर चडी करी कने खपेरां जो हटाई करी, उना उसयो मंझे समेत कमरे बिच यीशु दे सामणे उतारी दिता। 20 उनी उना दा भरोसा दिखीकरी बोलया, “हे माणू, तैरे पाप माफ होऐ।” 21 तालू व्यवस्था जो सिखाणे बाले कने फरीसी

गल्लां करणा लग्गे, “ऐ कुण है, जडा परमेश्वरे दी निंदा करा दा है? परमेश्वरे जो छडी करी होर कुण पापां जो माफ करी सकदा है?” 22 यीशुऐ उना दे मने दियां गल्लां जो जाणी करी बोलया, “की तुसां अपने मने च क्या गल्लां करा दे न? 23 क्या बोलणा असान है? क्या इयां बोलणा, की तरे पाप माफ होये, या की इयां बोलणा की उठ कने हंड फिर? 24 पर ऐ इस ताई की तुहांजो पता लग्गे की मिंजो, माणुऐ दे पुत्रे जो धरतिया पर पाप माफ करणे दा हक भी है।” उनी उस धरगे दे मरिजे जो बोलया, “मै तिजो ने बोलदा है, उठ कने अपने मंझे जो चुकी करी अपने घरे चली जा।” 25 सै झट पट उदे सामणे उठया, कने जिस पर सै लेटया था उसयो चुकी करी, परमेश्वरे दी बड़ाई करदा होया अपने घरे जो चली गया। 26 तालू सारे हेरान होऐ कने परमेश्वरे दी बड़ाई करणा लग्गे, सारे डरीकरी बोलणा लग्गे, “अज असां बडियाँ अनोखियां गल्लां दिखियां।” 27 कने उदे बाद यीशु बाहर गया, कने उनी लेवी नापे दे इक कर लेणेबाले जो चुंगिया दिया चोकिया पर बैठया दिखया, कने उसयो बोलया, “की मेरा चेला बण।” 28 तालू सै सब कुछ छडी करी उठया कने उदे पिच्छे चली पिया। 29 कने लेवी अपने घरे यीशुऐ ताई इक बड़ी बडी धाम दिती; कने चुंगी लेणेबाले कने होर मते भरी लोकां उदे सोगी खाणां खादा था। 30 कने फरीसी कने मूसा दी व्यवस्था जो सिखाणे बाले उदे चेलयां जो ऐ बोली करी गल्लां करणा लग्गे, “की तुसां चुंगी लेणेबाले कने पापियाँ सोगी कजो खांदे पिंदे न?” 31 यीशुऐ उना जो जबाब दिता, वैध भले चंगे लोका ताई नी होंदा, पर सै बिमारां ताई जरूरी होंदा है। 32 मै धर्मियों जो नी, पर पापियों जो मन बदलने ताई सदाणा आया है। 33 फरीसी कने मूसा दिया व्यवस्था जो सिखाणे बालयां यीशुऐ जो बोलया, “यहून्ना दे चले तां बराबर बरत रखदे कने प्राथना करदे न, कने तियां ही फरीसियाँ दे भी करदे न, पर तरे चले तां खांदे पिंदे न।” 34 यीशुऐ उना जो बोलया, “क्या तुसां बरातियां ला बरत करवाई सकदे न जालू दीकर लाडा उना सोगी होऐ? 35 पर सै दिन ओणे न, जिना च लाडा उना ला बख कितया जाणा है, तालू बरातियां उना रोजां च बरत रखणे न।” 36 यीशुऐ उना ने इक होर कहाणी बोली: कोई भी माणु नोऐ कपड़यां जो फाडिकरी पराणे कपड़यां च रफु नी लांदा है, अगर कोई इयां करदा है तां नोआ कपडा धोणे बाद छोटा होई जांदा है, जिसने पराणे कपडे होर फटी जाणा कने सै पराणा कपडा उस सोगी मेल नी खाणां। 37 नोऐ अंगूरा दे रसे जो पराणिया खलडिया च कोई नी रखदा है नी तां नोआ अंगूर रस पराणिया खलडिया जो फाडी करी निकली जांदा है, कने अंगूर रस खलडिया जो बरबाद करी दिन्दा है, 38 ताई तां नोआ अंगूर रस नोईयां खलडिया च ही रखणा चाईदा। 39 कोई माणु पराणा अंगूर रस पी करी नोआ नी पिणा चांदा क्योंकि सै बोलदा है, की पराणा ही खरा है।

6 फिरी सै सब्ते दे रोजे खेतरां च होईकरी चलया था, कने उदे चले बेलां तोडी-तोडी करी कने हथा ने मल्ली-मल्ली करी खांदे जा दे थे। 2 तालू फरीसियाँ च कोई बोलणा लग्गे, “तुसां सै कम्म कजो करदे न जडा सब्ते दे रोज करणा ठीक नी है?” 3 यीशुऐ उना जो जबाब दिता, की तुसां ऐ नी पढया, कि राजा दाऊदे जालू सै कने उदे साथी भूखे थे तां उना क्या किता?

4 दाऊद कियां परमेश्वरे दे घरे गया, कने भेंट चढाईयां रोटियां लेईकरी खादियां कने अपने साथियां जो भी दितियां, जिना जो सिर्फ याजक लोक ही खाई सकदे थे? 5 कने यीशुऐ उना ने बोलया, “मै माणुऐ दा पुत्र ऐ बोलणे दा हक रखदा है कि लोकां जो सब्ते बाले रोजे क्या करणा चाईदा कने क्या नी करणा चाईदा।” 6 कने इक दिन इयां होया की सै कुसी होर सब्ते दे रोजे यहूदी जंज घर च जाई करी उपदेश देणा लग्गा; कने ओथु इक माणु था, जिदा सज्जा हथ सुक्या था। 7 व्यवस्था जो सिखाणे बालयां कने फरीसी उस पर दोष लगाणे दे मोके दीया ताका पर थे, की दिखदे न की सै सब्ते दे रोजे ठीक करदा है की नी। 8 पर सै उना दे बिचार जाणदा था; ताई तां उनी सुक्यो हथे बाले माणुऐ जो बोलया, “उठ, खडोई जा।” सै उठी होया। 9 यीशुऐ उना जो बोलया, “मै तुसां ला ऐ पुछदा है की सब्ते दे रोजे क्या ठीक है, भला करणा या बुरा करणा; जान बचना या मारणा?” 10 तालू यीशुऐ उना लोकां पासे दिखया। कने उस माणुऐ जो बोलया, “अपणा हथ कर रूआं।” उनी किता, कने उदा हथ खरा होई गया। 11 पर ऐ दिखीकरी फरीसी कने मूसा दी व्यवस्था जो सिखाणे बाले बडे गुस्सा होई गे कने अपु चे बोलणा लग्गे की असां यीशुऐ दा क्या करन? 12 उदे बाद यीशु धारा पर प्राथना करणे ताई गया, कने परमेश्वरे ने प्राथना करणे च सारी रात बिताई। 13 जालू दिन होया, तां उनी अपने चेलयां जो सदीकरी उना चे बाहरा चुणी ले, कने उना जो प्रेरित बोलया। 14 कने सै ऐ न: शमौन जिदा ना उनी पतरस भी रखया; कने उदा भाई अन्दियास, कने याकूब, कने यहून्ना, कने फिलिप्पस, कने बरतुलमै, 15 कने मत्ती, कने थोमा, कने हलफई दा पुत्र याकूब, कने शमौन जिसयो जेलोतेस बोलदे न, 16 कने याकूब दा पुत्र यहूदा, कने यहूदा इस्करियोती, जडा उसयो पकड़वाणे बाला बणया। 17 तालू सै उना सोगी उतरिकरी चौरस दिया जगा पर खडोता, कने उदे चेलयां दी मती भीड कने सारे यहूदिया प्रदेश, कने यरूशलेम शहर, कने सूर कने सैदा शहरां दे कने समुद्रे दे बखे ला बतरे लोक, 18 जडे उदी सुणना कने अपणियां बमारियां ला ठीक होणे ताई उस बाल आयो थे, ओथु थे। कने बुरियां आत्मा दे सताये होऐ लोक भी ठीक होंदे थे। 19 कने सारे उसयो छूणा चांदे थे, क्योंकि उसला शक्ति निकलदी थी जडी सबना जो ठीक करदी थी। 20 तालू उनी अपने चेलयां पासे दिखीकरी बोलया, “धन्य न तुसां, जडे दीन न, क्योंकि परमेश्वरे दा राज्य तुहाडा है।” 21 “धन्य न तुसां, जडे की हुण भूखे न; क्योंकि तुसां रजाऐ जाणे न। धन्य न तुसां, जडे की हुण रोंदे न, क्योंकि तुसां हसणा है।” 22 “धन्य न तुसां, जालू माणुऐ दे पुत्रे दिया बजा ने लोकां तुहांजो ने दुशमणी रखणी है, कने तुसां जो कडी देणा, कने तुहाडी निंदा करणी, कने तुहाडा ना बुरा समझीकरी तुहांजो बडी देणा है।” 23 “उस रोजे खुश होनयो, क्योंकि तुहाडे ताई स्वर्ग च बडा इनाम है। उना दे बाप-दादे भी परमेश्वरे दा संदेश देणेबालयां सोगी इयां ही करदे थे।” 24 “पर तुहाडे ताई बडी बुरी सजा होणी जडे बडे अमीर न, क्योंकि तुहांजो पेहेले ही अपनी खुशी मिली गियो है।” 25 “तुहाडे ताई बडी बुरी सजा होणी जडे हुण रजी करी खांदे न, क्योंकि उना भूखे रेणा है। तुहाडे ताई बडी बुरी सजा होणी; जडे हुण हसदे न, क्योंकि बादे च शोक करणा कने रोणा है।” 26 “तुहाडे ताई बडी बुरी सजा होणी,

जालू सारे माणु तहांजो खरा बोलगे, क्योंकि तूहाडे पूर्वजां उना लोकां दे बारे च खरियाँ गल्लां बोलियां जडे परमेश्वरे दे संदेश देणेबाले झूठे लोक थे। इसला पता चलदा की तूसां भी परमेश्वरे दे संदेश देणेबाले झूठे लोक न।” 27 पर तूसां सुणने बालयां जो मैं बोलदा है, की अपने दुश्मणां ने प्यार रखा; जडे तूहांजो ने बैर करन, उना दा भला करा। 28 जडे तूहांजो श्राप देन, उना जो आशीष दिया; जडे तूहाड़ी बेजती करन, उना ताई प्राथना करा। 29 जडा तेरिया इकी खाडिया पर थपड़ मारगा तां तू दूजी भी उस पासे करी दे, कने जडा तेरी चादर खोई ले, उसयो अपना कुरता देणे ला भी मत रोक। 30 जडा कोई तिजो ला मंगे, उसयो देई दे; कने जडा तेरी चिज खोई ले, उसला मंगदा मत। 31 कने जियां तूसां चांदे न की लोक तूहांजो ने करन, तूसां भी उना ने तदिया ही करा। 32 अगर तूसां अपने ने प्यार रखणेबाले ने प्यार रखन, तां तूहाड़ी क्या बडाई? क्योंकि पापी भी तां अपने ने प्यार रखणे बालयां सोगी प्यार रखदे न। 33 कने अगर तूसां अपने ने भलाई करणे बाले ने ही भलाई करदे न, तां तूहाड़ी कोई कजो बडाई करे? क्योंकि पापी भी तां इयां ही करदे न। 34 कने अगर तूसां उसयो ही उधार दिन्दे न, जिसला बापस मिलणे दी आस रखदे न, तां तूहाड़ी कोई कजो बडाई करे? क्योंकि पापी भी पापियां जो उधार दिन्दे न, ताकि उतणा ही बापस मिलले। 35 अपने दुश्मणां ने प्यार रखा, कने भलाई करा, कने फिरी बापस नी मिलणे दी इच्छा नी रखीकरी उधार दिया; कने तूहाडे तांई बडा इनाम होणा है; कने तूसां परम प्रधान परमेश्वर दे सन्तान बणना, क्योंकि सै उना पर जडे परमेश्वरे दा धन्यवाद नी करदे न कने बुरे लोकां पर भी दया करदे न। 36 जियां तूहाडा पिता दयावान है, तियां ही तूसां भी दयावान बणा। 37 “कुसी पर दोष मत लगा; तां तूहांजो पर भी परमेश्वरे दोष नी लगाणा: कुसी जो सजा नी देणी, तूसां भी दुजयां जो माफ करगे तां तूहांजो भी परमेश्वरे माफ करणा।” 38 दिया करा, तां तूहांजो भी मिलणा। लोकां पूरा नाप दबाई-दबाई करी कने हिलाई-हिलाई करी कने उभरदा होया तूहाडिया गोदा च पाणा, क्योंकि जिस नापे ने तूसां नापदे न, उसी नापे ने तूहाडे तांई भी नापया जाणा। 39 फिरी यीशुए उना ने न इक होर कहाणी बोली: क्या कोई अन्ना माणु, कुसी अन्ने जो रस्ता दसी सकदा है? क्या इना दोना खड़े च नी पोंणा? 40 चेला अपने गुप्ते ला बडा नी होंदा, पर जडा कोई पूरा शिक्षित होंगा, सै ही अपने गुप्ते सांई होणा। 41 तू कजो अपने भाईए दियां छोटियां-छोटियां गलतियां जो दिखदा है, जडियां उदिया हखी च पिये छोटे दे कखे सांई न, कने तिजो अपणियां बडियां-बडियां गलतियां नी मिलदिंयाँ, जडियां तेरियां हखी च इक लठे सांई न। 42 जद की तिजो अपनी ही हखी दा लठा नी मिलदा है, तां अपने भाईये जो कियां बोली सकदा है, भाई स्क मैं तेरी हखी दे तिनके जो कडी दिन्दा है? हे कपटी मने दे लोको पेहले तां अपनी हखी दे लठे जो कडा, तां जडा तिनका तै भाईए दी हखी च है, उसयो ढंगे ने दिखीकरी कडी सकदे न। 43 कोई ऐसा खरा स्ख नी है, जडा बेकार फल दे, कने ना ही तां कोई बेकार स्ख है, जडा खरा फल दे। 44 हर कोई स्ख अपने फले ने पछयेणा जांदा है; क्योंकि लोक झिल्लां चे अंजीर नी तोडदे न, कने ना बेरी दे झीले ला अंगूर तोडदे न। 45 भला माणु अपने मने दे भले भंडारे ला खरियाँ गल्लां

कडदा है; कने बुरा माणु अपने मने दे बुरे भंडारे ला बुरियाँ गल्लां ही कडदा है; क्योंकि जडा मने च भस्या होंदा हे सेई मुए च ओदा है। 46 जालू तूसां मेरा बोलया नी मंदे, तां कजो मिजो प्रभु-प्रभु बोलदे न? 47 जडा कोई मेरे बाल ओदा है, कने मेरियां गल्लां सुणीकरी उना जो मनदा है, मैं तूहांजो दसदा है की सै कुसदे सांई है? 48 सै उस माणुए सांई है, जिनी घर बणादे बेले दुगी जमीन खणीकरी पथरां दी नियां बणाईयां न, कने जालू बाढ आई तां पाणी उस घरे ने लग्गा, पर उसयो हिलाई नी सकया, क्योंकि सै पक्का बणया था। 49 “पर जडे सुणीकरी नी मंदे न, सै उस माणुए सांई न, जिनी मिटीया पर बिना नियां दा घर बणया है, जालू उस पर पाणी लगया, तालू सै झट देई गया, कने सै ढेईकरी टूटी भजी गया।”

7 जालू सै लोकां जो अपणिया सारियां गल्लां सुणाई बैठा, तां कफरनहम शहर च आया। 2 कने ओथु कुसकी सूबेदारे दा इक सेवक जडा उदा बडा खास सेवक था, सै बमारिया ने मरणे बाला था। 3 उनी यीशु मसीह दे बारे च सुणया कने सुणिं करी केई बड़े यहूदी अगुवां जो उसला ऐ बिनती करणे तांई उदे बाल भेजया, की आई करी मेरे दासे जो ठीक करी दे। 4 सै यीशु बाल आये कने उसला बडी बिनती करी के बोलणा लग्गे, “ऐ सेनापति इस काबील है की, तू उस तांई ऐ कम्म करे, 5 क्योंकि सै साडिया जातियां ने प्यार रखदा है, कने उनी ही साडे यहूदी जंज घर जो बणया है।” 6 यीशु उना सोगी-सोगी चलया, पर जालू सै घरे ला थोड़ी दूर था, तां सुबेदारे उसयो अपने केई साथियां बाल बोली भेजया, प्रभु जी, इणा कष्ट मत कर, क्योंकि मैं इस लायक नी है की, तू मेरे घर आये। 7 इसा बजा ला मैं अपने आपे जो इसी लायक नी समझया की, तेरे बाल ओए, पर तू बचन ही बोली दे तां ही मेरा सेवके ठीक होई जाणा। 8 मैं भी अधिकारियां दे थल्ले कम्म करणे बाला माणु है, कने मेरे अधीन सपाई कम्म करदे न, कने जालू इकी सपाईए जो बोलदा है कि, तू जा, तां सै चली जांदा है; कने दुए जो बोलदा है कि, तू ऐथ आ, तां सै आई जांदा है; कने जालू मैं अपने नोकरे जो बोलदा, कि ऐ कर, तां सै करी दिन्दा है। 9 ऐ सुणिं करी यीशु हेरान होया, कने उनी मु फेरिकरी उसा भिडा ने जडी उदे पिच्छे ओआ दी थी बोलया, “मैं तूहांजो ने बोलदा है, कि मैं इस्त्राएल च भी ऐदिया भरोसा नी दिखया।” 10 कने जडे साथी भेजयो थे सै घरे बापस आये, कने उस सेवके जो दिखया तालू सै ठीक होई गया था। 11 थोडे रोजां बाद सै नाईन नापे दे इक शेहरे जो गया, कने उदे चले कने बडी भरी भीड उदे सोगी चलियो थी। 12 जालू सै शेहरे दे फाटके बखे पुज्जा, तां ओथु लोक इकी मुर्द जो बाहर लेई चलयो थे कने सै अपणिया माऊ दा इकलोता पुत्र था, कने सै बिधवा थी, कने शेहरे दे मते लोक उसा सोगी थे। 13 उसा जो दिखीकरी प्रभु जो उसा पर बडा तरस आया, कने यीशुए उसा जो बोलया की, “रो मत।” 14 तालू यीशुए जाई करी अर्थिया जो छुता; कने जडे अर्थिया लेईकरी चलयो थे सै स्की गे, तालू यीशुए बोलया, “हे जवान, मैं तिजो बोलदा है, की उठ जा!” 15 तालू सै मुर्दा जिंदा होई गया, कने बोलणा लग्गी पिया: कने उनी उसयो उदिया माऊ जो देई दिता। 16 ऐ सब कुछ दिखीकरी सै सारे डरी गे; कने सै परमेश्वरे दी बडाई करी के बोलणा लग्गे, “साडे बिच इक परमेश्वरे दा संदेश देणेबाला बडा महान माणु आया है,

कने परमेस्वर अपने लोकां दी मदद करणे ताई आया है।” 17 कने उदे बारे च ऐ गल्ल सारे यहदिया प्रदेशे दे इलाके कने अखे-बखे दे देशे च फेली गई। 18 कने यहन्ना जो उदे चेलयां इना सारियां गल्लां दी खबर दित्ती। 19 तालू यहन्ने अपने चेलयां च दो चेलयां जो सदीकरी प्रभु बाल ऐ पूछणे ताई भेजया, “की क्या तू ही मसीह है, जिसयो भेजणे दा बायदा परमेस्वरे कितया था या असां कुसी दुजे दी नियाल रखन?” 20 उना यीशुऐ बाल जाई करी बोलया की, “यहन्ना बपतिस्मा देणेबाले सांझो तैरे बाल ऐ पूछणे ताई भेजया है, की क्या तू ही मसीह है, जिसयो भेजणे दा बायदा परमेस्वर ने कितया था या असां कुसी दुजे दी नियाल रखन?” 21 उसी बेले यीशुऐ मतयां जो बिमारियाँ कने पीडा, कने बुरियां आत्मा ला छुड़ाया; कने मते अन्नयां जो हखी दितियां। 22 कने यीशुऐ उना ने बोलया, जडा कुछ तुसां दिखया कने सुणया है, जाई करी यहन्ना जो बोली दिया, “की जडे अन्ने थे उना जो मिलणा लग्गी पिया, कने जडे लंगडे थे सै चलदे फिरदे न, कने कोठियां दा कोठ ठीक होइ गिया है, कने जडे टोणे थे सै सुणना लग्गी पे, कने मुर्दे जिन्दे होई जांदे न, कने कंगालां जो शुभसमाचार सुणया जांदा है। 23 धन्य न सै, जडे मिंजो पर शक नी करदे न।” 24 जालू यहन्ना दे भेजयो संदेश देणेबाले दूत चली गे, तां यीशु यहन्ना दे बारे च लोकां ने बोलणा लग्गा, की तुसां सुनसान जगा च क्या दिखणा गियो थे? क्या होआ ने हिलदे होऐ सरकंडे जो? 25 तां फिरी तुसां क्या दिखणा गियो थे? क्या नरम कपडे लायो माणू जो? जडा मंगे कपडे पांदा है, कने ठाठ-बाट ने मेहलां च रेंदा है। 26 तां फिरी क्या दिखणा गियो थे? क्या कुसी परमेस्वरे दा संदेश देणेबाले जो? हां, मै तुहांजो ने बोलदा है, की तुसां परमेस्वरे दे संदेश देणेबाले ला भी बड़े जो दिखया है। 27 ऐ सै ही है, जिसदे बारे च पबित्र शाब्दां च लिखया है: “दिख, मै अपने संदेश देणेबाले दूते जो तैरे अग्रे-अग्रे भेजदा है, जिनी तेरा अग्रे दा रसता तैयार करणा है।” 28 “मै तुहांजो ने बोलदा है, जडे जनानिया ला जमयो न, उना च यहन्ना ला बडा कोई नी: पर जडा परमेस्वरे दे राज्य च छोटे ला छोटा है, सै उसला भी बडा है।” 29 जालू उना यीशुऐ दियां बोलियां गल्लां जो सुणया, तां सारयां लोकां ऐथू दीकर की कर लेणेबालयां भी यहन्ना ला बपतिस्मा लेईकरी परमेस्वरे जो सच्चा मनी लिया है। 30 पर फरीसियां कने व्यवस्था जो सिखाणे बालयां उसला बपतिस्मा लेणे ला मना करी दिता कने परमेस्वरे दिया मर्जिया जो जडी उना ताई थी उसा जो अपनाणे ला मना करी दिता। 31 मै इस युगे दे लोकां दी तुलना कुसने दें कि सै कुदे साई न। 32 सै उना जागतां साई न, जडे बजारां च बेईकरी इकी दुजे जो पुकारी करी बोलदे न। की असां तुहाडे ताई खुशिया दे गाणे गाऐ, कने तुसां नचे नी; असां रोए, कने तुसां छाती नी पिटी। 33 क्योंकि यहन्ना बार-बार बरत रखदा कने ना शराब पिन्दा था, कने सै बोलदे न कि उदे च बुरी आत्मा है। 34 मै माणुऐ दा पुत्र खांदा पिंदा है; कने तुसां बोलदे न, दिखा, पेटू कने शराबी माणू, कने कर लेणेबालयां दा कने पापियां दा साथी है। 35 “पर ज्ञान दी सच्चाई उदियां सारियां ओलादी दे सामणे आई है।” 36 फिरी कुनकी फरीसीऐ उसला बिनती किती, की मेरे सोगी खाणां खा; कने यीशु उस फरीसीऐ दे घरे जाई करी रोटी खाणां बैठा। 37 कने दिखा, उस शेहरे दी इक पापी जनानिया जो जालू ऐ पता लग्गा की फरीसी दे

घरे यीशु रोटी खाणां आया है, तां सै संगमरमर दे भांडे च बडा मंगा इत्र लेई आई। 38 कने उदे पैरां बखे बेईकरी रोई-रोई करी, पैरां जो आंसूआं ने सेडणा लग्गी कने अपने बाला ने पुंजया कने उदे पैरां जो बार-बार चुमणा लग्गी कने इत्र यीशुऐ दे पैरां च मलया। 39 ऐ दिखीकरी, सै फरीसी जिनी यीशुऐ जो सदया था, अपने मने च सोचणा लग्गा, “अगर ऐ परमेस्वरे दा संदेश देणेबाला होंदा तां इसयो पता लग्गी जांदा, की ऐ जडी उसयो छुआ दी है, सै कुण है कने कदेई जानानी है? क्योंकि सै तां पापी जानानी है।” 40 यीशुऐ उदे बिचारां जो जाणी करी उना जो जबाब च बोलया, हे शमौन, मिंजो तिजो ने कुछ बोलणा है। उनी बोलया, “गुरू जी, बोला।” 41 तालू यीशुऐ इक कहाणी सुणाई, “कुसकी महाजने दे दो देंणदार थे, इक पंजसो दिना दी मजदुरिया दा कने दूआ पंजा दिना दी दियाडी दा देंणदार था।” 42 पर जालू उना बाल बापस करणे जो कुछ नी रिया, तां उनी महाजने दोनो जणयां दा कर्ज माफ करी दिता। उना दोनो च कुनी उस महाजने ने जादा प्यार रखणा। 43 शमौने जबाब दिता, “मेरिया समझा च तां सै माणू जिंदा जादा कर्ज माफ करी दिता।” यीशुऐ उसला बोलया, तू ठीक जबाब दिता है। 44 कने उसा जनानिया पासे फिरी करी उनी शमौने ने बोलया, “क्या तू इसा जनानिया जो दिखया इना क्या किता? मै तैरे घरे जो आया पर तू मिंजो पैरां धोणे ताई पाणी नी दिता, पर इना मेरे पैर आंसूआं ने धोते, कने अपने बाला ने पूंजे।” 45 तू गले लाईकरी मेरा स्वागत नी किता, पर जालू ला मै आया है तालू ला इना मेरी इज्जत करणा नी छडी है। 46 तू मेरे सरे च तेल नी मलया; पर इना मेरे पैरां च इतणा मेहंगा इत्र मली करी मेरा इज्जत मान किता है। 47 “तांई ता मै तिजो ने बोलदा है; की मते सारे पाप जडे इना कितयो न, सारे माफ होऐ, क्योंकि इना जादा प्यार किता है; पर जिंदा थोडा माफ होया है, सै घट प्यार करदा है।” 48 कने उनी जनानिया ने बोलया, “तैरे पाप माफ होऐ।” 49 तालू जडे लोक ओथु रोटी खाणां बैठयो थे, सै अपने-अपने मने च सोचणा लग्गे, “ऐ कुण ऐ जडा पापां जो भी माफ करदा है क्योंकि परमेस्वर ही ऐ करी सकदा है।” 50 पर उनी जनानिये ने बोलया, “परमेस्वरे तिजो बचाई लिया है क्योंकि तू मिंजो पर भरोसा किता है, कने शांतिया ला चली जा।”

8 उदे बाद यीशु शेहरे-शेहरे च कने गांऐ-गांऐ च जाई करी प्रचार करदे होऐ कने परमेस्वरे दे राज्य दा शुभसमाचार सुणाणे लग्गा कने सै बाहरा चले भी उदे सोगी थे। 2 कने कुछ जनानिया भी जिना जो बुरियां आत्मा कने बिमारियाँ ला ठीक कितया था, कने उना दे ना ऐ न: मरियम जडी मगदल गां ला थी, जिसा ला सत बुरियां आत्मा निकलियाँ थियां। 3 कने राजा हेरोदेस दे भण्डारी खोजा दी घरेबाला योअन्ना कने सूसन्नाह कने मतियां जनानिया अपणिया कमाईया ने यीशु कने उदे चेलयां दी सेवा करदियां थियां। 4 जालू मती भरी भीड़ गिटी होई, कने शेहरे-शेहरे दे लोक उदे बाल चली ओंदे थे, तां उनी इक कहाणी उना जो सुणाई: 5 इक किसान अपने खेतरे च बी रांणे ताई निकलया: रांदे बेले थोडे बी रस्ते दे बखे पेयी गे कने सै तां पछियां आई करी चुगी ले। 6 कने थोडे बी पथरलिया जमिना पर पे जिथू उसयो जादा मिटी नी मिली, कने जादा मिटी नी होणे दिया बजा ने तौली लूणी पै, कने जालू खडी धुप पेई, तां सै फकुई गे, क्योंकि उना दियां जडा डुगियां नी थियां तां सै सुकी

गियां। 7 कने थोड़े बी झिल्लां च पै, कने जालू झिल्ल बदे तां उना से बी डकी ले, कने उना फल नी दिता। 8 पर थोड़े बी खरिया जमिना पर पे, कने सै बी लुगे, कने मते सारे फल देणेबाले होए; केईयां ती गुणा, केईयां सठ गुणा, केईयां सौ गुणा फल दिता। “ऐ बोलिकरी उनी जौरे ने बोलया, जिस बाल सुणने ताई कन्न न सै ध्यान लाईकरी गल्ला जो सुणे, कने इसा गल्ला जो समझी ले।” 9 उदे चेलयाँ उसयो पुछया, “की इसा कहाणिया दा क्या मतलब है?” 10 उनी बोलया, तुहांजो परमेस्वरे दे राज्य दे भेदां जो समझणे दी समझ दितियो है, पर ऐ कहाणियां बाकियां ताई सुणादा है, इस ताई की “सै दिखदे होऐ भी ना दीखन, कने सुणदे होऐ भी ना समझन।” 11 इसा कहाणिया दा मतलब ऐ की: बी तां परमेस्वरे दा बचन है। 12 रस्ते बखे बाले सै न, जिना सुणाया; पर शैतान झट पट जादां कने उना दे मने ला बचन कडी दिन्दा है, ताकि कुथी इयां ना होये की सै भरोसा करी लेन कने उना दा उद्धार होई जा। 13 कने जडा पथरिलिया जमिना च राया था, ऐ सै माणु न, जडे बचना जो सुणीकरी उना जो झट खुशिया ने ग्रहण करी लेंदे न। पर परमेस्वर दे बचना जो मने दिया गहराईया च बढणा नी दिन्दे, उदे बाद जालू बचने दिया बजा ने उना पर कला क्लेश या परेशानी होंदी है, तां सै बचना ला पिच्छे हटी जांदे न। 14 जडे बी झिल्लां च पियो न, ऐ सै माणु न जिना बचन सुणया, पर सै संसारे दियां चिंता जो लेईकरी दुखी, कने संसारिक चिंजा दा लालच उना दे मने च रेंदा है, ऐ सब परमेस्वरे दे बचना च स्कावट पांदा है। कने सै बचन उना ताई फायदेमंद नी होंदा। 15 कने खरियाँ जमिना बाले बी सै न, जडे बचन सुणीकरी भले कने खरे मने ने सम्भाली करी रखदे न, सै सबर ने फल दिन्दे न। 16 कोई दिय्या बाली करी भांडे ने नी दकदा है, कने ना मंझे हेठ रखदा है, पर धारिया पर रखदे न, ताकि अंदर ओणे बालयां जो लौ होऐ। 17 “क्योंकि जडा कुछ भी लुकया है, सै सामणे करणा है; कने हर इक गुप्त गल्ल सामणे आई जाणी है। 18 जिना बाल समझणे दी इच्छा है जडा परमेस्वर सिखांदा है, उसयो परमेस्वरे होर समझ देणी, पर जडा समझणे दी इच्छा नी रखदा, की मैं क्या सिखांदा, तां सै जडा समझया है, परमेस्वरे सै भी उसला लेई लेणा।” 19 उदी माता कने उदे भाई उस बाल आए, पर भीडा दिया बजा ने मिली नी सके। 20 कने उसयो बोलया, “तेरी माता कने तें भाई बाहर खडोतयो न कने तिजो ने मिलणा चांदे न।” 21 उनी उदे जबाब च बोलया, “मेरी माता कने मेरे भाई ऐ ही न, जडे परमेस्वरे दे बचना जो सुणदे कने मंदे न।” 22 फिरी इक रोज सै कने उदे चेले किस्तिया पर चढे, कने उनी उना ने बोलया, “ओआ, गलील झीला दे पार चलदे न।” कने उना किस्ति खोली दिती। 23 जालू किस्ति चलियो थी तां सै सोई गिया: कने झीला च तूफान आई गिया, कने किस्ति पाणिए ने भरूणा लगी पेई कने सै खतरे च थे। 24 तालू उना यीशुए बखे आई करी उसयो जगाया, कने बोलया, “हे स्वामी। हे स्वामी। असां डूबणा लगी पियो न।” तालू उनी उठी करी पाणिए कने तुफाने जो डांटया कने सै स्की गे, कने सै शान्त होई गिया। 25 यीशुए उना ने बोलया, तुहाडा भरोसा कुथु था? पर सै डरी गे, कने हेरान होईकरी अपु चे बोलणा लग्गे, “ऐ कदिया माणु है? ऐथु दीकर की तूफान कने लैहरां भी इदा हुकम मंदे न।” 26 फिरी सै गिरासे दे लोकां दे देशे च पुज्जे,

जडा उसी पार गलील प्रदेशे दे सामणे है। 27 जालू सै किनारे पर उतरया, तां उस गांए दा इक माणु उसयो मिल्ला, जिदे च बुरी आत्मा थी। कने सै कपडे नी पांदा था, कने ना घरे रेंदा था, सै कब्रिस्तान च रेंदा था। 28 सै यीशुए जो दुरे ला ही दिखीकरी दोडया, कने यीशुए जो इज्जत देणे ताई उदे पैरां अग्रे डेई पिया। उनी जौरे ने चिलाई करी बोलया, “हे यीशु, परमपिता परमेस्वरे दे पुत्र। मिजो तिजो ने क्या कम्म? मैं तिजो ने बिनती करदा है, मिजो दुख ना दे।” 29 क्योंकि सै उसा बुरिया आत्मा जो उस माणुए ला निकलने दा हुकम दे दा था, क्योंकि सै उदे च बार-बार प्रबल होंदी थी। लोक उसयो रसियाँ कने सुंगला ने बन्दे थे, तमी सै सब केसी जो तोड़ी दिन्दा था, कने बुरी आत्मा उसयो सुनसान जगा जो नठाई लेई जांदी थी। 30 यीशुए उसयो पुछया, “तेरा क्या ना है?” उनी बोलया, “मेरा ना सेना है, क्योंकि मतियां बुरियां आत्मा उदे च समाई गियां थियां।” 31 कने उना उसला बिनती किती की, “सांझो अथाह कुंडे च जाणे दा हुकम मत दीदा।” (Abyssos g12) 32 ओथु पाहडे पर इक बडा बडा सूअरां दा झण्ड चुग्गा दा था, उना उसला बिनती किती, “सांझो उना च समाणा दे।” कने यीशुए उना जो जाणा दिता। 33 तालू सै बुरियां आत्मा उस माणुए ला निकली करी सूअरां दे झण्डे च समाई गियां कने सै झण्ड पहाडे ला रिडकी करी दरियाये च पेई गिया कने सारे सूअर डूबी करी मरी गे। 34 उना दे पुहालां नठी करी शेहर कने गांए च ऐ खबर सुणाई। 35 कने जडा होया था लोक उसयो दिखणा आये कने जिस माणुए ला बुरियां आत्मा निकलियाँ थियां, उसयो यीशुए बखे कपडे पाइकरी कने ठीक-ठाक बैठया दिखीकरी सै डरी गे। 36 कने दिखणे बालयां उना जो दसया, की सै बुरियां आत्मा ने सताया होया माणु कियां ठीक होया। 37 तालू गिरासे दे लोकां दे देशे अखे-बखे दे लोकां यीशुए ने बिनती किती, की साडे ऐथु ला चली जा: क्योंकि सै बडे डरी गियो थे। कने सै किस्तिया पर चढी करी चली गिया। 38 जिस माणुए चे बुरियां आत्मा निकलियाँ थियां, सै यीशुए ने बिनती करणा लग्गा, की मिजो अपने सोगी रेंगा दे, पर यीशुए उसयो भेजी करी बोलया। 39 “की अपने घरयो बापस चली जा कने लोकां ने बोली दे, की परमेस्वरे तेरे ताई कंदे बड़े-बड़े कम्म किते न।” कने सै जाई करी सारे शेहरे च प्रचार करणा लग्गा, की यीशुए मेरे ताई कंदे बड़े-बड़े कम्म किते न। 40 जालू यीशु बापस ओआ दा था, तां लोक उसला खुशिया ने मिल्ले; क्योंकि सै यीशुए जो नित्याला दे थे। 41 यहूदी जंज घर दे सरदारां चे इक याईर नाये दा सरदार आया, सै यीशुए दी इज्जत मान ताई यीशुए दे पैरां अग्रे डेई पिया, कने उनी ऐ बोली करी बडी बिनती किती, “मेरे घरे जो चला।” 42 क्योंकि उदी बाहरां सालां दी इक ही कुडी थी, कने सै मरणे बाली थी। जालू सै चलदा था, तां लोक यीशुए पर डेई पोंदे थे। 43 कने इक जनानी जिसा जो बाहरां सालां ला खून चलणे दी बिमारी थी, कने उना अपनी सारी कमाई वेधां पिच्छे खर्ची बैठियो थी कने तमी कूदे भी हथे ला ठीक नी होइयो थी, 44 उना पिच्छे ला आई करी उदे कपडे दे कुंणे जो छुता, झट उसा दा खून निकलन बंद होई गिया। 45 इस पर यीशुए बोलया, मिजो कुनी छुता? जालू सारे मुकरणा लग्गे, तां पतरस कने उदे साथियां बोलया, “हे स्वामी, तू दिखा दा हे की तेरे अखे बखे इतणी भरी भीड़ है, कने तिजो पर ढेई पोंदे

ना।” 46 पर यीशुए बोलया, “कुनकी मिंजो छुता है मिंजो पता लगी गया है की मिंजो ला शक्ति निकली है।” 47 जालू जनानिया दिखया, की मैं लुकी नी सकदी, तालू कमदी होई आई, कने उदे पैरां पर पेईकरी सारे लोकां सामणे दसया, की मैं तिजो कजो छुता है, कने कियं मैं झट ठीक होई गई। 48 उनी उसा जो बोलया, “बेटी तेरा भरोसा जडा मिजों पर था उनी भरोसे तिजो ठीक कितया है, शांतिया ला चलिया।” 49 यीशु हले उसा ने गल्ल करा दा ही था, यहूदी जंज घरे दे सरदारे दे घरे ला कुछ लोकां आई करी बोलया, “की तेरी कुडी तां मरी गई है” हुण गुरे जो कजो तकलीफ दे दा है? 50 जडी गल्ल सै बोला दे थे, उसा गल्लां जो यीशुए अणसणी करिके यहूदी जंज घर दे सरदारे जो बोलया, “डर मत, सिर्फ मिजों पर भरोसा रख, तां उना ठीक होई जाणा।” 51 घरे आई करी उनी पतरस, कने यूहन्ना, कने याकूब कने कुडिया दे माता-पिता जो छडी करी होर कुसयो भी अंदर नी ओणा दिता। 52 कने सारे उसा तांई रोआ दे थे, पर उनी बोलया, “रोआ मत; सै मरियो नी है पर सुतियो है।” 53 सै ऐ जाणी करी, की मरी गियो है उदा मजाक उडाणा लगे। 54 पर उनी उसा कुडिया दा हथ पकड़या कने पुकारिकरी बोलया, “हे कुडी उठा।” 55 तालू उदे प्राण बापस आई गे कने सै झट उठी बैठी; फिर उनी हुकम दिता की, इसा जो कुछ खाणे जो दीया। 56 उसा दे माता-पिता हेरान होए, पर उनी उना जो चेतावनी दिती, की ऐ जडा होया है, सै कुसी ने मत बोलदे।

9 फिरी यीशुए उना बाहरां चेलयां जो सदिकरी उना जो सारियां बुरियां आत्मा जो कडणे कने बमारियाँ जो दूर करणे दी शक्ति कने हक दिता। 2 कने उना जो परमेश्वरे दे राज्य दा प्रचार करणे, कने बिमारियाँ जो ठीक करणे तांई भेजया। 3 कने उनी उना ने बोलया, की अपने रस्ते तांई सिर्फ इक सोठी लेनयो। ना तां खाणे तांई रोटी लेणी, ना तां झोला, ना ही बटुए च पेसे, पर जुते पाई लेनयो कने होर कोई कपड़े पाणे तांई मत लेंदे। 4 अगर कोई तुहांजो अपने घरे रहणे तांई सदगा, जालू दीकर तुसां उसी गांए च रेंगे, तालू दीकर उसी दे घरे च परोणे बणी करी स्की रिया। 5 “जिसा जगा दे लोक तुहांजो अपनांगे नी कने तुहाडी सुणगे नी, ओथु ला जांदे बेले अपने पैरां दी धुड जाडी दिनयो, ताकि उना लोकां जो पता लगे की परमेश्वरे दिया तरफा ला मिलणे बाली सजा दे सै अपु ही जिम्मेवार ना।” 6 सै निकलिकरी गांए-गांए च जाई करी श्भसमाचार सुणा दे, कने हर कुथी लोकां जो ठीक करदे फिरदे थे। 7 कने देशे दी चौथाई दा राजा हेरोदेस ऐ सारा कुछ सुणिकरी घबराई गया, क्योंकि मतयां बोलया, की यूहन्ना मरी करी जिन्दा होई गया है। 8 कने मतयां ऐ बोलया, की एलिय्याह दिखया है: कने केईयां बोलया की पुराणे परमेश्वरे दा संदेश देणेबाले के कोई जिन्दा होया है। 9 पर राजा हेरोदेसे बोलया, “यूहन्ना बपतिस्मा देणेबाले दा तां मैं सिर कटबाया था तां हुण ऐ कुण है, जिसदे बारे च ऐसिया गल्लां सुणादा मैं?” कने हेरोदेसे जो उसयो दिखणे दी इच्छा होई। 10 जालू सै प्रेरित जिना जो यीशुए भेजया था, सै यीशुए बाल मुडी करी आये कने उदे चारों बखे खडोई, कने जडा कुछ उना किता, कने सिखया था, उसयो दसी दिता, कने सै उना जो लग करिके बैतसैदा नापे दे इकी शेहेरे जो लेई गया। 11 ऐ जाणी करी भीड़ उदे पिच्छे चली पेई, कने सै

खुशिया ने उना ने मिला, कने उना सोगी परमेश्वरे दे राज्य दियां गल्लां करणा लग्गा, कने जडे ठीक होणा चांदे थे उना जो ठीक किता। 12 जालू संज होणा लग्गी, तां उना बाहरां आई करी उसयो बोलया, “भिडा जो बिदा कर, ताकि असां अखे बखे दे गां कने बस्तियां च जाई करी अपने रेणें तांई कने रोटिया दा इंतजाम करन, क्योंकि असां ऐथू सुनसान जगा च ना।” 13 यीशुए उना जो बोलया, “तुसां ही उना जो खाणे जो दिया।” उना बोलया, “साडे बाल पंज रोटियां कने दो मछियां जो छडी करी कुछ होर कुछ नी है; पर हों, अगर असां जाई करी इना सारयां लोकां तांई रोटियां खरीदी लेई ओन, तां होई सकदा है।” 14 (क्योंकि ओथु लगबग पंज हजार मर्द थे।) कने उनी अपने चेलयां ने बोलया, उना जो पंजा-पंजा करिके झुण्डा च बठाई दिया। 15 उना तियां ही किता, कने सबना जो बठाई दिता। 16 तालू उनी सै पंज रोटियां कने दो मछियां लिंयां, कने स्वर्गे पासे दिखिकरी धन्याबाद किता, कने तोडी-तोडी करी चेलयां जो दिन्दा गया ताकि सै लोकां जो परोसी दें। 17 सारे खाई करी रजी गे। कने जालू रोटी खायीं बैठे तालू चेलयां बाकी बचियाँ रोटियां कने मछियां गिठेरियां कने उसला बाहरा टोकरियाँ भर्ई गियां। 18 जालू यीशु एकांत च प्राथना करा दा था, कने चले उदे सोगी थे, तां उनी उना ला पुछया, “लोक मिंजो क्या बोलदे न?” 19 चेलयां जबाब दिता कुछ लोक बोलदे ने कि तुसां यूहन्ना बपतिस्मा देणेबाले न; पर कोई-कोई बोलदे एलिय्याह है, कने कोई-कोई बोलदे न कि पुराणे जमाने दे परमेश्वरे दा संदेश देणेबालयां के कोई इक है। 20 यीशुए उना ला पुछया, “पर तुसां मिंजो क्या बोलदे न?” “पतरसे जबाब दिता, परमेश्वरे दा मसीहा।” 21 तालू यीशुए उना जो समझाई करी बोलया, “ऐ कुसी ने मत बोलदे।” 22 कने उनी बोलया, कि मैं, जडा माणुए दा पुत्र है, “मिंजो मते दुख सेहणे पोणे न, कने यहूदी अगुवे, बड़े याजकां, कने यहूदी व्यवस्था जो सिखाणे बालयां मिंजो अपनाणा नी है, कने मैं मारया जाणा है, कने फिरी मैं तिन्ना रोजां बाद मरयां के जिन्दा होई जाणा है।” 23 यीशुए उना सबना जो बोलया, “जडा कोई मेरा चेला बनणा चांदा है, उसयो अपणिया शरीर दियां इच्छां कने जडियां तरकिबां बनाईयां न उना जो छडी करी! कने जडे मिजों तांई मरणे जो तैयार रेंदे न सेई मेरे चले बणी करी मिजों पिच्छे चली सकदे न। 24 कोई माणु ऐसा नी करगा कने अपने प्राणा जो बचाणा चांहगा, उनी परमेश्वरे सोगी आत्मिक जिन्दगी जिणे दा मोका गवाई देणा है। पर जडा माणु मिजों पर भरोसा करगा कने मेरे श्भसमाचार दिया बजा ने मरगा उस माणुए जो परमेश्वरे सोगी सदा तांई दी जिन्दगी मिलणी। 25 अगर तुसां संसारे दा सब कुछ पाई लेंगे कने पर परमेश्वरे सोगी हमेशा दी जिन्दगी जिणे दा मोका गवाई दिगे, तां उदा क्या फायदा? इक माणु परमेश्वरे जो क्या देई सकदा है, जडा उदी हमेशा दी जिन्दगी खरिदगा? कुछ नी! 26 तुहाड़े च अगर कोई माणु मिजों अपना परमेश्वर कने मेरियां शिक्षा दा पालन करणे जो मना करदा है, क्योंकि तुसां डरदे न की गैर विश्वासी कने पापी लोकां तुहाडा मजाक उडाणा। फिरी जालू मैं माणुए दा पुत्र, पबित्र स्वर्गदूतां सोगी धरती पर ओणा है, तां मैं उना लोकां जो भी अपना चेला मनणे ला मना करी देणा है, तालू सारयां लोकां मरी महिमा दिखणी जडी मेरे पिता दी है।” 27 “मैं तुसां ने सच्च बोलदा है, की

जडे ऐथु खडुतयो न, उना चे कोई-कोई ऐसे न, की जालू दीकर परमेश्वरे दा राज्य नी दिखी लेंगे, तालू दीकर उना मौत दा स्वादा नी चखणा है।” 28 इना गल्लां दे कोई अठ रोज बाद सै पतरस, कने यहून्ना कने याकूब जो सोगी लेईकरी प्राथना करणे ताई पहाडे पर गया। 29 जालू सै प्राथना करा दा ही था, तां उदे चेहेरे दा रूप बदलई गया, कने उदे कपडे चिट्टे होईकरी चमकणा लगे। 30 कने दिखा, दो परमेश्वरे दे संदेश देणेवाले मूसा कने एलिय्याह जो, जडे बडे पेहले जिन्दा थे उना जो यीशुए सोगी गल्लां करदे दिखया। 31 ऐ महिमा सोगी मिल्ले, कने उदे मरणे दी चर्चा करा दे थे, जडा यरूशलेम च होणेवाला था। 32 पतरस कने उदे साथी निंदा ने भस्यो थे, जालू ढंगे ने उठी होऐ, तां उदी महिमा; कने उना दो आदमियां जो, जडे उदे बखे खडुतयो थे, दिखया। 33 जालू सै उदे बखे ला जाणा लगे, तां पतरसे यीशुए जो बोलया, “प्रभु जी, साडा ऐथु रेंणा ठीक है, इस ताई असां ऐथु तीन तम्बू बणादे न, इक तेरे ताई, इक मूसा ताई, इक एलिय्याह ताई।” पतरसे ऐ इस ताई बोलया की, सै कने दुज्जे दो चेले डरी गियो थे, कने नी जाणदे थे क्या बोलणा क्या करणा। 34 सै ऐ बोला दा ही था, की इक बदले आई करी उना जो डकी लिया, जालू सै उस बदले ने धिरणा लगे तां सै डरी गे। 35 कने उस बदले चे ऐ अबाज निकली, “ऐ मेरा प्यारा पुत्र है, कने मैं इसला खुश है, कने जडा ऐ बोलदा है उसयो ध्याने ने सुणा।” 36 ऐ अबाज होंदे ही यीशुए जो उना किल्ला दिखया; कने सै चुप रे, कने जडा कुछ उना दिखया था, उदी कोई गल्ल उना रोजा च कुनी नी किती। 37 कने दुऐ रोजे जालू सै पहाडे ला उतरे, तां इक बडी बडी भीड उसला मिलणा आई। 38 तालू भिडा चे इक माणुऐ जोरे ने बोलया, गुरू जी, मैं तिजो ने बिनती करदा है, की मेरे पुत्रे पर दया कर; क्योंकि सै मेरा इकलोता पुत्र है। 39 कने इक बुरी आत्मा उसयो पकडी लेंदी है, कने सै इकदम बकणा लगी पोंदा है, कने सै आत्मा उसयो ऐसा मरोडदी है, की उदे मुऐ ला झाग निकली पोंदा है; कने उसयो गेची करी बडिया मुशकिला ने छडदी है। 40 कने मैं तेरे चेलयां ने बिनती किती, की इसा जो कडी दिया; पर सै कडी नी सके। 41 ऐ सुणीकरी यीशुए उना जो जबाब दिता, “हे अविश्वासी लोकों, मैं कालू दीकर तुहाडे सोगी रेंगा, कने कालू दीकर तुहाडे अविश्वास जो सेहन करणा उसी जागते जो मेरे बाल लोआ।” 42 सै ओआ दा ही था की बुरिया आत्मा उसयो पटकी करी मरोडया, पर यीशुए बुरिया आत्मा जो डांटया कने जागते जो ठीक करिके उदे पिता जो देई दिता। 43 तालू सारे लोक परमेश्वरे दी इसा शक्तिया ला हेरान होऐ। पर जालू सारे लोक उना सारे कम्मा ने जडे सै करदा था, हेरान होआ दे थे, तां उनी अपने चेलयां ने बोलया, 44 “ऐ गल्लां तुसां मत भुलदे, क्योंकि माणुऐ दा पुत्र, मेरे दुशमणा दे हथे पकडाय जाणा है।” 45 पर ऐ गल्ल उना दिया समझा च नी आई, कने ऐ उना ला छिपी रेई; ताकि उना जो पता नी लगे, कने सै इसा गल्ला दे बारे च पुछणे ला डरदे थे। 46 फीरी उना च ऐ बेहस होणा लग्गी की, की सांझो चे बडा कुण है? 47 पर यीशुए उना दे मने दी गल्ल जाणी लेई, कने इक बच्चे जो लेईकरी अपने बखे खडेरया, 48 कने उना ने बोलया, “जडा कोई मेरे नाऐ ने इस बच्चे जो अपनांदा है, सै मिजो अपनांदा है, कने जडा कोई मिजो अपनांदा है, सै मिजो भेजणे बाले जो

अपनांदा है, क्योंकि जडा तुहाडे चे सबना ला छोटा है, सेई बडा है।” 49 तालू यहून्ने बोलया, “प्रभु जी, असां इकी माणुऐ जो तेरे नाए दिया शक्तिया ने बुरियां आत्मा जो कडदे दिखया है, कने असां उसयो मना भी किता, क्योंकि सै साडे साई तेरा चेला नी था।” 50 यीशुऐ उसयो बोलया, “उसयो मना मत करा; क्योंकि जडे साडे बैरी नी है, सै साडे सोगी साथी ना।” 51 जालू यीशुऐ दे स्वर्ग जाणे दे दिन पुरे होणे बाले थे, तालू उनी यरूशलेम जाणे दा बिचार पका किता। 52 यीशुऐ ओथु जाणे ला पेहले अपने अग्रे संदेश देणेवाले दूत भेजे: सै सामरियों दे इक गांऐ जो गे, ताकि उदे ताई जगा तैयार करन। 53 पर उना लोकां उसयो उतरणा नी दिता, क्योंकि सै यरूशलेम शेहरे जो चलया था। 54 ऐ दिखीकरी उदे चेलयां याकूब कने यहून्ना ने बोलया, “प्रभु जी; क्या तू चांदा है, की असां हुकम देन, की अम्बरे ला अगग पोये कने उना जो भस्म करी दे?” 55 पर यीशुऐ उना जो मुडी करी डांटया कने बोलया, “तुसां नी जाणदे न की तुसां कदेई आत्मा दे न। 56 क्योंकि माणुऐ दा पुत्र लोकां दे प्राणा जो खत्म करणे ताई नी पर बचाणे ताई आया है।” कने सै कुसकी होरसी गांऐ जो चली गे। 57 जालू सै रस्ते च चलयो थे, तालू कुनकी उसयो बोलया, “जिथ-जिथ तू जांगा, मैं भी तेरे पिच्छे जाणा।” 58 यीशुऐ उसयो बोलया, “लोमडियां जो रेहणे ताई कुडी न, कने अम्बरे दे पंछियां दे घोंसले होंदे न; पर मिजो, माणुऐ दे पुत्रे बाल इक भी घर नहीं है, जिथू मैं सोई सकें।” 59 उनी दूऐ ने बोलया, “मेरे चेले बणी जा।” उनी बोलया, “प्रभु जी, मिजो पेहले जाणा दे ताकि मैं अपने पिता जो दबी ओऐ।” 60 उनी उसला बोलया, “जडे लोक आत्मिक स्पे ने मरयो न, उना जो अपने मुर्दे दबाणा दे, पर तू जाई करी परमेश्वरे दे राज्य दा शुभसमाचार सुंणा।” 61 इक होरनी बन्दे बोलया, “प्रभु जी, मैं तेरे पिच्छे ओगा; पर पेहले मिजो जाणा दे ताकि मैं अपने घरे दे लोकां ने बिदा लेई ओऐ।” 62 यीशुऐ उसयो बोलया, “जडा कोई अपना हथ हले पर रखीकरी पिच्छे दिखदा है, सै परमेश्वरे दे राज्य जोगी नी है।”

10 इदे बाद प्रभुऐ सतर होर चेले रखे कने जीसी-जीसी शेहरे कने जगा पर उनी अपु जाणे दी योजना बणाईयो थी ओथु उना जो दो-दो करिके अग्रे भेजया। 2 कने उनी उना जो बोलया, “पकियो फसला दे खेत बडे न; पर मजदूर थोडे न: इस ताई खेतरे दे मालिके ने बिनती करा, की सै अपने खेतरां जो बडणे ताई मजदूर भेजी दे।” 3 जा; दिखा मैं तुहांजो भेडां सांई भेडियां दे बिच भेजदा है। 4 इस ताई ना बटुआ, ना झोली, ना जूते; कने ना ही रस्ते च कुसयो नमस्ते करा। 5 जिसदे भी घरे जा, पेहले बोला, इस घरे दा कल्याण हो। 6 अगर ओथु कोई मेहमना दा आदर करणे बाला होंगा; तां तुहाडी आशीष उस पर होणी, नी तां तुहाडे बाल बापस आई जाणी। 7 उसी घरे च रिया, उस घरे ला तुहांजो जडा कुछ मिलदा है, सेई खा पिया; क्योंकि मजदूर जो तां अपनी मजदूरी मिलणा चाईदी; घरे-घरे मत फिरदे। 8 कने जिसी शेहरे च जांगे, कने ओथु दे लोक तुहांजो अपने घरे खुशिया ने अपनांगे, तां जडा कुछ तुहाडे सामणे रखगे सै ही खा। 9 ओथु दे बिमारां जो ठीक करा: कने उना जो बोलणा, परमेश्वरे दा राज्य तुहाडे बखे आई रिया है। 10 पर जिस शेहरे च जांगे, कने ओथु दे लोक तुहांजो अपनांगे नी, तां उना दे

बजारां च जाई करी बोला, 11 तुहाडे शेहरे दी धुड भी, जडी साडे पैरां च लगियो है, असां तुहाडे सामणे झाडी दिन्दे न, तमी ऐ समझी लिया, की परमेश्वरे दा राज्य तुहाडे बखे आई रिया है। 12 “मैं तुसां ने सच्च बोलदा है, की न्याय बाले रोजे सै शेहरे जिथू दे लोक परमेश्वरे दा बचन नी मंदे, उना दी हालत सदोम दे लोकां दी हालत ला भी जादा भयानक होणी है।” 13 “हाय! खुराजीन शेहर कने बैतसैदा शेहर दे लोको! जडे अनोखे कम्म तुहाडे शेहरे च कितयो न, अगर सै कम्म सूर कने सैदा शेहरे च किते जांदे, तां सै ऐ दसणे ताई की उना अपने पापां ला पश्चाताप करी लिया है, तां बडे पेहले टाट ओढी लेंदे, कने धुडी अपने उपर छिडकी लेंदे।” 14 की परमेश्वरे दे न्याय दे रोज जडी सजा सूर कने सैदा शेहरे दे लोकां जो देणी है, सै सजा तुहाडिया सजा ला घट होणी है। 15 हे कफरनहम शेहरे दे लोको तुसां क्या स्वर्गे दीकर उच्चे किते जाणे न? तुसां तां पताल लोक दीकर थले किते जाणे न। (Hadēs g86)

16 “जडा तुहाडी सुणदा है, सै मेरी सुणदा है, जडा तुहांजो तुच्छ समजदा है, सै मिजो भी तुच्छ समझदा है; कने जडा मिजो तुच्छ समजदा है, सै मेरे भेजे बाले जो भी तुच्छ समजदा है।” 17 सै सत्तर चेले खुशिया ने बापस आई करी बोलणा लग्ये, प्रभु जी, बुरियां आत्मा भी साडी गल्ल मन्नी जालू असां उना जो तेरे नापे ने हुकम दिता। 18 यीशुऐ उना ने बोलया, जालू बुरियां आत्मा तुहाडा हुकम मनया, तां मैं शैताने जो बिजलिया सांई स्वर्गे ला पोंदे दिखया। 19 मैं तुहांजो सपां कने बिच्छुआं जो मारणे, कने शैताने दी शक्तिया पर हक दितया है; कने कुसा भी चीजा ने तुहांजो कोई नुकसान नी होणा। 20 पर तुसां इसला खुश मत होआ, की बुरियां आत्मा तुहाडा हुकम मंदियां न, पर इसला खुश होआ की तुहाडे ना स्वर्गे च लिखयो न। 21 तालू सै पबित्र आत्मा च होईकरी खुश होई गया, कने बोलया, पिता जी, स्वर्गे कने धरतिया दे प्रभु, मैं तेरा धन्यवाद करदा है, की तू इना गल्लां जो ज्ञानिया कने समजदारां ला लुकाई रखया, कने बचयां पर प्रगट कितया है, पिता जी, क्योंकि तिजो ऐई खरा लग्गा। 22 “मेरे पिता मिजो सब कुछ देई दितया है; कने कोई नी जाणदा है की पुत्र कुण है सिर्फ पिता ही जाणदा है, कने पिता कुण है ऐ भी कोई नी जाणदा, सिर्फ पुत्र जाणदा कने सै जिदे पर पुत्र उसयो प्रकट करणा चांगा।” 23 तालू यीशुऐ चेलयां पासे मुडी करी उना जो एकांत च बोलया, “धन्य न सै हखी, जडियां गल्लां तुसां दिखदे न उना गल्लां जो सै भी दिखदियां न। 24 क्योंकि मैं तुहांजो ने बोलदा है, की परमेश्वरे दे संदेश देणेबाले मते लोक कने राजे चांदे थे, की जडियां गल्लां तुसां दिखदे न उना जो दिखा; पर नी दिखियां कने जडियां गल्लां तुसां सुणदे न उना जो सुणा, पर नी सुणियां।” 25

इक दिन जालू यीशु लोकां जो सिखा दा था तां इक यहूदी मूसा दी व्यवस्था जो सिखाणे बालयां च उठया; कने ऐ बोली करी उदी परख लेंणा लग्गा, “गुरू जी, हमेशा दी जिन्दगिया दा बारिस बणने तांई मैं क्या करे?” (aiōnios g166) 26 यीशुऐ उसयो बोलया, “मूसा दी व्यवस्था च क्या लिखया है? तू उना जो कियां समझदा है?” 27 उनी जबाब दिता, “तू अपने प्रभु परमेश्वरे सोगी अपने सारे तन मन कने अपने सारे प्राण कने अपने सारे जौरे ने कने अपणिया सारिया अकला ने प्यार कर; कने अपने पडोसिये ने अपणयां सांई प्यार रख।” 28 यीशुऐ उसयो बोलया, “तू ठीक जबाब दिता, ऐई कर

तां तिजो हमेशा दी जिन्दगी मिलणी।” 29 पर उनी अपने कम्मा जो सही ठेहराणे तांई यीशुऐ ला पुछया, तां मेरा पडोसी कुण है? 30 यीशुऐ उसयो इक कहाणिया दे जरिये जबाब दिता, इक माणु यरूशलेम शेहर ला यरीहो शेहर जो चलया था, कने डाकूयां उस पर हमला करी दिता कने उदे कपडे उतारी दिते, कने उसयो मारी-कुट्टी करी अदमरा करी के छडी गे। 31 कने इयां होया की उस रस्ते चे इक यहूदी याजक चलया था, पर याजके उसयो दिखीकरी उदी कोई मदद नी कीती कने ओथु ला चली गया। 32 इयां ही इक लेवी जडा यहूदी मंदरे च कम्म करदा था उसा जगा पर आया, उनी भी उसयो दिखीकरी उदी कोई मदद नी कीती कने दुज्जे पासे ला चली गया। 33 पर इक सामरिया प्रदेश दा इक माणु उसा जगा ला निकलया जिथू सै जख्मी माणु पिया था, उसयो दिखीकरी उस पर तरस आई गया। 34 कने उदे बखे आई करी उनी उदे जखमा पर तेल कने दाखरस लाईकरी पट्टी बन्नी, कने अपणिया सवारिया पर चड़ाई करी उसयो सरा च लेई गया, कने उदी सेबा कीती। 35 दूऐ रोजे उनी दो दीनार (दो दीनार मतलब दो दिना दी मजदूरी) देईकरी उसा सरां दे मालके जो दिते, कने बोलया, इसदी सेबा करनयो, कने जडा कुछ तेरा होर लग्गा, सै मैं तिजो बापस आई करी देई दिंगा। 36 तालू यीशुऐ पुछया, “हुण तेरिया समझा च जिस पर डाकूआं हमला कितया था, उदा इना तिन्ना चे पडोसी कुण होया?” 37 उनी बोलया, “सै ही जिनी उस पर तरस खादा था।” यीशुऐ उसयो बोलया, “जा, तू भी इयां ही कर।” 38 यीशु कने उदे चेले जालू चलयो थे, तां सै इक गांऐ च गया, ओथु मार्या नापे दी इकी जनानिया उसयो अपने घरे ओणे दा नियोता दिता। 39 कने मरियम नापे दी उसा दी इक बेंहण थी; सै प्रभु दे पैरां बखे बेईकरी उदी शिक्षा जो सुणा दी थी। 40 पर मार्या रोटियां बणादे-बणादे घबराई गई कने उदे बखे आई करी बोलणा लग्गी, प्रभु जी, क्या तिजो जरा भी चिंता नी है की मेरिया बेंहणा मिजो सारे कम्म करणे तांई किल्ला छडी दितया है? इस तांई उसा जो बोल, की मेरी मदद कर। 41 यीशुऐ उसा जो जबाब दिता, “मार्या, हे मार्या; तू बडियां गल्लां तांई चिन्ता करदी कने घबरांदी है। 42 पर इक ही गल्ला दी चिन्ता करणे दी जरूरत है, कने मरियमा से कम्म तोपी लिया है, कने इसा जो इसला दूर नी किता जाणा है।”

11 यीशु कुसकी जगा पर प्राथना करा दा था। कने जालू सै प्राथना करी बैठा, तां उदे चेलयां चे इकी चेले उसयो बोलया, “प्रभु जी, जियां यूहन्ने अपने चेलयां जो प्राथना करणा सिखया है तियां ही सांझो सिखाई दे।” 2 यीशुऐ उना ने बोलया, तुसां इस तरीके ने प्राथना करणा चाइदी की: है साडे पिता परमेश्वर, जडा तू स्वर्गे च है; तेरा ना सारे लोकां च पबित्र मनया जा, कने तेरा राज्य सांझो च ओऐ। 3 सांझो होर रोज सै खाणा दे जडा सांझो उस दिने तांई चाइदा है। 4 कने जियां असां सांझो सोगी गलत करणे बालयां जो माफ कितया है, तियां ही तू भी साडियां गलतियां जो माफ कर कने सांझो परख च फसणे ला बचा। 5 कने यीशुऐ उना ने बोलया, तुसां चे कुण है, जिसदा इक मित्र हो, कने सै अधिया राती जो उदे घरे जाई करी उसयो बोले, मिजो तिन्न रोटियां दे। 6 क्योंकि मेरा इक मित्र हुणी मिजो मिलणे तांई आया

है कने मिंजो बाल उसयो खुआणे ताई कुछ नी है। 7 कने सै अंदरे ला जबाब दिन्दा है, मिंजो तंग मत कर; हुण तां दरबाजा बंद है, कने मेरे बच्चे मेरे सोगी बिस्तरे च सुतयो न, इस ताई मैं उठीकरी तिजो कुछ नी देई सकदा। 8 मैं तुहांजो ने जडा बोलदा है उसयो समझा, अगर सै उदा मित्र होणे पर भी उसयो उठी करी री नी देणा चा, फिरी भी उस दोस्ते दे बार-बार बिनती करणे पर उदिया जर्रतां दे अनुसार उतणा उठी करी जर्र दिगा। 9 “तुसां जो जडा चाईदा सै परमेव्हे ला मंगा कने उनी तुसां जो देणा; अगर तुसां तोपगे, तां तुसां जो मिलणा; अगर खटखटांगे, तां तुहाडे ताई खुलणा।” 10 क्योंकि जडा कोई मंगदा है, उसयो मिलदा है; जडा तोपदा है, उसयो मिलदा है; कने जडा खटखटादा है, उदे ताई खुलदा है। 11 तुहाडे चे कुण ऐदिया पिता होंगा, की जालू उदा पुत्र रोटी मंगे, तां उसयो पथर दे: या मच्छी मंगे तां मछिया दे बदले सप दे? 12 या अंडा मंगे तां उसयो बिच्छु देई दे? 13 “अगर तुसां बुरे होईकरी अपने बचयां जो खरियाँ चिजा देणा जाणदे न, तां तुहाडे स्वर्गीय पिता परमेव्हे अपने मंगणे बाले जो केई जादा बदीकरी पबित्र आत्मा देणे ताई तैयार है।” 14 फिरी उनी इक गूंगी बुरी आत्मा जो कडया; जालू सै बुरी आत्मा निकली गेई, तां सै गूंगा बोलणा लगी पिया; कने लोकां जो हेरानी होई। 15 पर उना चे कितणयां ही बोलया, “ऐ तां बुरियां आत्मा दे सरदार शैताने दी मदद लेईकरी बुरियां आत्मा जो कडदा है।” 16 होरनी उदी परख लेणें ताई उसला स्वर्गे दा कोई निशान दसणे ताई बोलया। 17 पर उनी, उना दे मने दियां गल्लां जो जाणी करी, उना ने बोलया, “अगर कुसी राज्य च लोक अपु चे ही लडदे रेगे तां सै राज्य उजडी जांदा है। कने अगर कुसी घरे दे माणु अपु चे ही लडदे रेगे तां सै घर भी उजडी जांदा है।” 18 अगर शैतान अपनी ही बुरी आत्मा दे खिलाफ लडगा, तां उनी अपना ही नाश करी लेणा है, तां फिरी उदा राज्य कियां बदी सकदा है? क्योंकि तुसां मेरे बारे च तां बोलदे न, की ऐ तां शैताने दिया मददा ने बुरियां आत्मा जो कडदा है। 19 “भला अगर मैं शैताने दिया मददा ने बुरियां आत्मा जो कडदा है, तां तुहाडी ओलाद कुसदिया मददा ने बुरियां आत्मा जो कडदी है? इस ताई तुहाडिया ओलादी ही तुहाडा न्याय करणा है।” 20 पर अगर मैं परमेव्हे दिया शक्तिया ने बुरियां आत्मा जो कडदा है, तां परमेव्हे दा राज्य तुहाडे बखे आई रिया है। 21 जालू जौरे बाला माणु हथियार लेईकरी अपने घरे दी रखबाली करदा है, तां उदी संमति बची रेंदी है। 22 पर जालू उसला जादा जौरे बाला उसला लडी करी उसयो जीती लेंदा है, तां उदे सै हथियार जिना पर उसयो भरोसा था, उना जो खोई लेंदा है कने उदिया संपतिया जो लुटी करी बंडी दिन्दा है। 23 “जडा मेरे सोगी नी है सै मेरे खिलाफ है, कने जडा मेरे सोगी नी बटोलदा है सै खलारदा है।” 24 जालू बुरी आत्मा माणुए ला निकली जांदी है, तां सै सुकियां जगा च अराम तोपदी फिरदी है, पर उसा जो अराम नी मिलदा है। तां सै अपने आपे ने बोलदी है, कि मैं अपने तिस्सी घरे जो बापस चली जाणा है, जिस माणुए ला निकली थी, 25 “जालू सै बापस ओंदी है तां उस माणुए जो उस घरे साई पांदी है, जिसयो छेल करी साफ कने सजाया हो।” 26 तालू सै बुरी आत्मा जाई करी अपने ला होर बुरियाँ सत्त आत्मा जो अपने सोगी लेई ओंदी है, कने सै उदे अंदर बडी करी ओथु रेंदियां न, कने उस माणुए दी

हालत पहले ला भी बुरी होई जांदी है। 27 जालू यीशु ऐ सब गल्लां बोला दा ही था तां भिडा चे इकी जनानिया उचिया अबाजा ने बोलया, “धन्य हे सै जनानी जिना तिजो पैदा किता कने तिजो अपना दूध पियाया।” 28 उनी बोलया, “हाँ, पर धन्य न सै, जडे परमेव्हे दा बचन सुणीकरी मंदे न।” 29 जालू बडे भरी लोकां दी भीड़ गिठी होआ दी थी तां सै बोलणा लग्गा, “इस युगे दे बुरे लोक चिन्न चमत्कार तोपदे न, पर परमेव्हे दा संदेश देणेबाले योना दे चिन्न चमत्कार जो छडी करी उना जो कोई होर कोई चिन्न नी मिलणा।” कने यीशु उना जो छडी करी चली गया। 30 जियां योना नीनवे शेहरे दे लोकां ताई चिन्न बणया, तियां ही मैं माणुए दा पुत्र भी इस युगे दे लोकां ताई चिन्न होणा है। 31 दक्षिणे दिया राणिया न्याय दे रोजे इस बेले दे आदमियां दे सोगी उठी करी, उना जो दोषी बोलणा है, क्योंकि सै राजा सुलेमान दा ज्ञान सुणने ताई बडी दुरे ला आई, कने दिखा ऐथू सै है जडा सुलेमान ला भी बडा है। 32 नीनवे शेहरे दे लोकां न्याय दे रोजे इस बेले दे लोकां सोगी खडे होईकरी, इसा पीडी दे लोकां जो दोषी बोलणा है; क्योंकि उना योना दा प्रचार सुणिक्री मन बदलया है कने दिखा, ऐथू सै है जडा योना ला भी बडा है। 33 “कोई माणु दिया बाली करी थले या टोकस्से हेठ नी रखदा है, पर धारिया पर रखदा है ताकि अंदरे ओणे बालयां जो लौ होऐ।” 34 तेरियां हखी तें शरीर ताई इक दिव्ये साई न, इस ताई अगर तेरी हख साफ है, तां तेरा सारा शरीर भी लौ लुआन है; पर अगर सै बुरी है, तां तेरा शरीर भी नेहरे च है। 35 ताई तां ध्यान रखा, की जडी लौ तिजो च है सै नेहेरा ना होई जाये। 36 इस ताई अगर तेरा सारा शरीर लौ लुआन हो, कने उदा कोई हिसा नेहरे च नी रे, तां सारे दा सारा शरीर ऐसा लौ लुआन होणा, जियां उस बेले होंदा है, जालू दिया अपणिया लौडे ने तिजो लौ दिन्दा है। 37 जालू यीशु अपना प्रचार खत्म करी बेठा, तां इकी फरीसिये उसला बिनती किती, की मेरे घरे रोटी खाणां चल; कने सै अंदर जाई करी रोटी खाणां बैठा। 38 फरीसी जो ऐ दिखीकरी बडी हेरानी होई की यीशुए खाणां खाणे ला पहले अपने रिती रिबाजा ने हथ पैर नी धोते। 39 प्रभु यीशुए उसयो बोलया, “हे फरीसियों, तुसां ऐसे भांडे न, जडे तां उपरे-उपरे ला तां साफ न, पर तुसां दे मने अंदर लालच कने बुराई भरईयो है।” 40 हे मुखौं, जिनी बाहरे दा हिसा बणाया है, क्या उनी ही अंदरे दा हिसा नी बणाया है? 41 गरीब लोकां जो दान देईकरी अपना मन अंदरे ला साफ करा, तां दिखा सब कुछ तुहाडे ताई पबित्र होई जाणा। 42 “पर हे फरीसियों, तुहाडे ताई बडा बुरा होणा है! तुसां पुदीने कने जरि दा, कने सारिया भान्तिया दे साग पतयां दा दसमां हिसा दिन्दे न, पर न्याय जो कने परमेव्हे दे प्यारे जो टाल्ली दिन्दे न; तुहांजो इयां करणा चाईदा था की इना जो भी करदे रेदे कने उना जो भी नी छडदे।” 43 हे फरीसियों, तुहांजो ताई बडा बुरा होणा है! तुसां यहूदी जंज घर च खास-खास जगा च आसन कने ऐ चांदे न की बाजारां च लोक तुहांजो नमस्ते बोलन। 44 “तुहांजो ताई बडा बुरा होणा है। क्योंकि तुसां उना लुकियां कबरां दे साई न, जिना पर लोक चलदे न, पर जाणदे नी न।” 45 तालू इकी व्यवस्था जो सिखाणे बाले उसयो जबाब दिता, “गुरू जी, ऐसिया गल्लां बोली करी तू साडी निंदा करा दा है।” 46 उनी बोलया, “हे व्यवस्था जो सिखाणे बालयो, तुहांजो ताई बडा बुरा होणा

है। तुसां ऐसे बोझे जो माणुए पर लददे न, जिसयो चुकणा बडा मुशकिल है, पर तुसां अपु उना बोझां जो अपणिया इकी उंगलियां ने भी नी हिलादे न।” 47 तुहांजो ताई बडा बुरा होणा है। तुसां उना परमेश्वरे दा संदेश देणेबालयां दियां कबरां बणादें न, जिना जो तुहाडे बाप दादयां मारी दितया था। 48 इसा गल्ला दे तुसां गबाह न, कने अपने बाप दादयां दे कम्मा ने सहमत न; क्योंकि उना तां उना जो मारी दिता कने तुसां उना दियां कबरां बणादे न। 49 इस ताई तां परमेश्वरे दिया अकला भी बोलया है, की मैं उना बाल परमेश्वरे दा संदेश देणेबालयां कने प्रेरितां जो भेजगी, कने उना इना चे कितणयां जो मारी देणा, कने कितणयां जो सताणां है। 50 ताकि जितणे भी परमेश्वरे दा संदेश देणेबालयां दा खून इस संसारे दे शुरू ला बाहाया है, सबना दा लेखा, इस युगे दे लोंका ला लेणा है। 51 हाबिल दिया हत्या ला लेईकरी परमेश्वर दा संदेश देणेबाले जकर्याह दिया हत्या दीकर जिसयो बेदी कने मंदरे दे बिच मारया था; मैं तुसां ने सच्च बोलदा है; उदा लेखा इस बकते दे लोकां ने लेणा है। 52 “व्यवस्था जो सिखाणे बालयां लोकां पर लानत है! क्योंकि तुहांजो बाल स्वर्ग जाणे दा रस्ते दा पता था। पर तां भी तुसां उसी रस्ते पर नी चले कने दुजे लोकां जो भी जाणे ला रोकी लिया है।” 53 जालू सै ओथु ला निकलया, तां व्यवस्था जो सिखाणे बाले कने फरीसी बडे पिच्छे पेई गे, कने छेडना लग्गे, की सै बडियां गल्लां दी चर्चा करे, 54 कने उदिया ताका पर लग्गी रे, की उदे मुए दी कोई गल्ल पकडन।

12 इतणे च ओथु जालू हजारों दी भीड होई गेई, ऐथू दीकर की लोक इकी दूरे पर डेई पोंदे थे, तां यीशुए सबना ला पेहेले अपने चेलयां ने बोलया, फरीसियां दी कपटरूपी जिन्दगी ला जडी खमिरे साई है उसा ला बची करी रेनयो। 2 क्योंकि कुछ भी ढक्या नी है, जडा खोलया नी जाणा है; कने कुछ छुपया नी है, जडा सामणे नी ओणा है। 3 ताई तां जडा कुछ, तुसां नेहरे च बोलया है, सै लौइ च सुणाया जाणा, कने जडा तुसां अंदर कमरयां च कन्ना च बोलया है, उदा छती पर चढी करी प्रचार होणा। 4 “पर मैं तुसां ने बोलदा है, जडे मेरे साथी न, कि जडे शरीर जो मारी सकदे न, पर सै आत्मा जो नी मारी सकदे न, उना ला डरदे मत।” 5 मैं तुहांजो चेतावनी दिन्दा है की तुहांजो कुसने डरना चाईदा, तुहांजो उस परमेश्वरे ला डरणा चाईदा जिसयो तुहांजो मारणे ला बाद नरके च भेजणे दा हक है। (Geenna g1067) 6 “क्या बडी घट कीमत च पंज चीडियाँ नी बिकदियां? तमी परमेश्वर उना चे इकी जो भी नी भुलदा।” 7 बल्कि तुहाडे सिरे दे सारे बाल भी गिणयो न, इस ताई डरा मत, तुसां परमेश्वरे ताई मतियां चीडियाँ ला भी बदीकरी कीमती न। 8 मैं, माणुए दे पुत्र तुहांजो बोलदा है जडे कोई बोलदे न, की सै मेरे चले न, उसयो मैं भी अपने स्वर्गीय पिता परमेश्वर दे सामणे अपने चले मनी लेंगा। 9 पर अगर सै दूजयां दे सामणे ऐ बोलणे ला डरदे न, कि असां यीशुए दे चले न, तां परमेश्वरे भी अपने स्वर्गदूतां सामणे तुहांजो चेला नी मनणा है। 10 पर जडा कोई माणुए दे पुत्रे दे बारे च कोई बुरी गल्ल बोलगा, उदा ऐ अपराध माफ होई जाणा, पर जडा कोई पबित्र आत्मा दे बारे च बुरा बोलगा, उदा अपराध माफ नी होणा है। 11 “जालू लोक तुहांजो यहूदी जंज घर च कने हाकिमां कने अधिकारियां दे सामणे लेई जांगे, तां चिंता मत करदे की असां कियां या क्या

जबाब दें, या क्या बोलन।” 12 क्योंकि पबित्र आत्मा तुहांजो तालू ही सिखाई देणा, की क्या बोलणा चाईदा। 13 फिरी भिडा चे इकी माणुए यीशुए बोलया, “गुरू जी, मेरे भाईए जो बोल, की पिता दी जमीन जयादात मिंजो देई दे।” 14 यीशुए उसयो बोलया, “हे माणु, कुनी मिंजो तुहाडा न्याय करणे बाला या धन बंडणे बाला बणाया है?” 15 कने यीशुए उना जो बोलया, “ध्यान रखा, कने हर तरा दिया मोहमाया ने अपने आपे जो बचाई रखा; क्योंकि कदी भी जिन्दगी उदिया जमीन जायदाद ला जादा नी होंदी।” 16 यीशुए उना जो इक कहाणी सुणाई, कुसकी अमरि दिया जमिना च मती भरी फसल होई। 17 तालू सै अपने मने च सोचना लग्गा, की मिंजो नी समझ ओआ दी की मैं क्या करे, क्योंकि मेरे बाल तां इतणी जगा ही नी है, जिथू मैं अपनी सारिया फसला जो रखी सके। 18 कने उनी बोलया, मैं इयां करणा है की अपने गोदामें दियां बखारियां जो तोड़ी करी उना ला बडियां बणाणियां न; कने ओथु अपनी सारी संपति कने फसल रखणी; 19 कने इदे बाद अपने आपे ने बोलणा, की तरे बाल मते साला ताई मती धन दौलत कने फसल रखियो है; मजे ने खा पी, सूखे ने रे। 20 पर परमेश्वरे उसयो बोलया, हे मुखी इसा राती तू मरी जा; तां तालू जडा कुछ तू गेरया है, सै कुसदा होणा? 21 “इयां ही उस माणुए ने भी होणा है जडा सब कुछ अपने ताई गटेरदा, पर परमेश्वरे दिया सेवा करणे ताई अपनी क्षमता कने धन दौलत खर्च नी करदा।” 22 फिरी उनी अपने चेलयां ने बोलया, ताई तां मैं तुहांजो बोलदा है, अपनी जिन्दगी दी चिंता मत करा, की असां क्या खांगे; ना ही अपने शरीर दी की असां क्या पांगे। 23 क्योंकि रोटिया ला जिन्दगी कने कपडयां ला शरीर जादा बदीकरी है। 24 कोयां पर ध्यान दिया; ना सै रादें न, ना सै बडदे न, न उना बाल खेत; ना उना दे गोदाम होंदे न जिथू से गठेरी सकन, तमी परमेश्वर उना जो पालदा है। तुहाडी कीमत पछियां ला भी बदीकरी है। 25 तुसां चे ऐसा कुण है, जडा चिंता करणे ने अपणिया जिन्दगिया च इक घडी भी बधाई सकदा है? 26 इस ताई अगर तुसां सबना ला छोटा कम्म भी नी करी सकदे, तां जिन्दगी च दूजियां गल्लां दी कजो चिंता करदे? 27 “जंगली फुलां दे बारे च सोचा की सै कियां बडुदें न, सै ना तां मेहनत करदे न, कने ना ही कपडे पांदे न, तमी मैं तुसां ने बोलदा है, की जालू राजा सुलैमान बाल धन दौलत थी, तालू भी उनी जंगली फुलां चे कुसी साई भी कपडे नी पायो थे।” 28 इस ताई अगर परमेश्वर दरबडे दे घाए जो, जडा अज है, कने कल अग्गी च फुकया जाणा, तमी परमेश्वर घाए जो इतणी सुन्दरता दिन्दा है, तां हे अल्पविश्वासियों, तां उनी पक्का तुहाडी देखभाल करणी है, तुहाडा भरोसा इतणा घटू कजो है? 29 कने तुसां इसा गल्लां दिया तोपा च मत रिया, की क्या खांगे कने क्या पींगे, कने ना ही शक करा। 30 क्योंकि जडे लोक परमेश्वरे जो नी जाणदे सै इना चिजां जो तोपदे रेंदे न; कने तुहाडा पिता जाणदा है, तुहांजो इना चिजां दी जरूरत है। 31 पर उदे राज्य दिया तोपा च रिया, तां ऐ चिजां भी तुहांजो मिली जाणियां। 32 तुसां मेरे ताई भेडां दे झुण्ड साई न, इस ताई कुसा भी गल्ला दे बारे च मत डरा; क्योंकि तुहाडे परमेश्वर पिता जो ऐ खुशी है, की तुहांजो राज्य दे। 33 अपणिया जमीन जयादात जो बेचिकरी दान करी दीया; कने अपने ताई ऐसे बटुए बणां, जडे पराणे नी होंदे, इदा मतलब की स्वर्गे च

ऐसा धन गटेरा जड़ा घटदा नी है कने जिसदे नेडे चोर नी जांदा है, कने खराब करणे बाला कीड़ा नी लगदा। 34 क्योंकि जित्थू तूहाड़ा धन है, ओथु तूहाड़ा मन भी लगया रेंदा है। 35 हमेशा सेबा करणे तांई तैयार रिया कने सारी रात तूहाड़े दिव्ये बलदे रेंन। 36 कने तुसां उना माणुऐ सांई बणा, जडे अपने मालिके जो निय्याला दे होन, की सै बियाह ला कालू बापस ओगा; की सै जालू आई करी दरबाजा खट खटागां तां झट उदे तांई खोली देन। 37 धन्य न सै सेवक, जिना जो मालिक आई करी उदे बापस ओणे दी निय्याल रखदे दिखे; मैं तूहांजो ने सच्च बोलदा, की उनी इक सेवके सांई कपडे पाई करी उना जो रोटी खाणां बठाणा, कने अपु उना जो खांणे तांई परोसणा। 38 अगर सै अधिया राती या ब्यागा पेहर च आई करी उना जो जागदा दिखे, तां सै सेवक धन्य न। 39 पर तुसां ऐ जाणी लिया, की अगर घरे दा मालिक जाणदा, की चोरे कुसा घडिया ओणा है, तां सै जागदा रेंदा, कने अपने घरे च चोरी नी होणा दिन्दा। 40 तुसां भी मेरे बापस ओणे तांई तैयार रिया; क्योंकि मैं, माणुऐ दे पुत्रे ऐसिया घडिया स्वर्गे ला ओणा जालू तुसां मेरे ओणे दी उम्मीद नी कितियो होणी है। 41 तालू पतरसे बोलया, “प्रभु जी, क्या ऐ कहाणी तू सांझो ही बोला दा है की सबना जो बोलदा है।” 42 प्रभु यीशुऐ बोलया, “सै भरोसे लाइक कने अकला बाला भंडारी कुण है, मालिक जिसयो नोकरां-चाकरां दा सरदार बणाऐ ताकि सै उना जो टेमे दा खांणे पिणे दा समान दे।” 43 धन्य है सै सेवक, जिसयो उदा मालिक आई करी ऐसा ही करदा दिखे। 44 मैं तूहांजो ने सच्च बोलदा; उनी उसयो अपणिया सारिया संपतिया दा मालिक बणाई देणा। 45 पर अगर सै सेवक सोचना लगे, की मेरे मालिके जो ओणे च हल्ले बड़ा बकत है, कने सै दासां कने दासियाँ जो मारणा-कुटणा कने खाणां-पिणा कने शराबी होणा लगे। 46 तां उस दासे दे मालिके ऐसे रोजे ओणा है जिस दिने सै उसयो निय्याला दा नी होणा, कने ऐसी घडी जिसा जो सै जाणदा ना होणा, तालू उदे मालिके ओणा, उसयो खरियाँ झिड़कां देईकरी उदी गिणती अविश्वासियां सोगी करी देणा। 47 कने सै सेवक जड़ा मालिके दी इच्छा जाणदा था, कने तैयार नी रिया कने ना उदिया मरजिया चलया, उनी बडी मार खांणी। 48 पर जिसयो पता नी होईकरी मार खांणे जोगा कम्म करे उनी घट मार खांणी, तांई तां जिसयो जादा दितया है उसला जादा मंगया जाणा है; कने जिसयो जादा सौपया है, उसला जादा दा हिसाब लेणा है। 49 मैं धरतिया पर अग्न लगाणा आया है; बस ऐ ही चांदा है, की हुण ही लगी जांदी! 50 मिंजो जल्द ही इक भयंकर पीड झेलणा पोणी है; कने जालू दीकर सै पीड नी झलगा तालू दीकर मैं बड़ा बेचेन है। 51 तुसां क्या सोचदे न की मैं धरतिया पर लोकां बिच मेल मिलाप करणा आया है? मैं बोलदा है, नी मैं लग करणा आया है। 52 क्योंकि अगर कुसी इकी घरे दे पंज जणे न, तां उना अपु चे बख रेणा है, तिन्ना जाणया जडे मिंजो पर भरोसा नी करदे उना दां जणयां दा बिरोध करणा जडे मिंजो पर भरोसा करदे न। 53 पिता पुत्रे ने, कने पुत्रे पिता ने बेर रखणा; माता कुडिया ने, कने कुडिया माता ने, ससु नुआ ने, कने नुआ ससु ने बैर रखणा है। 54 कने यीशुऐ भिडा ने भी बोलया, जालू तुसां बदलां जो पश्चिम ला उददे दिखदे न, तां झट बोलदे न, की बरखा होणी है, कने इयां ही होंदा है। 55 कने जालू दक्षिणी होआ चलदी दिखदे न तां बोलदे की

लू चलणी, कने इयां ही होंदा है। 56 हे कपटियों, तुसां धरती कने अम्बरे दे स्पे च भेद करी सकदे न, पर इस युगे च परमेश्वर क्या करा दा है, उदे बारे च भेद कजो नी जाणदे न। 57 तुसां जो अपु ही फेसला करणा चाईदा की तूहाड़े तांई क्या ठीक है? 58 जालू तू अपने मुइई सोगी न्याय करणे बाले बाल चलया है, तां रस्ते च ही उसला छुटणे दी कोसिस करी ले इयां ना हो, की सै तिजो जजे बाल लेई जाऐ, कने जज सिपाई बाल देई दे कने सिपाई तिजो जेला च पाई दे। 59 मैं तूहांजो बोलदा है, कि जालू दीकर तू दमडी-दमडी नी देई दिगा तालू दीकर ओथु ला नी छुटी सकणा है।

13 उस बेले कुछ लोक आई रे, कने उना यीशुऐ ने बोलया, की रोमी राज्यपाल पिलातुसे गलील प्रदेशे दे थोडे लोकां दी हत्या करी दितियो थी, जालू से मंदिर च बलि चढ़ा दे थे। 2 ऐ सुणीकरी यीशुऐ उना जो जबाब च ऐ बोलया, “क्या तुसां ऐ समझदे न, की ऐ गलील प्रदेश दे लोक, बाकी सारयां गलीली लोकां ला जादा पापी थे की उना पर ऐ मुश्किल पेई?” 3 मैं तुसां ने बोलदा, की नी थे; पर अगर तुसां भी अपने पापां जो नी मनगे कने मन नी बदलगे तां तुसां भी इयां ही खत्म होणा है। 4 या क्या तुसां समजदे न, की उना ठारा जणयां दे बारे च तूहाड़ा क्या बोलणा है जालू उना पर शील्लोह दा गुम्मत पिया, कने सै दबुई करी मरी गे: क्या सै यरूशलेम शेहरे दे होर सारे रेणे बालयां ला जादा पापी थे? 5 “मैं तुसां ने बोलदा है, की नी थे; पर अगर तुसां मन नी बदलया तां तुसां भी इना सांई ही खत्म होणा।” 6 फिरी उनी ऐ कहाणी भी सुणाई, की कुसकी अंगूरा दे बागे च इक अंजूरि दा रख लगया था: सै उदे च फल तोपणा हर साल आया, पर नी मिल्ले। 7 तालू उनी बागे दे रखबाले जो बोलया, दिख मैं तिन्ना सालां ला इस अंजूरि दे रखे च फल तोपणा ओदा है, पर मिलदे नी न, इसयो बडी दे क्योंकि ये खरिया जमिना जो खराब करा दा है। 8 “उनी उसयो जबाब दिता, की हे मालिक इसयो इस साल तां रेंपी दे; की मैं इदे चारो पासे खूणी करी खाद पां। 9 अगली बरी अगर ऐ फलगा तां ठीक नितां इसयो बडी दियां।” 10 सब्ते दे रोजे यीशु इकी यहदी जंज घर च उपदेश दे दा था। 11 कने ओथु इक जनानी थी, जिसा जो ठारां सालां ला इक बुरी आत्मा बिकलांग करी रखया था, कने सै बडी जादा कुबडी होई गियो थी, कने कुसी भी तरीके ने सिदी नी होई सकदी थी। 12 यीशुऐ उसा जो दिखीकरी सदया, कने बोलया, “हे नारी, तू इसा अपणिया बिमारिया ला छुटी गेई।” 13 तालू उनी उसा पर हथ रखे, कने सै झट सीधी होई गेई, कने परमेश्वरे दी बड़ाई करणा लग्गी। 14 इस तांई की यीशुऐ उसा जो सब्ते दे रोजे ठीक किता था, यहदी जंज घरे दा सरदार लोकां ने बोलणा लग्गा, “इक हफते च छे रोज न, जिना च असां कम्म करी सकदे न, इना रोजा च आई करी ठीक होआ; पर सब्ते दे रोजे नी।” 15 ऐ सुणिंकरी प्रभु यीशु जबाब दिता, “हे कपटियों, क्या सब्ते दे रोजे तुसां सारे जणे अपने दांदा या गधे जो बेकां ला खोलिकरी पाणी पिणा नी लेई जांदे?” 16 ऐ जनानी जडी अब्राहमे दे बंशज है, जिसयो शैताने ठारां सालां ला बन्नी रखया था, क्या ठीक नी था की सब्ते दे रोजे अपने बंधे ला छुड़ाई जांदी? 17 जालू उनी ऐ गल्लां बोलियाँ, तां उदे सारे बिरोधी शरमिंदा होई गे, कने सारी भीड़ उना महान कम्मा ने जडे सै करदा था, खुश होई। 18 फिरी

यीशुए बोलया, “परमेश्वरे दा राज्य कुसदे सांई है? कने मैं उदी तुलना केसने करे?” 19 “सै राईया दे इकी दाणे सांई है, जिसयो इकी माणुए लेईकरी अपणिया जमिना च राया है: कने सै बडोईकरी स्रख बणी गिया; कने अम्बरे दे पंछियां उदियां डालियाँ पर अपने घोंसले बणाए।” 20 उनी फिरी बोलया, मैं परमेश्वरे दे राज्य दी तुलना केसने करे? 21 “सै खमिरे सांई है, जिसयो इकी जनानिया लेईकरी बडे सारे ओटे च पाया, कने होंदे-होंदे सारा अटा खमीर बणी गिया।” 22 सै शेहर-शेहर, कने अपने चेलयां सोगी ग्रां-ग्रां होईकरी उपदेश दिन्दा होया यरूशलेम शेहर दे पासे जा दा था। 23 कने कुंनकी यीशुए पुछया, “प्रभु जी, क्या परमेश्वरे कुछ लोकां जो ही अनन्तकाल दी सजा ला बचाणा है?” उनी उना जो बोलया, 24 परमेश्वरे दे राज्य च जाणे दी कोशिश करा, क्योंकि परमेश्वरे दे राज्य च अंदर जाणा सुंगडे दरबाजे ला अंदर जाणे सांई है, क्योंकि मैं तुसां ने बोलदा है, की मतयाँ अंदर जाणे दी कोशिश करणी है, पर जाई नी सकणा है। 25 जालू परमेश्वर जडा घरे दा मालिक है उठी करी दरबाजा बंद करी बैठया हो, कने तुसां बाहर खडोई करी दरबाजा खट खटाई करी कने बिनती करी बोलन, प्रभु जी, साडे तांई खोली दे, कने सै जबाब दे की मैं तुहांजो नी जाणदा, तुसां कुथु ला आयो न? 26 “तालू तुसां बोलणा लगणा, की असां तरे सामणे खादा पीता कने तू साडे बजारां च उपदेश दिता।” 27 पर परमेश्वरे बोलणा, मैं तुसां ने बोलदा है, मैं नी जाणदा तुसां कुथु ला न। हे बुरे कम्म करणे बालयाँ, तुसां सारे मिंजो ला दूर होई जा। 28 ओथु रोणा कने दंद पीणे: जालू तुसां पूर्वज अब्राहम कने इसहाक कने याकूब कने सारे परमेश्वरे दे संदेश देणेबालयां जो परमेश्वरे दे राज्य च बैठया कने अपने आपे जो बाहर कडया दिखणा। 29 तालू पुरे संसारे ला लोक आई करी परमेश्वरे दे राज्य दिया दावता च हिस्सेदार होंगे। 30 “कने दिखा, जडे पिछले न, उना पेहले होई जाणा, कने जडे पेहले न, उना पिछले होणा।” 31 उसा घड़िया कितणे ही फरीसियां आई करी उसयो बोलया, ऐथू ला निकली करी चली जा; क्योंकि राजा हेरोदेस तिजो मारी देणा चांदा है। 32 उनी उना ने बोलया, जाई करी उस माणुए जो बोली दिया जडा लोमडियां सांई चलाक है, की दिख मैं अज कने कल सारी बुरी आत्मा जो कडदा कने बिमारां जो ठीक करदा है कने तिजे रोजे अपना कम्म पूरा करणा है। 33 तमी मिंजो अज कने कल कने परसु सफर करणा जरूरी है, क्योंकि इक परमेश्वरे दा संदेश देणेबाला सिर्फ यरूशलेम शेहरे च ही मारया जाणा है। 34 “हे यरूशलेम शेहर दे लोको! तुसां इना परमेश्वरे दा संदेश देणेबालयां जो मारी दिता है, जडे पेहले रेंदे थे कने उना लोकां जो पथरां ने मारदे न जिना जो तुहाडे बाल भेजया; कितणी ही बरी मैं ऐ चाया, की जियां मुगीं अपणयां बचयां जो अपने फंगा थले गिटे करदी है, तियां ही मैं भी तरे बचयां दी रखबाली करे, पर तू ऐ नी चाया।” 35 “दिखा, तुहाडा मंदिर तुहाडे तांई उजाड़ी छडया है, कने मैं तुसां ने बोलदा है: जालू दीकर तुसां नी बोलगे, की धन्य है सै, जडा प्रभु दे नाए ने ओदा है, तालू दीकर तुसां मिंजो कदी नी दिखणा है।”

14 फिरी यीशु सब्ते दे रोजे फरीसियां दे सरदारां च कुसकी दे घरे रोटी खाणां खाणे तांई गिया: कने सै यीशु जो दंगे ने ताका दे थे की कोई गलती तोपी सकन। 2 ओथु इक माणु था, जिसदे हथ कने पैर सूजी गियो

थे। 3 इसा गल्ला पर यीशुए व्यवस्था जो सिखाणे बालयां कने फरीसियों ने बोलया, “क्या सब्ते दे रोजे लोकां जो ठीक करणे दी अनुमति व्यवस्था च है, की नी है?” 4 पर सै चुपचाप ही रे। तालू यीशुए उस पर हथ रखीकरी ठीक किता, कने जाणा दिता। 5 कने उना जो बोलया, “मन्नी लिया कि तुसां च कुसकी दा जागत या दांद सब्ते दे रोजे खुए च पेई जा कने उसयो उस रोजे झट बाहर ना कडे?” 6 सै इना गल्लां दा कोई भी जबाब नी देई सके। 7 तालू उनी दिखया, की सदयो लोक कियां सै जगा चुणी लेंदे जिथु सब्ते खास लोक बोंदे न, तां यीशुए उना जो इक कहाणी सुणाई करी उना ने बोलया, 8 जालू कोई तिजो बियाये दिया धामा च सदगा, तां तुसां उना खास आसना च मत बोदा, कुथकी इयां ना हो की उनी तिजो ला भी बडे खास बंदे जो न्युंदर दितियो हो। 9 कने जिनी तिजो कने उसयो दोनो जो न्युंदर दितियो है, सै आई करी तिजो ने बोले, की इसयो जगा दे, तालू तिजो शरमिदा होईकरी सारयां ला पिच्छे बालिया जगा च बोणा पोए। 10 पर जालू तिजो सदगे, तां सारयां ला पिच्छे बालिया जगा जाई करी बेई जा, की जालू सै, जिनी तिजो सदया हे सै ओए, कने तिजो ने बोले की हे मित्र, अग्रे जाई करी खास बाली जगा च बैठ; तालू तरे सोगी बोणे बालयां दे सामणे तेरी बडाई होंगी। 11 “क्योंकि जडा कोई अपने आपे जो बडा महान बणांगा, उसयो छोटा किता जाणा; कने जडा कोई अपने आपे जो छोटा बणांगा, सै सब्ते महान कितया जाणा।” 12 तालू यीशुए अपने न्युंदर देणेबाले फरीसियो जो भी बोलया, “जालू तू दिने दा या राती दा खाणां खांगा, तां अपने दोस्तां या भाईयां या रिश्तेदारां या अमीर पडोसियां जो मत सददा, की इयां ना हो, की सै भी तिजो सदन, कने जडा तू खाणा खुआया उदा बदला होई जाऐ।” 13 “पर जालू तू रोटी खाऐ, तां गरीबां जो, लंगडयां जो कने अन्नयां जो सदी लियां। 14 तालू तू धन्य होणा, क्योंकि उना बाल तिजो देंगे तांई कुछ नी है, पर जालू धर्मी लोकां दे फिरी जिन्दा होई जाणा तालू परमेश्वरे तुहांजो इदा इनाम देणा।” 15 उदे सोगी रोटी खाणे बालयां च इकी ऐ गल्लां सुणि करी उसयो बोलया, “धन्य है सै, जडा परमेश्वरे दे राज्य दिया धाम च शामिल होंगा।” 16 उनी उसयो बोलया, कुनकी माणुए बडी बडी धाम दिती कने मतयां जो सदया। 17 जालू खाणां तैयार होई गिया, तां उनी अपने नोकरे जो भेजया कि जिना जो न्युंदर दितियो उना लोकां जो बोली ओआ, की ओआ, खाणां तैयार है। 18 पर सै सारे दे सारे माफी मंगणा लग्गे, पेहले माणुए उसला बोलया, मैं खेतर खरीदया है कने जरूरी है की मैं उसयो दिखें; मैं तिजो ने बिनती करदा है, की मिंजो माफ करी दे। 19 दूरे माणुए बोलया, मैं पंज जोड़ी दांद खरिदयो न, कने उना जो परखणा जाणा है; मैं तिजो ने बिनती करदा है की मिंजो माफ करी दे। 20 इकी होरनी बोलया, की मैं बियाह कितया है, इस तांई मैं नी आई सकदा है। 21 उनी सेवके आई करी अपने मालिके ने ऐ गल्ल सुणाई। तालू घरे दे मालिके गुस्से च आई करी बोलया, शेहरे दे बजारां कने गलियां च जाई करी झट कंगालां, टुंडे, लंगडयां कने अन्नयां जो ऐथू लेई ओआ। 22 सेवके फिरी बोलया, हे मालिक, जियां तू बोलया था, तियां ही कितया है; फिरी भी जगा है। 23 “मालिके सेवके ने बोलया, सडकां कने बागां च जाई करी लोकां जो मजबूर करी के लेई आए ताकि मेरा घर भरई जा। 24 क्योंकि मैं तुसां ने

बोलदा है, की पेहले सदयो होए लोकां चे कोई भी मेरिया रोठिया जो नी चखगा।” 25 कने जालू मती भीड़ यीशुए सोगी चलियो थी, तां उनी पिच्छे मुडी करी उसला बोलया। 26 “जडे लोक मेरे बाल ओदे न, सै तालू दीकर मेरे चेले नी बणी सकदे, जालू दिकर अपने माता-पिता कने घरे बाली कने बच्चे कने भाई बहण कने अपने आपे ला जादा प्यारा मिजो ने नी करदे।” 27 जडा मेरिया बजा ला दुख सेहन कने मरणे तांई तैयार नही है, सै भी मेरा चेला बणने दे लायक नही है। 28 “अगर तुसां चे कोई इक बडा बड्डा घर बणाणा चांदा हो, तां उनी सबते पेहले बेईकरी इसा गल्ला दा हिसाब लाणा की इसयो बणाणे च कितणा खर्चा ओणा, कने दिखणा की इसयो पूरा करणे तांई पूरा पैसा है की नी।” 29 अगर उनी इयां नी किता, तां उनी जालू नियां पाई करी घरे जो पूरा तैयार नी करी सकणा, तां सारे दिखणे बाले ऐ बोलिकरी उदा मजाक उडाणा, 30 की इनी माणुए घर बणाणा तां शुरू किता, पर पूरा बणाई नी सकया? 31 “अगर इक राजा दस हजार माणुआं जो लेईकरी दुऐ राजे ने लडना चलया हो, जडा बी हजार माणुआं जो लेईकरी उस पर हमला करणा ओआ दा हो, तां सबते पेहले बेईकरी इसा गल्ला पर बिचार करे की जडा बी हजार लेईकरी मिजो ने लडना ओआ दा है, क्या मैं उदा सामणा करी सकदा है की नी?” 32 नितां उदे दूर रेदे ही, उसला संधी करणे दे बारे च गल्ल बात करणे तांई सै दूतां जो भेजे। 33 इयां ही तुसां चे जडा कोई अपना सब कुछ छडी दे, सै ही मेरा चेला होई सकदा है। 34 लूँण तां खरा होंदा है, पर अगर उदा स्वाद बिगडी जा, तां उदा स्वाद कियां नमकीन करणा? 35 “सै तां ना जमिना दे ना तां खादी दे कम्मे ओदा है: उसयो तां लोक बाहर फेंकी दिन्दे न। जिस बाल सुणने तांई कन्न न सै ध्यान लाईकरी गल्ला जो सुणे, कने इसा गल्ला जो समझी ले।”

15 सारे कर लेणेबाले कने पापी लोक यीशु बाल ओदे थे ताकि उदी सुणन। 2 कने फरीसी कने व्यवस्था जो सिखाणे बाले बोलणा लग्गे, “ऐतां पापी लोकां ने मिलदा है कने उना सोगी खाणा खांदा है।” 3 तालू उनी उना जो ऐ कहाणी सुणाई, 4 “अगर तुसां चे कुसी बाल सो भेडां होन, कने उना चे इक गबाची जाये तां सै उना नडिनुऐ भेडां जो सुनसान जगा च छडी करी, उसा गबाचिया जो तालू दीकर तोपे जालू दीकर सै मिल्ली न जा।” 5 कने जालू मिली जांदी है, तां सै बडिया खुशिया ने उसा जो मुंडे पर चुकी लेंदा है। 6 कने अपने घरे आई करी दोस्तां कने पडोसियां जो गिठे करी के बोलदा है, मेरे सोगी खुशी मना क्योंकि मेरी गबाचियो भेड मिली गेई है। 7 मैं तुसां ने बोलदा है; की इयां ही इक मन बदलने बाले पापिये दे बारे च स्वर्गे च इतणी ही खुशी होणी, जितनी की उना नडिनुऐ धर्मियां दे बारे च नी होदी जडे सोचदे न की सै धर्मी न, कने जिना जो पश्र्चाताप दी जरूरत नी है। 8 तालू यीशुए इक होर कहाणी सुणाई अगर कुसी जनानिया बाल दस चांदी दे सिक्के होन, कने उना चे इक सिक्का गबाची जाए; तां सै दिथ्या वाली करी कने पूरे घरे च बोंखरिया ने सोतया, तालू दीकर सै ध्यान लगाई करी तोपदी रेई जालू दीकर तोपी ना ले। 9 कने जालू मिली जांदा है, तां सै अपणियां सेलियां कने पडोसियां जो गठेरी करी बोलदी है, की ओआ मेरे सोगी खुशी मना क्योंकि मेरा गबाचिया सिक्का मिली गया है। 10 “मैं तिजो ने बोलदा

है; की इयां ही इक पापी माणु जालू अपने पापां जो मन्नी लेदां है, तां परमेस्वरे दे स्वर्गदूत उस पापी तांई खुशी मनादे न।” 11 फिरी उनी इक होर कहाणी सुणाई, इकी माणुए दे दो पुत्र थे। 12 उना चे छोटे जागते पिता ने बोलया, पिता जी, की जडा हिसा मेरा जमीन जयादात च है, सै हुण मिजो देई दिया। कने पिता उना जो अपणी सारी जमीन जयादाद दोनो जागतां बिच बंडी दिती। 13 “कने कुछ दिना बाद की छोटा पुत्र सारा कुछ गठेरी करी दूर कुसी देशे जो चली गया कने ओथु बुरे कम्मा कने खाणे पिणे च अपणी सारी धन दौलत उडाई दिती।” 14 जालू सै सारा कुछ खर्ची बैठा, कने उसी देशे बडा बडा अकाल पेई गया, कने उस बाल खाणे पिणे जो कुछ नी बचया। 15 कने सै उसी देशे दे रेहणे बाले इक माणुए दे घरे कम्म करणे तांई गया। उनी उसयो अपने खेतारां च सूआं जो चुगाणे तांई भेजया। 16 कने सै इतणा भूखा था, की सै उना फलियां जो खाणे ने इतणा खुश था जिना जो सूआ खांदे थे, क्योंकि उसयो कोई कुछ नी दिन्दा दा खाणे जो। 17 जालू उसयो समझ आई तां सोचना लग्गा कने बोलणा लग्गा, की मेरे पिता दे कितणे ही मजदुरां जो खाणे ला जादा रोटी मिलदी है, पर मैं ऐथू भूखा मरा दा। 18 मैं हुण उठी करी री अपने पिता बाल जाणा है कने बोलणा की पिता जी मैं परमेस्वर दे खिलाफ च कने तेरिया नजरा च पाप कितया है। 19 हुण इसी जोगा नी है की तेरा पुत्र बणे, मिजो अपने इकी मजदूरे सांई ही रखी ले। 20 तालू उनी उस देशे जो छडी दिता कने अपने पिता बाल जाणे तांई बापस चली पिया, सै अजे दूर ही था, की उदे पिता जो उसयो दिखीकरी तरस आई गया, कने उस पासे दोडी करी उसयो गल्ले लाई लिया, कने बडे चूमे ले। 21 पुत्रे उसला बोलया, पिता जी, मैं परमेस्वरे दे खिलाफ च कने तेरिया नजरा च पाप कितया है; कने मैं हुण तेरा पुत्र होणे जोगा नी रिया है। 22 पर पिता अपने नोकरां ने बोलया, झट छेल दे कपडे कडी करी इसयो पेहना, कने इदिया उंगलियां च गुन्ठिया कने पैरां च जूतियां पेहना, 23 कने इक बडी बडी धाम तैयार करा ताकि असां खाई करी खुशी मनान। 24 क्योंकि मैं सोचया था की मेरा ऐ पुत्र मरी गया है, पर ऐ मरया नी है: गवाची गया था, पर हुण मिली गया है। कने सै खुशी मनाणा लग्गे। 25 जालू ऐ सब होआ दा था पर उदा जेठा पुत्र खेतारां च कम्म करा दा था। कने सै जालू घरे बखे पुज्जा, तां उनी गाणे-बजाणे कने नचणे दा रोल्ला सुणया। 26 कने उनी इकी नोकरे जो सदीकरी पुछया, ऐ क्या होआ दा है? 27 उनी उसला बोलया, तेरा भाई घर बापिस आया है, कने तेरे पिता बड्डी धाम तैयार कितयो है, क्योंकि सै भला चंगा घर बापस आया है। 28 ऐ सुणिकरी उसयो बडा गुस्सा आई गया कने सै घरे अंदर नी जादा था, इस तांई उदा पिता बाहर आई करी उसयो अंदर चलणे तांई मनाणा लग्गा। 29 उनी पिता जो जबाब दिता, की दिख; की मैं इतणे सालां ला तेरी सेवा करा दा है, कने कदी तेरी गल्ल नी टाल्ली, तमी तू मिजो अजे दीकर कदी तू मिजो कुछ खरा नी दिता, की मैं अपने दोस्तां सोगी खुशी मनां। 30 पर जालू तेरा ऐ पुत्र आया, जिनी तेरी सारी धन दौलत कन्जरियां पिच्छे उडाई करी आया है, तां तू इदे तांई बडी धाम लगायी। 31 “उनी उसला बोलया, मेरा पुत्र तू हेमेशा मेरे सोगी है; कने जडा कुछ मेरा है सै सब कुछ तेरा ही है। 32 पर हुण तिजो

खुशी मनाणी कने मगन होणा चाईदा क्योकि तेरा ऐ भाई मरी गया था पर ऐ मरया नी है: गवाची गया था, पर हुण मिली गया है।”

16 फिरी उनी चेलयां जो भी कहाणी सुणई, कुसकी इक अमीर बन्दे दा इक भंडारी था, कने लोकां उदे सामणे उस पर इलजाम लगाया की ऐ तेरिया धन दौलत जो उडाई दिन्दा है। 2 कने उनी अमीर बंदे अपने भंडारी जो सदीकरी बोलया, ऐ क्या है जडा मैं तेरे बारे च मैं क्या सुणादा है? तू मेरे पैसां दा क्या कितया है सारा हिसाब दे; क्योकि तू अजे बाद भंडारी नी है। 3 “तालू भंडारी सोचना लगा, की हुण मैं क्या करे? क्योकि मेरा मालिक मिंजो भंडारी दे कम्मे ला कडा दा है: कोई मेहनत बाला कम्म तां मिंजो ला होंदा नी, कने भीख मंगणे ने मिंजो शर्म ओदी है।” 4 मिंजो पता है की क्या करणा ताकि जालू मिंजो भंडारिये दे कम्मे ला कडया जांगा तां लोक मेरी मदद करन। 5 कने उनी अपने मालिके दे देंणदारां जो इक-इक करी के सदया कने पेहले ला पुछया, की तिजो पर मेरे मालिके दा कितणा कर्ज है? 6 उनी बोलया, 3,700 लिटर तेल, तालू उनी उसला बोलया, की अपनी खाता बही ले कने बेईकरी झट 1,850 लिटर तेल लिखी दे। 7 फिरी दुज्जे ला पुछया, तिजो पर कितणा कर्ज है? उनी उसला बोलया, 20,000 किलो कणक, तालू उनी उसयो बोलया, अपना बही खाता ले कने 16,000 किलो कणक लिखी दे। 8 मालिके उस अधर्मी भंडारी दी तारीफ किती, की उनी चलाकिया ने कम्म कितया है; क्योकि इसा दुनिया दे लोक अपने बक्ते दे लोकां सोगी व्यवहार करणे च ज्योति दे लोकां ला जादा चलाक न। (aiōn g165) 9 कने मैं तुसां ने बोलदा है, की संसारिक पेसे ने अपने तांई मित्र बनाई लिया; ताकि जालू ऐ पैसा नी रेंगा तां अनन्तकाल दे घरे च तुहांजो रेहणे तांई जगा दे। (aiōnios g166) 10 जडा छोटिया-छोटिया गल्लां च भरोसे दे लायक है, सै बडियां गल्लां च भी भरोसे दे लायक है: छोटिया-छोटिया गल्लां च भरोसे दे लायक नी है, सै बडियां गल्लां च भी भरोसे दे लायक नी है। 11 इस तांई जालू तुसां संसारिक पेसे च भरोसे दे लायक नी, तां तुहांजो स्वर्गे दा धन कुनी देणा? 12 अगर तुसां होरसी दे पेसे च भरोसे दे लायक बणी रे, तां जडा तुहाडा है, उसयो तुहांजो कुण दिंगा? 13 “कोई सेवक दो मालिकां दी सेबा नी करी सकदा: क्योकि उनी इकी ने बेर कने इकी ने प्यार रखणा; या इकी ने मिली की रेंगा कने दुज्जे जो बुरा समझणा: तुसां परमेस्वर कने धन दौलत दोनो दी सेबा नी करी सकदे।” 14 फरीसी जडे लालची थे, ऐ सारियां गल्लां सुणिकरी उदा मजाक उडाणा लगे। 15 यीशुऐ उना ने बोलया, “तुसां तां माणुऐ दे सामणे अपने आपे जो सही दसदे न: पर परमेस्वर तुहाडे मने जो जाणदा है, जडी चीज आदमियां दिया नजरा च बडी जरूरी है, सै परमेस्वरे दिया नजरा च बुरी है।” 16 जालू यूहन्ना बपतिस्मा देणेबाला आया, उसला पेहले मूसा दी व्यवस्था कने परमेस्वरे दा संदेश देणेबाले तुहाडे मार्गदर्शक थे, पर परमेस्वरे दे राज्य दा शुभसमाचार दा प्रचार सुणाया जादा है, कने हर कोई परमेस्वरे दे राज्य अंदर जाणे तांई उताबले न। 17 “परमेस्वरे दिया व्यवस्था दे इक बिन्दुऐ दे मिटी जाणे ला, अम्बर कने धरतिया दा खत्म होई जाणा असान है।” 18 उदाहरण तांई जडा कोई अपणिया घरे बालिया जो छडी करी दुजिया ने बियाह करदा है, सै ब्यभिचार करदा है, कने जडा कोई ऐदिया जनानिये ने

बियाह करदा है, सै भी ब्यभिचार करदा है। 19 यीशुऐ इक होर कहाणी सुणाई इक अमीर माणु था सै बडे मेगे कने मलमले दे कपडे पेहनदा था कने हर रोज शानदार खाणा खादां कने ठाठ बाठ ने रेंदा था। 20 कने लाजर नाऐ दा इक गरीब जिदे शरिर च फोडे थे उसयो लोक उस अमीर माणुऐ दे घरे बाहर छडी दिन्दे थे। 21 कने सै चांदा था, की अमीर माणुऐ दे खाणे बाद बचयो जूठे टुकडयां ने अपना पेट भरे, कने कुत्ते भी आई करी उदे जखमा जो चट्टे थे। 22 कने इयां होया की सै गरीब मरी गया, कने स्वर्गदूत लाजर जो पूर्वज अब्राहम बाल लेई गया। कने सै अमीर भी मरया कने दबी दिता, 23 कने पताल च पीडा ने तडफदे होऐ उनी उपर दिखया कने दूरे ला लाजर जो अब्राहमे दे बखे बैठया दिखया। (Hadēs g86) 24 कने उनी जोरे ने अब्राज लाईकरी बोलया, हे पिता अब्राहम, मिंजो पर दया करी के लाजरे जो मिंजो बाल भेजी दे, ताकि सै मिंजो अपणिया उंगलियां दे सिरे जो सेडी करी मेरिया जीभा जो ठंडा करे, क्योकि मैं इसा अग्गी ने तडपा दा है। 25 पर अब्राहमे बोलया, हे पुत्र याद कर, की तू अपणिया जिंदगियां च खरियां चिजा लेई बैठया है, कने तियां ही लाजर जो सारियां बुरियां चिजां पर इसयो हुण ऐथू शांति मिल्ला दी है, कने तू तडफा दा है। 26 कने इना सारियां गल्लां जो छडी करी साडे कने तुहाडे बिच इक बडी बडू खाई है ताकि जडा ऐथू ला उस पार जाणा चा सै ना जाई सके, कने ना कोई ओथु ला इस पार साडे बाल आई सके। 27 उनी बोलया, हे पिता जी, मैं तिजो ने बिनती करदा है, की तू लाजर जो मेरे पिता दे घरे भेज, 28 क्योकि मेरे पंज भाई न, मैं चांदा है की लाजर जाए कने मेरे भाइयां जो चेताबनी दे, इयां ना होऐ की सै भी इसा पीडा दिया भयानक जगा च ओन। 29 अब्राहमे उसला बोलया, उना बाल चेताबनी देणे तांई तां मूसा दी व्यवस्था कने परमेस्वरे दा संदेश देणेबाले न, उना जो इना जो सुणना चाईदा। 30 “उनी बोलया, नि, पिता अब्राहम; पर अगर कोई उना जो चेताबनी दे, तां उना अपने पापां दा पश्चाताप करणा है। 31 अब्राहमे उसयो बोलया, जद सै मूसा कने परमेस्वरे दा संदेश देणेबालयां दी नी मंदे न, तां अगर कोई मरयां चे जिन्दा होई जा तां उना उदी गल्लां दा भी भरोसा नी करणा।”

17 फिरी यीशुऐ अपने चेलयां बोलया, ऐ गल्ल ता पक्की है कि परिक्षां माणुऐ पर जरूर ओणियां न जडा उना जो पाप करणे दी बजा बणगा, पर हाय उसी माणुऐ पर, जिदिया बजा ने सै ओदियां न। 2 पर जडा कोई इना छोटयां चे कुसी इकी जो भी भरोसे ला भटकांदा है या उना दे पाप करणे दी बजा बणदा है, उदे तांई तां खरा होंदा, कि उदे गले च बडू घराटे दा पथर लटकाया जाए, कने डुगे समुद्रे च डोबया जाए। 3 “ध्यान रखा; अगर तेरा मसीह भाई गलत कम्म करे तां उसयो समजाआ, कने अगर सै पछांगा तां उसयो माफ करी दे।” 4 “अगर सै दिन भर च सत बरी तिजो ने गलत करे कने सतों बरी तेरे बाल आई करी बोले, की मैं पछतादा है, तां उसयो माफ करी दे।” 5 तालू प्रेरितां प्रभु यीशु ने बोलया, “साडे भरोसे जो होर जादा बढा कने मजबूत करा।” 6 प्रभुऐ बोलया, अगर तुहाडा भरोसा राईया दे दाणे बराबर भी होंदा, तां अगर तुसां इस तुते दे रखे जो बोलते की तू जडा ला उखडी करी समुद्रे च लगी जा, तां उनी तुहाडी मनी लेणी। 7 अगर तुहाडा

सेवक हल जोती करी, या भेड़ा चुगाई करी बापस घरे जो ओऐ, तां उसयो बोले, झट आ कने रोटी खाई ले? 8 ना, उनी तां इयां बोलणा, की मिंजो ताई रोटी बणा कने जालू दीकर मैं रोटी खां तालू दीकर मेरी सेबा करणे ताई तैयार रे इंदे बाद तू भी खाई लियां? 9 क्या तुसां अपने सेवके जो उस कम्मे जो करणे ताई धन्यवाद नी करगे जडा तुसां उसयो करणे ताई बोलया था? 10 “इयां ही जालू तुसां सै सब कुछ करी लिया हो जडा तुसां जो करणे ताई बोलया था, तां तुसां जो ऐ बोलणा चाईदा, असां निकम्मे सेवक न; की जडा सांझो करणा चाईदा था सेई असां कितया है।” 11 जालू यीशु कने उदे चले यरूशलेम शेहरे जाणे बाले रस्ते पर चलयो थे, सै सामरियां कने गलील प्रदेश ला होईकरी जा दे थे। 12 कने कुसकी गांऐ ला जांदे बेले उसयो दस कोढी मिल्ले। 13 कने उना दुरे ला ही खडोई करी, “जोरे ने बोलया, यीशु जी, मालिक जी, सांझो पर दया कर।” 14 यीशुऐ उना जो दिखीकरी बोलया, “यरूशलेम दे मंदिर च जाओ; कने अपने आपे जो याजकां जो दस्सा कि तुसां खरे होई गियो न” कने सै जांदे-जांदे ही ठीक होई गे। 15 तालू उना चे इकी ऐ दिखया की मैं ठीक होई गिया है, सै जोरे ने बोली करी परमेश्वरे दी बडाई करदा यीशुऐ बाल बापस आया; 16 कने यीशुऐ दे पैरां पर झुकी करी धन्यावाद करणा लग्गा; कने सै सामरी था। 17 इसा गल्ला पर यीशुऐ बोलया, क्या सै दसो जणे ठीक नी होऐ, तां सै होर नौ जणे कतां न? 18 “क्या इस गैर यहूदी जो छडी करी कोई होर नी निकलया, जडा परमेश्वरे दी बडाई करदा है?” 19 तालू यीशुऐ उसला बोलया, “उठी करी चली जा; क्योंकि तू भरोसा कितया है की तू ठीक होई गिया है।” 20 जालू फरीसियां उसयो पुछया, की परमेश्वरे दा राज्य कालू ओणा है? तां यीशुऐ उना जो जबाब दिता, “परमेश्वरे दा राज्य इयोदिया नी है, जिसयो तुसां दिखी सकदे न। 21 कने लोकां ऐ नी बोलणा, की दिखा, ऐथु है, या ओथु है। क्योंकि दिखा, परमेश्वरे दा राज्य तुहाडे बिच है।” 22 कने यीशुऐ चेलयां ने बोलया, सै दिन ओणे न, जिना च तुसां माणुऐ दे पुत्रे दे रोजां चे इकी रोजे जो दिखणा चाणा है, पर नी दिखी सकणा है। 23 लोकां तुसां ने बोलणा, दिखा मसीह ओथु है! या दिखा ऐथु है! पर तुसां चली मत जांदे कने पिच्छे ही मत होई जांदे। 24 क्योंकि जियां बिजली अम्बरे दे इकी छोरे ला दुए छोरे दीकर चमकदी है, तियां ही मैं माणुऐ दे पुत्रे भी अपने रोजे च सामणे ओणा है। 25 पर पेहले बडा जरूरी है, की सै बडे जादा दुख झेले, कने उसयो इसा पीढी दे लोक निच बोलन। 26 जियां साडे पूर्वज नूह दे रोजां च होया था, तियां ही माणुऐ दे पुत्रे दे रोजां च होणा है। 27 जिस रोजे दीकर नूह जहाजे पर नी चढया, उस दिने दीकर लोक खांदे पिंदे थे, कने उना च बियाह शादियां होंदिया थियां; तालू जल-प्रलय आई कने सब कुछ खत्म करी दिता। 28 कने तियां रिती ला ही साडे पूर्वज लूत दे रोजां च होया था जडा सदोम शेहरे च रे दा था, की लोक खांदे-पिंदे कने लेण देंण करदे, कने पेड लागंदे कने घर बणांदे थे; 29 पर जिस रोजे लूत सदोमे ला निकलया, उस रोजे अम्बरे ला अग्ग गन्धक बरसी कने सारे लोकां जो जडे शेहर च रेंदे थे खत्म करी दिता। 30 कने सै रोज भी इयोदिया होणा, जालू मैं माणुऐ दे पुत्रे इयां ही इकदम दोबारा बापिस ओणा है। 31 उस रोजे जडा छती पर होंगा, कने उदा समान घरे हो, तां सै उसयो लेणे ताई थले ना उतरे, कने

तियां ही जडा खेतेरे जो गिया हो सै बापस नी ओऐ। 32 साडे पूर्वज लूत दी घरे आली जो याद रखा, की उसा कने क्या होया था। 33 जडा कोई अपने प्राणा जो बचाणा चांहगा, उनी परमेश्वरे सोगी आत्मिक जिन्दगी जिणे दा मोका खोई देणा है। जडा कोई मेरे ताई अपनी जान गबांगा उसयो परमेश्वरे सोगी सदा ताई दी जिन्दगी मिलणी। 34 मैं तुसां ने बोलदा है, उसा राती दो माणु इकी मंझे पर होणे, पर इक लेई जाणा कने दुज्जे जो छडी देणा है। 35 “दो जनानिया सोगी चक्की पिर्वां दियां होणियां, इक लेई जाणी कने दुई छडी देणी। 36 (दो जणे खेतेरे च होणे न, इक लेई जाणा कने दूजा छडी देणा।)” 37 ऐ सुणीकरी उना उसला पुछया, हे प्रभु ऐ कुथु होणा है? उनी उना ने बोलया, हर कोई जाणदा है ऐ कुथु होणा है तियां सारे जाणदे न जिथू लाश है, ओथु इल्लां गिठियां होंदियां न।

18 फिरी यीशुऐ अपने चेलयां जो इंदे बारे बोलया की रोज प्राथना करणा कने कदी हिम्मत नी छडणी चाईदी, इस ताई उना ने ऐ कहाणी सुणाई:

2 “कुसकी शेहरे च इक न्यायधीश रेंदा था; सै ना परमेश्वरे ला डरदा था ना कुसी माणुऐ दी परवाह करदा था।” 3 कने उसी शेहरे च इक बिधवा भी रेंदी थी: जडी उदे बाल आई करी बोलदी थी, की मेरा न्याय करी के मिंजो दुशमणे ला बचाई ले। 4 कने बडे दिना दीकर तां मनया नी पर आखरी च मने च सोची करी बोलया, मैं ना परमेश्वरे ला डरदा, कने ना आदमियां दी परवाह करदा है; 5 तमी ऐ बिधवा मिंजो तंग करदी रेंदी है, इस ताई मैं इसा दा न्याय करणा है, कुथी इयां ना हो की बार-बार आई करी आखरी च मिंजो बुरी तरह थकाई दे। 6 प्रभु ने बोलया, सुणा, की इनी अधर्मी न्यायधीशे क्या बोलया है, उस बारे च ध्याने ने सोचा। 7 क्या परमेश्वर अपने चुणयो लोकां दा न्याय नी करणा, जडे रात-दिन उदे सामणे रोंदे न; परमेश्वरे उना दी मदद करणे च देर नी करणी है? 8 “मैं तुसां ने बोलदा है; उनी झट उना दा न्याय करणा; तमी जालू मैं, माणुऐ दे पुत्रे बापस धरती ओणा, तां मिंजो हेरानी होंदी है की क्या मिंजो धरतिया पर ऐसा माणु मिलगा जडा मिंजो पर भरोसा करदा हो।” 9 कने यीशुऐ उना लोकां ने जडे अपने बारे च सोचदे न, की असां धर्मी न, कने दुजयां जो निच बोलंदे थे, ऐ कहाणी सुणाई 10 “दो माणु मंदरे च प्राथना करणा गे; इक फरीसी था कने दूजा कर लेणे बाला था। 11 फरीसी खडोई करी अपने मने च इयां प्राथना करणा लग्गा, की हे परमेश्वर, मैं तेरा धन्यवाद करदा है, की मैं होरनी माणुऐ साई बुरा करणे बाला, अन्यायी कने व्यभिचारी नी है, कने ना ही इस कर लेणेबाले साई है। 12 मैं हफते च दो बरी बरत रखदा है; मैं अपणिया कमाईया दा दसमां हिसा भी तुसां जो दिन्दा है। 13 पर कर लेणेबाले दुर खडोई करी, स्वर्गे पासे दिखणा भी नी चाया, पर सै दुखे ने अपणिया छातिया पिटी-पिटी करी बोलणा लग्गा, हे परमेश्वर मैं पापी है, मिंजो पर दया कर, मिंजो माफ कर। 14 यीशुऐ बोलया मैं तुसां ने बोलदा है, की ऐ चुंगी लेणे वाला था ना की फरीसी माणु जडा परमेश्वरे सामणे धर्मी दसया; क्योंकि जडा कोई अपने आपे जो बडा महान बणागा, सै छोटा करी देणा है; कने जडा अपने आपे जो छोटा बणागा, उसयो आदर मान मिलणा।” 15 फिरी लोक अपने बचयां जो यीशुऐ बाल लोणा लग्गे, ताकि सै उना पर हथ रखे; कने चेलयां दिखीकरी उना जो डांटया। 16 यीशुऐ बचयां जो अपने

बाल सदीकरी बोलया, बचयां जो मना मत करा कने इना जो मेरे बाल ओणा दिया, क्योकि परमेस्वरे दा राज्य उना दा है जडा इना बचयां साई है। 17 मैं तुसां ने सच्च बोलदा है, परमेस्वरे अपने राज्य च सिर्फ उना लोकां जो ओणा देणा है जडे परमेस्वरे दा राज्य जो बचयां साई अपनांदा है। 18 कुनकी यहदी अधिकारिये उसला पुछया, “उत्तम गुरू जी, मैं क्या काम करां की परमेस्वर मिंजो हमेशा दी जिनंदगी दे?” (aiōnios g166) 19 यीशुऐ उसयो बोलया, तुसां मिंजो कजो उत्तम बोलदे न, उत्तम तां सिर्फ इक ही है, सै परमेस्वर है। 20 तू परमेस्वरे दे हुक्मा जो तां जाणदा है की: “व्यभिचार नी करणा, झूठी गबाई नी देंगी, अपने माता पिता दा आदर करणा।” 21 उनी बोलया, “मैं तां इना सबना हुक्मा जो तां बचपन ला मनदा आया है।” 22 ऐ सुणीकरी, यीशुऐ उसला बोलया, तिजो च अजे भी इक गल्ला दी कमी है, जा, कने जडा कुछ तेरा है उसयो बेची करी गरीबां जो देई दे, तां तिजो स्वर्ग दा धन मिलणा, इयां करणे बाद आ कने मेरा चेला बणिंया। 23 सै ऐ सुणीकरी बडा उदास होई गया, क्योकि सै बडा अमीर था। 24 यीशुऐ उसयो दिखीकरी बोलया, अमीरां दा परमेस्वरे दे राज्य च जाणा बडा मुशकिल है। 25 ऊंटे दा सुइया दे नाके चे निकलना असान है, पर अमीरां दा परमेस्वरे दे राज्य च जाणा बडा भरी मुशकिल है। 26 कने सुणने बालयां बोलया, “अगर ऐसा है तां कुण अपने पापां दी सजा मिलणे ला बची सकदा है?” 27 यीशुऐ जबाब दिता, “जडा माणुऐ ला नी होई सकदा है सै परमेस्वरे ला होई सकदा है।” 28 पतरसे यीशुऐ जो पुछया, दिख, असां तां घर-बार छडी करी तैरे पिच्छे चल्यो न। 29 यीशुऐ उना जो जबाब दिता, “मैं तुसां ने सच्च बोलदा है, जिनी भी परमेस्वरे दे राज्य ताई घर, या घरे बाली, या भाई, या माता पिता, या बाल बचयां जो छडी दितया हो। 30 कने इस बेले केई गुणा जादा मिलणा; पर परलोके च हमेशा दी जिनंदगी मिलणी।” (aiōn g165, aiōnios g166) 31 फिरी यीशुऐ बाहरां चेलयां जो एकांत च लेईजाई करी उना ने बोलया, दिखा, असां यरूशलेम शहरे जो जाणा है, कने जितणियां भी गल्लां मेरे, माणुऐ दे पुने ताई परमेस्वरे दा संदेश देणेबालयां लिखियां न सै सारियां पुरियां होणियां न। 32 “क्योकि सै होर जातियां दे हथे देई देणा है। कने उना मेरा मजाक उडाणा है, कने मेरी निंदा करी के मिंजो पर थुकणा, 33 कने मिंजो कोडे मारणे, कने मिंजो मारी देणा है, कने मैं तिजे दिने मैं मरयां चे जिंटे होई जाणा है।” 34 कने चेलयां इना गल्लां चे कोई भी गल्ल नी समझ आई: कने ऐ गल्ल उना च ही लक्की रेई, कने जडा बोलया था सै उना दिया समझा च नी आया। 35 जालू यीशु यरीहो शहरे दे बखे पुज्जा, तां इक अन्ना सडका कंडे बेईकरी भिख मंगा दा था। 36 कने भिडा दी चलने दी अबाज सुणीकरी पुछणा लग्गा, ऐ क्या होआ दा है? 37 उना उसयो दसया, “नासरत दा यीशु मसीह जा दा है।” 38 तालू उनी अबाज लाईकरी बोलया, “हे यीशु, राजा दाऊदे दे बंशज, मिंजो पर दया कर।” 39 जडे अगगे-अगगे चल्यो थे, सै उसयो डांटणा लग्गे की चुप रे: पर सै होर जोरे ने बकणा लग्गा, “हे राजा दाऊदे दी बंशज मिंजो पर दया कर।” 40 तालू यीशुऐ ऐ सुणया कने स्की करी बोलया, “उसयो ऐथू लोआ।” कने तालू सै बखे आया तां यीशुऐ उसयो पुछया, 41 “तू क्या चांदा है की मैं तैरे ताई करे?” अन्ने उसने बोलया, गुरू जी, ऐ की मिंजो मिलणा

लगी पोऐ। 42 यीशुऐ उसयो बोलया, “दिखणा लग, तैरे भरोसे जडा मिंजो पर है तिजो ठीक करी दिता है।” 43 कने सै झट मिलणा लग्गी पिया; कने परमेस्वरे दी बडाई करदा होया उदे पिच्छे चली पिया, कने सारे लोका ऐ दिखीकरी परमेस्वरे दी स्तुति किती।

19 यीशु यरीहो शहर ला होईकरी जा दा था। 2 कने दिखा, जक्कई नाऐ दा इक माणु था जडा चुंगी लेणेबालयां दा सरदार कने अमीर था। 3 सै यीशुऐ जो दिखणा चांदा था की सै कुण दिया है? पर भिडा दिया बजा ने सै दिखी नी सका दा था। क्योकि सै छोटे कदे दा माणु था। 4 तालू सै उसयो दिखणे ताई अगगे दोडी करी इक गूलर दे स्खे पर चढी गया, क्योकि यीशु उसी रस्ते ला जाणे बाला था। 5 जालू यीशु उसा जगा पर पुज्जा जिथू जक्कई था, तां यीशुऐ उपरे पासे दिखीकरी बोलया, हे जक्कई, झट उतरी आ; क्योकि अज मिंजो तैरे घरे रेंणा जरूरी है। 6 सै झट स्खे ला उतरया कने यीशुऐ जो खुशिया ने अपने घरे जो लेई गया, कने खुशिया सोगी उदा स्वागत किता। 7 ऐ दिखीकरी सारे लोक बुडबडाणा लग्गे, “की सै तां इक पापी माणुऐ दे घरे चली गया है।” 8 जक्कई खणे दे बक्ते खडोई करी यीशु ने बोलणा लग्गा, “प्रभु जी, दिख मिंजो बाल जडा कुछ है सै गरीबां जो दिन्दा है, कने अगर मैं लोकां ला चुंगी लेणे च बेईमानी कितियो है तां उसयो चार गुणा बापस करी दिन्दा है।” 9 तालू यीशुऐ उसला बोलया, अज इसी घरे दे लोकां बिच उद्धार आया है, क्योकि ऐ भी अब्राहमे दा बंशज है। 10 “क्योकि मैं, माणुऐ दा पुत्र गवाचयां जो तोपणा कने उना जो अनन्त सजा ला बचाणे ताई आया है।” 11 जालू लोक ऐ गल्लां सुंणा दे थे तां यीशुऐ उना जो इक कहाणी सुणाई, इस ताई की सै यरूशलेम शहरे दे नेडे था, कने लोकां जो लगया की परमेस्वरे दा राज्य बस हुण ओणे बाला है। 12 यीशुऐ बोलया, इक अमीर माणु दूर देशे जो चलया ताकि राजपद पाई करी बापस आई जा। 13 कने उनी अपने दस सेवकां जो दस मुहरां दितियां, कने उना ने बोलया, मेरे बापस ओणे दीकर लेण देण करनयो। 14 पर उदे शहरे बाले उसला बैर रखदे थे, उदे पिच्छे संदेश देणेबाले दूतां ने बोली भेजया, की असां नी चांदे न की ऐ सांझो पर राज करे। 15 जालू सै राजपद लेईकरी बापस आया, तां इयां होया की उनी अपने सेवकां जो जिना जो मुहरां दितियां थियां, अपने बाल सदया ताकि पता लग्गे की लेणे देणे ने उना क्या-क्या कमाया है। 16 तालू पेहले आई करी बोलया, हे मालिक तेरियां मुहरां ने मैं दस होर मुहरां कमाईया न। 17 उनी उसला बोलया, उत्तम सेवक, बडा खरा किता, तू बडे ही थोडे च भरोसे बाला निकलया हुणे ला तू दसां नगरां दा अधिकारी। 18 दुज्जे आई करी बोलया, हे मालिक तेरियां मुहरां ने मैं पंज होर मुहरां कमाईया न। 19 उनी उसला बोलया, जा तू भी पंजा नगरां दा अधिकारी। 20 कने तिजे आई करी बोलया, हे मालिक दिख, तेरी मोहर ऐ है, जिसा जो मैं गमछे च बनी करी रखया था। 21 क्योकि मैं तिजो ला डरदा था, क्योकि तू बडा सकत माणु है: जडा तू नी रखया होंदा उसयो तू चुकी लेंदा, कने जडा तू नी राया है, उसयो तू बडदा है। 22 उनी उसला बोलया, हे निकम्मे सेवक, मैं तेरियां ही गल्लां ने तिजो दोषी बणादा है: तू मिंजो जाणदा था की मैं सकत माणु है, जडा मैं नी रखदा है उसयो चुकी लेंदा है, कने जडा मैं नी राया उसयो बडी लेंदा

है? 23 तां तू मेरे पैसे बयाजे पर महाजना बाल कनी रखी दिते, इयां करदा तां मैं आई करी बयाजे समेत लेई लेंदा। 24 कने जडे लोक उदे बखे खडोतयो थे, मालिके उना ने बोलया, इसला मुहरां जो लेई लिया, कने जिसदे बाल दस मुहरां न उसयो देई दिया। 25 उना मालिके ने बोलया, हे मालिक, उस बाल दस मुहरां तां हेन। 26 मालिके उना जो बोलया, “जिना बाल समझणे दी इच्छा है जडा परमेश्वर सिखांदा है, उसयो परमेश्वरे होर समझ देणी, पर जडा समझणे दी इच्छा नी रखदा, की मैं क्या सिखांदां, तां थोडा जडा उसयो समझ आया से भी उसला लेई लेणा।” 27 “पर मेरे उना बैरियां जो जडे नी चांदे थे की मैं उना दा राजा बना, उना जो मेरे सामणे लेई ओआ कने मारी दिया।” 28 ऐ गल्लां बोली करी यीशु अपने चेलयां सोगी यरूशलेम शेहरे दे पासे उना दे अगो-अगो चलय। 29 कने सै जालू जैतून सखां दे पाहडे पर बैतफगे कने बैतनिय्याह गांऐ दे बखे पुज्जा, तां उनी अपने दों चेलयां जो ऐ बोली करी भेजया, 30 सामणे दे गां च जा, कने ओथु पुजदे ही तुहांजो इक गधिया दा बच्चा बन्नया मिलणा है, उदे उपर हिली कोई नी बैठया था, सै खुंडे च बन्नया होणा उसयो खोली करी लेई ओआ। 31 “कने अगर कोई तुहांजो ला पुछे, की कजो खोला दे न, तां ऐ बोली देणा, कि प्रभु जो इसदी जरूरत है।” 32 जडे चेले भेजयो थे, उना जाई करी सियुदा ही दिखया, जियां यीशुऐ बोलया था। 33 जालू सै गंधे दे बच्चे जो खोला दे थे, तां उदे मालिके उना ला पुछया, “इसयो कजो खोला दे न?” 34 उना बोलया, “प्रभु जो इसदी जरूरत है।” 35 सै उसयो यीशुऐ बाल लेई आये कने अपने कपडे उदे उपर पाई दिते कने यीशु उस पर बैठी गया। 36 जालू यीशु गंधे पर बेईकरी जा दा था, तां मतयां लोकां अपने कपडे रस्ते च बछाई दिते। 37 यरूशलेम शेहरे जांदे बेले जालू यीशु जैतून सखां दे पाहडे दिया उतराईया च पुज्जा, तां चेलयां दी सारी मंडली उना सारे अनोखे कम्मा दिया बजा ने जडे उना दिखयो थे, खुश होईकरी जेरे ने सारे परमेश्वरे दी स्तुति करणा लगे: 38 “धन्य हो सै राजा, जडा प्रभु दे नाऐ ने ओदा है। स्वर्ग च शांति कने अम्बरे च महिमा हो।” 39 तालू भिडा चे कितणे ही फरीसी उसयो बोलणा लगे, “गुरू जी, अपने चेलयां जो ऐ गल्लां बोलणे तांई डांट।” 40 यीशुऐ जबाब दित, “मैं तुसां ने बोलदा है, अगर ऐ लोक चुप रे, तां पथरां बोली पोंगा है।” 41 जालू यीशु यरूशलेम शेहरे बखे आया तां उस शेहरे जो दिखीकरी रोया। 42 कने बोलया, की तैरे तांई कितणा भला होंदा, कि तू, इस रोजे तू परमेश्वरे दिया शांतिया दियां गल्लां समझदा जडियां तिजो शान्ति दिन्दियां, पर हण सै तेरिया नजरा ला लुक्की गियां न। 43 “क्योंकि सै दिन तिजो पर ओणे न जालू तेरे दुशमणा हर तरफा ला शेहर पर हमला करणा है, कने चारो पासे ला तुहांजो दबाई देणा है। 44 तेरे दुशमणा पूरी तराह ने शेहरे जो खत्म करी देणा कने तेरे सारे लोकां जो मारी देणा, कने तिजो च पथरे पर पथर भी नी छडणा है; क्योंकि तू सै मोका नी पछेणया जालू परमेश्वर तिजो बचाणे तांई आया था।” 45 तालू सै मंदरे च जाई करी बेचणे बालयां जो बाहर कडणा लग्गा। 46 कने यीशुऐ उना जो बोलया, पबित्र शास्त्र च लिखया है की, मेरा घर प्रार्थना दा घर होणा, पर तुसां तां इसयो डाकुआं ला भरईयो गुफा सांई बनाई दितया है। 47 कने सै हर रोज मंदरे च उपदेश दिन्दा था: कने बड़े याजक कने यहूदी

व्यवस्था जो सिखाणे बालयां कने बड़े लोक उसयो मारणे दा मोका तोपदे रेंदे थे। 48 पर कोई तरिका नी तोपी सके; की ऐ कियां करणा, क्योंकि सारे लोक उसयो बड़े चाऐ ने सुणदे थे।

20 इक रोज ऐसा होया की जालू यीशु लोकां जो मंदरे च उपदेश दे दा था, कने शुभसमाचार सुणा दा था, तां बड़े याजक कने यहूदी व्यवस्था जो सिखाणे बाले कने यहूदी अगुवे यीशुऐ बाल आया। 2 कने बोलणा लगे, “सांझो दस, तू इना कम्मा जो कुस अधिकारे ने करदा है, कने सै कुण है, जीनी तिजो ऐ हक दितया है?” 3 यीशुऐ उना जो जबाब दित, “मैं भी तुसां ला इक सबाल पुछदा है, मिजो दसा तां मैं भी दसगा: 4 यहून्ना जो लोकां जो बपतिस्मा देणे तांई कुनी भेजया था? क्या सै परमेश्वरे भेजया था या माणुऐ? मिजो दसा।” 5 तालू सै अपु चे बोलणा लगे कि अगर असां ऐ बोलया कि, “परमेश्वर जडा स्वर्ग च है उनी भेजया है, तां यीशुऐ सांझो ला पुछणा, कि तुसां यहून्ना पर भरोसा कनी किता?” 6 “अगर असां बोलया, माणुऐ दिया तरफा ला, तां सारे लोकां सांझो पथर मारणे, क्योंकि सारे लोक सची जाणदे न की यहून्ना सच्चा परमेश्वरे दा संदेश देणेबाला था।” 7 उना जबाब दित, “असां नी जाणदे, की सै कुसदिया तरफा ला था।” 8 यीशुऐ उना ने बोलया, “तां मैं भी नी दसणा की मैं ऐ कम्म कुसदे हके ने करदा है।” 9 तालू यीशु लोकां जो इक कहाणी सुणाणा लग्गा, इकी माणुऐ अंगरा दा बाग लगाया, कने किसाना जो उदा ठेका देईकरी कने मतयां रोजां तांई परदेस जो चली गया। 10 फिरी जालू अंगूर पक्की गे, तां उनी अपना इक नोकरे जो ठेकेदारे बाल अपना अंगरे दे बागे दा हिस्सा लोंणे तांई भेजया। पर ठेकेदारां उसयो पकडया कने मारी कुटी करी बिना कुछ दितयो खाली हथ भेजी दित। 11 फिरी मालिके इक होर नोकर भेजया, कने उना उसयो भी मारी कुटी करी कने बेजती करिके खाली हथे भेजी दित। 12 फिरी मालिके तिजे नोकरे जो भेजया, कने उना उसयो भी मारी कुटी करी बाहर कडी दित। 13 “तालू अंगरा दे बागे दे मालिके बोलया, मैं क्या करे? मैं अपने प्यारे पुत्रे जो उना बाल भेजदा है शायद सै मेरे पुत्रे दा आदर करन।” 14 जालू ठेकेदारां उसयो दिखया तां अपु चे बिचार करणा लगे, ऐ तां बारिस है; ओआ, असां इसयो मारी दिन्दे, ताकि सब कुछ साडा होई जा। 15 कने उना उसयो अंगरा दे बागे ला बार कडी करी मारी दित: तां दाखे दे बागे दे मालिके उना सोगी क्या करणा? 16 “उनी आई करी उना ठेकेदारां दा नाश करणा, कने अंगरा दे बागे जो कुसकी होरसी जो देई देणा। ऐ सुणीकरी लोकां बोलया, हे परमेश्वर इयां मत करदा।” 17 उनी उना पासे दिखीकरी बोलया, फिरी पबित्र शास्त्र च ऐ क्या लिखया है: जिसी पथरे जो राजमिस्त्रियां बेकार बोलया था, सेई कुणे दा सिरा बनया। 18 “जडा कोई उस पथरे पर पोंगा उदे टोटे-टोटे होई जांणे, कने जिदे पर सै पोंगा, उनी सै पिई देणा।” 19 तालू ही बड़े याजक कने यहूदी व्यवस्था जो सिखाणे बाले यीशुऐ जो पकडना चांदे थे, क्योंकि सै समझी गे, की उनी सांझो पर ऐ कहाणी बोलियो है, पर सै लोकां ला डरदे थे। 20 सै यीशुऐ जो फसाणे दिया ताका च थे। कने उना गुप्तचर भेजे, की सै धर्मी दा भेस बनाई करी उदी कोई गल्ल पकडन, ताकि उसयो राज्यपाल कने अधिकारियां दे हथे देई दें। 21 उना उसला ऐ पुछया, गुरू जी, असां

जाणदे न की, तुसां हमेशा सच्च बोलदे न कने सिखांदा भी है, कने कुसदा भी पक्षपात नी करदा है; कने परमेस्वरे दा रस्ता सच्चाईया न देसदा है। 22 “इस ताई सांझो दस की महाराजा जो कर देणा ठीक है की नी?” 23 उनी उना दी चलाकी दिखीकरी उना ने बोलया, 24 इक दीनार मिंजो दस्सा। इस पर कुसदी छाप कने ना है? उना बोलया, “महाराजा दा।” 25 यीशुए उना ने बोलया, “तां जडा महाराजा दा है, उसयो महाराजा जो दिया कने जडा परमेस्वरे दा है उसयो परमेस्वरे जो दिया।” 26 सै लोका सामणे उसा गल्ला जो पकड़ी नी सके, कने उदे जबाबे ने हेरान होईकरी चुप होई गे। 27 फिरी सदूकी जडे बोलदे न, की मरयां दा जिन्दा होणा हेई नी, उना चे थोडयां यीशुए बाल आई करी पुछया। 28 गुरू जी, मूसा दिया व्यवस्था च साडे ताई ऐ लिखया है, “अगर कुसकी दा भाई अपणिया घरे वालिया दे होंदे बिना बच्चे दे मरी जा, तां उदा भाई उदिया घरे वालिया जो ब्याई ले, कने उदे ताई बंश पैदा करे।” 29 इक घरे च सत भाई थे, पेहला भाई बियाह करिके बिना ओलादी दे मरी गया। 30 तां दुऐ भाईए उसा ने ही बियाह करी लिया कने से भी बिना ओलादी मरी गया, 31 कने इयां ही तिजे भाई ने होया कने सतां भाईयां उसा ने बियाह किता कने सतो भाई बिना ओलादी मरी गे। 32 बादे च सै जनानी भी मरी गेई। 33 हुण, सांझो दस सतां भाईयां उसा जनानिया ने बियाह कितया था, जालू सै मरणे दे बाद फिरी जिन्दे होंगे, तां सै जनानी कुदी घरे बाली होणी? 34 यीशुए उना ने बोलया, इसी युगे दे लोकां च तां बियाह होंदे न। (aiōn g165) 35 पर जिना लोकां इस लाइक होणा है, की उसी युगे च कने मरयां चे जिन्दे होणा है, उना च बियाह नी होणे न। (aiōn g165) 36 फिरी उना मरणा भी नी; क्योंकि सै स्पर्द्धते सांई होणे, कने मरयां चे जिन्दा होणे ने सै परमेस्वरे दी ओलाद होणे न। 37 पर इसा गल्ला जो की मरयो होऐ भी जिन्दा होई जांदे न, मूसे झाड़ी बालिया कथा च सिखाया है, इस ताई “सै परमेस्वर जो अब्राहम दा परमेस्वर, कने इसहाक दा परमेस्वर, कने याकूब दा परमेस्वर बोलदा है।” 38 “परमेस्वर तां मुर्दयां दा नी पर जिंदया दा परमेस्वर है: क्योंकि उदे ताई सारे जिंदे ना।” 39 तालू ऐ सुणिकरी कितणयां ही व्यवस्था जो सिखाणे बालयां बोलया, “गुरू जी, तू ठीक बोलया है।” 40 कने उना जो होर कुछ पूछणे दी हिम्मत नी होई। 41 फिरी यीशुए उना ला पुछया, मसीह जो राजा दाऊदे दा बंशज कियां बोलदे न? 42 राजा दाऊदे अपु भजन संहिता दिया कताबां च बोलया है: “प्रभुऐ मेरे प्रभु ने बोलया, 43 तू मेरे सिंहासने दे सजे पासे बो, जालू दीकर मैं तेरे बैरियां जो तेरे पैरां हेठ करी दें।” 44 “राजा दाऊद तां उसयो प्रभु बोलदा है तां सै फिरी उदा बंशज कियां होया?” 45 जालू सारे लोक सुणा दे थे, तां यीशुए अपने चेलयां ने बोलया। 46 “व्यवस्था जो सिखाणे बालयां ला साबधान रिया, जडे लोकां जो दसणे ताई लम्बे कने मेगे कपडे पाणा पसंद करदे, कने उना जो बड़ा पसंद है की लोक उना जो बजारां च नमस्ते करन, कने यहदी जंज घरां च कने खांदे बेले खास-खास आसना पर बोणा पसंद करदे न। 47 सै धोखे कने वेईमानिया ने विधवां दे घरां दी चिजां पर कब्जा करी लेंदे न। कने लोकां जो दसणे ताई बड़ी देरा दीकर प्राथना करदे न, परमेस्वरे ला इना जो बड़ी बुरी सजा मिलणी है।”

21 फिरी यीशुए मंदरे दे भंडारे दे सामणे बेईकरी अमीरां जो अपणा-अपणा दान पेटिया च पांदे दिखया। 2 इतणे च इक गरीब बिधवा आई करी दो तांबे दे सिक्के पाये, जिना दी कीमत बड़ी घट थी। 3 तालू उनी बोलया, मैं तुसां ने सच्च बोलदा है, की इना गरीब बिधवा सबना ला बदीकरी इस भंडारे च पाया है। 4 क्योंकि सबना अपने भंडारे चे थोडा दिया दिता, पर इना गरीब बिधवा इसा बाल जितना भी था सारा ही पाई दिता है। 5 जालू कुछ चले मंदरे दे बारे च गल्लां करा दे थे, की सै कदे छेल पथरां ने कने चढाईयां चिजां ने सवारया है, तां यीशुए बोलया, 6 “सै दिन ओणे न, जिना चिंजा दी तुसां बड़ी तारीफ करा दे न, इक दिन ओणा है इना भवना दे इक भी पथरे पर पथर नी रेणा है, जडा डायी नी जाणा है।” 7 चेलयां यीशुए ला पुछया, “गुरू जी, सांझो दस ऐ सब कुछ कालू होणा है? कने जालू ऐ सब कुछ पूरा होणेबाला होंगा तां उदा क्या निशान होणा है?” 8 यीशुए बोलया, ध्यान रख्यो की तुहांजो कोई धोखा न दे। मते सारे लोकां मेरे नाए ने दाबा करिके ओणा है। उना बोलणा है, मैं मसीहा हूँ; कने ऐ भी बोलणा की टेम नेडे आई गया है: तुसां उना पिच्छे मत चली जांदे। 9 जालू तुसां लडाईयां, कने दंगया दियां गल्लां सुणे तां डरी मत जांदे; क्योंकि इना दा होणा जरूरी है, पर तालू संसारे दा खात्मा नी होणा है। 10 तालू यीशुए उना ने बोलया, क्योंकि जातियां ने जातियां ने कने राज्य ने राज्यां ने इक दुजे ने लडाईयां करणियां न। 11 कने हर कुथी हिलण होणे न कने अकाल पोणे, कने महामारियां पोंणिया न, कने अम्बरे च गल्लां कने बड़े-बड़े निशान प्रगट होणे न। 12 पर इना सबना गल्लां ला पेहले उना लोकां तुहांजो कैदी बणाना कने यहदी जंज घरे च देणा कने तुहांजो मार पोंणी, कने मेरिया बजा ने तुहांजो हाकिमा कने राजयां दे सामणे न्याय ताई पेश किते जाणे न, 13 पर ऐ तुहाडे ताई गबाई देणे दा मोका बणी जाणा है। 14 इस ताई सब अपने-अपने मने च पेहले ही ठाणी लिया की असां जबाब देणे दी चिंता नी करणी है। 15 क्योंकि मैं तुहांजो ऐसे बोल कने दिमाग दिगा, की तुहाडे सारे बिरोधियां सामणा कने टाल्ली नी सकणा है। 16 कने तुहाडे माता-पिता कने भाई कने रिश्तेदारां, कने दोस्तां भी तुहांजो पकडाणा है; ऐथू दीकर की तुहांजो चे कितणयां जो मरवाई देणा है। 17 कने मेरे नाए दिया बजा ला सबना लोकां तुहांजो ने बैर करणा है। 18 पर तुहाडे सेरे दा, इक बाल भी बांका नी होणा। 19 पर जडा जिंदगी दे अंत दीकर मिंजो पर भरोसा रखगा सै ही बचाया जाणा है। 20 जालू तुसां यरूशलेम जो सेना ने घिरया दिखन, तां समझी लिया की उदा बिनाश होणेबाला है। 21 यहदिया प्रदेशे दे लोकां जो जान बचाणे ताई पहाडा जो नसणा पोणा। कने जडे यरूशलेम दे अंदर हॉन सै बाहर नसी जान; कने जडे गां च हॉन सै उना च मत जांदे। 22 क्योंकि ऐ बदला लेणे दे ऐसे रोज होणे न, जिना च सारियां लिखियां होइयां गल्लां पुरियां होणियां न। 23 ऐ उना जनानिया ताई बड़ा बुरा बकत होणा जडियां लैरथियां न, कने उना जनानियां ताई जडियां नियाणे जो दूध पियादियां न। क्योंकि देशे च बड़ा बडा क्लेश कने इना लोकां पर बड़ी मुसीबत होणी है। 24 उना जो तलबारां ने मारयां जाणा है, कने केई देशां दे लोक गुलाम बणाई करी लेई जाणे न, कने जालू दीकर बाकी जातियां दा बकत पूरा नी होंगा, तालू दीकर यरूशलेम बाकी जातियां दा गुलाम रेणा है। 25 कने सुरज

कने चन्द्रमा कने तारयां च अनोखे निशान मिलणे न, कने धरतिया पर, देशे-देशे दे लोकां जो परेशानी होणी है; क्योंकि उना उफणदे समुद्रे दियां लेहरां ने घबराई जाणा है। 26 कने डरे दिया बजा ने कने दुनिया च ओणे बालियां घटना दी राह दिखदे-दिखदे लोकां दीया जानी च जान नी रेणी हे क्योंकि अम्बरे दियां शक्तिन्हीं हिलाईयां जाणियां न। 27 तालू उना मिजों माणुए दे पुत्रे जो सामर्थ्य कने बडी महिमा दे सोगी बदले पर ओदे दिखणा है। 28 “जालू ऐ गल्लां होणा लगन, तां सीधे होईकरी अपने सिरे जो उपरे उठाणा; क्योंकि तुहाडा छुटकारा नेडे होणा।” 29 यीशुए उना जो इक कहाणी सुनाई, अंजिर कने सारे स्खां जो दिखा। 30 जियां ही उना दियां कुम्बलियां निकलदियां न, तां तुहांजो ऐ दिखीकरी पता लग्गी जांदा है, की गर्मियां ओणे बालियां न। 31 इयां ही जालू तुसां ऐ गल्लां होंदे दिखन, तां समझी लिया की परमेस्वरे दा राज्य नेडे है। 32 “मैं तुसां ने सच्च बोलदा है, कि जालू दीकर ऐ सारियां गल्लां पुरियां नी होई जांदियां न, तालू दीकर इसा पीढिया दा अंत नी होणा है।” 33 “अम्बर कने धरती खत्म होई जाणे, पर मेरियां बोलियां गल्लां कदी नी टलनिया न, सै हमेशा रेणियां न।” 34 इस ताई साबधान रिया, ऐसा ना हो की तुहाडे मन नशे च संसारे दियां मोहमाया च कने इसा जिन्दगिया दिया चिंता च सुस्त होई जान, कने सै दिन तुहांजो पर फंदे साई इकदम आई पोए। 35 क्योंकि उनी सारिया धरतिया पर रेणेबालयां पर इयां ही आई पोणा है। 36 “इस ताई जागदे रिया कने हर बेले प्राथना करदे रिया ताकि तुसां ओणे बालियां परेशानियां ला बचणे कने मिजों माणुए दे पुत्रे दे सामणे खडोणे लाइक बणन।” 37 कने सै दिने मंदरे च उपदेश करदा था; कने राती जैतून स्खां दे पाहडे पर जाई करी रेंदा था। 38 कने ब्यागा उसयो सुणने ताई मंदरे च उदे बाल ओदे थे।

22 अखमीरी रोटिया दा त्योहारे जिसयो फसह बोलदे न, नेडे ही था। 2 कने बड़े याजक कने व्यवस्था जो सिखाणे बाले इसा गल्ला दिया तोपा च थे की, उसयो कियां मारन, पर सै लोकां ला डरदे थे। 3 कने शैतान यहदा च बडी गिया, इसयो इस्करियोती भी बोलदे न कने सै बाहरां चेलयां चे इक था। 4 उनी जाई करी बड़े याजकां कने सरदारों ने गलबात किती, की उसयो कियां उना दे हथे पकड़ा। 5 सै खुश होए, कने उसयो पैसे देणे दा बचन दिता। 6 उनी मन्नी लिया, कने मोका तोपणा लग्गा, की बिना बुरा कितयो यीशुए उना दे हथे पकड़ाई दे। 7 तालू अखमीरी रोटिया दे त्योहारे दा दिन आया, जिदे च फसह दे मेमने दी बलि देणा जरूरी थी। 8 कने यीशुए पतरस कने यहन्ना जो ऐ बोली करी भेजया, “जाई करी साडे खाणे ताई फसह दा खाणा तैयार करा।” 9 उनी यीशुए पुछया, “तू कुथु चांदा है, की असां फसह दा खाणा तैयार करन?” 10 उनी अपने दो चेलयां जो ऐ बोली करी भेजया, की यरूशलेमे शेहरे जो जा, कने ओथु तुहांजो इक माणु घडे चुकी करी चलया मिलणा, उदे पिच्छे चली जानयो। 11 कने सै जिस घरे जो जांगा, उस घरे दे मालिके जो बोलयो: की गुरू जी ने पुछया है, की मेरा कने मेरे चेलयां दा फसह दा खाणा खाने बाला कमरा कुथु है? 12 “उनी तुहांजो इक उपरे आला सजया सजाया कने तैयार कितया बडा कमरा दसी देणा है, कने तुसां ओथु साडे ताई तैयारी करा।” 13 उना जाई करी, जियां यीशुए उना ने बोलया था,

सियुदा ही था, कने उना उसा जगा फसह दा खाणा तैयार किता। 14 जालू बकत होया, तां यीशु बारह प्रेरितां सोगी रोटी खाणां बैठा। 15 कने यीशुए उना ने बोलया, “की मिजो बडी इच्छा थी, की दुख भोगणे कने मरणे ला पेहले फसह दे त्योहारे दा खाणा तुहाडे सोगी खां। 16 क्योंकि मैं तुसां ने बोलदा है, की जालू दीकर सै परमेस्वरे दे राज्य च पूरा नी होगा तालू दीकर मैं फसह दे त्योहारे दा खाणा दुबारा नी खांगा।” 17 तालू उनी अंगूर दे रस दा कटोरा लेईकरी परमेस्वरे दा धन्यावाद किता कने बोलया, “इसयो लिया कने अपु चे बंडी करी पी लिया। 18 क्योंकि मैं तुसां ने बोलदा है, की जालू दीकर परमेस्वरे दा राज्य नी ओगा तालू दीकर मैं अंगूर दा रस कदी नी पिगा।” 19 फिरी उनी रोटी लेई, कने धन्यावाद करिके तोड़ी, कने उना जो ऐ बोली करी दिती, ऐ मेरा शरीर है, जडी तुहाडे ताई दितया जांदा है: मिजो याद करणे ताई ऐई करा-करा। 20 इयां ही उनी खाणां खाणे बाद कटोरा भी ऐ बोलदे दिता, ऐ अंगूर दे रसे दा कटोरा मेरे उस खुने च नोई बाचा है जडा तुहाडे ताई भाया जाणा है। 21 पर दिखा, मिजो पकड़वाणे बाले दा हथ मेरे सोगी मेरिया थालिया च है। 22 “क्योंकि मिजो, माणुए दे पुत्रे दा जियां उदे ताई तय है तियां करदा है, पर हाय उस माणुए पर, जिसदिया बजा ने पकड़ाया जांदा है।” 23 तालू सै अपु चे बोलणा लग्गे की, “असां चे कुण है, जडा ऐ कम्म करगा?” 24 उना चे ऐ भी बेहस होई की, सांझो चे कुण बडा समझया जांदा है? 25 यीशुए उना ने बोलया, बाकी जातियां दे राजे उना पर प्रभुता करदे न; जडे उना पर हक रखदे न, उना जो उपकारक बोलदे न। 26 पर तुसां ऐ दे मत बणदे; नितां जडा तुसां चे बडा है, सै छोट्टे दे बराबर कने जडा सबते बड़ा है सै सेबक दे बराबर बणे। 27 क्योंकि बडा कुण है; सै जडा रोटी खाणां बैठया या सै जडा सेबा करदा है? क्या सै नी जडा रोटिया खाणां बैठया है? पर मैं तुहाडे बिच सेवके साई है। 28 पर तुसां ही न, जडे मेरियां परिक्षां च लगातार मेरे सोगी रे; 29 कने जियां मेरे पिता मिजो ताई इक राज्य दितया है, तियां ही मैं भी तुहाडे ताई राज्य दिन्दा है। 30 ताकि तुसां मेरे राज्य च मेरिया मेजा पर खा पिया; कने सिंहसनां पर बेईकरी इस्राएले देशे दे बाहरां गोत्रों दे लोकां दा न्याय करा। 31 “शमौन, हे शमौन, दिख, शैताने तुसां लोकां जो परखणे ताई परमेस्वर ला आजा मंगी लियो है, कि भलाई जो बुराई ला बख करणा जियां किसान कणका ला भुए जो बख करदा है। 32 पर मैं तेरे ताई परमेस्वरे ला प्राथना किती है, की तेरा भरोसा मिजों ला नी जा: कने जालू तू पञ्चाताप करें, तां अपने भाईयां जो भी मिजों पर भरोसा करणे ताई मजबूत करें।” 33 पतरसे यीशुए बोलया, “प्रभु जी, मैं तेरे सोगी जेला जाणे कने मरणे जो भी तैयार है।” 34 पर यीशुए बोलया, “हे पतरस मैं तिजो ने बोलदा है, की अज सुर्गे तालू दीकर बांग नी देणी जालू दीकर तू तिन्न बरी मिजो पछेणने ला मना करी बोणा है।” 35 कने यीशुए उना ने बोलया, “जालू मैं तुहांजो बटुए, कने झोली, कने जुते बिना श्भसमाचार प्रचार करणे भेजया था, तां क्या तुहांजो कुसा भी चिजा दी कमी होई थी?” उना बोलया, “नी होई कुसा भी चिजा दी।” 36 उनी उना ने बोलया, “पर हुण लोक साडे खिलाफ न हुण जिसदे बाल बटुआ है सै उसयो लेई ले, कने तियां ही झोली भी, कने जिसदे बाल तलबार नी है सै बाहरे दे कपडे बेची करी खरीदी ले।” 37 क्योंकि मैं तुसां

ने बोलदा है, की ऐ जडा पबित्र शास्त्र च लिखया है सै पूरा हो की, “सै अपराधियां सांई मनया गया है, उदा पूरा होणा जरूरी है: क्योंकि मेरे बारे जडियां गल्लां लिखियां न सै पुरियां होंगे बालियां न।” 38 चेलयां बोलया, “प्रभु जी, दिख, ऐथू दो तलबारां न।” यीशुऐ उना ने बोलया, “बतेरियां न।” 39 तालू सै बाहर निकली करी रोजे सांई जैतून स्त्रां दे पाहडे पर गया, कने चेले उदे पिच्छे गे। 40 उसा जगा पर पुज्जी करी यीशुऐ उना ने बोलया, “प्राथना करा, की तुसां दी परख ना होऐ।” 41 फिरी यीशु थोडा अगगे गया, कने गोडे भार बेईकरी प्राथना करणा लग्गा, 42 “पिता जी अगर तू चा तां इस कटोरे जो बखे ला हटाई ले, पर तमी मेरी नी पर तेरी इच्छा पुरी हो।” 43 तालू स्वर्गे दे इक स्वर्गदूते ओथु प्रगट होया जडा उसयो सामर्थ्य दिन्दा था। 44 कने सै बडा परेशान कने व्याकुल होईकरी कने दुखे ने प्राथना करणा लग्गा; कने उदा पसीना मना की खूने दियां बडियां-बडिया बून्दा सांई धरतिया पर पोआ था। 45 तालू सै प्राथना ला उठया कने अपने चेलयां बखे आई करी उना जो उदासिया दे मारयो सुतया दिखया। 46 कने उना ने बोलया, “कजो सोआ दे न? उठा, प्राथना करा, की तुहाड़ी परख ना होऐ।” 47 जालू यीशु ऐ बोला दा ही था, की दिखा मते सारे लोक आए, यहदा जडा बाहरां चेलयां चे इक था सै अगगे-अगगे ओआ दा था, सै यीशुऐ दे बखे आया, ताकि उदा चूमा लेई सके। 48 यीशुऐ उसयो बोलया, “हे यहदा, क्या तू चूमा लेईकरी मिजो, माणुऐ दे पुत्रे जो पकडवा दा है?” 49 उदे साथियां जालू दिखया की क्या होणे वाला है, तां बोलया, “प्रभु जी, क्या असां तलबार चलान?” 50 कने चेलयां चे इकी महायाजके दे नोकरे पर तलबार चलाई करी उदा सजा कन उडाई दिता। 51 इस पर यीशुऐ बोलया, “हूण बस करा।” कने उदा कन छुई करी उसयो ठीक किता। 52 तालू यीशुऐ बड़े याजकां कने मंदरे दे रखबालयां दे अगुवां कने यहदी अगुवां जो बोलया, तुसां क्या तलवारां कने डांगा लेईकरी मिजो डाकुआं सांई पकडना आयो न। 53 “मै जालू हर रोज मंदरे च बेईकरी उपदेश दिन्दा था, तालू तां तुसां मिजो नी पकडया; पर ऐ तुहाडा बकत है, कने नेहरे दा हक है।” 54 फिरी सै उसयो पकडी करी लेई चले, कने महायाजक दे घरे जो लेई आये कने पतरस दूरे-दूरे ला ही उना दे पिच्छे चलया था। 55 कने जालू सै अंगणे च अगग वाल्ली करी गिठे बैठे, तां पतरस भी उना दे बिच बेई गया। 56 कने इक दासिया उसयो अगगी दी लौई च बैठया दिखीकरी कने उदे पासे दिखीकरी बोलणा लग्गी, “ऐ भी तां यीशुऐ सोगी था।” 57 पर पतरसे ऐ बोली करी मना किता, की मै इसयो नी जाणदा। 58 थोड़ी देरा बाद फिरी कुनकी होरनी उसयो दिखीकरी बोलया, “तू भी तां उना चे है।” पतरसे बोलया, “सै माणु मै नी है।” 59 कोई इक घंटे बाद इक होर माणु बोलणा लग्गा, “पक्का ऐ भी उना सोगी ही था; क्योंकि ऐ भी गलीली है।” 60 पतरसे बोलया, “मिजो नी पता की ऐ क्या बोला दा है?” पतरसे दे इयां बोलदे ही, मुर्गे झट बांग देई दिती। 61 तालू प्रभु यीशुऐ मुडी करी पतरसे पासे दिखया, कने पतरसे जो सै गल्ल याद आई जडी उनी बोलियो थी, “अज मुर्गे जो बांग देंगे ला पेहले, तू तिन्न बरी मिजो मना करणा है।” 62 कने पतरस बाहर निकली करी बडा भरी रोणा लग्गा। 63 जिना माणुआं यीशुऐ जो पकडया था, सै उदा मजाक उडाई करी उसयो कुटणा

लग्गे; 64 कने उदियां हखी पर पट्टी बन्नी करी पुछया, “अगर तू परमेश्वरे दा संदेश देणेबाला है! तां सांझो दस कुनी तिजो मारया।” 65 कने उना होर भी बुरियां गल्लां उदे बारे च बोलियां। 66 जालू ब्याग होई तां यहदी अगुवां कने बड़े याजक कने व्यवस्था जो सिखाणे बाले गिठे होऐ, कने उसयो अपणिया महासभा च आंणी करी पुछया, 67 अगर तू मसीह है, तां सांझो ने बोली दे। यीशुऐ उना ने बोलया, “अगर मै तुहांजो ने बोले तां तुसां मनणा नी। 68 अगर मै कोई सबाल पूछां, तां तुसां जबाब नी देणा। 69 पर हुणे ला मै, माणुऐ दे पुत्रे सबते शक्तिशाली परमेश्वरे दे सजे पासे बेई रेणा।” 70 इस पर सारयां बोलया, “तां तू क्या परमेश्वरे दा पुत्र है?” यीशुऐ उना ने बोलया, “तुसां अपु ही बोलदे न, क्योंकि मै है।” 71 तालू उना बोलया, “हुण सांझो गबाई दी क्या जरूरत है क्योंकि असां अपु ही इदे मुऐ ला सुणी लिया है।”

23 तालू सारी सभा उठी करी उसयो पिलातुस बाल लेई गई। 2 कने सै ऐ बोली करी उस पर दोष लगाणा लग्गे, “असां इसयो साडे लोकां जो बेहकांदे कने महाराजा जो कर देंगे ला मना करदे, कने अपने आपे जो मसीह, कने राजा बोलदे सुणया है।” 3 पिलातुसे उसला पुछया, “क्या तू यहदियां दा राजा है?” उनी उसयो जबाब दिता, “तू अपु ही बोला दा है।” 4 तालू पिलातुसे बड़े याजकां कने लोकां ने बोलया, “मिजो इस माणुऐ च कोई दोष नी मिलदा है।” 5 पर सै होर भी दबाब पाई करी जोरे ने बोलणा लग्गे, “यहदिया प्रदेशे दे सारे लोकां च इदिया शिक्षा दिया बजा ने दंगे हो दे न, कने गलील प्रदेश च भी इयां ही किता कने हुण ऐथू आई गया है।” 6 ऐ सुणीकरी पिलातुसे पुछया, “क्या ऐ माणु गलील प्रदेश दा रेणे बाला है?” 7 कने ऐ जाणी करी की सै उस प्रदेश दा है जिथू राजा हेरोदेस राज करदा है, तां उसयो हेरोदेसे बाल भेजी दिता, क्योंकि उना दिना राजा हेरोदेस भी यरूशलेम च था। 8 हेरोदेस यीशुऐ जो दिखीकरी बडा खुश होया, क्योंकि सै उसयो बडे रोजां ला दिखणा चांदा था: उनी उदे बारे च सुणया था, कने हेरोदेस यीशुऐ ला कुछ चमत्कार दिखणे दी आस रखदा था। 9 सै उसला मतियां गल्लां पुछदा रिया, पर उनी उना दा कोई भी जबाब नी दिता। 10 कने बड़े याजक कने व्यवस्था जो सिखाणे बाले खडोई करी पुरे जोर शोर लाईकरी उस पर दोष लांदे रे। 11 तालू राजा हेरोदेसे अपने सिपाईयां सोगी उदी बेजती करिके उदा मजाक उडाया, कने चटकिले कपडे पेहनाई करी उसयो पिलातुस बाल बापस भेजी दिता। 12 उस बकते दीकर पिलातुस कने हेरोदेस इकी दुऐ दे दुशमण थे, पर दोनो उसी रोजे मित्र बणी गे। 13 पिलातुसे बड़े याजकां कने सरदारां कने लोकां जो सदीकरी बोलया, 14 तुसां इस माणुऐ जो मेरे बाल लेई आये कने बोलया की दंगा करणे तांई लोकां जो भटकांदा था। पर दिखा, मै तुहाडे सामणे इसदी जाँच किती, पर जिना गल्लां दा तुसां इदे पर दोष लगा दे न, मिजो उना गल्लां दे बारे च उदे च कोई भी दोष नी मिल्ला है; 15 कने ना ही हेरोदेसे उस पर कोई दोष लाया, क्योंकि उनी इसयो साडे बाल बापस भेजी दितया है क्योंकि इनी माणुऐ ऐसा कुछ नी कितया की इसयो मौत दी सजा मिल्ले। 16 “इस तांई मै इसयो कोडे मरवाई करी छडी देणा है।” 17 पिलातुस फरसह दे त्योहारे दे बेले उना दे इकी केदिये जो छडी दिन्दा था। 18 तालू सारे मिली करी बोलणा लग्गे, इसयो मौत दी सजा दिया, कने साडे तांई

बरअब्बा जो छडी दे। 19 सै कुसकी दंगे दिया बजा ने जडा शेहरे च होया था, कने हत्या दिया बजा ने जेला च पाया था। 20 पर पिलातुसे यीशुए जो छडणे दिया इच्छा ने लोका जो फिरी समझाया। 21 पर सै ज़ोरे-ज़ोरे ने बोलणा लग्गे, “इसयो सूली पर चढाई दिया! इसयो सूली पर चढाई दिया!” 22 उनी तिजी बार फिरी बोलया, “कजो उनी क्या बुरा कितया है? पर मिंजो इदे च मौत दी सजा देणे जोगी कोई गल्ल नी मिल्ला दी है, मैं इसयो मारी कुट्टी करी छडी देणा है।” 23 पर सै चिलाई-चिलाई करी पिच्छे ही पेई गे, की इसयो सूली पर चढाई दिया, कने सै होर ज़ोरे-ज़ोरे ने बोलणा लग्गे। 24 पिलातुसे हुकम दिता, की इना दिया बिनतिया दे अनुसार करा। 25 कने उनी उस माणुए जो जडा दंगे कने हत्या दिया बजा ने जेला च था, जिसयो सै मंगदे थे, छडी दिता; कने यीशुए जो उना दिया इच्छा अनुसार उना जो देई दिता। 26 जालू सिपाई यीशुए जो लेई चलयो थे, तां उना शमौन नापे दे इक कुरेनी जो जडा गांए ला ओआ दा था, उसयो पकड़ी करी उस पर सूली लदी दिती ताकि उसयो यीशुए दे पिच्छे-पिच्छे लेई चले। 27 कने लोका दी बडी बडी भीड़ उना दे पिच्छे चली पेई, कने उना चे जनानिया भी मतियां थियां, जडियां उदे तांई छतिया पिटी करी रोआ दियां थियां। 28 यीशुए उना पासे मुडी करी बोलया, “हे यरूशलेम शेहरे दियां कुडियो, मेरे तांई मत रोआ; पर अपने तांई कने अपने बचयां तांई रोआ।” 29 क्योंकि दिखा, सै दिन दुख भरे दिन ओणे न, जिना च लोकां बोलणा है, “धन्य न सै जनानियां जिना दे कदी बच्चे नी थे, कने जिना कदी बच्चे जम्मे नी, जिना ना कदी उना जो दूध पियाया।” 30 उस बेले, उना लोकां पहाडा ने बोलणा लगणा है, की सांझो पर पेई जा, कने पहाडियां ने की सांझो ढकी लिया। 31 “क्योंकि अगर सै मिंजो इस तरीके ने मारदे न जडा हरे रूखे सांई है, तां जडे लोक सुके रूखे सांई न उना ने क्या कुछ नी करणा।” 32 सै होर दो माणुआं जो यीशुए सोगी मारणे तांई लेई चले जिना बुरे कम्म कितयो थे। 33 जालू सै उसा जगा पर पुज्जे जिसा जो खोपडी बोलदे न, तां उना ओथु उसयो कने उना दो बुरे कम्म करणे बालयां जो भी इकी जो सजे पासे कने दुज्जे जो खबे पासे सूली पर लटकाया। 34 तालू यीशुए बोलया, “हे पिता, इना जो माफ कर, क्योंकि ऐ जाणदे नी न की ऐ क्या करा दे न?” कने उना पर्चियां पाई करी उदे कपडे बंडी ले। 35 लोक खडोई करी दिखा दे थे, कने सरदार भी मजाक करिके बोलदे थे, इनी होरां जो बचाया, अगर ऐ परमेख्वरे दा मसीह है, कने उदा चुणयां होया है, तां अपने आपे जो बचाई ले। 36 सिपाई भी बखे आई करी यीशुए जो पिणे तांई सिरका देई करी उदा मजाक करिके बोलदे थे। 37 “अगर तू यहूदियां दा राजा है, तां अपने आपे जो बचा।” 38 कने उदे उपर इक दोष पत्र भी लगाया था: “ऐ यहूदियां दा राजा है।” 39 जडे बुरे कम्म करणे बाले यीशुए सोगी लटकाये थे, उना चे इकी निंदा करिके बोलया, “क्या तू मसीह नी है? तां फिरी अपने आपे जो कने सांझो बचा।” 40 इसा गल्लां पर दुज्जे उसयो डांटया, “क्या तू परमेख्वरे ला भी नी डरदा है?” तिजो भी तां से ही सजा मिलियो है, 41 “कने सांझो तां न्याय दे अनुसार सजा मिलियो है, क्योंकि सांझो तां अपने कम्मा दा ठीक फल मिला दा है; पर इनी तां कोई गलत कम्म नी कितया है।” 42 तालू उनी बोलया, “यीशु जी,

जालू तू अपने राज्य च राजा होई करी ओगा, तां मिंजो याद रखयां।” 43 यीशुए उसला बोलया, “मैं तिजो ने सचच बोलदा है की अज ही तू मेरे सोगी स्वर्गलोक च होणा है।” 44 कने लगभग दोपेहर ला लेई करी तिन्न बजे दीकर सारे देशे च नेहेरा रिया, 45 कने सूरजे दी लोओ चली गई, कने मंदरे दा मोटा परदा बिचे ला फटी करी दो टुकडे होई गया, 46 कने यीशुए ज़ोरे ने बोलया, “पिता, मैं अपनी आत्मा तेरे हाथां च दिन्दा हे।” ऐ बोली करी अपने प्राण छडी दिते। 47 सुबेदारे जडा कुछ होया था दिखी करी परमेख्वरे दी बडाई किती, कने बोलया, पका ऐ कोई धर्मी माणु था। 48 भीड़ जडी ऐ दिखणे तांई गिठी होईयो थी, इसा घटना जो दिखी करी छतियां पिटदे होए अपने घरां जो बापस चली गई। 49 कने यीशुए दे सारे जाणने पछेणने बाले मित्र, कने जडियां जनानिया गलील प्रदेश ला उदे सोगी आईयां थियां, दूर खडोई करी जडा कुछ होया था सारा कुछ दिखा दियां थियां। 50 कने ओथु यूसुफ नापे दा इक माणु था सै महासभा दा सदस्य था कने सज्जन कने धर्मी था। 51 कने सै यहूदी अगवां दे बिचारां कने उना दे कम्मा ला खुश नी था; कने सै यहूदियां दे शेहर अरिमतिया शेहरे दा रेहणे बाला कने परमेख्वरे दे राज्य दी नियाल्ल रखणे बाला था। 52 उनी पिलातुस दे बाल जाई करी यीशुए दी लाश मंगी, 53 कने लाशा जो सूली ला उतारी करी मलमले दिया चादरा च लपेटया, कने उसयो इक कबरा च रखया, जडी पथरे च खणियो थी; कने उसा च कदी भी कोई नी रखया था। 54 सै रोज शुकवार था, जडा तैयारी वाला दिन था कने सब्ते दा रोज शुरू होणे बाला था। 55 कने उना जनानियां जडियां उदे सोगी गलील प्रदेशे ला आईयां थियां, पिच्छे-पिच्छे जाई करी कबर दिखी कने ऐ भी की उदी लाश कियां रखी है। 56 कने अपने घरां जो बापस आई करी उना सुगंध बालियां चिजां कने इत्र यीशुए दिया लाशा पर मलणे तांई तैयार किता; कने सब्ते दे रोजे उना मूसा दिया व्यवस्था दे अनुसार अराम किता।

24 पर हबते दे पेहले रोजे सै बडी ब्यागा ही उना सुगंधित चिजां जो जडियां उना तैयार कितियां थियां, लेई करी कबरां पर आईयां। 2 कने उना दिखया की कबरा दे दरबाजे ला पथर पेहले ला ही हटया होया है, 3 कने सै अंदर गियां कने दिखया पर यीशुए दी लाश ओथु नी थी। 4 जालू सै इसा गल्ला ने हेरान थियां तां दिखा, दो माणु चिट्टे चमकीले कपडे पायो उना बखे खडोतयो थे। 5 जालू सै डरी गियां, कने उना मु धरतिया पासे हेठ करी दिते; तां उना स्वर्गदूतां जनानिया ने बोलया, “तुसां जिन्दया जो मरयां चे कजो तोपदे न?” 6 “सै ऐथू नी है, पर जिन्दा होई गया है। याद कर उनी गलील प्रदेशे च रेंदे बेले तुसां ने बोलया था, 7 की जरूरी है, की मैं, माणुए दा पुत्र पापियां दे हथे पकडया जा, कने सूली पर चडाया जाऐ, कने तिजे दिने मरयां चे जिन्दा होई जाऐ।” 8 तालू यीशुए दियां गल्लां उना जो याद आईयां। 9 कने कबरा ला बापस आई करी उना गयारां चेलयां जो, कने बाकियां सबना जो, ऐ सारियां गल्लां सुणाई दीतियां। 10 जिना प्रेरितां ऐ गल्लां बोलियां, सै मरियम मगदलीनी कने योअन्ना कने याकूबे दी मां मरियम कने उना सोगी दियां सारियां जनानिया भी थियां। 11 पर उना दियां गल्लां उना जो कहणियां सांई लगियां, कने चेलयां उना दा भरोसा नी किता।

12 तालू पतरस उठी करी दोड़ी करी यीशुए दिया कबरा पर गया, कने निंठे होईकरी अंदर दिखया ओथु उनी सिर्फ बस कपड़े पियो दिखे, कने जड़ा होया उसला हेरान होईकरी बापस घरे चली गया। 13 उसी रोजे यीशु दे दो चले इम्माऊस नाए दे इक गांए जो चलयो थे, जड़ा यरूशलेम शेहरे ला कोई गयारा किलो मीटर दूर था। 14 कने सै इना सारियां गल्लां पर अपु चे गल्ल बात करा दे थे, जड़ियां होईयां थियां। 15 कने सै जालू अपु चे गल्ल बात कने पूछताछ करा दे थे, तां यीशु अपु आई करी उना सोगी चलणा लगा। 16 पर परमेश्वरे उना जो यीशुए जो पछेणे लो रोकी रखया था, ताकि सै उसयो पछेणी नी सकन। 17 तालू यीशुए उना ने पुछया, “ऐ क्या गल्लां न, जड़ियां तुसां चलदे-चलदे अपु चे करा दे न?” सै स्की गे कने उना दे मु बड़े उदास लगा दे थे। 18 ऐ सुणीकरी, उना चे क्लियुपास नाए दे इकी माणुए बोलया, “शायद तू यरूशलेम च किल्ला ही परदेसी है; की जिसयो पता नी है की, पिछले इना रोजां च ऐथू क्या-क्या होया है?” 19 यीशु उना ला पुछया, “क्या-क्या होया है?” उना उसला बोलया, नासरत गां दे यीशु दे बारे च जड़ा असल च परमेश्वरे कने सारे लौका दे बखे कम्म कने बचन च सामर्थी परमेश्वरे दा संदेश देणेबाला था। 20 बड़े याजकां कने साडे सरदारां उसयो पकड़ाई दिता, की उसयो मारणे दा हुकम दिता; कने उसयो सूली पर चढ़ाई दिता। 21 पर सांझो आस थी, की इनी ही इस्त्राएले देश दे लोकां जो रोम देश ला छुटकारा देणा, कने इना सारियां गल्लां दे सिवा इसा गल्लां जो अज तिजा दिन होई गया। 22 कने हुण केई जनानिया सांझो हेरानिया च पाई दिता है, जड़ियां अज ब्यागा कबरा पर गियां थियां। 23 कने जालू उना जो उदी लाश नी मिल्ली, तां ऐ बोलदियां आईयां, की असां जो स्वर्गदूतां दे दर्शन होऐ, उना बोलया की यीशु जिन्दा है। 24 “तालू साडे साथियां चे केई कबरा पर गे कने जियां उना जनानिया बोलया था, तियां ही ओथु था; पर यीशुए जो उना नी दिखया।” 25 तालू यीशुए उना दोनो चेलयां ने बोलया, “हे मूर्खो, जड़ा कुछ परमेश्वरे दा संदेश देणेबालयां दिया कताबां च लिखया है तुसां लोकां जो इना सारियां गल्लां पर भरोसा करणा बड़ा कठिन लगदा है।” 26 “ऐ जरूरी था, की मसीह ऐ सारे दुख झेले कने फिरी करी अपणिया महिमा च प्रवेश करे।” 27 तालू यीशुए उना जो पुरे पबित्र शास्त्रां चे, उनी मूसा ला शुरू करिके सारे परमेश्वरे दा संदेश देणेबालयां जितणियां गल्लां उदे बारे च बोलियां दियां, सै उना जो समजाइयां। 28 इतणे चे सै उस गांए बखे पुज्जे, जिथू सै चलयो थे, कने यीशुए दे व्यवहारे जो दिखीकरी ऐसा लगा था, की सै चेलयां ला अगो बदणा चांदा है। 29 पर उना ऐ बोली करी उसयो रोकया, “साडे सोगी रे; क्योंकि संज होई चलियो है, कने दिन बड़ा डली गया है।” तालू सै उना सोगी रेहणे तांई अंदर गया। 30 जालू यीशु उना सोगी रोटी खाणां बैठा, तां उनी रोटी लेईकरी धन्यवाद किता, उसा जो तोड़ी करी उना जो देणा लगा। 31 तालू उना दियां हखी खुली गियां; कने उना उसयो पछेणी लिया, कने सै उना दी हखी अगो ला गायब होई गया। 32 उना अपु चे बोलया, “जालू सै रस्ते च सांझो ने गल्लां करा दा था, कने सांझो पबित्र शास्त्रां दा मतलब समझा दा था, तां क्या साडे मना च उतेजना नी जागी?” 33 सै उसी बेले उठी करी यरूशलेम शेहरे जो बापस चली गे, कने उना गयारां चेलयां कने उदे साथियां

जो गिठे दिखया। 34 जड़े गिठे होयो थे सै ऐ बोला दे थे, “प्रभु सची जिन्दा होई गया है, कने शमौने जो मिलया है।” 35 तालू उना रस्ते दियां गल्लां उना जो दसियां कने ऐ भी बोलया की जालू सै रोटी तोड़ा दा था तां उना उसयो पछेणी लिया की सै यीशु है। 36 सै ऐ गल्लां करा दे ही थे, की यीशु अपु ही उना बिच प्रकट हुआ; कने उना ने बोलया, “तुहांजो शांति मिल्ले।” 37 पर सै घबराई गे, कने डरी गे, कने सोचणा लगगे की असां भूते जो दिखदा दे न। 38 यीशुए उना ने बोलया, कजो घबरा दे न? कने तुहाड़े मने च कजो शक होंदा है? 39 “मेरे हथ कने पैरां जो दिखदा, की मैं सै ही है, मिंजो छुई करी दिखदा; क्योंकि भूत दी हड्डी कने मास नी होंदा है जियां मिंजो च दिखदे न।” 40 ऐ बोली करी उनी उना जो अपणे हथ पैर दर्से। 41 जालू खुशिया दे मारे उना जो भरोसा नी होया की यीशु जिन्दा है, कने हेरान होआ दे थे, तां यीशुए उना ला पुछया, “क्या ऐथू तुहाड़े बाल कुछ खाणे जो है?” 42 उना उसयो भुनियो मछिया दा टुकड़ा दिता। 43 यीशुए सै मछिया दा टुकड़ा लेईकरी उना दे सामणे खादा। 44 फिरी यीशुए उना ने बोलया, “ऐ मेरियां सै गल्लां न, जड़ियां मैं तुहाड़े सोगी रेईकरी तुहांजो ने बोलियां थियां, की जरूरी है, की जितणियां गल्लां मूसा दिया व्यवस्था कने परमेश्वरे दा संदेश देणेबालयां कने भजना दियां कताबां च मेरे बारे च लिखियां न, सै सारियां सच्च साबित होन।” 45 तालू यीशुए उना जो पबित्र शास्त्र समझणे तांई मदद किती। 46 कने उना ने बोलया, की पबित्र शास्त्रां च ऐसा लिखया है की मसीह जो दुख झेलणे न, कने तिजे दिने मरयां चे जिन्दा होई जाणा है, 47 कने यरूशलेम शेहरे ला लेईकरी सारियां जातियां दे पापां दी माफी तांई शुभसमाचार दा प्रचार उदे नाए ने होणा है। 48 “तुसां इना सारियां गल्लां दे गबाह न। 49 कने मैं अपु तुहांजो पर पबित्र आत्मा जो भेजणा है, जिसदा बायदा मेरे पिता किताया है। तालू दीकर शेहरे च इंतजार करणा होणा जालू दीकर तुहांजो स्वर्गे ला सामर्थ्य नी मिलदी।” 50 तालू सै उना जो बैतनिय्याह गांए दीकर शेहर ला बाहर लेई गया, कने उना जो हथ चुकी करी आशीष दिती; 51 कने उना आशीष दिन्दे ही उना ला लग होई गया कने स्वर्गे जो चली गया। 52 कने सै उसयो दण्डवत करिके बडिया खुशिया ने यरूशलेम शेहरे जो बापस चली गे। 53 कने सै लगातार मंदरे च जाई करी परमेश्वरे दी स्तुति करदे थे।

यूहन्ना

1 इस सारे संसारे दे बणने ला पेहले बचन था, कने बचन परमेश्वरे सोगी था कने सै बचन परमेश्वर था। 2 बचन इस सारे संसारे दे बणने ला पेहले ला ही परमेश्वरे सोगी था। 3 परमेश्वरे सारा कुछ उसी बचन ने ही बणाया है कने जडा कुछ भी बणाया है इदे चे कोई भी चीज बचन बिना नी बणियो है। 4 साडी शारीरिक कने आत्मिक जिन्दगी उना च ही थी, कने सै जिन्दगी सारे लोकां जो लौ दिन्दी जेत थी। 5 कने लौ नेहरे च चमकदी है; कने नेहरा उसा लौइ जो बुझाई नी सकया। 6 परमेश्वरे यूहन्ना नाऐ दे इक माणुऐ जो भेजया। 7 सै लौइ दे बारे च दसणे ताई आया था ताकि सारे लोक उदे जरिये उसा जोती पर भरोसा करन। 8 यूहन्ना अपु तां सै लौ नी था, पर सै उसा लौ दी गबाई देणा आया था। 9 “सै जडी सच्ची लौ है” जडी हर इक माणुऐ जो लौ करदी है, सै संसार च ओणे बाली थी। 10 सै संसार च था, कने संसार उदे ने पैदा होया है, कने संसारे दे लोकां उसयो नी पछेणया। 11 सै अपने लोकां च आया पर उसयो उदे अपने लोकां नी अपनाया। 12 पर जितणया उसयो अपनाया, उनी उना जो परमेश्वरे दी ओलाद होणे दा हक दिता, मतलब की सै जडे उस पर भरोसा रखदे न: 13 सै ना तां माता-पिता दी इच्छा ला, कने ना तां माणुऐ दिया इच्छा ने, ना शरीर दिया इच्छा ने, ना इक माणुऐ दिया ओलाद दी इच्छा ने, पर परमेश्वरे ला पैदा होया है। 14 कने बचन इक माणु बणया कने असां लोकां बिच रिया, कने असां उदी ऐसी महिमा दिखी, जदेई पिता दे इकलोते दी महिमा। जो पिता परमेश्वरे ला सचाइया कने अनुग्रह ने भरपूर होईकरी आया। 15 यूहन्ना उदे बारे च गबाई दिती, कने पुकारी करी बोलया, की ऐ सेई है, जिदे बारे च मैं बोलया था, की उनी मेरे बाद ओणा है, सै मिंजो ला भी बदीकरी है, क्योंकि सै मिंजो ला पेहले इस संसारे च मोजूद था। 16 क्योंकि उदी परीपूर्णता ने सांझो सारायां जो मिलया है मतलब अनुग्रह पर अनुग्रह। 17 व्यवस्था तां मूसा ने दितियो है, पर परमेश्वरे यीशु मसीह दे जरिये अनुग्रह कने सचाई दस्सी। 18 परमेश्वरे जो कुनी भी कदी नी दिखया है, सिर्फ उदे इकलोते पुत्रे जडा असल च परमेश्वर है, कने पिता परमेश्वर दे सबते नेडे है, उनी सांझो दसया है, की परमेश्वर कदिया है। 19 यूहन्ना दी गबाई ऐ है, की जालू यहूदी अगुवां यरूशलेम शेहरे ला याजकां कने लेवियां जो उसला ऐ पुछणे ताई भेजया, “तू कुण है?” 20 यूहन्ना उना जो साफ-साफ बोलया, “मैं मसीह नी है।” 21 तालू उना उसला पुछया, “तां फिरी कुण है? क्या तू परमेश्वरे दा संदेश देणेबाला एलियाह है?” उनी बोलया मैं नी है। तां क्या तू सै परमेश्वरे दा संदेश देणेबाला है जिसदा पिता परमेश्वरे बायदा कितया था? उनी जबाब दिता की, “नी।” 22 तालू उना यूहन्ना ला पुछया, “तां फिरी है कुण तू। ताकि असां अपने भेजणे बालयां जो जबाब देई सकन। तू अपने बारे च क्या बोलदा है?” 23 उनी बोलया, “जियां यशायाह परमेश्वरे दा संदेश देणेबाला बोलया है, की मैं सुनसान जगा च इक हक पाणे बाले दी अबाज है की तुसां प्रभुऐ दा रस्ता सीधा करा।” 24 ऐ लोक फरीसियां दे पासे ला भेजयो थे। 25 उना उसला ऐ सबाल पुछया, की अगर तू मसीह नी है, कने ना एलियाह है, कने ना ही सै परमेश्वरे दा संदेश देणेबाला है जडा ओणे बाला

था, तां फिरी तू बपतिस्मा कजो दिन्दा है? 26 यूहन्ना उना जो जबाब दिता, की मैं तां पाणिऐ ने बपतिस्मा दिन्दा है, पर तुहाड़े बिच इक माणु खडोतया है, जिसयो तुसां नी जाणदे न। 27 मतलब की मेरे बाद ओणे बाला है, मैं तां उदे जुतयां दे तस्मे खोलणे दे काबील नी है। 28 ऐ गल्लां यरदने खड्डा दे पार बैतनिय्याह शेहर च होईयां, जिथू यूहन्ना लोकां जो बपतिस्मा दिन्दा था। 29 यूहन्ने दुज्जे रोजे यीशुऐ जो अपने पासे ओंदे दिखीकरी बोलया, “दिखा, ऐ परमेश्वरे दा मेमना है, जिनी संसारे दे पाप चुकी लेई जाणे न। 30 ऐ सेई है जिदे बारे च मैं बोलया था, की इकी माणुऐ मेरे पिच्छे ओणा है, सै मिंजो ला भी बडा है, क्योंकि सै मिंजो ला भी पेहले था। 31 कने मैं उसयो पछेणदा नी था की सै मसीह था, इस्त्राएल देश दे लोकां जो ऐ दसणे ताई की सै कुण है, तां मैं पाणिऐ ने बपतिस्मा दिन्दा आया।” 32 कने यूहन्ने ऐ गबाई दिती की, मैं पबित्र आत्मा जो कबतुरे सांई स्वर्ग ला उतरदे दिखया है, कने सै उस पर स्की गोई। 33 पर मैं तां उसयो पछेणदा नी था सै मसीह था, पर जिनी मिंजो पाणिऐ ने बपतिस्मा देणा भेजया, उनी ही मिंजो ने बोलया, की जिस पर तू आत्मा जो उतरदे कने स्कदे दिखगा; सेई पबित्र आत्मा ने बपतिस्मा देणेबाला है। 34 कने मैं दिखया, कने गबाई दिती है की मैं तुसां ने सच्च-सच्च बोलदा की ऐई परमेश्वरे दा पुत्र है। 35 दुज्जे रोजे फिरी यूहन्ना कने उदे दो चले खडोतयो थे। 36 कने यीशु चलया था, तां उनी उदे पासे नजर करिके बोलया, “दिखा, ऐ परमेश्वरे दा मेमना है।” 37 तालू सै दोनो चले यूहन्ना दी गल्ल सुणीकरी यीशुऐ दे पिच्छे चलीं पे। 38 यीशुऐ पिच्छे मुडी करी उना जो पिच्छे ओंदे दिखीकरी उना ला पुछया, तुसां कुदिया तोपा च न? उना उसला बोलया, “गुरू जी, तू कुथु रेंदा है?” 39 यीशु मसीह उना ने बोलया, “चला दिखी लिया।” तालू उना आई करी उदे रेहणे दी जगा दिखी, कने उस रोजे सै सोगी रे; कने ऐ दोपहर दे लगबग चार बजयो थे। 40 उना दोना चे इक तां शमौन पतरस दा भाई अन्दियास था, जडे यूहन्ना दियां गल्लां सुणीकरी उदे पिच्छे आया था। 41 उनी पेहले अपने सगे भाई शमौन ने मिली करी उसला बोलया, की सांझो मसीह मिली गया है। 42 अन्दियास शमौने जो यीशुऐ बाल लेई आया: यीशुऐ उस पासे नजर करिके बोलया, तू यूहन्ना दा पुत्र शमौन है, तिजो पतरस बोलणा है। 43 दुज्जे रोजे यीशुऐ गलील प्रदेशे जो जाणे दा फेसला किता, कने फिलिप्पुस ने मिली करी बोलया, “मेरे चले बणने ताई मेरे पिच्छे चलीं पो।” 44 फिलिप्पुस तां अन्दियास कने पतरसे दे शेहर बैतसैदा दा रेंगेबाला था। 45 फिलिप्पुसे नतनएल ने मिली करी बोलया, “सांझो सै माणु मिल्ली गया है जिदे बारे च मूसा दिया व्यवस्था च कने परमेश्वरे दा संदेश देणेबालयां लिखया था। सै नासरत शेहरे ला यरूफे दा पुत्र यीशु है।” 46 नतनएले उसला बोलया, क्या कोई खरी चीज भी नासरत शेहर ला निकली सकदी है? फिलिप्पुसे उसला बोलया, “चली करी दिखी ले।” 47 यीशुऐ नतनएल जो अपने बाल ओंदे दिखीकरी उदे बारे च बोलया, दिखा, ऐ सची इस्त्राएल दा भरोसे बाला बंशज है: इदे च कोई कपट नी है। 48 नतनएले यीशुऐ जो बोलया, “तू मिंजो कियां जाणदा है?” यीशुऐ उसयो जबाब दिता, फिलिप्पुसे तिजो जालू सदया, उसला पेहले जालू तू अंजरी दे स्वे थले था, तालू मैं तिजो दिखया था। 49 नतनएले उसयो जबाब दिता, “गुरू जी, तू

परमेश्वरे दा पुत्र है; तू इस्राएल दा महाराजा है।” 50 यीशुऐ उसयो जबाब दिता, “मैं तां तिजो ने बोलया, की मैं तिजो अंजरी दे म्खे थले दिखया, क्या तू तां भरोसा करा दा है? तू इसला भी बड़े कम्म दिखणे ना।” 51 फिरी यीशुऐ उसयो बोलया, “मैं तुसां ने सच्च-सच्च बोलदा है की तुसां स्वर्गे जो खुलया कने परमेश्वरे दे स्वर्गदूते जो उपर जांदे कने मिजो, माणुऐ दे पुत्रे उपर उतरदे दिखणा।”

2 फिरी दो दिन बाद गलील प्रदेशे दे काना शहर च कुसकी दा बियाह था, कने यीशुऐ दी माता भी ओथु थी। 2 यीशु कने उदे चेले भी उसी बियाह च सदया थे। 3 जालू दाखरस घटी गया, तां यीशुऐ दिया माता उसला बोलया, “की इना बाल दाखरस नी रिया।” 4 यीशुऐ उसला बोलया, “माता जी तुसां मिजो कजो दस्सा दे? अजे मेरा टेम नी आया है की लोक मिजो मसीह से स्ने च पछेणन।” 5 पर उदिया माता सेवकां ने बोलया, “जडा कुछ सै तुहांजो बोलगा, सेई करनयो।” 6 ओथु यहदियां दे अपने धार्मिक रिबाजां दे अनुसार हथ धोणे दा रिबाज था। उना हथ धोणे तांई पथरे दे छे घड़े रखयो थे। जिना च लगभग सौ-सवा-सौ लिटर पाणी ओंदा था। 7 यीशुऐ उना ने बोलया, “घड्यां च पाणी भरी दिया।” उना घड्यां जो उपरे दीकर भरी दिता। 8 तालू यीशुऐ उना जो बोलया, “हूण पाणी निकाली करी धामा दे प्रधाने बाल लेई जा।” सेवकां तियां ही कितया जियां उना जो करणे तांई बोलया। 9 जालू धामा दे प्रधाने सै पाणी चखया, तां सै दाखरस बणी गया था कने उसयो नी पता था की सै कुथु ला आया है; पर जिना सेवकां पाणी कडया था सै जाणदे थे, तां धामा दे प्रधाने लाड़े जो सदीकरी, उसयो बोलया। 10 हर इक माणु पेहले सबना ला खरा दाखरस दिन्दा है, कने जालू लोक उसयो पी करी रजी जांदे न, तालू घटिया बाला दाखरस दिन्दा है; पर तू सबना ला बढिया दाखरस हले दीकर रखया है। 11 यीशुऐ गलील प्रदेशे दे काना शहर च अपना ऐ पेहला चमत्कार दसी करी अपना महिमा दसी कने उदे चेलयां उस पर भरोसा किता की सै ही मसीह है। 12 इदे बाद सै कने उदी माता, उदे भाई, उदे चेले, कफरनहम शहर जो गे कने ओथु थोड़े दिन रे। 13 यहदियां दा फसह दा त्योहारे नेडे था, कने यीशु यरूशलेम शहर जो गया। 14 कने उनी मंदरे च दांद, कने भेडां, कने कबुतरां जो बेचणे बालयां जो बैठया दिखया। 15 तालू उनी रसियां जो कोडा बणाई करी, सारियां भेडां कने दांदा जो मंदरे ला कडी दिता, कने साहुकरां दे पेसे खलारी दिते, कने पिढां जो पुठा सुटी दिता, 16 कने कबुतरां बेचणे बालयां ने बोलया, “इना जो ऐथू ला लेई जा। मेरे पिता दे घरे जो व्यापारे दा घर मत बणा।” 17 तां उदे चेलयां जो याद आया की पबित्र शास्त्र च लिखया है, “तेरे घरे दा जनून मेरे अंदर अग्गी सांई बलदा है।” 18 इस पर यहदी अगुवां उसला बोलया, “तू सांझो क्या चमत्कार दसी सकदा है की जिसने साबित हो की तिजो परमेश्वरे दिया तरफा ला हक है।” 19 यीशुऐ उना जो जबाब दिता, “इसी मंदरे जो तोड़ी दीया, कने मैं इसयो उना रोजां च दोबारा बणाई दिंगा।” 20 यहदी अगुवां बोलया, “इस मंदरे जो बणाणे जो छयाली साल लगयो न, कने तू क्या इसयो उना रोजां च बणाई दिंगा?” 21 पर यीशु जिस मंदरे दे बारे च बोला था, सै उदा शरीर था। 22 जालू यीशु मरी करी जिंदा होया था, तालू उदे चेलयां जो याद आया था की उनी ऐ बोलया

था; कने पबित्र शास्त्र कने सै बचन जडा यीशुऐ बोलया था, उस पर भरोसा किता। 23 जालू यीशु यरूशलेम शहर च फसह दे त्योहारे च था, तां मतयां उना चमत्कारां जो जडे सै दसदा था दिखीकरी उस पर भरोसा किता। 24 पर यीशुऐ भरोसा नी किता की उना उस पर भरोसा कितया है, 25 कने उसयो कुसदी भी जरूरत नी थी जडा उसयो लोकां दे बारे च दस्से क्योंकि सै जाणदा था की उना दे दिलां च कने उना दे क्या इरादे न?

3 फरीसियां च नीकुदेमुस नाऐ दा इक माणु था, जडा यहदियां दा धार्मिक अगुवा था, सै इक फरीसी था। 2 उनी राती यीशुऐ बाल आई करी उसयो बोलया, “गुरू जी, असां जाणदे न, की परमेश्वरे तुहांजो सांझो सिखाणे तांई भेजया है, क्योंकि कोई भी इना चमत्कार जो जडे तू दसदा है, अगर परमेश्वर दा साथ ना हो तां नी दसी सकदा है।” 3 यीशुऐ उसयो जबाब दिता, “मैं तिजो ने सच्च-सच्च बोलदा है, अगर कोई नोऐ सिरे ला नी जम्मे तां सै परमेश्वरे दा राज्य नी दिखी सकदा है।” 4 नीकुदेमुसे उसला बोलया, “माणु जालू बुद्धा होई जांदा है तां सै कियां जन्म लेई सकदा है? क्या सै अपणिया माता दे पेटे च दुज्जी बरी जाई करी जन्म लेई सकदा है?” 5 यीशुऐ जबाब दिता, मैं तिजो ने सच्च-सच्च बोलदा है, जालू दीकर कोई माणु पाणिऐ कने पबित्र आत्मा ने नी पैदा होऐ तालू दीकर सै परमेश्वरे दे राज्य च प्रवेश नी करी सकदा है। 6 माणु अपने बचयां जो जन्म दिन्दे न। फिरी भी सिर्फ परमेश्वरे दी आत्मा ही तुसां जो परमेश्वरे दी ओलाद दे स्ने च बदली सकदा है। 7 हेरान मत हो, की मैं तिजो ने बोलया, तिजो दोबारा ला पैदा होणा जरूरी है। 8 हवा जिस पासे चांहदी है उस पासे चलदी है, कने तू उदी अबाज सुणदा है, पर ऐ पता नी की सै कुथु ला ओंदी है कने कुस पासे चली जांदी है? जडा कोई पबित्र आत्मा ने जमया है सै ऐदिया ही है। 9 नीकुदेमुसे उसयो जबाब दिता, “क्या ऐ गल्लां होई सकदियां न?” 10 ऐ सुणीकरी यीशुऐ उसयो जबाब दिता, तू इस्राएलियां दा इक महान गुरू है, तिजो तां असल च इना गल्लां जो समझणा चाईदा है? 11 मैं तिजो ने सच्च-सच्च बोलदा है की सांझो जडा पता है, सै बोलदे न, पर जिसयो असां दिखदे न उदी गबाई दिन्दे न, कने असां जडा बोलदे न उस पर तुसां भरोसा नी करदे न। 12 जालू मैं तुसां ने धरतिया पर होणे बालियां गल्लां बोलियां, तां तुसां भरोसा नी किता, अगर मैं तुसां जो दस्से की स्वर्गे च क्या होणा है, तां क्या तुसां भरोसा करणे? 13 कोई स्वर्गे पर नी गया, “पर सिर्फ मैं, माणुऐ दा पुत्र स्वर्गे ला थल्ले आया है।” 14 कने जियां मूसे सुनसान जगा च पितल दे सप्पे जो उपर चढ़ाया, तियां ही जरूरी है की मैं, माणुऐ दे पुत्रे जो भी उपर चढ़ाया जाऐ। 15 ताकि जडा कोई मिजो पर भरोसा करे उदे च उसयो हमेशा दी जिन्दगी मिल्ले। (aiōnios g166) 16 “क्योंकि परमेश्वरे संसारे दे लोकां ने ऐसा प्यार किता की उनी अपना इकलोता पुत्र देई ता, ताकि जडा कोई उस पर भरोसा करे, उदा नाश ना होऐ, पर उसयो हमेशा दी जिन्दगी मिल्ले। (aiōnios g166) 17 क्योंकि परमेश्वरे अपने पुत्रे जो संसारे दे लोकां पर सजा देणे तांई नी भेजया है, पर इस तांई भेजया की उदे जरिये संसारे दे लोकां दा उद्धार होऐ। 18 जडा परमेश्वरे दे पुत्रे पर भरोसा करदे न, उस पर सजा दा हुकम नी होंदा, पर जडे परमेश्वरे दे पुत्रे पर भरोसा नी करदे न, सै दोषी न क्योंकि उनी परमेश्वरे दे इकलोते पुत्रे दे नाऐ पर भरोसा नी

किता। 19 कने सजा दा हुकम देंगे दी बजा ऐ की लौ संसारे च आई है, कने लोकां नेहरे जो लौइ ला जादा प्यार किता क्योंकि उना दे कम्म बुरे थे। 20 क्योंकि जडा कोई बुराई करता है, सै लौइ ने बेर रखदा है, कने लौइ च नी ओंदा है, इयां ना हो कि उदे कम्मा पर दोष लगना। 21 पर जडा सचाइया पर चलदा है सै लौइ च ओंदा है, ताकि उदे कम्म प्रगत होन जडा परमेस्वरे चांदा की सै करना।” 22 इदे बाद यीशु कने उदे चेले यहूदिया प्रदेश च आये; कने सै ओथु उना सोगी रेईकरी बपतिस्मा देणा लग्गा। 23 कने यहून्ना भी ऐनान ग्रां च जडा सामरिया इलाके दे शालेम शहर दे नेडे है ओथु बपतिस्मा दिन्दा था। क्योंकि ओथु मता पांणी था, कने लोक आई करी बपतिस्मा लेंदे थे। 24 क्योंकि यहून्ना तालू दीकर जेला च नी पाया था। 25 ओथु यहून्ना दे चेलयां दा कुसकी यहूदिये सोगी रिबाजा दे हिसावे ने शुद्धी दे बारे च बेहस होई। 26 कने यहून्ना दे चेलयां उस बाल आई करी उसला बोलया, “गुरू जी, जडा माणु यरदन खड्डा दे पारले पासे तैरे सोगी था, जिसदे बारे च तुसां गबाही दिती थी; दिख, सै बपतिस्मा दिन्दा है, कने सब उस बाल ओंदे ना।” 27 यहून्ने जबाब दिता, जालू दीकर माणुऐ जो स्वर्ग ला ना दितया जाए, उसयो तालू दीकर कुछ नी मिल्ली सकदा। 28 तुसां अपु मेरे गबाह न की क्या बोलया था, की मैं मसीह नी है, पर उदे पहले भेजया गया है। 29 लाडा लाडिये ने बियाह करी लेंदा है, पर लाडे दा मित्र सोगी खड्डोई करी उदी सुणदा है, लाडे दियां गल्लां ने बडा खुश होंदा है; तियां ही मेरा दिल खुश होई गया है। 30 जरूरी है सै होर जादा खास होई जा कने मैं घट खास होई जां। 31 “जडा स्वर्ग ला ओंदा है सै सबना ला बडा है, जडा धरतिया ला ओंदा है सै धरतिया दा है; कने धरती दियां गल्लां करता है: जडा स्वर्ग ला ओंदा है, सै सबना ला उपर है। 32 जडा कुछ उनी दिखया, कने सुणाया है, उदी गबाई दिन्दा है; पर बडे घट लोक उदे संदेश जो मंटे न। 33 पर जिना लोकां उदा संदेश मन्नी लिया उनी इसा गल्ला पर प्रमाण देई दिता की परमेस्वर सच्चा है। 34 क्योंकि जिसयो परमेस्वरे भेजया है सै परमेस्वरे दे बचना दा प्रचार करदे न क्योंकि ऐ सेई है जिसयो परमेस्वरे बिना नापी-तोली करी पबित्र आत्मा दिन्दा है। 35 पिता परमेस्वर पुत्रे ने प्यार करता है, कने उनी सारियां चिंजा उदे हथां च देई दितियां। 36 जडा परमेस्वरे दे पुत्रे पर भरोसा रखदा है, हमेशा दी जिन्दगी उदी है; पर जडा पुत्रे जो नी मनदा है, उसयो अनन्त जिन्दगी नी मिलणी, पर परमेस्वरे दी सजा उसयो मिलणी है।” (aiōnios g166)

4 फिरी जालू यीशुऐ जो पता लग्गा की फरीसियां सुणाया है की यीशु यहून्ना ला जादा चेले बणांदा कने बपतिस्मा दिन्दा है। 2 यीशु नी पर उदे चेले बपतिस्मा दिन्दे थे, 3 तालू सै यहूदिया प्रदेश जो छडी करी फिरी अपने चेलयां सोगी गलील प्रदेशे दे इलाके जो चली गया, 4 कने उसयो सामरियां प्रदेश ला होईकरी जाणा जरूरी था, क्योंकि परमेस्वर भी ऐई चांदा था। 5 तांई तां सै सामरिया प्रदेश दे खखार शेहरे दीकर आया, जडा उसा जमिना दे बखे है जडी याकूबे अपने पुत्र यूसुफे जो दितियो थी। 6 कने याकूबे जडा खु ओथु बणाया था, सै हेले दीकर भी ओथु ही था। कने यीशु रस्ते च थकी करी उस खुऐ पर इयां ही बेई गया। कने ऐ गल्लत दोपहर दे बक्ते होई थी। 7 इतणे च इक सामरी जनानी पांणी भरना आई। यीशुऐ उसा जो बोलया की “मिंजो

पीणे तांई पांणी दे।” 8 क्योंकि उदे चेले तां शेहरे च खाणा खरीदणा गियो थे। 9 इना सामरी जनानिया उसला बोलया, तू यहूदी होईकरी सामरी जनानिया ला पांणी कजो मंगा दा है? क्योंकि यहूदी सामरियां सोगी कुछ भी रिरता नी रखदे। 10 यीशुऐ जबाब दिता, “तू नी जाणदी है की परमेस्वर तिजो क्या देणा चांदा, कने ऐ भी नी जाणदी की कुण तिजो ला पांणी मंगा दा है। अगर तू जाणदी, तां तू मिंजो ला मंगदी, कने मैं तिजो जिन्दगिया दा पांणी दिन्दा जडा जिन्दगी दिन्दा है।” 11 जनानिया उसला बोलया, प्रभु जी, तैरे बाल पांणिए भरने तांई तां कुछ हे भी नी है, कने खु तां बडा डुगा है; तां फिरी सै जिन्दगिया दा पांणी तैरे बाल कुथु ला आया? 12 क्या तू साडे पूर्वज याकूबे ला बडा है, जिनी सांझो ऐ खु दिता; कने उनी कने उदे बचयां कने डंगरां समेत इस खुऐ ला पीता? 13 यीशुऐ उसा जो जबाब दिता, जडा कोई इस पांणिए जो पिगा उसयो फिरी त्रे लगी पोणी, 14 पर जडा कोई उस पांणिए जो पिगा जडा मैं उसयो देणा, तां उनी फिरी अनन्तकाल दीकर कदी त्रिणा नी होणा। जडा पांणी मैं उसयो दिगा, सै उदे च इक पांणिए दा खु बणी जाणा, जडा उस पांणिए जो दिन्दा रेंदा है कने उसयो हमेशा दी जिन्दगी देणी। (aiōn g165, aiōnios g166) 15 उना जनानिया उसला बोलया, “प्रभु जी, सै पांणी मिंजो दे ताकि मिंजो त्रे ना लगये कने ना पांणी भरणे तांई बार-बार इतणी दुरे जो ओऐ।” 16 यीशुऐ उसा जो बोलया, “जा, अपने घरे बाले जो ऐथू सदी लेई ओ।” 17 जनानिया जबाब दिता, “मेरा घरे बाले नी है।” यीशुऐ उसा ने बोलया, “तू ठीक बोलदी है, की मेरा घरेबाला नी है। 18 क्योंकि तू पंज घरे बाले करी बेठिइयो है, कने हुण तू जिस माणुऐ बाल है सै भी तेरा घरेबाला नी है; ऐ तू सच्च बोलया है।” 19 जनानिया उसला बोलया, “प्रभु जी, मिंजो लगदा है तू परमेस्वरे दा संदेश देणेबाला है। 20 साडे सामरी पूर्वज इसी पाहेडे पर परमेस्वरे दी भक्ति करदे थे, कने तुसां यहूदी लोक बोलदे न की सै जगा जिथू अराधना करणी चाईदी सै यरूशलेम शहर च है।” 21 यीशुऐ उसा ने बोलया, “हे जनानिये, मेरिया गल्लां पर भरोसा कर की सै बकत ओणा है, ना तां तुसां इसी पाहेडे पर पिता दी भक्ति करणी है ना तां यरूशलेम शहर च। 22 तुसां सामरी लोक जिसयो नी जाणदे न, उदी भक्ति करदे न; कने असां यहूदी लोक जिसयो जाणदे न उदी अराधना करदे न; क्योंकि उद्धार करणे बाले यहूदियां चे ही ओणा है। 23 पर सै बकत ओणा है, मतलब अजे भी है, जिदे च सच्चे भक्त पिता परमेस्वरे दी भक्ति आत्मा कने सचाइया ने करणी है, क्योंकि पिता परमेस्वर अपने तांई ऐदे ही अराधना करणे बालयां जो तोपदा है। 24 परमेस्वर आत्मा है, कने जरूरी है की उदी अराधना करणे बाले आत्मा कने सचाइया ने भक्ति करना।” 25 जनानिया उसला बोलया, “मैं जाणदी है की मसीह जिसयो ख्रिस्तुस बोलदे न, ओणे बाला है; जालू उनी ओणा है, तां उनी सांझो सारियां गल्लां दसी देणियां न।” 26 यीशुऐ उसा ने बोलया, “मैं जडा तिजो ने बोला दा है, सेई है।” 27 इतणे च उदे चेले आई गे, कने हेरान होणा लग्गे की सै जनानिया ने गल्लां करा दा है; पर तमी कुनी नी पुछया, तू क्या चांदा है? “कने कजो इसा ने गल्लां करा दा है?” 28 तालू सै जनानी अपना घडा छडी करी शेहरे जो चली गई, कने लोकां ने बोलणा लग्गी, 29 “ओआ, इक माणुऐ जो दिखा, जिनी सब कुछ दसी दिता जडा मैं कितया।

कुथी ऐई तां मसीह नी है?" 30 तालू सै शेहरे ला निकली करी यीशुए जो दिखणा ओणा लग्गे। 31 इतणे च उदे चले आई करी उसला बिनती करणा लग्गे, "गुरू जी, कुछ खाई ले।" 32 पर यीशुए उना ने बोलया, "मेरे बाल खाणे तांई ऐसा खाणा है जिसयो तुसां नी जाणदे न।" 33 तालू चेलयां अपु चे बोलया, "क्या कुनी इदे तांई कुछ खाणे जो लांदया है?" 34 यीशुए उना ने बोलया, मेरा खाणा परमेश्वरे दी इच्छा दा पालन करणा है जिनी मिंजो भेजया है, कने उस कम्मे जो पूरा करणा है जडा उनी मिंजो सौपया। 35 क्या तुसां नी बोलदे, बडाई करणे जो अजे भी चार महीने पियो न? दिखा, मैं तुसां ने बोलदा है, अपणियां हखी खोला कने ओणे बाले लोकां जो दिखा। सै खतरां च पकियो फसला सांई न, कने बडाई तांई तैयार न। 36 पेहले ला ही बडणे बाले कम्म करा दे न कने उना जो अपणी मजदूरी मिल्ला दी है। कने बी राणे बाला कने बडणे बाला दोनों मिलिकरी खुशी मनान। (aiōnios g166) 37 क्योंकि इसा गल्ला पर ऐ कहावत ठीक बोदी है: राणे बाला कोई होर है कने बडणे बाला कोई होर है। 38 मैं तुहांजो उस खेते जो बडणे तांई भेजया जिस च तुसां मेहनत नी कितियो होरनी मेहनत कितियो है, "तुसां उसा फसला जो गठेरणा (जिस तांई उना कम्म कितया है)।" 39 कने उस शेहरे दे मतयां सामरियां उसा जनानिया दे बोलणे ने यीशुए पर भरोसा किता; जिना ऐ बोलया था, की उनी सब कुछ दसी दिता, जडा मैं कितया है। 40 जालू सै सामरी उदे बाल आये, तां उसला बिनती करणा लग्गे की साडे ऐथू रे। तां सै ओथु दो रोज रिया। 41 कने उदे संदेश दिया बजा ने मतयां यीशुए पर भरोसा किता। 42 कने उना जनानिया बोलया, हुण असां तैरे बोलणे ने ही भरोसा नी करदे न, क्योंकि असां अपु ही सुणी लिया, कने असां जाणदे न की ऐई सच्ची दा संसारे दा उद्धार करणे बाला है। 43 फिरी सै उना दो रोजां बाद सै ओथु ला निकली करी गलील प्रदेश जो गया। 44 क्योंकि यीशुए अपु ही बोलया था की परमेश्वरे दा संदेश देणेबाले दी अपने देशे च इज्जत नी होंदी है। 45 जालू सै गलील प्रदेश गया, तां गलील बासी खुशिया ने उसला मिल्ले; क्योंकि जितणे भी कम्म उनी यरूशलेम शहर च त्योहारे बेले कितयो थे, उना सारयां कम्मा जो दिखया था, क्योंकि सै भी त्योहारे जो गियो थे। 46 तालू सै फिरी गलील प्रदेश दे काना शहर च आया, जिथू उनी पाणिजे जो दाखरस बणाया था। ओथु राजे दा इक सेवक था जिसदा पुत्र कफरनहम शहर च बीमार था। 47 सै ऐ सुणीकरी की यीशु यहूदिया प्रदेश ला गलील प्रदेश च आया है, उदे बाल गया कने उसला बिनती करणा लग्गा की चली करी मेरे पुत्रे जो ठीक करी दे: क्योंकि सै मरणे बाला था। 48 यीशुए उसयो बोलया, जालू तुसां चमत्कार कने अनेखे कम्म नी दिखी लेंगे तालू दीकर तुसां मिंजो मसीहा नी मनणा। 49 राजे दे सेवके उसला बोलया, "प्रभु जी, मेरे जागते दी मौत होणे ला पेहले चल।" 50 यीशुए उसयो बोलया, "जा तेरा जागत जिन्दा है।" उनी माणुए यीशुए दी गल्ल मन्नी कने चली गया। 51 सै अजे रस्ते च ही चलया था, की उदे सेवक उस बाल आई रे कने बोलणा लग्गे, "तेरा जागत जिन्दा है।" 52 उनी उना ला पुछया, "की कुस बकते सै खरा होणा लग्गा?" उना उसला बोलया, "कल दोपहर इक बजे उदा भूखार उतरी गया।" 53 तालू उस जागते दा पिता समझी गया की ऐ उस बकते ही होया है जिस बकते

यीशुए बोलया, तेरा जागत जिन्दा है, "कने उनी कने उदे सारे घरे बालयां यीशुए पर भरोसा किता।" 54 ऐ दुज्जा चमत्कार था जडा यीशुए यहूदिया प्रदेश ला गलील प्रदेश च बापस आई करी किता।

5 इना गल्लां दे बाद यहूदियां दा इक त्योहार होया, कने यीशु यरूशलेम शेहर जो गया। 2 यरूशलेम च भेडां दे फाटके बखे इक तलाब है जिसयो इब्रानी भाषा च बैतहसदा बोलदे न, कने उदे चारो पास्से पंज बरांडे न। 3 उना च मते बीमार, अन्ने, लंगड़े कने सुकयो अंगा बाले, पाणिजे हिलणे दिया आसा च ओथु बेई रेदे थे। 4 क्योंकि परमेश्वरे दे नियुक्त बकते पर स्वर्गादूत तलाब पर उतरी करी पाणिजे जो हिलादें थे: पाणी हिलणे बाद जडा कोई भी पेहले अंदर जांदा था सै ठीक होई जांदा था चाऐ उदी कोई भी बीमारी हो। 5 ओथु इक माणू था, सै ठतियां सालां ला बीमारिया च था। 6 यीशुए उसयो पिया दिखीकरी कने जाणी करी की ऐ इसा हालता च बडे रोजां ला है, उसला पुछया, "क्या तू ठीक होणा चांदा है?" 7 उनी बिमारे जबाब दिता, "प्रभु जी, मेरे बाल कोई माणू नी है, की जालू पाणी हिले, तालू मिंजो तलाब दे अंदर जाणे तांई मदद करे, मैं तलाब दे अंदर जाणे दी कोशिश करदा है, हमेशा मेरे पुजणे ला पेहले ही कोई होर मेरला पेहले तलाब अंदर चली जांदा है।" 8 यीशुए उसला बोलया, "उठ, अपणिया चटाईया जो चुकी करी हंड फिर।" 9 सै माणू झट ठीक होई गया, कने अपणिया चटाईया जो चुकी करी चलणा फिरणा लग्गी पिया। 10 जिस रोजे ऐ सब होया सै सब्ते दा दिन था। इस तांई यहूदी अगुवे उसला जडा ठीक होया था, बोलणा लग्गे, "मूसा दिया व्यवस्था दे अनुसार सब्ते दे रोजे, तिजो चटाईया जो चुकी करी लेई जाणा ठीक नी है।" 11 उनी उना जो जबाब दिता, "जिनी मिंजो ठीक किता उनी मिंजो बोलया है, अपणिया चटाईया चुकी करी चल फिर।" 12 उना उसला पुछया, "सै कुण माणू है जिनी तिजो ऐ बोलया, चटाई जो चुक कने चल फिर?" 13 पर जडा ठीक होई गया था, सै नी जाणदा था की सै कुण है; क्योंकि उसा जगा पर भीड़ होंणे दिया बजा ने यीशु ओथु भिडा ने मिली गया कने उना जो मिल्ला नी। 14 कुछ बकते बाद सै यीशुए जो मंदरे दे अंगणे च मिला, तालू उनी उसला बोलया, "दिख, तू तां ठीक होई गया है; हुण दोबारा पाप मत करदा, इयां ना हो की इसला भी बडी मुसबत तिजो पर आई जा।" 15 उनी माणुए जाई करी यहूदी अगुवां ने बोली दिता की जिनी मिंजो ठीक कितया है सै यीशु है। 16 इसा बजा ने यहूदी अगुवे यीशुए जो सताणां लग्गे, क्योंकि सै ऐसे-ऐसे कम्म सब्ते दे रोजे करदा था। 17 इसा गल्लां पर यीशुए उना ने बोलया, मेरा पिता परमेश्वर हले दीकर कम्म करदा है कने मिंजो भी कम्म करणा चाईदा। 18 यीशुए ऐ बोलया इसा बजा ने यहूदी अगुवे उसयो होर भी जादा मारणे दी कोशिश करणा लग्गे, की सै सिर्फ ऐई नी की सब्ते दे दिने दे रिबाजे जो तोडा दा, पर सै परमेश्वरे जो भी अपना पिता बोली करी, अपने आपे जो परमेश्वर दे बराबर बोला दा था। 19 इसी पर यीशुए उना ने बोलया, मैं तुसां ने सच्च-सच्च बोलदा है, मैं अपु ला कुछ नी करी सकदा है, सिर्फ सेई जडा सै पिता परमेश्वर जो करदे दिखदा है, क्योंकि जिना-जिना कम्मा जो सै करदा है उना जो मैं भी तियां ही करदा है। 20 इस तांई पिता परमेश्वर मिंजो ने प्यार करदा है कने जडे-जडे कम्म सै अपु करदा है, सै सारे उसयो

दसदा है; कने उनी इना ला भी बड़े कम्म उसयो दसणे न, ताकि तुसां हेरान होन। 21 क्योंकि जियां मेरा पिता परमेश्वर मरयां लोकां जो जिन्दा करदा है, तियां ही मैं भी जिना जो चांदा है उना जो जिन्दा करदा है। 22 पिता परमेश्वर कुसी दा भी न्याय नी करदा है, पर न्याय करणे दा सारा कम्म मिंजो देई दितया है, 23 इस ताई जियां सारे लोक पिता परमेश्वर दा आदर करदे न तियां ही मेरा भी आदर करन जडा मेरा आदर नी करदा, सै पिता परमेश्वर दा आदर भी नी करदा है जिनी उसयो भेजया है। 24 मैं तुसां ने सच्च-सच्च बोलदा है, जडा मेरा बचन सुणीकरी मेरे भेजणे बाले पर भरोसा करदा है, हमेशा दी जिन्दगी उदी है, कने उसयो सजा नी मिलणी है पर सै तां अनन्त मौता ला बची गिया है कने उनी पेहले ला ही जिन्दगी च प्रवेश करी लिया है। (aiōnios g166) 25 “मैं तुसां ने सच्च-सच्च बोलदा है, सै बकत ओणा है, कने हुण है, जिदे च मरयां परमेश्वरे दे पुत्र, मेरी अबाज सुणीनी, कने जडे सुणणे उना हमेशा ताई जी पोणा है।” 26 क्योंकि जियां पिता परमेश्वर अपने अंदर जिन्दगी रखदा है, तियां ही उनी अपने पुत्र, जो भी हक दितया है की सै अपने आपे च जिन्दगी रखे; 27 क्योंकि मैं माणुए दा पुत्र है, इस ताई पिता परमेश्वरे मिंजो सारे लोकां जो न्याय करणे दा अधिकार दितया है। 28 इसला हेरान मत होआ, क्योंकि सै बकत ओणा है, की सै सारे लोक जडे मरी गियो न, उना मेरी मतलब की, माणुए दे पुत्रे दी अबाज सुणीकरी जिन्दे होई जाणा है। 29 जिना बाल अच्छी जिन्दगी थी, उना हमेशा दी जिन्दगी ताई जिन्दे होई जाणा है, सै जडे बुराई च जिन्दगी बितान्दे न, उना दोषी होणे ताई जी पोणा है। 30 “मैं अपने आपे ला कुछ नी करी सकदा; मैं लोकां दा न्याय तियां ही करदा है जियां पिता परमेश्वर मिंजो उना दा न्याय करणे ताई बोलदा है, कने मेरा न्याय सही है; क्योंकि मैं अपनी मरजी नी, पर अपने भेजणे बाले दी मजी चांदा है। 31 अगर मैं अपु ही अपनी गबाई दें, तां मेरी गबाई सच्ची नी है। 32 इक होर है जडा मेरा पिता परमेश्वर है, सै भी मेरे बारे च गबाई दिन्दा है, कने मैं जाणदा है की मेरी जडी सै गबाई दिन्दा है, सै सच्ची है। 33 तुसां यहून्ना बपतिस्मा देणेबाले बाल संदेश देणेबाले भेजे कने उनी सचाइया दी गबाई दितियो है। 34 पर मैं अपने बारे च माणुआं दी गबाई नी चांदा है; तमी मैं इसा गबाई दे बारे च दसया है जडी यहून्ना दिती थी ताकि तुहाडा उद्धार होऐ। 35 यहून्ना इक दिव्ये साई था; कने तुहांजो थोडिया देरा ताई उदिया लौई च, मगन होणा खरा लग्गा। 36 पर मेरे बाल यहून्ना ला भी बड़ी गबाई है: क्योंकि जडा कम्म पिता परमेश्वरे मिंजो पूरा करणे ताई दितया सै मेरे बारे च गबाई दिन्दा है। जडा कम्म मैं करी सकदा है, सै गबाई दिन्दा है की मिंजो पिता परमेश्वरे भेजया है। 37 कने पिता परमेश्वर जिनी मिंजो भेजया है, उना ही मेरी गबाई दितियो है तुसां ना तां उदी कदी अबाज सुणी, कने ना उसयो आमणे सामणे दिखया है। 38 कने उदे संदेशा जो मने च टिकाई करी नी रखदे, क्योंकि जिसयो परमेश्वरे भेजया है तुसां उदा भरोसा नी करदे। 39 तुसां पबित्र शाब्बां च ध्याने ने पढी करी तोपदे न, क्योंकि तुसां समझदे न की उना ने हमेशा दी जिन्दगी मिलदी है, कने ऐ सेई बचन है, जडा मेरी गबाई दिन्दा है; (aiōnios g166) 40 पर ऐ सब होणे पर भी अनन्त जिन्दगी पाणे ताई मेरे बाल नी ओणा चांदे न। 41 मैं माणुए ला आदर दी आस नी रखदा है। 42

क्योंकि मैं तुसां जो जाणदा है की तुसां अपने मने च परमेश्वरे ताई प्यार नी रखदे न। 43 मैं अपने पिता परमेश्वर दे अधिकारे ने आया है, कने तुसां मिंजो अपनांदे नी अगर कोई होर अपने ही अधिकारे ने ओऐ, तां उसयो तुसां अपनाई लेंदे न। 44 तुसां मिंजो पर भरोसा नी करी सकदे न, क्योंकि तुसां इकी दुज्जे ला अपनी आदर मान चांदे न, कने तुसां इकलोते परमेश्वरे ला आदर मान पाणे दी कोशिश नी करदे न। 45 ऐ मत समझा, की मैं पिता परमेश्वरे दे सामणे तुसां पर दोष लगा दा: मूसा, जिस पर तुसां आस रखियो है, उनी तुसां पर दोष लगाणे न। 46 क्योंकि अगर तुसां मूसा दा भरोसा करदे, तां मेरा भी भरोसा करदे, इस ताई की उनी भी मेरे बारे च पबित्र शाब्बां च लिखया है। 47 क्योंकि तुसां उदियां लिखियां गल्लां दा भरोसा नी करदे, तां तुसां पक्का ही मेरियां गल्लां दा भी नी करी सकदे।”

6 इना गल्लां दे बाद यीशु गलील झिला च मतलब की तिबिरियासे दिया झिला बखे गिया। 2 कने बड़ी भरी भीड़ उदे पिच्छे चली पेई क्योंकि जडे अनोखे कम्म सै बिमारां पर दसदा था सै उना जो दिखदे थे। 3 तालू यीशु पहाडे पर चढी करी अपण्यां चेलयां सोगी ओथु बैठौ। 4 कने यहूदियां दे फसह दा त्योहारे नेडे ही था। 5 तालू यीशु ने नजरा चुकी करी मती भरी भिडा जो अपने बाल ओदे दिखया, कने फिलिप्पुस ने बोलया, “असां इना जो खाणे ताई रोटी कुथु ला खरदी लोणी?” 6 पर यीशु ऐ गल्ल उसयो परखणे ताई बोली; क्योंकि सै अपु जाणदा था की मैं क्या करणा है। 7 फिलिप्पुसे उसयो जबाब दित्ता, “इतणी रोटियां दी कीमत दो सो दिना दिया मजदुरिया दे बराबर होणी, सै भी उना ताई पूरी नि होणी की उना चे हर इकी जणे जो थोड़ी-थोड़ी मिल्ली जा।” 8 उदे चेलयां चे शमौन पतरस दे भाई अन्दियासे उसयो बोलया, 9 “ऐथू इक जागत है जिदे बाल जौ दियां पंज रोटियां न कने दो मछियां न, पर ऐ इतणे लोकां ताई काफी नी है।” 10 यीशु ऐ बोलया, “लोकां जो बढाई दिया।” उसा जगा पर मता घा था: तालू सै लोक बैठी गे, कने सै गिणतिया च लगबग पंज हजार थे। 11 तालू यीशु ऐ रोटियां लियां, कने धन्यवाद करिके जडे बैठयो थे उना जो बंडी दितियां: कने तियां ही मछियां जो भी जितणियां सै चांदे थे बंडी दितियां। 12 जालू सै खाई करी रजी गे तां उनी अपने चेलयां ने बोलया, “बचयां टुकडयां जो गठेरी लिया, ताकि कुछ बर्बाद ना होऐ।” 13 उना सै रोटियां दे टुकडे गठेरे, कने सै पंज रोटियां दे टुकडे जडे खाणे बालयां ला बची गियो थे उना ने बाहरा टोकरीयां भरियां। 14 तालू जडा अनोखा कम्म उनी करी के दसया उसयो दिखीकरी लोक बोलणा लग्गे; की सै परमेश्वरे दा संदेश देणेबाला है जडा संसारे च ओणे बाला था, सै पका ऐई है। 15 यीशु ऐ जाणी करी की लोक मिंजो राजा बणाणे ताई आई करी पकडना चांदे न, फिरी पहाडे पर किला ही चली गिया। 16 फिरी जालू संज होई, तां उदे चेले झिला कंडे पर आये, 17 कने किस्तिया पर चढी करी झिला पार कफरनहम शहर जो जाणा लग्गे: उस बेले नेहरा होई गिया था, कने यीशु हले दीकर उना बाल नी पुजया था। 18 कने तुफाने दिया बजा ने झिला च लेहरा उठणा लगियां। 19 जालू सै चलदे-चलदे लगबग चार मील निकली गे, तां उना यीशु ऐ जो झिला पर चलदे कने किस्तिया बखे ओदे दिखया, कने चेले डरी गे। 20 पर यीशु ऐ उना ने बोलया, “मैं है; डरा मत।”

21 सै उसयो किस्तिआ पर चढाणे ताई तैयार होऐ कने झट सै किस्ति उसा जगा जाई पुज्जी जिंसा जगा सै चलयो थे। 22 दुज्जे रोजे उना भिडा, जडी झिला पार खडोतियो थी, ऐ दिखया की ऐथू इकी जो छडी करी होर कोई लोकी किस्ति नी थी, कने यीशु अपण्यां चेलयां सोगी इसा किस्तिआ पर नी चढया था, बस उदे चेले ही गियो थे। 23 होर लोकी किस्तिआं तिबिरियास शेहरे ला उसा जगा पर आईयां, जिथू उना प्रभु दा धन्यवाद करणे बाद रोटी खादी थी। 24 जालू भिडा दिखया, की ऐथू ना यीशु है, ना उदे चेले, तां सै भी लोकियाँ-लोकियाँ किस्तिआ पर चढी करी यीशुऐ जो तोपदे कफरनहम शेहर च जाई पुज्जे। 25 कने झिला दे पार उसला मिली करी उसयो बोलया, “गुरू जी, तू ऐथू कालू आया?” 26 यीशुऐ उना जो जबाब दिता, “मैं तुसां ने सच्च-सच्च बोलदा है, तुसां मिंजो इस ताई नी तोपा दे की तुसां अनोखे कम्म दिखयो, पर इस ताई की तुसां रोटीयां खाई करी रजी गे। 27 खत्म होणे बाले खांणे पिच्छे मेहनत मत करा, पर उस खांणे ताई करा जडा हमेशा दिया जिन्दगिया दीकर रेंदा है, जडा मैं माणुऐ दे पुत्रे तुहांजो ऐ खाणा देणा है, क्योंकि पिता परमेश्वरे मिंजो ऐसा करणे दा हक दितया है।” (aiōnios g166) 28 उना यीशुऐ ला पुछया, “परमेश्वरे दा कम्म करणे ताई असां क्या करन?” 29 यीशुऐ उना जो जबाब दिता, “परमेश्वर चांदा है की तुसां उस पर भरोसा करन जिसयो उनी भेजया है।” 30 तालू उना उसला पुछया, “फिरी तू कुण दिया चमत्कार दसदा है, कि असां उसयो दिखीकरी तिजो पर भरोसा करन? तू कुण दिया कम्म दसदा है? 31 साडयां पूर्वजां सुनसान जगा च मन्ना खादा; जियां पबित्र शास्त्र च लिखया है, मूसा उना जो खांणे ताई स्वर्गे ला रोटी दिती।” 32 यीशुऐ उना बोलया, “मैं तुसां ने सच्च-सच्च बोलदा है तुहांजो सै रोटी स्वर्ग ला मूसा नी दितियो, पर मेरे पिता परमेश्वर तुहांजो स्वर्ग ला सच्ची रोटी दिन्दा है। 33 क्योंकि परमेश्वरे दी रोटी सेई है, जडी स्वर्ग ला उतरी करी संसारे दे लोकां जो जिन्दगी दिन्दी है।” 34 तालू उना उसला बोलया, “प्रभु जी, ऐ रोटी सांझो रोज ही दे कर।” 35 यीशुऐ उना ने बोलया, “रोटी जडी हमेशा दी जिन्दगी दिन्दी है सै रोटी मैं है: जडा मेरे बाल ओगा उनी कदी भूखे नी होणा कने जडा मिंजो पर भरोसा करगा, सै कदी तरिणा नी होणा। 36 पर मैं तुसां ने पेहले ही बोलया था, की तुसां मिंजो दिखी भी लिया है तमी भरोसा नी करदे। 37 जडा कुछ पिता परमेश्वरे मिंजो दिन्दा है, सै सब मेरे बाल ओगा है, कने जडा कोई मेरे बाल ओगा उसयो मैं कदी नी कडगा। 38 क्योंकि मैं अपणी इच्छा नी, पर अपने भेजणे बाले दी इच्छा पुरी करणे ताई स्वर्ग ला उतरया है। 39 कने मेरे भेजणे बाले दी इच्छा ऐ है की जडा कुछ उनी मिंजो दितया है, उदे चे मैं कुछ नी गबां पर उसयो आखरी रोजे इसयो फिरी ला जिन्दा करे। 40 क्योंकि मेरे पिता परमेश्वरे दी इच्छा ऐ है, की जडा कोई मिंजो दिखदा है, कने मिंजो पर भरोसा करे, उसयो हमेशा दी जिन्दगी मिल्ले; कने मैं उसयो आखरी रोजे फिरी जिन्दा करी दिगा।” (aiōnios g166) 41 तालू यहूदी अगुवे उस पर बुडबडाणा लग्गे, इस ताई की उनी बोलया था, “जडी रोटी स्वर्ग ला उतरियो है सै मैं है।” 42 कने उना बोलया, “क्या ऐ यूसुफे दा पुत्र यीशु नी है, जिसदे माता-पिता जो असां जाणदे न? तां सै कजो बोलदा न की मैं स्वर्ग ला उतरया है?” 43 यीशुऐ उना जो

जबाब दिता, “अपु चे मत बुडबुडा। 44 कोई मेरे बाल नी आई सकदा है, जालू दीकर पिता परमेश्वर, जिनी मिंजो भेजया है, उसयो अपने बाल खिची नी ले; कने मैं उसयो आखरी रोजे फिरी जिन्दा करी देणा है। 45 परमेश्वरे दा संदेश देणेबालयां लेखां च ऐ लिखया है, सै सारे परमेश्वरे दिया तरफा ला सिखाऐ होणे न। जिनी कुनी पिता परमेश्वर ला सिखया कने सुणाया है, से मेरे बाल ओदा है। 46 कुनी भी पिता परमेश्वर जो नी दिखया। मैं किल्ला ही है, जडा परमेश्वर दिया तरफा ला आया है, जिनी उसयो दिखया है। 47 मैं तुसां ने सच्च-सच्च बोलदा है, की जडा कोई मिंजो पर भरोसा करदा है, हमेशा दी जिन्दगी उदी है। (aiōnios g166) 48 रोटी जडी जिन्दगी दिन्दी है सै मैं है। 49 तुहाडे पूर्वजां सुनसान जगा च मन्ना खादा कने मरी गे। 50 ऐ जिन्दगी दी रोटी है जडी स्वर्ग ला उतरदी है ताकि माणु इसयो खा कने कदी मेरे ना। 51 जिन्दी रोटी जडी स्वर्ग ला उतरी सै मैं है। अगर कोई इसा रोटीया चे खा, तां हमेशा जिन्दा रेणा, कने जडी रोटी मैं संसारे दिया जिन्दगिया ताई दिगा, सै मेरा मास है।” (aiōn g165) 52 इस पर यहूदी अगुवे ऐ बोली करी अपु चे लडना लग्गे, “ऐ माणु सांझो कियां अपना मास खांणे जो देई सकदा है?” 53 यीशुऐ उना ने बोलया, “मैं तुसां ने सच्च-सच्च बोलदा है जालू दीकर मेरा, माणुऐ दे पुत्रे दा मास नी खांगे, कने उदा खून नी पीगे, तुसां च जिन्दगी नी है। 54 जडा मेरा मास खांदा है, कने मेरा खून पिंदा है, हमेशा दी जिन्दगी उदी ही है, कने न्याये दे रोजे उसयो फिरी जिन्दा करणा। (aiōnios g166) 55 क्योंकि मेरा शरीर सच्ची खांणे दी चीज है कने मेरा खून भी सच्ची पिणे दी चीज है। 56 जडा मेरा मास खांदा है कने मेरा खून पिंदा है सै मिंजो च टिकी रेंदा है, कने मैं उदे च रेंदा है। 57 मेरा पिता परमेश्वर जिनी मिंजो भेजया है, सै जिन्दगी दिन्दा है। जियां उनी मिंजो जिन्दगी दितियो, तियां ही मैं भी उस माणुऐ जो जिन्दगी देणी जडा मेरे शरीर जो खांदा है।” 58 ऐ सै रोटी है, जडी स्वर्ग ला उतरी होई है; पर तुहाडे पूर्वजां मन्ना खादा, कने मरी गे: जडा कोई ऐ रोटी खांगा, उनी हमेशा जिंदा रेणा। (aiōn g165) 59 ऐ गल्लां उनी कफरनहम शेहरे दे इक यहूदी जंज घर च उपदेश दिन्दे बेले बोलियां। 60 ताई तां यीशुऐ दे चेलयां चे मतयां ऐ सुणीकरी बोलया, ऐ समझणा बडा मुश्किल है; की कुण इसयो मन्नी सकदा है? 61 यीशुऐ अपने मने च ऐ जाणी करी की मेरे चेले अपु चे इसा गल्ला दे बारे च बुडबुडा दे न, उना ला पुछया, “क्या ऐ गल्ल तुहांजो मिंजो पर भरोसा करणे ला रोकदी है? 62 कने अगर तुसां मिंजो माणुऐ दे पुत्रे जो स्वर्ग जांदा दिखगे, जिथू सै पेहले था, तां क्या होंगा? 63 परमेश्वरे दी आत्मा तां जिन्दगी देणेबाली है, शरीर ने कोई फायदा नी है: जडियां गल्लां मैं तुसां ने बोलियाँ सै पबित्र आत्मा ने बोलियां न, कने ऐ गल्लां माणुआं जो जिन्दगी दीदियां न। 64 पर तुसां चे कितणे ऐसे न जडे भरोसा नी करदे न।” क्योंकि यीशु तां पेहले ही जाणदा था की जडे भरोसा नी करदे न, सै कुण न; कने कुनी उसयो पकडवाणा है। 65 कने यीशुऐ बोलया, इसी ताई मैं तुसां ने बोलया था की जालू दीकर पिता परमेश्वर दिया तरफा ला ऐ बरदान ना होऐ, तालू दीकर सै मेरे बाल नी आई सकदा है। 66 इसी पर उदे चेलयां चे मते बापस फिरी गे कने उदे बाद कदी उस सोगी नी चले। 67 तालू यीशुऐ उना बाहरां चेलयां ने बोलया, “क्या तुसां भी चली

जाणा चांदे न?" 68 शमौन पतरसे उसयो जबाब दिता, प्रभु जी, असां कुसदे बाल जाणा? हमेशा दिया जिन्दगिया दियां गल्लां तां तैरे बाल ही न। (aīnōis g166) 69 कने असां भरोसा कितया है, कने जाणी गियो न, की परमेश्वरे दा पबित्र जन कने मसीहा तू ही है जिसयो परमेश्वरे भेजया है। 70 यीशुऐ उसयो जबाब दिता, "क्या मैं तुसां बाहरां चेलयां जो नी चुणयां है? तमी तुसां च इक माणु बुरा है।" 71 ऐ उनी शमौन इस्करियोती दे पुत्र यहूदा दे बारे च बोलया, क्योंकि ऐई जडा उना बाहरां च था, जिनी उसयो पकड़वाया था।

7 इना गल्लां बाद यीशु गलील प्रदेश च गुमदा रिया, क्योंकि यहूदी अगुवे उसयो मारणे दी कोशिश करा दे थे, इस ताई सै यहूदिया प्रदेश च गुमणा नी चांदा था। 2 कने यहूदी लोकां दा इक त्योहारे ओणे बाला था जिसयो झोपडियां दा त्योहार बोलदे थे। 3 इस ताई यीशुऐ दे भाईयां उसयो बोलया, "ऐथू ला यहूदिया प्रदेश जो चली जा, की जडे कम्म तू करदा है, उना जो तैरे चले भी दिखन। 4 क्योंकि कोई भी जडा प्रसिद्ध होणा चांदा है सै लुकी करी कम्म नी करदा, अगर तू ऐ कम्म करदा है, तां अपने आपे जो संसारे च सबना दे सामणे कर।" 5 क्योंकि यीशुऐ दे भाई भी उस पर भरोसा नी करते थे। 6 तालू यीशुऐ उना ने बोलया, "मेरा बकत हले नी आया है; पर तुहाड़े ताई कोई भी बकत सही है। 7 संसारे दे लोक तुसां ने बैर नी करी सकदे न, पर सै मिजो ने बैर करदे न, क्योंकि मैं उदे खिलाफ ऐ गबाई दिन्दा है, की उना दे कम्म बुरे न। 8 तुसां त्योहारे जो जा; मैं हले इसी त्योहारे जो नी जाणा, क्योंकि हले दीकर मेरा बकत पूरा नी होया है।" 9 सै उना ने ऐ गल्लां बोली करी गलील प्रदेश च ही रिया। 10 पर जालू उदे भाई त्योहारे जो चली गे, तां सै बादे च लुकी करी ओथु गिया। 11 यहूदी लोक त्योहारे च ऐ बोली करी यीशुऐ जो तोपणा लागे की सै कुथु है? 12 कने लोकां च उदे बारे च लुकी-लुकी करी मतियां गल्लां बोलियां: कुछ बोलदे थे की, "सै भला माणु है।" कने कितणे ही बोलदे थे, की नी सै लोकां जो भटकांदा है। 13 यहूदी अगुवे दे डरे दिया बजा ने कोई भी माणु उदे बारे च खुली करी नी बोलदा था। 14 कने जालू त्योहारे दा अधा रोज होई गिया; तां यीशु मंदरे च जाई करी उपदेश देणा लग्गा। 15 तालू यहूदी लोक हेरान होईकरी बोलणा लग्गे, की ऐ माणु बिना पबित्र शास्त्र पढयो ज्ञानी कियां बणी गिया? 16 यीशुऐ उना जो जबाब दिता, "मेरा उपदेश मेरा अपणा नी है, पर परमेश्वरे दिया तरफा ला है जीनी मिजो भेजया है। 17 अगर कोई उदिया इच्छा पर चलणा चा, तां उनी जाणी लेंणा की मेरी शिक्षा परमेश्वरे दिया तरफा ला ओदी है, पर उपदेशे दे बारे च जाणी लेंणा की सै परमेश्वरे दिया तरफा ला है। 18 जडा अपणिया तरफा ला कुछ बोलदा है, सै अपणी ही इज्जत मान चांदा है; पर जडा अपने भेजणे बाले दा इज्जत मान चांदा है सै ही सच्चा है, कने उदे च धोखा नी है। 19 क्या मूसा परमेश्वरे दा संदेश देणेबाले तुहांजो व्यवस्था नी दितियो है? तमी तुसां चे कोई भी व्यवस्था पर नी चलदा है। तुसां कजो मिजो मारी देणा चांदे न?" 20 लोकां जबाब दिता; "तिजो च बुरी आत्मा है! कुण तिजो मारणा चांदा है?" 21 यीशुऐ उना जो जबाब दिता, "मैं इक कम्म सब्ते बाले दिने किता, कने तुसां सारे हेरान होई गे। 22 इसा बजा ने मूसा तुहांजो खतने दा हुकम दितया

है, ऐ नी की सै मूसा दिया तरफा ला है पर ऐ पूर्वजां ला चली आईयो है, कने सब्ते दे रोजे तुसां माणुऐ दा खतना करदे न। 23 जालू सब्ते दे रोजे माणुऐ दा खतना करदे न ताकि मूसा दिया व्यवस्था दा हुकम न टली जा, तां तुसां मिजो पर कजो इस ताई गुस्सा करदे न, की मैं सब्ते दे रोजे इकी माणुऐ जो पुरी तरा ठीक किता। 24 तुसां बाहरी रूप दिखीकरी न्याय मत करा, पर सच्चाईया ने न्याय करा।" 25 तालू कितणे यरूशलेम शहर दे रेणेबाले बोलणा लग्गे, "क्या ऐ सै ही नी है, जिसयो साड़े अगुवे मारणे दी कोशिश करा दे न? 26 पर दिखा, सै तां शरेआम गल्लां करदा है कने कोई उसयो कोई कुछ नी बोलदा है; क्या होई सकदा की यहूदी अगुवां सच्ची जाणी लिया है की, ऐई मसीह है? 27 इसयो तां असां जाणदे न, की ऐ कुथु दा है; पर मसीह जालू ओणा है, तां कुसयो नी पता होणा है सै कुथु दा है।" 28 तालू यीशुऐ मंदरे च उपदेश दिन्दे होऐ जौरे ने बोलया, "तुसां मिजो जाणदे न, कने ऐ भी जाणदे न की मैं कुथु दा है: मैं तां अपु ला नी आया है पर मिजो भेजणे बाला भरोसेमंद है, उसयो तुसां नी जाणदे न। 29 पर मैं उसयो जाणदा है; क्योंकि मैं उदिया तरफा ला है कने मिजो उनी ही भेजया है।" 30 इसा गल्ला पर अगुवां उसयो पकड़ना चाया पर तमी कुनी भी उसयो गिरफ्तार नी किता, क्योंकि उदा मरणे दा सही बकत हले दीकर नी आया था। 31 कने भिडा चे मतयां यीशुऐ पर भरोसा किता, कने बोलणा लग्गे, की जालू मसीह ओणा है, तां उनी क्या इंदे भी जादा अनोखे कम्म दसणे जडे इनी दसे न? 32 फरीसियां लोकां जो उदे बारे च ऐ गल्लां बल्ले-बल्ले करदे सुणाया; कने बड्डे याजकां कने फरीसियां उसयो पकड़ने ताई मंदरे दे रखबाले भेजे। 33 इस पर यीशुऐ बोलया, "मैं थोडिया देरा दीकर तुहाड़े सोगी है; फिरी मैं अपने भेजणे बाले दे बाल बापस चली जाणा है। 34 तुसां मिजो तोपणा है, पर मैं मिलणा नी है; कने जिथू मैं है, ओथु तुसां आई नी सकदे।" 35 यहूदी अगुवां अपु चे बोलया, इनी कुथु जाणा की सांझो इनी मिलणा ही नी है। क्या सै उना बाल जांगा जडे यूनान शहरे च लग-लग जगा च रेंदे न, कने यूनान दे लोकां जो भी उपदेश दिगा? 36 सै क्या बोलणा चांदा है, जडी उनी बोली, की तुसां मिजो तोपणा है, पर मैं नी मिलणा है: कने जिथू मैं है, ओथु तुसां नी आई सकदे? 37 फिरी त्योहारे दे आखरी रोजे, जडा खास दिन है, यीशु खड्डोता कने जौरे ने बोलया, "अगर कोई त्रिणा है तां मेरे बाल ओऐ कने पांणी पिऐ? 38 जडा मिजो पर भरोसा करगा, जियां पबित्र शास्त्रां च लिख्या है, उदे मने चे पाणिए दियां खड्डां जडियां जिन्दगी दिन्दियां सै चली पोणियां न।" 39 जालू यीशुऐ ऐ गल्ल बोली, तां सै पबित्र आत्मा दे बारे च बोला दा था, सै उना सारयां जो मिलदा है जडे उस पर भरोसा करदे थे, क्योंकि पबित्र आत्मा हल्ले दीकर नी उतरया था। क्योंकि परमेश्वरे हले दीकर यीशु दी महिमा जो प्रगट नी कितया था। 40 तालू भिडा चे केई लोकां ऐ सुणीकरी बोलया, "सच्ची ऐई है सै परमेश्वरे दा संदेश देणेबाला है, जिसदी असां उम्मीद रखियो है।" 41 लोकां बोलया, ऐ मसीह है, पर कुनी बोलया, "कजो? क्या मसीह गलील प्रदेश ला ओणा है? 42 पर पबित्र शास्त्रां च लिख्या है, की मसीह दाऊदे दे बंशे ला कने बैतलहम शहरे ला ओणा है, जिथू दाऊद रेंदा था?" 43 इयां यीशुऐ दिया बजा ने लोकां च फूट पेई गेई। 44 उना चे कितणे ही उसयो पकड़ाणा चांदे थे, पर

कोई भी उसयो गिरफ्तार नी करी सकया। 45 तालू सपाईं बड़े याजकां कने फरीसियां बाल बापस आये, कने उना सिपाईयां ला पुछया, “तुसां उसयो कनी लंदा?” 46 सिपाईयां जबाब दिता, की कुनी माणुए कदी भी ऐदिया गल्लां नी बोलियां। 47 फरीसियां उना जो जबाब दिता, “क्या तुसां भी भटकी गियो न? 48 क्या सरदारां या फरीसियां चे कुनी भी उस पर भरोसा किता है? 49 पर ऐ लोक जडे मूसा दी व्यवस्था जो नी जाणदे, उना जो परमेखरे श्राप दितया है।” 50 नीकुदेमुसे, (जड़ा राती यीशुए बाल आया था कने उना चे इक था), उना ने बोलया, 51 “क्या साडी व्यवस्था कुसी माणुए जो जालू दीकर पेहले उदे बारे च सुणीकरी समझी ला ले की सै क्या करदा है, उसयो सजा दिन्दी है?” 52 उना उसयो जबाब दिता, “क्या तुमी गलील प्रदेशे दा है? पबित्र शास्त्र च तोप कने तां तिजो पता चलणा, की गलील दे इलाके ला कोई परमेखरे दा संदेश देणेबाले प्रगट नी होंगा है।” 53 तालू सारे अपने-अपने घरे जो चली गे।

8 पर यीशु अपने चेलयां सोगी जैतून रूखां दे पाहडे पर गया। 2 यीशु अगली ब्यागा तडके मंदरे दे अंगणे च बापस आया, कने मते सारे लोक उदे बाल आये; कने सै बेठी करी उना जो उपदेश देणा लग्गा। 3 जालू सै बोला दा ही था, तां धार्मिक व्यवस्था जो सिखाणे बाले कने फरीसी इक जनानिया जो लेई आये जडी व्यभिचार च पकड़ियो थी, कने उसा जो सामणे खेडी करी यीशुए बोलया, 4 “गुरू जी, ऐ जनानी व्यभिचार करदे पकड़ियो है। 5 व्यवस्था च मूसा सांझो हुकम दितया है की ऐसे माणुए जो पथर मारी करी मारी दिया: तां तू क्या बोलदा है की सांझो क्या करणा चाईदा?” 6 उना यीशुए जो परखणे तांई ऐ गल्ल बोलि थी ताकि उना जो यीशुए पर दोष लांणे तांई कोई गल्ल मिल्ले, पर यीशु झुकी करी उंगलियां ने जमिना पर लिखणा लग्गा। 7 जालू सै उसला पछेदे रे, तां उनी सिधे होईकरी उना ने बोलया, “तुसां चे जिनी भी कदी पाप नी कितया है, सै ही पेहले इसा जो पथर मारे।” 8 कने फिरी झुकी करी उंगलियां ने जमिना पर लिखणा लग्गा। 9 पर ऐ सुणीकरी बडयां ला लेईकरी छोटयां दीकर सारे इक-इक करी के निकली गे क्योंकि सै जाणदे थे की सै पापी न, कने सिर्फ यीशु कने सै जनानी ओथु रेई गेई। 10 यीशुए सिधे होईकरी उसा ने बोलया, “हे जनानी, सै कुथु गे? क्या कुनी तिजो सजा देणे दा हुकम नी दिता?” 11 उना बोलया, “प्रभु जी, कुनी भी नी।” यीशुए बोलया, “मैं भी तिजो सजा देणे दा हुकम नी दिन्दा; हुण बापस घरे चली जा, कने हुण दोबारा कदी जिंदगी च पाप मत करदी।” 12 तां यीशुए लोंका ने फिरी बोलया, “संसारे दी लौ मैं है; जड़ा मेरियां गल्लां पर चलगा, उनी नेहरे च नी चलणा है, कने उसयो सै लौ मिलणी जडी हमेशा दी जिन्दगी दिन्दी है।” 13 फरीसियां उसला बोलया; “तू अपनी गबाई अपु ही दिन्दा है, तेरी गबाई सच्ची नी है।” 14 यीशुए उना जो जबाब दिता, “अगर मैं अपनी गबाई अपु दिन्दा है, तमी मेरी गबाई ठीक है, क्योंकि मैं जाणदा है, की मैं कुथु ला आया है कने कुथयो जाणा है? पर तुसां नी जाणदे की मैं कुथु ला ओदा है या कुथयो जाणा है। 15 तुसां लोक इन्सानी सोच ने बाकी लोकां दा न्याय करदे न; मैं कुसदा भी न्याय नी करदा है। 16 कने अगर मैं न्याय करे भी तां मेरा न्याय सच्चा है; क्योंकि मैं किल्ला नी है, पर

मैं पिता परमेखरे सोगी है, जिनी मिंजो भेजया है। 17 कने मूसा दिया व्यवस्था च लिखया भी है; दो जणया दी गबाई मिली करी ठीक होंदी है। 18 इक तां मैं अपु अपनी गबाई दिन्दा है, कने दूजा मेरा पिता परमेखर मेरी गबाई दिन्दा है जिनी मिंजो भेजया है।” 19 उना यीशुए ला पुछया, तेरा पिता कुथु है? यीशुए जबाब दिता, “ना तुसां मिंजो जाणदे न, ना तुसां मेरे पिता परमेखर जो, अगर मिंजो जाणदे होदें तां मेरे पिता परमेखर जो भी जाणदे।” 20 ऐ गल्लां उनी मंदरे दे अंगणे च उपदेश दिन्दे भंडार घरे च बोलियां, कने कुनी भी उसयो नी पकड़या; क्योंकि उदे मरणे दा बकत हले दीकर नी आया था। 21 यीशुए फिरी उना ने बोलया, “मैं चली जाणा है, कने तुसां मिंजो तोपणा है कने तुसां अपने पाप माफ होयो बिना ही मरी जाणा। जिथू मैं जांदा है, ओथु तुसां नी आई सकदे ना।” 22 इस पर यहूदी अगुवां बोलया, क्या इनी अपने आपे जो मारी लेणा है, की ऐ बोला दा है, “जिथू मैं जांदा है ओथु तुसां नी आई सकदे न?” 23 यीशुए उना ने बोलया, “तुसां इस संसारे च पैदा होयो न, पर मैं स्वर्गे ला आया है, तुसां इस संसारे द न, मैं संसारे दा नी है। 24 इस तांई मैं तुसां ने बोलया, कि तुसां अपने पापां माफ होयो बिना ही मरी जाणा है, अगर तुसां भरोसा नी करदे की मैं सै ही है जड़ा ओणे बाला है, तां तुसां मरी जाणा, कने तुहाडे पाप माफ नी किते जाणे न।” 25 यहूदी अगुवां उसला पुछया, “तू कुण है?” यीशुए उना ने बोलया, जालू ला मैं उपदेश देणा शुरू कितया है तालू ला मैं दसदा आया है की मैं सेई है। 26 मिंजो तुहाडे न्याय दे बारे च तुसां जो मता कुछ बोलणा है, पर मिंजो भेजणे बाला सच्चा है। कने जड़ा मैं उसला सुणदा है, सै ही संसारे दे लोकां जो बोलदा है। 27 सै हले दीकर ऐ नी समझी सके थे की सांझो ने पिता परमेखर दे बारे च बोला दा है। 28 तालू यीशुए बोलया, “जालू तुसां मिंजो, माणुए दे पुत्रे जो उपर चढ़ागे, जालू ला मैं उपदेश देणा शुरू कितया है तालू ला मैं दसदा आया है की मैं सेई है, कने अपने आपे ला कुछ नी करदा है, पर जियां मेरे पिता परमेखरे मिंजो सिखया है, तियां ही ऐ गल्लां बोलदा है। 29 कने मिंजो भेजणे बाला मेरे सोगी है, उनी मिंजो किल्ला नी छडया; क्योंकि मैं हमेशा ला ही कम्म करदा है, जिस ने सै खुश होंदा है।” 30 मतयां लोकां जिना यीशु जो ऐ गल्लां बोलदे सुणया, उस पर भरोसा किता। 31 तालू यीशुए उना यहूदी लोकां ने जिना उस पर भरोसा कितया था, बोलया, “अगर तुसां मेरी गल्लां च बणी रेगे, तां सच्ची मेरे चले न। 32 तुसां सच्च जो जाणना, कने सच्च ने तुहांजो अजाद करणा।” 33 उना उसयो जबाब दिता, “असां तां अब्राहम दे बंशज न, कने कदी कुसदे गुलाम नी रे; फिरी तू कजो बोला दा, की तुसां अजाद होई जाणा?” 34 यीशुए उना जो जबाब दिता, “मैं तुसां ने सच्च-सच्च बोलदा है की जड़ा कोई पाप करा दा है सै पापे दा गुलाम है। 35 कने सेवक हमेशा घरे च नी रेंदा है; पर पुत्र हमेशा घरे च रेंदा है। (aion g165) 36 इस तांई अगर पुत्र तुहांजो अजाद करगा तां, तुसां सच्ची दे अजाद होणा है। 37 मैं जाणदा है की तुसां अब्राहम दे बंशज दे न; तमी मेरे उपदेशां दा पालन नी करणा, तां तां तुसां मिंजो मारी देणा चांदे न। 38 मैं उना चिंजा जो दस्सा दा है जिना जो मैं दिखया है जालू मैं पिता परमेखरे सोगी था, कने तुसां सै ही करदे रेदे न जड़ा तुसां अपने पिता ला सुणाया है।” 39 उना उसयो जबाब दिता, “साडा पूर्वज तां अब्राहम है।”

यीशुए उना ने बोलया, अगर तुसां अब्राहम दे बंशज होंदे, तां जडा अब्राहम करदा था सै कम्म तुसां भी करदे। 40 अब्राहमे जडा किता, सै करणे दिया बजाए तुसां मिंजो मारणे दी कोशिश करा दे न, जिनी तुहांजो सच्चा बचन सुणाया जडा परमेश्वरे ला सुणाया ऐसा तां अब्राहमे नी कितया था। 41 तुसां अपने पिता सांई कम्म करदे न, उना उसयो बोलया, “असां व्यभिचारे ने नी जमयो न, साडा सिर्फ इक ही पिता है सै ही परमेश्वर है।” 42 यीशुए उना ने बोलया, “अगर परमेश्वर तुहाडा पिता होंदा, तां तुसां मिंजो ने प्यार रखदे; क्योंकि मै परमेश्वरे दिया तरफा ला आया है; मै अपणिगा इच्छा ने नी आया है, उनी ही मिंजो भेजया है। 43 जडा मैं कुछ बोलदा है सै तुसां कजो नी समझदे न? इस तांई तुसां मेरे संदेश जो मनणे तांई मना करदे न। 44 तुसां अपने पिता शैताने ला न, कने अपने पिता दियां जस्रतां जो पूरा करणा चांदे न। सै तां शुरू ला ही हत्यारा है, कने सै कदी भी सच्चा नी था, क्योंकि सच्च उदे अंदर है ही नी: जालू सै जूठ बोलदा है, तां सै अपने सभावे ने जूठ बोलदा है; क्योंकि सै जूठा है, बल्कि जूठ दा पिता है। 45 पर मै सच्च बोलदा है, इस तांई तुसां मेरा भरोसा नी करदे? 46 तुसां चे कुण मिंजो पापी साबित करी सकदा है? अगर मैं सच्चा है, तां तुसां मिंजो पर भरोसा कनी करदे? 47 जडा कोई भी परमेश्वरे ने रिश्ता रखदा है, सै परमेश्वरे दियां गल्लां सुणदा है; कने तुसां इस तांई नी सुणदे क्योंकि तुहाडा परमेश्वरे सोगी कोई रिश्ता नी है।” 48 ऐ सुणीकरी यहूदी अगुवां उसयो बोलया, “क्या असां ठीक नी बोलदे न, की तू सामरी है, कने तेरे अंदर बुरी आत्मा है?” 49 यीशुए जबाब दिता, “मिंजो च बुरी आत्मा नी है; पर मै अपने पिता परमेश्वर दा आदर करदा है, कने तुसां मेरा निरादर करदे न। 50 मै अपना आदर मान नी चांदा है, पर इक है जडा चांदा है मिंजो आदर मान मिल्ले, कने सै सेई है जडा न्याय भी करदा है। 51 मैं तुसां ने सच्च-सच्च बोलदा है, अगर कोई माणु मेरियां शिक्षा पर चलगा, तां उनी कदी नी मरणा है।” (aiōn g165) 52 यहूदी अगुवां उसयो बोलया, “हुण सांझो पता लगी गिया की तिजो अंदर बुरी आत्मा है: अब्राहम मरी गिया है, कने परमेश्वरे दा संदेश देणेबाले भी मरी गियो न कने तू बोलदा है, अगर कोई मेरे संदेश जो मनगा तां उनी अनन्तकाल दीकर मरणा नी है।” (aiōn g165) 53 साडा पूर्वज अब्राहम तां मरी गिया है, क्या तू उसला भी बडा है? कने परमेश्वरे दा संदेश देणेबाले भी मरी गियो न, तू अपने आपे जो क्या समझदा है। 54 यीशुए जबाब दिता, “अगर मैं अपु अपनी तारीफ करे, तां मेरी तारीफ कुछ नी, पर जडा मिंजो आदर मान दिन्दा है, सै मेरा पिता परमेश्वर है, कने जिसयो तुसां बोलदे न, की सै तुहाडा परमेश्वर है। 55 कने तुसां तां उसयो नी जाणया, पर मै उसयो जाणदा है, कने अगर मैं बोले की मै उसयो नी जाणदा है, तां मै तुहाडे सांई जूठा बणना: पर मै उसयो जाणदा कने उदे हुकम मनदा है। 56 तुहाडा पूर्वज अब्राहम मेरा दिन दिखणे दिया आसा च बडा मगन था; कने उनी दिखया कने खुश होया।” 57 यहूदी अगुवां उसयो बोलया, “हले दीकर तू पंजा सालां दा भी नी है, फिरी भी तू अब्राहम जो दिखया है?” 58 यीशुए उना ने बोलया, मै तुसां ने सच्च-सच्च बोलदा है, अब्राहम पैदा होणे ला पेहले, मै है। 59 तालू लोकां यीशुए जो मारणे तांई पथर चुके, पर यीशु लुकी करी मंदरे ला निकली गिया।

9 फिरी यीशुए जांदे बेले इक माणुए जो दिखया, जडा जमदा ही अन्ना था। 2 कने उदे चेलयां उसला पुछया, “गुरू जी, कुनी पाप कितया था की ऐ अन्ना जमया, इनी माणुए, या उदे माता पिता?” 3 यीशुए जबाब दिता, ना तां इनी पाप कितया था, ना तां इदे माता पिता: पर ऐ इस तांई अन्ना जमया, की परमेश्वरे दी शक्ति इदे च प्रगट होऐ। 4 जिनी मिंजो भेजया है; सांझो झट ही उदे दितयो कम्मा जो पूरा करणा है: सै रात ओणे बाली है जिदे च कोई कम्म नी करी सकदा है। 5 जालू दीकर मैं संसारे च है, तालू दीकर संसारे दी लौ मैं है। 6 ऐ बोली करी उनी जमिना पर थक्या कने उसी थके ने मिटी सेडी कने सेई मिटी उस अन्ने दिया हखी पर लगाई करी। 7 उसयो बोलया, “जा, कने अपना मु शीलोह दे कुण्डे च धोई ले” (शीलोह दे कुण्डे दा मतलब है भेजया है) तां उनी जाई करी धोता, कने जालू सै घरे जो बापस ओणा लग्गा तां उसयो मिलणा लगी पिया। 8 तालू उदे पडोसी कने होर लोक जिना उसयो पेहले भीख मंगदे दिखया था, इक दुज्जे ने बोलणा लग्गे, “क्या ऐ सै ही नी है, जडा बेईकरी भीख मंगदा था?” 9 केईयां लोका बोलया, ऐ सेई है, होरनी बोलया, नी, पर उदे सांई है उनी बोलया, “मैं सेई है जडा बेईकरी भीख मंगदा था।” 10 तां सै उसला पुछणा लग्गे, “तेरियां हखी दी लौ कियां बापस आई?” 11 उनी जबाब दिता, “यीशु नापे दे इकी माणुए मिटी सेडी, कने मेरियां हखी पर लगाई करी मिंजो बोलया, शीलोह दे कुण्डे च जाई करी मु धोई ले, मै गिया कने धोई करी मिंजो मिलणा लगी पिया।” 12 उना उसयो पुछया, सै माणु कुथु है? उनी बोलया, “मैं नी जाणदा।” 13 लोक उस माणुए जो जडा पेहले अन्ना था उसयो फरीसियां बाल लेई गे। 14 जिस दिने यीशुए मिटी सेडी करी उदियां हखी ठीक कितियां थियां सै सब्ते दा रोज था। 15 फिरी फरीसियां भी उसयो पुछया; तेरी हखी कियां ठीक होईयां? उनी उना जो बोलया, “उनी मेरी हखी पर मिटी लाई, फिरी मैं धोई लेई, कने हुण मिंजो मिलणा लगी पिया।” 16 इस पर केई फरीसी बोलणा लग्गे, “ऐ माणु परमेश्वरे दिया तरफा ला नी है, क्योंकि सै सब्ते दे रोजे जो नी मनदा है।” होरनी बोलया, इस सांई पापी माणु इस तरीके ने चमत्कार कियां दस्सी सकदा है? इसा गल्ला जो लेईकरी उना च फुट पेई गई। 17 उना उस अन्ने ने फिरी बोलया, उनी तेरियां हखी ठीक कितियां न, तू उदे बारे च क्या बोलदा है? उनी बोलया, “सै परमेश्वरे दा संदेश देणेबाला है।” 18 पर यहूदी अगुवां जो भरोसा नी होया की ऐ अन्ना था कने हुण दिखणा लग्गी गिया है जालू दीकर उदे माता पिता जो सदया जिदियां हखी ठीक होईयां थियां। 19 कने उना ला पुछया, “क्या ऐ तुहाडा पुत्र है, इसयो तुसां बोलदे थे की अन्ना जमया था? फिरी इसयो कियां मिलणा लगी पिया है?” 20 उदे माता पिता जबाब दिता, “असां तां जाणदे न की ऐ साडा पुत्र है, कने अन्ना जमया था। 21 पर असां ऐ नी जाणदे की हुण कियां करी इसयो मिलणा लगी पीया है; कने ना ऐ जाणदे की कुनी इसदियां हखी ठीक कितियां; सै अपने जबाब देणे तांई काफी बडा है; उसी ला पूछी लिया; उसी ला पुछी लिया उनी अपने बारे च अपु बोली देणा है।” 22 ऐ गल्लां उदे माता पिता तां बोलियां क्योंकि सै यहूदी अगुवां ला डरदे थे; क्योंकि यहूदी अगुवे एका करी के बैठयो थे, की अगर कोई भरोसा करे की सै मसीह है, तां सै यहूदी जंज घर ला कडी देणा। 23 इसा

बजा ने उदे माता पिता बोलया की सै सबालां दा जबाब देणे तांई बतेरा बडा है, उसला ही पृछी लिया। 24 तालू यहदी अगुवां उस माणुऐ जो फिरी सदया जडा अन्ना था उसयो बोलया, “परमेश्वरे दे सामणे बायदा कर की तू सच्च बोलगा; असां तां जाणदे न की सै माणु पापी है।” 25 उनी जबाब दिता, “मै नी जाणदा से पापी है या नी: मै तां बस इक गल्ल जाणदा है की मै अन्ना था कने हण दिखदा है।” 26 उना उसला फिरी पृछया, “उनी तैरे ने क्या किता? उनी तिजो कियां ठीक किता?” 27 उनी उना ने बोलया, “मै तां तुसां ने बोली बैठया है, कने तुसां नी सुणया; हण दुई बरी कजो सुणना चांदा न? क्या तुसां भी उदे चेले बणना चांदे न?” 28 तालू उना उसयो बुरा भला बोलया कने बोलया, तू ही उदा चेला है; असां तां परमेश्वर दे संदेश देणेबाले मूसा दे चेले न। 29 असां जाणदे न की परमेश्वरे मूसा ने गल्लां कितियां न; पर इस माणुऐ जो नी जाणदे न की कुथु ला आया है। 30 उनी उना जो जबाब दिता, ऐ तां हेरानिया दी गल्ल है की तुसां नी जाणदे कुथु दा है पर तमी उनी मेरियां हखी ठीक करी दितियां। 31 असां जाणदे न की परमेश्वर पापियां दी नी सुणदा है पर अगर कोई परमेश्वरे दा भक्त हो, कने उदिया इच्छा पर चलदा है, तां सै उदी सुणदा है। 32 जालू ला इस संसारे जो बणया है तालू ला ऐ कदी नी सुणया, की कुनी भी जन्मे दे अन्ने दियां हखी ठीक कितियो होन। (aiōn g165) 33 अगर ऐ माणु परमेश्वरे दिया तरफा ला नी होंदा, तां उनी कुछ भी नी करी सकणा था। 34 उना उसयो जबाब दिता, तू तां बिलकुल पापां च जमया है, तू क्या सांझो सिखा दा है? तालू उना उसयो यहदी जंज घर ला बाहर कडी दिता। 35 यीशुऐ सुणया, की उना उसयो यहदी जंज घरे ला बाहर कडी दितया है; कने जालू उसला मिलया तां बोलया, “क्या तू परमेश्वरे दे पुत्रे पर भरोसा करदा है?” 36 उनी जबाब दिता, “श्रीमान जी, मिंजो दस की ऐ परमेश्वरे दा पुत्र कुण है, ताकि मै उस पर भरोसा करी सके?” 37 यीशुऐ उसला बोलया, मै, “तू मिंजो पेहले भी दिखया है कने मै ही सै परमेश्वरे दा पुत्र है, जडा हण तिजो ने गल्लां करा दा है।” 38 उनी बोलया, “प्रभु जी, मै तिजो पर भरोसा करदा है।” कने उसयो दण्डवत किता। 39 तालू यीशुऐ बोलया, “मै इस संसारे च इस न्याय जो करणे तांई आया है: ताकि अन्ने लोकां जो मिलणा लग्गी पोणा कने जिना लोकां जो मिलदा है सै अन्ने होई जाणे।” 40 जडे फरीसी उदे सोगी थे, उना ऐ गल्लां सुणीकरी उसला बोलया, “क्या तू बोला दा है की असां भी अन्ने न?” 41 यीशुऐ उना ने बोलया, अगर तुसां अन्ने होंदे तां पापी नी होणा था पर हण बोलदे न, की सांझो मिलदा है, इस तांई तुहाडे पाप माफ नी किते जाणे न।

10 “मै तुसां ने सच्च-सच्च बोलदा है, की अगर कोई भेड़ा दिया गुराला दे दरबाजे ला नी अंदर ओऐ, पर होर कुसी पासे ला चढी करी अंदर ओऐ, सै चोर कने डाकू है। 2 पर जडा दरबाजे चे जांदा है सै भेड़ा दा पुआल है। 3 उदे तांई द्वारपाल दरबाजा खोली दिन्दा है, कने भेड़ा उदी अबाज पछेणदियां न, कने सै अपणियां भेड़ा जो ना लेई-लेईकरी सददा है कने बाहर लेई जांदा है। 4 कने जालू सै अपणिया सारियां भेड़ा जो बार कडी बोंदा है, तां उना दे अग्गे-अग्गे चलदा है, कने भेड़ा उदे पिच्छे-पिच्छे चली पोंदिया न; क्योंकि सै उदी अबाज पछेणदियां न। 5 पर सै होरसी दे पिच्छे नी जांदियां,

पर उना ला नठदियां न, क्योंकि सै होरसी दी अबाज नी पछेणदियां न।” 6 यीशुऐ उना ने ऐ कहानी बोली, पर सै नी समझे की ऐ बोलणे दा क्या मतलब है। 7 तालू यीशुऐ उना ने फिरी बोलया, मै तुसां ने सच्च-सच्च बोलदा है, की भेड़ा दा मै ही दरबाजा है जिदे चे भेड़ा अंदर ओदियां न। 8 जितणे मिंजो ला पेहले आये; सै सारे चोर कने डाकू न, पर मेरियां भेड़ा उना दी नी सुणी। 9 मै ही दरबाजा है; अगर कोई मिंजो चे अंदर जा तां परमेश्वरे उदा उद्धार करणा कने उनी अंदर बाहर ओदे जांदे रेणा कने उसयो खाणे पिणे जो मिलदी रेणी। 10 चोर सिर्फ भेड़ा जो चोरणे कने मारणे कने खत्म करणे तांई ओदा है। पर मै इस तांई आया की उना जो सच्चाई च जिन्दगी कने भरपूरी दी जिन्दगी मिल्ले। 11 खरा पुआल मै है; खरा पुआल भेड़ा तांई अपणी जान देई दिन्दा है। 12 भाडे पर रखयो होया मजदूर जालू सै भेडिये जो ओदे दिखणा तां उनी नठी जाणा। उनी भेड़ा जो छडी देणा क्योंकि सै उना दा पुहाल नी है कने भेड़ा उदियां नी न। इस तांई भेडिया उना पर हमला करदा है कने झुण्ड जो बखेरी दिन्दा है। 13 सै इस तांई नठी जांदा है की सै भाडे दा मजदूर है, कने उसयो भेड़ा दी चिंता नी है। 14 खरा पुआल मै है, मै अपणियां भेड़ा जो जाणदा है कने मेरियां अपणियां भेड़ा मिंजो जाणदियां न, 15 जियां पिता परमेश्वर मिंजो जाणदा है, कने मै पिता परमेश्वरे जो जाणदा है। कने मै भेड़ा तांई मरणे तांई तैयार है। 16 कने मेरियां होर भी भेड़ा न, जडियां इसा गुराला दियां नी न, मिंजो उना जो लोंणा भी जरूरी है, उना मेरी अबाज पछेणनी है; तां फिरी इक झुण्ड कने इक ही पुआल होंणा है। 17 मै अपणिया मरजिया ने जान दिन्दा है, इस तांई पिता परमेश्वर मिंजो ने प्यार करदा है, ताकि मै दोबारा जिन्दा होई जा। 18 कोई मेरिया जिन्दगिया जो मिंजो ला नी लेई सकदा है, इसयो मै अपणिया इच्छा ने दिन्दा है। मिंजो अपणी जिंदगी देणे दा भी हक है, कने उना जो फिरी बापस लेणे दा भी हक है: क्योंकि ऐ सेई हुकम है जडा मिंजो मेरे पिता परमेश्वरे ला मिलया है। 19 इना गल्लां दिया बजा ने यहदी लोकां च फिरी फुट पेई गई। 20 उना चे मते बोलणा लग्गे, इदे च बुरी आत्मा है, कने सै पागल है; इसदी मत सुणा? 21 होरनी बोलया, ऐ गल्लां ऐसे माणुऐ दियां नी न जिदे च बुरी आत्मा हो: इक बुरी आत्मा कदी भी नी इक अन्ने माणुऐ दी हखी ठीक करी सकदी है? 22 यरूशलेम शेर च यहदी मंदरे दी स्थापना दा त्योहार था, कने सदियां दी रित थी। 23 यीशु मंदरे दे अंगणे च घुमा दा था, जिसयो लोक सुलैमान राजे दा ओसारा बोलदे न। 24 तालू यहदी अगुवां उसयो घरोटी लिया कने पुछया, “तू सांझो बडे लम्बे बकते दीकर दुबिधा च रखया है। हण सांझो साफ-साफ दस। क्या तू मसीह है।” 25 यीशुऐ उना जो जबाब दिता, “मै तुसां ने बोली दितया है, कने तुसां मेरा भरोसा करदे ही नी न, जडे कम्म मै अपने पिता परमेश्वरे दे हके ने करदा है सै ही मेरे गबाह न। 26 पर तुसां इस तांई मेरा भरोसा नी करदे न क्योंकि तुसां मेरियां भेड़ा चे नी न। 27 मेरियां भेड़ा मेरी अबाज पछेणदियां न, कने मै उना जो जाणदा है, कने सै मेरे पिच्छे-पिच्छे चलदियां न। 28 मै उना जो हमेशा दी जिन्दगी दिन्दा है, कने उना दा कदी नाश नी होणा, कने कोई उना जो मेरे हथां ला नी खोई सकदा है। (aiōn g165, aiōnios g166) 29 मेरा पिता परमेश्वर, जिनी उना जो मिंजो दितया है, सबना ला बडा है, कने कोई उना जो

पिता परमेश्वरे दे हथे ला खोई नी सकदा। 30 मैं कने पिता परमेश्वर इक ही न।” 31 यहूदी अगुवां उसयो मारणे ताई फिरी पथर चुके। 32 इस पर यीशुए उना ने बोलया, “मैं पिता परमेश्वरे दिया तरफा ला तुहांजो मते भले कम्म दसयो न, उना चे कुस कम्मे ताई तुसां मिंजो पथर मारा दे न?” 33 यहूदी अगुवां यीशुए जबाब दिता, “भले कम्म ताई असां तिजो पथर नी मारा दे न, पर परमेश्वरे दी निंदा करणे दिया बजा ने कने इस ताई की तू माणु होईकरी अपने आपे जो परमेश्वरे बोलदा है।” 34 यीशुए उना जो जबाब दिता, क्या पबित्र शास्त्र च ऐसा नी लिखया है की परमेश्वरे अपने लोकां दे अगुवां ने बोलया की, तुसां ईश्वर न? 35 तुसां जाणदे न की पबित्र शास्त्र च कुछ भी बदलया नी जाई सकदा। इस ताई अगर उदे लोकां दे अगुवां जो “ईश्वर” बोलया गया हो। 36 तां जालू मैं बोलदा है, मैं परमेश्वरे दा पुत्र हूँ तां तुसां मिंजो कजो बोलदे न, “तू निंदा करा दा है।” मैं सै ही है जिसयो पिता परमेश्वरे लग कितया कने मिंजो संसार च भेजया है। 37 अगर मैं अपने पिता दा कम्म नी करदा तां, तुसां मेरा भरोसा मत करा। 38 पर अगर मैं करदा हूँ, तां चाऐ मेरा भरोसा ना भी करा, पर उना कम्मा दा तां भरोसा करा, तालू तुसां जो पता चलणा कने समझणा की पिता परमेश्वर मिंजो च रेंदा है, कने मैं पिता परमेश्वर च रेंदा हूँ। 39 तालू उना फिरी यीशुए जो पकड़ने दी कोशिश किती पर सै उना दे हथे ला बची करी निकली गया। 40 फिरी यीशु यरदने खड़ा दे पार उसा जगा पर चली गया, जिथू यहून्ना पेहले बपतिस्मा दिन्दा था, कने ओथु रिया। 41 कने मते लोक उदे बाल आई करी उसला बोलदे थे, “यहून्ना तां कोई चमत्कार नी दसया, पर जडा कुछ यहून्ना इदे बारे च बोला दा सै सारा सच्च था।” 42 कने ओथु मतयां उदे पर भरोसा किता।

11 बैतनिय्याह ग्रां च इक लाजर नाऐ दा माणु बीमार था। मरियम कने मार्था उदियां बेहणा थियां। 2 ऐ सै ही मरियम थी जिना बांदे च प्रभुऐ दे पैरा उपर इन्न नियोरी करी उदे पैरां जो अपने बाला ने पुंजया था, उसा दा ही भाई लाजर बीमार था। 3 उसा दिया बेहणा यीशुए जो बोली भेजया, “प्रभु जी, दिख, जिसयो तू प्यार करदा है, सै बीमार है।” 4 ऐ सुणीकरी यीशुए बोलया, “ऐ बिमारी मौत ने नी मुकणी, पर परमेश्वरे दिया महिमा ताई है, ताकि उसला मिंजो, परमेश्वरे दे पुत्रे दी महिमा हो।” 5 कने यीशु मार्था कने उदी बेहण कने लाजरे ने प्यार करदा था। 6 पर उनी सुणाया, की सै बीमार है, जिसा जगा सै था, ओथु दो रोज होर स्क्की गया। 7 फिरी दो दिन बाद उनी चेलयां ने बोलया, “ओआ, असां फिरी यहूदिया प्रदेश दे इलाके दे बैतनिय्याह शेहरे जो चलदे न।” 8 चेलयां उसयो बोलया, “गुरु जी, हुंणी तां यहूदी अगुवे तिजो पथर मारणा चांदे थे, क्या फिरी भी तू ओथु चलया है?” 9 यीशुए जबाब दिता, “क्या दिने दे बाहरा घंटे नी होंदे न? अगर कोई दिने चले, तां उसयो ठोकर नी लगदी, क्योंकि सै इस संसारे दी लौई ने मतलब की सूजे दी लौई ने दिखदे न। 10 पर अगर कोई राती जो चले, तां उसयो ठोकर लगणी, क्योंकि तालू उदे च लौ नी है।” 11 इदे बाद यीशुए उना ने बोलया, “साडा मित्र लाजर सोई गया है, पर मैं उसयो जगाणा चलया है।” 12 तालू चेलयां उसयो बोलया, “प्रभु जी, अगर सै सोई गया है, तां उनी ठीक ठाक होई जाणा।” 13 यीशुए तां उदिया मौता दे बारे च बोलया था: पर सै समझे

की उनी निंदां ने सोई जाणे दे बारे च बोलया। 14 तालू यीशुए उना ने साफ बोली दिता की, लाजर मरी गया है। 15 कने मैं तुहाड़े फायदे ताई खुश है की मैं ओथु नी था जिसने तुसां भरोसा करन। पर हुण ओआ, असां उदे बाल चलदे न। 16 तालू थोमा जिसयो दिदुमुस बोलदे न, अपने सोगी बाले चले ने बोलया, “ओआ, असां भी उदे सोगी मरणे ताई चलदे न।” 17 जालू यीशुए जो बैतनिय्याह ग्रां च आई करी ऐ पता चला की उसयो चार दिन पेहले ही कबरा च दफनाई दितया है। 18 बैतनिय्याह ग्रां यरूशलेम शेहर दे नेडे लगभग कोई तिन किलो मीटर था। 19 कने मते यहूदी लोक मार्था कने मरियम बाल उदे भाईऐ दे बारे च शान्ति देणे ताई आयो थे। 20 जालू मार्था यीशुए दे ओणे दी खबर सुणीकरी यीशुए ने मिलणा गई, पर मरियम घरे बेई रेई। 21 मार्था यीशुए जो बोलया, “प्रभु जी, अगर तू ऐथू होंदा, तां मेरा भाई कदी नी मरदा। 22 कने हुण भी जाणदी है, की जडा कुछ तू परमेश्वरे ला मंगया, परमेश्वरे तिजो देणा।” 23 यीशुए उसा जो बोलया, “तेरा भाई फिरी जिंदा होई जाणा।” 24 मार्था उसयो बोलया, मैं जाणदी है, “न्याय दे रोजे जालू हर कोई जिन्दा होई जाणा तालू उनी भी जिन्दा होई जाणा।” 25 यीशुए उसा ने बोलया, “मैं सै है जडा मरयो लोकां जो जिन्दगी च बापस लोंदा है, जडा कोई मिंजो पर भरोसा करदा है सै अगर मरी भी जा तमी, उनी जी पोणा। 26 कने जडा कोई मिंजो पर भरोसा करदा है सै जिन्दा है, कने उनी अनन्तकाल दीकर भी मरणा। मार्था तू क्या इसा गल्ला पर भरोसा करदी है?” (aiōn g165) 27 उनी उसयो बोलया, “हाँ, प्रभु जी, मैं भरोसा करी लिया है, की परमेश्वरे दा पुत्र मसीह जडा संसारे च ओणे बाला था, सै तू ही है।” 28 ऐ बोली करी सै चली गई, कने अपनी बेहण मरियम जो होले करी सदीकरी बोलया, “गुरु ऐथू ही है, कने तिजो सदा दा है।” 29 सै सुणदे ही झट उठी करी उदे बाल आई। 30 (यीशु हले दीकर भी गाऐ ला बाहर ही था, पर उसा ही जगा च था जिथू मार्था उसला मिल्ली थी।) 31 तालू जडे यहूदी लोक मरियम सोगी उसा दे घरे थे, कने उसा जो दिलासा देदे थे, कने दिखया की मरियम झट उठी करी बाहर चली गई। इस ताई सै उसा दे पिच्छे-पिच्छे हे, ऐ सै समझीकरी की सै कबरा पर रोंणे ताई जा दी है। 32 जालू मरियम ओथु पुज्जी जिथू यीशु था, तां उसयो दिखदे ही उदे पैरां च पेईकरी बोलया, “प्रभु जी, अगर तू ऐथू होंदा तां मेरा भाई नी मरदा।” 33 जालू यीशुए उसा जो कने उसा सोगी आयो यहूदी लोकां जो रोंदे दिखया, तां यीशुए बडा ही दुखी होईकरी उना ला पुछया, 34 कने बोलया, तुसां उसयो कुथु दफनाया है? उना उसयो बोलया, “प्रभु जी, चली करी दिखी ले।” 35 यीशुए दियां हखी चे आंसू निकलना लग्गे। 36 तालू यहूदी लोक बोलणा लग्गे, “दिखा, सै उसने कदेया प्यार रखदा था।” 37 पर उना चे कितणे ही बोलया की, “इनी तां उस अन्ने दियां हखी ठीक कितियां न, क्या ऐ लाजरे जो मरणे ला नी बचाई सकदा था?” 38 यीशु मने च बडा ही दुखी होया कने कबरा पर आया, सै इक गुफा थी, कने गुफा दे सुपे पर इक पथर रखया होया था। 39 यीशुए बोलया, “पथरे जो हटा।” उस मरयो दी बेहण मार्था बोलणा लग्गी, “प्रभु जी, उदे चे तां हुण मुस्क ओआ दी है, क्योंकि उसयो मरयो चार रोज होई गियो न।” 40 यीशुए उस जो बोलया, “क्या मैं तिजो ने बोलया नी था की अगर तू मिंजो पर भरोसा करगी तां तू

परमेश्वरे दी महिमा जो दिखगी।” 41 तालू उना सै पथर हटाया, फिरी यीशुए स्वर्ग पासे दिखीकरी के बोलया, “पिता परमेश्वर जी, मैं धन्याबाद करदा है की तू मेरी सुणी लेई है।” 42 पर जड़ी भीड़ अखे बखे खडोतियो है, उना दिया बजा ने यीशुए ज़ोरे ने बोलया, “मैं जाणदा है, की तू हमेशा मेरी सुणदा है, जिसने की सै भरोसा करन, की तू मिजो भेजया है।” 43 ऐ बोली करी उनी ज़ोरे ने पुकारया, “हे लाजर बाहर निकली आ।” 44 जड़ा मरी गया था, सै बाहर आया, कने उदा सारा शरीर पट्टियाँ च कने मु कपड़े च लपेटया होया था कने यीशुए उना जो बोलया, “इसयो खोली करी जाणा दिया।” 45 तालू जड़े यहूदी लोक मरियमा दे सोगी आयो थे, उना उदा ऐ कम्म दिखया कने उना चे मतयां उदे पर भरोसा किता। 46 उना चे कितणयां ही फरीसियां बाल जाई करी यीशुए दे कम्मा दी खबर दिती। 47 इस पर बड़े याजकां कने फरीसियां दी महासभा दे लोकां जो गठेरी करी बोलया, “असां क्या करगे? ऐ माणु तां बडे चमत्कार दसदा है। 48 अगर असां इसयो हुण भी नी रोकदे न, तां सारयां उस पर भरोसा करी लेंणा की सै ही मसीहा है, कने रोमी लोकां आई करी साडे मंदरे कने देशे पर कब्जा करी लेंणा।” 49 तालू उना दिया सभा चे कैफा नाए दा इक माणु जड़ा उस साले दा महायाजक था, उनी बोलया, “तुसां कुछ भी नी जाणदे; 50 कने ना ऐ समझदे न, तुहाडे ताई ऐ ठीक है, की साडे लोकां ताई इक माणु मेरे, नी की सारे इस्राएल देशे दे लोकां दा नाश होई जा।” 51 ऐ गल्ल उनी अपने आपे ला नी बोली, पर उस साले दे महायाजक दे स्पे च, उनी ऐ भविष्यवाणी किती, की यीशुए पुरे इस्राएल देशे ताई मरणा। 52 कने ना सिर्फ़ इना ताई ही नी। पर उनी परमेश्वरे दी होर ओलादी ताई भी मरणा जड़े इस संसारे च बिखरयो न, ताकि उना जो गठेरी सके। 53 यहूदी अगुवे उस रोजे ला ही उसयो मारने दी सलाह करणा लग्गी पे। 54 इसा साजिशा दिया बजा ने यीशुए यहूदियां दे बिच सेरेआम घुमणा बंद करी दिता; यीशु ओथु ला सुनसान जगा दे नेडे बाले प्रदेश दे इफ्राईम नाए दे इकी शेहरे जो चली गिया, कने अपने चेलयाँ सोगी ओथु ही रेंणा लग्गा। 55 कने यहूदिया दे फसह दे त्योहारे दा बकत नेडे था, कने मते लोक फसह ला पेहले यरूशलेम शहर जो गे ताकि मंदरे च अपने आपे जो शुद्ध करन। 56 कने यीशुए जो तोपदे कने मंदरे च खडोई करी अपु चे बोलणा लग्गे, “तुसां क्या समझदे न? क्या सै त्योहारे च नी ओंगा?” 57 कने बड़े याजकां कने फरीसियां ऐ हुकम दितया था, की अगर कुस्यो पता लग्गे की यीशु कुथु है तां दसनयो, ताकि उसयो गिरफ्तार करी सकन।

12 फिरी यीशु फसह दे त्योहारे ला छे रोज पेहले बैतनिय्याह ग्रां च आया, जिथु लाजर जो मरयां चे जिन्दा किता था। 2 ओथु उना उदे ताई धाम तैयार किती, कने यीशुए जो आदर मान देणे ताई मार्या सेबा करा दी थी, कने लाजर भी उना चे इक था, जड़े उदे सोगी रोटी खाणे ताई बैठयो थे। 3 तालू मरियमा जटमासी दा अधा सेर मेहणा इन्न लेईकरी यीशुए दे पैरां पर नियोरया, कने अपने बालां ने उदे पैर पूंजे, कने इन्ने दिया खुशबुआ ने सारा घर सुगन्धित होई गिया। 4 पर उदे चेलयाँ चे यहूदा इस्करियोती नाए दा इक चेला था जड़ा उसयो पकड़वाणा चांदा था, बोलणा लग्गा, 5 “ऐ इन्न तिनसो दीनारां च बेची करी गरीबां जो कनी देई दिता?” 6 उनी ऐ गल्ल इस ताई नी बोली की,

की उसयो गरीबां दी चिंता थी, पर इस ताई की सै चोर था कने उदे बाल उना दे पैसायां दी थेली रेंदी थी, कने उसा च कोई कुछ पांदे थे, सै कड़ी लेंदा था। 7 यीशुए बोलया, “इसा जो तंग मत करा, इना बकत ला पहले मिजो दफनाणे दी तैयारी ताई ऐ करा दी है। 8 गरीबां तां तुहाडे सोगी हमेशा रेंणा है, पर मैं तुहाडे सोगी हमेशा नी रेंणा।” 9 जालू लोकां सुणया की यीशु ओथु था तां तालू लोकां दी बड़ी भीड़ ओथु आई। सै सिर्फ़ यीशु जो ही नी पर लाजर जो भी दिखणा आयो थे जिसयो उनी मरयां चे जिन्दा कितया था। 10 तालू बड़े याजकां लाजरे जो भी मारणे दी योजना बणाई। 11 क्योकि उदिया बजा ने मते लोक उना जो नी अपनां थे, क्योकि उना यीशुए पर भरोसा कितया। 12 दुज्जे दिने मतयां लोकां जड़े त्योहारे च आयो थे, ऐ सुणीकरी, की यीशु यरूशलेम शहर च ओआ दा है। 13 इस ताई उना खजुरी दियां डालियाँ लियां, कने उसला मिलणे ताई निकले, कने चिलाणा लग्गे, “होशाना। इस्राएल दा राजा धन्य हो, जड़ा प्रभु दे नापे ने ओंदा है।” 14 जालू यीशुए जो इक गधे दा बच्चा मिल्ला तां सै उस पर बैठी करी यरूशलेम शहर च आया, ऐ तियां ही होया जियां की पबित्र शाब्ब च लिखया है। 15 “हे यरूशलेम शहर दे लोकों, मत डरा; दिख तेरा राजा गधे दे बच्चे च सवार होईकरी ओआ दा है।” 16 यीशुए दे चेले, ऐ गल्लां पेहले नी समझे थे; पर जालू यीशुए दी महिमा प्रगट होई, तां उना जो याद आया, की जड़ा कुछ भी यीशुए ने होया सै ठीक तियां ही होया जियां की पबित्र शाब्ब च लिखया था; कने लोकां उदे कने ऐदिया व्यवहार कितया था। 17 तालू भिडा दे लोकां जड़े उस बेले यीशुए सोगी थे, सै दुज्जे लोकां जो दसणा लग्गे की उनी लाजरे जो कबरा ला सदीकरी, उसयो जिन्दा करी दिता। 18 मते लोक यीशुए ने मिलणे ताई आपे, क्योकि उना इस चमत्कार दे बारे च सुणाया था। 19 तालू फरीसियां अपु चे बोलया, “सोचा असां कुछ नी करी सकदे न, दिखा, संसार च हर कोई उदे पिच्छे होई चलया है।” 20 ओथु कुछ यूनानी लोक थे जड़े फसह दे त्योहारे बेले भक्ति करणे ताई यरूशलेम शहर च आयो थे। 21 उना गलील प्रदेश दे बैतसेदा शेहरे दे रेणेबाले फिलिप्पुस दे बाल आई करी उसला बिनती किती, “श्रीमान असां यीशुए ने मिलणा चांदे न।” 22 फिलिप्पुसे आई करी अन्दियास ने बोलया; तालू अन्दियास कने फिलिप्पुसे दोनो जाई करी यीशुए जो बोलया। 23 इस पर यीशुए उना जो बोलया, सै बकत आई गिया है, की मेरी, माणुए दे पुत्रे दी महिमा हो। 24 मैं तुसां ने सच्च-सच्च बोलदा है, की जालू दीकर कणका दा दाणा जमिना च पेईकरी मरी नी जांदा है, सै किला ही रेंदा है पर जालू मरी जांदा है, तां मते फल दिन्दा है। 25 जड़ा अपने प्राणा ने प्यार करदा है, सै उना जो गबाई दिन्दा है; पर जड़ा इस संसारे च अपने प्राणा जो प्यार नी करदा है; तां उनी हमेशा दिया जिन्दगिया ताई उदी रक्षा करणी है। (aiōnios g166) 26 अगर कोई मेरी सेबा करे, तां मेरा चेला बणे; कने जिथु मैं है ओथु मेरे सेवके भी होणा; अगर कोई मेरी सेबा करे, तां पिता परमेश्वरे उदा आदर करणा। 27 हुंण मैं बड़ा बेचेन होआ दा है। इस ताई मैं क्या बोले? पिता जी, मिजो इसा दुखे दिया घड़िया ला बचाई ले? पर मैं संसार च इस ताई आया की दुख झेले कने मरी जां। 28 हे पिता परमेश्वर तू प्रगट कर की तू कितणा महिमामय है। तालू ऐ आकाशवाणी होई, “मैं प्रगट कितया है की मैं कितणा

महिमा बाला है कने मैं ऐ फिरी प्रगट करगा।” 29 तालू सै लोक जडे खडोई करी अबाज सुणा दे थे, उना बोलया, की बदल गरजया, कने होरनी बोलया, “कोई स्वर्गदूत उसने बोलया।” 30 इसी पर यीशुऐ बोलया, “ऐ अबाज तुहाडे भले ताई थी, मेरे ताई नी है। 31 हुण सै बकत है जालू परमेस्वरे संसारे दे लोकां दा न्याय करणा, कने हुण सै बकत है जालू यीशुऐ इस संसारे दे सरदार शैताने दी शक्ति जो खत्म करणा। 32 कने अगर मैं धरतिया ला उपर चढाया जांगा, तां सारयां जो अपने बाल लेई ओणा।” 33 इयां बोली करी उनी ऐ प्रगट करी दिता, की सै कियां मरणे बाला था। 34 इसा पर लोकां उसला बोलया, “असां पबित्र शास्त्र दी ऐ गल्ल सुणियो है, की मसीह हमेशा जिन्दा रेंगा है, फिरी तू कजो बोला दा है, की माणुऐ दे पुत्रे जो उच्चे पर चढाणा जरूरी है? ऐ माणुऐ दा पुत्र कुण है?” (aiōn g165) 35 यीशुऐ उना ने बोलया, “(लौ) हुण थोडिया देरा दीकर तुहाडे बिच है, जालू दीकर लौ तुहाडे सोगी है तालू दीकर चली रिया; इयां ना होए की नेहेरा तुहांजो घेरी ना ले; जडा नेहरे च चलदा है उसयो नी पता होंदा की कुथयो चलया है। 36 जालू दीकर लौ तुहाडे सोगी है, लौ पर भरोसा करा की तुसां लौ दी ओलाद बणन।” ऐ गल्लां बोली करी यीशु चली गया कने अपने आपे जो उना ला लुकाई रखया। 37 कने यीशुऐ उना दे सामणे इत्तणे चमत्कार दस्से, तमी उना उदे पर भरोसा नी किता; 38 ऐ इस ताई होया ताकि जडा यशयाह परमेस्वरे दा संदेश देणेबाले बोलया था सै सच्च होई जा; “प्रभु जी, साडे संदेश पर कुनी भरोसा किता है? कने परमेस्वर दी पराक्रमी शक्ति कुदे पर प्रगट होई?” 39 इसा बजा ने सै भरोसा नी करी सके, क्योंकि यशयाहे फिरी बोलया: 40 परमेस्वरे उना दी हखी अन्निया करी दितियां ताकि सै दिखी नी सकन, कने उना दे दिमाग बंद करी दिते ताकि सै समझी नी सकन। नितां उना मिंजो पर भरोसा करी लेणा कने मैं उना जो ठीक करी दिन्दा। 41 यशयाहे ऐ गल्लां इस ताई बोलियां, की उनी बकते ला पेहले उदी महिमा दिखी, कने उदे बारे च गल्लां कितियां। 42 मते अगुवां भी उदे पर भरोसा किता, पर फरीसियां दिया बजा ने सबना सामणे नी मंन्दे थे, इस डरे ने नी की उना जो यहूदी जंज घर ला कडी दिगे। 43 क्योंकि उना जो परमेस्वरे दी तारीफ ला, माणुऐ दी तारीफ जादा प्यारी लगदी थी। 44 यीशुऐ भिडा जो पुकारी करी बोलया, “जडा मेरे पर भरोसा करदा है, सै सिर्फ मिंजो पर नी पर मिंजो भेजणे बाले परमेस्वरे पर भरोसा करदा है। 45 कने जडा मिंजो दिखदा है, सै मिंजो भेजणे बाले परमेस्वरे जो दिखदा है। 46 मैं संसारे च इक लौ बणी करी आया है ताकि जडा मिंजो पर भरोसा करगा सै कदी नेहरे च नी रेंगा। 47 अगर कोई मेरियां गल्लां सुणीकरी उना दा पालन नी करे, तां मैं उसयो दोषी नी बोलणा है, क्योंकि मैं संसारे दे लोकां जो दोषी ठहरणे ताई नी आया, पर संसारे दा उद्धार करणे ताई आया है।” 48 जडा मिंजो तुच्छ समझदा है कने मेरियां गल्लां जो नी मंनदा है, उना दा न्याय करणे बाला तां इक ही है, मतलब की जडा बचन मैं बोलया है, उनी उसयो आखरी दिना च दोषी बणाणा। 49 क्योंकि मैं अपने हक ने ऐ गल्लां नी कितियां न, पर पिता परमेस्वर जिनी मिंजो भेजया है उनी मिंजो हुकम दितया है की क्या-क्या बोलें? 50 कने मैं जाणदा है, की उदे हुक्मा जो मनणा हमेशा दिया जिन्दगिया दा रस्ता है, इस

ताई मैं तुसां जो सेई बोलदा है जडा पिता परमेस्वर मिंजो बोलदा है। (aiōnios g166)

13 फसह दे त्योहरे ला पेहले जालू यीशुऐ जाणी लिया, की मेरा सै बकत आई गया है की मैं संसारे जो छडी करी अपने पिता परमेस्वर बाल बापस चली जां, यीशु अपने चेलयां सोगी हमेशा प्यार करदा रिया, जडे संसार च यीशुऐ सोगी थे, जदिया प्यार सै करदा था, आखरी दीकर सियुदा ही प्यार रखदा रिया। 2 यीशु कने उदे चेले राती दा खाणा खा दे थे। शैताने पेहले ही यीशुऐ जो धोखा देणे ताई शमीन दे पुत्र यहूदा इस्करियोती दे मने च ऐ पाई दितया था, की उसयो पकडवाई दे। 3 जालू यीशु ऐ जाणदा था की पिता परमेस्वरे मिंजो हर चिजा पर हक दितया है कने मैं परमेस्वरे दे बखे ला आया है, कने परमेस्वरे बाल बापस जांगा है। 4 खाणा खांदे बेले उडी करी यीशुऐ अपने बाहरी कपडे खोली दिते, कने अंगोछा लेईकरी अपना लवके च बन्नी लिया। 5 तालू भांडे च पाणी लेईकरी चेलयां दे पैर धोई करी कने जडा अंगोछा लवके च लपेटया था उसला पुंजणा लग्गा। 6 जालू यीशु शमीन पतरस दे बखे आया तालू पतरसे उसयो बोलया, “प्रभु जी, तू कजो मेरे पैरां धोणा लगया है?” 7 यीशुऐ उसयो जबाब दित्ता, “जडा मैं करदा है, तू हुण इदा मतलब नी जाणदा है, पर कुछ बकते बाद जाणना है।” 8 पतरसे उसयो बोलया, मैं तुसां जो अपने पैरां जो कदी नी धोणा देणा। ऐ सुणीकरी यीशुऐ उसयो बोलया, “अगर तू मिंजो अपने पैर नी धोणे नी दिते, तां तू मेरा चेला नी है।” (aiōn g165) 9 शमीन पतरसे उसयो बोलया, “प्रभु जी, तां मेरे पैर ही नी बल्कि हथ कने सर भी धोई दे।” 10 यीशुऐ उसयो बोलया, “इक माणु जडा नोहोई बैठया है, सै बिलकुल साफ है, उसयो सिर्फ अपने पैरा जो धोणे दी जरूरत है। कने तुसां सारे शुद्ध न सिर्फ इकी जो छुई करी।” 11 सै तां अपयों पकडणे बाले जो जाणदा था तां तां उनी बोलया, “तुसां सारे दे सारे शुद्ध नी न।” 12 जालू यीशु उना दे पैरां जो धोई बैठा तां सै अपने बाहरे बाले कपडे पाई करी फिरी बेई गया कने उना ने बोलणा लग्गा, “क्या तुसां समझे की मैं तुहाडे सोगी क्या कितया है? 13 तुसां मिंजो गुरू, कने प्रभु, कने ठीक ही बोलदे न, क्योंकि मैं तुहाडा गुरू कने प्रभु है। 14 अगर मैं प्रभु कने गुरू होईकरी तुहाडे पैर धोते, तां तुहांजो भी नम्र होईकरी इक दुज्जे दे पैर धोई करी मिंजो ला सिखणा चाईदा। 15 क्योंकि मैं तुहांजो इक नमूना दस्सी दितया है, की जियां मैं तुहाडे सोगी किता, तुसां भी तियां ही करा। 16 मैं तुसां ने सच्च-सच्च बोलदा है, नोकर अपने मालिके ला बडा नी होंदा, कने ना भेजया होया अपने भेजणे बाले ला बड़ा होंदा। 17 हुण तां तुसां इना गल्लां जो जाणदे न, तां इना जो करा ताकि तुसां भी धन्य होन। 18 मैं तुसां सबना दे बारे च नी बोला दा है: जिना जो मैं चुण्यां है, उना जो मैं जाणदा है: पर ऐ इस ताई होआ दा है ताकि पबित्र शास्त्रां च जडा लिखया है सै पूरा हो, जिनी मेरे सोगी रोटी खादी, उनी मिंजो धोखा दितदा है। 19 हुण मैं तुहांजो उदे होणे ला पेहले दसी दिन्दा है ताकि जालू होई जांगा तां तुसां भरोसा करनयो की मैं सेई है। 20 मैं तुसां ने सच्च-सच्च बोलदा है, की जडा मेरे भेजयां जो अपनांदा है, सै मिंजो भी अपनांदा है, कने जडा मिंजो अपनांदा है, सै मेरे भेजणे बाले जो भी अपनांदा है।” 21 ऐ गल्लां बोलणे बाद यीशु बडा ही दुखी होया कने अपने

चेलयां जो दसया, “मैं तुसां ने सच्च-सच्च बोलदा है, की तुसां चे इकी जणे मिजो पकड़ाणा है।” 22 चले ऐ शक करदे होऐ, इकी दुऐ पासे दिखणा लगे, ऐ कुसदे बारे च बोला दा है। 23 उदे चेलयां चे इक जिसने यीशु प्यार रखदा था, यीशुऐ दे बखे बैठया था। 24 तालू शमौन पतरसे उदे पासे इशारा करी के पुछया, “दसी दे तां, सै कुसदे बारे च बोला दा है?” 25 तालू उनी भी यीशुऐ दे बखे जाई करी पुछया, “प्रभु जी, सै कुण है?” 26 यीशुऐ जबाब दिता, “जिसयो मैं ऐ रोटिया दा टुकड़ा चटनिया च डोबी करी दिगा, सै ही है।” कने उनी टुकड़ा चटनिया च डोबी करी शमौने दे पुत्र यहूदा इस्करियोती जो दिता। 27 कने जियां ही यहूदा टुकड़ा खादा, यीशुऐ उसयो बोलया, “जडा तू हुण करणा जा दा है, सै झट कर, तालू ही शैतान उदे च बडी गया। 28 खाणा खाणे बालयां चे बाकी कुसियो भी पता नी था की यीशुऐ उसयो ऐसा कजो बोलया। 29 यहूदा बाल पैसायां दी थेली रेंदी थी, इस ताई कुनी-कुनी समझया, की यीशु उसयो बोला दा है, की जडा कुछ सांझो त्योहारे ताई चाईदा से खरीदी ले, या गरीबां जो कुछ दे। 30 तालू सै रोटी दे टुकड़े जो खाई करी झट बाहरे जो चली गया, कने राती दा बकत था। 31 जालू सै बाहर चली गया तां यीशुऐ बोलया, हुण मेरी, माणुऐ दे पुत्रे दी महिमा होई, कने परमेस्वरे दी महिमा मिजो च होई; 32 कने परमेस्वरे अपने पुत्रे दी महिमा करणी, कने तोल्लि ही करणी है। 33 हे प्यारे बच्चो, मैं होर थोडी देर तुहाड़े बखे है; फिरी तुसां मिजो तोपणा, कने जियां मैं यहूदियां जो बोलया, जिथू मैं जांगा, ओथु तुसां नी आई सकदे न, तियां ही मैं हुण तुहांजो भी बोलदा है। 34 मैं तुहांजो इक नौआं हुकम दिन्दा है, इक दुज्जे ने तियां ही प्यार करा: जियां मैं तुसां ने प्यार करदा है, तियां ही तुसां भी इक दुज्जे ने प्यार करा।” 35 अगर तुसां इक दुज्जे ने प्यार करगे, तां हर कुसी जो पता चलणा की तुसां मेरे चले न। 36 शमौन पतरसे उसयो बोलया, “प्रभु जी, तू कुथु जाणा है?” यीशुऐ जबाब दिता, जिथू मैं जाणा है, ओथु तू मेरे पिच्छे नी आई सकदा? पर बादे च तुसां मेरे पिच्छे ओणा। 37 पतरसे उसयो बोलया, “प्रभु जी, हुण मैं तेरे पिच्छे कनी आई सकदा है? मैं तां तेरे ताई अपनी जान देगे ताई तैयार है।” 38 यीशुऐ जबाब दिता, क्या तू मेरे ताई मरणा है? मैं तिजो ने सच्च-सच्च बोलदा है की मुर्गे जो बांग देगे ला पेहले तू मिजो तिन्न बरी बोलणा की तू मिजो नी जाणदा।

14 “तुहाडा मन दुखी ना हो, तुसां परमेस्वरे पर भरोसा रखा कने मिजो पर भी भरोसा रखा। 2 मेरे पिता परमेस्वर दे घरे रहणे दियां मतियां जगा न, अगर नी हुंदियां, तां मैं तुसां ने बोली दिन्दा क्योंकि मैं तुहाड़े ताई जगा तैयार करणा जांदा है। 3 मेरे जाणे कने तैयारी करणे बाद, तां मैं फिरी आई करी तुहांजो अपने सोगी लेई जांगा, ताकि जिथू मैं ऐ ओथु ही तुसां भी रेन। 4 उसा जगा दा रस्ता जिथू मैं जाणा है ओथु दा रस्ता तुसां जाणदे न।” 5 थोमे उसला बोलया, “प्रभु जी, सांझो नी पता तू कुथु जाणा है, तां सांझो रस्ता क्रियां पता होणा?” 6 यीशुऐ उना जो बोलया, “रस्ता कने सचाई कने जडा जिन्दगी दिन्दा है सै मैं ही है, मेरे बिना कोई भी पिता परमेस्वरे बाल नी पुज्जी सकदा है। 7 अगर तुसां मिजो जाणया होँदा, तां मेरे पिता परमेस्वरे जो भी जाणदे, कने हुण उसयो जाणदे भी हेन, कने उसयो दिखया भी है।” 8

फिलिप्पुसे उसला बोलया, “प्रभु जी, पिता परमेस्वर दे दर्शण करवाई दे: इतणा ही साडे ताई काफी है।” 9 यीशुऐ उसयो बोलया, हे फिलिप्पुस, मैं इतणे रोजां ला तुहाड़े सोगी है, क्या तू मिजो नी जाणदा? जिनी मिजो दिखया है उनी पिता परमेस्वर जो भी दिखया है: तू कजो बोला दा की पिता परमेस्वर दे दर्शण करवाई दे? 10 क्या तू भरोसा नी करदा है, की मैं पिता परमेस्वर च है, कने पिता परमेस्वर मिजो च है। ऐ गल्लां जडियां मैं तुसां ने बोला दा है, अपणिया तरफा ला नी बोला दा, पर पिता परमेस्वरे मिजो च रेईकरी जडा चांदा है सै ही करदा है। 11 मेरा ही भरोसा करा, की मैं पिता परमेस्वर च है; कने पिता परमेस्वर मिजो च है; नितां जडे चमत्कार मैं कितयो न उना दिया बजा ने मेरे पर भरोसा करा। 12 मैं तुसां ने सच्च-सच्च बोलदा है, की जडा मिजो पर भरोसा करदा है, ऐ कम्म जडे मैं करदा है उनी भी करणे, क्योंकि मैं पिता परमेस्वर बाल जाणा है। 13 कने जडा कुछ तुसां मेरे नाऐ ने मंगे, सेई मैं करगा ताकि पुत्रे दे जरिये पिता परमेस्वर दी महिमा होऐ। 14 अगर तुसां मिजो ला मेरे नाऐ ला कुछ मंगे, तां मैं सै पूरा करणा। 15 अगर तुसां मिजो ने प्यार करदे न, तां मेरे हुकमा जो मनगे। 16 कने मैं पिता परमेस्वर ने बिनती करगा, की सै तुहांजो इक होर मददगार दे, ताकि सै हमेशा तुहाड़े सोगी रे। (aiōn g165) 17 सै सच्च दी आत्मा, जडी पबित्र आत्मा है, सै परमेस्वरे दे बारे च सच्च जो प्रगट करदा है, क्योंकि संसार ना पबित्र आत्मा जो दिखदा है कने ना उसयो जाणदा है: तुसां पबित्र आत्मा जो जाणदे न, क्योंकि सै तुहाड़े सोगी रेंदा है कने उनी तुसां च होणा है। 18 “मैं तुहांजो अनाथ नी छडणा है, मैं तुहाड़े बाल बापस ओणा। 19 थोड़े ही बक्ते च संसारे दे लोकां मिजो नी दिखणा, पर तुसां मिजो दिखणा क्योंकि मैं फिरी ला जिन्दा होणा है, इस ताई तुसां भी जिन्दा रेणा है। 20 जिस रोजे मैं जिन्दा होईकरी बापस ओणा उसी दिने तुहांजो पता लगणा, की मैं अपने पिता परमेस्वर च है कने तुसां मिजो च न, कने मैं तुसां च है। 21 जडे मेरे हुक्मा जो जाणदा है, कने सै हुक्मा जो मनदा है, सै ही मिजो ने प्यार करदा है, कने मैं भी उसला प्यार करणा है कने जडा मिजो ने प्यार करदा है, उसला मेरे पिता परमेस्वरे भी प्यार करणा, कने मैं उसला प्यार रखणा, कने मैं अपने आपे जो उदे पर प्रगट करणा है।” 22 उनी यहूदे जडा इस्करियोती नी था, उनी बोलया, “प्रभु जी, क्या होया की तू अपने आपे जो सांझो पर प्रगट करणा चांदा है, कने संसारे दे लोकां पर नी?” 23 यीशुऐ उसयो जबाब दिता, मैं अपने आपे जो ऐसे लोकां जो दसदा है जडे कोई मिजो ने प्यार करदे न, कने मेरियां सिखाईयां गल्लां जो मंदे न। कने मेरे पिता उसने प्यार रखणा कने असां आई करी उदे सोगी रेणा है। 24 जडा मिजो ने प्यार नी करदा, सै मेरी सिखाईयां गल्लां जो नी मनदा है, कने जडा मेरी शिक्षा तुसां सुणदे न, सै मेरियां नी न पर मेरे पिता परमेस्वर दी शिक्षा न, जिनी मिजो भेजया है। 25 ऐ गल्लां मैं तुहाड़े सोगी रेईकरी तुसां ने बोलियां न। 26 मददगार मतलब की पबित्र आत्मा जिसयो पिता परमेस्वरे मेरी जगा लेणे ताई भेजणा है, पबित्र आत्मा तुहांजो सारियां गल्लां सिखाणियां न, कने जडा कुछ मैं तुसां ने बोलया है, सै सब कुछ तुहांजो याद करणा है। 27 मैं तुहांजो शांति दिन्दा है, मैं अपनी शांति तुहांजो दिन्दा है; ऐ सै शांति नी है जडी संसार देई सकदा है। तुसां अपने मने जो दुखी

कने डरया होया मत होणा दिया। 28 तुसां सुणाया, की मैं तुहांजो ने बोलया, “मैं जाणा है। कने तुहाडे बाल फिरी बापस आई जाणा है अगर तुसां मेरे ने प्यार करते न, तां इसा गल्लां ने खुश होंदे न, की मैं पिता परमेश्वर बाल जाणा है क्योंकि पिता परमेश्वर मिंजो ला बडा महान है।” 29 कने मैं हुण ऐ सब गल्लां होणे ला पेहले तुहांजो ने बोली दितियां न, की जालू सै होई जांगियां, तां तुसां मिंजो पर भरोसा करन। 30 हुण मेरे बाल तुसां ने तुहाडे सोगी गल्लां करणे ताई जादा बकत नी क्योंकि इसी संसारे दे सरदारे जैताने ओणा है, कने मिंजो पर उदा कोई हक नी है। 31 मैं तियां ही करदा है जियां पिता परमेश्वरे मिंजो हुकम दिता, ऐ इस ताई की संसार दे लोकां जो पता लग्ये की मैं पिता परमेश्वरे ने प्यार करदा है। कने जियां पिता परमेश्वर मिंजो हुकम दिन्दा, मैं तियां ही करदा है। उठा, ऐथू ला चलदे न।

15 सच्ची दाखा दी बेल मैं हे; कने मेरा पिता परमेश्वर किसान है। 2 हर इक डाली जड़ी मिंजो ने लगियो है, कने नी फल्दी है, उस जो सै बडी दिन्दा है, कने जडी डाली फल्दी है उसा जो सै छांडा है ताकि सै होर जादा फले। 3 जडी शिक्षा मैं तुसां जो दितियो है, उसा दिया बजा ने तुसां शुद्ध न। 4 तुसां मिंजो च बणी रिया, कने मैं तुहांजो च: जियां कोई डाली अगर दाखा दिया बेला ला टूटी जा, तां सै अपु नी फली सकदी, तियां ही तुसां मिंजो च बणी नी रेंगे तां, तुसां कुछ नी करी सकदे। 5 मैं दाख बेल है: कने तुसां डालियाँ न; जडा मिंजो च बणी रेंदा है, कने मैं उदे च, सै मता फलदा है, क्योंकि मिंजो ने लग होईकरी तुसां कुछ नी करी सकदे। 6 अगर कोई मिंजो च बणी नी रे, तां उसा डालियाँ जो बड़ी करी फेंकी दिन्दे न, कने जालू सै डालियाँ सुकी जादियां न; कने लोक उना जो गठेरी करी अग्गी च पाई दिन्दे न, कने सै फकुई जान्दियां न। 7 अगर तुसां मिंजो ने बणी रेन, कने मेरियां शिक्षा च तुसां बणी रेंगे तां तुसां जडा चांगे सै मंगा कने सै तुहाडे ताई होई जाणा। 8 मेरे पिता परमेश्वर दी महिमा इसी ने होंदी है, की तुसां बडा जादा फल लोंगे, ऐई तुहाडा मेरे चले होणे दा सबूत है। 9 जियां पिता परमेश्वरे मिंजो ने प्यार रख्या, तियां ही मैं भी तुहांजो ने प्यार किता, मेरे प्यारे च बणी रिया। 10 अगर तुसां मेरे हुकमा जो मन्ये, तां मेरे प्यारे च बणी रेणा जियां की मैं अपने पिता परमेश्वरे दे हुक्मा जो मनया है, कने उदे प्यारे च बणी रेंदा है। 11 मैं ऐ गल्लां तुहांजो इस ताई बोलियां न, ताकि तुसां च भी सेई खुशी हो जडी मिंजो च है, कने तुहाडी खुशी पुरी होई जा। 12 मेरा हुकम ऐ है, की जियां मैं तुसां ने प्यार रख्या है तियां ही तुसां भी इकी दुज्जे ने प्यार रखा। 13 कुसी बाल ऐ दसणे ताई की सै अपने मित्रां ने प्यार करदा है, इसला बडा होर कोई तरिका नी है की सै अपने मित्रां जो बचाणे ताई अपनी जान देई दे। 14 जडा भी हुकम मैं तुहांजो दिन्दा है, अगर तुसां उसयो करन, तां तुसां मेरे मित्र न। 15 हुण मैं तुहांजो सेवक नी बोलणा, क्योंकि सेवक नी जाणदा है, की उदा स्वामी क्या करदा है: पर मैं तुहांजो मित्र बोलया है, क्योंकि मैं जडियां गल्लां अपने पिता परमेश्वरे ला सुणियां, सै सारियां तुहांजो दस्सी दितियां न। 16 तुसां मिंजो नी चूण्या है पर मैं तुहांजो चूण्या है कने तुहांजो नियुक्त कितया है ताकि तुसां जाई करी फल देन; कने तुहाडा फल टिकाऊ रे, ताकि तुसां मेरे चले न, इस ताई जडा कुछ तुसां मेरे ना ने मंग्ये, सै तुहांजो दे। 17 इना गल्लां

दा हुकम मैं इस ताई दिन्दा है, ताकि तुसां इकी दुज्जे ने प्यार रखन। 18 अगर संसार दे लोक तुहांजो ने बैर रखदे न, तां तुसां जाणदे न, की इना तुसां ला पेहले मिंजो ने भी बैर रखया। 19 अगर तुसां संसारे दे लोकां सांई होंदे, तां संसारे दे लोक अपण्यां ने प्यार करते न, पर इसा बजा ने की तुसां इस संसारे दे लोकां ने रिश्ता नी रखदे, कने मैं तुहांजो इस संसारे ला चूण्या है, इस ताई संसारे दे लोक तुहांजो ने बैर रखदे न। 20 जडा मैं तुसां जो दसया है, सेवक अपने मालिके ला बडा नी होँदा है, इसयो याद रखा अगर उना मिंजो सताया, तां तुहांजो भी सताणा है; अगर उना मेरियां शिक्षा जो मनया, तां तुहाडी शिक्षा जो भी मनया। 21 पर ऐ सारा कुछ लोकां इसा बजा ने तुहाडे सोगी करणा क्योंकि तुसां मेरे चले न, कने सै मेरे भेजणे बाले परमेश्वरे जो नी जाणदे न। 22 अगर मैं नी ओंदा कने उना ने गल्लां नी करदा, तां सै पापी नी बणदे पर हुण उना जो उना दे पापां ताई कोई भाना नी। 23 जडा मिंजो ने बैर रखदा है, सै मेरे पिता परमेश्वर ने भी बैर रखदा है। 24 अगर मैं उना च सै चमत्कार नी करदा, जडे कुनी होरनी नी किते तां सै पापी नी बणदे, पर हुण उना मिंजो दिखी लिया है फिरी भी सै मिंजो कने मेरे पिता परमेश्वरे दोनो ने बैर करते न। 25 ऐ इस ताई होया की जडा उना दे पबित्र शास्त्र च लिखया है ऐ इना गल्लां जो पूरा करदा है, उना बिना कुसी बजा ने मिंजो ने नफरत किती। 26 पर जालू सै मददगार ओणा, जिसयो मैं तुहाडे बाल पिता परमेश्वरे दिया तरफा ला भेजगा, मतलब की सच्च दी आत्मा जडी पिता परमेश्वरे दिया तरफा ला निकलदी है, तां उनी मेरी गबाई देंगी। 27 कने तुसां भी गबाह न क्योंकि तुसां शुरू ला मेरे सोगी न।

16 ऐ गल्लां मैं तुहांजो ने इस ताई बोलियां की कुथी तुसां भरोसा करणा ना छडी देन। 2 उना तुहांजो यहदी जंज घर ला कडी देणा, कने सै बकत ओणा है, की अगर कोई तुहांजो मारी दिगा, तां तुहाडे हत्यारे ऐ समझणा है की सै परमेश्वरे दी सेबा करा दा है। 3 कने उना ऐ इस ताई करणा क्योंकि उना ना पिता परमेश्वर जो जाणया है कने ना ही मिंजो जाणदे न। 4 पर मैं ऐ गल्लां इस ताई तुसां ने बोलियां, ताकि जालू उना दा बकत ओऐ तां तुहांजो याद आई जा, मैं ऐ सब तुसां जो शुरू च इस ताई नी बोलया, क्योंकि उस बकत मैं तुहाडे सोगी था। 5 हुण मैं अपने भेजणे बाले बाल जाणा है कने तुसां चे कोई मिंजो ला नी पूछदा है, की मैं कुथु चल्या है? 6 पर मैं जडियां ऐ गल्लां तुसां ने बोलियां न, इस ताई तुहाडा मन बडा दुखी होया है। 7 तमी मैं तुसां ने सच्च बोलदा है, की मेरा जाणा तुहाडे ताई खरा है, क्योंकि अगर मैं नी जांगा, तां उनी दिलासा देणेबाले तुहाडे बाल नी ओणा, पर अगर मैं जांगा, तां उसयो तुहाडे बाल भेजी दिगा। 8 कने उनी आई करी संसारे दे लोकां जो पाप कने धार्मिकता कने न्याय दे बारे च यकीन दिलाणा। 9 पापे दे बारे च यकीन दिलाणा की सै मिंजो पर भरोसा करणे ने मना करते न; 10 कने ऐ साबित करदा है की यीशु धर्मी था, इस ताई की मैं पिता परमेश्वर बाल चल्या है, कने तुसां मिंजो फिरी नी दिखणा है, 11 कने न्याय दे बारे च भी यकीन दिलाणा की इस संसारे दे सरदार जैताने जो दोषी ठहराया है। 12 मैं तुहांजो ने होर भी मतियां गल्लां बोलणा चांदा है, पर हले तुसां इना जो सेहन नी करी सकदे न। 13 पर जालू सै मतलब की सच्च दिया आत्मा ओणा है, तां आत्मा

तुसां जो परमेश्वर दे बारे च जडा सच्च है सै समझाणा है, क्योंकि उनी अपने अधिकारे ने नी बोलणा है, पर जडा कुछ परमेश्वरे ला सुणगा, सै ही उनी बोलणा है, कने होणे बालियां गल्लां तुहांजो दसणियां। 14 उनी मेरी महिमा करणी, क्योंकि उसयो मेरिया तरफा ला जडा मिलया है, उनी तुसां जो सै ही सिखाणा। 15 जडा कुछ पिता परमेश्वर दा है, सै सब मेरा है; ताई तां मैं बोलया था की, उनी मेरियां गल्लां चे लेईकरी तुहांजो दसणा है। 16 “थोडे बकते च तुसां मिंजो नी दिखणा, कने फिरी थोड़ी देरा च तुसां मिंजो दिखणा है।” 17 तालू उदे कितणयां ही चेलयां अपु चे बोलया, “ऐ क्या है, जडा सै सांझो ने बोला दा है, थोडे बकते च तुसां मिंजो नी दिखणा, कने फिरी थोड़ी देरा च तुसां मिंजो दिखणा है? कने ऐ इस ताई की मैं पिता परमेश्वर बाल चलाया है?” 18 चले इकी दुज्जे ला पुछदे रे, “की सै क्या बोला दा है। क्या है ऐ थोडे बकत बाद जिसदे बारे च सै बार-बार बोला दा है।” 19 यीशुऐ ऐ जाणी करी, की सै मिंजो ला इना गल्लां दा मतलब पूछणा चादे न, उना जो बोलया, क्या तुसां अपु चे मेरिया इना गल्लां दे बारे च पूछा दे न, थोडे बकते च तुसां मिंजो नी दिखणा, कने फिरी थोड़ी देरा च तुसां मिंजो दिखणा है? 20 मैं तुसां ने सच्च-सच्च बोलदा है; मेरिया मौता दे बाद तुसां रोंणा कने दुखी होणा है, पर संसारे दे लोकां खुश होणा है: तुसां जो दुख होणा, पर जालू मैं मरी करी दुबारा जिन्दा होणा तालू तुहाडा दुख खुशी च बदली जाणा। 21 जालू जनानी बच्चे जो जमणा लगदी है तां उसा जो बड़ी पिढ होंदी है, क्योंकि उसा दे दुखे दी घडी आईयो है, पर जालू सै बच्चा जम्मी बोंदी है तां इसा खुशिया ने की संसारे च इक माणू पैदा होया है, उस दुखे जो फिरी कदी याद नी करदी। 22 इयां ही हुण तुहांजो भी दुख है, पर मैं तुसां ने फिरी मिलणा है कने तुसां खुश होणा; कने तुहाडी खुशी तुहांजो ला कुनी नी खोणी। 23 जालू मिंजो तुसां दोबारा दिखणा तालू मिंजो ला कुछ नी पूछणा: मैं तुसां ने सच्च-सच्च बोलदा है, अगर पिता परमेश्वरे ला कुछ मंगे, तां उनी मेरे चले होणे दिया बजा ने तुहांजो देणा। 24 हले दीकर तुसां मेरे नाऐ ने पिता परमेश्वरे ला कुछ नी मंगया; पर मंगे तां मिलणा ताकि तुहाडी खुशी पूरी होई जा। 25 “मैं तुहांजो ने ऐ गल्लां कहाणियां च बोलियां न, पर सै बकत ओणा है, की मैं तुसां ने होर कहाणियां च नी बोलणा है पर खुली करी पिता परमेश्वर दे बारे च दसणा। 26 उस बेले तुसां अपु मेरे नाऐ ने मंगणा, क्योंकि तुसां मेरे चले न कने मैं तुसां जो बोलदा है, की मैं तुहाडे ताई पिता परमेश्वर ने बिनती नी करणी। 27 क्योंकि मेरे पिता परमेश्वर तां अपु ही तुसां ने प्यार करदा है, इस ताई की तुसां मिंजो ने प्यार रखया है, कने ऐ भी भरोसा किता की, मैं पिता परमेश्वर दिया तरफा ला निकलया है। 28 मैं पिता परमेश्वर ला निकली करी संसारे च आया है, फिरी संसारे जो छडी करी पिता परमेश्वरे बाल जाणा है।” 29 उदे चेलयां बोलया, “दिख, हुण तां तू खुली करी बोला दा है, कने कोई कहाणी नी बोली।” 30 हुण असां जाणी गियो न, की तू सारा कुछ जाणदा है, कने तिजो कुसी दी जरूरत ही नी की कोई तिजो ला सबाल पुछे, इसला असां भरोसा करदे न, की तू परमेश्वरे ला निकलया है। 31 ऐ सुणीकरी यीशुऐ उना ने बोलया, “की क्या तुसां हुण भरोसा करदे न? 32 दिखा, सै बकत ओणा है बस आई रिया है की तुसां सारयां बख-बख होईकरी अपने-अपणे

रस्ते जाणा है, कने मिंजो किल्ला छडी देणा है, तमी मैं किल्ला नी क्योंकि मेरा पिता परमेश्वर मेरे सोगी है। 33 मैं ऐ गल्लां तुसां ने इस ताई बोलियां न, ताकि तुसां जो अंदरूनी शांति मिल्ले क्योंकि तुसां मेरे सोगी रिश्ता रखया, संसार च तुहांजो दुख होणा है, पर सबर रखा, मैं इस संसारे च राज करने बाले शैताने जो हराई दीतया है।”

17 यीशुऐ अपने चेलयां ने ऐ गल्लां बोलणे बाद कने अपणियां नजरां स्वर्ग पासे करिके बोलया, पिता परमेश्वर, सै बकत आई गिया है, की तू अपने पुत्रे दी महिमा कर, ताकि पुत्र भी तेरी महिमा करे, 2 क्योंकि तू मिंजो सारयां लोकां पर हक दितया है, की जिना जो तू मिंजो दितया है, उना सबना जो सै हमेशा दी जिन्दगी दे। (aiōnios g166) 3 कने हमेशा दी जिन्दगी ऐ है कि लोक तिजो जाणी सकन यानी कि इकलौते सच्चे परमेश्वरे जो। कने ऐ भी की सै मिंजो जाणन, यानी यीशु मसीह जो, जिसयो तू भेजया है। (aiōnios g166) 4 जडा कम्म तू मिंजो करने जो दितया था, उसयो पूरा करिके मैं धरतिया पर तेरी महिमा किती है। 5 इस ताई पिता परमेश्वर तू मिंजो अपनी महिमा ने महिमित कर, महिमा जडी संसारे दे होणे ला पेहले मेरी महिमा तरे सोगी थी। 6 मैं तुसां जो उना चेलयां पर प्रगट कितया है, जडे तुसां मिंजो संसारे चे दितयो न। सै तुहाडे थे, कने तू उना जो मिंजो दिता। कने उना तरे बचना जो मनया है। 7 हुण सै जाणी गियो न, की जडा कुछ तू मिंजो दितया है, सब कुछ तेरिया तरफा ला है। 8 क्योंकि जडा संदेश तू मिंजो दिता, मैं उना जो उना बाल देई दिता कने उना इना गल्लां पर भरोसा किता: कने सच्ची जाणी लिया है, की मैं तेरिया तरफा ला आया है, कने भरोसा करी लिया है की तू ही मिंजो भेजया है। 9 मैं उना ताई बिनती करदा है, सिर्फ उना ताई ही करदा है जडे तू मिंजो दितयो न क्योंकि सै तरे न। पर जडे संसारे ने रिश्ता रखदे न उना ताई बिनती नी करदा है। 10 कने जडा कुछ मेरा है सै सब कुछ तेरा है; कने जडा तेरा है सै मेरा है; इना ने मेरी महिमा प्रगट होई है। 11 हुण मैं संसारे च नी रेणा है, कने मैं तेरे बाल ओआ दा है पर मेरे चेलयां इस संसारे च रेणा है; हे पबित्र पिता, अपने नाऐ दिया शक्तिया ने उना दी रक्षा कर, ताकि उना दा इक ही मन हो जियां साडा इक ही मन है। 12 जालू मैं उना सोगी था, तां मैं तेरे उस नाऐ ने जडा तू मिंजो दितया है, उना दी रक्षा किती। मैं उना दी देख रेख किती, कने बिनाशे दे पुत्रे जो छडी करी उना चे कूसदा भी नाश नी होया, इस ताई की पबित्र शास्त्रे च लिखियो गल्ल पुरी हो। 13 पर हुण मैं तेरे बाल ओणा है, कने ऐ गल्लां मैं संसारे च रेंदे होए बोलदा है, ताकि उना जो मेरी खुशी भरपूरी ने मिल्ले। 14 मैं तेरा संदेश उना बाल पुजाई दितया है, कने संसारे दे लोकां उना ने बैर किता, क्योंकि जियां मैं संसार दा नी है, तियां ही से भी संसारे दे नी न। 15 मैं ऐ बिनती नी करदा, की तू उना जो संसारे ला चुकी ले, पर ऐ की तू उना दी शैताने ला रक्षा कर। 16 जियां मैं संसारे दा नी है, तियां ही से भी इस संसारे दे नी न। 17 तेरा बचन सत्य है। उना जो सच्चाई च अपने ताई लग कर। 18 जियां तू मिंजो संसारे च भेजया, तियां ही मैं भी इना जो संसारे च भेजया है। 19 कने मैं उना दे फायदे ताई अपने आपे जो पबित्र करदा है ताकि सै भी सच्च ने पबित्र होन। 20 मैं बस अपने चेलयां ताई ही बिनती नी करदा है, पर जडे इना दी शिक्षा ने मिंजो पर

भरोसा करगे उना ताई भी बिनती करदा है। 21 की सै सारे इक होन; जियां पिता तू मिंजो च है, कने मैं तिजो च है, तियां ही सै भी सांझो च होन, इस ताई की संसार दे लोक भरोसा करन, तू ही मिंजो भेजया है। 22 कने सै महिमा जडी तू मिंजो दिती, कने मैं उना जो दितियो है की सै तियां ही इक होन जियां असां इक न। 23 मैं उना च कने तू मिंजो च ताकि सै सिद्ध होईकरी इक होई जान, कने संसार जाणे की तू ही मिंजो भेजया है, कने जियां तू मिंजो ने प्यार रखया है, तियां ही उना ने भी प्यार रख। 24 पिता परमेस्वर, मैं चांदा है की जिना जो तू मिंजो दितयो है, जिथू मैं है, ओथु भी मेरे सोगी होन ताकि सै मेरिया उसा महिमा जो दिखन जडी तू मिंजो दितयो है, क्योंकि तू मिंजो संसारे दे बगने ला पेहले ला ही मिंजो ने प्यार रखया है। 25 हे धार्मिक पिता, संसारे दे लोकां तिजो नी जाणया, पर मैं तिजो जाणदा है कने चेलयां भी जाणया की तू मिंजो भेजया है। 26 कने मैं तेरा ना उना जो दसया कने दसदे रेणा है ताकि जडा प्यार तिजो मिंजो ने था, सेई उना चे रे कने मैं उना च रेणा।

18 जालू यीशुए प्राथना करणे बाद अपने चेलयां सोगी किद्रोन दे नाल्ले पार गया। ओथु इक बाग था, यीशु कने उदे चेले उस बागे दे अंदर गे। 2 उसयो पकड़बाणे बाला यहदा भी उसा जगा जो जाणदा था, क्योंकि यीशु ओथु अपने चेलयां सोगी जांदा था। 3 तालू यहदा, सिपाईयां दी इक टोलिया सोगी कने बड़े याजकां कने फरीसियां दे सेवकां जो लेईकरी उस बागे च आया कने हथां च दिये, मशालां, कने हथियार लियो थे। 4 तालू यीशु, उना सबना गल्लां जो जाणी करी जडियां उसने होंगे बालियां थियां, अगो आई करी उना ला पुछया, की कुसयो तोपा दे न? 5 उना उसयो जबाब दिता, “नासरत नगर ला यीशुए जो।” यीशुए उना जो बोलया, की मैं ही यीशु है। उसयो पकड़वाणे बाला यहदा भी उना सोगी खडोतया था। 6 यीशुए जो ऐसा बोलदे ही, की मैं ही नासरत दा यीशु है, सै पिच्छे हटी करी धरतिया पर डेई पे। 7 तालू यीशुए उना ला फिरी पुछया की, तुसां कुसयो तोपा दे न, “उना बोलया, नासरत नगर दे यीशु जो।” 8 यीशुए जबाब दिता, “मैं तां तुसां जो बोली बैठया है की हों मैं ही यीशु है, अगर तुसां मिंजो तोपा दे न तां इना लोकां जो जाणा दिया, ऐ मेरे चेले न।” 9 ऐसा इस ताई होया की, यीशुए जडा पेहले बोलया था सै सच्च होई जा: “जिना जो तू मिंजो दितया है उना चे मैं इकी जो भी नी गबाया है।” 10 तालू शमौन पतरसे अपणी तलवार कडी कने, महायाजके दे इकी नोकरे पर चलाई दिती कने उस दा इक कन उडाई दिता। उस सबके दा ना मलखुस था। 11 तालू यीशुए पतरसे ने बोलया, “अपणिया तलवारा जो मयाना च रख। जडा कटोरा मेरे पिता परमेस्वरे मिंजो दितया है, क्या मैं उसयो नी पिऐ?” 12 तालू सिपाईयां कने उना दे सूबेदारां कने यहदी अगुवां दे नोकरां यीशु जो पकड़ी करी बन्नी दिता, 13 कने पहले उसयो हन्ना बाल लेई गे, क्योंकि सै उस साले दे महायाजक कैफा दा सौरा था। 14 ऐ सेई कैफा नाऐ दा इक माणु था, जिनी यहदी अगुवां जो सलाह दिती थी की साडे लोकां ताई मरणा इक माणुए दा खरा है। 15 शमौन पतरस कने इक होर चेला भी यीशुए दे पिच्छे चली पे, इस चेले जो महायाजक जाणदे पछेणदे थे। इस ताई सै यीशुए पिच्छे-पिच्छे महायाजक दे अंगणे दीकर गया, 16 पर पतरस

बाहर दरबाजे पर खडोई रिया, तालू सै दुज्जा चेला जिसयो महायाजक जाणदे थे सै बाहर आया, कने उनी दरबाजे पर खडोतियो नोकराणियां जो बोली करी पतरसे जो अंदर लेई ओंदा। 17 उना नोकराणिया जडी दरबाजे पर खडोतियो थी, पतरसे जो बोलया, “की तू भी इस माणुए दे चेलयां चे तां नी ऐ?” उनी बोलया, “मैं नी है।” 18 सर्दियां दिया बजा ने मंदरे दे रखबाले कने सिपाई अगग बाली करी तपा दे थे, कने पतरस भी उना सोगी खडोई करी अगग तपा दा था। 19 तालू महायाजके यीशुए ला उदे चेले कने उदे उपदेशां दे बारे च पछताछ किती। 20 यीशुए उसयो जबाब दिता, “मैं सबना च खुली करी गल्लां कितियां, मैं यहदी जंज घर कने मंदरे च जाई करी हमेशा उपदेश दिता जिथू यहदी गिठे होंदे थे, कने कुछ भी लुकी करी कुछ नी बोलया। 21 तू मिंजो ला ऐ सबाल कजो पूछा दा है? सुणने बालयां ला पुछ की मैं उना ने क्या बोलया है। सै जाणदे न की मैं क्या-क्या बोलया है।” 22 जालू यीशुए ऐसा बोलया, तां बखे खडोतयो मंदरे दे रखबालयां चे इकी रखबाले, यीशुए जो थपड़ मारी करी बोलया, “क्या तू महायाजक जो इयां जबाब दे दा?” 23 यीशुए उसयो जबाब दिता, अगर मैं गलत बोलया, तां साबित कर की मैं गलत बोलया; पर अगर खरा बोलया है तां मिंजो कजो मारा दा है। 24 यीशुए अजे भी बनया ही था, कने हन्ने उसयो तियां ही कैफा महायाजक बाल भेजी दिता। 25 शमौन पतरस खडोई करी अगग तपा दा था, तालू उस सोगी खडोतयो लोकां उसयो पुछया की, “कुथी तू भी तां उदे चेलयां चे तां नी है?” उनी बोलया, “मैं नी है।” 26 महायाजक दे नोकरां चे इकी नोकरे, जडा उदा रिशतेदारां चे था, कने उदा कन पतरसे बडी दितया था, उनी बोलया की तिजो तां मैं यीशुए सोगी बागे च नी दिखया था? 27 पतरसे फिरी मना करी दिता, कने तालू झट मुर्गे बाग देई दिती। 28 फिरी यहदी लोक यीशु जो कैफा बाल लेई आऐ कने किल्ले जो लेई गे, ऐ रोमी राज्यपाल पिलातुस दा मेहल था, कने ब्यागा दा बकत था पर सै अपु किले अंदर नी गे अगर जांदे तां उना अशुद्ध होई जाणा था, क्योंकि पिलातुस यहदी नी था। अगर अशुद्ध होई जांदे तां फसह दी रोटी नी खाई सकदे थे। 29 तालू पिलातुस बाहर निकली करी उना बाल आया कने बोलणा लग्गा, “तुसां इस माणुए पर कुसा गल्लां दा आरोप लगा दे न?” 30 उना उसयो जबाब दिता, अगर ऐ अपराधी माणु नी होंदा तां असां इसयो तेरे बाल नी लोंदे। 31 पिलातुसे उना जो बोलया, “तुसां ही इसयो लेईजाई करी अपणिया व्यवस्था दे अनुसार इसयो सजा दिया।” यहदी अगुवां उसयो बोलया, “की सांझो कोई हक नी है की असां कुसी जो मौत दी सजा देई सकन।” 32 ऐ इस ताई होया की यीशु दी सै गल्ल पूरी हो जडी उनी ऐ इशारा करदे बोली थी मेरी मौत कियां कुस तरीके ने होणी है। 33 तालू पिलातुस फिरी किल्ले दे अंदर गया, कने यीशुए जो अंदर सदीकरी पुछया, “तू क्या यहदी लोकां दा राजा है?” 34 यीशुए जबाब दिता, “तू क्या ऐ गल्ल अपणिया तरफा ला बोला दा है, की कुनी होरनी ऐ गल्ल तिजो मेरे बारे च बोली है?” 35 पिलातुसे जबाब दिता, “तू जाणदा है की मैं यहदी नहीं है? तेरिया ही जाति कने बड़े याजकां तिजो मेरे हथे दितया है, तू क्या कितया है?” 36 यीशुए जबाब दिता, मेरा राज्य इस संसारे दा नी है, अगर मेरा राज्य इस संसारे दा होंदा तां मेरे चेलयां लड़णा था, कने मैं यहदी अगुवां दे हथे

गिरफ्तार नी होंदा: पर मेरा राज्य ऐथू दा नी है। 37 पिलातुसे उसयो बोलया, तू क्या राजा है? यीशुए जबाब दिता, “तू बोलदा है, की मैं राजा है, मेरा जन्म लेणा कने संसार च ओणे दी बजा ऐ है की मैं सच्च दे बारे च सिखाई सके। जडा कोई परमेश्वरे ने सच्चा प्यार करदा है, कने मेरा बचन सुणदा है।” 38 पिलातुसे उसयो बोलया, “सच्च क्या है?” ऐ बोली करी सै फिरी यहूदी अगुवां बाल चली गया कने उना ने बोलया, “मिंजो उदे च कोई भी दोष नी लग्गा दा है। 39 पर तुहाडा ऐ रिबाज है की मैं फसह दे त्योहारे च तुहाडे ताई इक कैदी छडी दें। तूसां क्या चांदे न की मैं तुहाडे ताई यहूदियां दे राजे जो छडी दें?” 40 तालू उना फिरी जोंरे ने बोलया, “इसयो नी, पर साडे ताई तू बरअब्बा जो छडी दे।” कने बरअब्बा इक डाकू था।

19 इसा गल्ला पर पिलातुसे सिपाईयां जो हुकम दिता की यीशुए जो लेई जा कने कोडे मारा। 2 कने सिपाईयां कंडयां दा मुकट बनाया कने उदे सिरे पर रखया, कने उसयो बैगणी कपड़े पेनाए, 3 कने उदे बखे आई करी बोलणा लग्गे, नमस्ते, यहूदियाँ दे राजा कने उसयो थपड़ मारे। 4 तालू पिलातुसे फिरी बाहर निकली करी लोंका ने बोलया, “मैं उसयो तुहाडे बाल फिरी लोंदा है, ताकि तुहांजो पता लग्गे की मिंजो इदे च कुछ भी गलत नजर नी आया।” 5 तालू यीशुए जो कंडयां दा मुकट कने बैगणी कपड़े पेनाई करी बाहर लांदा कने पिलातुसे उना ने बोलया, “इस माणुए जो दिखा।” 6 जालू बड़े याजकां कने मंदरे दे रखबालयां उसयो दिखया, तां चीलाई करी बोलया, “इसयो सूली पर चढा, सूली पर चढा!” पिलातुसे उना जो बोलया, “तूसां ही इसयो सूली पर चढा, क्योंकि मिंजो इदे च कुछ भी गलत नी मिल्ला है।” 7 यहूदी अगुवां उसयो जबाब दिता, “साडी भी व्यवस्था है कने उसा व्यवस्था दे अनुसार सै मारी देणे दे जोगा है क्योंकि उनी अपने आपे जो परमेश्वरे दा पुत्र बोलया है।” 8 जालू पिलातुसे ऐ गल्ल सुणी तां सै होर भी जादा डरी गया। 9 कने फिरी किले दे अंदर गया कने यीशुए जो बोलया, “तू कुथु दा है? पर यीशुए उसयो कोई भी जबाब नी दिता।” 10 पिलातुसे उसयो बोलया, “मिंजो ने कनी बोला दा है? क्या तू जाणदा नी की तिजो छडणे दा हक मिंजो है कने तिजो सूली पर चढाणे दा हक भी मिंजो है।” 11 यीशुए जबाब दिता, “अगर तिजो परमेश्वर दिया तरफा ला नी दितया होंदा, तां तेरा मिंजो पर कोई हक नी होंदा, इस ताई जिनी मिंजो तेरे हथे पकड़ाया है, उदा पाप जादा है।” 12 ऐ जबाब सुणीकरी पिलातुसे उसयो छडणा चाया, पर यहूदियां चीलाई करी बोलया, “अगर तू इसयो छडी दिगा तां तू महाराजा कैसरे दा मित्र नी है; जडा कोई भी राजा होणे दा दाबा करदा है कने अपने आपे जो राजा बोलदा है सै महाराजा दा दुश्मण है।” 13 ऐ गल्लां सुणीकरी पिलातुस यीशुए जो बाहर लेई आया कने न्याय दे सिंहासने पर बैठा, कने सै जगा इक चबूतरा था जिसयो इब्रानी भाषा च गम्बता बोलदे न। 14 ऐ फसह दे त्योहारे दे हफ्ते सबते दिया तयारियां दा रोज था कने दोपहर दे बक्ते: तालू उनी यहूदी लोकां जो बोलया, “ऐ ही है, तुहाडा राजा।” 15 पर सै चिलाणा लग्गे, इसयो मारी दे, इसयो मारी दे! कने इसयो सूली पर चढा। पिलातुसे उना जो बोलया, क्या मैं तुहाडे राजे जो सूली पर चढा? बड़े याजकां जबाब दिता, “महाराजा जो छडी करी साडा होर कोई राजा नी है।” 16 तालू पिलातुसे

यीशुए जो उना दे हबाले करी दिता ताकि सै उसयो सूली पर चढाण। 17 तालू सै यीशुए जो लेई गे। उना यीशुए ला अपनी सूली अपु चुकबाई कने उसयो यरूशलेम शेर दे बाहर खोपडी नाए दिया जगा जो लेई गे, कने जिसयो इब्रानी भाषा च गुल्गुता बोलदे न। 18 ओथु उना उसयो कने उदे सोगी दो माणुए जो सूली पर चढाया, इकी जो इक पास्से कने, दुजे जो दुऐ पास्से, कने बिच यीशुए जो। 19 कने राज्यपाल पिलातुसे इक्की फटिया पर लिखी करी सूलिया पर लगाई दिती कने उसा पर ऐ लिखया था, “नासरत दा यीशु मसीह यहूदियाँ दा राजा।” 20 ऐ फट्टी मते यहूदियाँ पढी क्योकि जिथू यीशुए जो सूली पर चढाया था सै जगा यरूशलेम शेर दे बखे थी कने इब्रानी भाषा च कने लतीनी भाषा कने यूनानी भाषा च लिखियो थी। 21 तालू यहूदियाँ दे बड़े याजक पिलातुसे बोलया, “यहूदियां दा राजा मत लिख पर ऐ की उनी बोलया, मैं यहूदियाँ दा राजा है।” 22 पिलातुसे जबाब दिता, “मैं जडा लिखी दितया है, सै नी बदलया जाणा है।” 23 जालू सिपाई यीशुए जो सूली पर चढाई बैठे, तां उदे कपड़े लेईकरी उना चार हिसयां च किते, चारो सिपाईयां ताई इक-इक हिसा कने कुरता भी लेई लिया, पर कुरते जो सितया नी था पर सै उपरे लेईकरी थले दीकर इक ही कपड़े ने बुणया था। 24 इस ताई उना अपु चे बोलया, “असां ऐ नी फाडना, पर इदे पर परिचियां पांदे न की ऐ कुसदा होणा।” ऐ इस ताई होया, ताकि पबित्र शास्त्रे च लिखया गया सच्च हो, “उना मेरे कपड़े अपु चे बंडी ले कने मेरे कपड़यां पर परिचियां पाईयां, कने सिपाईयां इयां ही किता।” 25 पर यीशुए दे सूली बाल उदी माता कने उदिया माता दी बेहण, क्लोपास दी घरे बाली मरियम कने मागदल ग्रां दी मरियम खडोटियो थी। 26 यीशुए अपणिया माता जो कने उस चले जो जिसने सै प्यार रखदा था उसयो बखे खडोतया दिखीकरी अपनी माता ने बोलया, “हे नारी, दिख, ऐ तेरा पुत्र है।” 27 तालू उनी चले बोलया, “ऐ तेरी माता है।” कने उसी बेले सै चेला, उसा जो अपने घरे लेई गया। 28 इदे बाद यीशुए ऐ जाणी करी की मेरा सारा कम्म खत्म होई गया है; इस ताई की पबित्र शास्त्रां दियां गल्लां सच्च साबित होन बोलया, “मैं तरिणा है।” 29 ओथु इक सिरके ने बस्या बांडा रखया था, तां उना चे कुनकी सिरके ने सेडयो स्पंजे जो जुफे दे स्खे दे डंडे पर रखीकरी उदे मुऐ ने लाया। 30 जालू यीशुए सै सिरका चखया, तां बोलया, “पूरा होया,” कने सर झुकाई करी अपने प्राण छडी दिते। 31 हुण ऐ तैयारिया दा दिन था, कने अगले दिन सब्त कने फसह दोनों ही थे। ऐ यहूदी लोकां ताई इक खास दिन था, सै नी चांदे थे इस दिने लाशा सूली उपर रेन। इस ताई उना पिलातुसे ने बोलया की उना माणुआ दियां जंगा तोडी दिया ताकि उना दी मौत झट होई जा ताकि लाशां जो थले उतारया जाई सके। 32 तां सिपाईयां आई करी पेहले बाले दियां जंगा तोडियां फिरी दुजे दियां भी, जडे यीशुए सोगी सूली पर चढायो थे। 33 पर जालू यीशुए बाल आई करी दिखया की सै मरी गया है, तां उदियां जंगा नी तोडियां। 34 पर सिपाईयां चे इकी बरछे ने उदा पंजर बेधया कने उदे च खून कने पाणी निकलया। 35 जिनी माणुए ऐ सब दिखया, उनी ऐ गबाई दिती है, ताकि तूसां भी यीशुए पर भरोसा करी सकन। कने उदी गबाई सच्ची है, कने सै जाणदा है, की सच्च बोला दा है। 36 ऐ गल्लां इस ताई होईयां की पबित्र शास्त्रे च जडा लिखया है सै सच्च

होई जा, “उदी कोई हड्डी नी तोडी जाणी।” 37 फिरि इक होर जगा पबित्र शास्त्र च लिखया है, “जिसयो उना बेधया है, उदे पर नजर करणी।” 38 इना गल्लां दे बाद अरिमतिया शेहरे दे यूसुफे, जडा यीशुए दा चेला था, (पर यहूदी अगुवां दे डरे ने इसा गल्ला जो लुकाई रखदा था), उनी पिलातुसे ने बिनती किती, की मैं यीशुए दिया लाशा जो लेई जां, कने पिलातुसे उदी बिनती सुणी, कने सै आई करी उदी लाशा जो लेई गया। 39 नीकुदेमुस भी जडा पेहले यीशुए बाल राती गया था कने लगबग तेती किलो गन्धरस कने एलवा लेई आया। 40 तालू इना दोनों यीशुए दी लाश लेई कने यहूदियां दे रिबाजे ने उस पर सै मुस्का बालियां चिंजा लगाई करी कपडे दियां पट्टियां च लपेटया। 41 उसा जगा पर जिथू यीशु सूली पर चड़ाया था, ओथु इक बारी थी; कने उसा सो बारिया च इक नोई कबर थी, उसा च पेहले कदी कोई नी दफनाया था। 42 इस तांई उना यीशुए जो उसा कबरा दिया गुफा च रखी दिता क्योंकि सै बखे ही थी कने सै यहूदियां दे सब्त दी तैयारिया दा दिन भी था।

20 तुआरे ब्यागा तडके मरियम जडी मगदल गां दी थी, सै कने उसा सोगी होर भी जनानियां कबरा पर आईयां, उना कबरा दे दरबाजे ला पथरे जो हटया दिखया। 2 तालू सै दोडी कने शमौन पतरसे कने उसी दुऐ चेले बाल जिसने प्रभु प्यार रखदा था, आई करी बोलया, “सै प्रभु यीशुए दी लाशा जो कबरा ला कडी लेई गे; कने मैं नी जाणदी की उसयो कुथु रखया है।” 3 तालू पतरस कने सै दुज्जा चेला कबरा पासे चलीं पे। 4 कने दोनों सोगी-सोगी दोडयो थे, पर दुआ चेला पतरसे ला तेज दौडी करी पेहले कबरा पर पुज्जी गया। 5 कने निठा होईकरी अंदर दिखया की ओथु कपडे दियां पट्टियां दा डेर लगया था: पर सै अंदर नी गया। 6 तालू उदे पिच्छे-पिच्छे शमौन पतरस भी पुज्जी गया कने कबरा दे अंदर गया कने कपडे पियो दिक्खे। 7 कने सै अंगोछा जडा सिरे पर लपेटया था, सै कपडे सोगी नी पिया था पर सै इक लग जगा च मिल्ला। 8 तालू दुआ चेला भी जडा कबरा च पेहले पुजया था, अंदरे जो गया कने दिखीकरी भरोसा किता कि यीशु मरयां चे जिन्दा होई गया था। 9 पबित्र शाखां च यीशु दे बारे च ऐ लिखया था की उनी मरणे बाद जिन्दा होणा है, पर सै हले दीकर नी समझी पायो थे। 10 तालू सै चेले अपने घरे जो बापस चलीं गे। 11 पर मरियम रौंदी होई कबरा दे बाहर ही खडोई रेई कने रौंदे-रौंदे कबरा पास्से निठे होईकरी, 12 दो स्वर्गदूतां जो चमकदे कपडे पाई करी इकी जो सौंदिया कने दुज्जे जो पोंदियां बैठया दिखया, जिथू यीशुए दी लाश रखियो थी। 13 स्वर्गदूतां मरियम ला पुछया, ओ जनानिये, तू कजो रोआ दी है? उनी उना जो बोलया, “सै मेरे प्रभु दिया लाशा जो चुकी लेई गे कने मिंजो नी पता की उसयो कुथु रखया है।” 14 ऐ बोलणे दे बाद सै पिच्छे मुडी कने यीशुए जो खडोतया दिखया कने पछेणया नी की सै यीशु है। 15 यीशुए उसा ने बोलया, जनानिये तू कजो रौंदी है? कुसयो तोपा दी है? उना माली समझीकरी उसयो बोलया, “श्रीमान जी, अगर तू उदे शरिर जो चुकया है तां मिंजो दसी दे की कुथु रखया है कने मैं उसयो लेई जांगी।” 16 यीशुए उसा जो बोलया, मरियम। उना उस पासे मुडी करी उसला इब्रानी भाषा च बोलया, गुरु जी। 17 यीशुए उसा जो बोलया, “मेरे पैरां च पेईकरी मिंजो मत रोक क्योंकि मैं हले दीकर उपर पिता परमेस्वर बाल

नी गया है, कने मेरे चेलयां बाल जाई करी उना जो बोली दे, की मैं अपने पिता, कने तुहाडे पिता, कने अपने परमेस्वर, कने तुहाडे परमेस्वरे बाल उपर चलया है।” 18 मरियम जडी मगदल गां दी थी उना जाई करी चेलयां जो दसया, “मैं प्रभु जो दिखया, कने उनी मिंजो ने गल्लां कितियां।” 19 उसी तुआरे दिया संझा बेले सारे चेले इकी जगा गिठे होए, उना दरबाजे बंद करी ले क्योंकि यहूदी अगुवां ला डरयो थे, तालू यीशु आया कने बिच खडोई करी उना जो बोलया, “तुहांजो शांति मिल्ले।” 20 कने ऐ बोली करी उनी अपने हथां कने पैरां दे जखम दर्से: तालू चेले प्रभु जो दिखीकरी खुश होए। 21 यीशुए फिरि उना जो बोलया, “तुहांजो शांति मिले; जियां पिता परमेस्वरे मिंजो संसार च भेजया है, तियां ही मैं भी तुहांजो संसारे च भेजा दा है।” 22 ऐ बोली करी उनी उना पर फुंक मारी कने बोलया, “पबित्र आत्मा जो अपनाओ। 23 अगर तुसां कुसी दे पाप माफ करगे, उना दे पाप माफ होए न, कने जिना दे पाप तुसां माफ नी करगे, उना अपने पापां च फसी रेणा है।” 24 पर बाहरां चेलयां चे इक माणु थोमा जिसयो दिदुमुस बोलदे न, जालू यीशु आया तां सै उना सोगी नी था। 25 जालू होर चेले उसला बोलणा लग्गे, असां प्रभु जो दिखया है, तालू उनी उना जो बोलया, “जालू दीकर मैं उदे हथां च मेखां दे जखम कने उना मेखां दे छेदां च कने उदे पसलियां च हथ नी पाई लेंगा, तालू दीकर मैं भरोसा नी करणा की सै मरयां च जिन्दा होई गया है।” 26 अठां रोजा बाद उदे चेले फिरि घरे अंदर थे, कने थोमा उना सोगी था, कने दरबाजे बंद थे, तालू यीशुए आई करी कने बिच खडोई करी बोलया, “तुहांजो शांति मिल्ले।” 27 तालू उनी थोमा जो बोलया, अपणिया उंगलियां ने मेरे हथां जो छूईकरी दिख कने अपने हथे जो अगगे करी के मेरियां पसलियां च पा; कने शक करणा बंद कर कने भरोसा कर की मैं मरयां चे जिन्दा होई गया है। 28 ऐ सुणीकरी थोमे जबाब दिता, “मेरे प्रभु जी, मेरे परमेस्वर।” 29 यीशुए उसयो बोलया, “तू तां मिंजो दिखीकरी भरोसा किता है। धन्य न सै जडे बिना दिखयो मिंजो भरोसा करदे न।” 30 यीशुए होर भी चमत्कार चेलयां दे सामणे दर्से, जडे इसा कताबां च नी लिखयो न। 31 पर ऐ इस तांई लिखयो न, ताकि तुसां भरोसा करन, की यीशु ही परमेस्वरे दा पुत्र मसीह है: कने उस पर भरोसा करी के उदे नाए ने तुहांजो हमेशा दी जिन्दगी मिल्ले।

21 इना गल्लां दे बाद यीशुए अपने आपे जो तिबिरियास झिला दे बखे चेलयां जो दर्शन दिते कने इस तरीके ने दर्शन दिते। 2 शमौन पतरस कने थोमा जिसयो दिदुमुस बोलदे न, कने गलील प्रदेश दे काना शेहरे दा नतनएल कने जब्दी दे पुत्र, कने उदे चेलयां चे दो जणे होर गिठे होए थे। 3 शमौन पतरसे उना जो बोलया, मैं मछियां पकडना चलया है। उना उसला बोलया, “असां भी तेरे सोगी चलदे न।” तां सै निकली करी किस्तिया पर चडी गे, पर उसा राती उना कुछ नी पकडया। 4 अगले दिने ब्याग होंदे ही यीशु कनारे पर खडोतया था, पर चेलयां उसयो पछेणया नी की ऐ यीशु है। 5 तालू यीशुए उना जो बोलया, हे मेरे प्यारो, क्या तुहाडे बाल कुछ खाणे जो है? उना जबाब दिता, “नी।” 6 यीशुए उना जो बोलया, “किस्तिया दे सजे पास्से जाल फेंका, तां मिलणियां।” तालू उना जाल फेंकया, कने हुण मछियां जादा

होणे दिया बजा ने उना ला जाल नी खिची होया। 7 इस ताई उस चले ने जिसने प्रभु प्यार रखदा था पतरसे जो बोलया, “ऐ तां प्रभु है।” जालू शमौने ऐ सुणया की प्रभु यीशु है, तां उनी अपने सै कपडे पाई ले जडे उनी कम्म करदे बेले उतारी दितयो थे कने पाणिये च छाल देई दिती। 8 पर होर चले डोंगिया पर मछियां ने भरुऐ जाले जो खिज्जी लेई आए, क्योंकि सै कनारे ला जादा दूर नी थे, कोई सो मीटर दूर थे। 9 जालू सै कनारे पर पुज्जे, तां उना कोलयां दिया अगगी पर मछियां कने उदे बखे रोटियां रखियां दिखियां। 10 यीशुऐ उना जो बोलया, “जडियां मछियां तुसां हुण पकडिया न, उना चे थोडिया लेई ओआ।” 11 शमौन पतरसे डोंगिया पर चढी करी इकसो त्रियूँजा मछियां ने भरया जाल कनारे पर खिचया, कने इतणियां मछियां होणे ने भी जाल नी फटया। 12 यीशुऐ उना जो बोलया, “ओआ रोटी खाई लिया।” कने चेलयां चे कुसयो भी होंसला नी होया, की उसला पूछन, तू कुण है? “क्योंकि सै जाणदे थे की ऐ प्रभु ही है।” 13 यीशुऐ रोटी लेईकरी उना जो दिती, कने तियां ही मच्छी भी दिती। 14 ऐ तिजी बरी है की यीशुऐ मरी करी जिंदा होणे बाद चेलयां जो दर्शण दिते न। 15 रोटी खाणे बाद यीशुऐ शमौन पतरसे जो पुछया, हे यहून्ना दे पुत्र शमौन, क्या तू सच्ची इना बाकियां ला जादा मिजो ने प्यार करदा है? उनी यीशुऐ जो बोलया, हां प्रभु; तू तां जाणदा है, की मैं तिजो पर भरोसा रखदा है, उनी उना जो बोलया, “मेरे छेलुआं दी रखबाली कर।” 16 यीशुऐ फिरी दूजी बरी उसयो पुछया, “हे यहून्ना दे पुत्र शमौन, क्या तू मिजो ने प्यार रखदा है?” उनी उसयो बोलया, “हाँ, प्रभु तू तां जाणदा हे की मैं तिजो ने प्यार करदा है?” उनी उसयो बोलया, “मेरियां भेडां दा पुआल बण।” 17 यीशुऐ तीजी बरी उसयो पुछया, “यहून्ना दे पुत्र शमौन, क्या तू मिजो ने प्यार करदा है?” पतरस उदास होई गया, की उनी उसयो तीजी बरी ऐसा बोलया, “क्या तू मिजो ने प्यार करदा है।” कने उनी बोलया, “प्रभु जी, तू तां सब कुछ जाणदा है की मैं तिजो ने प्यार करदा है।” यीशुऐ उसला बोलया, “मेरियां भेडां जो चुगा।” 18 “मैं तुसां ने सच्च-सच्च बोलदा है, जालू तू जवान था, तां अपने लक्के जो बन्नी करी जिथू चांदा था, ओथु गुमदा था; पर जालू तू बुडा होइ जाणा, तां तू अपने हथां जो फेलांगा, कने कोई तिजो बन्नी लेगा कने तिजो ओथु लेई जाणा जिथू तू जाणा नी चांदा।” 19 यीशुऐ ऐसा ऐ दसणे ताई बोलया की पतरसे कियां मरणा कने परमेश्वरे दी महिमा करणी है; ऐ बोली करी, उसयो बोलया, “मेरा चेला बणी रे।” 20 पतरसे मुडी करी उस चले जो पिच्छे ओदे दिखया जिसने यीशु प्यार रखदा था। ऐ सै ही है जिनी फसह दी रोटी खाणे बेले यीशुऐ बखे बेईकरी पुछया था, “प्रभु जी, तिजो पकडाणे बाला कुण है?” 21 उसयो दिखीकरी पतरसे यीशुऐ जो बोलया, “प्रभु जी, इदे सोगी क्या होणा है?” 22 यीशुऐ उसयो बोलया, “अगर मैं चां की सै मेरे ओणे दीकर जिन्दा रे, तां तिजो क्या? तू मेरा चेला बणी रे।” 23 ताई तां भाईयां च ऐ गल्ल फेली गेई की उनी दुज्जे चले नी मरणा है; तमी यीशुऐ उसयो ऐ नी बोलया, की इनी नी मरणा है, पर ऐ की “अगर मैं चां की ऐ मेरे ओणे दीकर जिन्दा रे, तां तिजो इसला क्या?” 24 जिनी माणुऐ ऐ सब कुछ दिखया, उनी ऐ गबाई दिती है, ताकि तुसां भी यीशु पर भरोसा करी सकन। कने उदी गबाई सच्ची है। कने असां जाणदे न की सै

सच्चाईया ने बोलदा है। 25 यीशुऐ होर भी मते कम्म किते, अगर उना सारे कम्मा जो लिखया जांदा, तां मिजो लगदा की सारे संसार च इतणी भी जगा नी होणी थी की उना सारियां कताबां जो रखी सके।

प्रेरितां दे कम्म

1 प्रिय थियुफिलस, मैं अपणिया पेलिया कताबा च उना सारियां गल्लां दे बारे च दसया है, जडियां यीशुए स्वर्ग च जाणे ला पेहले करणा कने सिखाणियां शुरू कीतियां। 2 पर परमेस्वरे दे जरिये यीशुए जो स्वर्ग च चुकणे ला पेहले, यीशुए दुख झेले कने मरी गया। उनी मते पक्के सबूतों ला उनी अपणे आपे जो जिन्दा दसया, कने चालियां रोजां दीकर सै उना चुण्यां चेलयां जो मिलदा रिया, कने परमेस्वरे दे राज्य दियां गल्लां करदा रिया। यीशुए पबित्र आत्मा दिया सहायता ला प्रेरितां जो हुकम दिता कने उदे बाद परमेस्वरे उसयो स्वर्ग च चुकी लिया। 4 इक बरी यीशुए चेलयां ला मिली करी उना जो हुकम दिता की, “यस्शलेमे शेहरे ला बाहर मत जांदे, पर उस दान दी नियाल रखा जडा मेरे पिता परमेस्वरे तुहांजे देंगे दा बायदा कितया था, तुसां मिजो उदे बारे च पेहले भी बोलदे सुण्या है। 5 यहून्ने तां पाणिए ला बपतिस्मा दितया है, पर थोडे रोजा बाद परमेस्वरे तुहाडे सोगी रेणे ताई पबित्र आत्मा जो भेजणा।” 6 बादे च जालू प्रेरित दोबारा यीशुए जो मिल्ले, तां उना यीशुए जो पुछया, “प्रभु जी, क्या तू हुण ही इस बकत इस्राएले जो रोमियां दी गुलामी ला अजाद करणे कने साडे राज्य जो फिरी ला बसाणे दी योजना बणा दा है?” 7 यीशुए उना जो बोलया, “ऐ सारियां चिंजा कालू होणियां कने कुस बकत होणियां, ऐ सब कुछ तय करणे दा हक सिर्फ मेरे पिता परमेस्वर जो है, ऐ सब कुछ जाणने दी तुहांजो जरूरत नी है। 8 पर जालू पबित्र आत्मा तुहाडे पर ओणा तालू तुहांजो शक्ति मिलणी; कने यस्शलेमे शेहरे च कने सारे यहूदिया कने सामरिया प्रदेशां च, कने संसारे दियां हर जगा दे लोकां मेरे बारे च गबाही देंगी है।” 9 ऐ बोली करी उना दे दिखदे-दिखदे ही परमेस्वर यीशुए जो स्वर्ग च लेई गया, कने इक बदले दिया बजा ला सै उसयो दिखी नी सके। 10 उदे जांदे बेले जालू सै अम्बरे पासे दिखा दे थे, तां अचानक दो माणू चिट्टे कपडे पाई करी उना बखे प्रगट होए। 11 कने बोलणा लग्गे, “हे गलीली प्रदेशे दे माणूआं, तुसां कजो खडोई करी अम्बरे पासे दिखा दे न? ऐई यीशू, जिसयो परमेस्वर स्वर्ग लेई गया है, जियां तुसां उसयो स्वर्ग जांदे दिखया तियां ही उनी फिरी ओणा है।” 12 ऐ सारियां गल्लां जैतुन नाए दे पहाडे पर होईयां जडा यस्शलेमे शेहरे ला लगभग इक किलो मीटर दिया दूरिया पर था कने प्रेरित पहाडे ला यस्शलेमे शेहरे जो बापस आई गे। 13 कने जालू प्रेरित शेहरे च पुज्जे तां सै उपरे बाले कमरे च गे, जिथू सै रे दे थे। जडे प्रेरित ओथु मौजूद थे सै ऐ न पतरस कने यहून्ना कने याकूब कने अन्दियास कने फिलिप्पुस कने थोमा कने बरतुल्लै कने मत्ती कने हलफईए दा पुत्र याकूब, शमौन जडा क्रान्तिकारी था कने याकूब दा पुत्र यहूदा थे। 14 ऐ सारे हमेशा गिठे होंदे थे कने सारे इक मन होईकरी लगातार प्रार्थना करदे थे। उना चे यीशू दे भाई कने यीशुए माता मरियम कने कुछ जनानियां भी थियां जिना यीशुए दी सहायता कितियो थी। 15 कने उना रोजां च इक रोज, जालू लगभग इक सौ बी मसीह भाई बेहण गिठे थे, तां पतरस उना दे बिच खडोई करी बोलणा लग्गा। 16 हे मसीह भाईयो बेहणो, पबित्र आत्मा बडे पेहले राजा दाऊदे दे जरिये यहूदा दे बारे च दसया था, जिनी यीशुए जो गिरफ्तार करणे बालयां दी अगुवाई किती।

ऐ जरूरी था की यहूदा दे बारे च पबित्र शास्त्रे च लिखया लेख पूरा हो। 17 बेशक यहूदा सांझो चे इक था, कने इसा सेवकाईया च भी हिस्सेदार बणया। 18 जियां की तुसां जाणदे न की उस पेसे ला जडे यहूदा यीशुए जो चलाकिया ला पकड़ाणे ताई लियो थे, उनी उस पेसे ला इक खेतर लिया। जालू यहूदा फा लेई लिया तां सै थल्ले सिरे भार पेई गया कने उदा पेट फटी गया, कने उदियां सारियां आंतडियां बाहर आई गियां। 19 कने इसा गल्ला दे बारे च यस्शलेमे शेहरे दे सारे लोकां जो पता लग्गी गया, इस ताई सै लोक उस जगा जो अपणी भाषा च हलकदमा मतलब की खूने दा खेतर बोलणा लग्गी पे। 20 क्योंकि राजा दाऊदे भजन संहिता दिया कताबा च लिखया है, “उदा घर उजड़ी जा कने उस घरे च कोई नी बसे,” कने राजा दाऊदे दुज्जी जगा च ऐ भी लिखया है की, “उदी जगा कोई होर लेई ले।” 21 इस ताई ऐ जरूरी है की प्रभु यीशू जो मरयां चे जिन्दे होणे दा, साडे सोगी गबाह बणने ताई इक माणूजे जो चुण्यां जा। सै माणू ऐसा होणा चाईदा जडा प्रभु यीशू दे सारे कम्मा दे बकते च मतलब की प्रभु यीशू जो यहून्ना ला बपतिस्मा लेणे ला लेईकरी उसयो स्वर्ग च जाणे दीकर साडे सोगी था। 23 तालू उना दो जणयां जो खरेडया इक यूसुफे जो, जिसयो बरसब्बास बोलदे न, जिदा दुआ ना युसतुस है, कने दुआ मत्तियाह जो। 24 कने ऐ बोली करी प्रार्थना किती, “प्रभु जी, तू तां सारयां दे मना जो जाणदा है, ऐ प्रगट कर की इना दो जणयां चे तू कुण चुण्या है, 25 की सै इस सेवा दे कम्मे जो कने उस प्रेरित दी सै खाली जगा ले, जिना जगा जो यहूदा छडी करी चली गया जिथू उसयो जाणा चाईदा।” 26 तालू उना दोनो दे बारे च चिठियां पाईयां, कने चिट्ठी मत्तियाह दे नाए दी निकली, कने सै उना गयारां प्रेरितां दे सोगी गणिया गया।

2 जालू यहूदियां दे पिन्तेकुस्ते त्योहारे दा दिन आया, तां सारे भरोसा करणे बाले इकी जगा पर गिठे थे। 2 तालू अचानक अम्बरे ला इक अबाज सुणोई, सै अबाज तेज होआ सांई थी, कने उसा ने सारा घर जिथू सै बैठयो थे गूंजी पिया। 3 तालू उना दे सामणे अग्गी सांई चीजां दा झुण्ड प्रगट होया जडा जीभा दे अकारे दा लगा दा था, जडा लग होईकरी उना चे हर इक माणूजे पर स्कदी गोई। 4 कने सै सारे पबित्र आत्मा ला भई गे, कने जियां ही पबित्र आत्मा उना जो बोलणे दी शक्ति दिती, सै होर-होर भाषा च बोलणा लग्गे। 5 उस बकत परमेस्वरे दा डर मनणे बाले केई यहूदी थे, जडे की संसारे दे हर इक देशे ला त्योहारे मनाणे ताई आयो थे कने यस्शलेमे शेहरे च रेंदे थे। 6 जालू उस तेज होआ दी अबाज होई थी तां भीड लग्गी गोई कने लोक हेरान होई गे, क्योंकि हर इक अपणी-अपणी भाषा च चेलयां जो बोलदे सुणा दे था। 7 कने सै सारे हेरान होईकरी बोलणा लग्गे, “दिखा, ऐ जडे लोक इस तरिके ला बोला दे न ऐ गलील प्रदेशे दे बासी ना।” 8 तां ऐ क्या होआ दा है, जडा सांझो चे हर इक जणा इना जो अपणी-अपणी बोली च गल्लां करदे होये सुणा दे है! 9 असां चे कुछ लोक पारथी इलाके ला न; कने कुछ मेदी कने कुछ लोक एलामी कने मेसोपोटामिया कने यहूदिया प्रदेशे कने कप्पदूकिया कने पुन्तुस कने आसिया प्रदेश, 10 कने फ्रूगिया कने पंफूलिया कने मिस्र देश कने लीबिया देशे कुछ इलाकयां दे न। जडे कुरेने शेहर दे बखे न, कने इना सारे देशां दे रेणेबाले कने रोम शेहर ला ओणे बाले लोक, 11 मतलब की क्या

यहूदी, कने क्या ही होर जातियां दे लोक जिना यहूदी धर्म अपनाई लिया था, केती टापू दे लोक कने अरबी देश दे लोक भी न, पर अपणिया-अपणिया बोलिया च उना ला परमेश्वरे दे चमत्कारी कम्मा दी चर्चा सुणदे न। 12 कने सै सारे हेरान होए, कने उना जो समझ नी ओआ दा था की क्या होआ दा है। 13 पर केईयां मजाक करदे होए बोलया, “सै तां नोईया शराबा दे नशे च न।” 14 पतरस उना गयारां प्रेरितां सोगी खडोता, कने जौरे ला बोलणा लग्गा, “तुसां लोक जडे साडे सांई यहूदी न कने यस्शलेम शेहरे दे बासियों, मेरियां गल्लां ध्याने ला सुणा मै तुहांजो दसदा है की इसा घटना दा क्या मतलब है। 15 तुहांजो लगदा है की असां नशे च न, पर असां नशे नी न कयोंकि हले तां ब्यागा दे नौ बजे न। 16 पर एे चमत्कार जडा साडे सोगी होया है, एे उसा गल्ला जो पूरा करदा है, जडी योएल परमेश्वरे दा संदेश देणेबाले दे जरिये पबित्र शास्त्र च परमेश्वरे बोलियों है: 17 परमेश्वर बोलदा है की, ‘आखरी दिना च ऐसा होणा है, की मै अपणी आत्मा सारे माणुए जो देणी है कने तुहाडे पुनां कने कुडियां भविष्यवाणियां करणियां, कने तुहाडे जवाना दर्शन दिखणे कने तुहाडे बुड़े मर्दा सुपने दिखणे।’ 18 उना दिना च मै अपने नोकरां कने नोकराणियां जो अपणी आत्मा देणी, कने उना भविष्यवाणी करणी। 19 कने मै उपर अम्बरे च अनोखे कम्म, कने थले धरतिया पर चमत्कार, मतलब की खून कने अग्ग कने धूए दे बदल दसणे। 20 प्रभु दा दिन ओणे ला पेहले सूरजे नेहरा होई जाणा कने चांदे खूने सांई होई जाणा। सै दिन महान कने तेजस्वी दिन होणा। 21 कने जडा कोई प्रभुए दा ना लेंगा, उदा उद्धार होणा।” 22 हे इस्राएल दे लोको इना गल्लां जो सुणा: परमेश्वरे नासरत दे यीशु मसीह दे जरिये चमत्कार कने अनोखे कम्म किते कने तुसां अपु जाणदे न की एे सच्च है। इयां करिरी परमेश्वरे तुसां जो दसया की यीशु परमेश्वरे दा भेजया माणु है। 23 उसयो ही, जालू सै परमेश्वरे दी बणाईयो योजना कने पेहले ला ही ज्ञाने दे अनुसार पकड़ाया गया, तां तुसां उसयो बुरे लोकां दे हथां ला किल्लां ठोकी करी सूली पर चढाई करी मारी दिता। 24 फिरी भी परमेश्वरे उसयो मरणे दे बाद फिरी ला जिन्दा करी दिता। यीशु मरी गया था पर परमेश्वरे उसयो मुर्दा रेणे ला बचाई लिया कयोंकि उदे ताई मरया रेणा संभव नी था। 25 कयोंकि राजा दाऊद यीशुए दे बारे च बोलदा है, “मै प्रभु जो हमेशा अपने सामणे दिखदा रिया कयोंकि सै मेरे सजे पाससे है, ताकि मै उना लोकां ला नी डेरें जडे मिंजो नुक्सान पूजाणा चांदे न। 26 मेरा मन बड़ा खुश होया, कने मै खुशिया ला बोलदा है; कने मेरे शरीर जो भी आस लग्गी रेणी। 27 कयोंकि तू मिंजो मुर्दा नी रेणा देणा। कने ना ही अपने पबित्र जण दिया लाशा जो सडना देणा। (Hadēs g86) 28 तू मिंजो जिन्दगिया दा रस्ता दसया है; तू मिंजो अपणिया मौजूदगी च खुशिया ला भरी देणा।” 29 “हे मसीह भाईयो, मै उस कुलपति राजा दाऊदे दे बारे च पुरिया हिम्मत ला बोली सकदा है की सै मरी गया है कने दबया भी है कने उदी कबर अजे दीकर भी साडे बिच है। 30 सै परमेश्वरे दा संदेश देणेबाला भी था, कने सै जाणदा था की परमेश्वरे मिंजो ने कसम खाई करी बायदा कितया है, ‘मै तेरे बंशे चे इकी माणुए जो तेरे सिंहासने पर बठांगा।” 31 एे जाणी करी की भविष्य च परमेश्वर क्या करणा जा दा था, राजा दाऊदे यीशु मसीह जो मरणे बाद जिन्दा होणे दी गल्ल किती

है। उनी बोलया ना तां उनी उसयो मुर्दा रेणा दिता, कने ना ही अपने पबित्र जण दिया लाशा जो सडना दिता। (Hadēs g86) 32 इसी यीशुए जो परमेश्वरे जिन्दा किता, जिदे असां सारे गबाह न। 33 हुण सै स्वर्गे च परमेश्वरे दे सजे हथे सबना ला बड़े इज्जता दे पदे पर बैठया है। कने पिता परमेश्वरे जदिया उसला बायदा कितया था, उनी अपणा पबित्र आत्मा यीशुए जो दिता कने यीशुए उदारता ला सै पबित्र आत्मा सांझो दिता है, जियां की तुसां अज दिखदे कने सुणदे न। 34 कयोंकि राजा दाऊद यीशु मसीह सांई शरीर च स्वर्ग पर नी चढया; पर सै अपु ही बोलदा है, प्रभु परमेश्वरे मेरे प्रभु ला बोलया; मेरे सजे पाससे बैठ, 35 जालू दीकर मै तेरे दुश्मणा जो तेरे पैरां थले दिया चौकिया सांई नी बणाई दें। 36 इस तांई इस्राएल दे सारे लोक इसा गल्ला दे बारे च पका ही जाणी लेन: की परमेश्वरे इसी यीशुए जो जिसयो तुसां सूली पर चढाया, उसयो प्रभु भी कने मसीह भी बणाया। 37 जालू लोकां एे सुणया तां उना अपने आपे जो दोषी महसूस किता, कने सै पतरस कने बाकी प्रेरितां ला पूछणा लग्गे, “हे मसीह भाईयो, असां क्या करन?” 38 पतरसे उना जो बोलया, “मन बदला, कने तुसां सारे अपने-अपणे पापां दी माफी तांई यीशु मसीह दे नाए ला बपतिस्मा लिया; तां तुसां जो पबित्र आत्मा दा दान मिलणा। 39 कयोंकि एे प्रतिज्ञा तुसां, कने तुहाडिया ओलादा कने उना सारे दुरे-दुरे दे लोकां तांई भी है जिना जो साडे प्रभु परमेश्वरे अपने बाल सदया।” 40 पतरसे होर भी मतियां गल्लां दी गबाई देईकरी उना जो समझाया कने बिनती कीती की अपने इस्राएली साथियां सांई मत बणा जडे परमेश्वरे पर भरोसा नी करदे कने परमेश्वरे ला बिनती करा की सै तुहांजो बचाए। 41 कने जडा कुछ पतरसे बोलया, उस पर जिना भरोसा किता कने उना बपतिस्मा लिया; कने उसी दिने लगभग तिन जार माणु उना ने शामिल होई गे। 42 कने सै प्रेरितां ला शिक्षा लेंगे च, उना सोगी संगती रखणे च, प्रभु भोज कने प्राथना करणे च लीन रेणा लग्गे। 43 कने प्रेरित जडे अनोखे कम्म कने अनोखे चमत्कार करदे थे, इना ला यस्शलेम शेहर दे लोक डरे कने हेरान होए। 44 कने सै सारे भरोसा करणे बाले गिठे रेदे थे, कने जडा कुछ भी उना बाल होंदा था सै सब कुछ सांझा करदे थे। 45 कने सै अपणिया-अपणिया जगा जमिना कने समाने जो बेची करी जदेई जिसयो जरूरत होंदी थी उसयो बंडी दिन्दे थे। 46 कने सै हर रोज इक मन होईकरी मंदरे च गिठे होंदे थे, कने रोटी खाणे तांई कने प्रभु भोज तांई इक दुज्जे दे घरे साफ मने ला खुशिया ला गिठे होंदे थे। 47 कने परमेश्वरे दी स्तुति करदे थे, कने सारे लोक उना ला खुश थे; कने जिना दा उद्धार होंदा था, उना जो प्रभु हर रोज उना च मिलाई दिन्दा था।

3 इक दिन पतरस कने यहून्ना दोपहर दे तिन बजे प्राथना दे बेले मंदरे जो चलयो थे। 2 कने लोक इकी जन्म ला ही लंगडे जो लोआ दे थे, जिसयो सै रोज ही मंदरे दे उस दरबाजे बाल बैठाई दिन्दे थे जिसयो सुंदर दरबाजा बोलदे न, ताकि सै मंदर जाणे बालयां ला भीख मंगी सके। 3 जालू उनी पतरस कने यहून्ना जो मंदरे च जांदे दिखया, तां उनी उना ला भीख मंगी। 4 पतरस कने यहून्ने उदे पाससे ध्याने ला दिखीकरी बोलया, “साडे पाससे दिख।” 5 सै उना ला कुछ मिलणे दी आसा च उना पाससे दिखणा लग्गा। 6 तालू पतरसे बोलया, “चांदी कने सोना तां साडे बाल है नी, पर जडा मेरे बाल

है सै तिजो दिन्दा है; नासरत दे यीशु मसीह दे नाए ला उठ कने चल फिर।” 7 कने पतरसे उदा सजा हथ पकड़ी करी उसयो उठाया; कने झट उदे पैरा कने गोडयां च जोर आई गया। 8 कने सै उछली करी खडोई गया, कने चलणा फिरणा लगी पिया; कने चलदा, कने छलांगा मारदे परमेस्वरे दी स्तुति करदा होया उना सोगी मंदरे दे अंगणे च गया। 9 सारे लोकां उसयो चलदे फिरदे कने परमेस्वरे दी स्तुति करदे दिखीकरी, 10 उसयो पछेणी लिया की सै ही लंगडा भिखारी है, जडा मंदरे दे सुंदर दरबाजे पर बेईकरी भीख मंगदा था; कने इसा घटना ला जड़ी उदे सोगी होइयो थी, बडे हेरान होऐ। 11 सै उस ओसारे च थे जिसयो सुलैमान दा ओसारा बोलदे न, कने सै लंगडा भिखारी जडा ठीक होई गया था सै पतरस कने यूहन्ने दा साथ नी छडा दा था। सै सारे लोक उना पासे दौड़े कने उसयो दिखीकरी बडे हेरान होऐ। 12 ऐ दिखीकरी पतरसे लोकां जो बोलया, हे इसाएलियां, तुसां इस माणुए पर कजो हेरान होआ दे, कने साडे पास्से कजो घुरा दे न, जियां मन्ना की असां ही अपणिया भक्तिया कने शक्तिया न इसयो चलणे फिरणे जोगा बणाई दितया है। 13 साडा परमेस्वर कने जडा अब्राहम, इसहाक, याकूब, कने साडे पूर्वजां दा भी परमेस्वर है उनी अपने सेवक यीशुए दी महिमा किती, पर तुसां यीशुए जो मरवाणे ताई रोमी अधिकारियां बाल पकडाई दिता, कने जालू पिलातुसे उसयो छडणे दा बिचार किता, तालू तुसां उदे सामणे यीशुए जो नकारी दिता। 14 तुसां यीशु मसीह जो नी अपनाया, जडा पबित्र कने धर्मी था। कने तुसां पिलातुसे ला चांदे थे की इक हत्यारे जो तुहाडे ताई छडी दिया। 15 कने तुसां उसयो जडा हमेशा दी जिन्दगी दिन्दा है मारी दिता, पर परमेस्वरे उसयो फिरी ला जिन्दा किता, कने इसा गल्ला दे असां गबाह न। 16 यीशुए दे नाए पर भरोसा करणे दे जरिये ही इस माणुए जो ताकत मिल्ली है, जिसयो तुसां जाणदे न कने हुण तुहाडे सामणे है। ऐ यीशु दा ना है कने जडा भरोसा उदे जरिये ओदा है जिनी उसयो बिलकुल ठीक-ठाक करी दितया है, जियां की तुसां अपु भी दिखी सकदे न। 17 कने हे भाईयो, मै जाणदा है की जालू तुसां कने तुहाडे अगुवां यीशु मसीह जो मारी दिता तालू तुसां उदे बारे च अनजाण थे की सै कुण था। 18 पर जिना गल्लां जो सारे परमेस्वरे अपने संदेश देणेबाले दे जरिये पेहले ही दसया था, की उदे मसीह जो दुख होणा कने सै मारी देणा है; तुहाडे जरिये परमेस्वरे इना गल्लां जो पूरा करी के दसया। 19 इस ताई मन बदला कने परमेस्वर बाल बापस ओआ ताकि तुहाडे पाप मिटी जान, तालू परमेस्वरे दिया तरफा ला आत्मिक शान्ति दा बकत ओणा। 20 कने उनी यीशुए जो भेजणा, जडा सै मसीह है जिसयो परमेस्वरे तुहाडे ताई चुणया है। 21 यीशुए दा स्वर्गे च रेणा उस बेले दीकर जरूरी है जालू परमेस्वर उना सारियां चिंजा जो नोआ बणाई दींगा जडियां उनी बणाईयां न। बडे बकत पेहले परमेस्वरे लोकां जो ऐ दसणे ताई पबित्र परमेस्वरे दे संदेश देणेबाले दे जरिये ऐसा करणे दा बायदा किता। (aiōn g165) 22 जियां की मूसा बोलया, “प्रभु परमेस्वरे तुहाडे भाईयां च तुहाडे ताई मिंजो सांई इक परमेस्वरे दा संदेश देणेबाला भेजणा,” जडा कुछ सै तुसां ने बोलगा, उदी सुणनयो। 23 पर हर इक माणु जडा उस परमेस्वरे दा संदेश देणेबाले दी नी सुणे, लोकां च उदा नाश होई जाणा। 24 कने शमूएल ला लेईकरी उदे बाद बालयां दीकर जितणे भी

परमेस्वरे दे संदेश देणेबालयां ऐ गल्ल बोली उना सारयां इना दिना दा संदेश दितया है। 25 तुसां सारे परमेस्वरे दे संदेश देणेबालयां दी ओलाद कने उस बायदे दे हिस्सेदार न, जडा परमेस्वरे तुहाडे पूर्वजां ला किता, जालू उनी अब्राहमे जो बोलया, “तैरे खानदाने ला धरतिया दे सारे घरानया जो आशीष मिलणी।” 26 जालू परमेस्वरे अपने सेवक यीशुए जो चुणया, कने उनी उसयो सबना ला पेहले तुसां इसाएली लोकां बाल भेजया, ताकि परमेस्वर तुसां च हर इक जणे जो पाप दे रस्ते ला दुरे करिरी आशीष दे।

4 जालू पतरस कने यूहन्ना लोकां जो ऐ बोला दे थे, तां याजक कने मंदरे दे रखबालयां दा सरदार कने सदूकी उना बाल आए। 2 क्योंकि सै बडे गुस्सा होऐ की पतरस कने यूहन्ना लोकां जो यीशुए दे बारे च सिखान्दे थे, की जडे लोक मरी गियो न परमेस्वरे उना जो फिरी जिन्दा करी देणा, जियां उनी यीशुए जो मरयां च फिरी जिन्दा करी दिता। 3 कने उना पतरस कने यूहन्ना जो गिरफ्तार करी अगले रोजे दीकर जेला च रखया क्योंकि संज होई गियो थी। 4 पर संदेश सुणने बालयां च मतयां यीशुए पर भरोसा किता, उना भरोसा करणे बाले माणुआं दी संख्या लगभग पंज हजार होई गई। 5 अगले रोजे उना दे सरदार कने यहूदी अगुवे कने व्यवस्था जो सिखाणे बाले यरूशलेम शहर च इकी जगा पर गिठे होऐ। 6 कने जडे लोक ओथु गिठे होऐ उना च महायाजक हन्ना कने सारे महायाजके दे घराने दे लोक, जिना च कैफा, यूहन्ना, सिकन्दर भी ओथु थे। 7 कने पतरस कने यूहन्ना जो बिच खरेडी करी पूछणा लग्ये, “इस माणुए जो ठीक करणे ताई कुनी शक्ति कने हक दिता?” 8 तालू पतरसे पबित्र आत्मा ला भरूई करी उना जो बोलया, “हे लोकां दे सरदारो कने यहूदी अगुवां, 9 असां इक कमजोर माणुए दी भलाई किती है, कने अज सांझो ला इदे बारे च पछताछ करा दे न, की सै कियां ठीक होया। 10 तां तुसां सब कने सारे इस्राएल दे लोक जाणी लिया की ऐ नासरत दे यीशु मसीह दे नाए ला ठीक होया है। इसी यीशुए जो तुसां सूली पर चढ़ाया था, पर परमेस्वरे उसयो मरयां च जिन्दा किता। अज उसी दे नाए ने ऐ माणु तुहाडे सामणे भला चंगा खडोतया है। 11 यीशु मसीह सै ही पथर है जिसयो तुसां मिश्रियां फेंकी दितया था कने सेई पथर कुंणे दा सिरा बणी गया। 12 यीशु जो छडी करी होर कुसी दुज्जे ला उद्धार नी है; क्योंकि स्वर्गे दे हेठ माणुए च कोई होर दुआ ना नी दितया है, जिसला असां उद्धार पाई सकन।” 13 जालू उना पतरसे कने यूहन्ना दी हिम्मत दिखी, कने उना जो ऐ पता लग्गा की ऐ पढ्यो लिखयो नी न कने आम माणु न, फिरी उना जो ऐहसास होया, ऐ इस ताई है क्योंकि ऐ यीशुए सोगी थे। 14 पर उस माणुए जो जडा खरा होया था, पतरस कने यूहन्ना सोगी खडोतया दिखीकरी, सै सभा उना दे खिलाफ कुछ नी बोली सकी। 15 पर उना जो महासभा ला बाहर जाणे दा हुकम देईकरी, सै अपु च बिचार बिमर्श करणा लग्ये, 16 “असां इना माणुए सोगी क्या करन? क्योंकि ऐ तां साफ है की इना ऐ अदभुत चमत्कार कितया है कने सारे यरूशलेम शहर दे रेणे बालयां जो पता है, कने असां ऐ दाबा नी करी सकदे की ऐ गल्ल नी होइयो है। 17 पर लोकां च ऐ गल्ल होर जादा नी फेलणा चाइदी, असां इना जो धमकाने, की ऐ इसी नाए ला फिरी कुसी माणुए ने गल्ल ना करन।” 18 तालू उना

पतरस कने यहून्ना जो सदया कने चेताबनी देईकरी बोलया, “यीशुऐ दे नाए ला कुछ नी बोलणा कने ना सिखाणा।” 19 पर पतरस कने यहून्ने उना जो जबाब दिता, “तुसां ही न्याय करा, की क्या ऐ परमेश्वरे दिया नजरा च ठीक है, की असां परमेश्वरे दिया गल्लां ला बडी करी तुहाडियां गल्लां मनन? 20 क्योंकि ऐ तां सांझो ला होई नी सकदा, की जडा असां दिखया कने सुणाया है, सै ना बोलन।” 21 तालू उना पतरस कने यहून्ना जो दुबारा धमकाया कने छडी दिता। ऐ प्रेरित लोकां बिच मशहूर थे इसा बजा ला उना जो इना प्रेरितां जो सजा देंगे दा कोई तरिका नी मिला, इस तांई की जडी घटना होईयो थी उदिया बजा ला सारे लोक परमेश्वरे दी बडाई करदे थे। 22 सै माणू, जडा अदभुत चमत्कारे ला ठीक होया था, उदी उग्र चाली सालां ला जादा थी। 23 पतरस कने यहून्ना छुटी करी अपने साथियां बाल आये, कने जडा कुछ बड़े याजकां कने यहूदी अगुवां उना ने बोलया था, उना जो सुणाई दिता। 24 ऐ सुणीकरी, उना इक मन होईकरी उच्चिया अबाज ला परमेश्वरे ला प्राथना किती, “हे प्रभु, तू ही है जिनी स्वर्ग कने धरती कने समुंद्रे कने जडा कुछ उना च है बनाया है।” 25 तू पबित्र आत्मा ला अपने सेवक कने साडे पूर्वज राजा दाऊदे दे मुऐ ला बोलया, “होरनी जातियां कजो गुस्सा किता? कने देशां-देशां दे लोकां कजो बेकार गल्लां सोचियां? 26 कने राजा दाऊदे ऐ भी बोलया था की, धरतिया दे राजयां अपने आपयो तैयार करणा, कने हाकिमा, प्रभु कने उदे मसीह दे बिरोध च गिठे होणा।” 27 कने ऐ गल्ल यरूशलेम शेहरे च सच्च होई की तैरे पबित्र सेवक यीशुऐ दे खिलाफ, जिदा तू अभिषेक किता, राजा हेरोदेसे कने पुन्तियुस पिलातुस राज्यपाल भी होर जातियां कने इस्राएलियां सोगी इसी शेहरे च गिठे होए, 28 उना सेई कितया जडा तेरिया शक्तिया कने इच्छा पेहेले ही तय करी लिया था की होणा चाईदा। 29 प्रभु जी हण, उना दियां धमकियां जो सुण कने अपने दासां जो ऐ बरदान दे की तेरा बचन बडिया हिमतां ने सुणान। 30 कने ठीक करणे तांई अपना हथ गां कर ताकि चमत्कार कने अनेखे कम्म तेरे पबित्र सेवक यीशु ऐ नाए ला होन। 31 जालू सै प्राथना करी बैठे, तां सै जगा जिथू सै गठयो थे हिली पेई, कने सै सारे पबित्र आत्मा ला भस्ई गे, कने परमेश्वरे दा बचन हिमता ने सुणादे गे। 32 भरोसा करणे बालयां दी मंडली इक चित कने इक मने दे थे, उना दा सब कुछ साझे दा था कने ऐथू दीकर की कोई भी अपणिया धन दौलता पर अपना होणे दावा नी करदा था। 33 कने प्रेरित बडिया शक्तिया ला प्रभु यीशुऐ दे मरी करी जिन्दा होणे दी गबाई दिन्दे रे कने उना सारयां पर परमेश्वरे दा बडा अनुग्रह था। 34 कने उना चे कोई भी गरीब नी था, क्योंकि जिना बाल जमीन या घर थे, सै उना जो बेची करी, बिकियां चिजां दे पैसे लोंदे थे कने उसयो प्रेरितां बाल जमा करवाई दिन्दे थे। 35 कने जदेई जिसयो भी जरूरत होंदी थी उसयो बंडी दिन्दे थे। 36 कने यूसुफ नाए दा इक माणू था, सै लेवी गोत्र दा था कने साइप्रस टापू ला था। जिदा ना प्रेरितां बरनबास रखया, जिदा मतलब ऐसा माणू जडा दुजयां जो प्रोत्साहित करदा है। 37 उदे बाल कुछ जमीन थी, जिसा जो उनी बेचया, कने सै पैसे लोकां जो बंडणे तांई प्रेरितां जो देई दिते।

5 हनन्याह नाए दे इकी माणूऐ, कने उदिया घरे बालिया सफ़ीरा अपणिया जमिना दा छोटा दिया हिस्सा बेचया। 2 कने हनन्याये जो जडे पैसे बेची

करी मिल्ले उदे चे उनी कुछ अपने तांई रखी लिया; कने ऐ गल्ल उदी घरे बाली भी जाणदी थी कने उना बाकी बचयो पैसे प्रेरितां जो देई दिते। 3 पर पतरसे बोलया, “हे हनन्याह! जडा शैताने तेरे मने च पबित्र आत्मा ला झूठ बोलणे दा बिचार पाया है कने तू अपणी बेचियो जमिना दे पैसे चे इक हिस्सा अपने तांई रखी लिया है?” 4 क्या बेचणे ला पेहेले सै जमीन तेरी नी थी? कने जालू जमीन बिकी गई तां उसा दी कीमत क्या तेरे बशे च नी थी? तिजो इस बुरे कम्मे दे बारे च कदी नी सोचणा चाईदा था! तू सांझो ला नी, पर परमेश्वरे ला झूठ बोलया। 5 ऐ गल्लां सुणदे ही हनन्याह जमिना पर पेई गया, कने सै मरी गया; कने जिना भी इस बारे च सुणया सै सारे डरी गे। 6 फिरी जवान माणू ओए कने उसयो कफन च लपेटया करी कने बाहर लेईजाई करी दबी दिता। 7 लगबग तिन घंटे बाद उदी घरे बाली अंदर आई, ओथू जडा कुछ होया था उसा जो नी पता था। 8 तालू पतरसे उसा जो बोलया, “क्या तुसां दोना सै जमीन इतणे च ही बेचियो थी?” उना बोलया, “हाँ, इतणे च ही।” 9 पतरसे उसा जो बोलया, “ऐ क्या गल्ल है, की तुसां दोना प्रभुऐ दिया आत्मा जो परखने तांई इक सलाह कितयो है? दिख, जिना जवान माणूआं तेरे घरे बाले जो दबया है सै दरबाजे बार खडोतयो न, कने इना तिजो भी बाहर लेई जाणा।” 10 तालू सै झट जमिना पर पेई गई, कने मरी गई, कने उना जवान माणूआं अंदर आई करी दिखया तां सै मरी गियो थी, कने उना उसा जो बाहर लेईजाई करी उसा दे घरे बाले दे बखे दबाई दिता। 11 कने कलीसिया दे सारे लोक कने जितणयां इना गल्लां जो सुणया सै बड़े डरी गे। 12 प्रेरित मते चिन्न कने अदभुत कम्म लोकां दे बिच करदे थे, कने जडे मसीह च भरोसा करणे बाले थे। सै अक्सर सारे इक चित होईकरी सुलैमाने दे ओसारे च गिठे होंदे थे। 13 पर जिना हल्ले दीकर यीशुऐ पर भरोसा नी कितया था उना चे कुसयो भी ऐ हिम्मत नी होंदी थी की, उना सोगी जाई मिलन; फिर भी लोक उना दी बडी इज्जत करदे थे। 14 कने प्रभु पर भरोसा करणे बाले मर्दा कने जनानियां दी गिणती बददी ही गई। 15 जडा कुछ प्रेरित करा दे थे उसा बजा ला लोक बिमारां जो सडका पर आंणी करी, मंझे कने पन्दी पर सुआई दिन्दे थे, ताकि जालू पतरस उस रस्ते ला जांगा, तां उदा प्रछोंआ उना चे कुसकी पर पेई जा। 16 कने यरूशलेम शेहरे दे अखे बखे दे नगरां दे लोक भी गिठे होंदे थे। कने सै बिमारां कने बुरियां आत्मा ला सताए लोकां जो लोंदे थे, कने सै सारे ठीक होई जांदे थे। 17 तालू महायाजक कने सारे यहूदी अगुवां दी टोली जिना जो सदूकी बोलंदे न दे, सै प्रेरितां ला जलन करणा लग्ये। 18 तां अगुवां मंदरे दे रखबालयां जो हुकम दिता की प्रेरितां जो पकडी करी जेला च बंद करी दिया। 19 पर राती दे बकत प्रभु दे इकी स्वर्गदूते जेला दे दरबाजे खोली करी उना जो बाहर कडया कने प्रेरितां जो बोलया, 20 “जा कने मंदरे च खडे होईकरी, लोकां जो इस हमेशा दिया नोईया जिन्दगिया दा पूरा संदेश सुणा।” 21 कने प्रेरित बडी ब्यागा ही मंदरे च गे जियां उना जो स्वर्गदूते दसया था जाई करी सिखाणा शुरू किता। जालू महायाजक कने उदे साथी आऐ कने उना महासभा जो कने इस्राएलियां दे सारे यहूदी अगुवां जो गिठा किता, कने जेला च बोली भेजया की प्रेरितां जो लोआ। 22 पर मन्दरे दे रखबालयां ओथू पुजिकरी दिखया की सै जेला च नी

न, कने उना बापस आई करी दसया, 23 “जेल ढंगे ला बंद थी, कने बाहर दरबाजे पर पेहेरेदार खरेडयो थे, पर जालू असां दरबाजा खोलया, तां अंदर कोई नी था।” 24 जालू मंदरे दे रखबालयां दे सरदारां कने बड़े याजकां ऐ खबर सुणी, तां हेरान होई गे कने उलझन च पेई गे की इदा क्या नतीजा होणा। 25 इतणे च कुनकी आई करी उना जो दसया, “दिखा, जिना जो तुसां जेला च बंद कितया था, सै माणु मंदरे च खडोई करी उपदेश देद न।” 26 जालू उना ऐ सुणया, तालू मंदरे दे रखबालयां दा सरदार कुछ रखबालयां जो सोगी लेईकरी मंदरे च गया, कने प्रेरितां जो पकडी करी महासभा च लेई आया, पर उना सोगी कोई जोर जबरदस्ती नी कीती, क्योंकि रखबाले लोकां ला डरा दे थे की लोक पथर मारी-मारी करी उना जो मारी ना देन। 27 जालू उना प्रेरितां जो महासभा दे सामणे खरेडया तालू महायाजके उना ला पुछया, 28 “क्या असां तुहांजो हुकम नी दितया था, की तुसां इस नाऐ ला शिक्षा मत दिन्दे? फिरी भी, तुसां सारे यरूशलेम शेहरे जो अपणिया शिक्षा ला भरी दिता है कने तुसां उस माणुऐ दी हत्या दा दोष जबरदस्ती सांझो पर लाणा चांदे न।” 29 तालू पतरसे कने, बाकियां प्रेरितां जबाब दिता, “माणुऐ दे हुकमे ला बदीकरी परमेश्वरे दे हुकमे जो मनणा ही साडा कम्म है। 30 साडे पूर्वजां दे परमेश्वरे यीशुऐ जो मरयां चे जिन्दा करी दिता, जिसयो तुसां सूली पर लटकाई करी मारी दितया था। 31 उसयो ही परमेश्वरे प्रभु कने उद्धार करणे बाला बणाया है, कने अपने सजे हथे ने सारयां ला उच्चे सिंहासने पर बैठया है, ताकि इस्राएले दे लोक अपने बुरे सोच बिचार कने बुरे रस्तयां जो छडी करी परमेश्वरे बाल मुडी ओन कने उदे जरिये उना जो अपने पापां दी माफी मिल्ले। 32 असां कने पबित्र आत्मा भी इना गल्लां दे गबाह न, जिना जो परमेश्वरे उना जो दितया है, कने जडे उदा हुकम मदे न।” 33 जालू महासभा दे लोकां ऐ सुणया तां उना जो बडा जादा गुस्सा आई गया, कने प्रेरितां जो मारी देणा चांदे थे। 34 पर गमलीएल नाऐ दा इक फरीसी था, जडा व्यवस्था जो सिखाणे बाला कने सारे लोक उसयो बडा मदे थे, उनी महासभा च खडाई करी प्रेरितां जो थोडिया देरा तांई बाहर करी देणे दा हुकम दिता। 35 तालू उनी महासभा दे लोकां जो बोलया, “हे इस्राएलियो, जडा कुछ भी इना माणुऐ ला करणा चांदे न सोची समझीकरी करनयो। 36 क्योंकि इना रोजां ला पहले थियुदास ऐ बोलदा था, की मैं भी कुछ है; कने कोई चारसो माणु उदे सोगी होई गे, पर सै मारी दिता, कने जितणे लोक उदी मदे थे सारे तितर बितर होई गे कने खत्म होई गे। 37 उदे बाद जनगणना दे दिना च गलील प्रदेशे दा बासी यहूदा आया, कने कुछ लोक अपने पासे करी ले, सै भी मारी गया, कने जितणे लोक उदे चले थे, सारे लोक तितर बितर होई गे। 38 इस तांई तां मैं हुण तुसां जो बोला दा है, इना माणुऐ ला दूर ही रिया कने उना ला कोई कम्म मत रखा; क्योंकि अगर ऐ कम्म कने योजना माणुऐ दिया तरफा ला हौदी तां इना अपने आप ही खत्म होई जाणा; 39 पर अगर परमेश्वरे दिया तरफा ला है, तां तुसां कदी नी मिटाई सकणा है, कुथी इयां ना हो की तुसां परमेश्वरे ला लडने बाले बंणन।” 40 तालू महासभा गमालिएल दी गल्ल मनी लेई, कने इस तांई प्रेरितां जो सदीकरी मारया कुटया; कने उना जो ऐ हुकम दिता की सै हुण यीशुऐ दे नाऐ च कुछ मत बोलदे कने फिरी उना जो छडी दिता। 41 कने

जालू सै महासभा जो छडी करी चली गे, तालू प्रेरित इसा गल्ला ला खुश होए की परमेश्वरे उना जो यीशुऐ तांई बेइजत होणे जोगे समझया। 42 कने हर रोज मंदरे च कने घरे-घरे च, प्रेरित लोकां जो सिखांदे रे कने शुभसमाचार दा प्रचार करदे रे की यीशु ही मसीह है।

6 उना रोजां च चेलयां दी गिणती लगातार बदा दी थी, तालू यूनानी बोली बोलणे बाले यहूदी विश्वासी इज्रांनी बोली बोलणे बाले यहूदी विश्वासियां दे खिलाफ शिकायत करणा लग्गे, की रोज खाणा कने पैसे बंडदे बकते यूनानी बिधवां जो सबना सांई खाणा कने पैसे नी दिन्दे। 2 तालू बाहरां प्रेरितां यरूशलेम शेहर दे बाकी चेलयां दी मंडलिया जो अपने बाल सदीकरी बोलया, “असां प्रेरितां जो अपना बकत परमेश्वरे दा बचन सिखाणे च लाणा चाईदा, ना की खुआणे पियाणे दी सेवा करणे च। 3 इस तांई हे मसीह भाईयो, अपने चे सत ऐसे माणुआं जो चुणा जिना दे बारे च सब जाणदे न की सै पबित्र आत्मा ने कने अकला ने भस्यो न, ताकि असां ऐ जिम्मेदारी उना जो देई देंन। 4 पर असां तां प्राथना, बचन दा प्रचार कने शिक्षा देणे च लगी रेन।” 5 ऐ गल्ल सारिया मंडलिया जो खरी लग्गी, कने उना स्तिफनुस नाऐ दे इक माणुऐ जो जडा भरोसे कने पबित्र आत्मा ला भई गया था, कने फिलिप्पुस कने प्रूक्सस कने निकानोर कने तीमोन कने परमिनास कने अन्ताकिया बासी नीकुलास जो जडा यहूदी धर्म च आई गया था, इना जो चुणी लिया। 6 कने इना जो सै प्रेरितां दे सामणे लेई आये कने उना तांई प्राथना कीती कने उना पर हाथ रखीकरी उस कम्मे तांई नियुक्त किता। 7 कने परमेश्वरे दा बचन फेलदा गया कने यरूशलेम शेहरे च चेलयां दी गिणती बददी गेई, कने केई यहूदी याजकां भी यीशु मसीह पर भरोसे दे इस संदेशे जो मन्नी लिया। 8 स्तिफनुस अनुग्रह कने शक्तिया ला भई करी लोकां च बड़े-बड़े अनोखे कम्म कने चमत्कार दसदा था। 9 पर कुछ लोक जडे उस यहूदी जंज घरे दे थे, जिसयो गुलाम मुक्त यहूदी जंज घर बोलंदे थे, सै स्तिफनुसे दे खिलाफ होई गे। कने इना चे कुछ लोक कुरेने कने सिकंदरिया दे शेहरां ला आयो थे, कने कुछ लोक किलिकिया प्रदेश कने आसिया प्रदेश ला आयो थे। ऐ लोक स्तिफनुसे सोगी बेहस करणा लग्गे। 10 स्तिफनुसे जडा कुछ भी बोलया सै उदा जबाब नी देई सके क्योंकि पबित्र आत्मा उसयो बडी ही समझा ला बोलणे च सहायता कीती। 11 इस तांई गुलाम मुक्त लोकां छुपके ला केई मर्दा जो रिखत देईकरी स्तिफनुसे दे बारे च झूठ बोलणे तांई भडकाया, “की असां इसयो मूसा कने परमेश्वरे दे खिलाफ च निंदा करदे सुणया है।” 12 कने उना स्तिफनुसे दे खिलाफ लोकां जो, यहूदी अगुवां जो, कने व्यवस्था जो सिखाणे बालयां जो भडकाया कने उना आई करी स्तिफनुसे जो पकडया कने उसयो महासभा दे सामणे लेई आये। 13 कने ओथु जूठे गबाह पेश किते, जिना स्तिफनुसे पर ऐ इलजाम लाया, “ऐ माणु इस पबित्र मन्दिर कने मूसा दिया व्यवस्था दे खिलाफ बोलणा नी छडदा है। 14 क्योंकि असां इसयो ऐ बोलंदे सुणया है, की नासरत बासी यीशुऐ इस मंदरे जो ढाई देणा है, कने रीती रिबाजां जो बदली देणा है जडे मूसा सांझो दितयो न।” 15 तालू सारयां लोकां जडे महासभा च बैठयो थे, उदे पासे घुरी करी दिखया तां उदा मु स्वर्गदूते दे मुऐ सांई चमका दा था।

7 तालू महायाजके स्तिफनुसे ला पछ्या, “क्या ऐ इलजाम सच्च न?” 2 उनी बोलया, “हे भाईयों कने पितरो सुणा, साडे पूर्वज अब्राहम जो हारान गां च आई करी बसणे ला पेहेले जालू सै मेसोपोटामिया प्रदेश च था; कने तेजोमय परमेश्वरे उसयो दर्शण दिते। 3 कने उसयो बोलया, ‘तू अपने देशे कने अपने रिश्तेदारां ला निकली करी उसी देशे जो चली जा, जिसयो मैं तिजो दसगा।’ 4 तालू सै कसदियों दे देशे ला निकली करी हारान गांऐ च जाई बसया; कने उदे पिता दिया मौता दे बाद परमेश्वरे उसयो ओथु ला आंणी करी इस देशे च बसाया जिदे च हुण तुसां बसदे न, 5 पर परमेश्वरे उसयो ऐथु विरासत च कुछ नी दिता, ऐथु दीकर की इक फुट जगा भी नी दिती, कने उस बेले उदी कोई ओलाद भी नी थी। फिर भी परमेश्वरे बायदा किता, की मैं ऐ देशे तरे कने तरे बाद तरे बंशे दे हथे दिगा।” 6 कने परमेश्वरे ऐ भी बोलया, तरे बंशे दे लोक पराये देशे च परदेशी होणे, कने उना लोकां उना जो गुलाम बणाई लेणा, कने चारसो सालां दीकर उना सोगी बुरा बर्ताब करणा। 7 फिरी परमेश्वरे बोलया, “जिसा जातियां दे उना गुलाम होणा है, उना जो मैं सजा देणी, कने उना उस देशे ला निकली करी इसी इस्त्राएल च मेरी भक्ति करणी।” 8 कने परमेश्वरे अब्राहम सोगी इक बायदा किता कने उसने बोलया की सै अपने घरे दे सारे मर्दा दा खतना बायदे दे चिन्ह दे तौर पर करबाऐ; कने बादे च जालू इसहाक पैदा होया, तां अठमे रोजे उदा खतना किता, कने इसला बाद ऐ परमपरा चलदी रेई कने इसहाक ला याकूब कने याकूब ला साडे बारा पूर्वज पैदा होऐ। 9 जलन दिया बजा ने यूसुफे दे भाईयां उसयो मिस्र देशे जाणे बालयां जो इक गुलाम दे से च बेची दिता, पर परमेश्वर उदे सोगी था। 10 कने परमेश्वरे यूसुफे जो उदे सारियां मुसीबतां ला छुड़ाई करी मिस्रे दे राजा फिरौन दे अग्रे अनुग्रह कने अकल दिती, कने फिरौन राजे उसयो मिस्र देशे पर कने अपने सारे घरे दा अधिकारी बणाया। 11 जालू यूसुफ मिस्र देशे दा गवर्नर था तालू सारे मिस्र कने कनान देशे च अकाल पिया; जिसने बड़ा भरी क्लेश होया, कने साडे पूर्वजां जो खाणे जो नी मिलदा था। 12 पर याकूबे ऐ सुणाया, की मिस्र देशे च अनाज है, उना साडे पूर्वजां जो अनाज लेणे तांई भेजया कने सै यूसुफे ने मिल्ले कने अनाज खरीदया पर उना यूसुफे जो नी पछेणया। 13 कने दुई बरी जालू सै अनाज लेणा गे, तां यूसुफ अपने भाईयां जो दसया की मैं तुहाडा भाई यूसुफ है, कने यूसुफे दे परिवार दे बारे च फिरौन जो पता लग्गी गया। 14 तालू यूसुफे अपने पिता याकूब कने अपने सारे रिश्तेदारां जो, जडे पचतर माणु थे, उना जो मिस्र देशे च ओणे तांई बुलाबा भेजया। 15 तालू याकूब मिस्र देशे गया; कने ओथु कुछ बकते बाद सै कने साडे बाप दादे मरी गे। 16 कने उदे बंशज याकूब कने उदे पुत्रां दियां लाशां जो साडे देश कनान च लेई गे, कने याकूब दिया लाशा जो उसा कबरा च दफनाया, जिसा जो अब्राहमे इक सही कीमता च खरीदया था, कने उना याकूब दे पुत्रां जो शेकेम शेहरे दिया उसा जमिना च दफनाया, जिसयो याकूबे हामौर दे पुत्रां ला खरीदया था। 17 पर जालू उस बायदे जो पूरा होणे दा बकत नेडे आया जडा परमेश्वरे अब्राहम ने कितया था, तां मिस्र देशे च लोक बदी गे, कने मते सारे होई गे। 18 तालू मिस्र देशे च दुआ राजा राज करणा लग्गा जडा यूसुफे जो नी जाणदा था। 19 उनी साडिया जातियां सोगी चलाकी

करिरी साडे पूर्वजां ला इसा हदा दीकर बुरा व्यवहार कितया की, उना दे माता पिता जो अपने बचयां जो फैकणा पेई गया ताकि सै मरी जान। 20 कने उस बेले मूसा पैदा होया, कने सै परमेश्वरे दिया नजरा च बडा ही छेल था; कने उसयो उना तिन मिहनयां दीकर उसयो उदे माता-पिता लुकाई करी पालया। 21 पर जालू सै उसयो होर जादा लुकाई नी सके, तां उना उसयो घरे बाहर रखी दिता कने तालू फिरौने दिया कुडिया उसयो गोद लेई लिया, कने उसयो अपने पुत्रे सांई पालया। 22 कने मूसा जो मिस्रियां दी सारी बिधा पडाई, कने सै बडा ही प्रभावशाली तरीके ने गल्लां कने कम्म करदा था। 23 जालू मूसा चालियां सालां दा होया, तां उदे मने च आया की अपने इस्राएली रिश्तेदारां ने मिल्ले। 24 कने उनी ओथु इक मिस्री माणुऐ जो इक इस्राएली माणुऐ सोगी बदसलूकी करदे दिखया, कने उसयो बचाया, कने मिस्री माणुऐ जो मारी करी उदा बदला लिया। 25 उनी सोचया, की में भाईयां समझणा की परमेश्वरे में हथे ने उना जो गुलामी ला अजाद करदा, पर उना नी समझया। 26 दुरे रोजे मूसा दो इस्राएलियां बाल आया जडे अपु चे लडा दे थे, कने उना बिच सुला करणे तांई ऐ बोलया, की हे मर्दा, तुसां तां भाई-भाई न, तुसां कजो इकी दुरे जो मारा दे न? 27 पर जडा अपने पडोसीऐ जो मारा दा था, उनी मूसा जो धक्का दिता कने बोलया, तिजो कुनी सांझो पर राजा कने न्याय करणे बाला बणाया है? 28 क्या जियां कल तू मिस्र देशे दे माणुऐ जो मारी दिता क्या मिजो भी मारणा चांदा है? 29 ऐ गल्ल सुणीकरी, मूसा मिस्र देशे ला नठया कने मिघान देशे च परदेसी बणी करी रेणा लग्गा: कने ओथु उदे दो पुत्र पैदा होऐ। 30 मिघान देशे च पुरे चाली साल रेहणे बाद, मूसा जो परमेश्वरे इक स्वर्गदूते दे से च सँनि पहाडे दिया सुनसान जगा च जलदिया झाडिया दिया अग्गी बिच दर्शण दिते। 31 जालू मूसा उसा अग्ग लगियो झाडिया जो दिखया जडी भस्म नी होआ दी थी, तां सै हेरान होया, कने जालू दिखणे तांई बखे गया, तां प्रभु दी ऐ अबाज सुणोई, 32 “मैं तरे पूर्वज, अब्राहम, इसहाक कने याकूब दा परमेश्वर है, जिदी सै अराधना करदे थे।” तालू तां मूसा डरे ने कमी पिया, ऐथु दीकर की उसयो दिखणे दी हिम्मत नी रेई। 33 तालू प्रभुऐ उसयो बोलया, अपने पैरां ला जुतयां उतारी दे, क्योंकि जिसा जगा तू खडोतया है, सै पबित्र जगा है। 34 मैं सची अपने लोकां दी दुर्दशा जो दिखया है, जडी मिस्र देशे च है, कने उना दी तकलीफ कने उना दे रोणे जो सुणया है, इस तांई उना जो छुडाणे तांई उतरया है। हुण आ, मैं तिजो मिस्र देशे च भेजणा। 35 ऐ सै ही मूसा है जिसयो इस्राएलियां नकरी दितया था कने जिना बोलया, तिजो कुनी सांझो पर राजा कने न्याय करणे बाला बणाया है? उसयो ही परमेश्वरे राजा कने छुडाणे बाला बणाई करी, उस स्वर्गदूते दे जरिये भेजया जिनी उसयो झाडिया च दर्शण दिते थे। 36 सै उना जो मिस्र देशे ला बाहर लेई आया कने उनी मिस्र देशे च कने लाल समुंद्रे पर कने सुनसान जगा च चालियां सालां दीकर अदभुत कम्म कने चिन्ह दर्से। 37 ऐ सेई मूसा है, जिनी इस्राएली लोकां जो बोलया, परमेश्वरे तुहाडे भाईयां च तुहाडे तांई मिंजो सांई इक परमेश्वरे दा संदेश देणेबाला बणाणा है। 38 मूसा इक अगुवे दे से च साडे पूर्वजां दे सोगी था जालू सै सुनसान जगा च गिठे थे, तालू स्वर्गदूते सँनि पहाडे पर मूसा ने गल्लां कितियां, कने ओथु मूसा जो जिन्दगी देणेबाले बचन मिल्ले

कने उनी सै बचन सांझो दीकर पूजाऐ। 39 पर साडे पूर्वज उदी मनणा नी चांदे थे; सै मने-मने च ही मिस्त्र देशे जो बापस जाणा चांदे थे, 40 कने उना मूसा दे भाई हारून ने बोलया, साडे ताई ऐसा देवता बणा, जडा मिस्त्र देशे जो बापस जाणे ताई साडे अग्रे-अग्रे चले; क्योंकि ऐ मूसा जडा सांझो मिस्त्र देशे ला कडी लेई आया है, असां नी जाणदे उसयो क्या होया है। 41 उना रोजां च उना इक बछड़े दी मूर्ति बणाई करी, उदिया मूर्तियां अग्रे बलि चढाई, कने अपने हथां दे कम्मा पर खुश होणा लगे। 42 फिरी परमेश्वरे उना जो अम्बरे दे तारे, चन्द्रमा, सूरजे जो अपने देवतां दे स्ने च पूजणे ताई छडी दिता, जियां परमेश्वरे दे संदेश देणेबालयां दीया कताबा च परमेश्वरे बोलया है, हे इस्राएल दे लोको, क्या तुसां सिर्फ मेरे ताई ही चालियां सालां दीकर सुनसान जगा च पशु बलि कने अन्नबली चढाई रे? 43 नही, तुसां उस तम्बूऐ जो डोता जिदे च तुहाडे देवता मोलेक दी मूर्ति थी; कने तुसां अपने देवता रिफान दे तारे जो चुकया, मतलब की उना मूर्तियाँ जो जिना जो तुसां भक्ति करणे ताई बणाया था। इस ताई मैं तुहांजो बाबेल देश च गुलाम बनाणा। 44 गबाई दा तम्बू रेगिस्तान च साडे पूर्वजां बिच था; जियां की परमेश्वरे मूसा जो बोलया, जडा अकार तू दिखया है, उदे सांई इसयो बणा। 45 बडे सालां बाद उसी तम्बूऐ जो साडे पूर्वज यहोशुऐ सोगी ऐथू लेई आये। उस बकत ऐ देश होरनी जातियां दे हथे च था, पर परमेश्वरे उना जो साडे पूर्वजां दे सामणे ला कडी दिता, कने सै तम्बू राजा दाऊदे दे बकते दीकर रिया। 46 दाऊद पर परमेश्वरे अनुग्रह किता; दाऊदे याकूब दे परमेश्वरे जो रेहणे ताई मंदर बणाने दी बीनती किती। 47 पर जिनी परमेश्वरे दे मंदरे जो बणाया सै दाऊदे दा पुत्र सुलैमान था। 48 पर परमेश्वर हथा ने बणायो मंदरा च नी रेंदा है, जियां की यशायाह परमेश्वरे दे संदेश देणेबाले बोलया की, 49 परमेश्वर बोलदा है, स्वर्ग मेरा सिंहासन है कने धरती मेरे पैरां थल्ले दी चौकी है, मेरे ताई तुसां कदिया मंदर बणागे? कने मिंजो अराम करणे दी कुण देई जगा होणी? 50 मैं खुद स्वर्ग कने धरती दोनों जगा पर सब कुछ बणाया है। 51 “हे जिदी लोको, तुसां परमेश्वरे दियां गल्लां मणगे कने सुणने ला मना करदे न, तुसां हमेशा पबित्र आत्मा दा बिरोध करदे न। जियां तुहाडे पूर्वज करदे थे, तियां ही तुसां भी करदे न। 52 तुहाडे पूर्वजां परमेश्वरे दे संदेश देणेबालयां च हर कुसी जो सताया कने जिना ऐ भविष्यबाणी किती की मसीह जडा धर्मी है ओणा है, उना जो भी मारी दिता, पर जालू मसीह आया, तां तुसां उसयो धोखा दिता कने उदी हत्या करी दिती। 53 तुहांजो स्वर्गदूते दी बणाईयो व्यवस्था तां मिली, पर उदा तुसां पालन नी किता।” 54 ऐ गल्लां सुणीकरी यहूदी अगुवे स्तिफनुसे पर बडे जादा गुस्सा होए कने स्तिफनुसे पर ददां जो पिणा लगे। 55 पर स्तिफनुसे पबित्र आत्मा ने भई करी स्वर्ग पासे दिखया कने परमेश्वरे दिया महिमा जो कने यीशुऐ जो परमेश्वरे दे सजे पासे खडोतया दिखीकरी, 56 बोलया, “दिखा, मैं स्वर्ग जो खुलया कने माणुऐ दे पुत्रे जो परमेश्वरे दे सजे पासे खडोतया दिखा दा है।” 57 जालू उना ऐ सब सुणया तालू उना जोरे ला चिलाया कने अपने कना पर हथ रखी ले, ताकि सै स्तिफनुसे दी नी सुणन कने गिठे होईकरी स्तिफनुसे पर टूटी पे। 58 कने उसयो यरूशलेम शेहरे दे बाहर कडी करी पथर मारणा लगे, कने स्तिफनुसे पर इल्जाम लगाणे बाले लोकां अपने बाहरे बाले कपडे खोली

करी शाऊले नाऐ दे जवान आदमिये बाल रखी दिते। 59 कने सै स्तिफनुसे जो पथर मारदे रे, कने सै ऐ बोली करी प्राथना करदा रिया, “प्रभु यीशू, मेरिया आत्मा जो लेई ले।” 60 फिरी गोडे भार बेईकरी जोरे ने पुकारया, “प्रभु जी, इस पापे ताई इना जो सजा मत दिन्दे।” कने ऐ बोली करी मरी गया।

8 शाऊल स्तिफनुसे दिया हत्या च पूरा सहमत था। उसी रोजे ला यरूशलेम शेहरे दिया कलीसिया पर बडा जुलूम होणा लग्गा कने प्रेरितां जो छडी करी सारे दे सारे यहूदिया प्रदेशे च कने सामरिया प्रदेशां च तितर बितर होई गे। 2 कने कुछ मर्दा जडे परमेश्वरे दी इज्जत करदे थे उना स्तिफनुसे जो दफनाई दिता, कने उदे ताई मते रोये। 3 शाऊल कलीसिया जो सता दा था, कने घरे-घरे जाई करी खिवासी मर्दा कने जनानिया जो घसीटी-घसीटी करी जेलां च पाई दिन्दा था। 4 जडे भरोसा करणे बाले तितर बितर होये थे, सै जिथू कुथू भी गे लगातार शुभसमाचार सुणादे गे। 5 कने फिलिप्पुस सामरिया प्रदेशे दे इक शेहरे च जाई करी लोकां च मसीह दा प्रचार करणा लग्गा। 6 जालू उना फिलिप्पुसे जो बोलदे सुणया कने उदे कितयो चिन्हा जो दिखया, तां उना सारयां मिलिकरी उदे संदेशे जो ध्याने ला सुणया। 7 क्योंकि जालू फिलिप्पुसे हुकम दिता तां मतयां च बुरियां आत्मा जोरे ने चिलांदिंयां होईयां निकली गियां कने मते लकवे दे रोगी कने लंगडे भी ठीक होए। 8 तां उस शेहरे दे मते सारे लोक खुश होए। 9 उस शेहरे च इक शमौन नाऐ दा माणु था, कने सै काफी बकत ला सामरियां दे लोकां पर जादू टोणा करा दा था, सै उदी काबिलियत ला बडे हेरान थे, कने सै दावा करदा था की सै इक महान आदमी है। 10 कने सारे छोटयां ला लेईकरी बड़े दीकर उसयो इज्जता ने बोलदे थे, “ऐ माणु परमेश्वरे दी सै शक्ति है, जिसयो महान बोलदे ना।” 11 उनी मते रोजां ला उना जो अपने जादूऐ दे कम्मा ने हेरान करी रखया था, ताई तां सै उसयो बडे मंदे थे। 12 पर जालू लोकां परमेश्वरे दे राज्य कने यीशू मसीह दे ना दा शुभसमाचार फिलिप्पुस ला सुणया कने भरोसा किता, तालू सारे मर्दा कने जनानिया बपतिस्मा लिया। 13 तालू शमौने अपु भी फिलिप्पुसे दे शुभसमाचार पर भरोसा किता कने बपतिस्मा लेईकरी हर जगा फिलिप्पुसे सोगी जाणा लग्गा कने चमत्कार कने बड़े-बड़े कम्म होंदे दिखीकरी सै हेरान होंदा था। 14 जालू यरूशलेम शेहर च प्रेरितां सुणयां की सामरिया प्रदेशे दे लोकां परमेश्वरे दा बचन मन्नी लिया है तां पतरसे कने यहून्ना जो उना बाल भेजया। 15 कने उना ओथु जाई करी उना ताई प्राथना किती ताकि उना जो पबित्र आत्मा मिल्ले। 16 क्योंकि पबित्र आत्मा हले दीकर उना च कुसदे पर भी नी उतरया था, उना तां बस यीशुऐ दे नाऐ ने बपतिस्मा लिया था। 17 तालू पतरस कने यहून्ने तिना पर हथ रखे कने उना जो पबित्र आत्मा मिल्ली। 18 जालू शमौने दिखया की प्रेरितां दे हथ रखणे ने पबित्र आत्मा मिलदी है, तां उनी पेसे देईकरी बोलया, 19 “ऐ शक्ति मिंजो भी दिया, ताकि मैं जिसदे पर हथ रखे, उसयो पबित्र आत्मा मिल्ले।” 20 पतरसे उसयो बोलया, “तू कने तेरे पैसे दोनों नाश होन, क्योंकि तू परमेश्वरे दा दान पैसयां ने खरीदणे दा बिचार किता। 21 इसा सेवा च ना तेरी हिस्सेदारी है, ना हिस्सा है; क्योंकि तेरा मन परमेश्वरे दे सामणे सच्चा नी है। 22 इस ताई तू अपने मने ला इसा बुरिया सोचा जो कडी दे कने प्रभु ने प्राथना कर, तां होई सकदा प्रभु तेरी

इसा बुरिया सोचा ताई तिजो माफ करे। 23 तू अपने पापां ला पश्चाताप कर क्योंकि तू कड़वाट ने भस्या है कने पाप ने जकड़या होया है।” 24 शमौने जबाब दिता, “तुसां मेरे ताई प्रार्थना करा ताकि जड़ियां गल्लां तुसां बोलियां न, ऐसा कुछ भी मेरे सोगी न हो।” 25 पतरस कने यहून्ना उस शेहरे च गबाई दिती कने प्रभु दे बचना दा प्रचार किता कने फिरी यरूशलेम शेहरे जो बापस चली गे। कने जांदे-जांदे बेले सामरिया प्रदेशे दे मतयां गां च शुभसमाचार दा प्रचार किता। 26 फिरी प्रभु दे इकी स्वर्गदूते फिलिप्पुसे जो बोलया, “उठी करी दक्षिणे पासे उस रस्ते पर जा, जड़ा यरूशलेम शेहरे ला गाजा शेहर जो जांदा है, ऐरेगिस्तानी रस्ता है।” 27 फिलिप्पुस उठी करी चली पिया, कने उसयो रस्ते च इक माणु मिल्ला सै इक खोजा कने कृशियों दी राणी कन्दुके दा मंत्री कने खजांची था, कने भक्ति करणे ताई यरूशलेम शेहर आया था। 28 कने सै रथे पर अपने देशे जो बापस चलया था, कने परमेश्वरे दा संदेश देणेबाले यशायाह दी कताबा जो जौरे ने पढा दा था। 29 तालू पबित्र आत्मा फिलिप्पुसे ने बोलया, “नेडे होईकरी इसी रथे ने चली पो।” 30 फिलिप्पुस दोड़ी करी उस रथे बखे आया कने उसयो परमेश्वरे दा संदेश देणेबाले यशायाह दी कताबां जो पढे सुणाया, तां उसला पुछया, “तू जड़ा पढा दा है क्या उसयो समझदा भी है?” 31 उनी बोलया, “मैं इसयो नी समझी सकदा जालू दीकर मिजो कोई इसयो समझांगा नी।” कने उनी फिलिप्पुसे ने बीनती किती की, रथे पर चढ़ी करी मेरे बखे बो। 32 पबित्र शास्त्रे दा जड़ा अध्याय सै पढा दा था, सै ऐ था, “उसयो भेडां साई मारणे ताई लेई गे, कने जियां मेमना ऊन कतरने बाले दे सामणे चुपचाप रेंदा है, तियां ही जालू लोकां उसयो दुख दिता तां उनी भी अपना मु नी खोलया, 33 उदिया दीनता दिया बजा ला उदी बेईजती किती कने उसयो न्याय नी मिल्ला, शायद कोई भी उदे बंशजा दे बारे च नी दस्सी सकदा है, क्योंकि इदे ला पेहले की धरती पर उदा कोई बंश होंदा, लोकां उसयो मारी दिता।” 34 इसी पर खोजे फिलिप्पुसे ला पुछया, “मैं तिजो ने बीनती करदा है, मिजो ऐ दस की परमेश्वरे दा संदेश देणेबाला कुसदे बारे च बोला दा है, अपने या कुसी होरसी दे बारे च?” 35 तालू फिलिप्पुसे बोलणा शुरू किता, कने इस पबित्र शास्त्रे ला शुरू करिरी उसयो यीशुऐ दा शुभसमाचार सुणाया कने उनी खोजे ऐ गल्लां समझी लियां कने यीशुऐ पर भरोसा किता। 36 रस्ते च चलदे-चलदे सै कुसकी तलाबे बाल पुज्जे, तालू खोजे बोलया, “दिख ऐथू तलाब है, हुण मिजो बपतिस्मा लेणे ताई क्या कमी है?” 37 फिलिप्पुसे बोलया, “अगर तू सारे मने ने भरोसा करदा है तां लेई सकदा है।” उनी जबाब दिता “मैं भरोसा करदा है की यीशु मसीह ही परमेश्वरे दा पुत्र है।” 38 तालू उनी रथ खरेडने दा हुकम दिता, कने फिलिप्पुस कने खोजा दोनो तलाबे दे पाणिऐ च उतरी गे, कने फिलिप्पुसे उसयो बपतिस्मा दिता। 39 जालू सै तलाबे ला निकली करी उपर आये, तां प्रभुऐ दी आत्मा फिलिप्पुसे जो चुकी लेई गेई, कने खोजे उसयो दोबारा नी दिखया, कने सै खुश होया की प्रभुऐ उसयो बचाया है कने अपने देशे जो बापस चली गया। 40 फिरी फिलिप्पुस अशदोह शेहर च प्रगट होया कने तालू ओथु ला यात्रा शुरू किती कने गां-गां च कने नगरां-नगरा च

शुभसमाचार दा प्रचार करदा रिया जालू दीकर सै कैसरिया शेहरे च नी पूजी गया।

9 शाऊल पर हले दीकर प्रभु यीशु दे चेलयां जो धमकाणे कने मारणे दा खून सबार था, इस ताई सै महायाजक बाल गया। 2 कने उसला दमिशक शेहरे दे यहूदी जंज घरा दे नाऐ पर अधिकार पत्र मंगे, की कोई भी मर्द कने जनानी जडे यीशु मसीह दी शिक्षा जो मंदे न उना जो बन्नी करी यरूशलेम शेहर जो लेई ओऐ। 3 पर जालू शाऊल कने उदे साथी दमिशक शेहरे बखे पुज्जे, तां अचानक अम्बरे ला शाऊले दे चारो पासे इक लौ चमकी, 4 सै धरती पर पेई गया, कने अबाज सुणी, जड़ी उसयो बोला दी थी, “हे शाऊल, हे शाऊल मिजो कजो सता दा है?” 5 शाऊले पुछया, “प्रभु जी, तू कुण है?” उनी बोलया, “मैं यीशु है, जिसयो तू सता दा है।” 6 पर हुण उठी करी शहरे जो जा, कुनी तिजो दस्सी देणा, की तिजो क्या करणा है। 7 जडे माणु उदे सोगी थे, चुपचाप रेई गे, क्योंकि उना जो अबाज सुणोंदी थी, पर कोई मिलदा नी था। 8 तालू शाऊल धरती ला उठया, पर जालू हखी खोलियां तां उसयो कुछ भी नी मिल्ला दा था कने सै उदा हथ पकड़ी करी दमिशक शेहर लेई गे। 9 कने सै तिन्ना रोजां दीकर दिखी नी सकया, कने ना उनी कुछ खादा कने ना पीता। 10 दमिशक शेहर च हनन्याह नाऐ दा इक चेला था, उसयो प्रभु यीशुऐ दर्शन च बोलया, हे हनन्याह। उनी बोलया, “हांजी प्रभु जी।” 11 तालू प्रभु यीशुऐ उसयो बोलया, “उठी करी सीधा नाऐ दिया गलिया च जा, कने यहूदा दे घरे शाऊल नाऐ दे इकी तरसुस शेहरे दे बासिये जो पूछी ले; क्योंकि सै प्रार्थना करा दा है, 12 उनी दर्शन च दिखया है की हनन्याह नाऐ दे इकी माणुऐ आई करी उस पर हथ रखे ताकि सै दोबारा दिखणा लग्गी पोऐ।” 13 हनन्याह जबाब दिता, “प्रभु जी, मैं इस माणुऐ दे बारे च मतयां लोकां ला सुणया है, की इनी यरूशलेम शेहर च तैरे पबित्र लोकां सोगी बड़ा बुरा कितया है; 14 कने ऐथू भी इसयो बड़े याजकां दिया तरफा ला हक मिलया है, की जडे लोक तिजो पर भरोसा करदे न, उना जो बन्नी करी यरूशलेम शेहर जो लेई जा।” 15 पर प्रभुऐ उसयो बोलया, “तू चली जा; क्योंकि ऐ तां, मैं होरनी जातियां, कने राजयां, कने इम्राएलियां दे सामणे मेरे बारे च प्रचार करणे कने मेरी सेवा करणे ताई चूंणया है। 16 कने मैं उसयो दसणा है, की लोकां जो मेरे बारे च प्रचार करणे दिया बजा ला उसयो कदिया-कदिया दुख झेलणा पोणा है।” 17 तालू हनन्याह उठी करी उस घरे च आया, जिथू शाऊल रे दा था, कने उदे पर अपना हथ रखीकरी बोलया, “हे भाई शाऊल, प्रभु यीशुऐ मिजो तैरे बाल भेजया है, जड़ा तिजो उस रस्ते च मिलया था, जालू तू ऐथू ओआ दा था। कने उनी मिजो इस ताई भेजया ताकि तू फिरी दिखी सके, कने पबित्र आत्मा ने भरई जाऐ।” 18 कने झट उदियां हखी ला छिलकयां साई कुछ पिया, कने उसयो मिलणा लग्गी पिया, कने सै उठया कने उनी बपतिस्मा लिया, 19 फिरी खांणा खाई करी उसयो जोर आया। सै केई रोजां दीकर उना चेलयां सोगी रिया जडे दमिशक शेहर च थे। 20 कने झट दमिशक शेहरे दे यहूदी जंज घरां च यीशुऐ दा प्रचार करणा लग्गी पिया, की यीशु ही परमेश्वरे दा पुत्र है। 21 कने सारे सुणनेबाले हेरान होईकरी बोलणा लग्गे, “क्या ऐ सेई माणु नी है, जड़ा यरूशलेम शेहरे च उना जो सतांदा था,

जड़े लोक यीशु नाए दे बंदे पर भरोसा करदे थे, कने ऐथु भी ताई ही आया था, की उना लोकां जो बन्नी करी बड़े याजकां बाल लेई जाए?” 22 पर शाऊल प्रचार करणे च होर भी जादा सामर्थी होंदा गया, कने इसा गल्ला दा सबूत देई-देईकरी की यीशु ही मसीह है, दमिश्क शेहरे दे रेहणे बाले यहदियां दा मु बंद करदा रिया। 23 जालू शाऊले जो दमिश्क शेहरे च रेंदे होए मते रोज होई गे, तां यहदियां मिली करी उसयो मारणे दी तरकीब बणाई। 24 कने सै उसयो मारणे ताई दिन रात फाटकां पर इतजार करदे रे, पर उना दी तरकीब शाऊले जो पता चली गई। 25 इक राती चेले शाऊले जो पथरे दिया उचिया दिबारा पर लेई आए, जडी शेहरे दे चारो पासे बणियो थी। तालू उना दिबारां दे खुले हिस्से ला रस्सियां दे सहारे इक बडिया दिया टोकरिया च उसयो थले उतारी दिता। इयां करिरी सै दमिश्क शेहरे ला बची करी निकली गया। 26 शाऊल यरूशलेम शेहरे जो गया कने ओथु पुज्जी करी उनी चेलयां सोगी मिलणे दी कोशिश किती, पर सारे उसला डरदे थे, क्योंकि उना जो भरोसा नी होंदा था, की सै भी चेला है। 27 पर बरनबासे उसयो अपने सोगी प्रेरितां बाल लेईजाई करी उना जो बोलया, की इनी कियां दमिश्क शेहर जाणे बाले रस्ते च प्रभु जो दिखया, कने प्रभु यीशुए उसला गल्लां कितियां; कने फिरी दमिश्क शेहरे च इनी कितणिया हिम्मत ला यीशुए दे नाए दा प्रचार किता। 28 प्रेरितां बरनबास पर यकीन किता, इस ताई शाऊल स्की गया कने उना सोगी यरूशलेम शेहरे दियां हर जगा पर गया कने बिना डरयो यीशु मसीह दे बारे च प्रचार करदा था। 29 कने यूनानी बोली बोलणे बाले यहदियां सोगी गल्ल बात कने बेहस करदा था; पर सै उसयो मारणे दी कोशिश करणा लगे। 30 तालू बाकी चेलयां जो इसा गल्ला दे बारे च पता चला तां सै शाऊले जो कैसरिया शेहरे च लेई आये, कने ओथु उना उदे ताई जहाजे ला तरसुश शेहर जाणे दा इंतजाम किता, जडा उदा अपना शेहर था। 31 इयां सारे यहदिया प्रदेश, कने गलील प्रदेश, कने सामरी प्रदेशां च कलीसिया जो चैन मिल्ला, कने सै मुजबुत होंदे गे, कने सै प्रभु यीशु मसीह दे डरे च जिन्दगी जिन्दे थे कने उना जो पबित्र आत्मा दे जरिये सहायता मिल्ली कने मतयां लोकां यीशु मसीह पर भरोसा किता। 32 फिरी इयां होया की पतरस हर प्रदेशे च फिरदा होया, इक रोज लुद्दा शेहरे च रेणेबाले पबित्र लोकां ला मिलणे ताई उना बाल पुज्जा। 33 ओथु उसयो ऐनियास नाए दा इक लकवे दा रोगी माणु मिल्ला, सै अठां सालां ला मंजे पर पिया था। 34 पतरसे उसयो बोलया, “हे ऐनियास। यीशु मसीह तिजो ठीक करदा है। उठ कने, अपना बछाण चुक।” तालू सै झट उठी खड़ोता। 35 उसयो ठीक होया दिखीकरी सारे लुद्दा कने शारोन शेहरां दे सारे रेहणे बालयां प्रभु यीशुए पर भरोसा किता। 36 याफा शेहरे च इक तबीता नाए दी जनानी रेंदी थी, जडी यीशुए पर भरोसा करदी थी, जिसा दा यूनानी भाषा च ना “दोरकास” था। (जिदा मतलब की इक हिरण।) कने सै बड़े भरी भले कम्म कने गरीबां दी सहायता करदी थी। 37 उना रोजां च ही जालू पतरस लुद्दा शेहरे च था, तालू तबीता बीमार होईकरी मरी गई, कने लोकां उसा जो नोहाई करी उपरे बाले कमरे च रखी दिता। 38 लुद्दा शेहर याफा शेहर दे नेडे था, चेलयां ऐ सुणीकरी की पतरस ओथु है तां दो माणु भेजी करी उसला बिनती किती की, “साडे बाल ओणे जो देर मत कर।” 39

तालू पतरस उठी करी उना सोगी चली पिया, कने जालू पुज्जी गया, तां सै उसयो उसी उपरे बाले कमरे च लेई गे। कने सारियां बिधवा रोंदिया उदे बाल आईयां, कने जड़े कपड़े दोरकास उना सोगी रेंदे बणायो थे, उना जो दसणा लगियां। 40 तालू पतरसे सारयां जो बाहर करी दिता, गोडयां दे भार बेईकरी प्राथना किती, कने लाशा पासे दिखीकरी बोलया, “हे तबीता उठ।” तालू उना अपणिया हखी खोली दितियां, कने पतरसे जो दिखीकरी उठी बैठी। 41 उनी हथ देईकरी उसा जो उठया कने पबित्र लोकां कने बिधवां जो सदीकरी उसा जो जिन्दा करी दसया। 42 ऐ गल्ल सारे याफा शेहर च फेली गई, कने मतयां प्रभु यीशु पर भरोसा किता। 43 कने पतरस याफा शेहरे च शमौन नाए दे कुसकी चमडे दा धंधा करणे बाले दे ओथु मते रोजां दीकर रिया।

10 कैसरिया शेहरे च कुरनेलियुस नाए दा इक माणु था, सै इतालियानी नाए दिया पलटना दा सुबेदार था। 2 सै परमेश्वरे दा भक्त था, कने सै कने उदा सारा खानदान परमेश्वरे ला डरदा था, कने सै गरीब यहूदी लोकां जो बडा दान दिन्दा था, कने हर बकत परमेश्वरे ला प्राथना करणा लगी रेंदा था। 3 इक रोज, उनी दिने दे लगभग तिन बजे दे करीब इक दर्शन च बिलकुल साफ दिखया की परमेश्वरे दे इकी स्वर्गदूते उदे बाल अंदर आई करी बोलया, “हे कुरनेलियुस।” 4 कुरनेलियुसे स्वर्गदूते जो ध्याने ला दिखया कने डरीकरी बोलया, प्रभु जी क्या हुक्म है? उनी उसयो बोलया, “तेरियां प्राथना कने तेरे दान याद ताई परमेश्वरे सामणे पुज्जे न। 5 हुण याफा शेहर च माणु भेजी करी शमौन जो, जिसयो पतरस बोलदे न, सदी ले। 6 सै शमौन, चमडे दा धंधा करणे बाले दे ओथु परोणा है, जिसदा घर समुद्रे बखे है।” 7 जालू सै स्वर्गदूत जिनी उसला गल्लां कितियां थियां चली गया, तां उनी दो सेवकां कने इक भक्त सिपाइए जो सदया जड़े उदी सेवा ताई ओथु रेंदे थे, 8 कने उसयो सारियां गल्लां दसी करी याफा शेहरे जो पतरसे जो लोणे ताई भेजया। 9 दुपे रोजे कुरनेलियुस दे भेजयो सै तिन माणु चलदे-चलदे लगभग दोपेरा दे बकत शेहरे बखे पुज्जे, तां उसी बकत पतरस छती पर प्राथना करणा चढ़या। 10 उसयो भूख लग्गी कने सै कुछ खांणा चांदा था, कने जालू सै खांणा तैयार करा दे थे, तां सै बेसुध होई गया। 11 कने उनी दिखया, की अम्बर खुली गया, कने इक बडिया चादरा सांई कोई चीच चारो कुंणा ला रस्सिया ला बनियो धरती पासे उतरा दी है। 12 जिसा च धरतिया दे सै चारा पैरां बाले कने रेंगेबाले जानवर कने अम्बरे दे पंछी थे, जिना दे बारे च मूसा दिया व्यवस्था च लिख्या है की सै अशुद्ध कने अपबित्र न कने यहदिया जो इना जो खोणे ताई मना है। 13 कने उसयो इक अबाज सुणोई, “हे पतरस उठ, मार कने खा।” 14 पर पतरसे बोलया, “नी प्रभु, कदी नी, क्योंकि मैं कदी भी कोई अपबित्र या अशुद्ध चीज नी खादियो है।” 15 फिरी दूजी बरी उसयो अबाज सुणोई, “जडा कुछ परमेश्वरे शुद्ध करी दितया है, उसयो अशुद्ध मत बोल।” 16 तिन बरी इयां ही होया, तालू सै चादर अम्बरे जो बापस चली गया। 17 जालू पतरस अपने मने च परशानिया च था, की ए जडा मैं दर्शन दिखया ऐ क्या है? उसी बकत सै माणु जिना जो कुरनेलियुसे भेजया था, शमौने दे घरे दा पता लगाई करी दरबाजे पर आई खडोते। 18 कने पुकारी करी पछणा लगे, “क्या शमौन जिसयो पतरस बोलदे न, ऐथु प्रोणा है?” 19 पतरस जडा उस

दर्शन दे बारे च सोचा दा ही था, की पबित्र आत्मा उसयो बोलया, “दिख, तिन माणु तिजो तोपा दे न। 20 भले ही सै होर जाति दे न, उठी करी थले जा, कने बिना सोचया उना सोगी चली जा, मै ही उना जो भेजया है।” 21 तालू पतरसे थले उतरी करी उना माणुणे जो बोलया, “दिखा जिसयो तुसां तोपा दे न, सै मै ही है, तुहाड़े ओणे दी क्या बजा है?” 22 उना बोलया, कुरनेलियुस सुबेदार जडा धर्मी कने परमेश्वरे ला डरने बाला कने सारिया यहूदी जाति च सुनाम माणु है, उसयो इक पबित्र स्वर्गदूते ऐ बोलया है, की तिजो अपने घरे सदीकरी तिजो ला उपदेश सुणे। 23 तालू उनी उना जो अंदर सदीकरी उना जो रेहणे तांई जगा दिती। कने दूरे रोजे सै उना सोगी गया, कने याफा शेहरे दे मसीह भाईयां चे कुछ उदे सोगी चली पे। 24 तिजे रोजे सै कैसरिया शेहरे च पुज्जे, कने कुरनेलियुस अपने रिशेदारां कने प्यारे दोस्तां जो गिठे करिरी उना दा इंतजार करा दा था। 25 जालू पतरस अंदर ओआ दा था, तां कुरनेलियुस उसने मिल्ला, कने उदे पैरां च पेईकरी नमस्ते किता। 26 पर पतरसे उसयो चुकी करी बोलया, “खडा हो, मेरी अराधना मत कर मै भी तां माणु ही है।” 27 कने उसने गल्लां करदे अंदर गया, कने मतयां लोकां जो गिठे दिखीकरी 28 पतरसे उसयो बोलया, तुसां जाणदे न, की होरनी जातियां दी संगती करणा या उना दे ओथू जाणा भी असां यहूदियां तांई साडिया व्यवस्था दे खिलाफ है। पर परमेश्वरे मिंजो दसया है कुसी भी माणुणे जो अपबित्र या अशुद्ध नी बोलणा। 29 इस तांई जालू मिंजो सदया तालू मै बिना कुछ बोलयो चली आया। हुण मै पुछदा है की मिंजो कुसी कम्मे तांई सदया है? 30 कुरनेलियुसे बोलया, तिन रोज पेहले, इसी बकत, मै अपने घरे च लगभग दोपेरा दे तिन बजे दे करीब प्रार्थना करा दा था, तां इक मर्द चमकीले कपडे पाई करी, मेरे सामणे आई खडोता। 31 कने उनी मिंजो बोलया, “हे कुरनेलियुस, तेरी प्रार्थना सुणी लियो है कने तेरे दान परमेश्वरे दे सामणे याद किते गे न। 32 इस तांई कुसकी जो याफा शेहर भेजी करी शमीने जो जिसयो पतरस बोलदे न, सदा। सै समुद्रे दे बखे शमीन जडा चमडे दा धंधा करणे बाले दे घरे च परोणा है, जालू उनी ओणा, तां उनी तिजो परमेश्वरे दिया तरफा ला इक संदेश दसणा। 33 तां मै झट तेरे बाल लोक भेजे, कने तू खरा किता की जडा तू आई गया। हुण असां सारे ऐथू परमेश्वरे दे सामणे न, ताकि जडा कुछ परमेश्वरे तिजो बोलणे तांई बोलया है, असां उसयो सुणना।” 34 तालू पतरसे मु खोली करी बोलया, हुण मिंजो पक्का यकीन होया, की परमेश्वर कूसदा भी पक्ष नी करदा, 35 हर जातियां च जडा परमेश्वरे ला डरदा है कने धर्म दे कम्म करदा है, उसयो परमेश्वर अपनाई लेंदा है। 36 तुसां उस संदेश जो जाणदे न जडा परमेश्वरे सांझो, मतलब की इस्त्राएल दे लोकां जो भेजया। उनी शान्ति दे बारे च शुभसमाचार सुणाया जडी लोकां जो यीशु मसीह पर भरोसा करणे ला मिली सकदी है। सै सारयां दा प्रभु है। 37 तुहांजो उस बचने दे बारे च पता है, जडा यहून्ना दे बपतिस्मा दे प्रचारे बाद गलीले प्रदेश ला शुरू होईकरी सारे यहूदिया प्रदेशे च फैली गया, 38 तुसां नासरत बासी यीशुए दे बारे च जाणदे न की परमेश्वरे कियां पबित्र आत्मा कने शक्तिया ला उदा अभिषेक किता; सै भलाई करदा कने जिना जो शैताने तंग कितया था, उना सारयां जो ठीक करदा गया, क्योंकि परमेश्वर उदे सोगी

था। 39 कने असां प्रेरितां उना सारियां चीजां दे बारे च लोकां जो दसया, जडियां यीशुए साडे यहूदिया प्रदेशे कने यरूशलेम शेहरे च कितियां, कने यरूशलेम शेहर च यहूदी अगुवां उसयो सूली पर लटकाई करी मारी दिता। 40 पर उसयो परमेश्वरे तिजे रोजे मरयां चे जिन्दा करी दिता, कने उसयो प्रगट भी किता है। 41 सारयां लोकां उसयो नी दिखया, पर उना गबाहां जो जिना जो परमेश्वरे पेहले ही प्रेरित चुणी लिया था, मतलब की सांझो जिना मरयां चे जिन्दा होणे बाद उदे सोगी खादा पीता। 42 कने उनी सांझो हुकम दिता की सारे लोकां जो शुभसमाचार दा प्रचार करा कने गबाई दिया, की यीशु सेई है जिसयो परमेश्वरे जिंदे कने मरयां दा न्याय करणे तांई बणाया है। 43 उदी सारे परमेश्वरे दे संदेश देणेबाले गबाई दिन्दे न की जडा कोई उदे पर भरोसा करगा, उसयो जडा मसीह सूली पर किता उदिया बजा ला ही पापां दी माफी मिलणी है। 44 जालू पतरस ऐ गल्लां बोला दा ही था की सारे बचन सुणने बालयां पर पबित्र आत्मा उतरी आई। 45 कने जितणे भी यहूदी भरोसा करणे बाले पतरसे सोगी आयो थे, सै सारे हेरान होऐ की होरनी जातियां जो भी पबित्र आत्मा दा तोफा दिता है। 46 क्योंकि उना जो भांति-भांति दियां बोलियां कने परमेश्वरे दी बड़ाई करदे सुणाया। इस पर पतरसे बोलया, 47 “क्या इना जो हुण कोई पाणिऐ ला रोकी सकदा है की इना जो बपतिस्मा ना मिल्ले, जिना जो साडे सांई परमेश्वरे दिया तरफा ला पबित्र आत्मा मिलियो है?” 48 कने पतरसे उना जो हुकम दिता जडे लोक कुरनेलियुस दे घरे गठयो थे की यीशु मसीह दे नाऐ ने बपतिस्मा लिया। तालू उना पतरसे ला बिनती किती की थोडे रोज होर रेई जा साडे सोगी कने इस तांई सै कुछ रोजां तांई रेई पिया।

11 प्रेरितां कने चेलयां जडे यहूदिया प्रदेशे च थे, उना सुणाया, की होरनी जातियां भी परमेश्वरे दा बचन मनी लिया है। 2 कने जालू पतरस यरूशलेम शेहर च आया, तां यहूदी विस्वासी उसला शिकायत करणा लग्ये, 3 “तू होर जातियां दे लोकां दे घरे जाई करी उना सोगी रोटी खादी।” 4 तालू पतरसे उना जो शुरू ला सारियां गल्लां सुणाईयां, जडियां ओथू होईयां थियां; 5 “मै याफा शेहरे च प्रार्थना करा दा था, कने बेसुध होईकरी इक दर्शन दिखया, की इक बडिया चादरा सांई कोई चीच चारो कुंणा ला रसियां ला बनूईयो अम्बरे ला धरती पासे उतरी करी मेरे बाल आई। 6 जालू मै उस पर ध्यान दिता, तां मै धरतिया दे चारा पैरां बाले जानवर कने जंगली जानवर कने रेंगणेबाले जीव कने अम्बरे दे पंछी दिखे; 7 कने मै इक अब्राज सुणी जडी मिंजो बोला दी थी की, हे पतरस उठ मार कने खा। 8 मै बोलया, “नी प्रभु जी! क्योंकि कोई अपबित्र या अशुद्ध चीज मेरे मुऐ च कदी नी गई।” 9 इदे जबाब च अम्बरे ला दूजी अब्राज आई, जडा कुछ परमेश्वरे शूद्र बणाया है, उसयो अशुद्ध मत बोल। 10 तिन बरी ऐदिया होया, तालू सारा कुछ अम्बरे पासे दोबारा चली गया। 11 कने झट तिन माणु जडे कैसरिया शेहरे ला मेरे बाल भेजयो थे, सै घरे दे दरबाजे पर आई खडोते, जिस घरे च असां थे। 12 तालू पबित्र आत्मा मिंजो बेझिझक उना सोगी चली जाणे जो बोलया, कने ऐ छे भाई भी मेरे सोगी चली पे, कने असां उस माणुए दे घरे पुज्जी गे। 13 कने उनी दसया, की मै स्वर्गदूते जो अपने घरे खडोतया दिखया, जिनी मिंजो बोलया, याफा शेहर जो इक माणु भेजी करी शमीने जो जिसयो

पतरस बोलदे न, सदी ले। 14 उनी तिजो ने ऐसिया गल्लां बोलणियां न, जिना ने परमेश्वरे तिजो कने तैरे सारे घराने दे लोकां जो बचाणा। 15 जालू मैं गल्लां करणा लग्गा तां पबित्र आत्मा उना पर तियां ही उतरी, जियां शुरू च पिन्तेकुस दे त्योहारे दे बकत सांझो पर उतरियो थी। 16 तालू मिंजो प्रभु दा सै बचन याद आया, जडा उनी बोलया, यूहन्ना तां पाणिऐ ला बपतिस्मा दिता, पर परमेश्वरे तुहाडे सोगी रेणे ताई पबित्र आत्मा जो भेजणा। 17 इस ताई ऐ साफ है की परमेश्वरे उना होर जातियां जो भी सेई दान दिता, जडा सांझो प्रभु यीशु मसीह दे नाऐ पर भरोसा करणे ला मिल्ला, तां मैं कुण था जडा परमेश्वरे जो रोकी सकदा था?" 18 ऐ सुणीकरी, यहूदी विश्वासी चुप रे, कने परमेश्वरे दी बड़ाई करी बोलणा लग्गे, "तां परमेश्वरे होर जातियां जो भी हमेशा दी जिन्दगी अपने बुरे कम्मा जो छडी करी यीशु मसीह पर भरोसा करणे ने दान दिता है।" 19 स्तिफनुसे दे मारे जाणे बाद, केई यीशु मसीह पर भरोसा करणे बालयां यरूशलेम शेहरे जो छडी दिता कने तितर बितर होई गियो थे, सै चलदे-चलदे फीनीके इलाके कने साइप्रस द्वीप कने सीरिया प्रदेशे दे अन्ताकिया शहर च पुज्जे, पर यहूदियां जो छडी करी कुसी होरसी जो परमेश्वरे दा बचन नी सुणांदे थे। 20 पर उना च कुछ विश्वासी साइप्रस बासी कने कुरेनबासी थे, जडे अन्ताकिया शेहरे च आए कने होर जातियां जो भी प्रभु यीशु दे शुभसमाचार दियां गल्लां सुणाणा लग्गे। 21 कने प्रभु दिया शक्तिया दा हथ उना पर था, कने मते लोकां उना दे प्रचार पर भरोसा किता कने प्रभु यीशु मसीह पर भरोसा करणा लग्गी पे। 22 तालू इना होईयां गल्लां दी खबर यरूशलेम शेहरे दिया कलीसिया सुणी, कने उना बरनबास जो अन्ताकिया शहर भेजया। 23 सै ओथु पुज्जी करी, कने परमेश्वरे दे अनुग्रह जो दिखीकरी खुश होया, सारयां जो उपदेश दिता की तन मन लाईकरी प्रभु सोगी लिपटी रिया। 24 बरनबास इक भला माणु था, कने पबित्र आत्मा कने भरोसे ने भरई गिया था, कने होर मते लोकां प्रभु यीशु मसीह पर भरोसा किता। 25 तालू बरनबास अन्ताकिया शहर छडी करी शाऊल जो तोपणे ताई तरसुस शहर जो चली गिया। 26 कने जालू उसने मिल्ला तां उसयो अन्ताकिया शहर जो लेई आया, कने इयां होया की शाऊल कने बरनबास इक साले दीकर कलीसिया सोगी मिलदे कने मते लोकां जो यीशु मसीह दे बारे च सिखांदे रे, कने चेलयां जो सारयां ला पेहले अन्ताकिया शहर च ही मसीही बोलया। 27 उना रोजां च केई भरोसा करणे बाले जडे परमेश्वरे दा संदेश देणेबाले थे, यरूशलेम शहर ला अन्ताकिया शहर जो आए। 28 उना चे अगबुसे नाऐ दे परमेश्वरे दा संदेश देणेबाले खडे होईकरी पबित्र आत्मा दिया प्रेरणा ला ऐ दसया, की सारे संसारे च बडा बड्हा अकाल पोणा है, कने सै अकाल सम्राट क्लौदियुस दे बेले पिया। 29 तालू चेलयां यहूदिया प्रदेश दे मसीह पर भरोसा करणे बालयां ताई अपणी पौच दे साबे ला सहायता देणे दा फेसला किता। 30 कने उना इयां ही किता, कने बरनबास कने शाऊल दे हथे अगुवां बाल कुछ पैसे भेजी दिते।

12 उस बकत हेरोदेस राजे कलीसिया दे कुछ लोकां जो दुख देणे ताई बन्दी बनाई लिया। 2 कने उनी प्रेरित याकुबे जो तलवारा ला मरवाई दिता, जडा प्रेरित यूहन्ना दा भाई था। 3 जालू उनी दिखया, की यहूदी लोक

इसला खुश होंदे न, तां उनी पतरसे जो भी पकडी लिया। सै अखमीरी रोटिया दे त्योहारे दा बकत था। 4 कने राजा हेरोदेसे उसयो पकडी कर जेला च पाई दिता, कने उदी रखबालिया ताई, चार-चार सिपाईयां दे चार दलां दा पेहरा लाइ दिता। कने सै चांदा था की फसह दे त्योहारे बाद लोकां सामणे उदा न्याय करे। 5 पतरसे जो कुछ दिना ताई जेला च रखया, पर कलीसिया उदे ताई मन लाईकरी परमेश्वरे ला प्रार्थना करा दी थी। 6 कने जालू राजा हेरोदेसे उदा न्याय करणे ताई उसयो लोकां सामणे लोणे बाला था, उसला इक रात पेहले पतरस दों सुंगला ला बनूया, दों स्पाईयां दे बिच सुतया था, कने पहरे दार दरबाजे पर जेला दी रखबाली करा दे थे। 7 तां अचानक प्रभु दा इक स्वर्गदूत पतरसे बखे आई खडोता कने उस कोठरी च इक चमकीली लौ होई गई, कने उनी पतरसे दियां पसलिया पर हथ मारी करी उसयो जगाया, कने बोलया, "उठ, जल्दी उठ।" कने उदे हथां ला सुंगल खुली करी पेई गे। 8 तालू स्वर्गदूते उसयो बोलया, "लके बन, कने अपने जुतयां पाई ले।" उनी तियां ही किता, फिरी स्वर्गदूते उसयो बोलया, "अपणे बाहरी कपडे जो पाई करी मेरे पिच्छे चली पो।" 9 सै निकली करी उदे पिच्छे चली पिया, पर सै ऐ नी जाणदा था की जडा कुछ स्वर्गदूत करा दा है, ऐ सचच था, पर सै ऐ समझा दा था की मैं दर्शण दिखा दा है। 10 तालू सै चली करी पेहले कने दुऐ पहरे ला निकली करी उस लोहे दे फाटके पर पुज्जे, जडा शेहरे पासे लेई जांदा था, सै फाटक उना ताई अपु ही खुली गिया, कने सै निकली करी इकी गलिया च होईकरी गे, इतणे च स्वर्गदूत उसयो छडी करी चली गिया। 11 तालू पतरसे होशा च आई करी बोलया, "हुण मिंजो सचच पता लग्गी गिया है, की प्रभुऐ अपणा स्वर्गदूत भेजी करी मिंजो राजा हेरोदेसे दे हथे ला छुड़ाई लिया है, कने यहूदी अगुवां दी सारी आस तोड़ी दिती।" 12 ऐ जाणी करी की परमेश्वरे उसयो बचाई लिया है, तां सै मरियम दे घरे गिया, जडी यूहन्ना दी माता थी, कने उदा दुज्जा ना मरकुस भी था। ओथु मते चेले गिटे होईकरी प्रार्थना करा दे थे। 13 जालू पतरसे बाहरे बाले दरबाजे जो खडकाया तां स्टे नाऐ दी इक दासी सुणने ताई आई। 14 कने पतरसे दी अबाज पछेणी करी, खुशिया दे मारे उना दरबाजा नी खोलया, पर दोड़ी करी अंदर गई, कने दसया की पतरस दरबाजे पर खडोतया है। 15 उना उसा जो बोलया, तू पागल है। पर सै अडी रेई की सै पतरस ही है, तालू उना बोलया, "सै पतरसे दा स्वर्गदूत होणा।" 16 पर पतरस दरबाजा खडकांदा रिया कने उना दरबाजा खोलया, कने उसयो दिखीकरी हेरान होई गे। 17 तालू पतरसे उना जो हथे ला इशारा किता की चुप रिया, कने उनी दसया की प्रभुऐ कियां मिंजो जेला ला कडी लयोंदा है। फिरी बोलया, "याकुब कने भाईयां जो ऐ गल्ल दसी दिनयो।" तालू पतरस निकली करी दुज्जी जगा जो चली गिया। 18 ब्यागा जेला दे सिपाईयां च बडा हल्ला पेई गिया की, पतरस कुथु गिया। 19 जालू राजा हेरोदेसे उसयो तोपणे दा हुकम दिता पर सै तोपी नी सके, तां पहरे दारां ला पछताछ किती कने जालू सै जबाब नी देई सके तां उना जो मारणे दा हुकम देई दिता, कने पतरस यहूदिया प्रदेशे जो छडी करी कैसरिया शेहरे च जाई करी रेंणा लग्गा। 20 राजा हेरोदेस सूर कने सैदा शेहरे दे लोकां ला बडा जादा गुस्सा था। इस ताई उना शेहरां दे लोक राजा हेरोदेस ला मिलणे ताई इक मन होईकरी आये। सारयां ला पेहले,

उना बलास्तुस ला सहायता मंगी जडा राजे दा खास कर्मचारी था। तां उना राजा हेरोदेसे ला शान्ति स्थापना ताई बोलया क्योकि सै अपने खाणे पिणे दियां जुस्तरतां ताई राजे दे देशे पर निर्भर थे। 21 जिस रोजे राजा हेरोदेसे उना शेहरे दे लोकां ने मिलणे दा फेसला किता, उस रोजे सै राज कपडे पाई करी सिहांसने पर बैठा, कने प्रजा जो भाषण देणा लग्गा। 22 कने लोक उदी बड़ाई करणे ताई ऐ बोलणा लग्गे कि, “ऐ तां माणुऐ दी नी, पर कुसी देवते दी अबाज है।” 23 उसी बेले प्रभुऐ दे इकी स्वर्गदूते आई करी राजा हेरोदेस पर बार किता क्योकि उनी परमेश्वरे दी महिमा नी किती कने उदे शरीर च कीड़े पेई गे कने सै मरी गया। 24 पर परमेश्वरे दा बचन फलदा गया कने भरोसा करणे बालयां दी गिणती बददी गई। 25 जालू बरनबास कने शाऊले यहूदिया प्रदेशे च अपनी सेबा दे कम्मे जो पूरा करी लिया तां सै यरूशलेम शेहरे ला अन्ताकिया शेहरे जो मुडी आए। यहून्ना जिसयो मरकुस भी बोलंदे न सै सोगी था।

13 अन्ताकिया शेहरे दिया कलीसिया च परमेश्वरे दा संदेश देणेबाले कने गुरु थे; मतलब की बरनबास कने शमौन जिदा दुज्जा ना निगर भी था; कने लूकियुस कुरेनी शेहर, कने चौथाई देशे दे राज हेरोदेसे दा दूध भाई मनाहेम कने शाऊल। 2 जालू सै बरत रखीकरी प्रभु दी भक्ति करा दे थे, तां पबित्र आत्मा बोलया, “मेरे ताई बरनबास कने शाऊल जो मेरी सेबा करणे ताई लग करा जिदे ताई मैं उना जो सदया है।” 3 तालू उना बरत कने प्राथना करिरी कने उना पर हथ रखीकरी उना जो परमेश्वरे दा कम्म करणे ताई भेजया। 4 शाऊल कने बरनबास पबित्र आत्मा दे जरिये भेजे गे, सै अन्ताकिया शेहर ला सिलुकिया शेहरे दिया बन्दरगाह जो गे, कने ओथु ला जहाजे पर चढ़ी करी साइप्रस टापू दी सलमीस बंदरगाह जो चली गे। 5 सलमीस शेहर च पुज्जी करी, उना परमेश्वरे दा बचन यहूदी जंज घरां च सुणाया, कने यहून्ना जिसयो मरकुस भी बोलंदे थे सै उना दी सहायता करणे ताई उना सोगी था। 6 इदे बाद उना पुरे टापूऐ च इक शेहर ला दुज्जे शेहर दी यात्रा किती कने आखिर च पाफुस शेहरे च पुज्जे। ओथु उना जो बार-यीशु नाऐ दा इक जादूगर मिल्ला जडा यहूदी कने झूठा संदेश देणेबाला था। 7 सै टापूऐ दे राज्यपाल सोगी था, जिदा ना सिरगियुस पौलुस था, कने सै बडा बुद्धिमान माणु था। राज्यपाले बरनबास कने शाऊल जो परमेश्वरे दा बचन सुणने ताई अपने बाल सदया। 8 पर जादूगर बार-यीशु, जिसया युनानी भाषा च एलीमास बोलंदे न, उना दा बिरोध करदा रिया, उदी कोशिश थी की सै राज्यपाल जो यीशु मसीह पर भरोसा करणे ला रोके। 9 तालू शाऊले जिदा ना पौलुस भी है, पबित्र आत्मा ला भर्खी करी जादूगरे पासे इक टक लाईकरी दिखीकरी बोलया, 10 “हे सारे कपट कने चलाकिया ला भस्यो शैताने दी ओलाद, सारिया धार्मिकता दे दुशमण, क्या तू प्रभु दिया सचाइया जो भ्रष्ट करणा नी छडणा? 11 हण दिख, प्रभु तिजो सजा देंगे बाला है, कने तू थोडे बकते ताई अन्ना रेंणा कने तू सूरजे जो नी दिखी सकणा।” तालू झट धुंधलापन कने उदे अग्रे नेहेरा होई गया, कने सै रूआं प्रां टटोलणा लग्गा ताकि कोई उदा हथ पकड़ी करी उदी सहायता करे। 12 तालू राज्यपाले जडा कुछ होया था, दिखीकरी कने प्रभु दियां शिक्षा ला हेरान होईकरी उनी यीशु

मसीह पर भरोसा किता। 13 पौलुस कने उदे साथियां पाफुस शेहरे ला समुंद्री यात्रा शुरू किती कने सै पंपूलिया प्रदेशे दे पिरागा शेहरे च जाई पुज्जे, कने यहून्ना मरकुस उना जो छडी करी यरूशलेम शेहरे जो बापस आई गया। 14 कने पिरागा शेहरे ला अग्रे चली करी गलातिया प्रदेशे दे पिसिदिया जिल्ले दे बखे अन्ताकिया शेहर च पुज्जे; कने सब्ते दे रोजे च यहूदी जंज घर च जाई करी बैठी गे। 15 मूसा दी व्यवस्था कने परमेश्वरे दे संदेश देणेबालयां दी कताबां ला पढने बाद यहूदियों दे जंज घरे दे सरदारां उना जो बोली भेजया, “हे भाईयो, अगर तुसां चे कुसी बाल लोकां जो शिक्षा देंगे ताई तुहाडे मने च कोई बचन है तां बोला।” 16 तालू पौलुस खडा होया कने उना जो हथे ला चुप रेणे दा इशारा करिरी बोलया, “हे इस्राएलियां, कने परमेश्वरे ला डरने बाले होर जाति दे लोको, सुणा।” 17 इना इस्राएली लोकां दे परमेश्वरे साडे पूर्वजां जो चूणी लिया है, कने जालू ऐ मिस्र देशे च परदेसी होईकरी रेंदे थे, तां उना जो गिणतिया च बदाई दिता; कने उना जो अपणिया शक्तिया ला उस देशे ला कडी लांदा। 18 कने सै कोई चालियां साला दीकर सुनसान जगा च उना दी सेहदां रिया, चाहे सै बार-बार परमेश्वरे दे हुकम दे खिलाफ जांदे थे। 19 कने कनान देशे च सत जातियां जो खत्म करिरी उना दा इस्राएली लोकां जो बिरासत च देई दिता। 20 साडे पूर्वजां मिस्र देशे च पुजणे बाद चार सौ पजां सालां बाद कनान देशे पर अधिकार करणा शुरू किता, इदे बाद परमेश्वरे दे संदेश देणेबाले शमूएल दे ओणे दीकर परमेश्वरे इस्राएल दे लोकां पर राज करणे ताई मुखिए नियुक्त किते। 21 जालू शमूएल हले दीकर उना दा अगुवा ही था, उना इक राजा मंगया, तालू परमेश्वरे बिन्यामीन दे गोत्र चे इक माणुऐ जो मतलब की कीश दे पुत्र शाऊले जो उना दा राजा बणाया, उनी चालियां सालां दीकर इस्राएल दे लोकां पर राज किता। 22 फिरी परमेश्वरे शाऊल जो राजे दे पद ला हटाई करी उदिया जगा पर दाऊदे जो उना दा राजा बणाया, जिदे बारे च उनी गवाई दिती, मिंजो इक माणु, यिशै दा पुत्र दाऊद, मेरे मने दिया इच्छा दा माणु मिली गया है। उनी मेरियां सारियां इच्छा पुरियां करणियां। 23 उदे ही बंशे चे परमेश्वरे अपने बायदे दे अनुसार इस्राएले ताई इक उद्धारकर्ता, मतलब की यीशु भेजया। 24 जिदे ओणे ला पेहले यहून्ने प्रचार किता की सारे इस्राएली लोकां जो अपने पापां दा पश्चाताप करणे कने परमेश्वरे पासे फिरणे कने बपतिस्मा लेंगे दी जरूरत है। 25 जालू यहून्ना अपनी सेबा पुरिया करणे पर था, तां उनी बोलया, तुसां मेरे बारे च क्या सोचंदे न? मैं मसीह नी है! दिखा, मेरे बाद इक ओणे बाला है, सै बडा जादा महान है, मैं तां उदे जूतयां दे तस्मे खोलणे दे काबील भी नी है। 26 “हे मसीह भाईयो, तुसां जडे अब्राहमे दी ओलाद न कने परमेश्वरे ला डरणे बाले होर जाति दे लोको, परमेश्वरे साडे बाल यीशु दे बारे च ऐ संदेश भेजया है जडा लोकां जो बचांदा है। 27 यरूशलेम शेहरे दे लोकां कने उदे अगुवां मसीह जो पछेणया नी कने उना परमेश्वरे दे संदेश देणेबालयां दे बचना जो नी समझया जिना जो सै हर सब्ते दे रोजे पढदे थे। इस ताई उना उसयो दोषी बोली करी परमेश्वरे दे संदेश देणेबालयां दे बचना जो पूरा किता। 28 उना जो मौत दी सजा देंगे दे लायक उदे च कोई दोष नी मिल्ला, फिरी भी उना राज्यपाल पिलातुसे ला बिनती किती, की उसयो मारी दे। 29 कने जालू उना सै सब कुछ किता जडा पबित्र

शान्त्र उदे बारे च बोलदा है, तां उदिया लाशा जो सूली ला उतारी करी कबरा च रखया। 30 पर परमेश्वरे उसयो मरयां चे जिन्दा किता, 31 कने जडे चेले यीशुए सोगी गलील प्रदेश ला यरूशलेम शेहरे च आयो थे, उना जो बडे रोजां दीकर मिलदा रिया; सै हुण लोकां सामणे उदे गबाह न। 32 असां तुहांजो उसा प्रतिज्ञा दे बारे च जडी पूर्वजां ला कितियो थी, ऐ शुभसमाचार सुणादे न, 33 की परमेश्वरे यीशुए जो मरयां ला जिन्दा करिरी, साडे सोगी वायदे जो पूरा कितया, जडे उना दी संतान न; जियां दुज्जे भजन सहिता च परमेश्वरे मसीह दे बारे च बोलया है की, तू मेरा पुत्र है, अज ही मैं तेरा पिता बणी गया है। 34 परमेश्वरे यीशुए जो मरयां चे जिन्दा करणे दा बायदा कितया था, कने उसयो कबर च सडना नी दिता, परमेश्वरे ऐ बोलया है, मैं तिजो सै पबित्र कने पक्की आशीष देणी जिना जो देणे दा बायदा मैं राजा दाऊदे जो कितया था।” 35 राजा दाऊदे ऐ गल्ल होर भजन सहिता च भी बोलदा है की, “तू अपने पबित्र जन जो सडना नी देणा।” 36 क्योंकि राजा दाऊद तां परमेश्वरे दिया इच्छा दे अनुसार अपने बकते ने सेबा करिरी मरी गया, कने अपने पूर्वजां बाल जाई रिया, कने सडी भी गया, इसला सांझो पता लगदा है की दाऊद इस भजन च अपने बारे च गल्ल नी करा दा था। 37 पर सै यीशु मसीह दे बारे च बोला दा है जिसयो परमेश्वरे मरयां चे जिन्दा किता, कने सै सडया भी नी। 38 इस ताई, हे यहूदी भाईयो; मैं चांदा है की तुसां ऐ जाणी लिया की यीशु मसीह दे जरिये ही तुहांजो पापां दी माफी मिलदी है। 39 तुसां कदी भी मूसा दिया व्यवस्था दे जरिये परमेश्वरे दिया नजरा च धर्मी नी बणी सकदे। पर हर इक जणा जडा यीशु मसीह पर भरोसा करदा है, सै परमेश्वरे दिया नजरा च धर्मी है। 40 इस ताई ध्यान रखा, की जडा परमेश्वरे दे संदेश देणेबालयां बोलया है, सै तुहाडे सोगी ना हो: 41 हे निंदा करणे बालयो, दिखा, हेरान होआ, कने मिटी जा; क्योंकि मैं तुहाडे दिना च इक कम्म करदा है; ऐसा कम्म, की अगर कोई तुसां ला उदी चर्चा करे, तां तुसां कदी भरोसा नी करणा। 42 जालू पौलुस कने बरनबास यहूदी जंज घरे ला बाहर निकला दे थे, तां लोक उना ला बिनती करणा लगे की, अगले सब्ते दे रोजे ऐ गल्लां सांझो दोबारा सुणानयो। 43 जालू सभा खत्म होई, तां मते यहूदी कने मते होर जातियां दे लोक जडे यहूदी मते चे आयो थे पौलुस कने बरनबासे पिच्छे चली पे, कने उना जो गल्लां करिरी समझाया, की परमेश्वरे दे अनुग्रह च बणी रिया। 44 अगले सब्ते दे रोज शेहरे दे लगभग सारे लोक परमेश्वरे दा बचन सुणने जो गिठे होई गे। 45 पर जालू यहूदी अगुवां बडिया भिडा जो दिखया तां सै प्रेरितां ला जलना लगे, कने पौलुस दे बचना दे बिरोध च बोलया कने उदी बेइजती कीती। 46 तालू पौलुस कने बरनबासे बिना डरयो बोलया, जरूरी था, की परमेश्वरे दा बचन पेहले तुहांजो सुणाया जांदा, पर तुसां उसयो नकारी दिता, कने अपने आपे जो हमेशा दिया जिन्दगिया दे लायक नी समझदे न, तां हुण, असां होरनी जातियां बाल जांणा। (aiōnios g166) 47 क्योंकि प्रभु यीशुए सांझो ऐ हुकम दितया है, “मैं तिजो होरनी जातियां ताई ज्योति बणाया है, तुहांजो संसार च हर जगा लोकां जो दसणा है की मैं कियां उना जो बचाई सकदा है।” 48 ऐ सुणीकरी होर जातियां खुश होइयां, कने सै परमेश्वरे दे बचने दी बडाई करणा लगे, कने जितणे लोक हमेशा दिया जिन्दगिया ताई बणायो थे, उना भरोसा किता।

(aiōnios g166) 49 तालू प्रभु यीशु दा बचन उस इलाके च सारे पासे फेलणा लग्गा। 50 पर यहूदियां दे अगुवां भक्त कने कुलीन जनानिया जो कने शेहरे दे बड़े लोकां जो भडकाया, कने पौलुस कने बरनबास पर हमला करवाई करी उना जो सीमा दे बार कडी दिता। 51 तालू पौलुस कने बरनबासे उना सामणे अपने पैरां दी धुड झाडी, उना जो ऐ दसणे ताई की परमेश्वरे उना जो ठुकराई दितया है कने उना जो सजा देणी। फिरी सै इकुनियुम शेहरे जो चली गे। 52 कने चेले अन्ताकिया शेहरे च आनंद ला कने पबित्र आत्मा ने भरूई गे।

14 इकुनियुम शेहर च ऐसा होया की पौलुस कने बरनबास यहूदी जंज घर च सोगी-सोगी गे, कने ऐसियां प्रभावशाली गल्लां कितियां की, यहूदियां कने होर जातियां दोना के मतयां यीशु पर भरोसा किता। 2 पर भरोसा नी करणे बाले यहूदियां होरनी जातियां दे मन मसीह भाईयां दे खिलाफ च भडकाए, कने उना दे मना च इना दे खिलाफ जहर भरी दिता। 3 कने पौलुस कने बरनबास मते रोजां दीकर ओथु रे, कने प्रभु यीशु दे भरोसे पर हिम्मत ला गल्लां करदे रे: कने प्रभु यीशुए उना जो अदभुत चिन्न चमत्कार करणे दी शक्ति दिती, ऐसा करी के यीशुए ऐ साबित किता की जिस अनुग्रह दे बारे च सै प्रचार करा दे न सै सच्चा है। 4 पर शेहरे दे लोकां च फुट पेई गियो थी, इसला कितणे ही तां यहूदियां पासे, कने कितणे ही प्रेरितां दे पासे होई गे। 5 तालू होर जातियां कने यहूदी लोकां अपने सरदारां सोगी मिली करी उना पर हमला कने पथर मारणे फेसला किता। 6 जालू पौलुस कने बरनबास जो इसा गल्ला दे बारे च पता लग्गी गया, कने सै लुकाउनिया प्रदेशे दे लुब्बा कने दिरबे शेहरां च, कने अखे बखे दे इलाके च नठी गे। 7 पौलुस कने बरनबासे ओथु पुज्जी करी लोकां जो शुभसमाचार सुणाया। 8 लुब्बा शेहर च इक माणु बैठया था, उदे पैर कमजोर थे। सै जन्मे ला ही लगडा था, कने कदी नी चलया था। 9 सै पौलुस जो गल्लां करदे सुंणादा था कने पौलुस दिखया की उनी भरोसा करी लिया है कने सै खरा होई सकदा है। 10 कने जौरे ला बोलया, “अपणे पैरां भार सीधा खडा हो।” तालू सै उछली करी चलणा फिरणा लग्गी पिया। 11 लोकां पौलुस दा ऐ कम्म दिखीकरी लुकाउनिया बोलिया च जौरे ने बोलया, “देवता माणुए दे स्ने च साडे बाल आया है।” 12 कने उना बरनबास जो यूनानी देवता ज्यूस दा ना दिता कने पौलुस जो हिर्मस दा ना दिता, क्योंकि पौलुस मुख्य संदेश देणे बाला था। 13 कने ज्यूस दे उस मंदरे दा पुजारी जडा उना दे शेहरे सामणे था, दांद कने फुलां दे हार फाटके पर लेई आया क्योंकि सै लोकां सोगी बलि चढाणा चांदा था। 14 पर बरनबास कने पौलुस प्रेरितां जालू सुणाया, तां सै बडे परेशान होऐ कने अपने कपडे फाडी दिते, कने भिडा च चली गे, कने पुकारी करी बोलणा लगे, 15 “हे लोको, तुसां क्या करदे न? असां भी तुहाडे सांई दुखे सुख भोगणे बाले माणु न, कने तुहांजो शुभसमाचार सुणादे न, ताकि तुसां इना बेकार दियां चीजां ला लग होईकरी जिंदे परमेश्वरे पासे आई जा, जिनी स्वर्ग कने धरती कने समुंद्रे कने जडा कुछ उना च है बणाया है। 16 उनी होए युगां च सारियां जातियां जो अपने-अपने रस्ते च चलणा दिता। 17 सै हमेशा अपने होणे दा सबूत उना खरियां चीजां ला दिन्दा है जडा सै करदा है, कने अम्बरे ला बरखा कने

फलां बाली रित देईकरी तुहाडे तांई खांणा कने तुहाडे मना जो खुशिया ला भरदा रिया।” 18 ऐ बोली करी भी उना लोकां जो बडी मुशकिला ला रोकया की उना तांई बलिदान मत करा। 19 पर कितणे ही यहदियाँ अन्ताकिया कने इकुनियुम शेहरां ला आई करी लोकां जो अपने पासे करी लिया, कने पौलुसे जो पथरा ने मारया कने उसयो मरया समझीकरी घसीटी करी शेहरे बाहर लेई गे। 20 पर जालू चले उदे चारो पासे आई खडोते, तां सै उठी करी शेहरे जो बापस मुडी गया कने दुऐ रोजे बरनबासे सोगी दिरबे शेहरे जो चली गया। 21 पौलुस कने बरनबास दिरबे शेहरे दे लोकां जो शुभसमाचार सुणई करी कने मते चले बणाई करी। तालू सै लुक्का शेहरे जो बापस चली गे। कने फिरी ओथु ला इकुनियुम शेहरे जो गे, कने फिरी सै पिसिदिया प्रदेश दे अन्ताकिया शेहरे जो गे। 22 कने हर शेहरे च चेलयां दे मना जो मजबूत करदे रे कने ऐ शिक्षा दिन्दे थे, की भरोसे च बणी रिया, कने ऐ बोलदे थे, “सांझो मते दुख झेली करी परमेश्वरे दे राज्य च दाखल होणा पोणा।” 23 कने उना हर इक कलीसिया च उना तांई अगुवे बणाऐ, कने प्राथना कने बरत करिरी उना जो प्रभु जो सोंपया जिदे पर उना भरोसा कितया था। 24 कने पिसिदिया प्रदेश ला होंदे होऐ सै पंफूलिया जिल्ले च जाई पुज्जे; 25 कने उना पंफूलिया जिल्ले दे पिरागा शेहरे च परमेश्वरे दे बचने दा प्रचार किता कने अन्तलिया शेहरे जो आई गे। 26 कने अन्तलिया शेहरे ला जहाजे पर अन्ताकिया शेहर जो मुडी आये, जिथु ला उना जो परमेश्वर दे अनुग्रह च सौपीकरी उस कम्मे तांई भेजया था जिसयो उना जो पूरा किता। 27 अन्ताकिया शेहरे च पुज्जी करी उना कलीसिया गठेरी कने दसया, की परमेश्वरे साडे सोगी होईकरी कदे बहू-बड़े कम्म किते कने कियां परमेश्वरे होर जातियां जो यीशु मसीह पर भरोसा करणे दे काबिल बणाया। 28 ओथु पौलुस कने बरनबास चेलयां सोगी मते रोज रे।

15 कुछ यहूदी मसीह पर भरोसा करणे बाले यहूदिया प्रदेशे ला अन्ताकिया शेहरे जो आऐ कने भरोसा करणे बालयां जो सिखाणा लग्गे: “अगर मूसा दिया व्यवस्था दे रिबाजे ला तुहाडा खतना नी होऐ तां तुहाडा उद्धार नी होई सकदा।” 2 जालू पौलुस कने बरनबास दा उना सोगी झगडा कने बडी बेहस होई तां कलीसिया दे अगुवां पौलुस कने बरनबास जो कने उना सोगी कुछ होर चेलयां जो यरूशलेम शेहरे जो जाणे तांई चुणया, ताकि सै इसा गल्ला दे बारे च प्रेरितां कने कलीसिया दे अगुवां सोगी चर्चा करन। 3 कलीसिया उना जो यात्रा तांई पैसे कने रोटीयां दा इंतजाम कराई करी भेजया, कने सै फीनीक कने सामरिया प्रदेशां ला होंदे होऐ कने ओथु दे भरोसा करणे बालयां जो दसया की होर जातियां दे लोकां कियां अपने पापां जो मन्नी लिया कने गलत कम्मा जो छडी करी यीशु मसीह पर भरोसा किता है। ऐ शुभसमाचार सुणीकरी सारे भरोसा करणे बाले भाई बड़े खुश होऐ। 4 जालू सै यरूशलेम शेहरे च पुज्जे, तां कलीसिया कने प्रेरित कने अगुवे उना सोगी खुशिया ला मिल्ले, कने पौलुस कने बरनबास दसया की परमेश्वरे उना सोगी होईकरी कदे-कदे कम्म किते थे। 5 पर फरीसियां दे दले दे लोकां च जिना भरोसा कितया था, उना च कितण्यां ही उठी करी बोलया, “होर जातियां जो

खतना करणे कने मूसा दी व्यवस्था जो मणने दा हुकम देणा चाईदा।” 6 तालू प्रेरित कने अगुवे इसा गल्ला दे बारे च बिचार करणे तांई गिठे होऐ। 7 तालू पतरसे बडी लम्बी बेहस होई जाणे बाद खडोई करी उना जो बोलया, “हे मसीह भाईयो, तुसां जाणदे न, कि मते रोज होऐ न, की परमेश्वरे तुसां चे मिंजो चुणी लिया है, ताकि मेरे जरिये होर जातियां शुभसमाचार दा बचन सुणीकरी भरोसा करन।” 8 कने मने जो जाणने बाले परमेश्वरे उना जो भी साडे सांई पबित्र आत्मा दिता, इयां करिके उनी दसया की उनी होर जातियां जो अपने लोक होणे तांई चुणी लिया है। 9 कने भरोसे दे जरिये उना दे मन शुद्ध करिरी सांझो च कने उना च कोई भी फरक नी रखया। 10 तां हण तुसां कजो परमेश्वरे जो परखदे न, की साड़ी यहूदी व्यवस्था कने रिती रिबाजां जो मणने तांई इना होर जातियां दे भरोसा करणे बालयां पर भारी बोज पान, जिसयो ना साडे बाप दादे चुकी सकदे थे कने ना असां चुकी सकदे न। 11 इयां करणा ठीक नी है, साडा भरोसा तां ऐ है कि जियां उना जो प्रभु यीशुऐ दे अनुग्रह ला उद्धार मिलणा, तियां ही सांझो भी मिलणा, ना की मूसा दिया व्यवस्था जो मन्नी करी। 12 तालू सारी सभा चुपचाप होईकरी बरनबास कने पौलुस दी सुणना लग्गी, जियां ही उना अदभुत चिन्त चमत्कारां दे बारे दसया जडे परमेश्वरे उना दे जरिये होर जातियां च किते। 13 जालू उना बोलणा बंद किता, तां याकूब बोलणा लग्गा, “हे मसीह भाईयो, मेरी सुंणा।” 14 शमौन पतरसे समझाया, कि परमेश्वरे पेहली बरी होर जातियां च कुछ लोकां जो अपने लोक होणे तांई चुणी करी उना जो आशीष दिती। 15 कने होर जातियां दा परमेश्वरे दे लोक बणना ऐ उसा गल्ला ला सहमत होंदा है, जिदे बारे च परमेश्वरे दे संदेश देणेबालयां पबित्र शास्त्र च बडे पेहले लिखया था। 16 “तालू मै बापस ओणा कने दाऊद दे राज्य जो दुबारा बणाणा जडा उदे दुशमणा वरबाद करी दितया है, कने उसयो दुबारा बणाई देणा। 17 इस तांई होर सारे लोक कने सारियां होर जातियां दे लोक जिना जो मै अपने लोक होणे तांई चुणया है, उना प्रभु जो तोपणा, 18 ऐ सेई प्रभु बोलदा है जडा बडे पेहले ला इना गल्लां दा समाचार दिन्दा आया है। (aiōn g165) 19 इस तांई मेरा बिचार ऐ है, कि सांझो होर जातियां तांई परमेश्वरे बाल मुडना कठिन नी बणाणा चाईदा; 20 पर असां उना जो इक चिट्ठी लिखी भेजन, की सै उस खाणे जो ना खान जिसयो लोकां मूर्तियां जो चढाया हो, कने ना व्यभिचार करदे कने ना ही गल्लां घोटी करी मारयो जानवरां दा माँस खांदे कने ना ही खून खांदे। 21 क्योंकि पूराणे बक्ते ला शेहरे-शेहरे च मूसा दिया इस व्यवस्था दे प्रचार करणे बाले होंदे आये न, कने सै हर सब्दे दे रोजे यहूदी जंज घरां च पढी जांदी है।” 22 तालू यरूशलेम शेहरे दिया सारिया कलीसिया कने प्रेरितां कने अगुवां जो ऐ खरा लग्गा, कि अपने चे कुछ माणुआं जो चुणी करी पौलुस कने बरनबासे सोगी अन्ताकिया शेहरे जो भेजन, उना इस तांई यहूदा जो, जिसयो बरअब्बा भी बोलदे न, कने सीलास जो चुणया, कने ऐ दोनो कलीसिया च सारयां ला इज्जतदार अगुवे थे। 23 कने सै इसा चिट्ठिया जो अपने सोगी लेई गे जिसा च लिखया था की, “ऐ चिट्ठी प्रेरितां कने अगुवां दिया तरफा ला है जडे तुहाडे भाई न, असां अन्ताकिया शेहरे दे कने सीरिया कने किलिकिया प्रदेशां दे होर जातियां दे लोकां जो जडे यीशु मसीह पर भरोसा करदे न, उना जो

नमस्ते भेजदे न। 24 असां सुणाया है कि, साडे ऐथु यस्शलेम ला कुछ अगुवे ओथु गे कने उना दियां गल्लां ला तुहांजो बुरा लग्गा कने तुसां दुखी होऐ, पर असां उना जो हुकम नी दितया था। 25 इस ताई असां इक मन होईकरी यहदा कने सीलास जो चुणने दा फेसला लिया, ताकि उना जो अपने प्यारे भाई बरनबास कने पौलुसे सोगी तुहाडे बाल भेजन। 26 ऐ तां ऐसे माणु न, जिना अपने प्राण साडे यीशु मसीह दी सेवा ताई खतरे च पायो न। 27 कने असां यहदा कने सीलास जो भेजया है, जिना तुहाडे सामणे अपने मुऐ ला ऐ गल्लां दस्सी देणियां न। 28 पबित्र आत्मा जो कने सांझो भी ऐ ठीक लग्गा कि इना जस्सी गल्लां जो छडी करी, तुहांजो पर होर बोझ ना पान; 29 कि तुसां मूर्तियां अग्रे चढायो खाणे जो मत खांदे, कने व्यभिचार कने गला घोटी करी मारयो जानवरां दा माँस कने उना दा खून मत खांदे। अगर तुसां इना ला दू रेगे तां तुहाडा भला होणा। शुभकामना।” 30 फिरी कलीसिया उना जो ओथु ला भेजी दिता कने अन्ताकिया शेहरे च पुज्जे, कने सभा जो गठेरी करी उना जो चिड़ी देई दिती। 31 कने सै उस उपदेशे जो पढी करी बडे खुश होऐ। 32 कने यहदा कने सीलासे जडे अपु भी परमेश्वरे दे संदेश देणेवाले थे, मतियां गल्लां ला भरोसा करणे बाले भाईयां जो शिक्षा देईकरी प्रोत्साहित कने मजबूत किता। 33 (यहदा कने सीलास थोडे हफ्ते ओथु रे, कने मसीह भाईयां उना जो शांति दी आशीष देईकरी यस्शलेम शेहरे दिया कलीसिया च बापस भेजी दिता।) 34 पर सीलासे अन्ताकिया शहरे च रेणे दा फेसला किता, इस ताई यहदा किल्ला ही यस्शलेम शेहरे जो बापस चली गया। 35 कने पौलुस कने बरनबास अन्ताकिया शेहरे च रेई पे, कने होर मते लोकां सोगी प्रभु यीशु दे बचना दी शिक्षा कने शुभसमाचार सुणंदे रे। 36 थोडे बकत बाद पौलुसे बरनबासे जो बोलया, “जिना-जिना शेहरां च असां प्रभु दे बचन सुणायो थे, ओआ, ओथु बापस जाई करी अपने विश्वासी भाईयां जो दिखदे न कि सै कदे न।” 37 तालू बरनबासे यूहन्ना जो जिसयो मरकुस बोलंदे न, सोगी लेई जाणे दा बिचार किता। 38 पर पौलुसे बोलया यहन्ने हार मन्नी लियो है कने सांझो छडी करी चली गया है जालू असां पंफूलिया इलाके च थे, इस ताई उसयो सोगी लेई जाणा खरा नी समझया। 39 ऐसी बेहस होई कि पौलुस कने बरनबास इकी दुज्जे ला लग होई गे, कने बरनबास, मरकुस जो लेईकरी जहाजे पर साइप्रस टापु जो चली गया। 40 पर पौलुसे सीलास जो चूणी लिया, कने मसीह भाईयां उना जो परमेश्वरे दे अनुग्रह च सौपी दिता कने फिरी सै दोनो ओथु ला अन्ताकिया शेहरे ला चली गया। 41 कने फिरी सै पुरे सीरिया कने किलिकिया प्रदेशां च गे कने कलिसियां दे भरोसा करणे बालयां जो प्रोत्साहित करदे गे।

16 फिरी पौलुस दिखे कने लुब्बा शेहरे च भी गे, कने ओथु तीमुथियुस नाऐ दा इक चेला था। उदी माता यहूदी विश्वासी थी, पर उदा पिता यूनान देशे दा था। 2 सै लुब्बा इकुनियुम शेहरां दे भरोसा करणे बाले भाईयां चे इज्जतदार था। 3 पौलुसे दी इच्छा थी कि तीमुथियुस उदे सोगी चले, कने उनी तीमुथियुस दा खतना इस ताई करया ताकि उस जगा दे यहूदी लोक उदी सुणन, क्योंकि सै सारे जाणदे थे, कि उदा पिता यूनानी था। 4 पौलुस कने उदे सोगी शेहरे-शेहरे जाई करी सै उना नियमां जो जडियां यस्शलेम शेहरे दे

प्रेरितां कने अगुवां बणाईयां थियां, उना जो विश्वासियां बाल पुजांदे थे ताकि सै उना नियम दा पालन करन। 5 इयां कलीसिया भरोसे च मजबूत होंदी गई कने हर रोज गिणतिया च बददी गई। 6 कने सै फ्रुगिया कने गलातिया प्रदेशां चे होईकरी गे, क्योंकि पबित्र आत्मा उना जो आसिया प्रदेशे च बचन सुणाणे ताई मना किता। 7 कने उना मूसिया प्रदेशे दे बखे पुज्जी करी, बिर्तुनिया प्रदेश जाणा चांदे थे; पर यीशुऐ दिया आत्मा उना जो जाणा नी दिता। 8 तां सै मूसिया प्रदेशे ला होईकरी बंदरगाह बाले शहर त्रोआस जो आए। 9 ओथु पौलुसे राती इक दर्शण दिखया कि इक मकिदुनी प्रदेशे दा मर्द खडोटया, कने उसला बिनती करी के बोलदा है, “समुन्द्रे पार उतरी करी मकिदुनिया प्रदेश च आ, कने साडी सहायता कर।” 10 जालू पौलुसे ऐ दर्शण दिखया, तालू असां झट मकिदुनिया प्रदेशे जो जाणे दी योजना बणाई, ऐ समझीकरी कि परमेश्वरे सांझो शुभसमाचार सुणाणे ताई सदया है। 11 इस ताई असां त्रोआस शेहरे ला जहाजे जरिये सुमानाके टापु च आए कने दुज्जे रोजे नियापुलिस शेहरे दिया बंदरगाह च आये। 12 ओथु ला असां फिलिप्पी शेहरे च पुज्जे, जड्डा मकिदुनिया प्रदेशे दा मुख्य शहर, कने रोमियां दी बस्ती है, कने असां उस शेहरे च थोडे रोजां दीकर रे। 13 सब्ते दे रोजे असां शेहरे दे फाटके बाहर खड्डा बखे ऐ सोची करी गे कि ओथु यहूदियों दी प्राथना करणे दी जगा होणी, कने बेईकरी उना जनानिया ने गल्लां करणा लग्गे, जडियां ओथु गठुइयां थियां। 14 कने ओथु इक लुदिया नाऐ दी जनानी उना दे बचन सुणा दी थी जड्डी थुआतीरा शेहरे ला बैजणी कपडे बेचदी थी, सै परमेश्वरे दी भक्त थी, कने परमेश्वरे उसा दा मन खोलया, ताकि सै पौलुसे दियां गल्लां पर ध्यान लगाऐ। 15 कने जालू उना अपने पुरे टब्बरे समेत बपतिस्मा लिया, तां उना बिनती किती, “अगर तुसां मिंजो परमेश्वरे पर भरोसा करणे बाली समझदे न, तां मेरे घरे रेंणा चला,” “कने सै सांझो मनाई करी अपने घरे लेई गई।” 16 इक रोज जालू असां प्राथना करणे बालिया जगा जो चलयो थे, तां सांझो इक दासी मिली, जिसा च इक ऐसी बुरी आत्मा थी, जिदिया सहायता ला सै भविष्य दिखी लेंदी थी, कने सै अपने स्वामियां ताई मतां कुछ कमाई लेंदी थी। 17 सै पौलुसे कने साडे पिच्छे आई करी चिलाणा लगी, “ऐ माणु परम प्रधान परमेश्वरे दा दास है, सै तुसां जो दसा दे न कि कियां बची सकदे न।” 18 सै मते रोजां दीकर इयां ही करदी रेई, कने पौलुस दुखी होई गया, कने मुडी करी बुरी आत्मा जो बोलया, “मै तिजो यीशु मसीह दे नाऐ ने हुकम दिन्दा है, कि इसा चे निकली जा, कने सै तालू ही निकली गई।” 19 जालू उसा दे मालिके दिखया कि, साडिया कमाईया दी आस तां चली गई, तां सै पौलुस कने सीलासे जो पकडी करी चौके च प्रधान बाल खिची लेई गे। 20 कने उना जो फौजदारिया दे हाकिमा बाल लेईजाई करी बोलया, “ऐ लोक जडे यहूदी न, साडे शेहरे च बडा हंगामा करा दे न, 21 कने ऐसे तरीके दसा दे न, जिना जो अपनाणा कने मनणा रोम देश च रेणे बालयां ताई ठीक नी है।” 22 तालू लोकां दी भीड पौलुस कने सीलासे दे बरोध च गिठी होईकरी चडी आई, कने हाकिमा उना दे कपडे फाडी करी उतारी दिते, कने उना जो डंडे मारणे दा हुकम दिता। 23 कने मते डंडे मारी करी उना जो जेला च पाई दिता, कने जेल अधिकारिये जो हुकम दिता कि साबधानी ला उना दी रखवाली

करा। 24 कने ऐसा हुकम मिलणे ला उनी उना जो अंदरे बालिया कोठढिया च रखया कने उना दे पैरां जो लकडिया दियां बेडियां ला जकडीं दिता। 25 लगबग अधिया राती पौलुस कने सीलास प्राथना करदे होए परमेश्वरे दे भजन गा दे थे, कने कैदी उना दी सुंगा दे थे। 26 कने इतणे च अचानक इक बडा बडा हिलण होया; ऐथू दीकर कि जेला दियां नियां भी हिलीं गिईयां, झट सारे दरबाजे खुलीं गे, कने सारयां दे बंधन खुलीं गे। 27 कने दरोगा उठी होया, कने जेला दे दरबाजे खुले दिखीकरी समझया कि सारे कैदी नठी गियो न, कने सै तलबारा कडी करी अपने आपे जो मारणा लग्गा। 28 पर पौलुसे जोंरे ने पुकारी करी बोलया, “अपणे आपे जो कुछ मत करदा, क्योंकि असां सारे ऐथू ही न।” 29 तालू सै दिय्या मंगाई करी अंदरे गिया कने कमदा होया पौलुसे कने सीलासे अगो पेई गिया, 30 कने उना जो बार आंणी करी बोलया, “हे सजनों, उद्धार पाणे तांई मै क्या करे?” 31 उना बोलया, “प्रभु यीशु पर भरोसा कर, तां तेरा कने तेरे घराने दा उद्धार होणा।” 32 कने उना उसयो कने उदे सारे घरे दे लोकां जो प्रभु दे बचन सुणाए। 33 कने राती उसी बेले उना जो लेईजाई करी उना दे जखम धोते, कने उनी कने उदे लोकां उसी बेले बपतिस्मा लिया। 34 कने उनी उना जो अपने घरे लेईजाई करी, उना अगो खांणा रखया, कने सारे घराने समेत परमेश्वरे पर भरोसा करिरी खुशी मनाई। 35 जालू अगलिया ब्यागा हकीमा सिपाईयां जो ऐ बोली भेजया कि उना माणुए जो छडी दिया। 36 दरोगे ऐ गल्ल पौलुसे जो सुणाई, “कि हाकिमा तुहांजो छडी देंगे दा हुकम भेजीं दितया है, इस तांई हुण निकली करी शांतिया ने चली जा।” 37 पर पौलुसे उना जो बोलया, “उना सांझो जडे रोम देश च रेणेबाले माणु न, बिना दोष साबित कितयो सांझो लोकां दे सामणे मारया कने जेला च पाया, कने हुण क्या सै चुपचाप बाहर निकाली देणा चांदे न? ऐसा नी होणा, पर सै अपु आई करी सांझो बार लेई जान।” 38 सिपाईयां ऐ गल्लां हाकिमा ने बोली दीतियां, कने सै ऐ सुणीकरी की सै रोम देशे दे नागरिक न, सै डरी गे, 39 कने आई करी उना ला माफी मंगी कने बार लेईजाई करी बिनती किती कि शेहरे ला चली जा। 40 सै जेला ला निकली करी लुदिया दे ऐथू गे, कने चेलयां ला मिली करी उना जो शांति दिती, कने चली गे।

17 फिरी पौलुस कने सीलास अम्फिपुलिस शेहर कने अपुल्लोनिया शेहरे ला होईकरी थिस्सलुनीके शेहरे च आए, जिथू यहूदी जंज घर था। 2 कने पौलुस रोजे सांई उना बाल गिया, कने तिन सब्तां दे रोजां पर पबित्र शाब्बां ला उना सोगी चर्चा किती। 3 कने उना गल्लां दा मतलब खोली-खोली करी समझांदा था कि मसीह जो दुख होणा, कने मरयां च जिन्दा होणा जरूरी था; “ऐई यीशु जिंदे बारे च मै प्रचार करता है, सेई मसिहा है।” 4 उना चे कुछ यहूदियां, कने परमेश्वर दा डर मनणे बाले यूनानियां कने मतियां खास जनानिया भरोसा उना दे बचना पर भरोसा करी लिया, कने पौलुसे कने सीलासे सोगी जुडी गे। 5 पर यहूदियां जलना ने भरई करी बजारू लोकां चे केई बुरे माणुए जो अपने सोगी लेई लिया, कने भीड़ लगाई करी शेहरे च दंगे करणा लग्गे, कने उना यासोने दे घरे पर हमला किता, सै पौलुस कने सीलासे जो लोकां दे सामणे लोणा चांदे थे। 6 कने सै उना जो नी मिल्ले, कने सै चिलांदे होए यासोन कने उदे कुछ मसीह भाईयां जो शेहरे दे हाकिमा सामणे

खिची लेई आये, “ऐ लोक जिना सारियां जगा च परेशानी पाईयो है, ऐथू भी आयो न।” 7 कने यासोने उना दा अपने घरे च स्वागत किता, कने ऐ सारे महाराजा कैसरे दे हुकमा दा बिरोध करदे न कने बोलदे न कि इक होर राजा है जिदा ना यीशु है। 8 जालू लोकां कने शेहरे दे हाकिमा ऐ गल्लां सुणियां तां सै परेशान होई गे। 9 कने उना यासोन कने बाकी लोकां जो जमानता पर छडीं दिता। 10 चेलयां झट रातो रात पौलुस कने सीलास जो बिरिया शेहरे च भेजीं दिता, कने सै ओथु पुज्जी करी यहूदी जंज घर च गे। 11 ऐ लोक तां थिस्सलुनीके शेहरे दे यहूदियां लोकां ला खुले दिले दे थे कने उना बडिया लालसा ला बचन जो अपनाया कने रोज पबित्र शाब्बां च इना गल्लां जो तोपदे रेंदे कि ऐ गल्लां ऐसियां हेन कि नी न। 12 इस तांई उना चे मतयां, कने यूनान देशां दियां इज्जतदार जनानिया चे कने मर्दां चे मतयां भरोसा किता। 13 पर जालू थिस्सलुनीके शेहरे दे यहूदियां जो पता चला कि पौलुस बिरिया शेहरे च भी परमेश्वरे दा बचन सुणा दे है, तां सै ओथु आई करी भी लोकां जो भडकाणा कने हंगामा करणा लग्गे। 14 तालू चेलयां झट पौलुसे जो ओथु ला भेजीं दिता कि तू समुंद्रे कंडे चली जा; पर सीलास कने तीमुथियुस बिरिया शेहरे च ही रेंदे गे। 15 सै लोक जडे पौलुसे जो लेई चलयो थे, सै उस सोगी एथेंस शेहरे दीकर गे, पर पौलुस दे इसी हुकमे सोगी सै बिरिया शेहरे जो मुडीं गे कि सीलास कने तीमुथियुस जो झट ही उदे बाल भेजीं दिया। 16 जालू पौलुस एथेंस शेहरे च उना दा इंतजार करा दा था, तां शेहरे जो मूर्तियां ला भुम्या दिखीकरी उदा मन बडा दुखी होया। 17 इस तांई सै हर सब्त दे दिन यहूदी जंज घरे च यहूदियां कने परमेश्वर दा डर मनणे बाले होर जाति दे लोकां सोगी बाद-बिबाद करदा कने चौंका पर जडे भी लोक मिलेदे थे, उना ला हर रोज चर्चा करदा था। 18 तालू सै गुरू जडे इपिक्री कने स्तोईकी करी के जाणे जांदे थे, इना चे कुछ उसला बेहस करणा लग्गे, कने केईयां बोलया, ऐ बकवास करणे बाला क्या बोलणा चांदा है? पर दुजयां बोलया, ऐ कुसी होरसी देशे दे देवतयां दा प्रचारक लग्गा दा है, क्योंकि सै यीशु दा कने मरयां चे जिन्दा होणे दा शुभसमाचार सुणादां था। 19 तालू सै उसयो अपने सोगी अरियुपगुस नाये दे यहूदी महासभा जो लेई गे कने पुछया, “क्या असां जाणीं सकंदे न, कि ऐ जडी नोई शिक्षा तू सिखा दा है, सै क्या है? 20 क्योंकि तू सांझो अनोखियां गल्लां सुणादा है, इस तांई असां जाणना चांदे न की इना सारियां गल्लां दा क्या मतलब है?” 21 इस तांई की सारे एथेंस शेहरे दे बासी कने परदेसी जडे ओथू रेंदे थे, नोईयां-नोईयां गल्लां बोलणे कने सुणने दे सिवा होर कुसी कम्मे च बकत नी बितांदे थे। 22 तालू पौलुसे अरियुपगुस नाये दी सभा दे बिच खडोई करी बोलया, हे एथेंस शेहरे दे लोको, मै दिखा दा है कि तुसां हर गल्ला च देवतयां जो बडा मंदे न। 23 क्योंकि मै गुमदे होए तुहाडियां अराधना करणे बालियां चीजां जो दिखा दा था, तां इक ऐसी वेदी भी मिली, जिसा पर लिखया था, “अनजाणे ईश्वरे तांई।” इस तांई तां जिसयो तुसां बिना जाणयो अराधना करदे न, मै तुसां जो उदा समाचार सुणादा है। 24 जिनी परमेश्वरे धरतिया कने उदियां सारियां चीजा जो बणाया है, सै स्वर्ग कने धरतिया दा मालिक होईकरी हथे ला बणायो मंदरा च नी रेंदा है। 25 ना ही कुसी चिजा दिया जुस्सता दिया बजा ला उसयो माणुए दिया सहायता दी

जस्तरत नी है, क्योंकि सै तां अपु ही सारयां जो जिन्दगी कने सारयां प्राणियां जो सांस कने सब कुछ दिन्दा है जडा उना जो जस्तरत है। 26 उनी शुरू च इक ही माणुऐ ला सारे माणुआं दियां सारियां जातियां सारिया धरतिया पर रेणे ताई बणाईयां न; कने उनी माणुऐ जो जिणे ताई उना दी उमर कने उना दिया जगा जो तय कितया, 27 परमेस्वरे इस ताई किता ताकि लोक उसयो तोपन, कने होई सकदा है। सै उना जो तोपदे-तोपदे मिली जाए, असल च सै सांझो ला कुसी ला भी दूर नी है। 28 क्योंकि सै सेई है जडा साडे जिणे कने चलणे-फिरणे दी बजा बणदा है कने सै बणादां है जडे असां असल च हेन; कने ठीक तियां ही जदिया तुहाडे कवियां बोलया भी है, “असां तां उदे ही वंश भी न।” 29 इस ताई परमेस्वरे दी ओलाद होईकरी सांझो ऐ समझणा ठीक नी कि परमेस्वर, सोने या चांदी या पथरे सांई है, जडे माणुऐ दिया सोचा कने कारिगिरिया ला बणायो न। 30 इस ताई परमेस्वरे लोका दिया अज्ञानता दे युगां उपर ध्यान नी दिता, पर हुण हर जगा सारे माणुआं जो, अपने पापां जो मन्नी करी कने गलत कम्मा जो छडी देणे दा हुकम दिन्दा है। 31 क्योंकि उनी इक दिन तय कितया है, जिदे च उनी उस माणुऐ जरिये धार्मिकता ला संसारे दा न्याय करणा है, जिसयो उनी नियुक्त कितया है, कने उसयो मरयां चे जिन्दा करी के, इसा गल्ला दा सबूत सारयां लोकां जो देई दितया है। 32 कितणे ही लोक उस बकत मजाक उडाणा लग्गे, जालू उनी मरयां चे जिन्दे होणे दी गल्ल बोली, पर कितणे ही बोलणा लग्गे, “ऐ गल्लां असां तिजो ला फिरी कदी सुणगे।” 33 ऐ सुणी करी पौलुस उना दे बीचे ला चली गया। 34 पर कुछ लोक उस सोगी मिली गे, कने प्रभु पर भरोसा किता; जिना च दियुनसियस जडा अरियुपगुस दा सदस्य था, कने दमरिस नाऐ दी इक जनानी थी, कने उना सोगी होर भी कुछ लोक थे।

18 इदे बाद पौलुस एथेंस शेहरे जो छडी करी कुरिन्थुस शेहरे जो आया। 2 कने ओथु उसयो अक्विला नाए दा इक यहदी मिल्ला, जिदा जन्म पुन्तुस प्रदेश च होया था; कने अपनी घरे बाली प्रिस्किल्ला सोगी इतालिया प्रदेश ला थोडे बकत पेहले ही आया था, क्योंकि महाराजा क्लौडियुसे सारे यहदियां जो रोम देशे ला निकली जाणे दा हुकम दितया था, उसी हुकमे दिया वजा ला सै कुरिन्थुस शेहरे जो आये। 3 पौलुस उना ला मिलणा गया। पौलुस कने अक्विला दा इक ही कारोबार था; इस ताई तां सै उना सोगी रेईकरी कम्म करणा लग्गा, सै दोनों तम्बू बणाणे बाले थे। 4 कने पौलुस हर सब्ते दे रोजे यहदी जंज घर च चर्चा करिरी यहदियां कने यूनानियां जो भी यीशु मसीह पर भरोसा करणे ताई समझांदा था। 5 जालू सीलास कने तीमुथियुस मकिदुनिया प्रदेशे ला आये, तां पौलुसे तम्बूआं बणाणे दा कम्म छडी दिता कने अपना सारा बकत बचन सुणाणे च कने यहदियां जो गबाई देणे च लाई दिता कि यीशु ही मसीहा है। 6 पर जालू यहदी पौलुस दी बेइज्जती कने बिरोध करणा लग्गे, तां उनी अपने कपड़यां दी धूड झाडी करी ऐ दसया की परमेस्वरे उना ला खुश नी है कने बोलया, “परमेस्वरे दे संदेश जो नी मन्णे दिया बजा ला तुसां अपु ही उसा सजा ताई जिम्मेबार न, जडा तुसां जो परमेस्वर दी तरफा ला मिलणी है। मैं निर्दोष है। हुणे ला मैं होर जातियां बाल जाणा कने उना जो परमेस्वरे दे संदेश दा प्रचार करणा।” 7 कने पौलुस होर

जाति दे लोकां जो बचन दी शिक्षा देणे ताई यहदियां दे जंज घरे ला चली करी तितुस युस्तुस नाऐ दे इक होर जाति दे माणुऐ दे घरे होर जातियां दे लोकां जो बचन दी शिक्षा देणा आया, कने सै माणु परमेस्वरे दी आराधना करदा था, कने उदा घर यहदी जंज घरे ला नेडे ही था। 8 तालू यहदियों दे जंज घरे दे सरदार क्रिस्पुसे अपने सारे परिवारे समेत प्रभुऐ पर भरोसा किता; कने मतयां कुरिन्थुस शेहरे च रेणे बालयां लोकां पौलुसे जो सुणीकरी भरोसा किता कने बपतिस्मा लिया। 9 कने प्रभुऐ राती जो दर्शन देईकरी पौलुसे ने बोलया, “डर मत, बोली जा चुप मत रे; 10 क्योंकि मैं तेरे सोगी है, कने कोई तिजो पर हमला करी कि तेरा नुक्सान नी करी सकदा है, क्योंकि इस शेहरे च मते ऐसे लोक न जडे मेरे लोक न।” 11 ताई तां पौलुस ओथु डेढ सालां दीकर परमेस्वरे दा बचन सिखांदा रिया। 12 जालू गल्लियो अखाया प्रदेशे दा हाकिम था तां यहदी लोकां गिटे होईकरी पौलुसे दे खिलाफ खडे होई गे, कने उसयो कचेरी च लेई गे कने बोलणा लग्गे, 13 “कि परमेस्वरे दी भक्ति ऐसिया रितिया ला करा, जडा व्यवस्था ला बिलकुल उल्टा है।” 14 जालू पौलुस बोलणा ही लग्गा, तालू ही गल्लिया यहदियां ला बोलया, “हे यहदियों, अगर ऐ कोई अन्याय या बुराईया दी गल्ल होंदी तां ठीक था कि मैं तुहाडी सुणदा। 15 पर अगर ऐ बाद-बिबाद अखरां कने ना दा है, कने तुहाडे यहदी दी व्यवस्था दे बारे च है, तां तुसां ही जाणा; क्योंकि मैं इसा गल्लां दा न्यायी नी बणना चांदा।” 16 कने गल्लियो हुकम दिता कि सै उना जो कडी दे कने उनी उना जो कचेरिया ला कडी दिता। 17 तालू सारे लोकां यहदियों दे जंज घरे दे सरदार सोस्थिनेस जो पकडी करी कचेरिया सामणे ही मारणा शुरू करी दिता। पर गल्लिया इसा गल्ला दी कोई भी चिंता नी किती। 18 पौलुस मते रोजां दीकर कुरिन्थुस शेहरे च रिया, फिरी मसीह भाईयां ला विदा लेईकरी किछिया शेहरे दिया बंदरगाह च जहाज तोपणे ताई चली गया। कने उसी शेहरे च पौलुसे अपना मुंडन कराई लिया, क्योंकि उनी इक सुखण सुखियो थी। बादे च सै पाणिये दे जहाजे ला सीरिया प्रदेश जो चली गया। उदे सोगी प्रिस्किल्ला कने अक्विला भी थे। 19 कने सै इफिसुस शेहरे च आये कने पौलुसे प्रिस्किल्ला कने अक्विला जो ओथु ही छडी दिता। कने अपु इफिसुस शेहरे दे यहदी जंज घर च जाई करी यहदियां ने बाद-बिबाद करणा लग्गा। 20 उना उसला बिनती किती की, “साडे सोगी थोडे रोज होर रेई ले।” पर सै नी मनया; 21 पर पौलुस उना ला ऐ बोली करी विदा होया की, “अगर परमेस्वरे चाया तां मैं तुहाडे बाल फिरी ओंगा।” तालू सै इफिसुस शेहरे ला जहाजे पर चडी करी चली गया; 22 कने सै कैसरिया शेहरे च उतरी करी यरूशलेम शेहरे जो गया कने ओथु सै कलीसिया दे लोकां ला मिली करी अन्ताकिया शेहरे च आया। 23 फिरी थोडे हफ्ते ओथु रेईकरी अन्ताकिया शेहरे ला चली गया, कने गलातिया कने फ्रूगिया इलाकयां ला जांदे बेले ओथु दे सारे चेलयां जो मजबूत करदा गया। 24 अपुल्लोस नाऐ दा इक यहदी जिसदा जन्म सिकंदरिया शेहरे च होया था, सै बडा अकला बाला माणु था कने पबित्र शास्त्रां जो ढंगे ने जाणदा था, सै इफिसुस च आया। 25 उनी प्रभु दे रस्ते दी शिक्षा लियो थी, कने मन लाईकरी यीशुऐ दे बारे च सुणदा कने सिखांदा था, पर सै सिर्फ यूहन्ना दे बपतिस्मे दी गल्ल जाणदा था।

26 सै यहूदी जंज घरां च बिना डरयो बोलणा लग्गा, जालू प्रिस्किल्ला कने अक्विला उदियां गल्लां सुणीकरी, तां उना उसयो अपने घरयो सदया कने परमेश्वरे दा रस्ता उसयो होर भी ढंगे ला दसया। 27 कने जालू अपुल्लोस अखाया प्रदेशे जो जाणा चांदा था, तां मसीह भाईयां उसयो प्रोत्साहित करिरी चेलयां जो लिखया कि सै उसला अच्छे ला मिलन, कने उनी ओथु पुज्जी करी उना लोकां दी बडी सहायता किती जिना अनुग्रह दिया बजा ला भरोसा कितया था। 28 क्योंकि सै सरेआम साबित करदा था की यहूदियां दी शिक्षा गलत है कने पबित्र शास्त्रे ला इदे सबूत भी दिन्दा था कि यीशु ही सै मसीहा है।

19 कने जालू अपुल्लोस कुरिन्थुस शेहरे च था, तां पौलुस सडका दे जरिये अंदरूनी इलाके ला होईकरी इफिसुस शेहरे जो आया कने उदी मुलाकात कुछ चेलयां ला होई। 2 उनी बोलया, क्या तुहांजो भरोसा करदे बेले पबित्र आत्मा मिल्ली? उना उसयो बोलया, “असां तां पबित्र आत्मा दे बारे च सुणया भी नी है।” 3 तालू पौलुसे उना जो पुछया, “तां फिरी तुहाडा बपतिस्मा कियां होया?” उना बोलया, “असां यहून्ना दा बपतिस्मा लिया।” 4 पौलुसे बोलया, “यहून्ना उना लोकां जो बपतिस्मा दिता जिना पाप करणा छडी दितयो थे कने परमेश्वरे पासे मुडी गे, पर उनी इस्राएल दे लोकां जो बोलया कि उसी इकी पर विश्वास करा जडा मेरे बाद ओणे बाला है, सै ही यीशु है।” 5 ऐ सुणीकरी उना प्रभु यीशु दे नाए दा बपतिस्मा लिया। 6 कने जालू पौलुसे उना पर हथ रखया, तां उना पर पबित्र आत्मा उतरी, कने सै होर-होर बोलियां च बोलणा कने भविष्यवाणी करणा लगे। 7 सै सारे लगभग बारा मर्द थे। 8 कने तालू पौलुस यहूदी जंज घरे च जाई करी बिना डरयो तिन मिनयां दीकर बोलदा रिया, कने परमेश्वरे दे राज्य दे बारे च बेहस करदा कने समझांदा रिया। 9 पर उना बिचे ला कुछ लोक बडे जिदी थे उना भरोसा करणे ला मना करी दिता, कने लोकां सामणे यीशु मसीह दे इस रस्ते जो बुरा भला बोलणा लगे, इस तांई पौलुस अपने चेलयां जो सोगी लेईकरी ओथु ला चली गया, कने हर रोज तरन्नुस दे स्कूले च जाई करी भरोसा करणे बालयां जो परमेश्वरे दे बारे शिक्षा दिन्दा कने समझांदा था। 10 दो सालां दीकर ऐई होंदा रिया, कने आसिया प्रदेश दे रेहणे बाले सारयां यहूदियां कने सारे यूनानियां प्रभु दा बचन सुणी लिया। 11 कने परमेश्वर पौलुसे दे जरिये अनोखे चमत्कार दसदा था। 12 ऐथू दीकर कि रूमालां कने तौलियां जो उदे शरीर ला छुआई करी बिमारां पर रखदे थे, तां उना दियां बिमारियां खरियां होई जांदिंयां थियां; कने बुरियां आत्मा उना ला निकली जांदिंयां थियां। 13 पर कुछ यहूदी मर्द जडे जादू टोणा करिरी बुरियां आत्मा जो कडदे थे, सै यीशु दा ना बुरियां आत्मा जो कडणे तांई करदे थे, कने सै ऐ बोल्दे थे की, “मैं तुहांजो उस यीशु मसीह दे नाए ला जिदा प्रचार पौलुस करदा है बाहर निकलने दा हुकम दिन्दा है।” 14 कने स्किक्वा नाए दे इक यहूदी बड़े याजके दे सत्त पुत्र थे, जडे इयां ही करदे थे। 15 पर बुरियां आत्मा जबाब दिता, “यीशुऐ जो मैं जाणदी है कने पौलुसे जो भी जाणदी है, पर तू कुण है?” 16 कने उनी माणुऐ जिदे च बुरी आत्मा थी; उना पर झपटी करी, उना जो काबू करी लिया, कने उना दी ऐसी हालत किती, कि सै नगे कने जख्मी होईकरी

उसी घरे ला नठी गे। 17 कने जालू ऐ गल्ल इफिसुस शेहरे दे रेहणे बाले सारे यहूदी कने यूनानी जाणी गे, कने सै सारे डरी गे; कने प्रभु यीशुऐ दे नाए दी महिमा किती। 18 कने जिना भरोसा कितया था, उना चे मतयां लोकां आई करी सबना सामणे अपने गलत कम्मा जो मन्नी लिया। 19 कने जादू टोणा करणे बालयां चे मतयां अपणियां-अपणियां पोथियां गिठियां करिरी सारे सामणे फुकी दितियां; कने जालू उना दी कीमत जोडी, तां सै पंजा झार चांदिये दे सिक्कां बराबर निकलीं। 20 इयां मतयां लोकां प्रभु यीशु दे बचना दे बारे च सुणया, कने बचन शक्तिशाली तरिके ला उना दियां जिंदगियां जो बदलदा गया। 21 जालू ऐ गल्लां होई गियां तां पौलुसे मकिदुनिया प्रदेश कने अखाया प्रदेश दे भरोसा करणे बालयां ला मिलणे बाद यरूशलेम शेहरे जो जाणे दा फेसला किता, कने उनी बोलया, “यरूशलेम शेहरे जो जाणे बाद मिंजो रोम शेहरे जो जाणा भी जरूरी है।” 22 इस तांई उनी अपने साथियां चे तीमुथियुस कने इरास्तुस जो मकिदुनिया प्रदेश अपु ला पेहले भेजी दिता, कने अपु कुछ बकत आसिया प्रदेशे दे इफिसुस शेहरे च रेई पिया। 23 उस बेले यीशु मसीह दे रस्ते दे बारे च बडा हंगामा होया। 24 क्योंकि देमेत्रियुस नाए दा इक चांदी दा कारिगर था, जडा अरतिमिस यूनानी देवी दे मंदरे दे चांदी दे ढांचे बणवांदा था, कने कारिगरां जो उना बणाणे तांई बडे पैसे दिन्दा था। 25 देमेत्रियुसे अपने कारिगरां जो सदया कने इयोदियां चीजां दे कारिगरां जो गिठे करिरी बोलया, “हे भाईयो, तुसां जाणदे न कि इसी कम्मे ला सांझो कितणा पैसा मिलदा है। 26 कने तुसां दिखदे कने सुणदे न कि सिर्फ इफिसुस शेहरे च ही नी, बल्कि सारे आसिया प्रदेश दे सारे गां च, इनी पौलुसे ऐ बोली करी मते लोकां जो समझाया कने भटकाया भी है, कि जडी हथां दी कारिगिरी है, सै ईश्वर नी है। 27 कने सिर्फ इसा इकी गल्ला दा ही डर नी है, कि साडे इस कम्मे दी इज्जत मान चली जाणा; बल्कि ऐ की हुण लोकां महान देवी अरतिमिसा दे मंदरे जो भी महत्त्व नी देणा कने खुद देवी अरतिमिस जिसा जो पूरे आसिया प्रदेशे च कने सारे संसारे दे लोक पूजदे न उसा दी इज्जत मान नी होणा।” 28 सारे कारिगर ऐ सुणीकरी गुस्से च आई गे कने चीलाई-चीलाई करी बोलणा लगे, “इफिसियों दी अरतिमिस, महान है।” 29 शेहरे दे केई होर लोकां चिल्लाणे दियां अबाजां सुणियां कने सै भी जाई करी भिडा सोगी मिली गे कने सारे शेहरे च हंगामा होई गया कने लोकां गयुस कने अरिस्तार्खुस कने मकिदुनिया प्रदेशे दे रेणे बालयां जो जडे पौलुसे सोगी यात्री थे, पकडी लिया, कने गिठे होईकरी रंगशाला च दोडी गे। 30 पौलुस भी रंगशाला दे अंदर जाई करी लोकां ला गल्ल बात करणा चांदा था, पर चेलयां उसयो जाणा नी दिता। 31 आसिया दे हकीमा चे भी उदे दोस्तां उसयो बोली भेजया कने बिनती किती, की रंगशाला दे अंदर जाई करी अपनी जान खतरे च मत पांदा। 32 रंगशाला दे अंदर, सारे लोक चिल्ला दे थे, कोई कुछ बोला दा था कने कोई कुछ होर। सारा कुछ गड बड था, कने मते लोक तां ऐ जाणदे भी नी थे कि असां कजो गिठे होयो न। 33 तालू यहूदी लोकां सिकन्दरे जो भिडा चे धक्का देईकरी अग्रे करी दिता, कने सिकन्दरे लोकां जो चुप रेणें तांई हथे ला इशारा किता कने लोकां जो समझाणे दी कोशिश किती कि क्या होआ दा है। 34 पर जालू उना जो पता लग्गा कि सै यहूदी है, कने जडे मसीही लोकां सांई

मूर्तिपूजा नी करदे थे, तां सारे दे सारे इकी अबाजा च कोई दो घंटे दीकर चिलांदे रे, “इफिसियों दी अरतिमिस, महान है।” 35 तालू शेहरे दे मंत्रिऐ लोकां जो शांत करिरी बोलया, “हे इफिसियों दे वासियों, सारे जाणदे न कि इफिसुस शेहरे दे लोक महान देवी अरतिमिस दे मंदरे दी कने उदिया मूर्तिया दी रखवाली करदे न जडी अम्बरे ला पियो थी। 36 जालू कोई इना गल्लां ला इनकार नी करी सकदा है, तां ठीक है कि तुसां चुप रिया; कने बिना सोचया बिचारयो कुछ मत करा। 37 क्योंकि तुसां इना माणुऐ जो लेईकरी आयो न, जडे ना ता मंदरे जो लूटणे बाले न, कने ना ही साडिया देविया दी बुराई करणे बाले न। 38 इसी वजा ला अगर देमेत्रियुस कने उदे साथी कारीगरां जो कुसी ला कोई दिक्कत है तां कचेरी खुली है, उना दे मुकदमे दा इन्साफ करणे ताई अधिकारी भी हेन; ओथु लोक इकी दूजे पर इलजाम लगाई सकदे न। 39 पर अगर तुसां कुसी होर गल्ला दे बारे च कुछ पूछणा चांदे न, तां शेहरे दिया सभा च फेसला होणा। 40 क्योंकि मिजो डर है की राज्यपाले इस सारे हंगामे दे बारे च सुणना कने बोलणा कि असां रोमी सरकार दे खिलाफ विद्रोह करणे दी कोशिश करा दे थे। इस ताई कि इदी कोई बजा नी है, कि असां इसा भिडा दे गिठे होणे दा जबाब नी देई सकणा।” 41 कने ऐ बोली करी उनी सभा जो बीदा किता।

20 जालू हंगामा स्की गया तां पौलुसे चेलयां जो सदीकरी उत्साहित किता, कने उना जो अलविदा बोली करी मकिदुनिया प्रदेश जो चली गया। 2 सै उस सारे प्रदेश चे होईकरी कने चेलयां जो बडा उत्साहित करिरी सै यूनान प्रदेश च आया। 3 तिन्न महीने रेईकरी जालू सै ओथु ला जाजे पर सीरिया प्रदेश जो जाणा लगया था, पर उनी सुणया कि यहदियां उसयो रस्ते च मारणे दी सलाह बणाईयो है, इस ताई उनी फेसला किता की मकिदुनिया प्रदेशे ला बापस ओदे होए सीरिया प्रदेशे जो जाए। 4 इसा यात्रा च बिरिया शेहरे दे वासी पुरूस दा पुत्र सोपत्रुस कने थिस्सलुनीकिया शेहरे ला अरिस्तर्खुस कने सिकुन्दुस कने दिरबे शेहरे दा गयुस, कने तीमुथियुस कने आसिया प्रदेशे दा तुखिकुस कने त्रुफिमस उदे सोगी चली पै। 5 कने सोगी यात्री सांझो ला अग्रे चली गे कने त्रोआस शेहरे च पुज्जी करी सांझो नियालना लग्गे। 6 कने अखमीरी रोटियां दे त्योहारे दे बाद फिलिप्पी शेहरे ला जाजे पर चडी करी उना बाल पंजा रोजां बाद त्रोआस शेहरे च पुज्जे, कने सत्त रोज ओथु ही रे। 7 हफ्ते दे पेहले रोजे असां जालू प्रभु भोज खाणे ताई गिठे होए, तां पौलुसे जिनी दुऐ रोजे चली जाणा था, उना ला गल्लां कितियां, कने अधिया राती दीकर उना जो उपदेश दिन्दा रिया। 8 जिस उपरे बाले कमेरे पर असां गिठे होयो थे, ओथु मते दिये बल्यो थे। 9 कने युतुखुस नाऐ दा इक जवान खिडकिया च बेईकरी निद्रा ने झुला दा था, कने जालू पौलुस बडिया देरा दीकर गल्लां करदा रिया, तां सै निद्रा दे झुटारे ने तिजिया मंजली ला पेई गया, कने जालू कुछ लोकां आई करी उसयो चुक्या तां तालू दिकर सै मरी गया था। 10 पर पौलुस थले उतरया कने उदे बाल जाई करी उसयो गले ने लाईकरी बोलया, “घबरा मत; क्योंकि ऐ हल्ले भी जिंदा है।” 11 कने उनी दुबारा उपर जाई करी प्रभु भोज किता, कने अगली भयाणा होणे दिकर गल्लां करदा रिया; कने फिरी सै चली गया। 12 फिरी सै उस जवाने जो ओथु ला जिन्दा लेई गे, कने

बडे खुश होऐ। 13 पौलुसे अस्सुस शेहरे ताई जमिनी यात्रा करणे दा फेसला किता, बाकी असां लोक समुन्द्री जाजे ला अग्रे चली गे, कने असां ओथु ला उसयो अपने सोगी जहाजे च लेई जाणे दी योजना बणा दे थे। 14 जालू पौलुस अस्सुस शेहरे च सांझो मिल्ला तां असां उसयो जाजे पर चढाई करी मितुलेने शेहरे जो आये। 15 दुऐ रोजे ओथु ला यात्रा करदे होये असां खियुस टापू च पुज्जे कने उसला अगले रोजे उदे बखे ला होईकरी सामुस टापू च पुज्जे कने उसला अगले रोजे मीलेतुस शेहरे जो आऐ। 16 क्योंकि पौलुसे इफिसुस शेहरे च नी जाणे दा फेसला किता क्योंकि सै आसिया प्रदेशे च होर जादा बकत नी बिताणा चांदा था, ताकि कुथी ऐसा ना होए कि, उसयो आसिया शेहरे च देर लग्गे; क्योंकि सै जल्दिया च था, कि अगर होई सके, तां सै पिन्तेकुस्त दे त्योहारे बाले रोजे यरूशलेम शेहरे च बकते पर पुज्जे। 17 कने जालू असां मीलेतुस शेहरे च उतरे, तालू पौलुसे इफिसुस शेहरे दिया कलीसिया दे अगुवां जो संदेशा गलाई भेजया की, सै आई करी उसयो मिलन। 18 जालू सै उदे बाल आये, तां उनी उना जो बोलया, “तुसां जाणदे न, कि मै कियां तुहाडे सोगी रिया, पेहले ही रोजे ला जालू मै आसिया प्रदेशे च पुज्जा, तां मै सारा बकत तुहाडे सोगी ही बिताया। 19 मतलब की बडिया दीनता ला, कने रोई-रोई करी, कने उना परीक्षां च जडियां यहूदी लोकां दिया साजिशा दिया बजा ला मिजो पर आईयां, मै तमी प्रभु दी सेवा करदा रिया। 20 कने जडियां-जडियां गल्लां तुहाडे फायदे दियां थियां, उना जो दसणे ताई कने लोका दे सामणे कने घरे-घरे जाई करी सिखाणे ला भी कदी नी डरया। 21 कने यहूदी लोकां कने होर जातियां सामणे गबाई दिन्दा रिया कि परमेश्वरे सामणे अपने पापां जो मनी लिया कने गलत कम्मा जो छडी दिया, कने साडे प्रभु यीशु पर भरोसा करा। 22 कने हुण, मै पबित्र आत्मा दे जरिये मजबूर होईकरी यरूशलेम शेहरे जो चलया है, कने मिजो नी पता कि ओथु मिजो पर क्या-क्या बितणी है, 23 सिर्फ ऐई कि पबित्र आत्मा हर शेहरे च चेताबनी देईकरी मिजो ला बोलदा है कि बंधन कने क्लेश तिजो ताई तैयार न। 24 पर मिजो अपनी जिन्दगी ला कोई प्यार नी है, मै तां बस अपनीया उसा दोडा जो, कने उस सेवा जो पूरा करणा चांदा, जडी मिजो परमेश्वरे दे अनुग्रह दे शुभसमाचार पर गबाई देणे ताई प्रभु यीशुऐ ला मिलियो है। 25 कने मै तुसां सारयां बिच परमेश्वरे दे राज्य दा प्रचार किता, कने हुण मै जाणदा है तुसां चे कोई भी मिजो दुबारा नी दिखणा। 26 इस ताई अजे दे दिन तुसां ला गबाई देईकरी बोलदा है, कि तुसां च अगर कोई भी यीशु पर भरोसा कितयो बिना मरी जादां है, तां से मेरी गलती नी है। 27 क्योंकि मै तुसां जो सै सब कुछ दसया है जडा परमेश्वर चांदा है कि तुसां जाणन। 28 इसी ताई अपनी कने अपने झुंडे दी देखभाल करा; जिना च पबित्र आत्मा तुहांजो अगुवा बणया है ताकि तुसां परमेश्वरे दिया कलीसिया दी रखवाली करन, क्योंकि परमेश्वरे उना जो अपने पुत्रे दा खून देईकरी खरीदया है। 29 मै जाणदा है, कि मेरे जाणे बाद तुसां बिच झुटे गुस्सां ओणा है कने उना भरोसा करणे बालयां दा बडा नुकसान करणा। सै उना फाडने बाले भेडियां सांई होणे जडे भेडां जो मारी दिन्दे न। 30 ऐथू दिकर की तुहाडे अपने भरोसा करणे बालयां दे दले चे ऐसे लोक ओणे न, जिना चेलयां जो अपने पिच्छे खीचणे ताई उल्टियां सिदियां गल्लां करणियां न। 31

इस ताई ध्यान रखा, कने याद रखा कि मैं तिन्ना सालां दीकर रात दिन रोई-रोई करी, हर इकी जो चेताबनी देणा नी छडया। 32 कने हुण मैं तुहांजो परमेश्वरे जो, कने उदे अनुग्रह दे बचना जो सौपी दिन्दा है; जडा तुसां दे भरोसे जो मजबूत करी सकदा है, कने परमेश्वरे तुसां जो सै बिरासत देणी जिसा दा बायदा उनी उना सारयां लोकां ला कितया है जडे उदे जरिये पबित्र कितयो न। 33 मैं कुदे भी सोने, चांदी या कपडे दा लालच नी किता। 34 तुसां तां अपु ही जाणदे न कि इना हथां ही मेरी कने मेरे साथियां दी जरूतां पुरियां कितियां न। 35 मैं तुहांजो सब कुछ करिरी दसया है की, कडी मेहनत करिरी सांझो कमजोरां दी सहायता करणी चाईदी कने प्रभु यीशु दे बचना जो याद रखणा जरूरी है, प्रभुए अपु ही बोलया है: लेणे ला देणा धन्य है।” 36 एे बोली करी उनी घुटणे टेके कने उना सबना सोगी प्राथना किती। 37 तालू सै सारे बडे रोए कने पौलुसे दे गले लग्गी करी उसयो चुमणा लग्गे। 38 सै खासकर इसा गल्ला ताई दुखी थे, जडी उनी बोली थी, तुसां मिंजो फिरी दुबारा नी दिखणा। कने उना उसयो जाजे दीकर पूजाया।

21 असां जालू उना ला विदा लेईकरी समुंदी यात्रा शुरू किती, तां असां सिधे रस्ते ला कोस टापु च आये, कने दुऐ रोजे स्टुस टापु च, कने ओथु ला पतरा शेहरे च पुज्जी गे; 2 कने पतरा शेहरे ला इक जाज सांझो फीनीके प्रदेश जो जांदा होया मिल्ला, कने असां उदे पर चडी करी यात्रा शुरू करी दिती। 3 असां खबे पासे साइप्रस टापु दिखया कने असां ओथु ला निकली करी सीरिया प्रदेश दिया सीमा पासे अग्रे चली गे कने सूर शेहरे च जाई पुज्जे क्योंकि ओथु जाजे ला समान उतारणा था। 4 कने ओथु असां कुछ चेलयां जो तोपया कने असां ओथु उना सोगी सत रोजां दीकर रे। उना पबित्र आत्मा दे जरिये हर बार पौलुसे ला यरूशलेम शेहरे जो नी जाणे दी विनती करदे रे। 5 सत रोज बाद जालू ओथु ला साडे जाणे दा बकत आया, कने सै सारे जनानिया कने बचयां समेत सांझो शेहरे ला बारे दीकर पुजाया कने असां समुंद्रे बखे घुटणे टेकी करी प्राथना किती। 6 तालू इकी दुज्जे ला विदा होईकरी, असां तां जाजे पर चडी गे, कने सै अपने-अपने घरे जो बापस चली गे। 7 जालू असां सूर शेहरे ला शुरू कितियो यात्रा पुरी करिरी असां पतुलिमयिस शेहरे च पुज्जे, कने मसीही भाईयां जो नमस्ते करिके उना सोगी इक रोज रे। 8 दुऐ रोजे असां ओथु ला चली करी कैसरिया शेहरे च आये, कने फिलिप्पुस शुभसमाचार प्रचार करणे बाले दे घरे जाई करी रे, सै उना सतां मर्दा चे इक था जिना जो यरूशलेम शेहरे च प्रेरितां विधवां दी देखभाल करणे ताई चुणयां था। 9 उदियां चार कुआरियां कुडियां थियां; जडियां भविष्यवाणी करदियां थियां। 10 जालू सांझो कैसरिया शेहरे च रेंदे होए मते रोज होई गे, तां ओथु अगबुसे नाए दा इक परमेश्वर दा संदेश देंगे वाला यहूदिया प्रदेश ला आया। 11 उनी साडे बाल आई करी पौलुसे दा कमरबंद लिया, कने उसयो अपने हथा पैरां च बन्नी करी बोलया, “कि पबित्र आत्मा ऐ बोलदी है, कि जिस माणुए दा ऐ कमरबंद है, उसयो यरूशलेम शेहरे च यहूदियां इयां ही बनणा है कने होर जातियां दे हथे देई देणा है।” 12 असां जालू ऐ गल्लां सुणियां, तालू असां कने ओथु दे लोकां पौलुसे ला विनती किती कि, यरूशलेम शेहरे जो मत जांदा। 13 पर पौलुसे जबाब दिता, तुसां

क्या करा दे न, रोई-रोई करी मेरा मन तोड़ा दे न? मैं तां प्रभु यीशुए दे नाए ताई यरूशलेम शेहरे च सिर्फ बनूणे ताई ही नी बल्कि मरणे ताई भी तैयार है। 14 जालू सै नी मनया तां असां ऐ बोली करी चुप होई गे, “प्रभुए दी इच्छा पुरी हो।” 15 थोडे रोजां बाद असां तैयारी किती कने यरूशलेम शेहरे जो चली पे। 16 कैसरिया शेहरे दे भी कुछ चले साडे सोगी चली पे, कने सै सांझो मनासोन नाए दे बंदे दे घरे लेई गे, जडा यरूशलेम शेहरे च रेंदा था कने साइप्रस टापु दा था, सै सबना ला पेहले दे चेलयां चे इक था। 17 असां जालू यरूशलेम शेहरे च पुज्जे, तां भरोसा करणे बाले भाईयां साडा बडिया खुशिया ला स्वागत किता। 18 दुऐ रोजे पौलुस सांझो सोगी याकूबे दे घरे गया, जिथू सारे अगुवे गिठे होयो थे। 19 तालू पौलुसे उना जो नमस्कार किता, कने जडे-जडे कम्म परमेश्वरे पौलुसे दिया सेवकाईया दे जरिये होरनी जातियां च कितयो थे, सै सारे कम्म इक-इक करिरी उना जो दस्से। 20 अगुवां ऐ सुणीकरी परमेश्वरे दी महिमा किती, फिरी उना बोलया, हे भाई पौलुस, तू जाणदा है न, कि यहूदियां चे केई हजारों लोकां भरोसा किता है; कने सै सारे मूसा दिया व्यवस्था दा पालन बडिया बफादारिया ला करदे न। 21 कने कुछ लोकां उना यहूदियां जो दसया जिना दा तरे बारे च ऐ विश्वास है, कि तू होर जातियां च रेणेबाले यहूदियां जो मूसा दी व्यवस्था जो छडी देणे ताई सिखांदा है, कने बोलदा है, कि ना बचयां दा खतना करा कने ना ही इना यहूदी रिती-रिबाजां पर चला। 22 तां फिरी क्या करणा चाईदा? उना जो पक्का ऐ पता लग्गी जाणा है कि तू ऐथू आया है। 23 इस ताई जडा असां तिजो बोलदे न, सै कर। साडे ऐथू चार माणु न, उना जो सै मन्त पूरी करणी है जडी उना परमेश्वरे दे सामणे मनियो है। 24 उना जो लेईकरी उना सोगी अपने आपे जो शुद्ध करणे दिया बिधिया जो पूरा कर; कने उना ताई खर्चा दे, ताकि सै सिर मुंडवाई सकन। तालू सारयां जो पता लगणा, कि जडियां गल्लां उना तरे बारे च सुणियां न, सै गल्लां सच नी न, कने तू अपु भी मूसा दिया व्यवस्था जो मन्नी करी उदे अनुसार चलदा है। 25 पर उना होर जातियां दे बारे च जिना भरोसा कितया है, असां ऐ फेसला करिरी चिट्ठी लिखी भेजी है, की सै उस खाणे जो ना खान जिसयो लोकां मूर्तियां जो चढाया हो, कने व्यभिचार मत करदे कने गल्लां घोटी करी मारयो जानवरां दा मांस कने खन मत खांदे। 26 दुऐ रोजे पौलुसे उना माणुआं सोगी जाई करी अपु जो शुद्ध किता, तां सै मंदरे जो गे, कने ऐ घोषणा किती, कि शुद्धी दे रोज कालू मुकणे न, मतलब की उना चे हर इकी ताई भेंट चढाणे दे दिन कालू पुरे होणें। 27 जालू सै सत रोज पुरे होणे बाले थे, तां आसिया प्रदेशे दे कुछ यहूदियां पौलुसे जो मंदरे च दिखीकरी सारयां जो भडकाया, फिरी पौलुसे जो पकडी लिया कने चिल्लाणा लग्गे, 28 “हे इस्राएलियां, सहायता करा; ऐ सै ही माणु है, जडा हर जगा साडे यहूदी लोकां दे, कने मूसा दिया व्यवस्था दे कने इसा जगा दे खिलाफ च सारे लोकां जो सिखांदा है, ऐथू दीकर की होर जाति दे लोकां जो भी इस मंदरे च आणी करी इस पबित्र जगा जो अपबित्र करी दिता है।” 29 उना ऐसा बोलया क्योंकि इसला पेहले इफिसस शेहरे दे वासी नुफिमसु जो पौलुस सोगी शेहरे च दिखया था, कने समझदे थे कि पौलुस उसयो मंदरे च लेई आया है। 30 तालू शेहरे च हल्ला पेई गया, कने लोक दोडी करी गिठे होए, कने पौलुसे जो

पकड़ी करी मंदरे बार घसीटी लेई आये, कने झट दरबाजे बंद करी दिते। 31 जालू सै पौलुसे जो मारी देणे दी कोशिश करा दे थे, तां रोमी सिपाईयां दे सरदारो जो खबर पुज्जी कि यरूशलेम शेहरे च मते सारे लोक हंगामा करा दे न। 32 तालू सै झट सिपाईयां कने सुबेदारां जो लेईकरी उना बाल आया; कने लोकां दिया भीड़ा सरदारो जो कने सिपाईयां जो दिखीकरी पौलुसे जो मारणा बंद करी दित। 33 तालू पलटना दे सरदारो पौलुसे बाल आई करी उसयो पकड़ी लिया; कने दो सुंगला ला बनणे दा हुकम देईकरी पूछणा लग्गा, “ऐ कुण है, कने इनी क्या कितया है?” 34 पर भिड़ा चे कोई कुछ बोलणा लग्गा कने कोई कुछ, कने जालू रोले दिया बजा ला सच्चाई पता नी लग्गी, तां उसयो किले च लेई जाणे दा हुकम दित। 35 जालू सै पोडियां पर पुज्जा, तां इयां होया कि भिड़ा दिया बजा ला सिपाईयां जो उसयो चुकी करी लेई जाणा पिया। 36 क्योंकि लोकां दी भीड़ ऐ बोली करी पिच्छे पियो थी, इसयो मारी दिया। 37 जालू सै पौलुसे जो किले च अंदर लेई जाणा लगयो थे, तां उनी पलटना दे सरदारो जो बोलया, क्या मिंजो इजाजत है कि मैं तिजो कुछ बोले? उनी बोलया, “क्या तू यूनानी भाषा जाणदा है? 38 क्या तू सै मिस्र देशे दा माणू नी है, जिनी कुछ बकत पेहेले सरकारा दे खिलाफ बिरोध कितया था कने चार जार आतंकियों जो सुनसान जगा च लेई गया था?” 39 पौलुसे बोलया, “नी, मैं तां इक यहदी है, कने किलिकिया प्रदेशे दे खास तरसुस शेहरे दा रेणे बाला है। कने मैं तिजो ला बिनती करदा है, कि मिंजो लोकां ने गल्लां करणा दे।” 40 जालू उनी हुकम दित, तां पौलुसे पथरे दिया पोडियां पर खडोई करी लोकां जो चुप रेणे तांई हथे ला इशारा कित। तालू सै चुप होई गे, तां सै इज्जानी भाषा बोलणा लग्गा।

22 “हे भाईयो कने बजुर्गो सुणा, जडे इल्जाम मिंजो पर लगयो न, उदे बचाव च मैं कुछ तुहाडे सामणे बोलणा है।” 2 सै ऐ सुणीकरी कि सै सांझो ला इज्जानी भाषा च बोला दा है, सै होर भी चुप होई गे। तालू उनी बोलया: 3 मैं यहदी है, मेरा जन्म किलिकिया प्रदेशे दे तरसुस शेहरे च होया है; पर इस शेहरे च गमलीएल दे पैरां बाल बेईकरी शिक्षा लियो है, कने पूर्वजां दी व्यवस्था भी मिंजो ठीक रीतिया ला सिखाई; कने हुण जदिया उत्साह परमेस्वरे तांई तुहाडा है, तदिया ही मेरा भी था। 4 मैं प्रभु यीशु मसीह दे रस्ते जो खत्म करणे तांई इदे चेलयां जो बडा सताया। मैं मर्द कने जनानिया दोनो जो बन्नी करी, जेला च पाई करी, उना जो मरवाई भी दित। 5 खुद महायाजक कने अगुवां दी सारी सभा भी गबाह न कि, मैं उना ला यहदी भाईयां तांई चिठियां लेईकरी दमिशक शेहरे जो चलया था, ताकि जडे ओथु न उना जो सजा देणे तांई बन्नी करी यरूशलेम शेहरे जो लेई ओऐ। 6 जालू मैं चलदे-चलदे दमिशक शेहरे बखे पुज्जा, तां इयां होया कि लगबग दोपहर दे बकते अचानक अम्बरे ला मेरे चारो पासे इक लौ चमकी। 7 कने मैं जमिना पर पेई गया: कने ऐ अबाज सुणोई, हे शाऊल, हे शाऊल, तू मिंजो कजो तंग करदा है? 8 मैं जबाब दित, हे प्रभु जी, तू कुण है? उनी मिंजो बोलया, मैं नासरत शेहरे दा रेणे बाला यीशु है, जिसयो तू तंग करदा है। 9 कने मेरे साथियां लौ चमकदी तां दिखी, कने जडा मिंजो सोगी बोला था उना उदी अबाज सुणी, पर सै समझी नी सके की अबाजा मिंजो ला क्या बोलया। 10

तालू मैं बोलया, प्रभु जी मैं क्या करे? प्रभुऐ मिंजो ने बोलया, उठी करी दमिशक शेहरे जो जा कने जडा कुछ तू करणा है सै तिजो ओथु दसी देणा है। 11 जालू उसा लौई दिया चमका दिया बजा ला मिंजो कुछ भी मिल्ला दा नी था, तां मैं अपने साथियां दा हथ पकड़ी करी दमिशके शेहरे जो आया। 12 तालू हनन्याह नाऐ दा व्यवस्था दे अनुसार इक धर्मी माणू, जडा ओथु रेणेबाले सारे यहदियां च इज्जतदार था, सै मेरे बाल आया, 13 कने मेरे बखे खडोई गया कने मिंजो ला बोलया, हे भाई शाऊल, दुबारा दिखणा लग्गी पो। तालू ही मेरियां हखी खुली गियां कने मिंजो दुबारा मिलणा लग्गी पिया। 14 तालू उनी बोलया, साडे बाप दादयां दे परमेस्वरे तिजो इस तांई चुणया है ताकि तू उदिया इच्छा जो जाणे, कने उस धर्मी जन जो दिखे, कने उदी अबाज सुणे। 15 क्योंकि तू उदिया तरफा ला सारे माणूआं सामणे इना गल्लां दा गबाह होणा, जडियां तू दिखियां कने सुणियां न। 16 हुण कजो देर करा दा है? उठ, कने बपतिस्मा ले, कने प्रभु दा ना लेईकरी अपने पापां जो धोई ले। 17 मैं जालू फिरी यरूशलेम शेहरे च आई करी मंदरे च प्रार्थना करा दा था, तां मैं बेसुध होई गया। 18 कने मैं प्रभु जो दिखया कने उसयो ऐ बोलदे सुणया, “झट पट करिरी यरूशलेम शेहरे ला निकली जा; क्योंकि जडे लोक ऐथु न उना मेरे बारे च तेरी गबाई नी मनणी है।” 19 मैं बोलया, प्रभु जी मिंजो समझ नी आया की यरूशलेम शेहरे च यहदियां मिंजो पर भरोसा कनी करणा क्योंकि सै तां अपु ही जाणदे न की मैं तिजो पर भरोसा करणे बालयां जो जेला च पांदा कने मारदे-मारदे यहदी जंज घरां ला लेई जांदा था। 20 कने जालू तैरे गबाह स्तिफनुसे जो मारा दे थे, तालू मैं भी ओथु खडोतया था, कने उसा गल्ला ला राजी था, कने उसयो मारणे बालयां दे कपडयां दी रखवाली करा दा था। 21 कने प्रभुऐ मिंजो बोलया, तू चली जा: क्योंकि मैं तिजो होरनी जातियां बाल दूर-दूर भेजणा है। 22 ऐथु दीकर तां लोक पौलुसे दिया गल्ला जो ध्याने ला सुणदे रे पर, फिरी सै जोरे ला बोलणा लग्गे, “ऐसे माणुऐ जो मारी दिया, इदा जिन्दा रेंणा ठीक नी।” उना ऐसा इस तांई बोलया क्योंकि सै नी मंदे थे की परमेस्वर यहदियां जो छडी करी कुसी होरसी जातिया जो बचाई सकदा है। 23 जालू सै चिलांदे कने अपने कपडे फेंकंदे कने अपना गुस्सा दसणे तांई होआ च धुड उडांदे थे; 24 तां पलटना दे सुबेदारो बोलया, “इसयो किले च लेई जा; कने कोडे मारी करी परखा, ताकि मैं भी जाणे कि लोक कुसा बजा ला इदे खिलाफ ऐसा बोला दे न।” 25 जालू सै उसयो कोडे मारणे तांई बन्ना दे थे तां पौलुसे उस सुबेदारो ने बोलया जडा उदे बखे खडोतया था, “क्या ऐ ठीक कि तुसां इक रोमी माणुऐ जो, बिना दोष साबित होयो कोडे मारन?” 26 सुबेदारो ऐ सुणीकरी सरदारो बाल जाई करी बोलया, “तू ऐ क्या करा दा है? ऐ तां रोमी माणू है।” 27 तालू सरदारो उदे बाल आई करी बोलया, मिंजो दस, क्या तू रोमी है? “उनी बोलया, हाँ।” 28 ऐ सुणीकरी सरदारो बोलया, मैं रोमी होणे दा पद मते पैसे देईकरी लिया है। पौलुसे बोलया, “मैं तां जमदा ही रोमी है।” 29 तालू जडे लोक उसयो परखा दे थे, सै झट उदे बखे ला हटी गे; कने सरदार भी ऐ जाणी करी कि ऐ रोमी है, कने मैं उसयो बनया है, सै डरी गे। 30 सुबेदार ऐ जाणना चांदा था कि यहदी लोक उदे पर कजो दोष ला दे न, इस तांई उनी बड्डे याजकां कने सारिया महासभा जो गिठे होणे दा

हुकम दिता। उना जो रिहा किता, पौलुसे जो थले आंणी क्री उना दे सामणे खड़ा किता।

23 पौलुसे महासभा पासे ध्यान लाईकरी दिखया, कने बोलया, “हे भाईयो, मैं अजे दीकर परमेश्वरे तांई बिलकुल सच्चि अंतरात्मा ला जिन्दगी कटी है।” 2 पौलुसे जड़ा बोलया सै सुणीकरी हनन्याह महायाजके, उना जो जडे उदे बखे खडोतयो थे, पौलुस दे मुए पर थपड मारणे दा हुकम दिता। 3 तालू पौलुसे उना जो बोलया, “है पाखंडी, परमेश्वरे तिजो मारणा। तू मूसा दी व्यवस्था दे अनुसार मेरा न्याय करणे जो बैठया है, कने फिरी भी मिजो मारणे दा हुकम देईकरी व्यवस्था दे खिलाफ जा दा है?” 4 जडे बखे खडोतयो थे, उना बोलया, “क्या तू परमेश्वरे दे महायाजक दी बेईजती करदा है?” 5 पौलुसे बोलया, “हे भाईयो, मैं नी जाणदा था, कि ऐ महायाजक है; क्योंकि पबित्र शास्त्र च लिखया है, अपने लोकां दे प्रधाने जो बुरा मत बोला।” 6 तालू पौलुसे ऐ जाणी करी, कि कुछ सदकी लोक न कने कुछ फरीसी लोक न, महासभा च पुकारी करी बोलया, “है भाईयो, मैं फरीसी कने फरीसियां दे बंशे दा है, कने मेरा मुकदमा इस तांई हो आ दा है क्योंकि मिजो आस है की परमेश्वरे मरयो लोकां जो दुबारा जिन्दा करणा।” 7 जालू उनी ऐ गल्ल बोली तां फरीसियां कने सदकियां च होणा लग्गी, कने सभा च फुट पेई गई। 8 क्योंकि सदकी लोक ऐ भरोसा करते न की लोकां मरणे बाद जिन्दा नी होणा, ना कोई स्वर्गदूत न कने ना आत्मा है; पर फरीसी लोक इना सबना पर भरोसा करते न। 9 तालू बड़ा रोला पिया कने कुछ व्यवस्था जो सिखणे बाले जडे फरीसी थे, उठी करी ऐ बोली करी बेहस करणा लग्गे, “सांझो इस माणुऐ च कोई बुराई नी मिली है; कने होई सकदा है की इक आत्मा या स्वर्गदूते उसला गल्ल किती हो।” 10 जालू लड़ाई बडी बदी गई, तां पलटना दे सरदारे इसी डरे ला कि सै पौलुसे दे टोटे-टोटे नी करी दें, इस तांई उनी पलटना जो हुकम दिता की सभा दे लोकां बीचे ला पौलुसे जो बचाई करी किले च लेई जा। 11 उसा ही राती प्रभु यीशुऐ पौलुस दे बखे आई करी बोलया, “हे पौलुस, हिम्मत रख; क्योंकि जियां तू यरूशलेम शेहरे च मेरी गबाई दितियो है, तियां ही तिजो रोम शेहरे च भी मेरी गबाई देणी पोणी है।” 12 जालू भ्याग होई तां कुछ यहूदी माणुआं गिठे होईकरी सलाह किती, कने कसम खादी कि जालू दीकर असां पौलुसे जो मारी ना देन, अगर असां खादा या पीता तां सांझो पर लानत है। 13 जिना ऐ कसम खादियो थी, सै चालियां जणयां ला जादा थे। 14 उना बड़े याजकां कने यहूदी अगुवां बाल आई करी बोलया, “असां ऐ कसम खादियो है कि जालू दीकर असां पौलुसे जो मारी नी दें, तालू दीकर असां अगर कुछ भी चखन तां सांझो पर लानत है। 15 इस तांई हुण तुसां कने महासभा मिलिकरी पलटना दे सरदारे जो समझा कि पौलुसे जो तहाडे बाल लेई ओऐ, भाना मारा कि तुसां उदे बारे च होर भी ठीक तरीके ला जांच करणा चांदे न, कने असां उदे पूजणे ला पेहेले ही उसयो रस्ते च मारणे तांई तैयार रेगे।” 16 पर पौलुसे दे भांजे सुणाया कि यहूदी लोक उसयो मारणे दी योजना बणा दे न, तां उनी किले च जाई करी पौलुसे जो खबर दिती। 17 पौलुसे सुबेदारां चे इकी जो सदीकरी बोलया, “इसी जवाने जो पलटना दे सरदारे बाल लेई जा, ऐ उसला कुछ बोलणा चांदा है।” 18 इस तांई सुबेदार

पौलुसे दे भांजे जो पलटना दे सरदारे बाल लेईजाई करी बोलया, “केदी पौलुसे मिजो सदीकरी बिनती किती, कि ऐ जवान पलटना दे सरदारे ला कुछ बोलणा चांदा है, इसयो उस बाल लेई जा।” 19 पलटना दे सरदारे उसयो हथ पकडी करी, कने उसयो लग लेईजाई करी पुछया, “तू मिजो ला क्या बोलणा चांदा है?” 20 उनी बोलया, “यहूदियां गिठे होईकरी योजना बणाईयो, कि तिजो ला बिनती करन कि कल पौलुसे जो महासभा च लोऐ, कने ऐसा लग्गे कि तू होर ठीक ढंगे ला उदी जांच करणा चांदा है। 21 पर कृपा करिरी तू उना दिया बिनतिया पर ध्यान मत दिन्दा, क्योंकि उना चे चालियां ला जादा माणू पौलुसे जो मारणे दिया ताका पर न, उना ऐ कसम खादियो है कि जालू दीकर असां पौलुसे जो नी मारगे, तालू दीकर ना खाणा है ना पिणा है, कने सै हुण तैयार न कने तेरे बचने दा इंतजार करा दे ना।” 22 तालू पलटना दे सरदारे जवाने जो ऐ हुकम देईकरी भेजया, “कुसी ला मत बोलदा कि तू मिजो ला ऐ गल्लां बोलियां ना।” 23 तालू पलटना दे सरदारे दो सुबेदारां जो सदीकरी बोलया, “अज राती नौ बजे दीकर दो सो सपाई, सत्तर सवार, कने दो सो भाले बाले, कैसरिया शेहरे जो जाणे तांई तैयार रखा।” 24 कने पौलुसे दिया सवारिया तांई घोडे जो तैयार रखा ताकि उसयो फेलिक्स राज्यपाले बाल ठीक-ठाक पुजाई सकन। 25 पलटना दे सरदारे राज्यपाले जो इक चिट्ठी भी लिखी: 26 “महाप्रतापी फेलिक्स राज्यपाले जो क्लौडियुस लुसियास दिया तरफा ला नमस्कार; 27 इस माणुऐ जो यहूदी पकडी करी मारणा चांदे थे, पर जालू मिजो पता लग्गा कि ऐ रोमी है, तां पलटन भेजी करी छुड़ाई लांदा। 28 कने मैं जाणना चांदा था, कि सै इस पर कुसा बजा ला दोष लांदे न, इस तांई उसयो उना दी महासभा च लेई गया। 29 तालू मैं जाणी लिया, कि सै अपणिया यहूदी व्यवस्था दे विवादां दे बारे च उदे पर दोष लगा दे न, पर ऐ कोई ऐसा दोष नी है, जिदे तांई उसयो मौत दी सजा या जेल होए। 30 कने जालू मिजो दसया कि सै इस माणुऐ जो मारणे दिया ताका पर न, तां मैं झट उसयो तेरे बाल भेजी दिता; कने उना यहूदियां जो जिना उस पर दोष लाया है हुकम दिता, कि तेरे सामणे उदे पर दोष लान।” 31 सिपाइयां जो जड़ा हुकम दितया था तियां ही सै पौलुसे जो लेईकरी रातो रात अन्तिपत्रिस शेहरे च लेई ओऐ। 32 दुरे रोजे उना घुडसवारां जो पौलुसे सोगी कैसरिया शेहर जाणे तांई छडी दिता कने सपाई अपु पैदल यरूशलेम शेहरे दे किले जो मुडी ओऐ। 33 उना कैसरिया शेहरे च पुज्जी करी राज्यपाले जो चिट्ठी दिती; कने पौलुसे जो भी उदे सामणे खड़ा किता। 34 राज्यपाले चिट्ठी पढी करी पुछया, “ऐ कुसी देशे दा है? कने जालू ऐ सब जाणी लिया कि सै किलिकिया प्रदेशे दा है।” 35 तां उसयो बोलया, “जालू सै लोक ओगे जिना तिजो पर दोष लाया है, तालू मैं तेरा मुकदमा सुणना है।” कने उनी पौलुसे जो राजा हेरोदेसे दे किले च पेहरे च रखणे दा हुकम दिता।

24 पंजा रोजा बाद हनन्याह महायाजक केई यहूदी अगुवां कने तिरतुल्लुस नाऐ दे बकिले जो सोगी लेईकरी कैसरिया शेहरे च आया; उना राज्यपाल दे सामणे पौलुसे पर दोष लाऐ। 2 जालू पौलुसे जो ओथु सदया, तां तिरतुल्लुसे उस पर दोष लाईकरी बोलया, “हे महाप्रतापी फेलिक्स, तेरिया बजा ला असां बडिया शांतिया ला रे दे न, कने तेरे इंतजाम ला इसा जातियां

ताई कितणियां बुराइयां सुधरा दियां न। 3 इसयो असां हर जगा कने हर तरीके ला धन्याबाद सोगी मंदे न। 4 पर मैं तेरा जादा बकत नी लेणा चांदा है, मैं तिजो ला बिनती करदा है, कि कृपा करिरी थोड़ी देर साडी सुणी ले। 5 ऐ माणु संसारे दे सारे यहदियां बिच मतभेद कने मुसीबत पैदा करा दा है, कने ऐ इक ऐसे कुपंथे दे अगुवां चे भी है, जिस पंथे जो लोक नासरत दे यीशुऐ दे पिच्छे चलणे बाला पंथ बोलदे न। 6 उनी मंदरे जो अशुद्ध करणा चाया, कने तालू असां उसयो बंदी बणाई लिया। असां उसयो अपणिया व्यवस्था दे अनुसार सजा देणा चांदे थे; 7 पर पलटना दे सरदारो लुसियासे आई करी जबरदस्ती उसयो सांडे हथाला छुड़ाई लिया, 8 कने इदे पर दोष लांणे बालयां जो तेरे बाल ओणे दा हुकम दिता। इना सारियां गल्लां जो जिना दे बारे च असां उदे पर दोष ला दे न, तू अपु ही उसयो जाँची करी सच्चाईया जो जाणी लेणा है।” 9 यहदियां भी उदा साथ देईकरी बोलया, ऐ गल्लां बिलकुल ठीक न। 10 जालू राज्यपालो पौलुसे जो बोलणे ताई इशारा किता तां उनी जबाब दिता: “मैं ऐ जाणी करी कि तुसां इस देशे दा बडे सालां ला न्याय करा दा है, इस ताई मैं खुशिया ला अपणा जबाब दिन्दा है।” 11 तू अपु ही पता लगाई सकदा है, कि जालू ला मैं यरूशलेम शेहरे च अराधना करणा मन्दरे च आया है, मिंजो बारा रोजां ला उपर नी होऐ न। 12 उना मिंजो ना मंदरे च, ना यहदी जंज घरां च, कने ना शेहरे च कुसी ने बेहस करदे या ना भिडा जो गिठा करदे दिखया; 13 कने ना ही सै उना गल्लां जो, जिना दे बारे च सै हण मिंजो पर दोष ला दे न, तेरे सामणे सच्च साबित करी सकदे न। 14 पर मैं तेरे सामणे ऐ मनी लेंदा है, कि मैं मसीह दे पंथे दा चेला होईकरी अपने पूर्वजां दे परमेश्वरे दी सेवा करदा है, जिसी पंथे जो ऐ माणु यहदी झूठा पंथ बोलदे न: कने जडियां गल्लां मूसा दिया व्यवस्था च कने परमेश्वरे दा संदेश देणेबालयां दियां कताबां च लिखियाँ न, उना पर भरोसा करदा है। 15 कने परमेश्वरे पर आस रखदा है, जडी सै अपु भी रखदे न, कि परमेश्वरे धर्मी कने अधर्मी दोनो जो मरयां चे जिन्दा करी देणा। 16 इस ताई मैं अपु भी परमेश्वरे कने लोकां सामणे अपणी अंतरात्मा जो निर्दोष रखणे दी पूरी कोशिश करदा है। 17 मतयां सालां बाद मैं अपने गरीब लोकां जो दान कने परमेश्वरे जो बलिदान चडाणे ताई यरूशलेम शेहरे च आया था। 18 उसी बकत उना मिंजो मंदरे च शूद्र होणे दे रिबाजां जो पूरा करदे दिखया। ओथु ना तां कोई भिड थी कने ना ही कोई हल्ला था। 19 पर ओथु आसिया प्रदेशे दे कुछ यहदी लोक थे, जिना हंगामा किता। अगर मैं कुछ गलत कितया था, तां उना जो मिंजो पर दोष लांणे ताई ऐथु तेरे सामणे होणा चाईदा था। 20 या इना माणुआं जो अपु ही बोलणा चाईदा, कि जालू मैं महासभा दे सामणे खडोतया था, तां उना जो मिंजो पर कुण दिया दोष मिल्ला? 21 सिर्फ इक दोष है जडा सै मेरे खिलाफ लाई सकदे न, सै ऐ है जालू मैं अंगणे च जोरे ला बोलया था, “पर ऐ मुकदमा मेरे पर इस ताई चलया है क्योंकि मैं भरोसा करदा है की परमेश्वरे उना लोकां जो जडे मरी गियो न दुबारा जिन्दा करणा।” 22 राज्यपाल फेलिक्स जडा इसी पंथे दियां गल्लां जो अच्छे ला जाणदा था, उनी सुणवाई जो ऐ बोली करी स्थगित करी दिता, “कि जालू पलटना दा सरदार लुसियास ओगा, तां तुहाडिया गल्लां दा न्याय करगा।” 23 कने सूबेदार जो हुकम दिता, कि पौलुसे जो

थोडी छुट देईकरी उसयो पेहरे च रखा, पर उदे दोस्तां चे कुसयो भी इदी सेवा करणे ला मत रोकदे। 24 थोडे रोजां बाद राज्यपाल फेलिक्स अपणी घरे बाली दूसिल्ला जो, जडी यहदी थी, सोगी लेईकरी पौलुसे ला मिलणा आया कने पौलुसे जो सदया, कने उस भरोसे दे बारे च उसला सुणया जडा यीशु मसीह पर है। 25 जालू पौलुसे धार्मिकता कने अपणी इच्छां पर काबू रखणा कने परमेश्वरे जरिये होणे बाले न्याय दे बारे च दसणा शुरू किता, तां फेलिक्से डरीकरी जबाब दिता, “इस बकत तां तू जा; जालू मेरे बाल बकत होंगा तां मैं तिजो दुबारा सदी लेंगा।” 26 हालांकि फेलिक्स उना गल्लां दे बारे च डरदा था जडियां पौलुसे बोलियां थियां, फिरी भी सै पौलुसे जो सददा था, कने उस सोगी गल्लां करदा था क्योंकि सै सोचदा था की सै जेला ला छुटणे ताई उसयो कुछ पैसे दिगा। 27 पर जालू दो साल बीती गे, तां पुरकियुस फेस्तुस, फेलिक्से दिया जगा पर राज्यपाल बणी गया, कने फेलिक्स यहदियां जो खुश करणे दिया इच्छा ला पौलुसे जो केदी ही छडी गया।

25 उना रोजां बाद राज्यपाल फेस्तुस दे स्पे च यहदिया प्रदेश च आया। फिरी सै कैसरिया शेहरे ला यरूशलेम शेहरे जो गया। 2 तालू बड़े याजकां, कने यहदियां दे अगुवां, उदे सामणे पौलुसे पर दोष लाऐ; 3 कने उसला बिनती किती की उना दा समर्थन करे कि सै पौलुस जो यरूशलेम शेहरे च सदे, क्योंकि उना उसयो रस्ते च ही मारी देणे थी योजना बणाईयो थी। 4 फेस्तुसे जबाब दिता, “पौलुस कैसरिया शेहरे च केदी है, कने मैं अपु जल्दी ओथु जाणा है।” 5 फिरी बोलया, “तुसां ने जडे बड़े माणु न, सै मेरे सोगी चलन, कने अगर उनी माणुऐ कुछ गलत कम्म कितया है, तां उस पर दोष लगान।” 6 यरूशलेम शेहरे च कोई अठ दस रोज रेईकरी सै कैसरिया शेहरे जो गया: कने दुऐ रोजे न्याय-आसने पर बेईकरी पौलुसे जो लोंणे दा हुकम दिता। 7 जालू सै आया, तां यहदी अगुवे जडे यरूशलेम शेहरे ला आयो थे, उना अखे बखे खडोई करी उदे पर बडे भरी दोष लाऐ, पर उना बाल इना दोषां जो सच्च साबित करणे ताई कोई सबूत नी था। 8 पर पौलुसे जबाब दिता, “मैं ना तां यहदियां दिया व्यवस्था दे कने ना मंदरे दे, कने ना महाराजा कैसरे दे खिलाफ कोई अपराध कितया है।” 9 तालू फेस्तुसे यहदी अगुवां जो खुश करणे दिया इच्छा ला पौलुसे जो पुच्छया, “क्या तू चांदा है की तेरे इना दोषां दी सुणवाई मेरे सामणे यरूशलेम शेहरे च हो?” 10 पौलुसे बोलया, “मैं महाराजा कैसरे दे न्याय-आसने सामणे खडोतया है: ठीक ऐई है की मेरे मुकदमे दी सुणवाई ऐथु ही होणा चाईदी। मैं यहदी लोकां दे खिलाफ कोई भी अपराध नी कितया है, कने इसा गल्ला जो तू भी अच्छे ला जाणदा है। 11 अगर अपराधी है कने मौत दी सजा देणे जोगा कोई कम्म कितया है, तां मैं मरणे ला नी मूकरदा है; पर जिना गल्लां दा ऐ मिंजो पर दोष ला दे न, अगर उना चे कोई गल्ल सच्च नी है, तां कुसी जो भी ऐ हक नी है की मिंजो इना दे हथे देई दे। मेरी बिनती है की मेरा न्याय महाराजा दे हथे ला होणा चाईदा।” 12 तालू फेस्तुसे अपणिया सभा सोगी बिचार करिरी जबाब दिता, “तू महाराजा कैसरे दे हथे ला न्याय होणे दी मांग किती है, तां तिजो महाराजा कैसरे बाल ही भेजणा है।” 13 थोडे रोज होणे बाद राजा अग्रिपे कने उदी छोटी बेहण बिरनीके कैसरिया शेहरे च आई करी राज्यपाल फेस्तुसे ला

मिल्ले। 14 उना जो ओथु मते रोज रेहणे बाद फेस्तुसे उना ने पौलुसे दे बारे च दसया, “इक माणु है, जिसयो फेलिक्स केदी छडी गया है। 15 जालू मैं यरूशलेम शेहरे च था, तां बड़े याजकां कने यहदी अगुवां उस पर दोष लाए कने चांदे थे, कि उसयो मौत दी सजा हुकम मिल्ले। 16 पर मैं उना जो जबाब दिता, कि रोमियां दा ऐ रिबाज नी है, कि कुसी माणुए जो सजा देंगे ताई सौपी दें, जालू दीकर आरोपी जो अपने दोष लांणे बालयां सामणे खडे होईकरी दोषां दे जबाब देंगे दा मोका ना मिल्ले। 17 इस ताई जालू यहदी अगुवे मेरे सोगी ऐथू कैसरिया शेहरे च आये, तां मैं कोई देर नी किती, कने दूए ही रोजे न्याय-आसने पर बेईकरी, पौलुसे जो अदालता च लोंणे दा हुकम दिता। 18 जालू उस पर दोष लांणे बाले खडुते, तां उना ऐसिया बुरियां गल्लां दा दोष नी लाया, जदिया मैं समजदा था। 19 पर उना बिच अपने धर्म जो लेईकरी कने यीशु नाए दे माणुए दे बारे च कुछ झगडा था, जडा मरी गया था, पर पौलुस दाबा करदा था की यीशु जिन्दा है। 20 क्योंकि मिंजो नी पता था की इना गल्लां दी जांच पडताल कियां करे, इस ताई मैं पौलुसे जो पुच्छया, क्या तू यरूशलेम च शेहरे च मुकदमे दी सुणवाई ताई राजी है। 21 पर जालू पौलुसे बिनती किती की महाराजा कैसर ही मेरा न्याय करे, तां मैं हुकम दिता, कि जालू दीकर मैं उसयो महाराजा कैसरे बाल नी भेजें, उदी रखवाली किती जाए।” 22 तालू अग्रिप्पे फेस्तुसे जो बोलया, “मैं भी उस माणुए दी सुणना चांदा है।” उनी बोलया, “तू कल सुणी लियां।” 23 दूए रोजे, जालू अग्रिप्पे कने बिरनीके बडी धूम धाम ला आई करी पलटना दे सरदारां कने शेहरे दे खास-खास लोकां सोगी दरबारे च पुज्जे। तालू फेस्तुसे हुकम दिता, कि सै पौलुसे जो लेई ओआ। 24 फेस्तुसे बोलया, “हे राजा अग्रिप्पे, हे सारे लोक जडे ऐथू साडे सोगी न, तुसां इसी माणुए जो दिखा दे न, जिदे बारे च सारे यहदियां यरूशलेम शेहरे च कने ऐथू भी चिलाई-चिलाई करी मिंजो ला बिनती किती, कि इदा जिन्दा रेंणा ठीक नी है। 25 पर मैं जांणी लिया कि उनी ऐदिया कुछ नी कितया है कि इसयो मौत दी सजा मिल्ले; कने जालू की उनी अपु ही बिनती किती की महाराजा धिराज मेरा न्याय करे, तां मैं उसयो भेजणे दा फेसला किता। 26 पर मिंजो उदे बारे च कोई भी पक्की गल्ल नी लगी कि महाराजा जो लिखें, इस ताई तां मैं उसयो तुहाडे सामणे कने खास करिरी राजा अग्रिप्पे तरे सामणे लांदा है, ताकि जांचणे बाद मिंजो कुछ लिखणे जो मिल्ले। 27 क्योंकि केदिये जो भेजणा कने जडे दोष उदे पर लायो न, उना जो नी दसणा, मिंजो ठीक नी लग्गा दा है।”

26 राजा अग्रिप्पे पौलुसे जो बोलया, “तिजो अपने बारे च बोलणे दी इजाजत है।” तालू पौलुसे हथ चुकी करी लोकां जो शांत किता, तालू सै अपने बचाव च बोलणा लग्गा, 2 हे राजा अग्रिप्पे, जितणियां गल्लां दा यहदी अगुवे मिंजो पर दोष लांदे न, अज तरे सामणे उना दा जबाब देंगे ताई मैं अपने आपयो जो धन्य समझदा है, 3 क्योंकि तू यहदियां दे सारे रिबाजां कने समस्यां जो अच्छे ला जाणदा है। इस ताई मैं बिनती करदा है, अच्छे ला मेरी सुणी ले। 4 जदिया मेरा चाल-चलण बचपन ला लेईकरी अजे दीकर अपने लोकां च कने यरूशलेम शेहरे च था, ऐ सब यहदी जाणदे न। 5 सै मिंजो तालू ला जाणदे न जालू मैं बच्चा था, सै चांदे न तां इसा सच्चाईया दी गवाई भी देई

सकदे न की, मैं फरीसियां दा इक सदस्य रिया है, जडा साडे धर्म दा सारयां ला कट्टर पंथ है। 6 अज मैं परमेश्वरे जरिये साडे पूर्वजां जो दितयो बायदे दिया आसा दिया बजा ला ऐथू दोषिदे दे स्पे च खडोटया है। 7 उसी बायदे जो पूरा होणे दी आसा च, साडे बारा गोत्र अपने सारे मने ला दिन रात परमेश्वरे दी सेवा करदे आये न। हे राजा, ऐ उसा आशा दिया बजा ला है की परमेश्वरे सेई करणा जडा उनी बायदा कितया था की ऐ यहदी मिंजो पर दोष ला दे न। 8 तालू पौलुसे सुणने बालयां चे सारे यहदियां जो बोलया, तुसां लोक भरोसा करदे न की परमेश्वर मरयां जो दुबारा जिन्दा करी सकदा है, तां तुसां इसा गल्ला पर भरोसा करणे जो कजो मना करदे न की उनी यीशु मसीह हो मरयां चे जिन्दा किता? 9 “मेरा भी पक्का भरोसा था कि नासरत बासी यीशुए दे खिलाफ मिंजो मता कुछ करणा चाईदा।” 10 कने मैं यरूशलेम शेहरे च इयां ही कितया; कने बड़े याजकां ला हक पाई करी बड़े पबित्र लोकां जो जेला च पाया, कने जालू उना जो मारी दिन्दे थे, तां मैं भी उना दे खिलाफ अपनी सेहमती दिन्दा था। 11 कने मैं हर यहदी जंज घर च उना जो सजा दिलादां कने उना जो यीशुए दी निंदा करणे ताई मजबूर करदा था, ऐथू दीकर गुप्से ला ऐसा पागल होई गया था कि दुज्जे शेहरां च जाई करी उना जो तंग करदा था। 12 “इसी ही मकसदे सोगी जालू मैं बड़े याजकां ला अधिकार कने हुकम दी चिट्ठी लेईकरी दमिशके शेहरे जो चलया था; 13 तां हे राजा, रस्ते च लगभग दोपेरा दे बेले मैं अम्बरे ला सूरजे दिया चमका ला भी जादा चमकदी इक लौ अपने कने अपने सोगी चलणे बालयां दे चारो पासे चमकदी दिखी। 14 कने जालू असां सारे धरती पर डेई पे, तां मैं इब्रानी भाषा च, मिंजो ला बोलदे इक अबाज सुणी, ‘हे शाऊल, हे शाऊल, तू मिंजो कजो तंग करदा है? हरबरी जालू तू मिंजो दुखी करणे दी कोशिश करदा है, तालू तू अपु जो ही दुखी करदा है।’ 15 मैं बोलया, प्रभु जी, तू कुण है? प्रभुए बोलया, मैं यीशु है जिसयो तू तंग करदा है। 16 पर तू उठ, अपने पैरां पर खडा हो; क्योंकि मैं तिजो दर्शण इस ताई दिता है ताकि तिजो उना गल्लां दा भी सेवक कने गबाह बणां, जडियां तू दिखियां न, कने उना दा भी जिना ताई मैं तिजो दर्शण देणा है। 17 कने मैं तिजो तेरे लोकां ला कने होर जातियां ला बचादा रेंगा, जिना बाल मैं तिजो इस ताई भेजणा है। 18 कि तू उना दियां हखी खोले, ताकि सै नेहरे ला लौई पासे, कने शैताने दे अधिकारे ला परमेश्वरे पासे ओन; तां परमेश्वरे उना दे पाप माफ करणे, कने उना लोकां सोगी बिरासत मिल्ले, जडे मिंजो पर भरोसा करणे ला पबित्र होयो न। 19 इस ताई हे राजा अग्रिप्पा, मैं उस स्वर्गीय दर्शन दी गल्ला दा पालन किता, 20 मैं पेहेले दमिशके शेहरे दे, फिरी यरूशलेम शेहरे दे रेणे बालयां जो, फिरी सारे यहदिया प्रदेश च कने होर जातियां जो प्रचार किता, कि पाप करणा छडी दिया कने परमेश्वरे पासे फिरी करी ऐसे कम्म करा ताकि तुहाडिया जिन्दगिया ला पता लग्ये की तुसां अपने पापां ला पश्चाताप करी लिया है। 21 इसा गल्ला दिया बजा ला यहदी मिंजो मंदरे च पकडी करी मारी देंगे दी कोशिश करा दे थे। 22 पर परमेश्वरे दिया सहायता ला मैं अजे दीकर ठीक है कने छोटे बड़े सारयां दे सामणे गबाई दिन्दा है। कने मैं इना गल्लां दे सिवा कुछ नी बोलणा है, सै परमेश्वरे दे संदेश देणेबालयां कने मूसा भी बोलया है कि होंणे बालियां न, 23 कि मसीह जो दुख झेलणा पोणा

हैं, कने सै मरयां चे जिन्दा होणेबाला पैला जन होणा, इस तरीके ला उनी यहदियां च कने होर जातियां च ज्योति दा प्रचार किता।” 24 जालू पौलुस इसा रीतिया ला जबाब दे दा था, तां फेस्तुसे जोरे ला बोलया, “हे पौलुस, तू पागल है। मतिया बिधा तिजो पागल करी दितया है।” 25 पर उनी बोलया, “हे महाप्रतापी फेस्तुस, मैं पागल नी है, पर सच्चाईया कने अकली दियां गल्लां बोला दा है। 26 राजा भी ऐ गल्लां जाणदा है जिदे सामणे मैं बिना डरयो बोला दा है, कने मिजो भरोसा है इना गल्लां चे कोई भी गल्ल उसला छुपियो नी है, क्योंकि जडा यीशुऐ सोगी होया सै गुप्त च नी होया है। 27 हे राजा अग्रिप्पे, क्या तू परमेश्वरे दा संदेश देणेबालयां दा भरोसा करदा है? हां, मैं जाणदा है, कि तू भरोसा करदा है।” 28 हुण अग्रिप्पे पौलुसे जो बोलया, “कि तू क्या थोडे दे समझाणे ला मिजो मसीही बणाणां चांदा है?” 29 पौलुसे बोलया, “मेरी परमेश्वरे ला ऐ प्राथना है कि क्या थोडे च, कने क्या मते च, सिर्फ तू ही नी, पर जितणे भी लोक मेरी सुणदे न, मेरे इना बंधणा जो छडी करी मेरे साईं मसीह पर भरोसा करणे बाले होई जाना।” 30 तालू राजा अग्रिप्पा कने राज्यपाल फेस्तुस कने उदी छोटी बेहण बिरनीके कने उदे सोगी बैठयो सारे उठी होऐ कने चली गे; 31 जालू सै बाहर जा दे थे, सै इक दुज्जे ला बोलणा लग्गे, “इनी माणुऐ ऐसा कोई अपराध नी कितया है जियदिया बजा ला उसयो मौत दी सजा या जेल हो।” 32 राजा अग्रिप्पे राज्यपाल फेस्तुसे जो बोलया, “अगर ऐ माणु महाराजा कैसरे ला अपणे न्याय दी मांग नी करदा, तां छुटी सकदा था।”

27 जालू फेस्तुस राज्यपाले ऐ गल्ल पक्की किती कि असां जाजे पर इतालिया प्रदेशे जो जाणा है, तां उना पौलुसे कने कुछ होर केदियां जो भी युलियुस नाऐ दे महाराजा औगुस्तुसे दिया पलटना दे इक सरदारो दे हथे सौपी दिता। 2 अद्रुमलियुम शेहरे दे इक जाजे पर जडा आसिया प्रदेशे दे कंढे दिया जगा जो जाणे ताईं तैयार था, असां उस पर चडी करी समुंद्री यात्रा शुरू किती, कने अरिस्तर्खुस नाऐ दा इक माणु जडा मकिदुनी प्रदेशे दे थिस्सलुनीके शेहरे दा बासी था, सै साडे सोगी था। 3 दुऐ रोजे असां सैदा शेहरे च पुज्जी गे कने युलियुसे पौलुसे पर कृपा करिरी उसयो दोस्तां बाल जाणा दिता ताकि उना ला जरूरी चीजां लेई ओऐ। 4 ओथु ला असां दुबारा यात्रा शुरू किती कने होआ दा स्ख उल्टा होणे दिया बजा ला असां साइप्रस टापू दिया आडा च होईकरी चले; 5 कने असां समुंद्री यात्रा करदे होऐ किलिकिया प्रदेशे कने पंफुलिया शेहरे दे तट दे बखे ला होईकरी लूसिया प्रदेशे दे मुरा शेहरे च पुज्जे। 6 ओथु सुबेदारो जो सिकंदरिया शेहरे दा इक जाज इतालिया प्रदेशे जो जांदा होया मिल्ला, कने उनी सांझो उस जाजे पर चढाई दिता। 7 असां बडे रोजा दीकर बले-बले यात्रा किती। साडा कनिदुस शेहरे दीकर पुजणा मुशकिल होई गिया था क्योंकि होआ उल्टी दिशा च चलिया थी, इस ताईं असां क्रेते टापू दिया आडा चे, सलमोने दे इक छोटे दे टापू दे बखे ला होईकरी अगगे बदे। 8 कने मुशकिला ला उदे किनारे-किनारे चली करी शुभलंगरबारी नाऐ दिया इक्की जगा च पुज्जे, जिथू ला लसया शेहर नेडे था। 9 जालू मते रोज बिती गे थे, कने समुंद्री यात्रा हुण बडी खतरनाख होई गियो थी क्योंकि सदियां दे मौसमे च होणे बाला पन्नाताप दी बलि दा

त्योहारे होई गिया था, कने ऐ सेई मौसम था ऐसा मौसम शुरू होई गिया था जालू समुन्द्र च मौसम बडा तूफानी होई जांदा है, इस ताईं पौलुसे उना जो चेताबनी देईकरी बोलया, 10 “हे सज्जनो, मिजो ऐसा लग्गा दा है कि साडी ऐ यात्रा बडी नुकसानदायक है। ना सिर्फ जाजे कने समाने दा पर साडे प्राणा दा भी नुकसान होणेबाला है।” 11 पर सूबेदारां जाजे दे कपताने कने जाजे दे मालिके दियां गल्लां जो पौलुसे दियां गल्लां ला बदीकरी मनया। 12 कने ऐ शुभलंगरबारी बन्दरगाह सदियां कटणे ताईं खरी नी थी; इस ताईं मतयां दा बिचार होया कि ओथु ला अगगे चली करी कुसी तरिके ला होई सके तां फिनिक्स बन्दरगाह च पुज्जी करी सदियां कटन। ऐ तां क्रेते टापू दी इक बन्दरगाह है जिसा दा दरबाजा दक्षिण-पश्चिम कने उत्तर-पश्चिम दिशा च है। 13 जालू थोडी-थोडी दक्षिण होआ चलणा लग्गी, तां उना सोचया की उना दी योजना पूरी करणे ताईं ठीक बकत है, इस ताईं उना लंगर चुकया कने क्रेते टापू दे किनारे ला होंदे होऐ अगगे बढणा लग्गे। 14 पर अचानक क्रेते टापू दिया जमिना ला इक बडा तूफान उठया, जिसयो उतरपूर्वी तूफान बोलदे न। 15 जालू तूफान जाजे ला टकराया, तां जाज तूफाने अगगे नी टिकी सकया, इस ताईं असां उसयो होआ दे साबे जाणा दिता, कने इयां ही होआ सोगी चलदे गे। 16 तालू असां कौदा नाऐ दे इक टापूऐ दिया आडा च अगगे बदे कने बडिया मुशकिला ला जाजे दी जीवनरक्षक किस्तिया जो बचाया। 17 फिरी जाजे च कम्म करणे बालयां जीवनरक्षक किस्तिया जो चुकी करी ठीक किता, कने उना मजबूती ताईं पतवार जो चारो पासे ला रस्सियां ला बन्नी दिता, कने सुरतिस दिया खाडिया दिया रेटा च फसी जाणे दे डरे ला, उना लंगरे जो थोडा थले उतारी करी जाजे जो होआ दे बहाबे सोगी-सोगी रुडने ताईं छडी दिता। 18 कने जालू दुज्जे रोजे सांझो तूफाने दिया बजा ला धक्के लगे लगणा, तां सै जाजे ला माल फेंकणा लग्गे; 19 कने तरिऐ रोजे उना अपणे हथा ला जाजे दा साजो समान भी फेंकी दिता। 20 कने जालू मतयां रोजां दीकर ना सूरज ना तारे मिल्ले, कने तूफान लगातार चलया था, तां आखरी च साडे बचणे दी सारी आस खत्म होई गेई। 21 जालू उना मते रोजां दीकर कुछ नी खादा, तां पौलुसे उना दे बिच खडोई करी बोलया, “हे लोको, तुहांजो मेरी सलाह मनणी चाईदी थी, क्रेते टापू ला अगगे नी जांदे, तां ना ऐ मुसीबत ओदी कने ना ऐ घाटा होंदा। 22 पर मैं हुण तुसां जो समझांदा है कि हिम्मत रखा, क्योंकि तुसां चे कुसी दे भी प्राण नी जाणे, पर सिर्फ जाजे दा नाश होणा। 23 क्योंकि परमेश्वर जिदा मैं है, कने जिदी सेवा मैं करदा है, उदे स्वर्गदूते पिछली राती मेरे बाल आई करी बोलया, 24 हे पौलुस, डर मत। तिजो महाराजा कैसरे दे सामणे खडा होणा जरूरी है। कने परमेश्वरे सबना जो बचाई लेंगा है जडे तेरे सोगी यात्रा करा दे न। 25 इस ताईं, हे भाईयो, हिम्मत रखा; क्योंकि मैं परमेश्वरे पर भरोसा करदा है, कि जियां मिजो ला बोलया है, तियां ही होणा है। 26 पर साडा जाज कुसी टापूऐ पर टकराई टूटी जाणा।” 27 जालू चौदमी रात होई, कने असां अद्रिया समुद्रे च भटका दे थे, तां अधिया राती जाजे च कम्म करणे बालयां अण्दाजा लाया कि असां कुसी देशे दे बखे पुजणे बाले न। 28 उना समुद्रे दी गेहराई नापी तां सेंटी मीटर निकली कने थोडा अगगे जाई करी फिरी नापया तां सताईस मीटर निकलया। 29 तालू

पथरीली जगा ला टकराणे दे डेरे ला उना जाजे दे पिच्छे चार लंगर पाए, कने ब्याग होणे दी कामना करदे रे। 30 पर जाजे पर कम्म करणे बाले जाजे ला नठणा चांदे थे, कने उना जाजे दे सामणे लंगर पाणे दे बहाने जान बचाणे बाली किस्ती समुद्रे च उतारी दिती; 31 तां पौलुसे सिपाईयां कने सुबेदारां जो बोलया, “अगर ऐ जाजे पर नी रे, तां तुसां भी नी बची सकदे।” 32 तालू सिपाईयां रसियां बडी करी सै किस्ती फेंकी दिती। 33 जालू ब्याग होणे बाली थी, तां पौलुसे ऐ बोली करी, सबना जो रोटी खांणे ताई बिनती किती, “अज चौदा रोज होए कि तुसां चिंता करिरी भूखे रे, कने कुछ नी खादा। 34 इस ताई तुहांजो ला बिनती करदा है कि कुछ खाई लिया, जिसला तुसां बची सकन, क्योंकि तुसां चे कूसदा भी कोई बाल बांका नी होणा।” 35 कने ऐ बोली करी उनी रोटी लेईकरी सबना दे सामणे परमेस्वरे दा धन्याबाद किता कने तोड़ी करी खांणा लग्गा। 36 तालू उना सारयां जो हिम्मत मिल्ली कने रोटी खांणा लग्गे। 37 असां सारे मिली करी जाजे पर दो सो छिहतर जणे थे। 38 जालू सै रोटी खाई करी रजी गे, तां कणका जो समुद्रे च फेंकी करी जाजे जो हलका करणा लग्गे। 39 जालू दिन निकलया, तां उना उसी देशे जो नी पछेणया, पर इक खाडी दिखी जिसा दा चौरस किनारा था, कने बिचार किता कि होई सके तां जाजे जो ओथु लेईकरी चलन। 40 तालू उना लंगरा जो खोली करी समुद्रे च छडी दिता कने उसी बेले पाल दे रस्से खोली दिते, कने होआ दे सामणे अगला पाल चढाई करी किनारे पासे चले। 41 पर जाज रेते दे डेरे ला टकराई गिया कने जाजे दा अगला हिस्सा रेते च फसी गिया, पर जाजे दा पिछला हिस्सा लेहरां दे जोरे ला टूटणा लग्गी पिया। 42 तालू सपाइयां दा ऐ बिचार होया कि केदियां जो मारी दें, ऐसा ना होए कि कोई तेरी करी नठी जा। 43 पर सुबेदारां पौलुसे जो बचाणे ताई उना जो इस बिचार ला रोकया, कने ऐ बोलया, कि जडे तेरी सकदे न, सै पेहेले छाल देईकरी किनारे जो निकली जा। 44 कने बाकी कोई पटरां पर, कने कोई जाजे दियां होर चीजा दे सहारे निकली जा, कने इसा रीतिया ने सारे जमिना पर बची निकले।

28 जालू असां सारे सलामत बची करी किनारे पर पूजी गे, तालू सान्द्रो पता लग्गा कि इस टापू दे दा ना माल्टा था। 2 कने ओथु रेणबाले लोक बडे दयालू थे, क्योंकि उना बरखा कने ठंड दिया बजा ला अग्न वाली करी साड़ा स्वागत किता। 3 जालू पौलुसे लकड़ियां बटोली करी अग्नी पर रखियां, अग्नी दे सेके ला इक सप्प निकलया कने उदे हथे ने लिपटी गिया। 4 जालू ओथु दे रेणे बालयां उस कीडे जो उदे हथे च लटकया दिखया, तां अपु चे बोलया, “सच्ची ऐ माणु हत्यारा है, कि समुद्रे च तां बची गिया, पर साडी न्याये दी देवी नी चांदी की ऐ जिन्दा रे।” 5 तालू उनी कीडे जो अग्नी पर झटकी दिता, कने उसयो कोई नुकसान नी होया। 6 पर सै लोक नियाला दे कि उनी सूजी जाणा है, या इकदम थले पेई कि मरी जाणा है, पर जालू सै मतिया देरा दीकर दिखदे रे कने दिखया कि उसयो कुछ नी होया है, तां उना लोकां दे बिचार ही बदलूई गे कने बोलणा लग्गे, “ऐ तां कोई देवता है।” 7 उसा जगा दे अखे बखे उस टापू दे प्रधान पुबलियुसे दी जमीन थी: उनी सांझो अपने घरे लेईजाई करी तिन रोज साडी खातिरदारी किती। 8 पुबलियुसे दे पिता जो बुखार कने पेचिस बिमारी थी। पौलुसे उदे बखे जाई करी प्राथना किती, कने

उदे पर हथ रखीकरी उसयो ठीक किता। 9 जालू इयां होया, तां उस टापू दे बाकी बिमार लोक भी पौलुसे बाल आये, कने ठीक होई गे। 10 उना साडी बडी इज्जत किती, कने तिन मिहने बाद जालू असां जाणा लग्गे, तां जडा कुछ साडे ताई जस्री था, उना जाजे पर रखी दिता। 11 असां तीन मिहने बाद सिकंदरिया जाजे पर यात्रा शुरू किती। ऐ जाज सर्दियां दिया बजा ला इस टापू पर स्कया था, कने जाजे दे अगले हिस्से पर इक जोडी देवतयां दा इक निशाण दियुसकुरी बणया था। 12 सुरुकुसा शेहरे च लंगर पाई करी असां तिन दिन दीकर स्की रे। 13 असां ओथु ला अग्ने चली करी रेगियुम शेहरे च पुज्जे; इक दिन बाद दक्षिण होआ चली, तां असां दुज्जे रोजे पुतियुली शेहरे च पुज्जे। 14 ओथु सांझो कुछ मसीह भाई मिल्ले, उना दे बोलणे ला असां ओथु सत रोज रे; ओथु ला असां जमिनी रस्ते ला रोम शेहरे पासे चले। 15 रोम शेहरे दे कुछ मसीही भाईयां सुण्या की असां ओथु ओआ दे न, सै सांझो ला मिलणा कने सांझो रोम शेहर लेई जाणे ताई अप्पियुस शेहरे दे बजार कने तीन-सराए शेहरे दीकर आए, उना जो दिखीकरी पौलुसे परमेस्वरे दा धन्याबाद किता कने बडा खुश होया। 16 जालू असां रोम शेहरे च पुज्जे, तां पौलुसे जो इक सपाईए सोगी जडा उदी रखबाली करदा था, किले रेणे दा हुकम मिल्ली गिया। 17 तिन्ना रोजां बाद उनी यहूदी अगुवां दी इक सभा सदी, कने जालू सै गिठे होए तां उना जो बोलया, “हे यहूदी भाईयो, मै अपने लोकां दे या अपने पूर्वजां दे रीती रिवाजां दे खिलाफ च कुछ नी किता, फिरी भी मिंजो केदी बणाई करी यरूशलेम शेहरे ला रोमी सरकार दे हथे देई दिता। 18 उना मिंजो जाँची करी छडी देणा चाया, क्योंकि मिंजो च मौत दी सजा देणे जोगा कोई दोष नी था। 19 पर जालू यहूदी अगुवे इदे खिलाफ च बोलणा लग्गे, तां मिंजो बिनती करणा पेई की महाराजा कैसर मेरा न्याय करे; इस ताई नी कि मिंजो अपने लोकां पर कोई दोष लांणा था। 20 इस ताई मै तुहांजो सदया है, ताकि तुसां ला मिल्ले कने गलबात करे; क्योंकि इस्राएले दिया आसा ताई जडी की मसीह है, मै इना जंजीरा ला जकडया होया है।” 21 उना उसयो बोलया, “ना सांझो कोई तरे बारे च यहूदिया प्रदेशे दे लोकां ला कोई चिड्डी मिली, कने ना साडे भाईयां चे कुनी भी आई करी तरे बारे च दसया, कने ना बुरा बोलया। 22 पर तेरा बचार क्या है? सेई असां सुणना चांदे न, क्योंकि असां जाणंदे न, हर जगा इस मते दे बारे च लोक बिरोध करदे न।” 23 तालू यहूदी लोकां जडे पौलुसे सोगी थे, उना उदे ताई इक दिन तय किता, कने मते भरी लोक उना बाल गिठे होए। कने पौलुस ब्यागा ला लेईकरी संझा दीकर मूसा दी व्यवस्था ला कने परमेस्वरे दा संदेश देणेबालयां दियां कताबां ला परमेस्वरे दे राज्य दी गबाई, कने यीशु दे बारे च समझाई-समझाई करी दसदा रिया। 24 तालू थोडे लोकां पौलुसे दियां गल्लां पर भरोसा किता, कने केईयां भरोसा नी किता। 25 जालू सै अपु चे सेमत नी होए, तां पौलुसे दिया इसा इकी गल्ला पर चली गे, “पबित्र आत्मा यशायह परमेस्वरे दा संदेश देणेबाले दे जरिये तुहाडे पूर्वजां ला ठीक बोलया है, 26 जाई करी इना लोकां ने बोल: कि सुणंदे तां रेणा, पर समझणा नी है, दिखंदे तां रेणा है, पर जाणना नी है; 27 क्योंकि इना लोकां दा मन मोटा। कने उना दे कन भारी होई गियो न, कने उना अपणियां हखी बंद कितियां न, इयां ना हो कि सै हखी ला दिखन, कने

कना ला सुणन, कने मने ला समझन कने बदली जान, कने मै उना जो ठीक करे। 28 इस ताई तुसां जाणा, कि परमेश्वरे दे इस उद्वारे दी कथा होर जातियां बाल भेजइयो है, कने उना मनणी।” 29 जालू उनी ऐ बोलया तां यहदी अपु चे बेहस करणा लग्गे कने ओथु ला चली गे। 30 कने सै पुरे दो साल अपणे खर्चे पर किराए दे घरे च रिया, उना सबना दा स्वागत करदा था जड़े उसला मिलणा ओदे थे, 31 कने बिना रोक टोक कने बिना डरयो होईकरी परमेश्वरे दे राज्य दा प्रचार करदा कने प्रभु यीशु मसीह दियां गल्लां सिखांदा रिया।

रोमियो

1 ऐ चिड़ी पौलुस दिया तरफा ला है, जड़ा प्रभु यीशु मसीह दा सेवक है, कने परमेस्वरे उसयो प्रेरित होणे ताई चुण्या है, कने परमेस्वरे दा शुभसमाचार दा प्रचार करणे ताई नियुक्त कितया है। 2 पबित्र शास्त्र च परमेस्वरे अपने संदेश देणेबालयां दे जरिये बड़े पेहले ही शुभसमाचार दा वायदा कितया था, 3 ऐ शुभसमाचार उदे अपने पुत्र, साडे प्रभु यीशु मसीह दे बारे च है, उदा जन्म इक इन्सान दे स्मे च राजा दाऊदे दे बन्शे च होया था, 4 कने पबित्र आत्मा दिया शक्तिया ला जालू सै मरयां च जिन्दा होया तालू उनी साबित किता की सै परमेस्वरे दा पुत्र है। कने सै यीशु मसीह साड़ा प्रभु है। 5 मसीह दे जरिये मिजो अनुग्रह कने प्रेरिताई परमेस्वरे ला मिली ताकि उदे नाऐ दिया बजा ने सारियां जातियां दे लोक मसीह पर भरोसा करन कने उदे हुकमा जो मनन, 6 तुसां विश्वासी जडे रोम शहर च रेंदे न इना ही लोकां च शामिल न जिना जो परमेस्वरे यीशु मसीह दे होणे ताई चुण्या है। 7 ऐ चिड़ी रोम शहर च रेणेबाले उना सारयां दे ना है जिना ने परमेस्वर प्यार करदा है, कने अपने पबित्र लोक होणे ताई सदया है, साडे पिता परमेस्वरे कने प्रभु यीशु मसीह दिया तरफा ला तुसां जो अनुग्रह कने शांति मिलदी रे। 8 पेहले मै तुसां सारयां ताई यीशु मसीह दे जरिये अपने परमेस्वरे दा धन्यवाद करदा है, क्योंकि मती सारियां जगां दे लोक तुसां दे यीशु मसीह पर भरोसे दे बारे च गल्लां करा दे न। 9 परमेस्वर जिसदी सेबा मै अपने पुरे मने ने उदे पुत्रे दे बारे च शुभसमाचार दा प्रचार करदा है, सेई मेरा गबाह है, की मै अपनी प्राथना च तुसां लोकां जो लगातार याद करदा है, 10 कने हर रोज बिनती करदा है, की परमेस्वरे दी इच्छा ने कुसी ना कुसी तरीके ने आखरी च तुसां ने मिलणे दा मौका मिलले। 11 क्योंकि मै तुसां ने मिलने दी बड़ी इच्छा है, ताकि मै तुसां जो कोई आत्मिक बरदान दें जिसने तुसां भरोसे च होर भी मजबूत होई जान, 12 मेरे बोलने दा मतलब ऐ की मै तुसां जो उत्साहित करी सके क्योंकि तुसां जाणदे न की मै कियां भरोसा किता कने तुसां मिजो उत्साहित करी सकन क्योंकि मै जाणदा है की तुसां कियां भरोसा किता। 13 कने हे मसीह भाईयो, मै चांदा है की तुसां जाणी लिया की मै तुसां बाल बार-बार ओणा चांदा, की जियां मै होर जातियां च मसीह ताई चले बणाऐ, तियां ही तुसां च भी चले बणन, पर हले दीकर इदे च स्काबट ओदी रेई। 14 मेरी जिम्मेबारी सारयां लोकां जो शुभसमाचार सुणाणे दी है, चाऐ सै यूनानी भाषा जाणने बाले होन या नी जाणने बाले होन कने चाहे समझदार होन या नासमझ होन। इस ताई मेरी रोम शेहरे च तुसां ने मिलणे दी बड़ी इच्छा है। 15 इस ताई मै तुसां जो भी जडे रोम शेहरे च रेंदे न, शुभसमाचार सुणाणे जो भरपूर तैयार है। 16 क्योंकि मै मसीह दे शुभसमाचार च घमंड करदा है, क्योंकि शुभसमाचार दी शक्ति ने ही परमेस्वरे शुरू ला यहदियां जो बचाया कने हण सारे संसारे दे लोकां जो बचांदा है। 17 क्योंकि शुभसमाचार च परमेस्वर दी धार्मिकता दे बारे च दसया है, ऐ धार्मिकता शुरू ला लेईकरी आखरी दीकर भरोसे दे जरिये होंदी है, जियां पबित्र शास्त्र च लिखया है, “जड़ा माणु भरोसे दे जरिये परमेस्वरे सोगी सही बणी रेंदा है, उनी ही जिन्दा रेणा।” 18 परमेस्वरे दा गुस्सा तां, जडे बुराई कने अधार्मिक कम्म

करदे न उना लोकां पर स्वर्गे ला प्रकट होंदा है, जडे बुरे कम्म करणे दे जरिये लोकां जो परमेस्वरे दिया सच्चाईयां जो जाणने ला रोकदे न। 19 इस ताई की सै परमेस्वरे दे ज्ञाने दे बारे च असांनी ने समझी सकदे न, क्योंकि परमेस्वरे ऐ ज्ञान उना पर प्रगट कितया है। 20 क्योंकि परमेस्वरे दी हमेशा दी शक्ति कने चरित्र जो दिखी नी सकदे, पर संसार दी शुरूआत ला ही परमेस्वरे इना जो अपनी सृष्टिया ने दसया है, इस ताई उना बाल कोई भाना नी है की सै परमेस्वर जो नी जाणदे। (aidios g126) 21 इसा बजा ने की परमेस्वरे जो जाणने पर भी उना परमेस्वरे दे स्मे च इज्जत नी दीती, कने सोचणा लग्गे की ऐ बेकार गल्लां न, ऐथू दीकर की उना जो जियां सोचणा चाईदा तियां नी सोचया पर बेकार गल्लां सोचदे रे। 22 सै अपने आपे जो बुद्धिमान जताई करी मुख बणी गे, 23 कने हमेशा जिन्दा रेणेबाले परमेस्वरे दिया महिमा जो हमेशा जिन्दा नी रेणेबाले, कने पछियां, कने चारां पैरां बाले, कने रेण्णेबाले जानकरां दियां मुर्तियां साई बदलीं दिता कने इना दी पूजा करणा लग्गे। 24 इसा बजा ला परमेस्वरे उना जो उना दे मने दिया इच्छा अनुसार यौन अशुद्धता ताई छडी दिता, ताकि सै अपु चे बुरे कम्म करी के अपने शरीरां दी अनादर करन। 25 क्योंकि सै परमेस्वरे दे बारे दिया सच्चाईया पर भरोसा करणे जो मना करदे न, कने सै उसयो मंदे जडा जुट है। कने उना संसारे दी पूजा कने सेबा किती, कने ना की उस सृष्टिकर्ता दी सेबा किती। उस सृष्टिकर्ता दी जिनी सारे संसारे दियां चिजां जो बणाया है, उदी महिमा सदा होंदी रे। आमीन। (aiōn g165) 26 इस ताई तां परमेस्वरे उना जो उना दे बुरे बिचारां दे बशे च छडी दिता; ऐथू दीकर उना दियां जनानिया मर्दां सोगी जायज रिशतयां जो दुजियां जनानियां सोगी नाजायज रिशतयां च बदलीं दिता। 27 तियां ही मर्द भी जनानिया सोगी जायज रिशता छडी करी अपु चे व्यभिचार करिरी बरबाद होणे लग्गे, कने मर्दां-मर्दां सोगी व्यभिचार करिके अपने ही शरीर च अपणिया इसा गलतिया दी ठीक सजा मिलली। 28 क्योंकि जालू उना परमेस्वरे जो अपनाणा मुखता समझया, तां परमेस्वरे भी उना जो सारे नकम्मे कम्म करणे ताई उना दे नकम्मे मने दे बशे च छडी दिता। 29 इस ताई सै हर तरा दे गलत कम्मा च, बुराई च, कने लालच, कने बैरभाव ने भई गे; कने जलन, कने हत्या, कने लड़ाई झगडे, कने धोखा, कने जलन ने भई गे, कने चुगलखोर, 30 गप्पां मारणे बाले, कने होरनी दी बेस्ती करणे बाले, लडाके, घमंडी, झूठे, डिंगमार, बुरियां गल्लां करणे बाले, कने माता पिता दी गल्ल नी मनणे बाले, 31 बेअकले, धोखेबाज, दया भाव नी है कने निर्दयी होई गियो न। 32 सै तां परमेस्वरे दे नियम जो जाणदे न की ऐसा कम्म करणे बाले मौत दी सजा जोगे न, तमि ना सिर्फ अपु ऐसे कम्म करदे न कने करणे बालयां ने खुश भी होंदे न।

2 इस ताई तू सोचदा है की, तू ऐसे लोकां दी निंदा करी सकदा है, जडे दुज्जयां पर दोष लांते न; क्योंकि जिसा गल्ला पर तू दुज्जे पर दोष लांदा है, उसा ही गल्ला च तू अपने आपे जो दोषी बणांदा है, क्योंकि तू जडा दोष लांदा है सेई कम्म तू अपु करदा है। 2 कने असां जाणदे न की परमेस्वर ऐसे बुरे कम्म करणे बालयां जो न्याय अनुसार सजा दिन्दा है। 3 कने तू जडा ऐसे-ऐसे कम्म करणे बालयां पर दोष लांदा है, कने अपु सेई कम्म करदा है; तू क्या ऐ समझदा है की तू परमेस्वरे दिया सजा ला बची जाणा है? 4 तू

क्या परमेश्वर दी भलाई, कने सेहनशीलता, कने धीरज रूपी धने जो बेकार समझदा है? क्या ऐ नी समझदा की परमेश्वरे दी भलाई तिजो अपने पापां जो मनणा कने गलत कम्मा जो छडणा सिखांदी है? 5 पर क्योंकि तू जिदी कने अपने पापां दा पञ्चाताप करणे ला मना करी दिता, जिस रोज परमेश्वरे अपना गुस्सा दसणा, उस रोज सच्चा न्याय होणा, जालू परमेश्वरे न्याय करणा तालू परमेश्वरे होर भी जादा दर्दनाक सजा देणी। 6 परमेश्वरे हर इकी जो उदे कम्मा दे अनुसार इनाम देणा है। 7 जडे खरे कम्मा जो मेहनत करदे होऐ महिमा, कने आदर, कने अमरता दीया तोपा च न, उना जो परमेश्वरे हमेशा दी जिन्दगी देणी है; (aiōnios g166) 8 पर जडे मतलबी न कने सच्च जो नी मंदे न, पर बुरे कम्मा जो करदे न, उना पर परमेश्वरे दा गुस्सा कने प्रकोप पोणा है। 9 दुख कने मुशकिलां हर इक उस माणुऐ पर ओणियां न जडे बुरा करदे न, परमेश्वरे पेहले यहूदियां दा न्याय करणा है कने बादे च उना दा न्याय करणा जडे यहूदी नी न; 10 पर महिमा कने इज्जत कने शांती हर इकी जो मिलणी है, जडा भला करदा है, परमेश्वरे सारायां ला पेहले यहूदी लोकां जो देणा फिरी उना लोकां जो देणा जडे यहूदी नी न। 11 क्योंकि परमेश्वर सबना सोगी इकोदिया व्यवहार करदा है। 12 इस तांई की होर जाति दे लोकां बिना मूसा दी व्यवस्था मिलयो ही पाप किता, उना जो बिना व्यवस्था दे ही परमेश्वरे सजा देणी, कने जिना यहूदी लोकां मूसा दी व्यवस्था मिलणे बाद पाप किता, उना जो परमेश्वरे मूसा दी व्यवस्था दे अनुसार सजा देणी; 13 क्योंकि परमेश्वरे दी नजरा च धर्मी लोक सै नी न, जडे मूसा दी व्यवस्था जो सुणनेवाले न, पर परमेश्वरे दी नजरा च धर्मी लोक सै न जडे व्यवस्था दा पालन करदे न। 14 फिरी जालू होर जातियां दे लोक जिना बाल मूसा दी व्यवस्था नी है, पर स्वभावे ने ही इना कम्मा जो करदे न जडे मूसा दी व्यवस्था च लिखयो न, तां उना बाल मूसा दी व्यवस्था नी होणे पर भी से साबित करदे न की उना दे मने च ही व्यवस्था है। 15 सै दसदे न की परमेश्वरे दी व्यवस्था उना दे मना च लिखियो है, क्योंकि उना दी अंतरात्मा भी ऐई गबाई दिन्दी है की ऐ सच्च है, क्योंकि उना दे बिचार ही उना जो दसदे न की सै सही करा दे न की गलत करा दे न। 16 ऐ सच्च उस रोज सामणे आई जाणा, जालू परमेश्वरे यीशु मसीह दे जरिये जिसदा मै शुभसमाचार सुणादा है सारे माणुआं दी गुप्त गल्लां दा न्याय करणा है। 17 अगर तू अपने आप जो यहूदी बोलदा है, कने व्यवस्था पर भरोसा रखदा है, कने घमंड करदा है की तू परमेश्वर दा खास जन है, 18 कने तिजो परमेश्वर दी इच्छा पता है, तू खरियाँ-खरियाँ गल्लां दा साथ दिन्दा है, क्योंकि तिजो इना दे बारे च मूसा दी व्यवस्था च सिखाया है; 19 कने तिजो इसा गल्ला दा पक्का पता है की, तू अन्ने लोकां जो परमेश्वर दा रस्ता दसदा है, कने तू उना लोकां तांई लौई सांई है जडे नेहे च रेदे न, 20 कने बेअकलां जो सिखाणे बाला, कने बचयां दा गुरू है। तिजो पक्का पता है क्योंकि मूसा दी व्यवस्था तेरे बाल है, कने तू पूरी तरा सब कुछ जाणदा है कने तू जडा बोलदा है सै सच्च है। 21 इस तांई तू जडा बाकियां जो शिक्षा दिन्दा है, सै शिक्षा अपने आप जो कनी दिन्दा? तू जडा चोरी नी करणे दी शिक्षा दिन्दा है, कने अपु ही चोरी करदा है। 22 तू जडा ऐ सिखांदा है, “व्यभिचार मत करा,” अपु ही तां व्यभिचार करदा है! तू जडा मूर्तियां ने

नफरत करदा है, अपु ही तां मंदरा जो लुटदा है! 23 तू इसा गल्ला पर घमंड करदा है की तेरे बाल परमेश्वरे दी व्यवस्था है, क्या तू अपु ही व्यवस्था जो नी मन्नी करी, परमेश्वरे दा अनादर नी करदा? 24 “क्योंकि तुसां यहूदियां दिया बजा ने, होर जाति दे लोक परमेश्वरे दे बारे च बुरियां गल्लां करदे न,” तूहाडे इना कम्मा दिया बजा ने पबित्र शास्त्र दियां गल्लां सच्च होइयां न। 25 मै तिजो समझांदां है, की तेरा खतना होणे दा फायदा तालू ही है अगर तू व्यवस्था जो पूरा करे, पर अगर व्यवस्था च जियां लिखया तू तियां नी करे, तां तुसां खतना होयो यहूदी लोक भी होर जातियां सांई न जिना दा खतना नी होया। 26 तां इदा मतलब है की अगर कोई माणु जिदा खतना नी होया कने सै व्यवस्था दे नियमा जो मनदा है, तां परमेश्वर ऐसे माणुऐ जो भी उस माणुऐ सांई दिखदा है जिदा खतना होया है। 27 कने जडा माणु शरीरिक स्पे च बिना खतना रिया सै अगर व्यवस्था जो मनदा है, तां क्या उनी तिजो पर जिस बाल मूसा दी व्यवस्था है कने खतना होणे पर भी व्यवस्था जो नी मनदा है, दोष नी लाणा? 28 क्योंकि सच्चा यहूदी सै नी जडा यहूदी पैदा होया कने जिदा खतना होया। 29 क्योंकि इक सच्चा यहूदी सै है जिदा मन परमेश्वरे सोगी सही है कने सच्चा खतना सिर्फ मूसा दे नियम-कानून मनणे नी है, पर मने दा बदलना है जडा की परमेश्वरे दी आत्मा ने होंदा है। ऐसे लोकां दी महिमा लोकां दे जरिये नी पर परमेश्वरे दिया तरफा ला होंदी है।

3 तां कोई बोली सकदा है की अगर खतना होई जाणे पर भी परमेश्वर यहूदियां जो अपनांदा नी तां यहूदी दा यहूदी होणे दा क्या फायदा, कने खतने दा क्या फायदा? 2 हाँ, इदा बडा फायदा है। क्योंकि सारायां ला जरूरी गल्ल ऐ है की, परमेश्वरे दा बचन यहूदियों जो दितया है। 3 अगर कुछ यहूदी परमेश्वर सोगी बफादार नी भी निकले तां भी क्या है? क्या इदा मतलब ऐ है की परमेश्वरे भी अपने बायदे ला मुकरी जाणा जडा उनी यहूदी लोकां ने किता? 4 नी बिलकुल भी नी! परमेश्वर हमेशा सच्च बोलदा है, कने हर इक माणु झूठा होऐ, जियां पबित्र शास्त्र च परमेश्वरे दे बारे च लिखया है, “जिसने तू अपणियां गल्लां च धर्मी होऐ कने न्याय करदे बेले तेरी जय होऐ।” 5 पर अगर साडे बुरे कम्म परमेश्वरे दी धार्मिकता दसदे न, तां असां क्या बोलणा? क्या ऐ गलत है की परमेश्वर गुस्सा होई जाए कने सांझो सजा दे? (ऐ तां मै माणुऐ दिया रीतिया पर बोलदा है।) 6 नी बिलकुल भी नी! अगर परमेश्वर साडा यहूदियां दा न्याय करणे च सही नी है, तां सै सारे संसारे दे लोकां दा न्याय कियां करणा? 7 कुछ लोक बोली सकदे न, “पर अगर मेरा झूठ परमेश्वरे दिया सच्चाईया जो उजागर करदा है कने उसयो होर जादा महिमा मिलदी है तां सै कियां मेरा न्याय करी सकदा है कने मिंजो इक पापी दे स्पे च दोषी बणाई सकदा है?” 8 असां बोली सकदे न की “चला असां बुरे कम्म करन, ताकि इदे च कोई भलाई निकले?” जियां की सांझो पर ऐई दोष लगांदे भी न, कने थोडे बोलंदे न की इना दा ऐई बोलणा है। पर जडे मेरे बारे च इयूदियां गल्लां करदे न सै सजा दे काबिल न। 9 तां फिरी क्या होया? क्या असां यहूदी लोक होर जातियां दे लोकां ला खरे न? नी बिलकुल भी नी! क्योंकि असां यहूदियां कने होर जातियां दोनो पर ऐ दोष लाई बैठयो न की सै

सारे लोक पाप दिया शक्तिया दे बशे च न। 10 जियां पबित्र शास्त्र च लिखया है: “परमेश्वर दे सामणे कोई भी धर्मी नी है, इक भी नी।” 11 ऐथू कोई भी माणु नी है जडा समझी सके की क्या सही है; कोई भी परमेश्वरे जो नी जाणना चांदा। 12 सारे परमेश्वरे ला दूर चली गे, कने सारे दे सारे परमेश्वरे ताई निकमे बणी गे; भलाई करणे बाला कोई भी नी, इक भी नी। 13 उना दा गला खुलियो कबरा सांई है जिसा ला बडी बदबू ओदी है: क्योंकि सै अपनी जिबा ने बुरा बोलदे न, कने जडा बोलदे न सै सांणे दे जेहरे सांई खतरनाख होंदा है। 14 कने उना दे भाषण श्राप कने कडवाट ने भस्यो न। 15 सै हत्या करणे तांई फुतीले न। 16 जिथू कुथी सै जांदे न सै बुराई कने दुख जो लेई ओदे न। 17 सै नी जाणदे न की कियां शांति ने जि न। 18 उना च परमेश्वर दा डर है ही नी। 19 असां जाणदे न, की व्यवस्था जडा कुछ भी बोलदी है सै उना ने ही बोलदी है, जडे व्यवस्था दे अधीन न, इस तांई की लोकां जो भाना बणाने ला रोकया जाये, कने सारे संसारे दे लोक परमेश्वर दे सामणे हिसाब देणेबाले होई जान। 20 क्योंकि व्यवस्था च दितयो हुकमा जो मनणे ने कोई भी माणु परमेश्वरे सामणे धर्मी नी बणदा, क्योंकि मूसा दी व्यवस्था सांझो दसदी है की असां पापी न। 21 पर हुण बिना मूसा दी व्यवस्था दे हुकमा जो मनयो परमेश्वर दी धार्मिकता प्रकट होई है, ऐ मूसा की व्यवस्था कने परमेश्वरे दे संदेश देणेबालयां दियां कताबां च लिखया है की असां कियां परमेश्वरे दे जरिये धर्मी बणे, 22 मतलब की परमेश्वरे दे सामणे धर्मी तालू बणदे न जालू असां यीशु मसीह पर भरोसा करदे न। क्योंकि हुण यहूदी कने होर जाति च कोई फरक नी है। 23 इस तांई की सारयां पाप कितया है कने परमेश्वरे दी उस महिमा ला दूर न जडी परमेश्वर दिंदा है, 24 पर परमेश्वरे दे अनुग्रह ने उनी सांझो यीशु मसीह दे जरिये पाप दी सजा ला अजाद किता जडा यीशु मसीह च है, परमेश्वर सांझो बिना कुछ कितयो धर्मी घोषित करी दिन्दा है। 25 परमेश्वरे यीशु मसीह जो सूली पर चढना दिता ताकि उदा खून लोकां दे पापां जो माफ करणे दा जरिया बणी सके, जडे उस पर भरोसा करदे न। परमेश्वरे ऐसा ऐ दसणे तांई किता की सै धर्मी है। पूरणे बकते च परमेश्वरे सबर रखीकरी लोकां दे पापां जो अणदिखा किता, पर हुण सै लोकां दे पापां ने निपटदा है, ताकि सै अपनी धार्मिकता दस्सी सके। इयां परमेश्वर साबित करदा है की सै धर्मी है कने यीशु पर भरोसा करणे बालयां जो भी धर्मी बणादा है। 27 तां हुण ऐसा कुछ है जिस पर असां घमंड करन? नी, ऐसा कुछ नी जिदे बारे च असां घमंड करी सकन। कुण दे नियमा दिया बजा ने? क्या साडे व्यवस्था दे कम्मा जो पूरा करणे ने? नी, पर यीशु मसीह पर भरोसा करणे दी दिया बजा ने। 28 इस तांई असां जाणदे न की परमेश्वरे सांझो यीशु मसीह पर भरोसा करणे ने धर्मी घोषित करी दितया है, ना कि मूसा दी व्यवस्था जो मनणे ने। 29 परमेश्वर सिर्फ यहूदियां दा ही परमेश्वर नी है, पर होर जातियां दा भी परमेश्वर है। 30 क्योंकि इक ही परमेश्वर है, जिनी खतने बालयां जो भरोसे ने कने जिना दा खतना नी होया उना जो भरोसे दे जरिये धर्मी घोषित किता है। 31 तां क्या असां व्यवस्था जो भरोसे दे जरिये बेकार बणादे न? नी बिलकुल भी नी! पर असां तां व्यवस्था जो उसा दा सही महत्व देदे न।

4 तां असां यहूदी होणे दे नांते अपने पूर्वज अब्राहमे दे बारे च क्या बोलन? की उसयो कुसा बजा ला धर्मी गिणया? 2 क्योंकि अगर अब्राहम भले कम्मा ने धर्मी बणदा, तां सै घमंड करी सकदा था, पर हुण सै परमेश्वरे सामणे अपने भले कम्मा पर घमंड नी करी सकदा। 3 पबित्र शास्त्र क्या बोलदा है? ऐ की “अब्राहमे परमेश्वरे दे वायदे पर भरोसा किता, कने इसी ने ही परमेश्वरे अब्राहमे जो धर्मी बणया।” 4 कम्म करणे बाले दी मजदूरी देणा दान नी है, पर ऐ हक समझया जांदा है। 5 कुण परमेश्वर दा अनुग्रह पाणे तांई कम्म नी करदा है, पर जडा पापी लोकां जो धर्मी ठहराणे बाले परमेश्वरे पर भरोसा करदा है, उदा भरोसा उदे तांई धार्मिकता गिणया जांदा है। 6 जियां पबित्र शास्त्र च दाऊद उना आशीषां दे बारे च लिखदा है, जडियां उना लोकां जो मिलदियां न जिना जो परमेश्वरे धर्मी बणाई दिता, चाहे उना धर्मी बणने तांई कोई कम्म नी किता, दाऊद भी इना जो धन्य बोलदा है; 7 “धन्य सै न, जिना दे अधर्म परमेश्वरे माफ किते, कने जिना दे पाप भुलाई दिते। 8 धन्य न सै माणु परमेश्वर जीना दे पापां दा लेखा जोखा नी रखदा।” 9 तां क्या ऐ धन्य बचन खतने बालयां तांई ही है, या जिना दा खतना नी होया है उना तांई भी है? असां ऐ बोला दे न की पबित्र शास्त्र क्या बोलदा है, अब्राहमे परमेश्वरे दे वायदे पर भरोसा किता, कने इसी ने ही परमेश्वरे अब्राहमे जो धर्मी बणया। 10 तां सै धर्मी कालू बणया? क्या खतना होणे ला पेहले या खतना होणे बाद? अब्राहम खतना होणे ला बाद नी, पर खतना होणे ला पेहले धर्मी बणया। 11 परमेश्वरे उसयो पेहले ही अपनाई लिया था कने उसयो धर्मी घोषित करी दितया था, जबकि उदा हले भी खतना नी होया था, खतने दा निशाण उस अपनाणे दी मोहर है। इस तांई सै उना लोकां दा पूर्वज है जिना बाल भरोसा है पर उना दा खतना नी होया है। इना जो इना दे भरोसे दिया बजा ने धर्मी गिणया जांदा है। 12 कने अब्राहम उना खतना कितयो लोकां दा पूर्वज होया, जडे ना सिर्फ खतने पर आस रखदे न, पर उना बाल सियुदा ही भरोसा है, जडा साडे पूर्वज अब्राहमे खतना करणे ला पेहले कितया था। 13 परमेश्वरे अब्राहम कने उदे बंशजा ने बायदा किता की सै पुरे संसार दे वारिस होणे न, परमेश्वरे ऐ बायदा इस तांई नी किता की अब्राहमे मूसा दे हुकमा जो मनया, पर अब्राहमे जो भरोसे दिया बजा ने परमेश्वरे धर्मी बणया। 14 क्योंकि अगर परमेश्वरे दा अब्राहम कने उदे बंशजा जो संसार देणे दा वायदा सिर्फ उना ही लोकां तांई है जडे मूसा दी व्यवस्था दे हुकमा जो मंदे न, तां भरोसा बेकार है कने परमेश्वरे दे बायदे दा भी कोई मतलब नी रिया। 15 परमेश्वर तां उना लोकां जो सजा दिन्दा जडे व्यवस्था जो पूरी तरा नी मंदे, पर जिथू व्यवस्था है ही नी, ओथू व्यवस्था दा उलंघन भी नी होंदा। 16 इस तांई लोकां जो परमेश्वरे दा बायदा उना दे भरोसे दे जरिये मिल्ला। ऐ इस तांई होया की परमेश्वरे दा वायदा अनुग्रह दे जरिये मिल्ले, तालू अब्राहम दे सारे बंशा बाल ऐ वायदा हो, ऐ सिर्फ उना तांई ही नी है जडे मूसा दी व्यवस्था पर चलदे न, पर हर इक उस माणु तांई जडा अब्राहमे सांई भरोसे सोगी जिन्दगी जिंदा है, जडा असां सारयां दा पूर्वज है। 17 जियां पबित्र शास्त्रां च लिखया है, “मैं तिजो मतियां जातियां दा पूर्वज बणया है” परमेश्वरे दे सामणे अब्राहम साडा पिता है। उना उस परमेश्वरे पर भरोसा किता, जडा मरयां जो फिरी जिन्दा

करदा है कने जडियां चीजां मोजूद भी नी न, उना दा ना इयां लेंदा है, की जियां की सै चीजां मोजूद न। 18 परमेस्वरे अब्राहम जो बोलया की सै तिजो मते सारे बंशज दिगा, पर अब्राहमे सोचया की मैं बड़ा बुढ़ा होई गया है, क्योंकि उस बकत सै लगबग सौ सालां दा होई गया था कने सारा भी बच्चे पैदा नी करी सकदी थी। तां ऐ पक्का ही था की अब्राहम कदी भी मतियां जातियां दा पिता नी बणी सकदा था, पर फिर भी अब्राहम अपने भरोसे च कमजोर नी होया कने सै लगातार भरोसा रखदा रिया कने उम्मीदा जो टूटना नी दिता। 20 कने ना ही अविश्वासी होईकरी परमेस्वरे दे बायदे पर शक किता, पर भरोसे च मजबूत होईकरी परमेस्वरे दी महिमा किती, 21 कने पक्का यकीन किता की जिसा गल्ला दा परमेस्वरे वायदा कितया है, सै इस बायदे जो पूरा करणे दे भी काबिल है। 22 उदे भरोसे दिया बजा ने ही परमेस्वरे अब्राहमे जो धर्मी बनाया, 23 कने इस बचन कने भरोसे दिया बजा ने ही परमेस्वरे अब्राहमे जो धर्मी बनाया, “ना सिर्फ उदे ताई लिखया गया,” 24 बल्कि साडे ताई भी जिना जो परमेस्वरे धर्मी घोषित करणा, मतलब की अगर असां परमेस्वरे पर भरोसा करगे, जिनी साडे प्रभु यीशु मसीह जो मरयां चे जिन्दा किता, तां असां भी भरोसे दिया बजा ने धर्मी मन्ने जाणे। 25 यीशु मसीह साडे पापां ताई मरी गया, कने परमेस्वरे उसयो दुबारा जिंदा किता ताकि परमेस्वर सांझो धर्मी बनाए।

5 इस ताई असां भरोसे ने धर्मी बणे, क्योंकि जडा प्रभु यीशु मसीह साडे ताई कितया है, उदे जरिये असां परमेस्वरे सोगी शांति ने रेन, 2 क्योंकि साडे भरोसे दिया बजा ला यीशु मसीह सांझो इस अनुग्रह च लेईकरी आया जिथू असां हुण न, कने असां पूरी हिम्मत कने खुशिया ने परमेस्वरे दी महिमा च हिस्सेदार होणा। 3 सिर्फ ऐ ही नी, बल्कि सांझो दुखां च भी खुश रेणा चाईदा, क्योंकि असां जाणदे न की दुख सेहणे ने असां होर जादा सहनशील बणेदे न, 4 परमेस्वरे सांझो अपनाई लिया क्योंकि असां दुखां च सेहणा सीखी लिया है, कने परमेस्वर सांझो अपनांदा है इस ताई सांझो आस है; 5 कने आस ने सांझो शर्मिंदगी नी होंदी, क्योंकि पबित्र आत्मा जडी परमेस्वरे सांझो दितियो है उदे जरिये परमेस्वरे सांझे मना जो प्यार ने भरी दितया है। 6 क्योंकि जालू असां कमजोर थे, तालू मसीह परमेस्वरे दे चुणयो बकत पर बुरे लोकां ताई मरया। 7 ऐ कुसी ताई कठिन है की कोई धर्मी माणुऐ ताई अपनी जान देई दे, होई भी सकदा है की भले माणुऐ ताई अपनी जान देणे दी इच्छा रखे। 8 पर परमेस्वर सांझो पर अपने प्यार दी भलाई इस तरीके ने प्रगट करदा है, की जालू असां पापी ही थे तालू मसीह सांझे ताई मरया। 9 जालू असां हुण धर्मी बणे क्योंकि यीशु मसीह सांझे ताई मरया कने सांझे पापां ताई अपना खून बहाया, तां सांझो यकीन है की मसीह सांझो परमेस्वरे दे गुस्से ला बचाणा? 10 क्योंकि जालू असां परमेस्वरे दे दुश्मन ही थे तमी उदे पुत्र यीशु दे मरणे ने साडा मेल परमेस्वरे सोगी होया, इस ताई सांझो पक्का पता है की हुण साडा मेल शान्ति ने परमेस्वरे सोगी है, मसीह सांझो बचाणा क्योंकि मसीह जिन्दा है। 11 कने सिर्फ ऐ ही नी, पर हुण तां सांझे प्रभु यीशु मसीह दे जरिये परमेस्वरे ने साडा मेल होई गया है, इस ताई असां परमेस्वर च खुश न। 12

इस ताई जालू इक माणुऐ दिया बजा ने पाप संसार च आया, आदम पेहला माणु है जिसयो परमेस्वरे बनाया कने आदमे पाप किता कने मरी गया, कने जिसदी बजा ने सै सारे लोक जडे इस संसार च पैदा होए, सै सारे मरे, क्योंकि सब पापी बणी गे। 13 मूसा दी व्यवस्था दिते जाणे ला पेहले ही लोकां पाप किता, पर इसयो पाप नी गिणया क्योंकि तालू कोई व्यवस्था नी थी कने कोई नियम भी नी टुटया था। 14 तमी आदम ला लेईकरी मूसा दीकर सारयां लोकां पाप किता कने सारे मरी गे, जिना आदम साई कुसी तरा दे हुकम नी मन्णे ने पाप नी कितया था। आदम दे पापे इना सारयां लोकां पर प्रभाव पाया, ठीक तियां ही जियां मसीह किता जडा उदे बाद आया। 15 पर आदम दा पाप उस बरदान साई नी है जडा परमेस्वर सांझो अपने अनुग्रह ला दिन्दा है, क्योंकि इक माणुऐ दा पाप मते लोकां ताई मौत लेईकरी आया। पर परमेस्वरे दा अनुग्रह बड़ा महान है, जडा उनी सांझो दितया है, उदी कीमत मतयां लोकां ताई उसला बडी जादा है। यीशु मसीह इक माणुऐ दे स्मे च अपने अनुग्रह ला जडा किता, उनी इसयो संभव किता। 16 जडा तोफा परमेस्वर सांझो दिन्दा है सै आदम दे पाप साई नी है, क्योंकि इक पाप सजा लेईकरी आया, पर चाहे असां मते सारे पाप किते न, परमेस्वरे सांझो सै तोफा दिता जिसने असां धर्मी बणदे न। 17 क्योंकि जालू इक माणुऐ दे पापां दिया बजा ने मौत सारे लोकां पर आई गेई, तां जिना लोकां जो अनुग्रह कने धार्मिकता दा बरदान मता सारा मिलदा है उना जो इक माणुऐ दे, मतलब की यीशु मसीह दे जरिये हमेशा दी जिन्दगी मिलणी कने उना राज्य भी करणा। 18 इस ताई जियां इक पाप सारे माणुआं ताई सजा लेईकरी आया, तियां ही इक धार्मिकता दा कम्म भी सारयां लोकां ताई धर्मी बणने दी बजा बणी जडा जिन्दगी दिन्दा है। 19 क्योंकि जियां इक माणुऐ दे हुकम नी मन्णे ने मते लोक पापी बणे, तियां ही इक माणुऐ दे हुकम मन्णे ने मते लोकां धर्मी बणना है। 20 मूसा दी व्यवस्था दिति गेई ताकि सारे लोक जाणी सकन की सै कितणे पापी न, पर जालू लोकां पाप पर पाप किते, तां परमेस्वरे अपनी दया कने अनुग्रह होर भी जादा दसया, 21 जियां सारयां पाप किता कने सारे मरी गे, तियां ही सांझे प्रभु यीशु मसीह दे जरिये परमेस्वरे दे अनुग्रह ने उना जो धर्मी बनाणा कने उना जो हमेशा दी जिन्दगी देणी। (aiōnios g166)

6 तू सोचदा है, की अगर परमेस्वरे अपने अनुग्रह ने सांझे पापां जो माफ करी दितया है, पर असां ऐसा ना सोचन, चला असां पाप करदे रैन ताकि अनुग्रह होर जादा हो। 2 नी बिलकुल भी नी! अगर असां पाप ताई इक बरी मरी गे तां सांझो लगातार पाप नी करणा है। 3 असां जाणदे न की जालू असां यीशु मसीह सोगी इक होणे ताई बपतिस्मा लिया, तां असां यीशु मसीह सोगी मरी गे। 4 जालू असां बपतिस्मा लिया तां ऐ ऐसा था जियां असां मसीह सोगी मरी गे कने उस सोगी दफनाई दिते, ताकि जियां मसीहा पिता परमेस्वर दिया महिमा दे जरिये मरयां चे जिन्दा किता, तियां ही असां भी नोई जिन्दगिया जो नोए तरीके ने जिन। 5 क्योंकि अगर असां बपतिस्मे जरिये यीशु दी मौता च उदे सोगी इक होई गे, तां पक्का है की असां उदे जिन्दे होणे पर उदे सोगी इक होई जाणा। 6 क्योंकि असां जाणदे न की साडा पराणा पापी सभाव यीशु

मसीह सोगी सूली पर चढ़ाया गया, ताकि शरीर दा पापी सभाब खत्म होई जाऐ, कने असां अग्रे जो पाप दे गुलाम नी रेन। 7 क्योंकि जालू असां मसीह सोगी मरी गे तां असां पाप दी शक्ति ला मुक्त होई गे। 8 इस तांई अगर असां मसीह सोगी मरी भी गे, तां साडा भरोसा ऐ भी है की उदे सोगी जीणा भी है, 9 क्योंकि असां जाणदे न की, मसीह मरी करी जिन्दा होया कने फिरी कदी नी मरणा है। मौत दा उस पर कोई हक नी है। 10 क्योंकि यीशु मसीहा जडा मरी गया तां पाप तांई इक ही बरी मरी गया; पर जडी जिन्दगी सै जी दा है, सै परमेस्वर दे आदर तांई जिंदा है। 11 इयां ही तुसां भी अपने आपे जो पापे दी शक्ति तांई मरया होया समझा, पर परमेस्वरे तांई यीशु मसीह जो इज्जत देणे तांई जिया। 12 इस तांई पापी इच्छां जो अपणिया जिन्दगिया पर राज करणा मत दिया, ताकि तुसां अपणियां पापी इच्छा दे अनुसार कम्म ना करन। 13 कने ना अपने शरीर दे अंगा जो बुरे कम्मा तांई इस्तेमाल करा, पर अपने आपे जो मरयां चे जिन्दा समझीकरी अपने आपे जो परमेस्वरे जो दिया, कने अपने शरीर दे अंगा जो धार्मिकता दे कम्मा जो पूरा करणे तांई अपणी जिन्दगी परमेस्वरे जो दिया। 14 तां तुसां पर पाप दी शक्तिया राज्य नी करणा, क्योंकि तुसां मूसा दी व्यवस्था दे अधीन नी पर परमेस्वर दे अनुग्रह दे अधीन न। 15 तां क्या होया? अगर हुण असां व्यवस्था दे अधीन नी न पर परमेस्वरे दे अनुग्रह दे अधीन न, तां सांझो पाप नी करणा चाईदा। 16 तुसां ऐ जाणदे न की जालू तुसां अपने आपे जो कुसी दा गुलाम बणाई दिन्दे न, तां फिरी सै माणु तुहाडा मालिक है कने तुसां जो सै करणा चाईदा जडा सै बोलदा है: तुसां पाप दे गुलाम बणी सकदे न, जडा तुसां जो मौता पासे लेई जांदा है, या तुसां परमेस्वरे दे गुलाम बणी सकदे न, जडा तुसां जो धार्मिक जिंदगी जिणे च अगुवाई करदा है। 17 तुसां जडे पाप दे गुलाम थे, पर हुण तुसां उस शिक्षा जो मंदे न जडी तुसां जो मिल्ली है, इदे तांई मैं परमेस्वर दा धन्यावाद करदा है, 18 परमेस्वरे तुसां जो पाप दी शक्ति ला अजाद करी दिता कने तुसां परमेस्वर दे गुलाम बणी गे, की सै करणे तांई जडा सही है। 19 मैं गुलामी दा ऐ उदाहरण तुसां जो इस तांई दिता ताकि तुसां असां नी समझी सकन की मैं क्या सिखा दा है। जियां तुसां अपने शरीर दे अंगा जो बुरे कम्म कने अपवित्रता दी गुलामी तांई देई दिता, तियां ही हुण अपने शरीर दे अंगा जो भले कम्म कने पवित्रता दे गुलाम होणे तांई देई दिया। 20 जालू तुसां पाप दे गुलाम थे, तां तुसां दी भले कम्मा जो करणे दी कोई इच्छा नी थी। 21 तुसां बुरे कम्म किते, कने तुसां हुण इना कम्मा ला शरमिंदा होंदे न। तां तुसां जो क्या मिल्ला? ऐसे कम्म सिर्फ मौत लेईकरी ओदे न। 22 पर हुण पाप ला अजाद होईकरी कने परमेस्वरे दे गुलाम बणी करी तुसां दे ऐसे कम्म जिन्दगी च पवित्रता लेईकरी ओदे न, कने उना दा अंत हमेशा दी जिन्दगी है। (aiōnios g166) 23 क्योंकि पाप दा नतीजा मौत है, पर सै बरदान जडा परमेस्वर सांझो दिन्दा है, सै हमेशा दी जिन्दगी है जडी साडे प्रभु यीशु मसीह च है। (aiōnios g166)

7 हे मसीह भाईयो, तुसां जाणदे न (मैं व्यवस्था जो जाणने बालयां जो बोलदा हे) की जालू दीकर माणु जिन्दा रेंदा है, तालू दीकर ही उस व्यवस्था दा अधिकार उस पर है? 2 उदाहरण तांई, व्यवस्था दे अनुसार इक माणु ऐ दी घरे

बाली उदी ही घरे बाली बणी की रे जालू दीकर उसा दा घरेबाला जिन्दा है, पर जालू उसा दा घरेबाला मरी गया, तां सै कुसी होरसी ने बियाह करणे तांई अजाद है, पर अगर सै अपने घरे बाले दे होंदे होए कुसी होरसी माणु ऐ सोगी चली जाऐ, तां उसयो व्यभिचारणी बोलदे न। 4 तां हे मेरे मसीह भाईयो, जालू तुसां मसीह सोगी मरी गे, तां तुसां व्यवस्था दे अधिकार तांई भी मरी गे। हुण तुसां मसीह दे न जडा मरयां चे जिन्दा होई गया ताकि तुसां परमेस्वरे तांई फलदायक जिन्दगी जी सकन। 5 क्योंकि जालू असां पापी सभाब दे बशे होंदे न, तां पापी इच्छां साडे अंदर कम्म करदियां न कने व्यवस्था इना पापी इच्छां जो जगाई दिदिया न कने मौत दा फल पैदा करणे तांई साडे शरीर च कम्म करदियां न। 6 पर असां व्यवस्था तांई मरी गे जिना सांझो गुलाम बणया था, पर हुण व्यवस्था ला अजाद होई गे न, हुण असां लिखियो व्यवस्था जो परमेस्वरे दी सेवा मन्नी करी नी करदे न, पर आत्मा दियां गल्लां जो मनी करी नोए तरीके ने सेवा करी सकदे न। 7 तां असां क्या बोलणा? क्या व्यवस्था पाप है? नी बिलकुल भी नी! पर व्यवस्था ने मिंजो पता चला की पाप क्या है। मिंजो समझ आया की लालच करणा पाप है क्योंकि ऐ व्यवस्था च लिखया है, की लालच मत कर। 8 पर पापे इना हुकमा दा इस्तेमाल करिके मिंजो च हर तरह दा लालच पैदा किता, क्योंकि बिना व्यवस्था दे पाप मुर्दा है। 9 मैं तां व्यवस्था बिना जाणयो जिन्दा था, पर जालू मैं व्यवस्था जो जाणी लिया, तां पाप करणे दी इच्छां मेरे अंदर बदी गियां, कने मैं परमेस्वरे ला लग होई गया। 10 कने सेई हुकम जिना जो परमेस्वरे मिंजो जिन्दगी देणे तांई दितया था, इना ही मिंजो परमेस्वर ला लग करी दिता। 11 क्योंकि पापे इना हुकमा दा इस्तेमाल करिके मिंजो धोखा देई दिता, कने उनी ही मिंजो परमेस्वरे ला लग करी दिता। 12 इस तांई व्यवस्था पाप नी पर पवित्र है, कने हुकम पवित्र, धर्मी कने सही है। 13 क्या व्यवस्था जडी खरी थी, मिंजो परमेस्वरे ला लग होणे दी बजा बणी? सै जडी खरी थी, मिंजो परमेस्वरे ला दूर करणे दी बजा बणी? नी बिलकुल भी नी! पर ऐ पाप था जिनी ऐ किता, पापे व्यवस्था जो इस्तेमाल किता जडी सही थी, ताकि सै मिंजो परमेस्वरे ला लग करे, इस तरीके ने पापे दस्सी दिता की सै सच्ची च क्या है, कने हुकम दस्सी दिता की पाप बुरा है। 14 क्योंकि असां जाणदे न की व्यवस्था तां आत्मिक है, पर मैं शारीरिक माणु कने पाप दा गुलाम है। 15 कने जडा मैं करदा है उसयो नी जाणदा, क्योंकि जडा मैं चांदा है सै नी करदा, बल्कि सै ही करदा है, जिसला मैं नफरत करदा है। 16 कने अगर, जडा मैं नी चांदा है सेई बुरे कम्म मैं करदा है, तां मैं मनी लेंदा है की व्यवस्था खरी है। 17 तां ऐसी हालत च जडा बुरे कम्म करणे बाला है सै मैं नी, पर पाप है जडा मिंजो च बसया है। 18 क्योंकि मैं जाणदा है, की मेरे पापी सभाब च कुछ भी खरा नी है, भले कम्म करणे दी इच्छा तां मिंजो च है, पर भले कम्म मिंजो ला होंदे नी। 19 क्योंकि जिस खरे कम्मे दी इच्छा मैं करदा है, सै तां नी करदा, पर जिसा बुराईया दी इच्छा नी करदा, सेई करदा है। 20 पर अगर मैं सेई करदा है जिसदी इच्छा नी करदा है, तां इसयो करणे बाला मैं नी है, पर सै पाप है जडा मिंजो च बसया है। 21 ऐथ मिंजो इस सच दा अहसास होंदा है की जालू भी मिंजो खरा करणे दी इच्छा होंदी है, तां मैं सेई करदा है जडा बुरा है। 22

क्योंकि मैं अपने पुरे मने ला तां परमेश्वरे दिया व्यवस्था ला बड़ा खुश रेंदा है। 23 पर मिंजो अपने शरीर दे अंगा च कोई होर ही व्यवस्था मिल्ला दी है, जडी मेरिया मने दिया व्यवस्था ला लडदी है कने ऐ शक्ति मिंजो पाप दा गुलाम बनादी है जडी हले भी मेरे शरीर दे अंगा च कम्म करदी है। 24 मैं कदिया अभागा माणु है! मिंजो इस शरीर ला कुण छुडागां, जडा मिंजो परमेश्वरे ला लग करदा है? 25 मैं मने ला तां परमेश्वरे दिया व्यवस्था जो मनदा, पर शरीर ला पाप दिया व्यवस्था जो मनदा है। मैं परमेश्वरे दा धन्यवाद करदा है जिनी मिंजो प्रभु यीशु मसीह दे जरिये बचाई लिया।

8 इसा बजा ला हुण जडे यीशु मसीह च न, उना जो सजा दा हुकम नी है।

2 क्योंकि पबित्र आत्मा तुसां जो से जिन्दगी दिन्दा है, जडी यीशु मसीह ला ओदी है कने से तुसां जो पाप कने मौत ला अजाद करदी है। 3 क्योंकि जडा कम्म मूसा दी व्यवस्था साडा पापी सभाव होणे दिया बजा ने नी करी सकी, सै परमेश्वरे किता, मतलब की अपने ही पुत्रे जो साडे पापी शरीर सांई बनाई करी साडे पापां तांई बलिदान होणे तांई भेजी दिता, परमेश्वरे मसीह दे शरीर च पाप जो सजा दिती। 4 इस तांई की व्यवस्था जडी धर्मी होणे तांई जिना गल्लां दी मांग करदी है, पर असां पापी सभाव दे अनुसार नी पर पबित्र आत्मा दे अनुसार चली करी इना गल्लां जो पूरा करदे न। 5 क्योंकि जडे लोक पापी सभाव दे बशे च रेंदे न, सै पापी गल्लां दे बारे च सोचदे न, पर जडे पबित्र आत्मा दे बशे च रेंदे न सै उना गल्लां दे बारे च बिचार करदे न जडियां आत्मा जो खुश करदियां न। 6 अगर तुसां अपने मन जो पापी सभाव दे बशे च रखदे न तां उदा नतीजा मौत है, पर अगर तुसां अपने मने जो पबित्र आत्मा दे बशे च रखगे तां उदा इनाम जिन्दगी कने शांति है। 7 क्योंकि पापी सभाव दे बशे च रेणा तां परमेश्वरे ने बैर रखणा है, क्योंकि पापी सभाव ना तां परमेश्वरे दिया व्यवस्था दे अधीन है, कने ना ही उदिया व्यवस्था दा पालन करी सकदा है। 8 कने जडे पापी सभाव दे बशे च न, सै परमेश्वरे जो खुश नी करी सकदे। 9 पर जालू परमेश्वरे दी आत्मा तुसां च बसदी है, तां तुसां पापी सभाव दे बशे च नी न, पर आत्मा दे बशे च न। अगर कुसी च मसीह दी आत्मा नी है तां सै मसीह दा नी है। 10 अगर मसीह तुसां च है, तां पाप दिया बजा ने शरीर मरया होणे पर भी धार्मिकता दिया बजा ने तुहाडी आत्मा जिन्दा है। 11 कने अगर परमेश्वरे दी आत्मा जिना यीशुऐ जो मरी करी जिन्दा किता जडी तुसां च बसियो है; तां जिनी यीशु मसीह जो मरयां चे जिन्दा किता उनी तुहाडे मरणे बाले शरीर जो अपणिया आत्मा दे जरिये जिन्दा करणा। 12 तां हे मसीह भाईयो, सांझो हुकम मनणा चाईदा, पर सै नी जडा साडा पापी सभाव चांदा है की असां करन। 13 क्योंकि अगर तुसां पापी सभाव दे अनुसार जिन्दगी जीगे, तां तुसां परमेश्वरे ला लग होई जाणा, अगर तुसां पबित्र आत्मा दिया शक्तिया ला सै सब करणा बंद नी करगे जडा तुहाडा पापी सभाव करणा चांदा है, तां तुसां जिन्दा रेंणा। 14 इस तांई की जितणे लोक परमेश्वरे दिया आत्मा दे चलाणे ने चलदे न, से ही परमेश्वरे दे बच्चे न। 15 क्योंकि तुसां जो गुलामी दी आत्मा नी मिलियो है, की तुसां फिरी परमेश्वरे ला डरन, पर तुहांजो परमेश्वरे दी आत्मा मिल्ली है जालू उनी तुसां जो अपने बच्चे होणे तांई गोद लिया, जिसने असां हे बापू, हे पिता बोली करी पुकारदे न।

रोमियो

16 पबित्र आत्मा अपु ही साडिया आत्मा सोगी गबाई दिन्दा है, की असां परमेश्वरे दी ओलाद न। 17 कने अगर ओलाद न, तां वारिस भी न, बल्कि परमेश्वरे दे वारिस कने मसीह सोगी वारिस न, अगर असां यीशु सांई दुखां जो सेहन करदे न। तां असां भी उदी महिमा च हिस्सा लेणा। 18 मिंजो पक्का यकीन है, की जिना दुख तकलिफां जो असां इस बकत सेहन करा दे न, ऐ दुख तकलीफ उस महिमा दे सामणे बडे घट न जडी सांझो परमेश्वर बादे च देंगे बाला है, 19 क्योंकि सारी सृष्टि बडिया आसा सोगी उस बकत दा इंतजार करा दी है, जालू परमेश्वरे प्रगट करणा है की उदे बच्चे कुण न। 20 क्योंकि परमेश्वरे जडा कुछ भी संसार च बनाया, सै बेकार होई गया, इस तांई नी होया की सै चांदे थे, पर ऐ इस तांई होया की परमेश्वरे ऐसा किता। पर फिर भी इक आस है। 21 की संसार उस दिने दा इंतजार करा दा है, जालू संसारे मौत कने बिनाश दी गुलामी ला अजाद होई जाणा कने परमेश्वरे दे बचयां दी महिमामय आजादी च हिसेदार होंगा। 22 क्योंकि असां जाणदे न, जालू ला आदमे पाप किता, तालू ला लेइकरी हुणे दीकर जितणियां भी चीजां जो परमेश्वरे बनाया, सै पीडा ने इयां चिखदियां न जियां इक जनानी बच्चे जो जमणे बकत चिखदी है। 23 कने सिर्फ संसार ही नी जडा पीडा सेहन करा दा है, पर असां भी पबित्र आत्मा जरिये होणे बाली महिमा दा स्वाद चखणा है, हालांकि असां अंदर-अंदर ही पीडा सेहन करदे न; पर असां हुण भी उस बकते दा इंतजार करदे न जालू परमेश्वर सांझो अपने बच्चे होणे तांई उपर लेई जाणा है कने साडे शरीर जो उना सारियां बुरियां चीजां ला छुटकारा देई देणा कने सांझो नोए शरीरां जो देईकरी साडे शरीरां जो अजाद करणा है। 24 परमेश्वरे जालू सांझो बचाया तालू सांझो ऐ आस दिती, की हल्ले दीकर सांझो सै सब कुछ नी मिल्ला जिसदा परमेश्वरे वायदा कितया, इस तांई सांझो अजे भी आस है की सै सब कुछ मिलणा है। इस तांई हुण असां सबर रखीकरी इंतजार करदे न जालू दीकर सै मिल्ली ना जाऐ। क्योंकि कोई भी उसा चिजा जो पाणे दी इच्छा नी करदा जडी पेहले ला ही उदे बाल है। 26 इयां ही पबित्र आत्मा भी साडी तालू सहायता करदा है जालू असां अपने परमेश्वरे पर भरोसे च कमजोर होंदे न, क्योंकि असां नी जाणदे की प्राथना किया करणा चाईदी, पर पबित्र आत्मा अपु ही रोई-रोई करी साडे तांई बिनती करदी है, सै असां दस्सी नी सकदे न। 27 कने मना जो जाणने बाला परमेश्वर जाणदा है, की पबित्र आत्मा क्या बोला दी है? क्योंकि सै पबित्र लोकां तांई परमेश्वरे दिया इच्छा अनुसार बिनती करदा है। 28 कने असां जाणदे न, की जडे लोक परमेश्वरे ला प्यार रखदे न, उना लोकां तांई सारियां गल्लां मिलिकरी भलाई जो ही पैदा करदियां न, मतलब की उना तांई जडे उदिया इच्छा अनुसार चुणयो न। 29 क्योंकि जिना जो उनी पेहले ला ही चुण्या है, उना तांई पेहले ला ही निर्णय भी लिया है, की सै उदे पुत्रे सांई बणी जान ताकि सै मते भाईयां चे जेठा पुत्र बणन। 30 फिरी जिना तांई परमेश्वरे पेहले ला ही तय कितया है, उना जो ही चुण्या भी, कने जिना जो चुण्या है, उना जो धर्मी भी बनाया है, कने जिना जो धर्मी बनाया, परमेश्वरे अपणी महिमा उना सोगी बंडणी है। 31 तां असां इना गल्लां दे बारे च सोची करी इसी नतीजे पर ओदे न, अगर परमेश्वर साडे पासे है, तां कोई भी दुश्मण सांझो हराई नी सकदा। 32 जिनी

परमेश्वर अपने इकलौते पुत्रे जो साडे ताई बलिदान करी दिता, कने साडे ताई उसयो दुशमणा दे हथे देई दिता, तां उनी सांझो सै सब कुछ भी देणा जिसदा उनी सांझो ने वायदा कितया है। 33 कोई भी परमेश्वर दे सामणे सांझो पर दोष नी लगाई सकदा, क्योंकि सेई है जडा अपने सोगी सांझो धर्मी बनादा है। 34 कोई भी साडी बुराई नी करी सकदा, क्योंकि ऐ यीशु मसीह है, जडा साडे ताई मरी गया कने मरी करी जिन्दा होई गया था, कने जडा साडे ताई परमेश्वरे ला बिनती करदा है। 35 कोई भी सांझो मसीह दे प्यार ला लग नी करी सकदा, ना ही दुख, ना ही मुसिबतां, ना ही सताया जाणा, ना ही अकाल, ना ही गरीबी, ना ही खतरा, कने ना ही तलवार इना चे इक भी नी। 36 जियां पबित्र शास्त्र च लिखया है, “परमेश्वरे ताई हर दिन लोक सांझो जानी ला मारणे दी धमकी दिन्दे। सांझो बलि देंगे बालियां भेडां सांई समझया गया।” 37 पर इना सारे बुरे हालातां च उदे जरिये साडी पूरी जित है, जिनी सांझो ने प्यार किता है। 38 क्योंकि मै पक्का जाणदा है की, कुछ भी सांझो प्यार करणे बाले मसीह ला दूर नी करी सकदा, इसला कोई फरक नी पोंदा की असां जिन्दे न या मुर्दा, स्वर्गदूत, अधिकारी, कने अम्बरे दियां शक्तियां इस काबिल नी की उदे प्यार ला लग करी सकन कने जडा कुछ हुण होआ दा है कने जडा कुछ अग्रे होणा, कने सारे संसारे च जडा सब कुछ है इस काबिल नी है की सांझो परमेश्वरे दे प्यारे ला जडा साडे प्रभु यीशु मसीह च है लग करी सके।

9 हुण कुछ भी नी है जडा सांझो परमेश्वरे दे प्यार ला लग करी सकदा है, तां फिरी कजो इस्राएली लोक, मेरे यहूदी भाई परमेश्वरे ला लग न? मेरा मन मेरे अपने लोकां ताई बड़ा दुखी होँदा है, क्योंकि मै ऐशू दीकर चांदा की अपने लोकां दा उद्धार करणे ताई मै मसीह ला लग होई जां कने अरोपी बणी जां, मै ऐ करणे ताई तैयार भी है। मै मसीह जो गबाह मन्नी करी सच्च बोला दा है। पबित्र आत्मा कने मेरी अंतरात्मा भी ऐ जाणदे न की मै झूठ नी बोला दा है। 4 सै मेरे सांई इस्राएली लोक न, इना जो परमेश्वरे अपने गोद लियो बच्चे होणे ताई चुणया, महिमा, बाचा, मूसा दी व्यवस्था, परमेश्वरे दी भक्ति कने बायदा उना दी है। 5 अब्राहम, इसहाक कने याकूब उना दे पूर्वज न, जडे शरीरिक तौर पर प्रभु यीशु मसीह दे भी पूर्वज न कने पिता परमेश्वर जडा सबना पर राज करदा है, उदी महिमा युगां-युगां दीकर होंदी रे। आमीन। (aiōn g165) 6 पर ऐ नी की, परमेश्वरे अपने वायदे पुरे नी करी सकया, इस ताई होया की जडे इस्राएले दे बंशज न सै असल च सारे इस्राएली नी न; 7 कने अब्राहम दे बंशे च पैदा होणे ने ही सारे उदी सच्चि ओलाद नी बणदे, क्योंकि परमेश्वरे अब्राहम ने बोल्या “जडे इसहाक दे बंश च पैदा होंदे न, सेई तैरे बंश मन्ने जाणे ना।” 8 मतलब की जडे शरीर ने पैदा होंदे न, सै परमेश्वरे दी ओलाद नी है, पर सिर्फ बायदा कितयो ओलाद ही अब्राहम दे बंश मन्ने जान। 9 क्योंकि बायदे दा बचन ऐ है, “मै अगले साल इस बकत दुबारा ओणा कने तालू सारा जो इक पुत्र होणा।” 10 कने सिर्फ ऐई नी, पर रिबका दे जुडवा जागतां दा इक ही पिता था, साडा पूर्वज इसहाक। 11 कने ऐशू दीकर उना दे पैदा होणे ला पहले परमेश्वरे रिबका ने बोल्या, की उदे बडे जागते छोट्टे जागदे दी सेवा करणी। परमेश्वरे ऐसा इस ताई बोल्या की

परमेश्वर अपनी इच्छा ने ही चुणदा है, ऐ इस ताई नी होया की इना बचयां चे कुनी कुछ कितया था, पर परमेश्वर ही है जडा ऐ चुनाव करदा है। 13 जियां पबित्र शास्त्र च लिखया है, “मै याकूब ने प्यार किता, पर एसाब ने प्यार नी किता।” 14 तां असां इदे बारे च क्या बोलन? क्या परमेश्वरे उना लोकां जो चुणने च अन्याय करदा है जिना जो सै चुणना चांदा है? नी बिलकुल भी नी! 15 क्योंकि परमेश्वरे मूसा ला बोल्या, “मै जिस पर दया करणा चांगा उस पर दया करणी, कने जिस कुसी पर कृपा करणा चांगा उस पर कृपा करणी।” 16 इस ताई परमेश्वर उसी जो ही चुणदा है जिस पर दया दसणा चांदा है, परमेश्वरे दा चुणना इसा गल्ला पर निर्भर नी करदा है की लोक क्या चांदे न या क्या करणे दी कोशिश करदे न। 17 क्योंकि पबित्र शास्त्र च परमेश्वरे मिम्र दे राजा फिरौन जो बोल्या, “मै तिजो इसी ताई राजा बणाया है, की तिजो पर अपनी शक्ति दस्से, कने मेरे नाऐ दा प्रचार सारे संसार दे लोकां च हो।” 18 कने सै जिसयो चांदा हे, उस पर दया करदा हे, कने जिसयो चांदा हे, उसयो जिद्दी बणाई दिन्दा है। 19 फिरी कुछ लोकां मिजो ने बोलणा, “अगर ऐसा है तां परमेश्वर कियां बोली सकदा है की असां गलत न? क्योंकि कोई भी उसयो नी रोकी सकदा जडा सै करणा चांदा है।” 20 हे भाई, तू कुण है, जडा परमेश्वरे ने बेहस करदा है? क्या बणाई होई चीज बणाणे बाले पुच्छी सकदी है, “की तू मिजो ऐसा कजो बणाया?” 21 कुम्हारे जो क्या मीटिया पर हक नी, की सै इकी ही मीटिया ला, इक बांडा आदर ताई, कने दूजा अनादर ताई बणाऐ, 22 तां इदे च कुण देई हेरानी दी गल्ल है की परमेश्वरे अपना गुस्सा दसणे ताई कने अपनी शक्ति प्रगट करणे दिया इच्छा ला गुस्से दे भांडयां दी, जडे विनाश ताई तैयार कितयो थे, बडे सबर ने सेहन किती। 23 जिना लोकां पर परमेश्वर दया करगा, जिना जो उनी अपनी महिमा च हिस्सेदारी ताई पेहेले ही चुणया है, उना पर अपणिया बड़ी जादा महिमा दे धने जो प्रगट करणे दी इच्छा किती? 24 मतलब की असां पर जिना जो उनी ना सिर्फ यहूदियां चे बल्कि होर जातियां चे भी चुणया। 25 जियां होर जातियां दे बारे च, परमेश्वर उदा संदेश देणेबाले होसे दिया कताबां च भी बोलदा है, “जडी मेरी प्रजा नी थी, उना जो अपनी प्रजा बोलणा, कने जडे मेरे प्यारे लोक नी थी, उना जो मै प्यारे बोलणा; 26 कने इयां होणा की जिसा जगा च परमेश्वरे उना जो ऐ बोल्या था, की तुसां मेरे लोक नी न, उसा ही जगा च जिन्दा परमेश्वरे उना जो अपनी संतान बोलणा।” 27 कने परमेश्वरे दा संदेश देणेबाले यशायाह इस्राएल दे लोकां बारे च पुकारी करी बोलदा है, “चाऐ इस्राएले दे लोक गिणतिया च समुद्रे दे कंडे दिया रेता सांई मते भरी न, तमी उना चे थोडे ही बचणा।” 28 क्योंकि प्रभुऐ जल्दी ही संसारे लोकां दा न्याय सच्चचाईया ने करणा। 29 जियां परमेश्वरे दा संदेश देणेबाले यशायाह पेहेले भी बोल्या था, “अगर सबते शक्तिशाली प्रभु इस काबिल नी बणादां की साडे कुछ बंश होन, तां असां सदोम कने अमोरा शेहरां दे लोकां सांई खत्म होई जांदे।” 30 तां असां इदे बारे च क्या बोलन? ऐ की होर जातियां अपने आप जो परमेश्वरे सोगी ठीक करणे दी कोशिश नी करदे थे, पर परमेश्वरे उना जो अपने सोगी धर्मी बणाया क्योंकि उना उस पर भरोसा किता; 31 पर इस्राएली लोक, जडे मूसा दी व्यवस्था जो मन्नी करी परमेश्वरे दे जरिये धर्मी होणा चांदे थे, पर सै

धर्मी बणने च सफल नी होए। 32 ऐ कियां होई सकदा है? इस ताई की इस्राएली लोक भरोसे ने नी, पर भले कम्मा धर्मी होणा चांदे थे: उना मसीह जो नी अपनाया जिदी उस पथरे सोगी तुलना करी सकदे न जिसला लोकां जो ठोकर लगदी है। 33 जियां पबित्र शास्त्र च लिखया है, “दिखा मैं यरूशलेम शहर च लोकां जो ठोकर लगणे ताई इक पथर रखा दा है जिसला लोकां डेई पोणा है, कने जडा इस पर भरोसा करगा, उनी शर्मिदा नी होणा।”

10 हे मसीह भाईयो, मेरे मने दी इच्छा कने इस्राएली लोकां ताई परमेश्वरे ने ऐ मेरी प्राथना है, की परमेश्वर उना जो बचाई ले। 2 क्योंकि मैं उना दी गबाई दिन्दा है, की सै परमेश्वरे ताई उत्साहित रेदे न, पर परमेश्वर दी सेवा करणे दी उना दी समझ सही नी है। 3 क्योंकि इस्राएली लोक परमेश्वरे दिया उसा धार्मिकता ला अनजान होईकरी कने अपने ही तरीके ने धर्मी बणने दी कोशिश करदे न, उना अपने आपे जो परमेश्वरे दिया धार्मिकता दे अधीन नी किता। 4 क्योंकि व्यवस्था दा मकसद हुण पूरा होई गया है की मसीह आई गया है। इस ताई हर कोई जडा मसीह पर भरोसा करदा है, उसयो परमेश्वर धर्मी बणादा है। 5 क्योंकि मूसा व्यवस्था ला मिलियो धार्मिकता दे बारे च परमेश्वरे दे बचन च ऐ लिखया है, “की जडा माणु इना गल्लां जो मनदा है, उसयो इसी ने ही जिन्दगी मिलणी।” 6 पर जडी धार्मिकता सांझो मसीह पर भरोसा करणे ने मिलदी है, इदे बारे च पबित्र शास्त्र ऐ बोलदा है, “तू अपने मने च ऐ मत बोलदा की कुण स्वर्गे पर चढगा कने मसीह जो थले धरती पर उतारगा?” 7 या कुण अधोलोक च उतरगा कने कुण मसीह जो मरयां चे जिन्दा करिरी उपर लेई ओगा? (Abyssos g12) 8 क्या है इदा मतलब? “ऐ की परमेश्वरे दा बचन तेरे बाल है, तेरे मुऐ कने तेरे मने च,” ऐ सेई भरोसे दा संदेश है, जडा असां प्रचार करदे न। 9 इस ताई अगर तू अपने मुऐ ला यीशु मसीह जो प्रभु मन्नी लेदां है कने अपने मने ने भरोसा करे, की परमेश्वरे उसयो मरयां चे जिन्दा कितया है, तां पक्का परमेश्वरे तिजो बचाणा। 10 जालू असां अपने मने ला भरोसा करदे न तां असां परमेश्वरे असां परमेश्वर दी नजरा धर्मी बणदे न, कने जडा भरोसा असां अपने मने च कितया उसयो मुऐ ला बोलदे न, तां असां बचाये जाणे न। 11 क्योंकि परमेश्वरे दा संदेश देणेबाले यशायाह पबित्र शास्त्र च मसीह दे बारे च ऐ लिखदा है, “जडा कोई उस पर भरोसा करगा उनी शर्मिदा नी होणा।” 12 यहदियां कने होर जातियां च कोई फरक नी, क्योंकि परमेश्वर सारयां दा प्रभु है, कने जडे भी उसला सहायता मंगदे न, सै उना जो बचादां है। 13 क्योंकि पबित्र शास्त्र च ऐ लिखया है “जडा कोई भी उसला सहायता मंगदा है प्रभु उना जो बचादां है।” 14 पर इसला पेहले की लोक प्रभु ला सहायता मंगन, उना जो प्रभु पर भरोसा करणा है, इसला पेहले की सै प्रभु पर भरोसा करन, उना जो उदे बारे च सुणना है कने लोक प्रभु दे बारे च सुणन, तां कुसी जो उना जो यीशु मसीह पर भरोसा करणे दे बारे च दसणा है। 15 कने इसला पेहले कोई जाई करी उना जो बोले, की उस माणुऐ जो प्रचार करणे ताई भेजणा चाईदा, इस ताई पबित्र शास्त्र च लिखया है, “क्या ही छेल उना दे पैर न जडे शुभसमाचार लेईकरी ओदे न।” 16 पर सारयां उस शुभसमाचार पर भरोसा नी किता। परमेश्वरे दा संदेश देणेबाले यशायाह बोलदा है, “हे प्रभु, थोडे लोकां साडे

संदेश पर भरोसा किता है?” 17 इस ताई भरोसा तालू ओदा है जालू असां संदेश सुणदे न, कने यीशु मसीह दे बचन सुणने ला ओदा है। 18 पर मैं बोलदा है, की इस्राएली लोकां पक्का ही यीशु मसीह दे संदेश दे बारे च सुणया है, क्योंकि ऐ पबित्र शास्त्र च लिखया है, “उना दे बचन सारिया धरती पर न, कने उना दे बचन धरतिया दे कुणे-कुणे दीकर पुज्जी गियो न।” 19 मैं फिरी बोलदा है, की ऐ सच्च है की इस्राएल दे लोक मसीह दे संदेश दे बारे च समझदे थे, पेहले तां प्रभुऐ मूसा दे जरिये ऐ बोलया, “तुसां यहदी लोकां मेरा होर जातियां ताई प्यार दिखीकरी जलना है, मैं तुसां जो मुख होर जातियां ला गुस्सा चडाणा।” 20 फिरी परमेश्वरे दा संदेश देणेबाला यशायाह बडिया हिम्मत ला ऐ बचन सुणाया की, “जडे मिजो नी तोपदे थे, उना मिजो पाई लिया; कने जडे मिजो पछदे भी नी थे, उना पर मैं प्रगट होई गया।” 21 पर परमेश्वरे संदेश देणेबाले यशायाह दे जरिये इस्राएली लोकां दे बारे च बोलया है, “मैं सारा दिन अपने हथ इक हुकम नी मनणे बाली कने बेहस करणे बाली प्रजा पासे फेलादां रिया की सै मेरे पासे मुडन।”

11 इस ताई मैं पुछदा है, क्या परमेश्वरे अपणिया प्रजा जो छडीं दिता? नी बिलकुल नी! मैं भी तां इस्राएली है; अब्राहम दे बंश कने बिन्यामीन दे गोत्र दा है। 2 परमेश्वरे अपणिया उस प्रजा जो नी छडया, जिसा जो उनी पेहले ला ही चुणया था: तुसां जाणदे न की पबित्र शास्त्र परमेश्वरे दा संदेश देणेबाले एलिय्याह दे बारे च क्या बोलदा है: की सै इस्राएली लोकां दे खिलाफ परमेश्वरे ने बिनती करदा है। 3 उनी बोलया “प्रभु जी, उना तेरे संदेश देणेबालां जो मारी दिता, कने उना तेरिया वेदिया जो डाई दितया है, मैं ही सिर्फ किला बचया जडा तिजो पर भरोसा करदा है, सै मिजो भी मारणे ताई तोपा दे न।” 4 पर परमेश्वरे एलिय्याह ने बोलया, “मैं अपने ताई सत हजार माणुऐ जो रखया है, जडे बाल देवता दी मूर्तिया अगे नी झुके।” 5 इयां ही हुण भी, परमेश्वर दे अनुग्रह ने ऐथू थोडे दे यहदी न जिना जो परमेश्वरे अपने सच्चे लोक होणे ताई चुणया है। 6 परमेश्वरे उना जो अनुग्रह दे जरिये चुणया है, ऐ भले कम्म करणे ने नी होया है। अगर ऐ भले कम्मा ने है, तां अनुग्रह फिरी अनुग्रह नी रिया। 7 इदा नतीजा ऐ होया: की इस्राएली लोकां परमेश्वर दिया नजरा च धर्मी बणने दी कोशिश किती, पर कामयाब नी होऐ, पर जिना लोकां जो परमेश्वरे चुणया, सै परमेश्वरे दिया नजरा च धर्मी बणे। दुजयां जो जिडी बणाई दिता कने उना परमेश्वरे दी सुणने ला मना करी दिता। 8 जियां पबित्र शास्त्र च यशायाह लिखया है, “परमेश्वरे उना जो हले दीकर सुस्त दिमाग दितया है, उना दियां हखी तां हेन पर उना जो सच्चाई नी मिलदी कने कन्ना ला सुणदे तां हेन, पर समझदे नी न।” 9 कने राजा दाऊद बोलदा है, “मैं विनती करदा है की उना लोकां दियां सारियां आशीषां उना जो खत्म होणे दी बजा बणी जा, ऐथू दीकर की सै उजडीं जान कने उना जो सजा मिल्ले। 10 कने उना दियां हखी अनिया होई जान, ताकि सै दिखी नी सकन, कने हर बकत अपणी मुसीबतां च दबुई रेन।” 11 तां मैं पुछदा है, की उना क्या इस ताई: “क्या इस्राएली लोक ठोकर लगणे दिया बजा ने हमेशा ताई खत्म होई गियो न? नी बिलकुल नी! पर उना दे अक्विवास दिया बजा ने होर जातियां जो उद्धार मिल्ला, ताकि इस्राएली लोकां जो होर जातियां ला जलन हो।” 12

अगर इस्राएली लोगों का अविश्वास होर जातियां दी भलाई दी बजा बणदा है, तां इस्राएली लोगों का परमेश्वर बाल बापस ओणे पर बड़ा अच्छा होणा। 13 मैं होर जातियां ने ऐ गल्लां बोलदा है। हुण जालू मैं होर जातियां तांई प्रेरित है, मिंजो अपनी सेबकाई पर घमंड है। 14 ताकि मैं कियों भी करिरी यहदी लोगों जो जलन करवाई करी उना चे केईयां जो बचाई सके। 15 क्योंकि जालू की उना दा परमेश्वर जो छडी जाणे दिया बजा ने संसारे दे लोगों दा परमेश्वर सोगी मेल होया था, तां उना दा मसीह जो अपनाणा, इक मरयो होऐ माणुऐ सांई होणा जड़ा दुबारा जिन्दा होई गया है। 16 मैं इस्राएली लोगों दे बारे च तुसां जो इक उदाहरण दिन्दा है। ऐ साड़ा इस्राएली लोगों दा रिबाज है, असां जालू रोटी बणाने तांई आटा गुन्दे न, तां असां परमेश्वर जो भेंट चढ़ाणे तांई मुठी भर आटा लेंदे न, अगर सै इक मुठी परमेश्वर दी है, तां इदा मतलब है की पूरा आटा भी परमेश्वर दा है। तियां अगर स्खे दी जड़ परमेश्वर दी है, तां इदा मतलब है की स्खे दियां सारियां डालियाँ भी परमेश्वर दियां न। 17 इस्राएली लोक इक अच्छे जैतून स्खे दियां डालियाँ सांई न कने उना दे पूर्वज अब्राहम, इसहाक कने याकूब उस स्खे दियां जड़ा सांई न। होर जातियां जंगली जैतून स्खे दियां डालियाँ सांई न, जड़ियां कलम करी के उना बडियां डालियाँ दिया जगा च उस अच्छे जैतून स्खे च लाइयां न, हुण सै डालियाँ उस स्खे दिया जड़ा दियां हिस्सेदार न। 18 तां तू अपने आप जो उना बडियां डालियाँ ला जादा मत समझदे। अगर तू जादा समझदा है, तां याद रख की तू जड़ा जो नी सम्भालदा, पर जड़ तिजो सम्भालदी है। 19 तां तू अपने मने च ऐ मत सोचदा की परमेश्वर इस्राएली लोगों जो उना डालियाँ सांई ठुकराई दिता जड़ियां इक स्खे ला तोडी दितियां जांदियां, ताकि सै होर जातियां जो अपनाई सके, जड़ियां उना डालियाँ सांई न जिना जो कलम कितया है। 20 ऐ सच है, सै तां अविश्वास दिया बजा ने तोडियां, पर तू अपने भरोसे दिया बजा ने टिकी रेंदा है, इस तांई घमंड मत कर, पर परमेश्वर दा डर मन, 21 क्योंकि जालू परमेश्वर असली डालियाँ पर दया नी किती, तां तिजो पर भी दया नी करणी। 22 इस तांई तू परमेश्वर दिया कृपा कने सकताई पर बिचार कर! पर जडे डेई पियो न उना पर सकताई कने तिजो पर दया, अगर तू उदिया दया च बणी रे, नी तां तू भी कटी करी लग करी देणा। 23 अगर इस्राएली लोक भी भरोसा करणा शुरू करगे तां उना जो फिरी ला कलम लगाई देणे न, क्योंकि परमेश्वर उना जो फिरी कलम करी सकदा है। 24 कुसी जंगली डालिया दा अच्छे स्खे दा हिस्सा बणना स्थाभिक नी है। कने तुसां जडे यहदी नी न इक जंगली जैतून स्खे ला बडियां डालियाँ सांई न कने इक अच्छे जैतून स्खे ने जुडी गियो न। पर सै यहदी इक डालिया सांई न जडी अच्छे स्खे च बड़ई थी, उना जो पक्का ही दुबारा ला अपने स्खे ने जोडया जाई सकदा है। 25 हे मेरे मसीह भाईयो, मैं नी चांदा की तुसां इसा गल्ला ला अनजान रिया, इयां ना हो की तुसां अपने पर घमंड करणा लगी पो न, ऐ सच है की इस्राएल दे केई लोक भरोसा करणे तांई तैयार नी न, पर जालू परमेश्वर पर भरोसा करणे बाली होर जातियां दे लोकों दी संख्या पूरी होई जांगी, तां इस्राएल दे लोकों भरोसा करणा कने परमेश्वर बाल बापस आई जाणा। 26 इयां होणे बाद सारे इस्राएली लोकों दा उद्धार होणा, जियां पबित्र शास्त्र च लिखया है, “छुड़णे

बाले यस्शलेम शेर ला ओणा है, कने अभक्ति जो याकूबे दे बंश ला दूर करणा। 27 कने उना सोगी मेरा ऐई बायदा होणा, जालू की मैं उना दे पापां जो माफ करी देणा।” 28 यहदी लोक परमेश्वर दे दुश्मण न, क्योंकि सै श्भसमाचार पर भरोसा नी करणा चांदे न, कने ऐ तुहाडे तांई फायदा बणी गया है। पर परमेश्वर उना ने प्यार करदा है क्योंकि परमेश्वर उना जो अपने तांई चुणी लिया। इसा गल्ला दा परमेश्वर उना पूर्वजां ने बायदा कितया था। 29 क्योंकि परमेश्वर अपने बरदाना ने, कने बुलाहट ला कदी भी अपना मन नी बदलदे। 30 क्योंकि जियां होर जातियां दे लोकों पेहले परमेश्वर दा हुकम नी मनया पर इस्राएली लोकों दे हुकम नी मनणे दिया बजा ला हुण तुसां पर दया होई है। 31 तियां ही उना भी हुण हुकम नी मनया की तुसां पर जडी दया होंदी है इसला उना पर भी दया हो। 32 क्योंकि परमेश्वर सारायां जो हुकम नी मनणे दी आजादी दिन्दा है, ताकि परमेश्वर सारायां लोकों पर अपनी दया दस्सी सके। (eleāsē g1653) 33 वाह, परमेश्वर दे अनुग्रह दा धन कने अकल, कने ज्ञान कितणा ही गंभीर है! कोई भी उदे सोच बिचार जो नी जाणी सकदा, कने ना ही उदे रस्तयां जो जाणी सकदा है! 34 “प्रभु दे बिचारां जो कोई भी नी जाणी सकदा, ना ही कोई उदा सलाहकार बणी सकदा है,” 35 कने कुनी भी परमेश्वर जो कुछ नी दितया की परमेश्वर जो सै उसयो बापस करणा पोऐ। 36 क्योंकि सब कुछ परमेश्वर ला ओंदा है। उनी सब कुछ बणाया है, सब कुछ उदा है। उदी महिमा युगां-युगां दीकर होंदी रे। आमीन। (aiōn g165)

12 इस तांई हे मसीह भाईयो, मैं तुसां ला परमेश्वर दी दया याद करवाई करी बिनती करदा है, की तू अपनी जिन्दगिया जो जिन्दी, पबित्र, कने परमेश्वर जो खुश करणे बाला बलिदान करिरी चढ़ा; परमेश्वर दी सेवा करणे दा ऐई सही तरिका है। 2 कने इस संसारे दे लोकों सांई मत बणा; पर तुहाडे सोचणे दे तरीके जो परमेश्वर जो बदलना दे ताकि तुहाडा चाल चलण भी बदली जाए, इयां करिके तुसां जो पता लगी जाणा की परमेश्वर क्या चांदा है, कने उदिया नजरा च क्या भला, सिद्ध कने सही है। (aiōn g165) 3 क्योंकि मैं उस अनुग्रह दिया बजा ला जड़ा परमेश्वर ला मिंजो मिलया है, तुसां चे हर इकी जो बोलदा है, की जियां समझणा चाईदा, उसला बदीकरी कोई भी अपने आपे जो ना समझे; पर जियां परमेश्वर हर इकी दे उदे भरोसे दे अनुसार बंडया है, तियां ही अच्छी समझा ने अपने आपे जो समझा। 4 क्योंकि जियां साडे इक शरीर च मते भरी अंग न, कने सारे अंगा दा कम्म इकोदिया नी है; 5 तियां ही, असां जालू मसीह पर भरोसा करदे न, असां सारे मसीह दे शरीर दे अंग न, कने असां सारे इक दुज्जे ने जुडयो न। 6 कने जालू की उस अनुग्रह दे अनुसार जड़ा परमेश्वर सांझो दितया है, सांझो लग-लग बरदान मिलयो न। तां जिसयो भविष्यदाणी दा बरदान मिलया हो, उसयो सै बोलणा चाईदा जिसदा उसयो भरोसा है की सै परमेश्वर उसयो बोलया है। 7 अगर दुज्जयां दी सहायता करणे दा बरदान मिलया हो, तां इस कम्मे च लगी रे, अगर कोई सिखाणे बाला हो, तां सिखाणे च लगी रे; 8 अगर कुसी जो लोकों जो उत्साहित करणे दा बरदान मिलया हो, सै उत्साहित करणे च लगी रे, अगर कुसी जो दुज्जयां दी जरूरतां जो पूरा करणे दा बरदान हो, तां उस दान जो जादा ला जादा दे कर, अगर कुसी जो अगुवाई करणे दा बरदान मिलया हो,

तां सै पूरी लगन ने करे, जडा दया करे, सै खुशिया ने दया करे। 9 दुज्जयां ने प्यार करणे दा दिखाना ना करे, बुराईया ने नफरत करा, जडा परमेश्वरे दिया नजरा च अच्छा है, उसयो करणे च लगी रिया। 10 परिवारे सांई इक दुज्जे ने प्यार करा; अपु चे इकी दुज्जे दी इज्जत बदीकरी करा। 11 सकत मेहनत करा कने आलसी मत बणा; उत्साह च बणी रिया, पुरे मने ने प्रभु दी सेबा करदे रिया। 12 तुहाडे बाल जडी आस है, उदे च खुश रिया; कला कलेश च सबर रखा, हर बकत प्राथना च लगी रिया। 13 पबित्र लोकां जो जडा कुछ जरूरी हो, उना दी सहायता करा; मेहमाना दा आदर सत्कार करदे रिया। 14 अपर्यों जो पेशान करणे बालयां जो आशीष दिया; आशीष दिया पर श्राप नी। 15 खुशी मनाणे बालयां सोगी खुशी मना, कने रोणे बालयां सोगी रोआ। 16 इक दुज्जे दा उतणा ही ध्यान रखा जितणा की अपणा रखदे न; घमंड मत करा, पर गरीबां ने मिली जुली करी रिया; अपने आपे जो अकलमंद मत समझा। 17 बुराईया दे बदले कुसी ने बुराई मत करा; जडियां गल्लां सारे लोकां तांई खरियां न, उना दी चिंता करा। 18 जियू दीकर होई सके, तुसां सबना लोकां सोगी मेल जोल रखा। 19 हे प्यारो अपणा बदला मत लेंदे; पर परमेश्वरे जो अपने तांई बदला लेणा दिया, क्योंकि पबित्र शास्त्र च प्रभु बोलदा है, “बदला लेणा मेरा कम्म है, प्रभु बोलदा है मैं ही बदला देणा।” 20 पर पबित्र शास्त्र च ऐ भी लिख्या है, “अगर तेरा दुशमन भूखा है तां उसयो खाणां दे, अगर प्यासा है तां उसयो पाणी पिया; क्योंकि इयां करणे ने तू उसयो शर्मिदा करी देणा।” 21 बुराईया जो अपने पर जितणा मत दिया पर भलाईया ने बुराईया जो जीती लिया।

13 हर इक माणु शासन दे अधिकारियां दे अधीन रे; क्योंकि सारे अधिकार परमेश्वर दिया तरफा ला होंदे न; कने जडे अधिकार न, सै परमेश्वरे ही दितयो न। 2 इस तांई जडा कोई ऐसे लोकां दा बिरोध करदा है जिना बाल शासन करणे दा अधिकार है, सै परमेश्वरे दे नियमा दा बिरोध करदा है, कने बिरोध करणे बालयां जो सजा मिलणी। 3 क्योंकि अगर कोई अच्छे कम्म करदा है तां, उना जो अधिकारियां ला डरने दी जरूरत नी है; अगर सै बुरे कम्म करदा है तां उसयो डरने दी जरूरत है, अगर तुसां अधिकारियां ला डरणा नी चांदे न तां भले कम्म करा जिसला सै तुहाडी तारीफ करन। 4 क्योंकि अधिकारी लोक तेरिया सहायता तांई परमेश्वरे दे सेवक न। पर अगर तू बुराई करे, तां तू डर; क्योंकि अधिकारियां बाल तुसां जो सजा देणे दा हक है कने सै परमेश्वरे दे सेवक न, जिना जो इस तांई भेजया है की सै उना लोकां जो सजा देन जडे गलत कम्म करदे न। 5 तुसां जो ऐसा सिर्फ सजा ला बचणे तांई ही नी करणा चाईदा, पर इस तांई भी की तुहाडी अंतरात्मा साफ रे। 6 इस तांई करी भी दिया, क्योंकि शासन करणे बाले परमेश्वरे दे सेवक न, कने हमेशा अपणी जिम्मेबारियां जो निभाणे च अपणी जिन्दगी लाई दिन्दे न। 7 इस तांई जिसयो जडा मिलणा चाईदा, तुसां जो सै उसयो देणा चाईदा; जिसयो कर चाईदा, उसयो कर दिया, जिसयो चुंगी चाईदी, उसयो चुंगी दिया; जिसला डरणा चाईदा उसला डरा; जिसदी इज्जत करणा चाईदी उदी इज्जत करा। 8 तुसां सारयां जो सिर्फ इक ही गल्ला दा कर्जदार होणा चाईदा कने सै ऐ है, की तुसां सारे इक दुज्जे ने प्यार रखा;

रोमियो

क्योंकि जडा दुज्यां ने प्यार रखदा है, उनी ही व्यवस्था पूरी कीती है। 9 क्योंकि मूसा दी व्यवस्था च मते हुकम न, “व्यभिचार नी करणा, हत्या नी करणी, चोरी नी करणी, लालच नी करणा,” इना जो छडी के होर कोई भी हुकम हो तां सारयां दा निचोड इस हुकम च है, “की जितणा अपने आपे ने प्यार करदे न, दुज्जयां ने भी उतणा ही प्यार करा।” 10 प्यार पड़ोसियां दी कुछ बुराई नी करदा, जडा प्यार करदा है, सै व्यवस्था जो पूरा करदा है। 11 तुसां चे हर इक जोने जो इक दुज्जे ने प्यार करदे रेणा चाईदा क्योंकि सै बकत नेडे है, जालू परमेश्वरे सांझो इसा बुरिया दुनिया ला बचाणा है। जालू असां पैली बरी यीशु मसीह पर भरोसा किता, उस बकते ला तां ऐ होर भी नेडे है। इसयो समझीकरी तुसां जो अपणी निद्रा ला जागणा कने साबधान रेणा चाईदा। 12 “इसा बुरी दुनिया च रेणे दा साडा बकत लगभग खत्म होई गया है इक रात सांई, जडी लगभग खत्म होई गई है, कने सै बकत भी नेडे है जालू मसीहे बापस ओणा है।” सांझो उना चीजां जो भी करणा बंद करी देणा चाईदा जडियां बुराईया ने जुडियां न, कने सांझो लौई च इस्तेमाल होणे बाले हथियारां दा इस्तेमाल करणा चाईदा। 13 असां जो लौई च रेणेबाले लोकां सांई अपणा चाल चलन ठीक करणा चाईदा, ना की खेलेणे कूदणे च, ना खाणां पीणे च, ना व्यभिचार च, ना लुचापन च, कने ना ही लडाई झगडे कने जलन च। 14 पर प्रभु यीशु मसीह तुहाडा कवच बणी जा, ताकि तुहाडी रक्षा करी सके, कने पापी सभाब दियां इच्छां जो पूरा करणे दी कोशिश मत करा।

14 जडा मसीह भाई भरोसे च कमजोर है उदियां मानयता दे बारे च कुसी भी शेके दे विना ही अपनाई लिया, उदे सोगी बेस मत करा की क्या करणा चाईदा या क्या नी करणा चाईदा। 2 क्योंकि इकी जो भरोसा है, की सब कुछ खाणां ठीक है, पर जडा भरोसे च कमजोर है, सै सिर्फ साग पत्ते ही खांदा है। 3 जडे मास खांदे न, सै मास नी खाणे बालयां जो नीच ना समझन कने मास नी खाणे बाला, मास खाणे बालयां पर दोष ना लाऐ; क्योंकि परमेश्वरे दोनों जो अपनांदा है। 4 इस तांई तिजो कुसी दे भी सेवके दा न्याय नी करणा चाईदा, उदा सफल होणा या नी होणा दोनों उदे मालिके ने ही सम्बन्ध रखदा है, उनी पक्का ही सफल होई जाणा क्योंकि प्रभु उसयो सफल करी सकदा है। 5 इयां ही कोई तां इक दिने जो दुज्जे दिने ला बदिया मंदा है, कने कोई सारे दिना जो इकोदे मंदा है, हर इक जो यकीन होणा चाईदा की जडा सै सोचदा है सै सही है या नी। 6 जडा कोई कुसी दिने जो मनदा है, सै इस तांई करदा है क्योंकि सै प्रभु दी इज्जत करणा चांदा है, जडे मास खांदे न, सै भी प्रभु तांई खांदे न, क्योंकि सै परमेश्वरे दा धन्यवाद करदा है, कने जडा मास नी खांदा है, सै प्रभु तांई नी खांदा है कने परमेश्वरे दा धन्यावाद करदा है। 7 असां सारे प्रभु दे न। इस तांई साडी जिन्दगी च कने साडिया मौत च सांझो सिर्फ प्रभु जो खुश करणा चाईदा ना की अपु जो। 8 क्योंकि अगर असां जिंदे न, तां प्रभु तांई जिंदे न, अगर असां मरदे न, तां प्रभु तांई मरदे न; तां असां जिन या मरन, असां प्रभु दे ही न। 9 क्योंकि मसीह इसी तांई मरया कने फिरी जिन्दा होई गया क्योंकि सै सेई है, सै जिन्दे कने मरयो दोनों दा प्रभु है। 10 तू कजो अपने मसीह भाईए पर दोष लगांदा है? या तू कजो अपने मसीह भाई जो बुरा समझदा है? साडा सारयां दा परमेश्वरे न्याय करणा। 11

क्योंकि पवित्र शास्त्र च लिखया है, “प्रभु बोलदा है, मैं अपनी जिन्दगी दी कसम खांदा है की हर इकी माणुए मेरे सामणे गोडे टेकणे न, कने हर इक माणुए परमेस्वरे जो अपनाणा।” 12 असां च हर इकी जणे जो अपने-अपने करमा दा लेखा परमेस्वरे जो देणा पोंणा। 13 तां असां अग्रे ला इकी दुज्जे पर दोष नी लान, पर तुसां ऐई ठांणी लिया की कोई भी अपने भाई या बेहणा दे पाप करणे दी बजा ना बणे। 14 मैं जाणदा है, कने प्रभु यीशु ला मिजो ऐ पक्का होया है, की सारे खाणे बालियां चीजां ठीक न, पर जडा उसयो अशुद्ध समझदा है, उदे ताई अशुद्ध है। 15 अगर तेरा भाई या बेहण तेरे खांणे दिया बजा ला उदास होंदा है तां तेरे अंदर प्रभु दा प्यार नी है, तां अपने खाणे दिया बजा ला उदा विनाश मत कर, जिदे ताई मसीह मरी गया था। 16 इस ताई भले ही जडा तुसां करा दे न सै खरा है, पर अगर कोई उसयो बुरा मनदा है, तां उस कम्मे जो मत करा। 17 क्योंकि परमेस्वरे दा राज्य सिर्फ खांणे पिणे दे बारे च नी है, पर पवित्र आत्मा च धार्मिकता, शांति कने खुशी च है। 18 जडा कोई इस तरीके ने मसीह दी सेवा करदा है, परमेस्वर उसला खुश होंदा है कने लोक भी उदे बारे च खरा बोलदे न। 19 इस ताई सांझो हमेशा सेई करणे दी कोशिश करणी चाईदी जडा लोकां बिच शांति दी बजा बणे कने इक दुज्जे जो भरोसे च मजबूत करे। 20 तुहाडे खांणे पिणे दिया चिजां ला परमेस्वरे दा कम्म ना बिगडे, सब कुछ ठीक तां है, पर कुछ ऐसी चीज खाणा गलत है अगर सै दुज्जे माणुए जो पाप करणे दी बजा बणे। 21 खरा तां ऐ है, की तू ना मांस खाये, कने ना दाखरस पिऐ, कने ना कुछ ऐसा करे, जिसने तेरा भाई या बेहण पाप करे। 22 तुसां भरोसा करी सकदे न, की तुसां जडा करा दे न, उस सोगी कुछ भी गलत नी है, पर इसयो अपने कने परमेस्वरे दे बिच रखा। धन्य है सै, जडा उसा गल्ला च, जिसयो सै ठीक समझदा है, अपने आप जो दोषी नी बणादा। 23 पर साडे मने च कुछ भी खाणे दे बारे च शक है कने आखरी च अगर असां फिरी उसयो खाई लेंदे न, तां असां गलत न, क्योंकि सांझो जडा साडे मने च भरोसा है उदे अनुसार नी किता है, कने अगर तुसां कुछ सै करदे न जडा तुसां जो लगदा है की ठीक नी है, तां तुसां पाप करदे न।

15 असां जडे भरोसे च पक्के न, असां जाणदे न, की इना गल्लां ला कुछ खास फरक नी पोंदा है, पर असां सिर्फ अपने आप जो खुश करणे ताई ऐसा नी करी सकदे। सांझो उना लोकां दे शक कने कमियां दे बारे च बिचार करणा चाईदा जडे इना गल्लां जो गलत मंदे न। 2 असां च हर इक जो ऐसा करणा चाईदा जडा साथी मसीह भाई या बेहणा जो खुशी दे कने दुज्जयां जो भरोसे च मजबूत करणे च सहायता करा। 3 क्योंकि मसीह अपने आपो जो खुश नी किता, पर जियां पवित्र शास्त्रां च लिखया है, “तेरी निंदा करणे बालयां मेरी निंदा भी किती।” 4 जितणियां गल्लां पेहले ला पवित्र शास्त्रां च लिखियां न, सै साडिया ही शिक्षा ताई लिखियां न ताकि असां सबर कने पवित्र शास्त्र ला मिलणे बाले होसले दे जरिये आस रखी सकन ताकि परमेस्वरे जडा बायदा कितया था, सै करणा। 5 मैं प्रार्थना करदा है की परमेस्वर तुसां जो सबर कने उत्साहित करे, की तुसां यीशु मसीह सांई बणी करी अपु चे इक जुट होईकरी रेन। 6 ताकि तुसां सारे सोगी मिली करी साडे प्रभु यीशु मसीह दे पिता परमेस्वरे दी महिमा करन। 7 इस ताई इक दुज्जे जो अपनाई लिया जियां

मसीह तुसां जो अपनाई लिया है; ताकि लोक परमेस्वरे दी तारीफ करन। 8 मैं बोलदा है, की जडे बायदे पूर्वजां जो दितयो थे, उना बायदयां जो सच्च करणे ताई कने ऐ दसणे ताई की परमेस्वर भरोसे दे लायक है, मसीहा यहूदी लोकां दा सेवक बणया। 9 कने होर जातियां भी परमेस्वरे दी दया दिया बजा ने परमेस्वरे दी स्तुति करन, जियां पवित्र शास्त्र च लिखया है, “इस ताई मैं कने होर जातियां दे लोकां च तेरी स्तुति करांगा, कने तेरे भजन गांगा।” 10 पवित्र शास्त्र च ऐ भी लिखया है, “होर जातियां दे सारे लोक, परमेस्वरे दी प्रजा सोगी खुशी मना।” 11 कने फिरी ऐसा भी लिखया है, “हे होर जातियां दे सारे लोको, प्रभु दी स्तुति करा; कने हे राज्य-राज्य दे सारे लोको; उदी स्तुति करा।” 12 कने फिरी परमेस्वरे दा संदेश देणेबाला यशायाह भी बोलदा है, “विशै दी इक जड पैदा होणी है, कने होर जातियां पर शासन करणा, उस पर होर जातियां दे लोकां आस रखणी की उनी सांझो बचाणा।” 13 मैं प्रार्थना करदा है की परमेस्वर जडा साडा दाता है, तुसां जो पूरे तरीके ला खुशी कने शांति दा आनंद लेणे ताई सहायता करी सके, ताकि पवित्र आत्मा दिया शक्तिया ने तुहाडी आस बददी जा। 14 हे मेरे मसीह भाईयो; मैं अपु भी तुसां दे बारे च पक्का जाणदा है, कने तुसां भी अच्छे ने जाणदे न की परमेस्वर क्या चांदा है, की तुसां जो क्या करणा चाईदा कने इक दुज्जे जो सिखाई सकदे न। 15 तमी मैं कुथी-कुथी तुसां जो याद दिलाणे ताई तुसां जो बडी हिम्मत करिके लिखया है, ऐ उस अनुग्रह दिया बजा ने होया है, जडा परमेस्वरे ला मिजो मिलया है। 16 ताकि मैं होर जातियां ताई मसीह यीशु मसीह दा सेवक होईकरी मैं इक याजक सांई परमेस्वरे ला मिलियो शुभसमाचार सुणाणे दी सेवा करदा है; ताकि होर जातियां जो परमेस्वरे दे सामणे भेंट दे स्पे च दितया जाऐ जिसने सै खुश है, कने जिना जो पवित्र आत्मा पवित्र बणाया है। 17 मैं यीशु मसीह दिया बजा ने हर इक उसा गल्ला दे बारे च जडी परमेस्वरे दी सेवा ने जुडियो है उसा पर घमंड करी सकदा है। 18 क्योंकि जडा मसीह मेरे ताई कितया है, इसा ही बजा ने मैं ऐ हिमता ने बोली सकदा है की मैं होर जाति दे लोकां जो परमेस्वरे दे हुकमा दा पालन करबाणे दे काबिल है। जालू सै मेरियां गल्लां जो सुणदे न कने मेरे कम्मा जो दिखदे न तां सै यीशु मसीह पर भरोसा करदे न। 19 पवित्र आत्मा दे जरिये मिजो दितियो शक्ति ने मैं अनोखे कम्म कने चमत्कार करदा है, इस ताई जिथू भी मैं यरूशलेम ला इतिरिकम दीकर गया है, ओथु मैं सारे लोकां जो, यीशु मसीह दे बारे च शुभसमाचार सुणादा है। 20 पर मेरे मने दी इच्छा ऐ है, की शुभसमाचार दा प्रचार उना जगां च हो, जिथू यीशु मसीह दे बारे च हले दीकर सुणया ना हो; मैं ओथु शुभसमाचार दा कम्म नी करी सकदा जिथू कुनी होरनी पेहले ही शुरू करी दितया हो। 21 मैं उसा गल्ला जो पूरा करणा चांदा है जडा पवित्र शास्त्र च लिखया है, “जिना जो शुभसमाचार दे बारे च दसया ही नी है, उना दिखणा है कने जिना कदी उदे बारे च सुणया नी है, उना भी समझणा।” 22 ऐ सेई बजा है की तुसां ने मिलणे ताई मेरे ओणे च मुशकिल ओंदी रेई। 23 पर हुण इना प्रदेशां च, मैं अपना कम्म पूरा करी लिया है, कने बडे सालां ला मिजो तुहाडे बाल ओणे दी इच्छा है। 24 इस ताई जालू मैं इसपानिया देश जो जांगा तां तुहाडे बाल होंदा जांगा क्योंकि मिजो आस है, की उस यात्रा च तिजो ने मिल्ले, कने तुहाडे सोगी

संगती करिके खुश होई जां, मैं चांदा है की तुसां मिंजो मेरी इसपानिया देश दी यात्रा तांई सहायता करन। 25 पर हुण तां मैं परमेस्वरे दे पबित्र लोकां ने मिलणे तांई यरूशलेम शहर जो चलया है। 26 क्योंकि मकिदुनिया कने अखाया प्रदेशे दे लोकां ऐसा करणा इक खरी गल्ल समझी, की जडे यरूशलेम शहर दे परमेस्वरे दे लोक न कने गरीब न उना तांई कुछ चंदा भेज न। 27 उना ऐ खुशिया ने कितया है, सै यरूशलेम शहरे दे लोकां दे कर्जदार न, क्योंकि होर जातियां जो यरूशलेम शहर च रेणेबाले विश्वासियां ला खुशखबरी दी आत्मिक आशीषां मिलियां न, इस तांई उना जो लगदा है की इदे बदले च उना दी कुछ चंदा देईकरी सहायता करी सकदे न। 28 इस तांई मैं सबते पेहले यरूशलेम शहर चलया है ताकि उना जो ऐ गठेरेया चंदा देई सकें। उदे बाद, फिरी मैं रोम देश च आई करी तुसां ने मिलणे बाद इसपानिया देश जो जांणा। 29 कने मैं जाणदा है, की जालू मैं तुहाडे बाल ओणा, तां मसीह दी खास आशीष जो तुहाडे सोगी बंडगा। 30 कने हे मसीह भाईयो; प्रभु यीशु मसीह च साडे भरोसे कने पबित्र आत्मा सांझो जडा प्यार दितया है उदिया बजा ने, मैं तुसां ने बिनती करदा है की तुसां मेरे तांई परमेस्वरे ला बडी इमानदारिया ने प्राथना करा। 31 की मैं यहूदिया प्रदेशे दे अविश्वासियां ला बची रे, कने इस तांई भी प्राथना करा की ओथु दे विश्वासी भी मेरे इस तोफे जो ग्रहण करी लेन जडा मैं अपने सोगी यरूशलेम शहर जो लेई चलया है। 32 कने मैं परमेस्वरे दिया इच्छा ने तुहाडे बाल खुशिया ने आई करी तुहाडे सोगी अराम करे। 33 मैं प्राथना करदा है की परमेस्वर, जडा शांति दिन्दा है, तुसां सारयां सोगी हो। आमीन।

16 मैं तुसां ने फीबे तांई बिनती करदा है, जडी साडी साथी विश्वासी बेहण है कने क्रिश्चिया शहर दिया कलीसिया दी सेविका है, मैं चांदा है की तुसां इसा दी इज्जत करा। 2 जडा प्रभु दा है, उदा स्वागत करा; कने जिसा गल्ला च उसा जो तुहाडी सहायता चाईदी होंगी, तां उसा दी सहायता करा; क्योंकि उना मतयां दी सहायता कितियो है कने मेरी भी। 3 बेहण प्रिस्का कने उसा दे घरे बाले अक्विला जो मेरी तरफा ला नमस्कार जडे यीशु च मेरे सोगी प्रभु दी सेवा करदे न। 4 उना मेरी जान बचाणे तांई अपनी जान खतरे च पाई थी, कने सिर्फ मैं ही नी पर होर जातियां दियां सारियां कलीसियां भी उना दा धन्यवाद करदियां न। 5 कने उसा कलीसिया जो भी नमस्कार जडी उना दे घरे च गिठी होंदी है। मेरे प्यारे इपेनितुस जो नमस्कार जडा आसिया प्रदेशे ला मसीह पर भरोसा करणे बाला पेहला माणु है। 6 मरियम जो नमस्कार, जिना तुहाडे तांई बडी मेहनत कितियो है। 7 भाई अन्दस्निकुस कने बेहन युनियास जो नमस्कार, जडे मेरे यहूदी विश्वासी भाई न, कने जडे मेरे सोगी जेला च थे, कने प्रेरित उना जो अच्छे ने जाणदे न, कने मिंजो ला पेहले मसीह पर भरोसा करदे थे। 8 अम्पलियातुस जो नमस्कार, जडा प्रभु च मेरा प्यारा भाई है। 9 उरबानुस जो नमस्कार, जडे मसीह च साडे सोगी प्रभु दी सेवा करदा है, कने मेरे प्यारे भाई इस्तखुस जो भी नमस्कार। 10 अपिल्लेस जो नमस्कार, जडा परखे जाण बाद भी मसीह पर भरोसा करदा रिया। अरिस्तुबुलुस दे परिवारे जो नमस्कार। 11 मेरा रिशतेदार यहूदी भाई हेरोदियोन जो मेरा नमस्कार। नरकिस्सुस दे परिवारे दे लोकां जो मेरा

रोमियो

नमस्कार, जडे प्रभु यीशु मसीह जो मंदे न, 12 बेहण त्रेफेना कने बेहण त्रुफोसा जो मेरा नमस्कार, जडियां प्रभु दी सेवा तांई मेहनत करदियां न। प्यारी बेहण पिरसिस जो मेरा नमस्कार जिना प्रभु च बडी मेहनत किती। 13 स्फुस जो जिसयो प्रभुऐ अपनी सेवा तांई चुणया है, कने उदी माता जो भी जडी मेरे तांई भी माता सांई है, दोनो जो मेरा नमस्कार। 14 असुक्रितुस कने फिलगोन कने हिर्मस कने पत्रुबास कने हिमास कने उदे सोगी दे विश्वासी भाईयां जो मेरा नमस्कार। 15 फिल्लुगुस कने यूलिया कने नेर्युस कने उदी बेहन, कने उलुम्पास कने उदे सोगी दे सारे परमेस्वरे दे लोकां जो मेरा नमस्कार। 16 अपु चे इक दुज्जे जो गले लाईकरी नमस्कार करा: तुसां जो मसीह दी सारी कलीसियां दिया तरफा ला नमस्कार। 17 हुण हे मसीह भाईयो, मैं तुसां ने बिनती करदा है, की जडे लोक कलीसिया च इक दुज्जे ने लडाई झगडा करदे न कने जिना दिया बजा ने दुज्जयां लोकां दा भरोसा खत्म होई जांदा है, ऐ लोक उसा सच्ची शिक्षा दे खिलाफ चलदे न जडी तुसां जो मिलियो है, ऐसे लोकां ला साबधान कने दूर रिया। 18 क्योंकि ऐसे लोक साडे प्रभु यीशु मसीह दी नी पर अपने आप दी सेवा करदे न; सै खेल-खेल गल्लां करी के लोकां दी चापलूसी करदे न, इयां करी के सै सीधे-साधे लोकां जो धोखा दिन्दे न। 19 हर कोई जाणदा है की तुसां कितणे अच्छे ला प्रभु दे हुकम मंदे न; इस तांई मिंजो तुहाडे बारे च खुशी होंदी है; पर मैं ऐ चांदा है, की क्या खरा है ऐ जाणने तांई बुद्धिमान न, पर बुराईयां तांई भोले बणी रिया। 20 शांति दे परमेस्वरे शैताने जो तुहाडे अधीन करी देणा। मैं प्राथना करदा है की साडे प्रभु यीशु मसीह दा अनुग्रह हमेशा तुसां सबना पर होंदा रे। 21 तीमुथियुस मेरे कलीसिया कम्म करणे बाले दा, कने लुकियुस कने यासोन कने सोसिपत्रुस मेरे यहूदी भाई दा, तुसां जो शुभकामनाऐ दे दा है। 22 मैं तिरितियुस जडा पौलुस तांई ऐ चिठी लिखा दा है, अपनी शुभकामनाऐ तुसां जो भेजा दा है। मैं भी प्रभु दा इक सेवक है। 23 गयुस भी तुसां जो अपनी शुभकामनाऐ भेजा दा है। मैं भी इदे घरे रेंदा है जिथू कलीसिया गिठी होंदी है। इरास्तुस जडा इस शहरे दा भण्डारी है, कने साडे भाई क्वारतुस भी तुहांजो अपनी शुभकामनाऐ भेजदा है। 24 मैं प्राथना करदा है की साडे प्रभु यीशु मसीह दा अनुग्रह तुसां पर रे। 25 हुण सारी महिमा परमेस्वरे जो मिल्ले जडी तुसां जो मजबूत बणाणे च काबिल है कने जिस शुभसमाचार दा मैं प्रचार करदा है, इस संदेश च यीशु मसीह अपनी उस योजना जो होर जातियां तांई प्रगट कितया है, जडी शुरू ला गुप्त थी। (aiōnios g166) 26 पर हुण प्रगट होईकरी हमेशा दे परमेस्वरे दे हुकमे ने परमेस्वरे दे संदेश देणेबालयां दियां कताबां दे जरिये सारियां होर जातियां जो दसया है, की सै भरोसे ने हुकम मनणे बाले होई जान। (aiōnios g166) 27 उसी इकमात्र बुद्धिमान परमेस्वरे दी यीशु मसीह दे जरिये युगां-युगां दीकर महिमा होंदी रे। आमीन। (aiōn g165)

1 कुरिन्थियों

1 मैं, पौलुस जडा प्रभु यीशु दा प्रेरित होणे ताई परमेश्वरे दिया इच्छा ला चुणया है कने मैं ऐथु साडे मसीह भाई सोस्थिनेस सोगी है। **2** मैं ऐ चिट्ठी परमेश्वरे दिया कलीसिया जो लिखा दा है, जडी कुरिन्थुस शहर च है, मतलब की उना लोकां जो जिना जो परमेश्वरे यीशु मसीह सोगी इक करिरी अपने लोक होणे ताई लग कितया है कने उनी तुहांजो अपने पबित्र लोक होणे ताई सदया है; उनी तुहांजो तियां ही पबित्र कितया है, जियां सै हर जगा दे लोकां जो पबित्र करदा है जडे यीशु मसीह पर भरोसा करदे न, जडा साडा सारयां दा प्रभु है। **3** मैं प्राथना करदा है की साडे पिता परमेश्वरे कने प्रभु यीशु मसीह तुहांजो अनुग्रह कने शांति दे। **4** मैं तुहाडे बारे च अपने परमेश्वरे दा हमेशा धन्यवाद करदा है, क्योंकि उनी अपने अनुग्रह ला तुसां जो यीशु मसीह च इक करी दिता कने मतियां सारियां आशीषां दितियां। **5** मसीह सोगी इक करणे दा मतलब ऐ है, की परमेश्वरे तुसां जो सै बडा जादा दिता जिदी तुहांजो जरूरत थी, खासकर, उदा संदेश सुणणे कने उदे बचन दे ज्ञान दियां केई आत्मिक आशीषां दितियां। **6** इना आत्मिक आशीषां ला जडियां परमेश्वरे तुहांजो दितियां न, तुहांजो साबित किता की मसीह दे बारे च संदेश सच्चा है। **7** कने इसा बजा ला पबित्र आत्मा तुहांजो सै सारे हुनर दिते जिना दी तुहांजो जरूरत थी, क्योंकि तुसां प्रभु यीशु मसीह दे मुडी ओणे दा इंतजार करा दे थे। **8** कने परमेश्वरे तुसां जो आखरी दीकर भरोसे च मजबूत करणा, की तुसां साडे प्रभु यीशु मसीह जो धरती पर मुडी ओणे दीकर निर्दोष बणी रेन। **9** परमेश्वरे ऐसा करणा, क्योंकि जडा सै बोलदा है उसयो पूरा करणे ताई सै भरोसे दा काबिल है, कने उनी तुहांजो अपने पुत्र यीशु मसीह सोगी रिशता बनावे ताई सदया है। **10** हे प्यारे भाईयो, मैं साडे प्रभु यीशु मसीह दे अधिकारे ला तुहांजो ला बिनती करदा है, की तुसां सब इक दुज्जे सोगी सेहमती रखा, कने तुसां च फूट ना होऐ, पर इक ही मन कने इक ही सोच च होईकरी मिली करी रिया। **11** क्योंकि हे मेरे मसीह भाईयो, खलोए दे परिवारे दे लोकां मिंजो तुहाडे बारे च दसया है, की तुसां च झगडे होआ दे न। **12** मेरे बोलणे दा मतलब ऐ है, की तुसां चे कोई अपने आपे जो बोलदा है की मैं “पौलुस दा चेला है,” कोई बोलदा, “अपुल्लोस दा चेला है,” कोई बोलदा, “कैफा दा,” कोई बोलदा, “मसीह दा चेला है।” **13** ऐ गल्ल खरी नी है, क्योंकि मसीह लग-लग टोलियां च नी बंडूया है। शायद तुसां गलतिया ला ऐ सोचदे न की मैं, पौलुस तुहांजो अजाद करणे ताई सूली पर चढया था। कने शायद तुसां गलतिया ला ऐ भी सोचा दे न की तुहांजो इस ताई बपतिस्मा दितया है ताकि तुसां मेरे चेले बणन। **14** मैं परमेश्वरे दा धन्यवाद करदा है, की क्रिस्पुस कने गयुस इना दोनों भाईयां जो छडी करी, मैं तुसां चे कुसी जो भी बपतिस्मा नी दितया है। **15** इस ताई कोई ऐसा नी बोली सकदा की तुसां मेरे चेले बणने ताई बपतिस्मा लिया है। **16** कने मिंजो हुणी याद आया, की मैं स्तिफनास दे परिवारे जो भी बपतिस्मा दितया; इना जो छडी करी, मैं नी जाणदा कि मैं कुसी होरसी जो भी बपतिस्मा दितया है। **17** क्योंकि मसीह मिंजो बपतिस्मा देणे ताई नी, पर शुभसमाचार सुणणे जो भेजया है, जालू मैं शुभसमाचार

सुणादां है, ताल बोलणे च मैं अपने हुनर दा इस्तेमाल नी करदा है, अगर लोक सिर्फ मेरे हुनर दिया बजा ला मिंजो मदे न, तां सै सूली पर मसीह दी मौत दी शक्ति जो नी जाणदे न। **18** क्योंकि जडे लोक परमेश्वरे ला लग होई जांगे, उना जो सजा मिलणी, सै सूली पर मसीह दी शिक्षा दी कोई कीमत नी समझदे, पर साडे ताई जडे बचायो न, असां जाणदे न की ऐ परमेश्वरे दिया शक्तिया दा सबूत है। **19** क्योंकि पबित्र शास्त्र च परमेश्वर बोलदा है, “मैं दसणा है की जिना लोकां दे बिचारां जो संसारे दे लोक बुद्धिमानी बोलदे न, असल च सै बिचार मुखता दे न। मैं साबित करणा है की असल च सै बिलकुल भी समझदार नी न।” **20** तां फिरी, असां बुद्धिमान लोकां दे बारे च क्या बोली सकदे न? कने असां व्यवस्था जो सिखाणे बालयां दे बारे च बोली सकदे न? कने असां उना लोकां दे बारे च क्या बोली सकदे जडे बोलणे च बड़े चलाक न? परमेश्वरे उना सारयां जो मुख बणाई दितया है, कने उना दी बुद्धिमानी जो बेकार कने बकवास दसया है। (1aōn g165) **21** मैं ऐसा इस ताई बोलदा है क्योंकि परमेश्वरे समझदारिया ला ऐ फेसला लिया की इस संसारे दे लोक अपनी काबलियता ला उसयो नी जाणी सकदे न, इस ताई परमेश्वर उना जो बचादां जडे शुभसमाचार पर भरोसा करदे न जिदा असां प्रचार करदे न, चाहे कोई भरोसा नी करणे बाला बोले की ऐ मुखता दियां गल्लां न। **22** यहदियां ताई ऐ इस ताई मुखता है, क्योंकि सै इसयो सच्च साबित करणे ताई स्वर्ग ला कोई निशाण मंगदे न, कने होर जातियां ताई भी जडे इन्सानी ज्ञान दिया तोपा च रेंदे न। **23** पर असां तां ऐ प्रचार करदे न की मसीह साडे पापां ला सांझो छुडाणे ताई सूली पर मरया, जडा यहदियां ताई ठोकर दी बजा है, कने होर जातियां दिया ताई मुखता है; **24** पर जिना जो परमेश्वरे अपने लोक होणे ताई सदया है, क्या यहदी, क्या होर जातियां दोना ताई ऐई मसीह परमेश्वरे दी शक्ति, कने परमेश्वरे दा ज्ञान है। **25** ऐ परमेश्वरे दी मुख योजना बुद्धिमान माणुआं दी योजना ला जादा बुद्धिमान है, कने परमेश्वरे दी कमजोरी भी माणुआं दी सबना ला बडी ताकत ला भी बदीकरी ताकतबर है। **26** हे मसीह भाईयो, अपने उना हालतां जो याद रखा जालू परमेश्वरे तुसां जो मसीह दे पिच्छे चलणे ताई सदया, अगर असां इन्सानी सोचा ला सोचन, तां तुसां चे मते बुद्धिमान नी थे, कने तुसां चे कोई भी राजा महाराजे दे खानदान ला नी थे। **27** पर बुद्धिमान लोकां जो शरमिन्दा करणे ताई, परमेश्वरे उना लोकां जो चुण्या जडे संसारे दिया नजरा च मुख न कने ताकतबर लोकां जो शरमिन्दा करणे ताई, परमेश्वरे उना लोकां जो चुण्या जडे संसार दिया नजरा च कमजोर न। **28** कने परमेश्वरे उना जो चुण्या जडे संसारे दे लोकां दिया नजरा च निच न, कने जिना दी संसार च कोई कीमत नी है उना जो चुणी लिया ताकि जडे अपने आप जो कीमती समझदे न उना जो बेकार करी दे। **29** परमेश्वरे ऐसा इस ताई कितया ताकि कोई भी माणु परमेश्वरे सामणे घमंड ना करे। **30** पर परमेश्वरे तुहांजो यीशु मसीह सोगी इक किता, कने मसीह दे जरिये सांझो बुद्धि दिन्दा है। परमेश्वर सांझो धर्मी बणादां है, कने मसीह दे जरिये सांझो पबित्र, कने पापां ला छुडादां है। **31** ताकि जियां पबित्र शास्त्र च लिखया है, तियां ही हो, “जडा घमंड करे सै उस पर घमंड करे जडा परमेश्वरे कितया है।”

2 हे मसीह भाईयो, जालू मैं तुहांजो परमेस्वरे दे बारे च संदेश सुणाया, तां मैं बड़े-बड़े ज्ञान दे अखरां दा इस्तेमाल नी किता कने ना ही समझदार लगणे दा दिखबा किता। 2 क्योंकि मैं तुहाड़े बिच ऐ फेसला करी के आया था, की मैं यीशु मसीह कने उदी सूली पर मौत दे बारे दे इलाबा होर केसी दे भी बारे च गल्ल नी करणी है। 3 कने जालू मैं तुहाड़े बाल था, तां मैं अपने आप जो मसीह दा कम्म करणे दे काबिल नी समझदा था, इसा बजा ला मैं बडा कमजोर कने डरदा होया तुहाड़े सोगी रिया। 4 कने मेरी शिक्षा कने मेरे प्रचार च संसारिक ज्ञान कने लोकां जो खुश करणे बालियां गल्लां नी थियां; पर पबित्र आत्मा बडिया शक्तिया ला प्रगट किता की जडी शिक्षा मैं तुहांजो दिती सै सच्ची है, 5 इस ताई की तुहाडा भरोसा माणुऐ दे ज्ञान पर नी पर परमेस्वरे दिया शक्तियाँ पर निर्भर हो। 6 फिरी भी मैं उना लोकां जो, जडे भरोसे च मजबूत न, ज्ञान भरी शिक्षा दिन्दा है; पर ना ही संसारिक ज्ञान कने ना ही इस संसारे दे हाकिमा दा ज्ञान, जिना दा नाश होणेबाला है। (aiōn g165) 7 पर असां परमेस्वरे दे उस ज्ञान दी गल्ल करदे न जडा गुप्त था। हल्ले दीकर इसयो कोई नी जाणदा था, परमेस्वरे धरती बणाणे ला पेहले ही फेसला लिया था, की उदे ज्ञान ला सांझो महिमा मिल्ले। (aiōn g165) 8 परमेस्वरे दिया इसा योजना जो संसारे दे हाकिमा चे कुनी भी नी समझया, क्योंकि अगर जाणदे, तां महिमामय प्रभु जो सूली पर नी चढ़ादे। (aiōn g165) 9 पर जियां पबित्र शास्त्र च लिखया है, “ना कदी कुनी दिखया है, ना कदी कुनी सुणया, कने ना कदी कुनी उना भली चीजां दे बारे च सोचया, जडियां परमेस्वरे उना लोकां ताई तैयार कितियां न जडे उदे ने प्यार करदे ना।” 10 परमेस्वरे ऐ गल्लां पबित्र आत्मा जरिये असां प्रेरितां जो दसियां; क्योंकि ऐसा कुछ नी है जडा परमेस्वरे दी आत्मा नी जाणदा हो। ऐथू दीकर की सै परमेस्वरे डुगे बिचारां जो भी अच्छे ने जाणदा है। 11 तुसां सेई न जडे जाणदे न की तुहाड़े अपने मने च क्या है, तियां ही परमेस्वरे दिया आत्मा दे सिबाये कोई भी परमेस्वरे दे बिचारां जो नी जाणी सकदा। 12 पर साड़ी सोच कने बिचार संसारे दे माणुआं साई नी न, पर परमेस्वरे सांझो अपणी आत्मा दितियो है, ताकि असां उना गल्लां जो जाणन, जडियां परमेस्वरे अपने अनुग्रह ला दितियां ना। 13 कने इस ताई असां इना गल्लां जो दुज्जे लोकां जो दसदे न तां असां ऐसे अखरां दा इस्तेमाल नी करदे, जडे माणुआं दे ज्ञाने ला मिलदे न, पर असां उना अखरां दा इस्तेमाल करदे न जडे परमेस्वरे दिया जरिये मिलदे न, जडा आत्मिक ज्ञाने दे जरिये आत्मिक गल्लां जो समझांदा है। 14 पर सै माणु जिसयो परमेस्वरे दी आत्मा नी मिलियो है, सै परमेस्वरे दिया आत्मा दियां गल्लां जो नी मंदा, क्योंकि सै उदिया नजरा च मुर्खता दियां गल्लां न कने सै इना गल्लां दी कीमत नी समझदा। 15 जिना जो पबित्र आत्मा मिलया, सै उना चीजां जो समझी सकदे न, जडा पबित्र आत्मा सिखांदी है। पर जिना लोकां बाल पबित्र आत्मा नी है सै उना लोकां दे बिचारां जो नी समझी सकदे जिना बाल पबित्र आत्मा है। 16 ऐ सच्च है क्योंकि पबित्र शास्त्र च लिखया है की, “कोई भी ऐ नी जाणी सकदा की परमेस्वरे दे मने च क्या है कने कोई भी उसयो सिखाई नी सकदा।” पर असां भरोसा करणे बाले समझदे न की मसीह दे मने च क्या है।

3 हे मसीह भाईयो, मैं जालू तुहाड़े सोगी था, तालू मैं तुसां जो गेहरी गल्लां नी सिखाईयां, जियां की मैं आत्मिक लोकां जो सिखांदा है, मैं तुसां लोकां ला इयां गल्लां कितियां जियां की तुसां इसा दुनिया दे लोकां साई न, या इयां जियां की तुसां मसीह जिन्दगी च बच्चे न। 2 मैं तुहांजो परमेस्वरे दे बचने ला सिर्फ बुनियादी शिक्षा दिती, कने गेहरी शिक्षा नी दिती, क्योंकि उस बकत तुसां इसा शिक्षा जो पाणे ताई तैयार नी थे, 3 क्योंकि तुसां हल्ले दीकर भी संसारे दे लोकां साई जिन्दगी जिया दे न। इस ताई की जालू तुसां च इक दुज्जे सोगी जलन कने झगडा होंदा है, तां ऐ साबित करदा है की तुसां संसार दे लोकां साई न। कने तुसां उना लोकां साई जिन्दगी जिन्दे न जडे लोक प्रभु दे लोक नी न। 4 इस ताई की जालू इक बोलदा है की, “मैं पौलुस दा है,” कने दुज्जा बोले कि, “मैं अपुल्लोस दा है,” तां क्या तुसां संसार दे लोकां साई नी करदे न? 5 तां फिरी सोचा की अपुल्लोस कुण है? कने मैं पौलुस कुण है? असां तां सिर्फ परमेस्वरे दे सेवक न, जिना दे जरिये तुसां मसीह पर भरोसा किता, असां च हर इक जणे सेई कम्म किता जडा परमेस्वरे सांझो करणे ताई दिता। 6 अगर मैं तुसां दी तुलना खेतेरे सोगी करें, तां मैं उस माणुऐ साई है जिनी पेहले तुसां च शुभसमाचार दा बी राया, कने अपुल्लोस उस माणुऐ साई है जिनी उस बूटे जो खाद पाणी दिता ताकि सै बदी सके, पर परमेस्वर ही है जडा तुसां जो आत्मिक रूप ला बदांदा है, जियां परमेस्वर उस बूटे जो बदांदा है। 7 इस ताई ना तां बूटे जो लगाणे बाला कुछ है, कने ना ही सै कुछ है जिनी खाद पाणी दिता, पर परमेस्वर ही सब कुछ है जिनी उस बूटे जो बदाया। 8 मैं तुहांजो शुभसमाचार सुणाया कने परमेस्वरे दे बचना जो सिखाणा शुरू किता कने अपुल्लोस तुहांजो सिखांदा रिया पर साडा दोनों दा इक ही मकसद है, कने हर इक माणुऐ जो उदिया मेहनता दे साबे ला परमेस्वरे इनाम देणा। 9 क्योंकि असां परमेस्वरे दे सहकमीं न; कने तुसां सारे मसीह लोक परमेस्वरे दिया खेतिया साई न, कने मैं तुहाड़ी तुलना इक घरे साई करी सकदा है, जिसयो परमेस्वर बणांदा है। 10 परमेस्वरे जडा बरदान मिजो दिता, उदे जरिये मैं इक खरे राज मिश्त्री ऐ साई उस घरे दिया नियां पाईयां कने होर दुज्जे लोकां इसा नियां पर घर बणाया। पर हर इक माणु ध्यान रखे की सै कियां घर बणांदा है। 11 क्योंकि नि जडी पहले ला ही रखियो है, सै यीशु मसीह है, कने होर कोई भी दुज्जी नि नी रखी सकदा। 12 कने अगर मसीह सेवक खरियां गल्लां सिखाऐ जडियां परमेस्वरे उना जो दीतियां, सै उना घर बणाणे बालयां साई न जडे उसा नियां पर होर चीजां न जियां सोना या चांदी या कीमती पथरां ला घर बणांदा है। पर अगर सै झुटियां गल्लां सिखाऐ तां सै उना घर बणाणे बालयां साई है जडे घटिया चीजां ने जियां लकड़ी, भू कने घाए ने घर बणांदे, 13 पर न्याय बाले रोजे अग्गी हर कुसी दे कम्म प्रगट करणे न की कुदे कम्म खरे थे कने कुदे कम्म बुरे थे; कने अग्गी दसणा है की उस माणुऐ दे कम्मा दी कोई कीमत है की नी। 14 अगर कुसी घर बणाणे बाले दा कम्म जडा उनी उसा नियां पर घर बणांदे बकत कितया हो, कने अगर सै नी फकुंगा तां मसीहे उसयो इनाम देणा है। 15 पर अगर कुसी घर बणाणे बाले दा कम्म फकुई जांगा तां मसीहे उसयो इनाम नी देणा। पर उसयो हमेशा दी जिन्दगी मिली जाणी जडी परमेस्वरे उस ताई रखियो है। 16 तुसां जो पक्का पता है, की तुसां

परमेश्वरे दा मन्दिर न, कने परमेश्वरे दी दितियो आत्मा तुहाडे बिच वास करदी है। 17 तुसां परमेश्वरे दे मंदरे साईं न, अगर कोई माणु तुहांजो मिली जुली करी रेंणा नी दिन्दा है। तां परमेश्वरे उसयो सकत सजा देंणी, क्योंकि परमेश्वरे दा मंदर पबित्र है, कने सै मन्दिर तुसां न। 18 कोई अपने आपे जो धोखे च ना रखे। अगर तुसां चे कोई अपने आप जो इस संसारे दे लोकां सामणे ज्ञानी समझे, तां सै उना दिया नजरां च मुर्ख बणी जाऐ, ताकि तुसां परमेश्वरे दिया नजरा च ज्ञानी बणी सकन। (aiōn g165) 19 क्योंकि इस संसारे दे लोक जिना गल्लां जो ज्ञान समझदे न, सै सारियां गल्लां परमेश्वरे दिया नजरां च मुर्खता है, जियां पबित्र शास्त्र च लिखया है की, “परमेश्वर ज्ञानी लोकां दी चलाकियां च उना जो फसाई दिन्दा है।” 20 कने पबित्र शास्त्र ऐ भी लिखया है की, “प्रभु ज्ञानी लोकां दे बिचारां जो जाणदा है की सारे बेकार न।” 21 इस ताईं तुसां घमंड मत करा की तुसां कुसी खास माणुऐ दे चले न, मै पौलस, अपुल्लोस, पतरस, सारे तुसां दे न, ऐथु दीकर की सारा कुछ तुसां दा है मतलब की संसारे दियां चीजां, अगर तुसां जिन्दे न या मरी गियो, अज या भविष्य सब कुछ तुहाडा है। 23 कने तुसां मसीह दे अधिकारे दे अधीन न, कने मसीह परमेश्वरे दे अधिकारे अधीन न।

4 तुसां सांझो मसीह दे सेवक समझा जिना जो परमेश्वरे शुभसमाचार दे भेदां दी सच्चाई जो समझाणे दा कम्म दितया है। 2 परमेश्वरे जिसयो ऐ कम्म करणे जो दितया, जरूरी है की सै भरोसे लाइक हो, ताकि दितयो कम्मे जो पूरा करी सके। 3 पर मै इसा गल्ला दी फिकर नी करदा की, तुसां या होर कोई मेरे बारे च ऐ बोले की ऐ भरोसे दे लायक है की नी है, सच्च तां ऐ है की मै अपने बारे च भी नी बोलदा की मै भरोसे दे लायक है की नी। 4 क्योंकि मेरी अंतरात्मा मिंजो कुसी भी गल्ला च दोषी नी बणांदी, पर इसला मै निर्दोष नी बणदा, क्योंकि परमेश्वर मिंजो परखणेबाला है कने सेई मिंजो बेकसूर साबित करदा है। 5 इस ताईं साडे प्रभु यीशु मसीह दे बापस ओणे दीकर कोई कुसी दा न्याय ना करे, क्योंकि परमेश्वरे साफ तरीके ला उना सारे बिचारां जो दसणा जडे लोकां दे मना च न, जिना दे बारे च कोई नी जाणदा है, उनी उना दे मने दे सारे इरादयां जो प्रगट करणा है, तालू परमेश्वरे दिया तरफा ला हर इकी दी तारीफ होंणी। 6 हे मसीह भाईयो, मै अपुल्लोस कने अपने बारे च तुहांजो इस ताईं दसया ताकि तुसां सांझो इक उदाहरण साईं लेई सकन, “पबित्र शास्त्र च जडा लिखया है, उसला अग्ये मत बदा।” ऐ खरा नी है की तुसां कुसी इकी जो इज्जत देईकरी बढा बणा, कने दुज्जे दी बेजती करिरी निचा दस्सा। 7 कुण बोलदा है की तू दुज्जे ला खरा है? कने जडा कुछ तरे बाल है सै परमेश्वरे तिजो दितया। कने जालू परमेश्वरे ही सब कुछ तिजो दितया, तां तिजो कोई हक नी है की तू कुसी गल्ला च घमंड करे। 8 तुहांजो लगदा है की तुहाडे बाल आत्मिक रूप च सारियां चीजां न। कने तुहांजो लगदा है की पेहेले ही सारे बरदान तुहांजो मिली गियो न, जडे पबित्र आत्मा अपने लोकां जो दिन्दी है, कने तुहांजो लगदा की तुसां साडे बिना राजयां साईं शाशन करणा लग्गी पियो न, मै खुश होई जांदा अगर तुसां सच्ची राजयां साईं राज करणा लग्गी पियो होंदे ताकि असां भी तुहाडे सोगी शाशन करी सकन। 9 मिंजो ऐसा लग्गा दा की परमेश्वरे असां प्रेरितां जो जित दिया यात्रा च

सारयां ला आखरी जगा च उना केदियां साईं रखया है जिना जो मौत दी सजा मिलियो हो। असां सारी दुनिया, स्वर्गदूतां कने माणुआं सामणे तमाशा बणी गियो न। 10 लोक सांझो मुर्ख समझदे न क्योंकि असां मसीह दा प्रचार करदे न, पर तुसां गलत सोचदे न की तुसां बुद्धिमान मसीह न! मते लोक मंदे न की साडे बाल कोई हक नी है। पर तुसां घमंड ला बोलदे न की तुहाडे बाल परमेश्वरे दी शक्ति है। लोक साडी इज्जत नी करदे पर लोक तुहाडी इज्जत करदे न। 11 असां उस रोजे दीकर भूखे प्यासे कने फटयो कपडे पायो न, कने लोकां सांझो मारया कृतया, कने साडे ताईं रेणे जो घर नी था। 12 कने अपने ही हथां ला कम्म करिके मेहनत करदे न, लोक बुरा बोलदे न, असां आशीष दिन्दे न, सै सतादे न असां सेहन करदे न। 13 जालू लोक बदनाम करदे न, तां असां उना जो बडे प्यारभाव ला जबाब दिन्दे न। अजे भी लोक साडी इज्जत नी करदे कने सै बोलदे न की साडी कोई कीमत नही है। 14 मै तुहांजो शर्मिंदा करणे ताईं ऐ गल्लां नी लिखदा है, पर मेरा मकसद तुहांजो सुधारणा है क्योंकि तुसां मेरे बचयां साईं न जिना जो मै बडा प्यार करदा है कने चेताबनी दिन्दा है। 15 भले ही तुहाडे बाल सिखाणे ताईं हजारो गुरु होन, सिर्फ मै ही तुहाडे पिता साईं है, क्योंकि मै पेहला माणु है, जडा तुहाडे ताईं शुभसमाचार लेईकरी आया, जिसदी बजा ला तुहांजो मसीह यीशु पर भरोसा होया। 16 इस ताईं मै तुहांजो बिनती करदा है, की जियां मै मसीह च जिन्दगी जिया दा, तियां ही तुसां भी जिन्दगी जिया। 17 इस ताईं मै तीमथियुस जो तुसां बाल भेजया है, जडा प्रभु यीशु च मेरा प्यार कने भरोसे बाला पुत्र है, उनी तुहांजो दसणा की मै क्या करदा है कने यीशु मसीह दा चेला बणी करी जिया दा, ठीक ऐई गल्लां मै हर जगा कने सारी कलीसियां जो सिखांदा। 18 तुहाडे बिच कुछ लोक सोचदे न की तुहांजो मिलणा नी ओणा, इस ताईं सै घमंडी होई गियो न। 19 पर प्रभुऐ दी इच्छा होई तां मै तुहाडे बाल जल्दी ओणा है, कने उना घमडियां दियां सिर्फ शिक्षा जो ही नी, पर उना दिया शक्तिया जो भी जाणी लेंणा है। 20 क्योंकि परमेश्वरे दा राज्य सिर्फ बडियां भरी गल्लां करणा ही नी, पर ऐ परमेश्वरे दिया शक्तिया ला जीणा है। 21 जालू मै तुहाडे बाल ओणा तां तुसां क्या चांदे न की मै करां? अगर तुसां अपणियां बुरियां गल्लां ला नी सुधरयो होंगे, तां मै तुहांजो अपने तरीके ला सुधारणा, पर अगर सुधरी गियो होंगे तां मै तुसां पर दया दसणी, कने दसणा की मै तुहांजो ने कितणा प्यार करदा है।

5 मै लोकां जो तुहाडे बारे च बोलदे सुणया है, की तुसां चे कुछ लोक व्यभिचार करदे न, कने ऐसा व्यभिचार तां होर जाति दे लोकां च भी नी होंदा। सै ऐ है की इकी माणुऐ अपनी सौतेली माऊ सोगी नाजायज रिश्ता रखया है। 2 कने तुसां जो तां इसा गल्ला दा दुख होणा चाईदा था, पर इंदे बजाये तुसां इसा गल्ला च घमंड करदे न। तुहांजो इयुदे माणुआं जो कलीसिया ला कडी देणा चाईदा। 3 भले ही मै ओथु तुहाडे सोगी नी है, पर ऐसा लगदा है कि मने ला मै ओथु ही है, कने मै इयुदे कम्म करणे बालयां दे खिलाफ फेसला करी दितया है। 4 कने तुहांजो ऐसा करणा चाईदा की तुसां सारे भरोसा करणे बाले होणे दे नाते गिटे होन, ऐ जाणदे होऐ की तुहाडे बाल असल च साडे प्रभु यीशु मसीह दा हक है। 5 उस पाप करणे बाले माणुऐ जो अपनी

कलीसिया ला कडी दिया, कने बापस उस जो शैतान दे बशे च देई दिया। क्या पता सै पाप करणा छडी दे। क्योंकि अगर सै पाप करणा छडी दिगा, तां जिस दिन प्रभुऐ न्याय करणा पक्का उस दिन उनी बची जाणा। 6 तुहाडा घमंड करणा बिलकुल भी ठीक नी है, क्या तुसां नी जाणदे की थोडा दिया खमीर पुरे गुनयो आटे जो खमीर करी दिन्दा है? अगर कुसी माणुऐ जो पाप करणे दी इजाजत मिलदी है, तां झट सारयां पाप करणा लगी पोंणा। 7 जियां यहूदी लोक अपने घरां ला फसह दा त्योहार मनाणे ला पेहले सारा खमीर कडी दिन्दे न, तियां ही तुसां भी इस पापी माणुऐ जो कलीसिया ला कडी दिया, तां तुसां इक ताजी रोटिया सांई होणा, जडी बिना खमिरे ला बणियो है, कने असल च तुसां सेई न। क्योंकि साडे फसह दा त्योहार असल च मसीह दे बलिदाने दे जरिये पूरा होया है। 8 इस तांई ओआ की असां अपने फसह दा त्योहार मनान। जियां यहूदी खमीर बाहर कडया, तियां अपने पापी सभाव जो छडी दिया, कने जियां यहूदी खमिरे बाली रोटी खांदे थे, सांझो भी परमेश्वरे दे लोकां सांई जीणा चाईदा, जिना च कोई बुराई नी होंदी, मतलब की अपने मने ला चलाकिया दियां गल्लां जो कडी करी कने सच्चाईया कने यीशु मसीह सोगी चला। 9 मैं अपणिया पिछलिया चिठिया च तुहांजो लिखया था, की व्यभिचारियां सोगी संगती मत करदे। 10 ऐ नी की तुसां बिलकुल ही इस संसारे दे व्यभिचारियां, या लोभियां, या दूज्ज्यां जो धोखा देणेबाले, या मूर्तिपूजा करणे बालयां दी संगती नी करणी, क्योंकि इयां तां तुहांजो इस संसारे ला निकलना पेई जाणा। 11 पर मेरे बोलणे दा मतलब ऐ है, ऐसे माणुऐ सोगी कोई रिश्ता मत रखा जडा अपने आपे जो मसीही बोलदा है, पर व्यभिचार, या लालची, या मूर्तिपूजक, या गाली देंगे बाला, या शराबी, या दूज्ज्यां जो धोखा देणेबाला हो, तां उस माणुऐ सोगी संगती मत करदे। 12 क्योंकि कलीसिया ला बाहर बालयां दा फेसला करणा मेरा कम्म नी है, पर तुहांजो उना जो जस्स सुधारणा चाईदा जडे तुहाडे कलीसिया दे लोक न। 13 पर कलीसिया ला बाहर बालयां दा फेसला परमेश्वर करदा है: पर जियां पबित्र शास्त्र च लिखया है, की कुसी भी बुरे कम्म करणे बाले माणुऐ सोगी रिश्ता मत रखा।

6 अगर तुहाडा कुसी दुज्जे मसीह भाई या बेहणा सोगी झगडा होंदा है, तां तुसां जो कचेरी च नी जाणा चाईदा। तुहांजो अपनी कलीसिया चे कुसी जो बोलणा चाईदा की, सै तुहाडे झगडे दा फेसला करे की कुण सही है कने कुण गलत है। 2 तुसां जाणदे न की, ओणे बाले दिना च परमेश्वरे दे लोकां इस संसारे दे लोकां दा न्याय करणा। इस तांई जालू तुसां बिच छोटे मोटे झगडे होन तां तुसां जस्स फेसला करी सकन की कुण गलत है कने कुण सही है। 3 तुसां जाणदे न की, ओणे बाले दिना च असां शैताने दे दूतां दा न्याय करणा, तां असां जस्स इसा जिन्दगिया च होणे बालियां छोटियां-छोटियां गल्लां दा फेसला करी सकदे न। 4 अगर एसियां गल्लां सामणे ओदियां न, तां उना दा फेसला करणे तांई ऐसे लोकां बाल नी जाणा चाईदा, जिना दी कलीसिया दे लोक इज्जत नी करदे होन। 5 मैं ऐ गल्लां तुहांजो शर्मिदा करणे तांई बोला दा है: क्या सच्ची तुसां चे कोई भी समझदार नी है, जडा अपने मसीह भाईयां कने बेहणा दा न्याय करी सके? 6 बल्कि इक मसीह भाई दुज्जे मसीह भाई दे

खिलाफ मुकदमे जो लेईकरी भरोसा नी करणे बाले बाल जाऐ। 7 पर सच्ची गल्ल तां ऐ की तुसां बिच मुकदमे चलणे दा मतलब है की तुसां इक मसीही जिन्दगी जिणे च हारी गियो न। इस तांई अगर कोई होर मसीह भाई या बेहण तुहाडे सोगी गलत करे, कने धोखे ने तुहाडा कुछ लेई ले, तां तुसां इदे बदले च कुछ मत करा। 8 पर तुसां तां अपु ही गलत करा दे न कने धोखा दे न कने सै भी अपने ही मसीह भाई बेहणा जो। 9 तुसां पक्का जाणदे न की, बुरे कम्म करणे बाले लोक परमेश्वरे दे राज्य दे हकदार नी होणे न। कोई तुसां जो ऐ गल्ल बोली करी धोखा ना दे, की तुसां बुरे कम्म करी के भी परमेश्वरे दे लोक बणी रेई सकदे न। इस धोखे च मत रेदे की, बेश्यागामी, मूर्तिपूजा करणे बाले, परस्त्रीगामी, लुच्चे, पुस्सगामी, 10 चोर, लालची, शराबी, गाली देणेबाले, दूज्ज्यां जो धोखा देणेबाले परमेश्वरे दे राज्य दे हकदार नी होणे न। 11 कने तुसां चे कुछ लोक पेहेले ऐसे ही थे, पर प्रभु यीशु मसीह दे नाऐ ला कने साडे परमेश्वरे दिया पबित्र आत्मा तुहाडे पाप धोई दितयो न, ताकि तुसां पबित्र कने परमेश्वरे दिया नजरा च धर्मी बणन। 12 तुसां बोली सकदे न की, मैं सारियां चीजां करी सकदा है क्योंकि मैं इक मसीह पर भरोसा करणे बाला है; पर सारियां चीजां मेरे फायदे दियां नी न। पर मैं कुसी भी गल्ला दे बशे नी होणा। 13 तुसां बोली सकदे न की, खाणा पेटे तांई, कने पेट खाणे तांई है, ऐ तां सच्च है पर परमेश्वरे ऐ दोनो खत्म करी देणा। साडे शरीर व्यभिचार तांई नी न, बल्कि प्रभु तांई है, कने इसला प्रभु दी सेवा करणी चाईदी। 14 पर साडा शरीर इस तांई भी खास है क्योंकि जियां परमेश्वरे अपणिया शक्तिया ला प्रभु जो मरयां चे जिन्दा किता, तियां ही उनी सांझो भी मरयां चे जिन्दा करणा। 15 तुसां जाणदे न की, तुहाडे शरीर मसीह दे अंग न। तां क्या इक माणुऐ अपने शरीर जो लेईकरी, बेश्या सोगी जोडना चाईदा? नी बिलकुल भी नी। 16 तुसां जाणदे न की पबित्र शास्त्र च लिखया है, “उना दोनो इक बणी जाणा।” इस तांई तुहांजो पता होणा चाईदा की जडा कोई बेश्या ला जुडी जांदा है सै बेश्या सोगी इक बणी जांदा है। 17 कने जडा प्रभु सोगी जुडी जांदा है, उदी आत्मा कने प्रभु दी आत्मा इक होई जांदियां न। 18 व्यभिचार ला बची रिया; माणुऐ दे कितयो होर पाप उदे शरीर जो उतणा प्रभावित नी करदे जितणा ऐ करदा है, पर व्यभिचार करणे बाला अपने ही शरीर दे खिलाफ पाप करदा है। 19 तुसां जाणदे न की, तुहाडा शरीर सै मंदर है जिदे च पबित्र आत्मा बसदी है; जडी परमेश्वरे तुहांजो दितियो है, कने हुण तुसां अपने नी न, पर परमेश्वरे दे न। 20 क्योंकि जालू परमेश्वरे प्रभु यीशु मसीह जो भेजया, तालू उनी तुहाडे तांई बडी बूढ़ी कीमत चुकाई है, इस तांई अपने शरीर ला परमेश्वरे दी महिमा करा।

7 हुण जडे सबाल तुसां मिंजो ला चिठिया च पछयो थे हुण मैं उना दा जबाब दिन्दा है। तुसां पूछया था कि, “क्या असां लोकां तांई ऐ खरा है की असां बियाह ना करन?” 2 क्योंकि ऐ आम गल्ल है की लोक नाजायज रिश्ते बणाई लेंदे न, इस तांई मैं सलाह दिन्दा है की हर इक मर्द बियाह करे, कने अपनी घरे बालिया सोगी बफादार रहे। 3 इक माणु पति होणे दे नाते अपणिया जिम्मेबारियां पुरियां करे; कने तियां ही इक जनानी भी घरे बाली होणे दे नाते जिम्मेबारियां पूरी करे, कने दोनो इक दुज्जे दियां जस्सतां जो पूरा करन। 4

घरे बालिया जो अपने शरीर पर हक नी है, पर उसा दे घरे बाले जो है; तियां ही घरे बाले जो भी अपने शरीर पर हक नी है, पर उदी घरे बालिया जो है। 5 तूसां इकी दुज्जे ला लग मत रिया; पर सिर्फ कुछ बकत दीकर अपु चे सलाह करिके लग रिया, ताकि प्रार्थना करणे तांई कुछ बकत मिल्ली सके, कने फिरी दुबारा सोगी रिया, इयां ना हो की अपने पर काबू नी रखणे दिया बजा ला शैतान तूसां जो नाजायज रिशता रखणे तांई परखे। 6 पर मैं जडा कुछ बोला दा है सै मेरी सलाह है ना की मेरा हुकम। 7 मैं ऐ चांदा है, की जियां की मैं बियाह नी कितया, तियां ही तूसां सोरे भी बियाह मत करा, पर परमेस्वरे कुछ लोकां जो खास बरदान दितया है। परमेस्वरे कुछ लोकां जो बियाह करणे दा बरदान दितया, कने कुसी जो बगेर बियाये रेणे दा बरदान दितया है। 8 पर कुआरयां कने बिधवां जो मेरी सलाह ऐ है की, उना तांई ऐई खरा है की सै बगेर बियाह कितयो रिया, जियां मैं है। 9 पर अगर सै सबर नी रखी सकन, तां उना जो बियाह करी लेणा चाईदा, क्योंकि शरीर दिया इच्छा ला लडने ला खरा है की बियाह करी लिया। 10 जिना दा बियाह होई गया है, उना जो मैं नी, बल्कि प्रभु यीशु मसीह हुकम दिन्दा है, की घरे बाली अपने घरे बाले जो तलाख ना दे। 11 कने अगर तलाख होई भी जा, तां सै दुज्जा बियाह ना करे; या अपने घरे बाले सोगी दुबारा मिली करी रे। कने ना घरेबाला अपणिया घरे बालिया जो तलाख दे। 12 पर हुण ऐ प्रभु दा हुकम नी है, पर मैं उना भरोसा करणे बाले लोकां जो बोलणा चांदा है, जिना दा बियाह भरोसा नी करणे बाले लोकां ने होई गया है; अगर कुसी मसीह भाईऐ दी घरे बाली मसीह पर भरोसा नी करदी है, कने उदे सोगी रेणा चांदही, तां सै उसा जो तलाख ना दे। 13 कने जिसा मसीह जनानिया दा घरेबाला भरोसा नी करदा हो, कने उसा सोगी रेहणे च खुश हो, तां सै अपने घरे बाले जो तलाख ना दे। 14 क्योंकि इक मसीह पर भरोसा करणे बालिया दे घरे बालिया दिया बजा ला परमेस्वरे उसा दे घरे बाले जो अपनाई लेणा है, अगर ऐ सचच नी होँदा की तुहाडा भरोसा नी करणे बाला घरेबाला या घरे बाली परमेस्वरे दे न, तां तुहाडे बाल बच्चे परमेस्वरे दे नी होँदे, पर हुण तां तुहाडे बाल बच्चे भी परमेस्वरे दे ना। 15 अगर कोई भरोसा नी करणे बाला भाई या बेहण तलाख देणा चांदा है, तां सै ऐसा करी सकदा है। ऐसे हालातां च इक भरोसा करणे बाले घरे बाले या घरे बालिये जो इस रिश्ते जो निभाणे दी जरूरत नी है, क्योंकि भरोसा नी करणे बाला ऐ तलाख दे दा है; परमेस्वरे सांझो शांति ला जिन्दगी जिणे तांई सदया है। 16 हे घरेबालियो तुहांजो याद रखणा चाईदा की तुहाडिया बजा ला तुहाडे घरे बाले दियां जिन्दगिया भी बची जान कने हे घरे बालयो तुहांजो भी याद रखणा चाईदा की तुहाडिया बजा ला तुहाडे घरे बालियां दी जिन्दगी बची सके। 17 मेरा इतणा सब कुछ बोलणे दा मतलब ऐ की जियां प्रभुऐ हर इकी जो जिना हलातां च रखया है, सै उना ही हालातां च अपनी जिन्दगी जिये, जिस तांई परमेस्वरे उना जो अपने लोक होणे तांई सदया है। कने ऐई गल्ल मैं सारियां कर्त्तिसियां दे लोकां जो सिखांदा है। 18 इक उदाहरण तांई, अगर कोई यहूदी माणु प्रभु यीशु मसीह भरोसा करदा है, तां उसयो उदी यहूदी होणे दी पछेण नी छडणी चाइदी, कने तियां ही अगर कोई होर जाति दा माणु यीशु मसीह पर भरोसा करे तां उसयो यहूदी बणने तांई खतना करबाणे दी जरूरत नी

है। 19 इक माणु दा खतना होया हो या नी होया हो इसला कोई फर्क नी पोंदा। पर परमेस्वरे दे हुकमा जो मणणा ही सारयां ला जरूरी है। 20 परमेस्वरे जिस माणुऐ जो जिना हलातां च अपने लोक होणे तांई सदया है, सै माणु उना ही हलातां च ही अपनी जिन्दगिया जो जिये। 21 अगर तू नोकर होँदे होऐ परमेस्वरे पर भरोसा किता है, तां तू इस बारे च चिंता मत कर; अगर तेरा मालिक बोले की तू अजाद है, तालू तू जाई सकदा है। 22 क्योंकि जिसयो नोकरे दिया हालता च प्रभु दे लोक होणे तांई सदया हो, सै अजाद माणुऐ सांई है, क्योंकि प्रभु यीशु मसीह उसयो उदे पापां ला आजादी देई दितियो है। कने इयां ही जिसयो आजादी दिया हालता च सदया हो, सै मसीह दे सेवक बणी रे। 23 क्योंकि परमेस्वरे तूसां तांई बड़ी बड़ी कीमत चुकाईयो है, जालू उनी यीशु मसीह जो सूली पर बलिदान किता; इस तांई माणुआं दे गुलाम नी पर परमेस्वरे दे गुलाम बणा। 24 हे मसीह भाईयो, परमेस्वरे जिस माणुऐ जो जिना हलातां च अपने लोक होणे तांई सदया है, सै उना ही हलातां च अपनी जिन्दगी जिये। 25 कुआरियां दे बारे च मिंजो प्रभुऐ दा कोई हुकम नी मिलया, पर प्रभुऐ अपनी दया ला मिंजो भरोसे दे काबिल ज्ञान दितया, उदी बजा ला मैं तुहांजो अपनी सलाह दिन्दा है। 26 क्योंकि इना रोजां च भरोसा करणे बाले लोकां सोगी हर जगा बडियां पेशानिया बालियां गल्लां होआ दियां न, इस तांई मिंजो लग्गा दा है की ऐ खरा है की कुआरे लोक कुआरे ही रेन। 27 अगर तेरी घरे बाली है, तां उसा जो तलाख देणे दी कोशिश मत कर; कने अगर तेरी घरे बाली नी है, तां तू बियाह करणे दी कोशिश मत कर। 28 अगर तू बियाह भी करे, तां कोई पाप नी है; कने अगर कुआरिया दा बियाह होई जा, तमी कोई पाप नी है; पर बियायो लोकां जो इस संसारे च रेंदे होयो दुग्दां दा सामणा करणा पोणा, कने मैं चांदा है की तूसां इना दुग्दां ला बची रिया। 29 हे मसीह भाईयो, मैं तुहांजो ऐ बोलदा है, की इस संसार च साडे बाल जादा बकत नी है, इस तांई तुहाडे बाल घरे बाली है या नी, इस बारे च जादा फिकर मत करा; पर प्रभु दी सेवा करणे दे बारे च सोचदे रिया। 30 कने जडे लोक दुखी न, सै अपना दुख ना दसन; जडे खुश न, उना दी खुशी लुकी रे, कने जडे खरीदारी करणे बाले न, सै ऐसे होई जान की उना बाल कुछ ना हो। 31 कने जडा कुछ इस संसारे च साडे बाल है, सांझो इना चिंजा जो जादा कीमत नी देणी चाइदी, क्योंकि इस संसारे च जडा कुछ साडे बाल है, सै जल्दी ही खत्म होणेबाला है। 32 इस तांई मैं चांदा है, की तूसां संसारिक जिन्दगी दी इच्छां ला अजाद रिया। कुआरा माणु परमेस्वरे दे बारे च सोचदा रेंदा है की सै कियां प्रभु जो खुश करे। 33 पर बियाया माणु संसारे दियां गल्लां दे बारे च सोचदा रेंदा है, की अपणिया घरे बालिया जो कियां खुश रखे। 34 इस तांई सै दो गल्लां दे बारे च सोचदा रेंदा, इक तां अपनी घरे बालिया जो खुश करणा कने दुज्जा प्रभु जो खुश करणा। बियाइयो कने नी बियाइयो च भी फरक है; कुआरी प्रभु दी सेवा दे बारे च सोचदी रेंदी, ताकि सै कियां शरीर कने आत्मा ला परमेस्वरे जो खुश करी सकें; पर बियाइयो जनानी संसारे दियां चीजां दे बारे च सोचदी रेंदी, की सै अपने घरे बाले जो कियां खुश करी सकें। 35 मैं ऐ गल्लां तुहाडिया भलाईया तांई बोला दा है, ना कि तूसां जो बियाह करणे ला रोकणे तांई। पर इस तांई की तूसां ढंगे ला जिन्दगी जी

सकन; ताकि तुसां इक मन होईकरी परमेश्वरे दी सेवा च लगी रेन। 36 कने अगर कुसी पिता जो ऐ लग्गे की सै अपणिया कुआरिया कुडिया दा बियाह बडा बादे च करणे ला उसा सोगी अन्याय करा दा है, क्योंकि उसा दी उमर जादा होआ दी है, तां उस पिता जो सैई करणा चाईदा जडा उसयो खरा लग्गे। तां सै पिता अपणिया कुडिया दा बियाह करी सकदा है, इदे च कोई पाप नी है। 37 अगर सै अपने मने च पक्का करी ले की, उदिया कुडिया ताई कुआरा रेणा ही खरा है, कने ऐसा करणे ताई उस पर कुसी दा दबाब न होऐ, तालू जडा फेसला उनी लिया है, तां उस पिता बाल ऐसा करणे दा पूरा हक है। कने अगर उनी अपणिया कुडिया जो कुआरा रखणे दा फेसला करी लिया है, तां सै परमेश्वरे दिया नजरा च खरा करदा है। 38 इस ताई जडा अपणिया कुवारिया कुडिया दा बियाह करी दिन्दा है, तां सै खरा करदा है, कने जडा उसा दा बियाह नी करदा है, सै होर भी जादा खरा करदा है। 39 जालू दिकर कुसी जनानिया दा घरेबाला जिन्दा है, तालू दीकर उसा उस सोगी बियाह दा रिशता निभाणा पोणा, पर जालू उसा दा घरेबाला मरी जाऐ, तां सै अजाद है, कने जिसला बियाह करणा चांहदी उसला करी सकदी है, पर उस सोगी ही जडा मसीह पर भरोसा करदा है। 40 पर मेरे बिचार ला, अगर सै दुबारा बियाह ना करे, तां उना होर भी जादा खुश रेणा, कने मैं समझदा है, की जालू मैं इयुदियां गल्लां बोलदा है, तां परमेश्वरे दी आत्मा मिजो जरिये बोलदी है।

8 तुसां दी चिठिया च तुसां मिजो ला मूर्तियां दे सामणे बलि कितियां चीजां दे बारे च पृछया था। हां, असां इना गल्लां दे बारे च कुछ ना कुछ जाणदे न। पर जालू ऐई ज्ञान लोकां जो घमंड करणे बाला बणाई दिन्दा है, तां प्यार च अग्गे बढणे च असां इक दुज्जे दी सहायता करी सकदे न। 2 अगर कोई माणु ऐ समझे की, सै बडा बुद्धिमान है, तां सै असल च हल्ले दीकर सियुदा जाणी नी सकया है, जदिया जाणना उस ताई जरूरी है। 3 पर अगर कोई परमेश्वरे ला प्यार रखदा है, तां उसयो परमेश्वर जाणदा है। 4 हुण खांणे दे बारे च तुहांजो जबाब देणा चांदा है। मूर्तियां दे सामणे बलि दीतिया चिजां दे बारे च असां जाणदे न, की इस संसारे च कुथी भी मूर्तियां च परमेश्वर नी है, कने सिर्फ इक ही सच्चा परमेश्वर है। 5 पर स्वर्गे कने धरतिया पर मतियां चीजां जो, जिना जो लोक ईश्वर कने प्रभु बोलदे न। पर साडा तां इक ही परमेश्वर है: कने सै साडा पिता है; कने उनी ही सारियां चीजां बणाईयां न, कने असां उदे जरिये ही जिन्दे न, तियां ही साडा इक ही प्रभु है, कने सै यीशु मसीह है। उदे जरिये सारियां चिजां बणईयां गियां थियां, कने उदे जरिये असां जिन्दे न। 7 पर साडे भरोसा करणे बाले लोकां जो हल्ले दीकर ऐ नी पता की मूर्तियां बाल कोई शक्ति नी है। क्योंकि सै पेहेले मूर्तियां दी पूजा करदे थे, कने हुण जालू सै मूर्तियां जो चढाया खाणा खांदे न, तां सै गलत सोचदे न की सै हल्ले भी मूर्तियां दिया पूजा च करदे न। कने सै ऐ सोची करी दुखी होंदे न की अगर सै मूर्तियां पर चढाया खाणा खांदे न, तां सै पाप करदे न। 8 पर खांणा खांणे ला असां परमेश्वरे दे नेडे नी होंदे। कने खांणे जो खांणे ताई मना करणे ला असां परमेश्वरे जो घट खुश नी करदे न, कने खांणा खाणा सांझो परमेश्वरे दिया नजरा च कुछ खास नी बणांदा। 9 पर ध्यान रखा की, ऐसा ना हो की,

तुहाडी ऐ अजादी कुथी घट भरोसे बाले लोकां ताई उदे पाप करणे दी बजा ना बणी जाऐ। 10 तुसां जाणदे न की असल परमेश्वर नी न, इस ताई तुसां मूर्तियां दे मंदरे च खांणा खाई सकदे न। पर जडा कोई भरोसे च कमजोर है, सै तुसां जो ओथु खांणा खांदे दिखदा कने मूर्तियां पर बलि कितियां चीजां जो खांणे ताई हिम्मत करे, पर ऐ सोचे की ऐसा करणा पाप है। 11 इस ताई तू जिना गल्लां जो जाणदा है, उसा बजा ला जडा मसीह भाई भरोसे च कमजोर है उनी माणुऐ मसीह पर भरोसा करणा छडी देणा, जिस ताई यीशु मसीह अपणी जान दिती। 12 कने अगर साडे इस कम्मे जो करणे दिया बजा ला साडे साथी मसीही भाई अपने आप जो पापी महसूस करदे न, तां असां उना दे खिलाफ कने यीशु मसीह दे खिलाफ पाप करदे न। 13 इस ताई अगर मूर्तियां दे सामणे बलि चढाया खाणा खांणे दिया बजा ला कुसी भरोसा करणे बाले भाई या बेहणा दा भरोसा कमजोर होई जांदा है, तां मैं कदी भी ऐसा खाणा नी खाणा जिसदी बजा ला उस माणु दा भरोसा कमजोर होई जाऐ। (aiōn g165)

9 जडा कुछ मिजो खरा लगदा है, सै खाणे ताई मैं अजाद है। मैं प्रेरित है। मैं प्रभु यीशु मसीह जो दिखया है। प्रभुऐ जडी सेवा मिजो करणे ताई दितियो है तुसां उस सेवा दा नतीजा न। 2 भले ही लोक ऐ नी मंदे की मैं प्रभु यीशु दा प्रेरित है, पर तुहांजो ऐ गल्ल मनणा चाइदी। क्योंकि मैं ही तुसां बाल सारयां ला पेहेले शुभसमाचार लेईकरी आया था, तुसां दा भरोसा जडा यीशु मसीह पर है, सै इसा गल्ला दा सबूत है की मैं सच्ची तुसां ताई परमेश्वरे दा चुण्या चेला है। 3 जडे लोक मेरे प्रेरित होणे पर सबाल करदे न उना ताई मेरा ऐई जबाब है। 4 मेरा कने बरनबास दा पूरा हक है की, असां तुसां लोकां ला पैसे कने खाणे ताई सहायता लेई सकदे न। 5 जियां पतरस कने होर चेले कने प्रभु दे भाई जालू सेवा करणे ताई अपणी घरे बालियां सोगी जांदे न, तियां ही मेरे बाल भी हक है की मैं ऐसा करे। 6 मिजो कने बरनबास जो भी होर प्रेरितां सांई आर्थिक सहायता लेणे दा हक है, कने अपणियां जूरुतां जो पूरा करणे ताई कम्म करणे दी जरूरत नी है। 7 कोई भी माणु अपने खर्च पर सिपाई दा कम्म नी करदा। इक माणु जडा अंगूरा दा बाग लांदा है सै भी उदा फल खाणे दी उम्मीद रखदा। भेडां दी रखबाली करणे बाला भी उना दा दूध पिणे दी उम्मीद रखदा। 8 मैं ऐ सारियां गल्लां माणुआं दिया सोचा दे मुताबिक नी बोलदा है। 9 मूसा दी व्यवस्था भी ऐई बोलदी है। क्योंकि मूसा दिया व्यवस्था च लिखया है, “गांण गांदे बक्ते दांदे दा मु मत बनदे।” क्या तुहांजो लगदा है की परमेश्वरे जो दांदा दी ही चिंता है? नी बिलकुल भी नहीं! 10 परमेश्वरे ऐ खासकर सांझो ताई ही बोलया है। कने ऐ साडे ताई ही लिखया है, क्योंकि हल बांणे बाला आस रखीकरी ही खतरां जो बांदा है, कने गांणे बाला फसल मिलणे दी आस रखीकरी ही फसल गांदा है। 11 असां तुहाडे बिच आत्मिक बी राया है, इस ताई ऐ उम्मीद करणा बडी बढी गल्ल नी है, की तुसां साडे खर्च ताई पैसे देन। 12 अगर तुसां दुज्जे लोकां दी सहायता किती है जिना तुसां बाल आई करी प्रचार किता, तां बरनबास कने मेरा जादा हक बणदा है की तुसां साडियां जूरुतां जो पूरा करा। क्योंकि असां सारयां ला पेहेले तुहांजो शुभसमाचार सुणाया, पर असां इसा गल्ला ताई तुसां पर भोजन नी पाया। इदे बजाऐ असां सब कुछ सेहन करणे ताई तैयार थे, ताकि

साडे मसीह दे बारे च शुभसमाचार पर भरोसा करणे ला कुसी जो भी परेशानी ना होऐ। 13 तुसां जाणदे न की, जडे लोक मंदरा च सेवा करदे न, उना जो उना दा खांणा मंदरा ला ही मिलदा है, कने जडे वेदी पर बलि चढादे न, उना जो उस बलि दे चढाबे चे ही हिस्सा मिलदा है। 14 इस ताई प्रभुए हुकम दितया है की शुभसमाचार सुणणे बालयां दी रोजी रोटी उना लोकां ला मिलणी चाईदी जडे शुभसमाचार सुणदे न। 15 पर इना हकां चे मैं कदी कुसी दा भी इस्तेमाल नी किता। कने ऐ गल्लां मैं इस ताई नी लिखियां की, हुण तुसां मेरे ताई ऐसा करा। नी बिलकुल भी नी! मेरे ताई मरणा ठीक है, इदे बजाऐ की मैं तुसां ला सहायता मंगे, अगर मैं तुसां ला मुजदूरी लेई तां फिरी मैं इसा गल्ला पर घमंड नी करी सकदा, की मैं बिना कुछ लियो तुसां ताई कम्म किता। 16 इस ताई अगर मैं शुभसमाचार सुणा, तां इदे च घमंड करणे बाली कोई गल्ल नी है; क्योंकि प्रभु यीशुए मिंजो ऐ कम्म करणे दा हुकम दितया है, अगर ऐ कम्म मैं नी करे तां मिंजो बडा दुख होणा। 17 क्योंकि अगर मैं अपणिया इच्छा ला ऐ कम्म करदा है, तां मिंजो मजदूरी मिलणी। कने अगर ऐ कम्म बिना इच्छा ला करदा है, तां ऐ सिर्फ परमेखरे दी दितियो जिम्मेबारियां जो पूरा करदा है, तां मैं कोई भी मजदूरी दी उम्मीद नी करी सकदा। 18 तां क्या है मेरी मजदूरी? मेरी मजदूरी ऐई है की मैं बिना मजदूरी लियो मुफ्त च शुभसमाचार दा प्रचार करें। होर कुछ नी मिंजो इदे च ही खुशी है की मैं मुफ्त च ही शुभसमाचार दा प्रचार करें, हालांकि मिंजो बाल पूरा हक है की मैं अपणी मजदूरी इना ला मंगी सके। 19 इदा मतलब ऐ है की मैं लोकां दियां गल्लां जो मनणे ताई मजबूर नी है, सिर्फ इस ताई की सै मेरी सहायता करदे न, फिरी भी मैं सारयां दा सेबक बणया, ताकि मैं उना जो मसीह च लेई ओऐ। 20 जालू मैं यहूदी लोकां सोगी था, तां मैं उना सांई जिन्दगी जिन्दा था ताकि मैं उना जो मसीह च लेई ओऐ; जालू मैं यहूदी व्यवस्था जो मनणे बालयां सोगी रेंदा था, तां मैं अपु भी उस व्यवस्था दे अधीन रेंदा था, हल्ले की मिंजो उस व्यवस्था जो मनणे दी जरूरत नी है, पर मैं सै इस ताई मनदा है ताकि मैं व्यवस्था दे अधीन रेणे बालयां जो मसीह च लेई ओऐ। 21 ठीक तियां ही होर जातियां सोगी था, तां उना सांई जिन्दगी जी, ताकि उना जो भी मसीह च लेई ओऐ, पर मैं जाणदा की मैं परमेखरे दी व्यवस्था दे बगैर नी जिन्दा था, क्योंकि मैं, मसीह दी व्यवस्था दे अधीन ही है। 22 जालू मैं उना लोकां सोगी होंदा है, जिना दा भरोसा कमजोर है, तां मैं उना सांई व्यवहार करदा है, ताकि मैं उना जो मसीह दे पिच्छे चलणे च सहायता करी सकें, मैं हर इक माणुऐ ताई कुछ न कुछ बणया है ताकि कुसी न कुसी तरीके ला कुछ लोकां दा उद्धार होई सके। 23 कने मैं सारा कुछ मसीह दे बारे च शुभसमाचार जो सुणणे ताई करदा है, ताकि मिंजो शुभसमाचार दी आशीषां च हिस्सा मिली जाऐ। 24 तुसां जाणदे न की, दौडा च तां सारे दौडदे न पर इनाम इकी जो ही मिलदा है। तुसां इयां दौडा की इनाम तुहांजो मिल्ले। इयां ही सांझो सै सब कुछ करणा चाईदा जिदे ला असां परमेखरे जो खुश करी सकन। ताकि सांझो सै इनाम मिली सके जडा परमेखरे ओणे बाले बकत च सांझो देणा। 25 कने जडे लोक दौडा च हिस्सा लेणा चांदे न, सै पेहेले इदी तैयारी करदे न, अपणी इच्छां पर काबू रखदे न, सै ऐसा इस ताई करदे न ताकि जिती सकन कने इज्जत

मिल्ले। उना दी इज्जत करणे ताई पतयां दी बणियो माला दिन्दे न, जडी जल्दी सुकी जांदी है। पर असां जडे यीशु मसीह पर भरोसा करदे न, साडी इज्जत होणी है जडी, कने सांझो ऐसी आशीष मिलणी है, जडी युगां-युगां ताई बणी रेणी है। इस ताई सांझो होर भी जादा सबर रखणा चाईदा। 26 इस ताई मैं अपणी मसीह जिन्दगी जो इक पक्के मकसद सोगी जी दा है, जियां इक कुशती लडने बाला पलबाण लडदा है कने सै होआ च मुक्के नी मारदा है। 27 मैं अपने शरीर जो काबू च रखदा है, ताकि मैं शरीर दियां इच्छां पर काबू करी सकें; इयां ना हो की मैं होरां जो शुभसमाचार दा प्रचार करें, मिंजो अपु जो ही इनाम नी मिल्ले।

10 हे मसीह भाईयो, मैं चांदा है, की तुसां इसा गल्लां जो याद रखा की बडे पेहेले साडे बाप दादयां सोगी जंगला च क्या होया था। परमेखरे इक बदल भेजी करी अगुवाई किती, जडा उना दे अगो-अगो चलदा था। कने उना जो लाल समुंद्र ला निकाली करी सुक्की धरतिया पर लेई आया। 2 जियां असां प्रभु यीशु दे चले बणने ताई बपतिस्मा लेंदे न, तियां ही सै भी सारे बदला दिया छांआ च थे कने मूसा दे चले बणने ताई लाल सागरे चे गे। 3 कने सारयां सेई रोटी खादी, जडी परमेखरे उना जो स्वर्ग ला दिती। 4 कने उना सबना सेई पाणी पीता जडा परमेखरे उना जो दिता था, उना इक चटान ला निकलने बाले पाणिए जो पीता, कने उस चटाना दी तुलना मसीह सोगी करी सकदे न जिना उना सोगी रेईकरी उना जो जिन्दगी दिती। 5 पर परमेखर उना चे मतयां ला खुश नी था, इस ताई तां सै सुनसान जगा च मरी गे। 6 ऐ सारियां गल्लां साडे बाप दादयां ने इस ताई होईयां ताकि सांझो चिताबनी मिल्ले की अगर असां भी इना सांई बुराई करणे दी इच्छा करगे, तां जडा उना सोगी होया सै साडे सोगी भी होई सकदा है। 7 कने तुसां मूर्तियां दी पूजा मत करा, जियां उना चे मते लोकां किता था, ऐ ठीक तियां है जियां पबित्र शाब्ब च लिखिया है, “लोक धामा च खांणा पीणा बैठे, कने रंगरलियां मनाणे ताई उठे।” 8 कने शरमिंदा होणेबाला कम्म कोई मत करा; जडा साडे बाप दादयां चे केईयां किता; कने इक ही रोजे तेरेई हजार लोक मरी गे। 9 कने प्रभु जो मत परखा; जियां उना चे मते लोकां किता, कने जहरीले सपां सै डस्से कने सै मरी गे। 10 बुडबुडा मत जियां उना चे मते लोकां किता, कने परमेखरे इक स्वर्गदूते जो भेजी करी सै मारी दिते। 11 पर ऐ सारियां गल्लां, जडियां साडे बाप दादयां सोगी हुईयां, सै इस ताई हुईयां ताकि ऐ सारे लोकां ताई उदाहरण बणे, कने ऐ गल्लां सांझो चेताबनी देंगे ताई लिखियां न, जडे इस संसारे च इना आखरी दिना च रे दे न। (aiōn g165) 12 इस ताई अगर ऐथू कोई ऐसा माणु है जडा बोलदा है की, परमेखरे पर उदा भरोसा मजबूत है, तां सै ध्यान रखे की, कुथी ऐसा ना हो की सै अचानक भरोसे ला भटकी जा कने पाप करी ले। 13 पाप करणे दियां इच्छां साडे बाल जस्र ओदियां न, पर परमेखर भरोसे दे लायक है; क्योंकि सै तुसां जो कदी एसियां परखा च नी पोणा दिन्दा, जिसदा तुसां सामणा नी करी सकदे, पर इदे बजाए उनी तुसां जो शक्ति देणी, जिसदी तुसां जो जरूरत है, ताकि तुसां पापां ला बची सकन। 14 इस ताई, हे मेरे प्यारे भाईयो, मूर्तियां दियां पूजा करणे ला बची रिया। 15 मैं तुहांजो समझदार समझीकरी गल्लां बोला दा है, इस ताई इना गल्लां पर ध्याने

ला सोच बिचार करा जड़ियां मैं हण बोलणा लगया की सै सही न या गलत न। 16 जालू असां प्रभु भोज च इस्तेमाल होंगे बाले कटोरे ला अंगूरा दा रस्स पिदे न, कने जिस ताई असां परमेश्वरे दा धन्यवाद करदे न, तालू असां सच्ची मसीह दे खने जो साझा करदे न। कने जालू असां रोटी तोडदे न कने खांदे न, तां असां सच्चे मसीह दे शरीर जो साझा करदे न। 17 इस ताई की, इक ही रोटी है जड़ी की मसीह है, भले ही असां केई न, असां इक शरीर बणी जांदे न; क्योंकि असां सारे उसा इकी रोटिया चे खांदे न। 18 इस्राएल देशे दे लोकां दे बारे च सोचा, जालू सै परमेश्वरे जो चढ़ाणे बाले खाणे जो खांदे न, तां परमेश्वरे दी पूजा च हिस्सा लेंदे न, इयां ही जडे लोक मूर्तियां जो चढ़ाणे बाले खाणे जो खांदे न, सै भी उना मूर्तियां दिया पूजा च हिस्सा लेंदे न। 19 मेरे बोलणे दा मतलब ऐ नी की मूर्ति या मूर्तियां सामणे चढ़ाईयां बलियां दी कोई कीमत है। 20 पर मैं ऐ बोला दा है की, जडे लोक उना मूर्तियां ताई चीजां दियां बलियां चढ़ांदे न, सै परमेश्वरे ताई नी पर बुरियां आत्मा ताई चढ़ांदे न, मैं ऐ नी चांदा की तुसां बुरियां आत्मा दे हिस्सेदार बणा। 21 ऐ होई नी सकदा की तुसां प्रभु दे कटोरे चे पीया कने बुरियां आत्मा दे कटोरे चे भी पीया; इयां ही ऐ भी नी होई सकदा की तुसां प्रभु दी मेज च हिस्सेदार होआ कने बुरियां आत्मा दे मेज च भी। 22 अगर असां ऐसा करदे न तां असां प्रभु दे गुस्से जो भडकांदे न। याद रखा असां परमेश्वरे ला जादा शक्तिमान नी न। 23 तुसां बोलदे न की, साडे बाल सारियां चीजां करणे दी अजादी है, हां पर सारियां चीजां साडे फायदे ताई नी न। असां सब कुछ करणे ताई अजाद, पर सारियां चीजां परमेश्वरे पर भरोसे जो नी बतादियां। 24 तुसां चे हर कुसी जो अपने बारे च ही नी सोचना चाईदा, पर दुर्जे दिया भलाईया ताई भी सोचना चाईदा। 25 पर जालू तुसां बजारां च मास खरीददे न, तां उसयो खरीदी करी खाई लिया, ऐ मत पुच्छा की ऐ मूर्तियां सामणे बलि कितया था की नी, तां तुसां दिया अंतरात्मा परेशान नी होणा। 26 तुसां इसयो खाई सकंदे न, क्योंकि पबित्र शास्त्र च लिखया है की, “धरती कने जडा कुछ उसा च है; सै सब कुछ प्रभु दा है।” 27 कने अगर कोई भरोसा नी करणे बालयां चे तुहांजो खाणे ताई सदे, कने तुसां जाणा चान, तां जडा कुछ तुहाडे सामणे खाणे ताई रखगे तां उना ला ऐ मत पुछदे की ऐ खाणा बलि कितया है की नी, ताकि अगर सै बलि कितया होंगा, तां उस खाणे दिया बजा ला तुसां दिया अंतरात्मा तुहांजो दोषी नी बणाणा। 28 पर अगर कोई तुसां जो बोले, “ऐ तां मूर्तियां जो चढ़ाया खाणा था,” तां तुसां उस खाणे जो मत खांदे, अपनी अंतरात्मा दिया बजा ला नी, पर उदिया अंतरात्मा दिया बजा ला जिनी तुहांजो ऐ गल्ल दस्सी थी। क्योंकि मेरी अपनी खाणे दी अजादी जो कुसी होरसी माणुऐ दिया अंतरात्मा जरिये न्याय नी कितया जाणा चाईदा। 30 अगर मैं धन्यवाद करिरी मूर्तियां सामणे बलि कितियां चीजां खाई लेंदा है, तां उस ताई मिजो पर कजो दोष लगांदे न, जिस खाणे ताई मैं परमेश्वरे दा धन्यवाद किता? 31 कने इदा जबाब ऐ है, चाऐ तुसां खा, या पिया, चाहे जडा कुछ करा, पर सारा कुछ परमेश्वरे दिया महिमा ताई करा। 32 मैं जडा कुछ भी करदा है, उदे च मैं सारयां जो खुश करणे दी कोशिश करदा है; मैं अपनी भलाई नी सोचदा पर सारयां दी भलाई सोचदा है ताकि सारे बची सकन। इस ताई तुसां भी इस तरीके ला जिया की तुसां यहदी

लोकां ताई, या होर जाति दे लोकां ताई, या परमेश्वरे दिया कलीसिया दे लोका ताई कोई परेशानी खड़ी ना होऐ, जिसा बजा ला सै मसीह पर भरोसा करणा छडी देन।

11 जियां मैं मसीह सांई जिन्दगी जिंदा है, तियां ही तुसां भी मेरे सांई जिन्दगी जिया। 2 हे मसीह भाईयो, मैं तुहाड़ी तारीफ करदा है, क्योंकि तुसां मिजो सारियां गल्लां च याद करदे न, कने जड़ियां शिक्षा मैं तुसां जो दीतियां न, उना दा ध्याने ला पालन करा दे न। 3 पर इक गल्ल है जड़ी मैं चांदा है की तुसां ऐ जाणी लिया की, हर इक मर्दे दा मुंड मसीह है, कने इक घरे बालिये दा मुंड उदा घरेबाला है, कने मसीह दा मुंड परमेश्वर है। 4 इस ताई अगर कोई मर्द कलीसिया च प्रार्थना करदे बकत या परमेश्वरे दा संदेश सुणंदे बकत अपना सिर ढकदा है, तां सै मसीह दा अनादर करदा है जडा उदा सिर है। 5 पर जड़ी जनानी कलीसिया च बिना सिर ढक्यो प्रार्थना या परमेश्वरे दा बचन सुणा दी है, इदा मतलब ऐ है की सै अपने घरे बाले दा अनादर करदी है जडा उसा दा सिर है। सै उसा जनानिया सांई है जिसा जो शर्मिंदा करणे ताई उसा दा मुंडन करी दिन्दे न। 6 अगर सै जनानी मुंड नी ढकणा चांहदी, तां सै अपने बाल कटाई दे; पर अगर जनानिया ताई बाल कटवाणा सरमा दी गल्ल है, तां सै प्रार्थना या भविष्यवाणी करदे बकत सिर ढकी ले। 7 मरदे ताई अपना सिर ढकणा खरा नी है, क्योंकि मर्द परमेश्वरे दी महिमा है, जिसयो परमेश्वरे अपने रूपे च बणाया है; पर जनानियां मर्दा दिया महिमा जो जाहिर करदियां न। 8 क्योंकि पेहला मर्द जनानिया ला नी आया था, पर पैली जनानी मरदे ला आईयो थी। 9 परमेश्वरे पेहले मरदे जो जनानिया दिया सहायता ताई नी बणाया, पर जनानिया जो मरदे ताई बणाया। 10 इसा बजा ला कने स्वर्गदूतां दिया बजा ला भी, इक जनानिया जो अपने सिरे जो ढकणा चाईदा, अपने अधिकारे दे चिन्न दे स्पे च। 11 तमी अगर असां भरोसा करणे बाले लोकां दी गल्ल करदे न, तां ना जनानियां मरदा ला अजाद न, कने ना ही मरद जनानिया ला अजाद न। 12 हालांकि परमेश्वरे पैली जनानी मरदे ला बणाई, पर हण जनानियां ही मर्दा जो जमदियां न; कने सै दोनो परमेश्वरे दिया तरफा ला न जिनी सारयां जो बणाया है। 13 मैं चांदा है की तुसां अपु ही फेसला करा, की क्या इक जनानिया जो उघडे सिरे सभा च परमेश्वरे दी प्रार्थना करणा सही है? 14 कुदरती तुसां ऐ जाणंदे नी, की अगर कोई मर्द लम्बे बाल रखे, तां उदे ताई ऐ सरमा दी गल्ल है। 15 अगर जनानी लम्बे बाल रखे तां उदे ताई शोभा है, कने उना जो अराधना च सिर ढकणा चाईदा। 16 पर अगर कुसी जो लग्गा दा है मैं गलत बोला दा है, तां तुसां ऐ जाणी लिया की साडी कलीसिया कने परमेश्वरे दिया कलीसिया दे ऐई रिबाज न। 17 जिना गल्लां दे बारे च हण मैं तुहांजो बोलणा लगया, उना दी मैं तारीफ नी करी सकदा है, क्योंकि कलीसिया च तुहाडे गिठे होणे ला तुहाड़ी भलाई नी पर बुराई ही होई है। 18 क्योंकि सारयां ला पैली गल्ल तां ऐ है, मैं ऐ सुणया है, की जालू तुसां कलीसिया च अराधना ताई गिठे होंदे न, तां तुसां बिच अपु चे बणदी नी, कने मिजो भरोसा है की उना दियां गल्लां च कुछ सच्चाई है। 19 तुसां जो क्या लगदा, की तुसां बिच जालू बटबारा होणा, तालू ही पता लगणा है की कुण परमेश्वरे दे चुणयो लोक न? नी ऐसा बिलकुल नी

है। 20 जालू तूसां इक जगा च गिठे होंदे न, तां तूहांजो इसा गल्ला दी चिंता नी है, कि प्रभु यीशु मसीह दी मौत जो याद करणे ताई प्रभु भोज कियां खाणा चाईदा। 21 क्योंकि मिंजो पता लगया की तूसां चे केई लोक दुज्जयां सोगी बंडणे ला पेहले अपना खाणा खाई लेंदे न, जिंसा बजा ला कुछ लोक भूखे ही चली जांदे न, कने केई शराबी होई जांदे न। 22 तूसां अपने घरां च खाई पी सकदे न! तूसां परमेश्वरे दिया कलीसिया दा निरादर कने गरीबां दी बेईजती करदे न। क्या मैं इस कम्मे ताई तुहाड़ी तारीफ करां? मैं ऐसा करणे ताई तुहाड़ी तारीफ नी करणी। 23 जड़ी शिक्षा मैं तूहांजो दितियो थी, सेई शिक्षा है जड़ी मिंजो प्रभु ला मिलियो है, की प्रभु यीशु मसीह जिस राती पकड़बाया गया, तां उनी रोटी लेई, 24 कने परमेश्वरे दा धन्याबाद करिरी तोड़ी, कने बोलया, “ऐ मेरा शरीर है, जडा तुहाड़े उद्धार ताई बलिदान कितया जाणा, कने मिंजो याद करणे ताई इयां ही करदे रिया।” 25 कने जालू सै रोटी खाई बैठे तां यीशुएं अंगरा दे रस्से ला भस्म्या कटोरा लिया, कने बोलया, “ऐ कटोरा मेरे खूने च नोई बाचा है, जालू कदी तूसां इसयो पीगे, तां मेरी याद ताई इयां ही करदे रिया।” 26 क्योंकि जालू भी तूसां इसा रोटिया चे खांगे, कने इस कटोरे चे अंगरा दा रस पीगे, तां जालू दीकर प्रभु मुडी नी ओए तां उदिया मौता दा प्रचार करदे रिया। 27 इस ताई जडा कोई इस तरीके ला जडा मसीह दा निरादर करदा है प्रभु दी रोटी खा, या उस कटोरे चे पिऐ, तां सै प्रभु दे शरीर कने खूने दे खिलाफ पाप करदा है। 28 इस ताई हर इक माणु इसा रोटिया जो खाणे कने इस कटोरे चे अंगरा दा रस पीणे ला पेहले अपने आपे जो जांजी परखी ले की उदे अपने बिचार सही न। 29 क्योंकि जडा कोई रोटी जो खाणे कने कटोरे च पिंदे बेले प्रभु दे शरीर दी इज्जत ना करे, तां सै इस तरीके ला खाई पी करी अपने उपर सजा लेई ओंदा है। 30 ऐई बजा है की तूसां चे केई बीमार न, कने तूसां लोकां बाल कमजोर शरीर भी है कने केई लोक मरी भी गियो न, क्योंकि ऐ परमेश्वरे दी सजा है। 31 इस ताई अगर असां पेहले अपने आपे जो परखी लेंदे न, तां परमेश्वरे सांझो सजा नी देणी। 32 पर अगर परमेश्वर इस तरीके ला सांझो सजा दिन्दा है, तां सै सिर्फ सांझो सुधारदा है, ताकि सांझो न्याय बाले दिने संसारे दे लोकां सोगी सजा ना मिल्ले। 33 इस ताई, हे मेरे मसीह भाईयो, जालू तूसां प्रभु भोज खाणे ताई गिठे होंदे न, तां इक दुज्जे ताई स्का करा ताकि सोगी रोटी खाई सकन। 34 अगर कोई भूखा हो, तां अपने घरे खाई ले ताकि जालू तूसां गिठे होंदे न तां सही ढंगे ला व्यवहार करी सकन, ताकि परमेश्वर तूहांजो सजा ना दे, कने बाकि गल्लां दे बारे च जड़ियां तूसां लिखियां थियां, सै मैं ओथु आई करी समझाई दिंगा।

12 हे मसीह भाईयो, तूसां मिंजो ला पबित्र आत्मा दे बरदाना दे बारे च पछया था, मैं चांदा की तूसां इना बरदाना दे बारे च अच्छे ला जाणी लिया। 2 तूसां जाणदे न, की परमेश्वरे पर भरोसा करणे ला पेहले कियां जिन्दगी जिन्दे थे। तूसां भटकाई दितयो थे की तूसां बेजान मूर्तियां दी पूजा करन। 3 इस ताई मैं चांदा है तूसां इसा गल्ला जो जाणी लिया की परमेश्वरे दी दितियो पबित्र आत्मा दे जरिये कोई भी माणु ऐसा नी बोलदा की यीशु श्रापित है, कने पबित्र आत्मा दे जरिये ही सै बोली सकदा है की “यीशु ही प्रभु है।” 4 कने हुण केई किस्मा दे बरदान न, पर इना जो सारे बरदाना जो देणेबाला

सिर्फ इक ही है, कने सै पबित्र आत्मा है। 5 कने लग-लग तरीके ला असां प्रभु दी सेवा करी सकदे, पर असां सारे इक ही प्रभु दी सेवा करदे न। 6 कने परमेश्वर भी केई तरीके ला साडिया जिन्दगिया च कम्म करदा है, पर ऐ सेई परमेश्वर है जडा असां सारयां दे जरिये कम्म करदा है। 7 परमेश्वरे सांझो सारयां जो इक दुज्जे बिस्वासी भाई बेहणा दी सहायता ताई ऐसा बरदान दितया है, जडा पबित्र आत्मा दी हाजरी जो प्रकट करदा है। 8 क्योंकि पबित्र आत्मा कुसी इकी माणुए जो अकली दियां गल्लां बोलणे दा बरदान दिन्दी, कने होर कुसी माणुए जो ज्ञान दियां गल्लां बोलणे दा बरदान दिन्दी है। 9 कने कुसी माणुए जो मसीह पर बडा जादा भरोसा करणे दा बरदान दिन्दा, कने कुसी जो ऐई पबित्र आत्मा दुज्जे माणुआं जो ठीक करणे दा बरदान दिन्दी है। 10 पबित्र आत्मा कुसी जो चमत्कार करणे दी शक्ति दिन्दी; कने कुसी जो परमेश्वरे दा सदेश देणे दा बरदान दिन्दी, कने कुसी जो ऐ परखणे दी समझ दिन्दी की पबित्र आत्मा दिया तरफा ला कने बुरियां आत्मा दिया तरफा ला मिलणे बाले बरदाना च क्या फर्क है। कने कुसी जो लग-लग भाषा बोलणे दा बरदान दिन्दी, जड़ी उना कदी नी सिखियो हो; कुसी जो इना भाषा दा मतलब दसणे दा बरदान दिन्दी। 11 पर ऐ सारे बरदान इक ही पबित्र आत्मा दे कम्म न, सै सारे मसीह पर भरोसा करणे बालयां जो बरदान दिन्दा है जदिया पबित्र आत्मा चांदा है। 12 क्योंकि जियां माणुए दा शरीर तां इक है पर उदे अंग मते न, कने मते सारे अंग मिली करी इक शरीर बणादे न, इयां ही मसीह भी कने उस पर भरोसा करणे बाले भी इक न। 13 क्योंकि असां सारयां जडे यहूदी न, या होर जाति न, या गुलाम न, या अजाद न, इक ही पबित्र आत्मा जरिये इक शरीर होणे ताई बपतिस्मा लिया, कने सांझो सारयां जो इक ही आत्मा मिलींथो, जियां असां सारयां इक ही कटोरे चे पिंदे न। 14 साडे शरीर च इक ही अंग नी है, पर मते सारे अंग न। 15 सोचा, अगर पैर बोले की, “मैं हथ नी है, इस ताई मैं शरीर दा अंग नी है,” तां क्या उदे ऐसा बोलणे दिया बजा ला सै शरीर दा अंग नी है? 16 कने अगर कन बोले, “मैं हथ नी है, इस ताई मैं शरीर दा अंग नी है,” तां क्या सै कन्ना दा ऐसा बोलणे दिया बजा ला सै शरीर दा अंग नी है? 17 अगर सारा शरीर हथ ही होंदी तां सुणना कुथु ला था? अगर सारा शरीर कन ही होंदा तां सिंघणा कुथु ला था? 18 पर परमेश्वरे अपनी इच्छा अनुसार शरीर दे सारे अंगा जो इक-इक करिरी ठीक जगा च रखया है। 19 अगर सारे इक ही अंग होंदे, तां कोई शरीर नी होणा। 20 इस ताई, भले ही शरीर दे मते अंग होंदे न, पर शरीर इक ही है। 21 हथी हथां ला नी बोली सकदियां की, मिंजो तेरी जरूरत नी है, कने ना सिर पैरां जो बोली सकदा है की, “मिंजो तेरी जरूरत नी है।” 22 पर शरीर दे सै अंग जिना जो असां कमजोर समझदे न, सै बडे जरूरी न। 23 कने शरीर दे जिना अंगा जो असां आदर दे काबिल नी समझदे न उना जो असां बडे ध्याने ला ढकी करी रखदे न। इस ताई उना अंगा दी रक्षा करदे न जिना जो दुज्जयां जो नी दस्सी सकदे, जालू की जादा आदर दे काबिल अंगा जो खास देखभाल दी जरूरत नी होंदी। इस ताई परमेश्वरे शरीर जो इस तरीके ला बणाया है की उना अंगा जो जादा आदर कने देखभाल होऐ जडे घट इज्जत दे काबिल न। 25 परमेश्वरे ऐ इस ताई किता की शरीर दे सारे अंग इक दुज्जे ला मिल्ली करी रेन, कने

शरीर दे सारे अंग इक दुज्जे दी देखभाल करन। 26 अगर साडे शरीर दा इक अंग बीमार है, तां उस सोगी शरीर दे सारे अंग दुखी होंदे न, कने इयां ही साडे शरीर दे इक अंगो दी अच्छे ला देखभाल होंदी है, तां पूरा शरीर खुश है। 27 इयां ही तुसां भी सारे मिली करी मसीह दे शरीर न, कने तुसां सारे उदे शरीर दे अंग न। 28 कने मसीह दे इस शरीर च जड़ी कलीसिया है, परमेस्वरे लग-लग लोकां जो लग-लग कम्म दितया है। पेहले सै लोक जडे उदे प्रेरित न, दुज्जे परमेस्वरे दे संदेश देणेबाले, तीजे सै लोक न जडे सिखांदे न। उदे बाद सै लोक न जिना जो उनी चमत्कार करणे दा हक दितया है, कने सै लोक न जिना जो लोकां जो ठीक करणे दा हक दिता, फिरी सै न जिना जो दुज्जयां दी सहायता करणे दी ताकत मिलियो, फिरी सै न जडे अगुवे न, फिरी सै न जिना जो पबित्र आत्मा जरिये लग-लग भाषा बोलणे दा बरदान मिलया, जडियां उना कदी सिखियां नी थियां। 29 हर कोई प्रेरित नी होंदा। हर कोई परमेस्वरे दा संदेश देणेबाला नी होंदा। कने हर कुसी बाल चमत्कार करणे दा हक नी होंदा। 30 हर कुसी जो लोकां जो ठीक करणे दा बरदान नी मिलया होंदा। कने हर कुसी जो लग-लग भाषा बोलणे दा बरदान नी मिलया होंदा, जडियां उनी कदी भी नी सिखियां होन। 31 हर कुसी जो लग-लग भाषा दा मतलब दसणे दा बरदान नी मिलया, जडियां उनी कदी नी सिखियां। इस ताई पबित्र आत्मा ला बडे ला बडा बरदान पाणे दी इच्छा रखा! पर मै हुण तुसां जो दसणा की इदे ला भी खरा क्या है।

13 अगर मै माणुआं, कने स्वर्गदूतां दी भाषा बोलें, कने मै लोकां सोगी प्यार ना करें, तां मेरा बोलणा ठण-ठण करदी पितल कने छण-छण करदी झांझ साई है। 2 कने अगर मै परमेस्वरे दा संदेश देई सकें, कने सारे भेदां कने हर तरा दे ज्ञाने जो समझी सकें, कने ऐथू दीकर की मेरा परमेस्वरे पर पूरा भरोसा हो की, मै पहाडे जो हटाई दें, पर दुज्जे सोगी प्यार नी करें, तां मेरी कोई कीमत नी। 3 कने अगर मै अपनी सारी जमीन जायदाद गरीबां जो बंदी दें, या उना जो अपना शरीर फुकरे ताई देई दें, कने दुज्जे सोगी प्यार नी करें, तां इदे ला मिंजो कोई फायदा नी। 4 जडे लोक दुज्जयां सोगी प्यार करदे न, सै सबर रखणेबाले कने दयालू होंदे न, सै लोक जलन नी करदे; कने ना सै अपनी बडाई करदे न कने न अपने बारे च घमंड करदे। 5 सै लोक कुसी सोगी भी बुरा व्यवहार नी करदे, सै अपनी ही खुशी दे बारे च ही नी सोचदे, सै झट गुस्सा नी करदे, कने सै उना बुरियां गल्लां जो याद नी रखदे, जडियां उना दे खिलाफ कितियां होन। 6 जालू लोक बुरे कम्म करदे न तां सै खुश नी होंदे, पर सै तालू खुश होंदे जालू लोक सही कम्म करदे न। 7 सै कदी हार नी मंदे, प्यार सांझो हर तरा दे हालातां च परमेस्वरे पर भरोसा करणा कने आस रखणे दे काबिल बणादां है, ऐ दुख कने परेशानियां च सबर रखणा सिखांदा है। 8 सै बकत ओणा जालू लोकां परमेस्वरे दे संदेश दा प्रचार होर-होर भाषा च नी करणा, कने परमेस्वरे दे बारे च खास ज्ञाने दी जरूरत नी होणी, पर प्यार हमेशा ताई बणी रेणा। 9 क्योंकि साडा खास ज्ञान कने परमेस्वरे दे संदेश दे बारे च प्रचार करणे दी शक्ति, दोनों अधूरियां न। पर जालू उनी ओणा है जडा पूरा कने सिद्ध है, तालू जडा अधुरा है उदी जरूरत नी रेणी। 11 ऐ इक माणुऐ दे बड्डे होणे साई। जालू मै इक बच्चा था, तां मै बच्चे

साई बोलदा कने सोचदा समझदा था, पर जालू मै बडा होई गया, तां मै बचपने दे तरीके छडी दिते। 12 इसा जिन्दगी च असां सब कुछ पूरी तरा नी समझदे न। ऐ तियां है जियां कोई माणु अपनी शकल धुन्तले सीसे च दिखदा है। पर जालू असां स्वर्गे च जांदे न, तालू असां सब कुछ साफ-साफ समझणा। ऐ कुसी सोगी आमणे सामणे गल्ल करणे साई होणा। हुण असां सब कुछ जाणदे न जडा परमेस्वर सांझो सिखाणा चांदा है। तालू असां सब कुछ जाणी जाणा, जियां परमेस्वर सांझो जाणदा है। 13 इस ताई हुण असां तिन गल्लां जो करदे न: परमेस्वरे पर भरोसा रखा, परमेस्वरे दे बायदे पर आस रखा। पर इना गल्लां च सारयां ला बडी गल्ल इक दुज्जे ला कने परमेस्वरे ला प्यार करणा।

14 इक दुज्जे ला प्यार करणे दी कोशिश करा, कने पबित्र आत्मा दे बरदान पाणे दी बडी इच्छा रखा, खासकर परमेस्वरे दा संदेश देणे दा बरदान पाणे दी इच्छा रखा। 2 क्योंकि जडा होर-होर भाषां च गल्लां करदा है, उसा भाषा जो कोई नी समझी सकदा, सै माणुऐ ला नी, पर परमेस्वरे ला गल्लां करदा है। इस ताई कोई भी नी समझदा की सै क्या बोला दा है, क्योंकि सै पबित्र आत्मा दिया शक्तिया ला गुप्त गल्लां बोलदा है। 3 पर जडा भविष्यवाणी करदा है, सै भरोसा करणे बाले लोकां जो उना दे भरोसे च मजबूत करदा, कने उना दे मना जो होंसला कने तसल्ली देणे ताई सहायता करदा है। 4 होर-होर भाषां च गल्लां करणे बाला माणु अपने आप दा भरोसा मजबूत करदा है, पर जडा भविष्यवाणी करदा है, सै कलीसिया दे सारे भरोसा करणे बाले लोकां दे भरोसे जो मजबूत करदा है। 5 मै चांदा है, की तुसां सारे होर भाषा च गल्लां करा, पर इसला बडिया गल्ल ऐ की तुसां भविष्यवाणी करा। क्योंकि सै जडा भविष्यवाणी करदा है, उस होर भाषा च बोलणे बाले ला, जडा मतलब दसयो बिना होर भाषा च बोलदा है, बेहतर है क्योंकि मतलब पता लगणे ला ही कलीसिया दे लोकां दी तरक्की होई सकदी है। 6 इस ताई हे मसीह भाईयो, अगर मै तुहाडे बाल आई करी होर भाषा च गल्लां करें, कने इदा मतलब नी समझाई सकें तां इदे ला तुहांजो क्या फायदा होणा? इदे बदले अगर मै तुहांजो सै दस्से जिदा परमेस्वरे मिंजो प्रकाशन दितया, या सच्चाईया दा ज्ञान, भविष्यवाणियां, या उपदेश दियां गल्लां दस्से, इदे ला तुहांजो जादा फायदा होणा। 7 इयां ही अगर कोई बिण या बंसरी बजांदा है, कने अगर इना दिया अबाजा च कोई फर्क नी है, तां बाकियां कियां पछेणना की ऐ बिण या बंसरी है? 8 कने अगर लडाई दे बकत तुरही दी अबाज साफ नी सुणुऐ, तां सिपाई लडाईऐ ताई तैयार नी होई सकदा। 9 इयां ही, जालू तुसां ऐसे शब्द बोलंदे न जिना जो लोक समझी नी सकदे न, तां ऐ होआ च गल्लां करणे साई है कने जडा तुसां बोला दे न उदी कोई कीमत नी होणी। 10 इस संसारे च मतियां लग-लग भाषां न कने हर भाषा दा अपना मतलब है। 11 पर अगर असां उस भाषा दा मतलब नी समझदे न, जडे दुज्जे बोलंदे न, तां ऐ ऐसा होणा मन्ना की सै साडे ताई परदेसी न, कने असां उना ताई परदेसी न। 12 इस ताई जालू तुसां आत्मिक बरदान पाणे दी इच्छा रखदे न, तां पबित्र आत्मा तुहांजो बरदान दिन्दा है, तां उना बरदाना दा इस्तेमाल करणे ताई कोशिश करदे रिया ताकि इना बरदाना ला कलीसिया दे लोकां दा भरोसा होर

जादा मजबूत हो। 13 इस ताई जडे होर भाषा च परमेश्वरे ला गल्लां करदे न, सै प्राथना करन की जडा सै बोला दे न उदा मतलब दुज्जयां जो समझाई सकन। 14 क्योंकि जालू मैं होर भाषा च प्राथना करें, तां मेरी आत्मा प्राथना करदी है, पर मेरा मन इसयो नी समझदा है। 15 कने इसा बजा ला जालू मैं प्राथना करें तां मैं पबित्र आत्मा दी अगुवाई च प्राथना करें, पर मैं ऐ भी चांदा है की दुज्जे लोक समझी सकन की मैं क्या बोला दा है। कने जालू मैं भजन गां तां सै भी पबित्र आत्मा दी अगुवाई च हो, पर ऐ भी जरूरी है की जडा मैं भजन गा दा है सै भी दुज्जे लोक समझन। 16 मना की कोई आम बन्दा तुहाडिया अराधना च है कने तुसां अपनी आत्मा ला परमेश्वरे दी अराधना करा दे न। अगर सै तुहाडियां गल्लां जो नी समझदा, तां तुहाडा परमेश्वरे जो धन्यवाद देणे बाद, उसयो कियां पता लगणा की आमीन कालू बोलणा जिस बारे च तुसां बोलया। 17 तू तां सही ढंगे ला परमेश्वरे दा धन्यावाद करदा होगा, पर इदे ला दुज्जे लोकां दा भरोसा मजबूत नी होंदा। 18 मैं अपने परमेश्वरे दा धन्यवाद करदा है, की मैं तुसां ला जादा होर भाषा च गल्लां करदा है। 19 पर जालू मैं कलीसिया दे लोकां च होंदा है, तां मेरे ताई ऐई खरा है की उना जो सिखाणे ताई समझणे दे पंज अखर बोले जडे सै समझी सकन। ना कि इदे बजाए होर भाषा च दस हजार गल्लां बोले, जिना जो कोई नी समझे। 20 हे मसीह भाईयो, तुसां इना गल्लां जो समझणे ताई बचयां साईं मत बणा; पर बुराईया ताई बचयां साईं मासूम बणा, पर इना गल्लां जो समझणे ताई सियाणे बणा। 21 पबित्र शास्त्र च लिखया है, की प्रभु बोलदा है की, “मैं बिदेशी कने अजनबी लोकां दे जरिये अपने लोकां ला गल्लां करणियां, जिना अजीब या लग भाषा बोलणियां, तमी उना मेरियां गल्लां नी सुणनियां।” 22 इस ताई होर भाषां भरोसा करणे बालयां ताई नी, पर भरोसा नी करणे बालयां ताई इक निशाण है, कने परमेश्वरे दे संदेश दसणा भरोसा नी करणे बालयां ताई नी, पर भरोसा करणे बालयां ताई इक निशाण है। 23 इस ताई अगर कलीसिया दे लोक इक जगा गिठे होन, कने सारे होर भाषा च परमेश्वरे ला गल्लां करन, कने कोई जडे ऐ भाषा नी समझदे होन या कोई भरोसा नी करणे बाले अंदर आई जान तां उना पक्का सोचणा की तुसां पागल होई गियो न। 24 पर अगर सारे परमेश्वरे दे संदेश दसणा लग्गे, कने अगर कोई भरोसा नी करणे बाला या इस बरदान दे बारे च अनजाण माणु अंदर आई जा, तां उसयो ऐहसास होई जाणा की सै पापी है, कने उनी अपनी जिंदगी तुसां दे बोलेने दिया बजा ला बदली देणी। 25 परमेश्वरे दे श्भसमाचार दिया बजा ला उसयो उदी बुराई कने उदे मने दे बुरे बिचारां दा ऐहसास होणा, कने उसयो ऐहसास होणा की सै पापी है कने उनी पापां दा पछाताप करणा, कने गोडे भार बेईकरी परमेश्वरे दी अराधना करणी। कने मन्नी लेणा की, सच्ची परमेश्वर तुहाडे बिच है। 26 इस ताई हे मसीह भाईयो, सुणा तुहांजो क्या करणा चाईदा? जालू तुसां अराधना ताई गिठे होंदे न, तां तुसां चे इकी माणुऐ प्रभु दे भजन गाए, कने इक ही परमेश्वरे दे दितयो प्रकाशन दस्से, कने इक ही होर भाषा च परमेश्वरे ला गल्लां करे, कने होर दुज्जे इदा मतलब दसन। ऐ सारा कुछ तुहांजो भरोसा करणे बाले लोकां जो मजबूत करणे ताई करणा चाईदा। 27 अगर होर भाषा च परमेश्वरे सोगी गल्लां करणियां चांदे न, तां

सिर्फ दो या तिन्न जणे बारी-बारी बोलन, कने इक माणु इना भाषा दा मतलब दसणे बाला होणा जरूरी है। 28 पर अगर होर भाषा दा मतलब दसणे बाला कलीसिया च कोई नी है, तां सै माणु कलीसिया च चुप रे, कने अपने मने च परमेश्वरे ला गल्लां करे। 29 परमेश्वरे दा संदेश देणेबालयां चे दो या तिन ही परमेश्वरे दा संदेश देन, कने बाकी लोक ऐ दीखन की जडा सै बोला दे न सै पबित्र शास्त्रे अनुसार ठीक है की नी है। 30 पर अगर कुसी दुज्जे माणुऐ जो जडा कलीसिया च बैठया हो, उसयो परमेश्वरे दिया तरफा ला कोई संदेश मिल्ले, तां जडा पेहले बोलणा लगया हो सै चुप होई जाए कने उसयो बोलणा दे। 31 क्योंकि तुसां सारे परमेश्वरे दा संदेश देई सकदे न, पर इक-इक करिरी, ताकि हर कोई सिखे कने सारयां जो हिम्मत मिल्ले। 32 कने परमेश्वरे दा संदेश देणेबाला अपने आप पर काबू रखे; सै अपणिया इच्छा ला बोली सके कने अपणिया इच्छा ला बोलणा बंद भी करी सके। 33 क्योंकि परमेश्वर गडबडी दा नी पर शांति दा परमेश्वर है। इसी नियमे जो परमेश्वरे दियां सारियां कलीसियां मंदियां न। 34 जनानिया कलीसिया च चुप रेन, क्योंकि उना जो गल्लां करणे दा हुकम नी है, पर अधीन रेणे दा हुकम है। जियां मूसा दिया व्यवस्था च भी लिखया है। 35 अगर सै कुछ सिखणा चांदिया न तां सै कलीसिया च जादा सबाल जबाब ना करन, पर घरे जाई करी अपने घरे बाले ला पछन, क्योंकि जनानिया दा कलीसिया च गल्लां करणा सही नी है। 36 ऐसा क्या है की तुसां चे कुछ लोक पेहले दसियो व्यवस्था जो नी मनणा चांदे? क्या तुहांजो लगदा है की तुसां पेहले न जिना जो परमेश्वरे दा बचन दितया है? या सिर्फ ऐ तुहांजो ही दितया था? 37 अगर कोई माणु अपने आप जो परमेश्वरे दा संदेश देणेबाला या ऐसा माणु समझे जिसयो पबित्र आत्मा बरदान दितया हो, तां ऐ समझी लिया की, जडियां गल्लां मैं तुहांजो लिखियां न, सै प्रभु दा हुकम है। 38 अगर कोई माणु मेरियां लिखियां गल्लां जो ना मन्ने, तां तुसां भी उदियां बोलियां गल्लां मत मन्ना। 39 हे मसीह भाईयो, परमेश्वरे दा संदेश देणे दी इच्छा रखा कने होर भाषा च परमेश्वरे ला गल्लां करणे ताई कुसी जो भी मना मत करा। 40 पर जडा कुछ भी तुसां अराधना करदे बकत करदे न, उना सारियां गल्लां जो पुरे सभ्य तरीके ला करा।

15 हे मसीह भाईयो, मैं तुहांजो सै ही श्भसमाचार याद करांदा है, जडा मैं पेहले सुणाई बैठया है, जिस पर तुसां पेहले भरोसा भी किता था कने जिदे च तुसां टिकयो भी न। 2 अगर तुसां उस श्भसमाचार पर जिदा मैं प्रचार किता, तुहाडा भरोसा उस पर बणी रेंगा तां परमेश्वरे तुहाडा उद्धार करणा; अगर तुहाडा भरोसा कमजोर होई जांगा तां उदी कोई कीमत नी कने सै बेकार है। 3 इसा बजा ला मैं तुहांजो सारयां ला जरूरी संदेश दसया, जडा मिंजो प्रभु यीशु मसीह ला मिलया। कने सै संदेश ऐ है पबित्र शास्त्रे दे बचने अनुसार यीशु मसीह साडे पापां ताई मरी गया। 4 कने धरती च दबया; कने पबित्र शास्त्र दे अनुसार त्रिऐ रोजे मरयां चे जिन्दा भी होई गया। 5 कने फिरी सै पतरस जो मिल्ला कने उदे बाद सै बारां चेलयां जो मिल्ला। 6 फिरी उदे बाद सै पंज सौ ला जादा चेलयां जो मिल्ला, जिना चे मते लोक हले दीकर जिंदे न पर कैई मरी गियो न। 7 फिरी उदे बाद याकूबे जो मिल्ला कने सारे चुणयो प्रेरितां जो भी मिल्ला। 8 कने सारयां ला बादे च उनी अपने आप जो

मिंजो पर प्रगट किता, जडा उस बच्चे साईं है जिदा जन्म सही बकत पर नी होया हो। 9 क्योंकि मैं प्रेरितां च सारयां ला घट खास है, बल्कि प्रेरित बणने जोगा भी नी है, क्योंकि मैं परमेश्वरे दिया कलीसिया दे लोकां जो सताया था। 10 पर अगर अज मैं प्रेरित है तां सैं परमेश्वरे दा अनुग्रह है: कने उनी जडा अनुग्रह मिंजो पर कितया है, सैं बेकार नी होया। पर मैं उना दुज्जे प्रेरितां ला जादा बदीकरी मेहनत किती; तमी ऐ मेरिया तरफा ला नी होया, पर परमेश्वरे दे अनुग्रह मेरी बडी सहायता किती की मैं उदा कम्म करी सकें। 11 इस ताई अगर चाऐ मैं है, या दुज्जे प्रेरित न, असां सारे मसीह दे बारे च प्रचार करते न, कने इसी पर तुसां भरोसा किता। 12 हुण मैं तुहांजो ऐ बोलणा चांदा; क्योंकि असां सारयां तुहाडे बिच ऐई प्रचार किता की जालू मसीहा मरया तां परमेश्वरे उसयो जिन्दा किता, तां तुसां चे कोई भी ऐ ना बोले की परमेश्वरे भरोसा करणे बाले दे मरणे बाद उना जो जिन्दा नी करणा। 13 अगर मरणे बाद जिन्दा होणा नी होंदा, तां फिरी मसीह भी मरयां चे जिन्दा नी होया। 14 कने अगर मसीह मरयां चे जिन्दा नी होया, तां जिस संदेश दा असां प्रचार करते न कने मसीह पर तुहाडा भरोसा करणा दोनों बेकार न। 15 इसला भी बदीकरी ऐ की असां परमेश्वरे दे झूठे गबाह साबित होआ दे न क्योंकि असां उदे बारे च ऐ गबाई दीतियो है की उनी मसीह जो मरयां चे जिन्दा कितया है, पर अगर मरयो असल च जिन्दे नी होंदे न तां परमेश्वरे मसीह जो भी जिन्दा नी कितया है। 16 अगर मरयो लोक मौत ला बाद जिन्दा नी होंदे न, तां मसीह भी मौत ला बाद जिन्दा नी होया है। 17 कने अगर मसीह जिन्दा नी होया, तां मसीह पर तुहाडा भरोसा करणा बेकार है; कने तुसां हले दीकर भी अपने पापां च जिया दे न। 18 अगर मसीह मरयां चे जिन्दा नी होया है, तां जडे मसीह च भरोसा करणे बाले लोक मरी गियो न, सैं बचायो नी न, बल्कि नाश होई गियो न, मतलब की ऐ की हमेशा ताई परमेश्वरे ला लग होई गियो न। 19 अगर असां सिर्फ ऐथू दी जिन्दगिया ताई मसीह पर आस रखदे न, तां इस संसारे दे माणुऐ ला साडी हालत जादा बुरी है। 20 पर सच्चाई ऐ की परमेश्वरे मसीह जो सारयां ला पेहेले मरयां चे जिन्दा कितया है, सैं इसा गल्ला दा सबूत है उनी सैं जिन्दे करणे जडे मरी गियो न। 21 इस ताई जियां इक माणु आदम दे जरिये मौत इस संसारे च आई कने हुण मरयां दा जिन्दा होणा भी इक माणुऐ जरिये है मतलब की यीशू मसीह जरिये शुरू होया है। 22 जियां आदम दिया बजा ला सारयां दी मौत होंदी है, क्योंकि असां उदे बंश न, तियां ही दुज्जे माणु मतलब की मसीह सोगी जितणे भी लोक जुडयो न, उना सारयां मरयां चे जिन्दे होई जाणा है। 23 पर हर इक जणा अपणिया-अपणिया बारिया पर जिन्दा होणा; इदा सबूत ऐ है की मसीह सारयां ला पेहेले जिन्दा किता, फिरी जालू मसीह मुडी करी ओणा है, तां जडे लोक उदे सोगी मजबूत रिश्ता रखदे न उना जो मरयां चे जिन्दा करणा है। 24 कने फिरी जालू मसीह परमेश्वरे दा बिरोध करणे बालियां सारियां बुरियां शक्तियां दा नाश करी देणा उदे बाद संसारे दा अंत होई जाणा। तालू मसीह अपने पिता परमेश्वरे जो अपना राज्य सौंपी देणा ताकि सैं उस पुरे तरीके ला राज्य करे। 25 पर जालू दीकर परमेश्वर उदे सारे दुशमणा जो पुरे तरीके ला राई नी दे, तालू दीकर मसीहा जो उस राज्य पर राज करणा चाईदा। 26 सारयां ला आखरी

दुशमण खत्म करी देणा है, सैं मौत है। 27 पबित्र शास्त्र च भजनकार लिखदा है की, “परमेश्वरे सब कुछ मसीह दे अधिकारे थले करी देणा है,” पर इदे च परमेश्वर अपु शामिल नी है क्योंकि सैं ही है जिनी मसीह जो अधिकार दितया था। 28 कने जालू सारा कुछ मसीह दे मतलब की पुत्रे दे अधीन होई जाणा, तां पुत्रे भी अपु जो परमेश्वरे दे अधीन करी देणा। ताकि परमेश्वर जिनी अपने पुत्रे जो सारियां चीजां पर हक दितया है, ताकि परमेश्वर ही सारयां ताई सारा कुछ होणा। 29 अगर मरयो लोक जिन्दे नी होंदे तां उना दा क्या होणा, जडे मरयो लोकां ताई बपतिस्मा लेंदे न? अगर परमेश्वर मरयो लोकां जो जिन्दा नी करदा तां लोक हुण भी ऐसा कजो करदे न? 30 अगर मरयो लोकां दा जिन्दा होणा नी होंदा है, तां ऐ साडे ताई मुखता दी गल्ल है की असां अपने आपे जो बार-बार कजो खतरे च पांटे रेंदे? 31 है मसीह भाईयो, जियां ऐ गल्ल पक्की है की तुसां दे यीशू मसीह ला जुडने दिया बजा ला मैं घमंड करदा है, तां ऐ गल्ल भी पक्की है की मिंजो हर रोज मरणे दा खतरा है। 32 ऐथू इफिसस शहरे च जिना लोकां मेरा जंगली जानवरां साईं बिरोध किता, कने जडे दुख उना मिंजो दिते उना जो सेहन करणे दा क्या फायदा होया? कुछ भी नी! अगर ऐ सच्च होंदा की मरयो लोक दुबारा जिन्दा नी होंदे न, तां खरा होंदा की मैं उना लोकां दी गल्ल मन्नी लेंदा जडे ऐ बोलदे न की, “ओआ असां खादे-पिंदे क्योंकि अगर असां कल मरी गे तां सब कुछ खत्म होई जाणा।” 33 जडे इयूदियां गल्लां करदे न उना ला मुख मत बणदे, “बुरी संगती खरे चरित्र जो बिगाडी दिन्दी है।” 34 तुसां होसा च ओआ कने पाप करणा छडी दिया; मैं तुहांजो ऐ गल्ल शर्मिदा करणे ताई बोला दा है, क्योंकि तुसां बिच केई ऐसे न जिना दा परमेश्वरे सोगी रिश्ता ठीक नी है। 35 उदाहरण ताई अगर तुसां चे कोई पुच्छे की, “कियां परमेश्वर मरयां जो जिन्दा करदा या उना दा शरीर कदिया होणा,” 36 जडा भी इस तरीके दे सबाल पुछदा है तां सैं मुख है। तुसां जाणदे न की इक बी जालू उसयो जमिना च रांदे न, तां सैं जालू दीकर सडी नी जांदा है, अंकुरित नी होंदा है। 37 अगर तुसां धान या कोई होर बी रांदे न, तां तुसां पेहेले ला ही उगया बूटा नी लांदे न, बल्कि सिर्फ इक बी रांदे न। 38 पर परमेश्वर अपणिया इच्छा अनुसार उसयो बूटे दा रूप दिन्दा है; कने हर किस्मा दे बी अपने स्वे च बददे न। 39 संसार च सारे प्राणियां दा शरीर इकोदिया नी हंदा, माणुआं दा शरीर डंगरां साईं नी हंदा; चिड्डां पखेरूआं दा शरीर मछियां साईं नी हंदा। 40 कने जियां संसार दे प्राणियां दे शरीर केई तरा दे होंदे न, तियां ही अम्बरे च भी है, जियां की सूरज, चाँद कने तारे। आसमाने दियां चीजां दी सुन्दरता इको देई होंदी, कने धरती दियां चीजां चे इक होर तरा दी सुन्दरता होंदी है। 41 सूरजे दी सुन्दरता लग है, चन्द्रमे दी सुन्दरता लग है, कने तारयां दी सुन्दरता लग है, क्योंकि इक तारे ला दुज्जे तारे दी सुन्दरता च फरक है। 42 इस ताई जालू मरयां लोकां दुबारा जिन्दे होणा, तालू उना सोगी भी ऐसा होणा। जिस शरीर जो सैं दफनांदे न, सैं ऐसा शरीर है जडा सडी जांदा है, पर जालू ऐ दुबारा जिन्दा होंदा है, तां ऐ ऐसा शरीर होणा है जडा सडी नी सकदा है। 43 जालू असां मरी जांदे न, तालू साडा शरीर बदसूरत कने कमजोर होंदा है, पर जालू उना मरयां चे जिन्दा होणा, तां उना छेल कने ताकतवर होणा। 44 जियां साडे बाल

मास कने खूने दा शरीर है, इयां ही ऐसे शरीर भी न जिना जो परमेश्वरे दी आत्मा जरिये जिन्दगी मिलदी है; साडे ऐ मास कने खूने दे शरीर उना शरीर च बदलई जाणा जिसयो परमेश्वर दी आत्मा जरिये जिन्दगी मिलदी है। 45 पबित्र शास्त्र च भी लिखया है, “पेहला माणु, मतलब की आदम, जिन्दा माणु बणया” कने आखरी आदम, मतलब की यीशु मसीह हमेशा दी जिन्दगी देणेबाला बणया। 46 सारयां ला पेहला मॉस कने खूने दा शरीर आया, फिरी सै शरीर आया जिसयो परमेश्वरे दिया आत्मा जिन्दगी दीती। 47 पेहला माणु आदम था धरतिया ला मतलब की मीटिया दा बणया था। दुज्जा माणु मसीह है जडा स्वर्ग ला आया है। 48 संसारे दे पेहले माणु आदम सांई न जडा मीटिया दा बणया था, पर जडे स्वर्ग दे लोक न, सै स्वर्ग ला आयो माणु मतलब की मसीह सांई न। 49 असां सारयां बाल आदम दा रूप है जिसयो मीटिया ला बणया था, इयां ही इक रोज सांझो मसीह दा रूप भी मिलणा, जडा स्वर्ग ला आया था। 50 हे मसीह भाईयो, मै तुसां जो बोलदा है, इसा धरती पर साडे शरीर मॉस कने खूने ला बणयो न; असां स्वर्ग च परमेश्वरे दे राज्य च अपने इस शरीर सोगी नी रेई सकदे जडा मरी सकदा है, क्योंकि ओथु कोई भी मौत नी है। 51 इस भेद दिया गल्लां जो सुणा, साडे चे कुछ भरोसा करणे बालयां केई लोकां नी मरणा। ऐ सारियां गल्लां पलक झपकदे ही होई जाणियां न। जालू आखरी तुरही बजाई जाणी, तां जडे लोक मरी गियो न, सै हमेशा दी जिन्दगी तांई दुबारा जिन्दे करणे न कने असां जडे जिन्दे न, साडे शरीर बदलई जाणे। 53 क्योंकि साडा शरीर जडा तोल्लि ही मरणे बाला कने सडने बाला है, जरूरी है की ऐ इक ऐसे शरीर च बदलई जा जडा कदी नी मरदा कने सडदा हो। 54 कने जालू ऐसा होणा तालू ऐ गल्ल पुरी होई जाणी जडी परमेश्वरे पबित्र शास्त्र च लिखियो की, “मौत जो हराई देणा कने उना कदी नी रेणा।” कने इयां पबित्र शास्त्र च लिखया पूरा होई जाणा। 55 “हे मौत तेरी जित कुथु है? हे मौत तेरा डंक कुथु रिया?” इस तरीके ला पबित्र शास्त्र च जडा लिखया था सै पूरा होया। (Hades 986) 56 क्योंकि पाप ऐसा डंक है जिदा नतीजा मौत है, कने व्यवस्था दिया बजा ला पाप दी शक्ति साडिया जिन्दगिया च ओदी है। 57 पर परमेश्वरे दा धन्यबाद हो, जडा सांझो साडे प्रभु यीशु मसीह दे मरणे जरिये पाप कने मौत पर जितांदा है। 58 इस तांई हे मेरे मसीह भाईयो, अपने भरोसे च मजबूत रिया कने कोई तुसां जो न भडकाए, कने प्रभु दे कम्मा च हमेशा बददे जा, क्योंकि तुसां ऐ जाणदे न की तुसां प्रभु तांई मेहनत करदे न कने सै बेकार नी है।

16 यरूशलेम शेहरे दे परमेश्वरे दे पबित्र लोकां दी सहायता तांई जडा चंदा तुसां गटेरया, इदे बारे च तुसां मिंजो ला सुआल पछया था, कने हुण मै इदे बारे च बोलणा चांदा है, इदे बारे च जडियां गल्लां मै गलातिया प्रदेश दिया कलींसिया दे लोकां जो करणे तांई बोलया था तुसां भी इयां ही करा। 2 हर तुरारे बाले रोजे तुसां चे हर इक माणु अपणिया कमाईया चे कुछ पैसे कडी करी लग रखी ले, ताकि जालू मै ओंगा तां उस बकत तुसां जो दान गिठा करणे च पेशानी ना हो। 3 कने जालू मै ओथु रेंगा तां मै उना लोकां जो भेजगा जडे तुहाडिया नजरा च भरोसेमंद न की सै यरूशलेम शेहर जो दान लेईकरी जान। मै उना सोगी इक चिट्ठी भी भेजी दिंगा ताकि ओथु दे भरोसा

करणे बाले लोकां ने उना दी पछेण कराई सके। 4 अगर तुसां जो लगगा दा है की मिंजो जाणा चाईदा, तां सै मेरे सोगी जाई सकदे न। 5 कने मै मकिदुनिया प्रदेश च जाणे बाद आई करी तुहांजो ने मिलणा है। क्योंकि मै मकिदुनिया प्रदेश जो जाणे दी योजना बणा दा है। 6 पर होई सकदा की कुछ लम्बे बकते दीकर मै तुहाडे सोगी रें, या होई सकदा की सदियां तुहाडे बाल कटें, कने उदे बाद मेरिया अगलिया यात्रा तांई तुसां मिंजो भेजी सकदे न। 7 मै नी चांदा की मकिदुनिया प्रदेश च जां दे बले सिर्फ कुछ बकते तांई तुसां सोगी रें। अगर प्रभु दी इच्छा होई तां मै आस रखदा है की कुछ लम्बे बकते दीकर ओथु तुसां सोगी रें। 8 पर मै पेन्तिकुस्त त्योहारे दे रोजे दीकर इफिसस शेहरे च ई रेंगा। 9 क्योंकि हल्ले भी ऐथू मते लोक न जडे परमेश्वरे दा बचन सुणा चांदे न, मेरा ऐथू रेंगा बडा जरूरी है। हालांकि ऐथू मते लोक ऐसे न जडे मेरा बिरोध करदे न। 10 अगर तीमुथियस तुहाडे बाल कुरिन्थस शेहरे च ओंगा, तां उदी खातिरदारी इज्जता ला करनयो, क्योंकि सै मेरे सांई प्रभु दा कम्म करदा है। 11 इस तांई कोई उदी बेईजती ना करे, पर यात्रा तांई जुर्रतां दियां चीजां देईकरी बिदा करा, ताकि सै मेरे बाल आई जा; क्योंकि मै उदी कने दुज्जे भरोसा करणे बाले भाईयां जो भी नियाला दा जडे उना सोगी आयो न। 12 कने मै मसीह भाई अपुल्लोस ला बडी बिनती किती है की सै भी होर भरोसा करणे बालयां सोगी तुहांजो ला मिलणा ओऐ, पर सै इस बकत नी ओणा चांदा, पर जालू उसयो खरा मोका मिलगा, तालू उनी आई जाणा। 13 साबधान रिया, लगातार भरोसा करदे रिया, साहसी माणु बणा, कने परमेश्वरे सोगी अपने रिशते जो मजबूत रखा। 14 तुसां जडा कुछ भी करदे न सै प्यारे ला करा। 15 हे मसीह भाईयो, तुसां स्तिफनास जो कने उदे परिवारे जो जाणदे न की, उना अखाया प्रदेशे च उना ही सारयां ला पेहले मसीह पर भरोसा कितया था, कने सै परमेश्वरे दे लोकां दी सहायता तांई तैयार रेंदे न। 16 इस तांई मै तुहांजो ने बिनती करदा है की ऐसे अगुवां दियां गल्लां मन्ना, बल्कि ऐसे सारे लोकां दी सुणा जडे प्रभु दी सेवा जो बडी मेहनता कने बडी भक्ति ला करदे न। 17 कने मै स्तिफनास फूरतनातुस कने अखईकुस मसीह भाईयां दे मेरे बाल ओणे ला खुश है, क्योंकि उना मेरी सै सहायता किती, जिसा जो करणे तांई तुसां ऐथू नी थे। 18 कने उना मेरे मने जो हिम्मत दीती ठीक तियां ही जियां उना तुहाडे तांई भी करणा जालू उना तुहाडे बाल ओणा। इस तांई तुहांजो भी ऐदे लोकां दी इज्जत करणी चाईदी। 19 आसिया प्रदेश दिया कलींसिया दे लोकां दिया तरफा ला तुहांजो नमस्कार; अक्विला कने उदी घरे बाली प्रिस्का दा कने उना दे घरे च गिठी होणे बाली कलींसिया दे मसीह भाई बेहणा दिया तरफा ला भी तुसां जो प्रभु च नमस्कार। 20 ऐथू ला जितणे भी मसीह भाई बेहणा न, उना सारयां दिया तरफा ला तुहांजो नमस्कार। गले लगगी करी इक दुज्जे जो नमस्कार करा। 21 कने हुण मै पौलुस, इसा चिठिया दे आखरी च अपने हथां ला इस नमस्कार जो लिखा दा है। अगर कोई प्रभु ला प्यार नी करे, तां सै श्रापित हो। 22 हे साडे प्रभु, आई जा! 23 मै प्रार्थना करदा है साडा प्रभु यीशु मसीह तुहांजो पर अपना अनुग्रह करदा रे। 24 मै तुसां सारयां ला प्यार करदा है, जिना दा यीशु मसीह सोगी गेहरा रिश्ता है। आमीन।

2 कुरिन्थियों

1 मैं, पौलस, परमेश्वरे दिया इच्छा ला यीशु मसीह दा प्रेरित है, कने साडा मसीह भाई तीमुथियुस मेरे सोगी है। मैं ऐ चिट्ठी कुरिन्थुस शेर च परमेश्वरे दिया कलीसिया जो, कने अखाया प्रदेशे दे सारे परमेश्वरे दे लोकां जो लिखा दा है। **2** मैं प्राथना करदा की साडा पिता परमेश्वर कने प्रभु यीशु मसीह तुहांजो पर अनुग्रह करे कने तुहांजो शांति दे। **3** साडे प्रभु यीशु मसीह दे पिता कने परमेश्वरे दा धन्यवाद हो, जडा सांझो पर दया कने सांझो हमेशा तसल्ली दिन्दा है। **4** सै सांझो साडे सारे दुखां च तसल्ली दिन्दा है; ताकि असां दुज्जयां दे दुखां च उना जो इयां ही तसल्ली देई सकन जियां परमेश्वर सांझो दुखां च तसल्ली दिन्दा है। **5** जितणा जादा असां यीशु मसीह तांई दुख सेहन करदे न, परमेश्वर मसीह दे जरिये उतणी ही जादा तसल्ली सांझो दिन्दा है। **6** असां दुख सेहन करदे न, ताकि परमेश्वर तुहांजो तसल्ली दे कने तुहाडा उद्धार करे। क्योंकि परमेश्वरे सांझो तसल्ली दिन्दा है इस तांई उनी तुहांजो भी तसल्ली देणी क्योंकि तुसां बडे सबर सोगी साडे सांई दुख सेहन किते। **7** कने साडी आस तुहाडे बारे च पक्की है, क्योंकि असां जाणदे न, की जियां तुसां साडे दुखां च साथी थे, तियां ही तुसां साडिया तसल्लिया च साथी होणा, जडी परमेश्वरे सांझो देणी। **8** हे मसीह भाईयो, मैं चांदा की तुसां साडिया उना मुसीबतां दे बारे च जाणा, जडियां आसिया प्रदेश च सांझो होईयां। असां ऐसे बोझे ला दुबई गियो थे, जडा साडे सेहणे ला बाहर था, असां तां जिणे दी पूरी उम्मीद ही छडी दितियो थी। **9** असां तां अपने मने च ऐ सोची लिया था, की असां मरणे बाले ना। ऐ इस तांई होया की असां अपने आपे पर नी पर परमेश्वरे पर भरोसा रखन, जडा मरयां जो जिन्दा करदा है। **10** परमेश्वरे ही सांझो इतिणिया बडिया मुसीबता ला बचाया, कने बचाणा भी; कने सांझो ऐ आस है की उनी अगो भी बचांदे रेणा है। **11** जियां तुसां साडे तांई प्राथना करिरी साडी सहायता करदे न, तियां ही मते लोकां दियां प्राथना ला सांझो परमेश्वरे दियां आशीषां मीलियां न, उदिया बजा ला साडिया तरफा ला परमेश्वरे दा धन्यवाद करनयो। **12** क्योंकि असां अपनी अंतरात्मा दिया सच्चाईया पर घमंड करदे न। संसार च कने खासकर तुसां लोकां बिच साडी जिन्दगी पबित्र कने सच्ची थी, जडा परमेश्वरे दिया तरफा ला सांझो मिलया था। असां माणुआं दे ज्ञान पर भरोसा नी रखया है, पर परमेश्वरे दे अनुग्रह पर भरोसा रखया है। **13** असां हमेशा तुहांजो अपनी चिटियां च उना ही गल्लां जो लिखदे न जडियां तुसां पडी कने मन्नी सकन। भले ही तुसां हुण इना गल्लां जो अच्छे ला नी समझदे, पर मिंजो आस है की प्रभु यीशु मसीह दे दुबारा मुडी ओणे दीकर तुसां इना गल्लां जो अच्छे ला समझणा कने मनणा ताकि उस रोज तुसां साडे पर तियां ही घमंड करन, जियां असां तुहाडे पर घमंड करदे न। **15** मिंजो इसा गल्ला दा भरोसा था की तुसां सांझो समझणा, इस तांई हुण मैं चांदा है की मैं सारयां ला पेहेले तुहाडे बाल ओऐ ताकि तुहाडे बाल दो बरी ओणे ला तुहांजो दो गुणी आशीष मिल्ले। **16** मैं सोचा दा था की तुहाडे बाले ला होईकरी मकिदुनिया प्रदेश जो जां, कने मकिदुनिया प्रदेश ला बापस मुडदे फिरी तुहाडे बाल ओऐ, कने तुसां मिंजो यहूदिया प्रदेशे दीकर सफर

करणे तांई समान देईकरी मेरी सहायता करनयो। **17** मेरी योजना ऐई थी। तां, क्या मैं बिना कुसी बजा दे ही अपना बिचार बदली दिता? क्या मैं संसारिक माणुआं सांई योजना बणादां है? क्या मैं इक बकत च, हां कने बादे च ना बोलदा है? **18** परमेश्वरे पर भरोसा करी सकदे न, तियां ही तुसां भी सांझो पर भरोसा करी सकदे न, हालांकि असां तुहाडे बाल ओणे दा बायदा करा दे न। **19** क्योंकि परमेश्वरे दा पुत्र यीशु मसीह जिदा प्रचार मैं, सिलवानुस कने तीमुथियुस दे जरिये तुहाडे बिच होया, सै प्रभु यीशु मसीह सच्चा है, क्योंकि उदे च कदी हां कने कदी ना बाली कोई गल्ल नी है, उदे च सिर्फ हां ही है। **20** क्योंकि पिता परमेश्वरे दे जितणे भी बायदे न, सै सारे बायदे मसीह च पुरे होंदे न कने इस तांई असां “आमीन” बोलदे, की साडे जरिये पिता परमेश्वरे दी महिमा हो। **21** परमेश्वर ही है, जडा तुहाडे सोगी सांझो मसीह च मजबूत करदा है। परमेश्वरे सांझो पर अपनी मोहर लाईकरी ब्याने दे स्पे च अपनी आत्मा साडे मना च रखीकरी सांझो अपने तांई चुणया। **23** परमेश्वर मेरिया इसा सच्चाईया दा गबाह है की मैं हले दीकर कुरिन्थुस शेर च इस तांई नी आया की, मैं तुहांजो दुख देणा नी चांदा था। **24** इदा मतलब ऐ नी की, असां तुहाडे भरोसे पर अपना हक जतान, क्योंकि तुसां अपने ही भरोसे च टिकयो न। असां तां तुहाडिया खुशिया तांई तुहाडे सोगी न।

2 मैं अपने मने च ऐई ठाणी लिया था की मैं इक बरी दुबारा ओथु आई करी तुहांजो दुख ना दे। **2** क्योंकि अगर मैं ओथु आई करी तुहांजो दुखी करे, तां तुसां दे सिवा मिंजो खुशी देणे बाला होर कोई नी है, सिर्फ तुसां ही न जिना जो मैं दुखी किता है। **3** कने मैं ऐई गल्ल तुहांजो इस तांई लिखी, की कुथी इयां ना हो, की मेरे ओणे पर जिना ला मिंजो खुशी मिलणा चाईदी, सेई मेरे दुखी होणे दी बजा न बणी जान। क्योंकि मिंजो तुसां पर इसा गल्ला दा भरोसा है की, जडी मेरी खुशी है, सेई तुसां सारयां दी भी खुशी है। **4** बडे दुखी मने ला, कने रोई-रोई करी ऐ चिट्ठी मैं तुहांजो लिखी है, इस तांई नी की, तुसां दुखी होई जा, पर इस तांई की तुसां उस बड़े प्यार जो जाणी लिया, जडा मिंजो तुसां सोगी है। **5** अगर कोई दुखे दी बजा है, तां सै ऐ की जिनी माणुऐ ऐ सारियां पेशानियां खडियां कीतियां, उनी मिंजो दुखी करणे ला जादा तुसां सारयां जो दुखी किता है। मैं इदे बारे च इसला जादा होर कुछ नी बोलणा चांदा। **6** ऐसे माणुऐ तांई ऐ सजा काफी है, जडी तुसां चे मते विश्वासी लोकां उसयो दिती। **7** इस तांई इदे बजाए तां ऐ खरा है की उदिया गलतिया जो माफ करी दिया कने उसयो तसल्ली दिया। अगर तुसां उसयो माफ नी किता तां शायद सै इतणा दुखी होई जाऐ कने परमेश्वरे पर भरोसा करणा बिलकुल ही छडी दे। **8** इसा बजा ला मैं तुसां ला बिनती करदा है, की उसयो यकीन दिला की तुसां हले भी सच्ची उसला प्यार करदे न। **9** क्योंकि मैं ऐ इस तांई भी लिखया था की, तुसां जो परखी लें की, तुसां मेरे सारे हुकमा जो मदे न की नी। **10** जिसयो तुसां माफ करदे न उसयो मैं भी माफ करदा है, क्योंकि जालू मिंजो माफ करणे दी जरूरत होदी है, तां मैं तुहाडे फायदे तांई मसीह दे हके सोगी ऐसा करदा है। **11** ताकि शैतान साडे हालातां दा फायदा ना लेई सके, क्योंकि असां उदे बुरे इरादे जो जाणदे न। **12** कने जालू मैं मसीह दा शुभसमाचार सुणणे तांई नोआस शेर च आया, तां परमेश्वरे मिंजो

शुभसमाचार दा प्रचार करणे दे बडे मौके दिते। 13 तां मेरा अपना मसीह भाई तीतुस तुहाडी खबर लेईकरी मेरे बाल नी आया, जिदे ला मेरे मने जो चेन नी मिला। इस ताई मैं तीतुस जो तोपणे ताई त्रोआस शेहरे दे मसीह लोकां ला बिदा लेईकरी मकिदुनिया प्रदेश जो चली गया। 14 पर परमेख्वरे दा धन्यबाद हो, जडा मसीह सोगी साडे रिशते दिया बजा ला हमेशा साडे सोगी चलदा है, कने सांझो जितांदा है। इदा मतलब है की असां जिथू भी जांदे न, असां शुभसमाचार दी खुशबु फेलांदे न, ताकि सारे लोक परमेख्वरे जो जाणन कने सुणन। 15 क्योंकि असां परमेख्वरे ताई मसीह दे जरिये बखायो धुपे साईं न। कने साडे जरिये प्रचार कितया संदेश सारे लोकां च फेलियो खुशबु साईं है, जडी उद्धार पाणे बाले, कने नाश होणे बाले लोकां बिच बिखरदी है। 16 पर ऐ खुशबु नाश होणे बालयां लोकां ताई तां मौता दी मुस्क है, जडी उना जो मौत दिया तरफा लेई जांदी है; पर उद्धार पाणे बाले लोकां ताई ऐ जिन्दगी दी ऐसी खुशबु है, जडी उना जो हमेशा दिया जिन्दगीया पासे लेई जांदी है। असल च कोई भी अपने आप ला इसा खुशबुआ जो फेलाणे दे काबिल नी है। 17 क्योंकि असां उना साईं नी न, जडे पैसयां ताई परमेख्वरे दे बचना दा प्रचार करते न; पर असां सच्चाईया ला परमेख्वरे दे बचना दा प्रचार करते न, ऐ जाणी करी की परमेख्वर सांझो दिखदा है।

3 मैं अपने बारे च इना गल्लां जो लिखी करी अपनी बड़ाई नी करा दा है।

या कुछ होर माणुऐ साईं सांझो भी तुहाडे बाल सिफारिश दियां चिठियां लियोणे कने या तुहाडे ला लेंगे दी जरूरत नी है। 2 तुसां अपु ही इक चिठिया साईं न जडी साडे ताई सिफारिश करदी है, जडी साडे दिले च लिखियो है, तुहाडी बदलुइयो जिन्दगी तुहाडे बिच साडे कम्मा दिया बजा ला है, जडा इक चिठिया साईं है जिसा जो हर कोई पढी सकदा है। 3 ऐ तां मिलदी गल्ल है, की तुहाडी बदलुइयो जिन्दगी इक चिठ्ठी है जडी मसीह लिखियो है, कने ऐ चिठ्ठी साडे कम्मा दा नतीजा था। सै स्याईया ला या पथरे दियां पटियां पर नी, पर जिन्दे परमेख्वरे दिया आत्मा जरिये साडे दिले दियां पटियां पर लिखियो है। 4 असां ऐसा इस ताई बोलदे न क्योंकि असां मसीह दे जरिये परमेख्वरे पर भरोसा रखदे न। 5 असां ऐ नी बोलदे न की साडे बाल अपु ला कुछ करणे दी काबिलियत है। पर परमेख्वरे ही ऐ जडा सांझो इस काबिल बणांदा है। 6 जिनी सांझो नोई बाचा दे सेवक होणे दे काबिल किता, कने मूसा दी व्यवस्था दे सेवक नी पर पबित्र आत्मा दे सेवक न, क्योंकि मूसा दी लिखियो व्यवस्था जो नी मनणे दी सजा मौत है, पर पबित्र आत्मा हमेशा दी जिन्दगी दिन्दी है। 7 मूसा दी व्यवस्था जालू इस्राएल दे लोकां जो दिती जडी पथरां दियां पटियां पर लिखियो थी, उस बकत परमेख्वरे दी महिमा प्रगट होई। इस्राएल दे लोक लम्बे बकते दीकर मूसा दे मुऐ पास्से नी दिखी सके क्योंकि सै चमका दा था, हालांकि सै जादी देर दीकर नी चमकदा रिया। अगर मौता पास्से लेई जाणे बाली मूसा दी व्यवस्था पर आधारित सेवा इतणी तेजोमय थी, तां नोई बाचा पर आधारित सेवा होर भी जादा तेजोमय होणी। 9 क्योंकि जालू दोषी बणाणे बाली मूसा दी व्यवस्था तेजोमय थी, तां नोई बाचा जडी सांझो परमेख्वरे सामणे धर्मी बणांदी है तां सै होर भी जादा तेजोमय कनी होणी? 10 कने मूसा दी व्यवस्था जडी बडी तेजोमय थी, पर हुण उस नोई

बाचा दे तेज सामणे मूसा दी व्यवस्था दा कोई तेज नी रिया क्योंकि ऐ नोई बाचा दे मुकाबले जादा तेजोमय नी है। 11 व्यवस्था उस तेज सोगी दितियो थी जडी घटदी जांदी थी, पर नोई बाचा दा तेज होर भी जादा बडी करी है क्योंकि ऐ हमेशा दीकर बणी रेंणी है। 12 इस ताई ऐसी आस रखीकरी असां हिम्मत सोगी बोलदे न। 13 कने असां मूसा साईं नी न, जिनी अपने मुऐ पर परदा पाया था ताकि इस्राएली लोक उसा घटदी चमका जो गायब होंदे ना दिखी लेंन। 14 पर इस्राएल दे लोकां दे मन कठोर होई गियो थे, क्योंकि अजे दीकर पुराणे नियम जो पढने ला उना दे मने च सै ही पडदा पिया रेंदा है; पर सै परदा मसीह च भरोसा करणे ला उठी जांदा है। 15 कने अजे दीकर भी जालू कदी मूसा दी व्यवस्था पढी जांदी है, तां उना दे मने च परदा पेई रेंदा है इस ताई सै इसयो पुरे तरीके ला नी समझदे। 16 पर जालू सै प्रभु यीशु मसीह पर भरोसा करगे, तालू सै परदा उठी जाणा। 17 प्रभु तां आत्मा है: जिथू कुथी प्रभु दी आत्मा है, ओथु मूसा दी व्यवस्था ला अजादी है। 18 क्योंकि असां सारे इक सीसे साईं परमेख्वरे दे तेज जो ऐसे चेरयां ला दसदे न जिना पर परदा नी पिया है, तां परमेख्वर सान्झो लगातार बदा दे तेज च जादा ला जादा अपने साईं बणा दा है। ऐ तेज प्रभु ला ही मिलदा है, जडा पबित्र आत्मा है।

4 इस ताई जालू सांझो पर परमेख्वरे दी ऐसी दया होई की, सांझो परमेख्वरे दे शुभसमाचार दा प्रचार करणे दी सेवा मिल्ली, तां असां हिम्मत नी छडदे न। 2 पर असां सरमा बाले गुप्त कम्मा जो भी करणा छडी दिता, कने ना असां चलाकी करते न, कने ना ही परमेख्वरे दे बचना च मिलावट करते न, बल्कि असां परमेख्वरे दे सामणे सिर्फ सच्च सिखांदे न। कने हर इक माणु इसा गल्ला दी गबाई देई सकदा है की ऐ सच्च है। 3 अगर लोक उस शुभसमाचार जो नी समझी सकदे न जिदा असां प्रचार करते न, तां ऐ सै लोक न जडे खतम होणे बाले न। 4 कने उना भरोसा नी करणे बाले लोकां ताई, जिना दिया अकला जो इस संसारे दे ईश्वर जैताने अन्ना करी दितया है, इस ताई सै मसीह कने उदी महिमा दे बारे च शुभसमाचार जो नी समझी पांदे की मसीह परमेख्वरे दा रूप है। (aiōn g165) 5 क्योंकि असां अपने आपे दा नी, पर यीशु मसीह दा प्रचार करते न की, यीशु मसीह ही प्रभु है। कने उनी ही सांझो तुहाडे सेवक होणे ताई भेजया है। 6 इस ताई परमेख्वरे बोलया की, “नेहरे च लौ चमके,” कने परमेख्वरे लौई साईं साडे मना च समझ दिती, ताकि असां परमेख्वरे दिया महिमा जो पछेणी सकन, जडी यीशु मसीह दे मूऐ च मिलदी है। 7 असां उसा मीटिया दे भांडयां साईं न जिना च ऐ खजाना रखया है। इसला ऐ गल्ल साफ होई जांदी है की, ऐ असीम शक्ति साडिया तरफा ला नी है, पर परमेख्वरे दिया तरफा ला है। 8 असां चारो पासे ला परेशानियां ला धिरयो रेंदे न पर कदी हार नी मंदे; घबरांदे तां हेन, पर हिम्मत नी छडदे। 9 असां सताये तां जांदे न, पर परमेख्वर सांझो छडदा नी है; डाऐ तां जांदे न पर, पर परमेख्वर सांझो खतम नी होणा दिन्दा। 10 असां हमेशा उना दुखां जो अपने शरीर च महसूस करते न, जडे दुख यीशुऐ मरदे बकत महसूस किते थे; ताकि जडा कम्म असां करते न उदे जरिये लोक यीशु दी जिन्दगी जो दिखी सकन। 11 क्योंकि असां जिंदे जी यीशु दिया बजा ला मौत दे खतरे च रे, ताकि यीशुऐ दी जिन्दगी भी साडे मरणे बाले शरीर पर प्रगट होऐ। 12 इस ताई असां मौत दे खतरे च रेंदे न,

पर इदिया बजा ला तुहांजो हमेशा दी जिन्दगी मिली। 13 पर असां प्रचार करदे रे क्योंकि सांझो च सेई भरोसा था, जदिया भजन लिखणे बाले च था, जालू उनी पबित्र शास्त्र च ऐसा लिखया की, “मैं भरोसा किता, इस तांई मैं बोलया।” असां भी भरोसा करदे न, इस तांई बोलदे न। 14 क्योंकि असां जाणदे न, जिनी प्रभु यीशु मसीह जो मरयां चे जिन्दा किता, उनी ही सांझो भी यीशु मसीह सांई जिन्दा करणा, कने परमेश्वरे सामणे खडे होणे तांई सांझो तुहाडे सोगी लेई ओणा है। 15 क्योंकि जडे दुख असां सेहन किते, सै तुहाडे फायदे तांई न, ताकि परमेश्वरे दा अनुग्रह जादा ला जादा मतयां लोकां जो मिल्ले, कने मते सारे लोक परमेश्वरे दिया महिमा तांई धन्यवाद करन। 16 इस तांई असां हिम्मत नी छडदे; भले ही साडे शरीर दी ताकत घटदी जा दी है, पर साडी अंदरूनी आत्मा रोज-रोज नोई होंदी जा दी है। 17 क्योंकि साडा ऐ हुणे दा घट कने थोडे बकते दा दुख साडे तांई ऐसी हमेशा दी महिमा जो पैदा करदा है, जिदे बारे च असां सोची भी नी सकदे। (aiōnios g166) 18 कने असां दिखियां चीजां जो नी पर अणदिखियां चीजां जो दिखदे रेंदे न, क्योंकि दिखियां चीजां थोडे ही दिना दियां न, पर अणदिखियां चीजां सदा बणी रेंदियां न। (aiōnios g166)

5 क्योंकि असां जाणदे न, की धरतिया पर साडे शरीर इक तम्बूऐ सांई न जिदे च असां रेंदे न। कने जालू असां मरी जाणा, तां परमेश्वरे दिया तरफा ला सांझो स्वर्गे च इक ऐसा शरीर मिलणा है, जडा माणुआं दे हथां ला नी बणया पर स्वर्गीय कने हमेशा तांई होणा है। (aiōnios g166) 2 इस शरीर च तां असां रेंदे न, कने बडी इच्छा रखदे न, की सांझो इक ऐसा शरीर मिल्ले जडा साडे स्वर्गे दे घरे सांई हो। 3 जालू सांझो सै स्वर्गे दा शरीर मिलणा, तां असां नगे नी रेंणा। 4 कने असां इस घरे च रेंदे होऐ भोझे हेठ दबई करी रेंदे रेंदे न; क्योंकि असां इना संसारिक शरीरां जो नी छडणा चांदे न, पर असां चांदे न की परमेश्वरे सांझो स्वर्गे दा शरीर दे ताकि ऐ मरी जाणे बाले शरीर, नी मरणे बाले शरीर च बदलुई जान। 5 कने परमेश्वरे सांझो अपु नोऐ शरीर देंगे तांई तैयार कितया है कने उनी ही सान्झो बयाने दे स्पे च पबित्र आत्मा भी दितियो है, जडा ऐ एकनी दुआंदा है की परमेश्वरे उसयो जस पूरा करणा। 6 इस तांई असां हमेशा सबर रखदे न कने ऐ जाणदे न; की जालू दीकर असां शरीर च रेंदे न, तालू दीकर असां प्रभु ला दूर न जडा स्वर्गे च रेंदा है। 7 क्योंकि असां प्रभु यीशु मसीह दे रूप जो दिखीकरी नी, पर उस भरोसे करणे दिया बजा ला जिन्दे न। 8 इस तांई असां सबर रखदे न, कने शरीर दे घरे जो छडी करी परमेश्वरे सोगी रेंणा जादा खरा समझदे न। 9 इस बजा ला साडे मने दी इक ही इच्छा है की, चाहे असां उदे सोगी स्वर्गे च होन, या असां इसा धरती पर होन, असां प्रभु जो खरे लागदे रेंन। 10 क्योंकि जरूरी है, की मसीह साडा सारयां दा न्याय करे, कने हर इक माणुऐ जो उदे अपने भले बुरे कम्मा दा इनाम मिल्ले जडे उनी शरीर दे जरिये कितयो न। 11 सांझो पता है की परमेश्वरे दा डर क्या है, इस तांई असां सच्च पर भरोसा करणे तांई लोकां जो समझदे न कने परमेश्वर सांझो पुरे तरीके ला जाणदा है कने मिंजो उम्मीद है की तुहाडिया अंतरात्मा भी सांझो ढंगे ला पछेणी लिया है। 12 असां फिर भी अपनी प्रशंसा तुहाडे सामणे नी करदे बल्कि असां तुहांजो अपने बारे च घमंड

करणे दा मोका दिन्दे न, ताकि तुसां उना जो जबाब देई सकन, जडे मने पर नी, बल्कि दिखावटी गल्लां पर घमंड करदे न। 13 अगर कोई बोलदा है की असां पागल न, तां सै परमेश्वरे तांई न; अगर कोई बोले की साडे दिमाग खरे न, तां सै तुहाडे भले तांई न। 14 क्योंकि मसीह दा प्यार सांझो मजबूर करी दिन्दा है, इस तांई की असां ऐ भरोसा करदे न, की जालू इक माणु सारयां तांई मरी गया, तां सारे मरी गियो न। 15 कने मसीह इस तांई सारयां तांई मरया, ताकि जडे जिंदे न, सै अग्रे जो सिर्फ अपु जो खुश करणे तांई ना जीन पर उना जो उदे तांई जीणा चाईदा। मसीह उना तांई मरया कने परमेश्वरे उसयो जिन्दा करी दिता। 16 इस तांई हुणे ला असां कुसयो भी संसारिक नजरा ला नी दिखणा, अगर असां पेहले मसीह जो भी संसारिक नजरा ला दिखया था, पर हुण नी दिखणा क्योंकि हुण उसयो जाणी गियो न। 17 इस तांई, अगर कोई मसीह पर भरोसा करदा है, तां उसयो इक नौआ सभाव मिलया है, पुराणा सभाव खत्म होई गया है; कने हुण नोआ सभाव होई गया है। 18 कने सारियां गल्लां परमेश्वरे दिया तरफा ला न जिनी मसीह दे जरिये सांझो अपने बाल बापस लौंदया है, कने लोकां जो परमेश्वरे सोगी मेल मिलाप करणे दी सेवा सांझो देई दिती है। 19 परमेश्वर सारे लोकां तांई इक रस्ता बणा दा था की जडा कुछ मसीहे कितया है, उदे जरिये परमेश्वरे सोगी मेल मिलाप करी सकन। परमेश्वरे लोकां दे पापां दा दोष उना पर नी लाया कने उनी शान्ति दे बारे च संदेश बंडणे दा कम्म सांझो देई दितया है। 20 इस तांई असां मसीह दे राजदूत न। परमेश्वर उदे संदेश जो अपनाणे तांई साडे जरिये लोकां ला बिनती करदा है। असां मसीह दिया तरफा ला बिनती करदे न की परमेश्वरे बाल आई जा। 21 मसीह जडा पाप ला अनजाण था, उसी जो ही परमेश्वरे साडे तांई पाप बणाया, ताकि असां परमेश्वरे दिया नजरा च धर्मी बणी जान क्योंकि मसीहे साडे पापां दी सजा अपने उपर लेई ली।

6 परमेश्वरे सोगी कम्म करणे बाले होणे दिया बजा ला असां तुसां ने बिनती करदे न, की परमेश्वरे दा अनुग्रह जडा तुसां पर होया है, उसयो तुसां बेकार मत जाणा दिया। 2 क्योंकि पबित्र शास्त्र च परमेश्वर बोलदा है, “सही बकत पर मैं तेरी सुणी, कने उद्धार दे रोजे मैं तेरी सहायता किती।” सुणा; हुण ही सही बकत है; सुणा, ऐ ही है उद्धार दा दिन। 3 परमेश्वरे सोगी कम्म करदे होऐ साडा व्यवहार कुसी तांई कोई भी स्काबट नी बणदा है, ताकि ऐसा ना हो की कोई साडिया सेवा पर दोष लाऐ। 4 असां हर इक तरीके ला दसदे न की असां परमेश्वर दे सच्चे सेवक न। क्योंकि असां बडा सबर रखीकरी कलेशां जो, दरिद्रता कने मुसीबतां जो सेहन करिरी, 5 असां कोडे खादे, जेला च गे, कने दंगे फसादां च चोटां लगियां, असां बडी मेहनत किती, बगेर सोऐ कने बगेर खादे-पिते रे, 6 पर असां अपु जो बडा पबित्र रखया, अकली ला कम्म किते, सबर रखया कने दुज्जयां पर दया किती, पबित्र आत्मा दे हुकम मने, 7 सच्चा प्यार किता, असां सच्चाई दा संदेश सुणाया, परमेश्वरे दिया शक्तिया साडे च कम्म किता। असां सज्जे हथे च धार्मिकता दे हथियारे जो हमला करणे तांई कने खबे हथे जो बचाब तांई इस्तेमाल करदे न, 8 चाहे लोकां साडी इज्जत किती या बेइज्जती किती, तारीफ या बुराई किती, पर

असां इमानदार न, पर सै बोलदे न की असां झूठे न। 9 भले ही लोक सांझो अनजान समझदे न, पर फिरी भी असां प्रसिद्ध न; भले ही लोक सांझो मरयां सांई समझदे न, पर फिरी भी असां जिंदे न; सांझो सजा तां मिलदी है पर जानी ला नी मारी सके। 10 सांझो बड़े दुख थे, पर असां हमेशा खुश रेंदे थे। असां अपु तां गरीब थे, पर बाकियां जो आत्मिक स्ने च अमीर बनाई दिन्दे न। इयां न जियां सांझे बाल कुछ नी फिरी भी सांझे बाल सब कुछ है। 11 हे कुरिन्थस शहर दे मसीह लोको, असां खुली करी तुसां जो सच्चियां गल्लां बोलदे न, असां पुरे दिले ला तुहांजो प्यार करते न। 12 तुहाड़े तांई साड़ा प्यार कदी घट नी होया, पर तुसां दा प्यार सांझे तांई घटी गया है। 13 पर अपने बाल बच्चे समझीकरी मैं तुहांजो बोलदा है, की तुसां भी सांझे प्यार दे बदले च सांझे सोगी पुरे दिले ला प्यार करा। 14 भरोसा नी करणे बाले लोकां सोगी कोई रिशता मत रखा, क्योंकि धार्मिक कम्मा दा कने बुरे कम्मा दी कोई बराबरी नी। लौई दा कने नेहरे दा कोई रिशता नी। 15 कने मसीह दा शैताने सोगी कोई रिशता नी है। कने भरोसा करणे बाले लोकां दा भरोसा नी करणे बाले लोकां सोगी कोई रिशता नी। 16 कने मूर्तियां दी परमेश्वरे दे मंदरे च कोई जगा नी। क्योंकि असां तां जिंदे परमेश्वरे दे मंदर न; जियां परमेश्वरे पबित्र शास्त्र च बोलया है, “मैं इना लोकां सोगी रेंणा कने उना बिच ही चलणा फिरणा; कने मैं उना दा परमेश्वर होणा, कने सै मेरे लोक होंगे।” 17 इस तांई प्रभुए सांझो ला पबित्र शास्त्र दे जरिये बोलया है की, “उना लोकां ला लग होई जा जड़े परमेश्वरे पिच्छे नी चलदे। कने गंदिया चीजां सोगी कोई रिशता मत रखा, तां मैं तुहांजो अपनाणा।” 18 “कने मैं तुहाड़ा पिता होणा कने तुसां मेरे बेटे कने बेठियां होंगे: ऐ सारयां ला शक्तिशाली प्रभु परमेश्वर दा बचन है।”

7 हे प्यारो भाईयो, क्योंकि परमेश्वरे सांझो अपने बच्चे दे स्ने च अपनाणे दा बायदा कितया है, इस तांई ओआ असां अपने शरीर दे सारे बुरे कम्म कने आत्मा दे गंदे बिचारां जो करणा बंद करी देन कने परमेश्वरे दा डर मन्नी करी कने उदी इज्जत करा। कने सांझो पुरे तरीके ला पबित्र जिन्दगी जिणे तांई मेहनत करणी चाईदी। 2 तुसां सांझो ला अपने पुरे दिले ला प्यार करा, असां ना कुसी ने अन्याय किता, ना कुसी दा कुछ बिगाडया, ना कुसी सोगी बेईमानी किती। 3 मैं ऐ तुसां पर दोष लाणे तांई नी बोला दा है, क्योंकि मैं पेहले ही बोली बैठया है की, असां तुसां सोगी पुरे दिले ला प्यार करते न कने असां लग नी होणा है चाहे असां जिन्दे रेन या मरी जान। 4 मैं तुसां ला बड़े भरोसे सोगी बोला दा है, मिंजो तुसां पर बड़ा घमंड है: मिंजो बड़ी तसल्ली मिली; कने मैं अपने सारे दुखां च भी बड़ा जादा खुश रेंदा है। 5 क्योंकि जालू असां त्रोअस शहर जो छडी करी मकिदुनिया प्रदेश च आये, ओथु सांझो कोई अराम नी मिल्ला, बल्कि हर पासे ला पेशानियां झेलदे थे; कने हर पासे लड़ाई-झगड़े थे कने सांझे मना च डर था। 6 पर उदास लोकां जो तसल्ली देणेबाले परमेश्वरे तीतुस जो सांझे बाल भेजी करी सांझो तसल्ली दिती। 7 ऐ सच्च है की तीतुस सोगी मिली करी असां खुश होऐ। पर इसला भी जादा असां इसा गल्ला पर खुश होऐ की तुसां लोकां उसयो बड़ी हिम्मत दिती। कने उनी मिंजो दसया की तुसां मिंजो ला मिलणे दी कितणी इच्छा रखदे न, मेरे तांई दुखी न कने मेरे तांई कितणी लगन रखदे न, इना गल्लां ला मिंजो होर भी

खुशी होई। 8 मिंजो कोई पछताबा नी है की मैं तुहांजो ऐ सकत चिट्ठी लिखी, चाहे तुसां इसा दिया बजा ला दुखी होऐ। पर पेहले मिंजो पछताबा होया जालू मैं दिखया की इसा चिट्ठिया जो पढी करी तुहांजो थोडे बकते तांई दुख तां होया पर ऐ थोडिया देरा तांई था, 9 पर हुण मैं खुश है इस तांई नी की तुहांजो बड़ा जादा दुख देईकरी बल्कि इस तांई की तुसां उस दुखे दिया बजा ला पाप करणा बंद करी दिता कने परमेश्वरे बाल मुडी ओऐ, क्योंकि ऐ उस तरीके दा दुख है जड़ा परमेश्वर चांदा है की उदे लोकां जो हो, ताकि तुहांजो साडिया बजा ला कुसा भी गल्ला च तकलीफ ना हो। 10 क्योंकि सै दुख जड़ा परमेश्वर चांदा है की असां अनुभव करन, सै लोकां दे पश्चाताप करणे दी बजा बणदा है, जिंदे ला उना दा उद्धार होंदा है, कने फिरी उसला पछताणा नी पोंदा: पर संसारे दे दुख लोकां जो हमेशा दिया मौता पासे लेई जांदे न। 11 ध्यान दिया की परमेश्वरे दिया तरफा ला आयो दुगां ला तुहाड़े च क्या-क्या बदलाव आया है, इदे ला तुहाड़ी हिम्मत बदी गई, अपने आप जो बेकसूर साबित करणे दी इच्छा, अन्याय तांई तुहाड़ा गुस्सा, पेशानियां तांई ऐसी साबधानी, मिंजो ला मिलणे दी इतणी जादा इच्छा, परमेश्वरे दी सेवा तांई तुहाड़ी फिकर, कने गलत माणुऐ जो सजा देणे तांई तैयार रेणा, इना कम्मा दे जरिये तुसां साबित करी दितया है की सब कुछ ठीक-ठाक करणे च तुसां कोई भी कमी नी छडी है। 12 हालांकि ऐ सकत चिट्ठी मैं तुहांजो इस तांई नी लिखी थी की मिंजो उना दी चिंता थी, जड़े अन्याय करदे न कने ना ही उना तांई जड़े अन्याय सेंदे न, पर इस तांई लिखी की तुसां अपु ही परमेश्वरे सामणे दिखी लेन की तुसां सांझे तांई कितणे सच्चे न। 13 इस तांई सांझो इना गल्लां ला हिम्मत मिल्ली; कने साडी हिम्मत कने खुशी तीतुस जो दिखीकरी होर भी बदी गई; क्योंकि सै तुहाडिया बजा ला बड़ा खुश होई गया था। 14 क्योंकि अगर तीतुसे सामणे मैं तुहाड़े बारे च घमंड किता है, तां मैं शर्मिंदा नी होया, पर जियां असां तुसां सोगी सारियां गल्लां सच्च-सच्च बोली दितियां थियां, तियां ही साड़ा घमंड दसणा तीतुसे सामणे भी सच्च साबित होया। 15 कने जालू सै याद करदा है की तुसां सारयां उदी गल्ल मन्नी कने डरदे कने कमदे उसयो अपनाया तां उदा प्यार तुहाड़े तांई होर भी बदी गया है। 16 मिंजो इसा गल्ला दी भी खुशी होंदी है की, हुण मैं हर गल्ला च तुसां पर भरोसा करी सकदा है।

8 हे मसीह भाईयो हुण, मैं तुहांजो उस अनुग्रह दे बारे च दसणा चांदा है, जिसयो परमेश्वरे मकिदुनिया प्रदेश दिया कलीसिया जो दितया है। 2 जालू बडियां भरियां पेशानियां ला उना दी परिक्षा होई, तां सै बड़े खुश होऐ कने हालांकि सै बड़े गरीब थे, फिरी भी उना होर भरोसा करणे बालयां दिया सहायता तांई उदारता ने पैसे दिते। 3 कने उना दे बारे च मेरी ऐ गबाई है की, उना ना सिर्फ जितणा होई सकदा था, बल्कि उना उसला भी जादा बदीकरी दिता, कने उना ऐ कम्म अपनी इच्छा ला किता। 4 उना लोकां सांझे ला बडी बिनती करिरी इजाजत मंगी की यरूशलेम शहरे दे परमेश्वरे दे पबित्र लोकां दी सहायता करणे दा सांझो मौका दिया। 5 असां इदी उम्मीद बिलकुल भी नी कितियो थी। उना अपने आपे जो पेहले प्रभु जो कने फिरी सांझो देई दिता, ठीक बिलकुल तियां ही जियां परमेश्वर चांदा था की सै करन। 6 इस तांई

असां तीतुस ला बिनती किती की, जियां उनी पेहले दान गिठा करणे दा कम्म शुरू कितया था, तियां ही तुहाडे बिच इस दान दे कम्मा जो पूरा करी ले। 7 पर जियां तुसां सारियां गल्लां च मतलब की भरोसे च, परमेस्वरे दे बचने दा प्रचार करणे च, ज्ञान कने तुसां दुज्जयां दी सहायता करणे ताई कोशिश करणे च, कने उस प्यार च जड़ा सांझो ला करदे न, इना गल्लां च बददे जांदे न, तियां ही हुण इना भरोसा करणे बाले गरीब लोकों जो दान देणे दिया सहायता ताई भी बददे जा। 8 मै तुहांजो कोई हुकम नी देणा लगया, मै सिर्फ दुज्जे लोकां दी हिम्मत दी तुलना तुहाडे प्यार ला करा दा है, ताकि तुहाडे प्यारे दिया सच्चाईया जो परखी सकें। 9 तुसां साडे प्रभु यीशु मसीह दे अनुग्रह जो ढंगे ला जाणदे न की, सै अमीर होईकरी भी तुहाडे ताई गरीब बणी गया ताकि उदे गरीब होणे ला तुसां अमीर होई जान। 10 पिछले साल तुसां दान देणे कने ऐसी इच्छा रखणे च भी सारयां ला अगे थे। इस बारे च तुहाडे ताई क्या खरा है, उदे बारे च मेरी ऐ सलाह है की; हुण जड़ा तुसां शुरू कितया है, उसयो पूरा करा। शायद तुसां भी इस कम्मे जो खत्म करणे ताई उतणे ही उत्साही न जितणे तुसां इसयो शुरू करणे च थे। 12 क्योंकि अगर तुहाडे मने च दुज्जयां जो दान देणे दी इच्छा है तां जडा उदे बाल है, उदे मुताबिक ही उदा दान ग्रहण होणा, ना की उदे मुताबिक जडा उदे बाल नी है। 13 मै नी चांदा है की दुज्जयां दी जिन्दगी असान बणाणे ताई तुहाड़ी जिन्दगी मुश्किल होई जा। पर सारयां बाल इक बराबर होणा चाईदा। 14 पर इस बकत तुहाड़ी बढोतरी उना दी जरूरत पूरी करणे ताई भतेरी है, पर कदी ऐसा भी होई सकदा है की तुहांजो जरूरत पेई जा, तालू सै तुहाड़ी सहायता करन, तालू दोनों इक बराबर होई जाणा। 15 जियां पबित्र शास्त्र च लिखया है, “जिनी बडा जादा गठेरया, उसयो जादा नी मिलया कने जिनी घट गठेरया, उसयो कुसी चिजा दा घाटा नी होया।” 16 कने परमेस्वरे दा धन्याबाद हो की, जडी फिकर मिजो तुहाडे बारे च है, ठीक सियुदी ही फिकर परमेस्वरे तुहाडे बारे च तीतुस दे मने च पाई दिती है। 17 जालू असां तीतुसे जो तुहाडे बाल जाणे ताई बोलया, तां उनी खुशिया ला साडी बिनती मन्नी लेई कने बडा उत्साही होईकरी अपणिया मरजिया ला तुहाडे बाल आया है। 18 कने असां तीतुस सोगी इक होर मसीह भाईऐ जो भेजया है, कने सारियां कलीसियां दे भरोसा करणे बाले लोक उदी तारीफ करदे न क्योंकि सै शुभसमाचार दा प्रचार बडे अच्छे ला करदा है; 19 कने सिर्फ इतणा ही नी, पर उसयो कलीसिया दे लोकां ही चुण्या है, ताकि इस दान देणेबाले कम्मे ताई साडे सोगी चले। असां ऐ दान दी सेवा इस ताई करदे न, ताकि प्रभु दी महिमा हो, कने ऐ दसणे ताई की असां यरूशलेम शेहरे दे भरोसा करणे बालयां दी सहायता करणा चांदे न। 20 तीतुस सोगी उस मसीह भाईऐ जो भेजणे जरिये असां इसा गल्ला दा ध्यान रखदे न, की इस दान देणे दिया सहायता दे बारे च जिदी सेवा असां करदे न, कोई सांझो पर दोष ना लाई सके। 21 क्योंकि असां सिर्फ उना गल्लां पर ही ढंगे ला ध्यान नी दिन्दे न, जडियां परमेस्वरे दिया नजरा खरियां न, पर उना पर भी दिन्दे न जडियां माणुआं दिया नजरा च खरियां न। 22 कने असां इना सोगी अपने इक होर मसीह भाईऐ जो भेजया है, असां उसयो बडी बरी बडियां गल्लां च परखया है कने सै सच्चा निकलया है। पर हुण तुसां पर

उसयो बडा भरोसा है, इसा बजा ला सै होर भी जादा उत्साही है। 23 अगर कोई तीतुस दे बारे च पुच्छे, तां सै मेरा साथी, कने तुहाडे ताई मेरा सहकमी है, कने अगर साडे मसीह भाईयां दे बारे च कोई पुच्छे, तां सै कलीसिया दे भेजयो होऐ न कने उना दी जिन्दगी मसीह दी महिमा ताई है। 24 इस ताई अपना प्यार कने साडा सै घमंड जडा असां तुहाडे बारे च करदे न, कलीसिया दे सामणे उना जो साबित करिरी दसा।

9 हुण यरूशलेम शेहरे दे भरोसा करणे बाले लोकां जो दान देणेबाली सेवा दे कम्मे दे बारे च मिजो तुसां जो लिखणा जरूरी नी है। 2 क्योंकि मै तुहाडे मने दिया इच्छा जो जाणदा है। कि तुसां उना दी सहायता करणे ताई तैयार न, इस ताई मै तुहाडे बारे च मकिदुनिया शेहरे दे भरोसा करणे बाले लोकां सामणे घमंड दसदा है की, तुसां अखाया प्रदेशे दे लोक पिछले इक साले ला तैयार थे, कने तुहाडे उत्साह दिया बजा ला होर भी लोक उत्साहित होई गे। 3 मै तीतुस कने दो होर मसीह भाईयां जो तुहाडे बाल इस ताई भेजा दा है, ताकि असां जडा घमंड तुहाडे बारे च दसया, सै इसा गल्ला च बेकार ना होई जाए; पर जियां मै बोलया तियां ही तुसां यरूशलेम शेहरे दे भरोसा करणे बाले लोकां ताई दान देणे ताई तैयार रिया। 4 इयां ना हो की, अगर कोई मकिदुनी शेहरे दा मसीह भाई मेरे सोगी ओऐ, कने तुहाडा दान तैयार ना होए, तां साडा जडा तुसां पर भरोसा है, उदिया बजा ला असां बेईजत होणा, पर तुसां इदे ला भी जादा बेईजत होणा। 5 इस ताई मै मसीह भाईयां ने बिनती करणा जरूरी समझया की सै पेहले ही तुहाडे बाल चली जान, कने जडा दान देंगे दा बायदा तुसां कितया था, उसयो तैयार रखन, जडा तुसां प्यारभाव ला देणा है ना की कुसी मजबूरिया च। 6 पर इसा गल्ला जो याद रखा, की जडा थोडा रांदा है सै बडदा भी थोडा है; कने जडा जादा रांदा है, सै जादा ही बडदा है। 7 इस ताई जिनी अपने मने च जितणे भी देंगे दा फेसला कितया है, सै उतणा ही दे, बिना इच्छा या मजबूरिया ला ना दे। क्योंकि परमेस्वर खुशिया ला देणेबालयां ला प्यार करदा है। 8 परमेस्वर तुहांजो तुहाडिया जरूरतां ला भी जादा हर तरा दा अनुग्रह देई सकदा है। जिदे ला हर गल्ला च कने हर बेले, सब कुछ, जडा तुहांजो जरूरी हो, सै तुहाडे बाल रे, ताकि तुहाडे बाल हर भले कम्मा ताई जरूरत ला जादा हो। 9 जियां की पबित्र शास्त्र च लिखया है, “परमेस्वर जरूरतमंदा जो उदारता ला दिन्दा है, कने जडे कम्म सै करदा है, सै सही न कने हमेशा होंदे रेणे।” (aiōn g165) 10 परमेस्वर हमेशा किसाना जो रांणे ताई बी दिन्दा है, कने खाणे ताई रोटी दिन्दा है। इयां ही परमेस्वरे ऐ इंतजाम करणा की तुहाडे बाल हमेशा इतणी धन दौलत हो ताकि तुसां होर जादा उदारता ला गरीब लोकां दी सहायता करी सकन। 11 परमेस्वरे तुहांजो हर तरीके ला आशीर्वाद देणा ताकि तुसां हमेशा उदारता ला दान देई सकन। कने जालू असां तुहाडे दाने जो जरूरतमंद लोकां जो देणा, तां उना परमेस्वरे जो धन्याबाद देणा। 12 क्योंकि इसा सेवा जो पूरा करणे ला, ना सिर्फ परमेस्वरे दे लोकां दियां जरूरतां पुरियां होंदिया न बल्कि लोकां दिया तरफा ला परमेस्वरे दा बडा जादा धन्याबाद होंदा है। 13 क्योंकि दुज्जयां दी सहायता करणे ताई दान देंगे दी ऐ सेवा दसदी है की तुसां अपना बायदा पूरा किता है, क्योंकि तुसां मननया है की मसीह दा शुभसमाचार ही सचच है कने खुद अपने बचना

दा पालन किता है। कने गरीब भरोसा करणे बाले कने सोगी ही बाकी भरोसा करणे बालयां दी सहायता करणे च उदारता दसदे न। 14 कने उना तुहाडे ताई परमेस्वरे ला प्राथना करणी। सै तुहाडे ने प्यार करदे न, क्योंकि सै जाणदे न की परमेस्वरे तुहांजो बडा जादा अनुग्रह दितया है। 15 ओआ असां परमेस्वरे दे उस दाने ताई धन्यवाद करन, जिसयो शब्दां च बयान नी करी सकदे।

10 मैं सेई पौलस है, जडा तुहाडे सामणे डरफोक लगदा है, पर तुहांजो ला दूर जाणे पर हिम्मत बाला होई जांदा है। तुहांजो ला मसीह दिया उदारता कने कोमलता दिया बजा ला बिनती करा दा है की, 2 कुछ लोक बोलदे न असां इस संसारे दे लोकां साईं कम्म करदे न। इस ताईं जालू मैं ओणा है तां मिंजो उम्मीद है की मिंजो उना सोगी सकत होणा पोणा। मैं हथ जोडी करी बिनती करदा है की जालू मैं तुहाडे बाल ओणा तां मिंजो तुहाडे सोगी ऐसा बर्ताब ना करणा पोए। 3 क्योंकि असां इस संसार च रेंदे जस्स न, पर असां अपने दुशमणा सोगी संसारे दे लोकां साईं नी लडदे। 4 क्योंकि जिना हथियारां ला असां लडदे न सै संसारे दे लोकां दे हथियारा साईं नी न, पर किलयां जो ढांणे ताईं परमेस्वरे दे शक्तिशाली हथियार न। 5 इना दे जरिये असां उस हर इक बिरोध जो कने उस हर इक घमंड करणे बालिया गल्ला जो, जडी परमेस्वरे दे ज्ञान दे खिलाफ खडी होंदी है, उना उच्चिया गल्लां जो असां डाई दिन्दे न, कने साडे हर इक बिचार जो काबू करिरी उना जो मसीह दा हुकम मनणे बाला बणाई दिन्दे न। 6 कने जालू तुसां मसीह दा हुकम मनणे बाले बणी जांदे न, तां असां सारे हुकम नी मनणे बालयां जो सजा देंगे ताईं तैयार रेंदे न। 7 तुसां सिर्फ बाहरी दिखावे जो ही दिखदे न, अगर कुसी जो अपने उपर ऐ भरोसा हो, की मैं मसीह दा है, तां सै ऐ भी जांणी ले, की जियां सै मसीह दा है, तियां ही असां भी मसीह दे न। 8 क्योंकि अगर मैं उस हके दे बारे च होर भी घमंड दस्सें, जडा तुहाडे भरोसे जो खत्म करणे ताईं नी, पर तुहांजो भरोसे च बढणे ताईं दितया, तां इदे च मिंजो कोई शर्म नी होणी। 9 मैं नी चांदा की तुहांजो ऐ लगे की मैं ऐ चिडी तुहांजो डराणे ताईं लिखा दा है। 10 क्योंकि तुहांजो चे कुछ लोक बोलदे न, “पौलसे दियां चिठियां गंभीर कने प्रभावशाली न; पर जालू दिखदे न, तां बोलदे न सै कमजोर माणु है कने उदियां गल्लां बेकार न।” 11 इस ताईं ऐसा बोलणे बालयां जो ऐ समझणा चाईंदा की, जियां असां दूर रेईंकी चिठिया दे जरिये तुसां सोगी गल्लां करदे न, तियां ही तुहाडे सोगी रेणे पर साडे कम्म भी होणे। 12 क्योंकि सांझो ऐ हिम्मत नी है की असां अपने आपे जो उना सोगी गिणन, या उना जो अपने ला मिलान, जडे अपनी तारीफ करदे न, कने अपने आप जो अपु चे ही नापदे न, कने अपनी तुलना अपने आपे ने ही करदे न। तां सै अपने आपे जो मुख बणांदे न! 13 असां उस कम्मे ला बाहर जडा परमेस्वरे सांझो दितया है कदी घमंड नी करदे, पर उसा ही मर्यादा दीकर असां घमंड करणा जडी मर्यादा परमेस्वरे साडे ताईं बणाईये है, कने उदे च ही तुसां भी आईं गियो न कने उस मर्यादा दे अनुसार ही घमंड भी करणा। 14 क्योंकि असां अपने आपे जो मर्यादा ला बाहर नी बदाणा चांदे, जियां की तुहांजो दीकर पुज्जणे दिया हालता च होँदा, बल्कि तुहांजो मसीह दा शुभसमाचार सुणाणे ताईं कुरिन्थुस शहर दीकर यात्रा करणे बाले असां पेहले माणु थे। 15 कने असां

मर्यादा ला बाहर होरनी दिया मेहनता पर घमंड नी करदे न; पर सांझो उम्मीद है, की जियां-जियां तुहाडा भरोसा बददा जाणा तियां-तियां असां अपणिया मर्यादा अनुसार तुहाडिया बजा ला तुहाडे अखे-बखे दे कने मते लोकां बाल पूजी सकदे न। 16 की असां तुहाडे इलाके ला बाहर दूर-दूर जगा च भी शुभसमाचार सुणान, कने ऐ नी की होरनी दे दायरे अंदर बणयो कम्मे पर घमंड करन। 17 पर जियां पबित्र शाब्द च लिखया है की, “अगर कोई घमंड करणा चांदा है, तां सै प्रभु पर घमंड करे।” 18 क्योंकि जडा अपनी बडाई करदा है, सै नी, पर जिदी बडाई प्रभु करदा है, सै ही प्रभु दिया नजरा च खरा है।

11 अगर तुसां उना दी सुणी लेंदे न जालू सै अपने बारे च खरियां गल्लां करदे न। इस ताईं मिंजो उम्मीद है की तुसां मिंजो भी बरदाश करी लेणा है जालू मैं थोडा बेवकूफां साईं गल्लां करगा। 2 क्योंकि मैं तुहाडे ला तियां ही प्यार करदा कने तुहाडी चिंता करदा है जियां परमेस्वर करदा है, इस ताईं की मैं तुहांजो सिर्फ यीशु मसीह जो देंगे दा बायदा कितया है, जियां इक पिता अपणिया कुआरिया कुडिया जो उसा दे लाडे जो देई दिन्दा है, जालू उना दा बियाह होँदा है। 3 पर मैं डरदा है की जियां शैताने सपे दे स्मे च अपणिया चलाकिया ला पैली जनानी हव्वा जो बेहकाई दिता, तियां ही शैतान तुहाडे मना जो उस सीधेपन कने पबित्रता ला मसीह दी सेबा ला दूर ना करी दे। 4 जालू कोई तुहाडे बाल आईं करी कुसी होर यीशु दे बारे च दसदा है, तां तुसां उस नोए माणुऐ जो अपनाणे ताईं बडे उताबले रेंदे न। ऐ यीशु सै नी है जिदे बारे च असां तुहांजो प्रचार कितया था। कने तुसां खुशिया ला उस पर ध्यान दिन्दे कने सुणदे न जालू तुहांजो इक ऐसी आत्मा कने संदेश मिलदा है, सै यीशु दे शुभसमाचार कने आत्मा साईं नी होँदा जडा असां तुहाडे बाल लेईंकी आयो थे। 5 मैं अपने आपे जो उतणा ही खरा समझदा है जितणा की सै प्रेरित जडे अपने आपे जो सारयां ला महान प्रेरित समझदे। 6 मैं बोलणे च इतणा माहिर नी है, पर मैं मसीह कने शुभसमाचार दे बारे च अच्छे ला जाणदा है; मैं अपना ज्ञान उना सारियां गल्लां जरिये साबित कितया है जडियां मैं सिखाईयां न। 7 मैं तुहाडे बिच परमेस्वरे दा शुभसमाचार मुफ्त च प्रचार किता कने अपने आपे जो नम्र किता ताकि तुहाडी इज्जत हो। मैं क्या ऐसा करिरी पाप किता? 8 तुहाडी सेबा करणे ताईं मैं होर कलीसियां ला सहायता लेईं। तुहांजो ऐ नी बोलणा चाईंदा की ऐसा करणा गलत है। 9 कने जालू मैं तुहाडे सोगी था, कने मिंजो पैसायां दी कमी होई, तां मैं कुसी पर भी भोजन नी बणया, क्योंकि मसीह भाईयां मकिदुनिया प्रदेश ला आईं की मेरिया कमिया जो पुरा किता: कने मैं कुसी भी गल्ला च अपने आपे जो तुसां पर भोजन नी बणना दिता, कने ना अगे जो बणना देणा है। 10 मसीह दी सचाईं मिंजो च है, इस ताईं मिंजो घमंड है की मैं अखाया प्रदेशे च कुसी ला भी पैसे नी ले। 11 मैं तुहाडे पैसे कनी ले? क्या मैं ऐ इस ताईं किता की, मैं तुहांजो ला प्यार नी करदा? ऐ तां परमेस्वर जाणदा है की मैं तुहांजो ने प्यार करदा है। 12 पर जडा मैं करदा है, सेई करदे रेणा है, ताकि मैं उना लोकां जो रोकी सके, जडे इसा गल्ला पर घमंड करणे ताईं इक मोका तोपदे न की परमेस्वरे ताईं उना दा कम्म साडे कम्मे साईं है। 13 क्योंकि ऐसे लोक झूठे प्रेरित, कने धोखे ने कम्म करणे बाले, कने मसीह दे प्रेरित होणे दा झूठा दाबा करदे न। 14 कने

ऐ कोई हेरानिया बाली गल्ल नी है, क्योंकि शैतान अपु भी परमेस्वर दी महिमा दे स्वर्गदूत दा रूप धारण करिरी धोखा दिन्दा है। 15 इस ताई अगर शैताने दे सेवक भी परमेस्वर दे सेबकां दा रूप धारण करन, तां इदे च कोई बडी बडी गल्ल नी है, पर उना दा अंत उना दे कम्मा दे अनुसार होणा। 16 मै फिरी बोलदा है, कोई मिंजो मुख ना समझे; नी तां मुख ही समझीकरी मिंजो अपनाई लिया, ताकि थोड़ा दिया मै भी घमंड करी सके। 17 बेधडक होईकरी मै जडा कुछ बोलदा है, ऐ मै तियां नी बोलदा जदिया प्रभु यीशु मसीह चांदा है, पर मन्ना मुखता दिया बजा ला बोलदा है। 18 जालू की बडे लोक इस संसारे दे लोकां साईं घमंड करदे न, तां मै भी घमंड करणा। 19 तुसां तां समझदार होईकरी भी खुशिया ला मूर्खी दी सेहन करी लेंदे न। 20 क्योंकि जालू तुहांजो कोई नोकर बणाई लेंदा है, या तुहाडा सब कुछ लेई लेंदा है, या तुहांजो धोखा दिन्दा है, या अपने आपे जो तुहांजो ला उपर रखदा है, या तुहाडे मुए पर थपड मारदा है, तां तुसां सेहन करी लेंदे न। 21 मिंजो ऐ सब करणे च शर्मिंदगी होंदी; पर जिसा कुसी गल्ला पर कोई घमंड करदा है, मै मुखता ला बोलदा है तां मै भी घमंड करदा है। 22 क्या सै ही इब्रानी न? मै भी इब्रानी है, क्या सै इस्राएली न? मै भी इस्राएली है, क्या सै अब्राहम दे बंशे दे न? अब्राहम दा बंशज मै भी है। 23 क्या सेई मसीह दे सेवक न? मै पागला साईं बोलदा है, मै उना ला बदीकरी है! मै उना ला जादा मेहनत कीतियो है, उना ला जादा बार जेला गया है, बडी बरी कोडे खादे न, बडी बरी मेरिया जानी जो खतरा होया। 24 यहूदी अंगुवां मिंजो पंज बरी उनाताली-उनाताली कोडे मारे। 25 तिन बरी मै बेता ने मार खादी; इक बरी पथरा ने मार खादी; तिन बरी मेरा जाज समुद्रे च टूटी करी डूबी गया, इक रात दिन मै समुद्रे च कटी। 26 बार-बार मिंजो सफर करणा पिया; कदी खड़ा च, कदी खुबंर डाकुआं दे, कदी अपने देशे दे लोकां दे, कने कदी होर जातियां दे लोकां दे, कदी शेहरां च, कदी बणा च, कदी समुद्रे दे खतरयां दा कने कदी झूठे मसीह भाईयां दे खतरयां दा सामणा करणा पिया। 27 मै केई रातां जागी करी, भूखा प्यास रेईकरी, सर्दियां च थोडे कपडयां च रेईकरी बडी मेहनत किती कने बडियां मुसीबतां झेलियां। 28 कने इना सारियां गल्लां दे इलाबा मिंजो हर रोज सारियां कलीसियां दी भलाई दी चिंता दा भोज बणी रेंदा है। 29 जालू कोई कमजोर होंदा था तां मै भी अपने आपे जो कमजोर महसूस करदा था। जालू कोई पाप करदा है, तां मै बडा परेशान होंदा है। 30 अगर घमंड करणा जरूरी है, तां मै भी अपणिया कमजोरियां दिया गल्लां पर घमंड करणा। 31 परमेस्वर, जडा साडे प्रभु यीशु मसीह दा पिता, जडा हमेशा धन्य है, सै जाणदा है, की मै जुठ नी बोलदा। (aiōn g165) 32 जालू मै दमिश्क शेहरे च था, राजा अरितास दे राज्यपाले मिंजो पकडने ताई शेहरे च पैरा बठाई दितया था। 33 पर दोस्तां मिंजो इक टोकरिया च इक लम्बा रस्सा बन्नी करी उदे च बैठाया कने उसयो दिबारां दे इक सुराखे ला बाहर जमिना पर उतारी दिता कने इयां करिरी मै राज्यपाले दे हथे ला बची के निकली गया।

12 घमंड करणा मेरे ताई ठीक नी है, पर तमी करणा पोंदा है; तां मै प्रभु दे दितयो दर्शन कने प्रकाशना दी चर्चा करणी। 2 मै इक ऐसे माणूऐ जो जाणदा है, जडा मसीह पर भरोसा रखदा है, मसीह जो चौदा साल पेहेले स्वर्ग

जो चुकी लिया जिथू परमेस्वर रेंदा, मै नी जाणदा की सै अपने शरीर च था, या सिर्फ आत्मा च था, ऐ सिर्फ परमेस्वर ही जाणदा है। 3 मै दुबारा बोलदा है, मै जाणदा है की ऐ माणु स्वर्गें जो चुकी लिया (फिरी भी मिंजो नी पता की ऐ सच्ची होया की या इक सुपना था, ऐ तां परमेस्वर ही जाणदा) कने ऐसियां गल्लां सुणियां जिना दा शब्दां च बखान नी करी सकदे कने जिना दे बारे च दुज्जयां जो दसणे दी लोकां जो इजाजत नी है। 5 ऐसे माणूऐ पर तां घमंड करणा, पर अपने आपे पर अपणियां कमजोरियां जो छडी करी, अपने बारे च घमंड नी करणा। 6 क्योंकि अगर मै घमंड करणा चांगा भी तां मै मुख नी होणा, क्योंकि मै सच्च बोलणा; पर मै अपने आप जो घमंड करणे ला रोकदा है, इयां ना हो की, जियां कोई मिंजो दिखदा है, या मिंजो सुणदा है, मिंजो उसला बदीकरी समझे। 7 पर मिंजो उना अनोखी चीजां दे बारे च घमंड नी करणा चाईदा जडियां परमेस्वर मिंजो दसियां न। इस ताई मेरे शरीर च कंडा चुभाया मतलब की मिंजो बडी बडी मुसीबत दितियो है। शैताने दिया तरफा ला इक दूत मिंजो मारणे कने मिंजो घमंडी होणे ला रोकणे ताई दितया है। 8 इदे बारे च मै प्रभु ला तिन्न बरी बिनती किती की, मिंजो ला ऐ दूर होई जा। 9 कने उनी मिंजो ने बोलया, “मेरा अनुग्रह तेरे ताई काफी है; क्योंकि मेरी शक्ति कमजोरिया च सिद्ध होंदी है।” इस ताई मै बडिया खुशिया ने अपणियां कमजोरियां पर घमंड करणा है, ताकि मसीह दी शक्ति मिंजो मिलदी रे। 10 इसा बजा ला मसीह ताई मै कमजोरियां च, कने निंदा च, कने दरिद्रता च, कने लड़ाई झगडयां च, कने मुसीबतां च खुश है, क्योंकि जालू मै कमजोर होंदा है, तालू मै मसीह दी शक्ति ने शक्तिशाली होंदा है। 11 मै मुख तां बणया, पर ऐ तुसां ही न जिना मिंजो ऐसा करणे ताई मजबूर किता: तुहांजो तां मेरी प्रशंसा करणी चाईदी थी, क्योंकि अगर मै कुछ भी नी है, तमी उना महान प्रेरितां ला कुसी भी गल्ला च घट नी है। 12 मै तुहाडे बिच रेईकरी इक सच्चा प्रेरित होणे दे सबूत दिते, मै सबर रखया, चिन्न चमत्कार, अनोखे कम्म, कने शक्ति दे कम्म दस्से। 13 तुसां कुसा दिया गल्ला च होर कलीसियां ला घट थे, सिर्फ इक ही गल्ल की जडी मै बाकियां कलीसियां सोगी किती कने तुहाडे सोगी नी किती की, मै तुहाडे ला अपणियां जुस्रतां ताई पैसे नी मंगे, तुहाडा ऐ सोचणा गलत है की मै ऐसा करिरी तुहाडे बिरोध च गलत किता है। 14 दिखा मै तीजी बरी तुहाडे बाल ओणे ताई तैयार है, कने मै इस बरी भी तुहाडे ला कोई सहायता नी लेणी; क्योंकि मै तुहाडिया संपतिया जो नी, पर तुहांजो चांदा है। क्योंकि बचयां जो अपने माता-पिता ताई धन नी गटेरणा चाईदा, पर माता-पिता जो बचयां ताई धन दौलत गटेरणी चाईदी। 15 मै तुहाडे ताई बडिया खुशिया ला अपना सब कुछ देई देणा बल्कि अपने आप जो भी देई देणा; क्योंकि मै तुहांजो ने बडा प्यार करदा है, पर ऐसा लगदा है की तुसां मिंजो ने घट प्यार करदे न। 16 कुछ भी हो, मै तुहांजो पर भोज नी बणया, पर दुज्जयां जो लगदा है की मै चलाक है कने मै तुहांजो धोखा दिता है, पर ऐ झूठ है। 17 मै तीतुस जो कने होर मसीह भाईयां जो कदी भी तुहांजो बाल भेजी करी पैसे दी सहायता नी मंगी। 18 मै तीतुस जो कने उदे सोगी अपने मसीह भाईऐ जो भेजया था, तां क्या तितुसे धोखा देईकरी तुहांजो ला कुछ लिया? नी! क्योंकि साडा इक ही मकसद है कने

साडा इक ही कम्म है। 19 मेरे प्यारे मसीह भाईयो, तुसां अपने मने च ऐ सोचा दे होणे न की असां ऐ सब अपने बचाव ताई बोला दे न। पर असां ऐ सब परमेश्वरे दे सामणे यीशु मसीह च तुहाडे भरोसे जो मजबूत करणे ताई बोला दे न। 20 क्योंकि मिंजो डर है, कृथी इयां ना हो, की मैं तुहाडे बाल ओऐ कने मैं जदेई उम्मीद कितियो है, तुसां सियुदे ना होन, कने जदेई उम्मीद तुसां मिंजो ला कितियो कने मैं भी सियुदा नी होऐ। मिंजो डर है, की ओथु झगडा, जलन, गुस्सा, मतलबीपन, चुगली, घमंड कने बखेडे ना पियो होन। 21 कने ऐसा ना हो की जालू मैं दुबारा बापस ओऐ, तां मेरा परमेश्वर मिंजो बेज्जत करे। कने फिरी मिंजो केईयां ताई रोंणा पोऐ, जिना पेहले गंदे कम्मा ला, कने व्यभिचार, कने लुचपन ने, कने जडे पाप उना कितया होन, उना ला पश्चाताप नी कितया हो कने पाप करणा नी छडया हो।

13 पबित्र शास्त्र च लिखया है की, “हर इक गल्ल जो साबित करणे ताई दो या तिन गबाह दी जरूरत होदी है,” जालू मैं दुज्जी बरी तुहाडे बाल आया था, तालू मैं कुछ लोकां जो चेताबनी दिती थी, जडे पाप करदे थे। हुण मैं इसा चिठिया दे जरिये सारायां जो दुबारा चेताबनी दिन्दा है, जियां मैं पेहले भी दितियो थी। हुण मैं तिजी बरी तुहाडे बाल लगया ओणा कने हुण भी उना लोकां पाप करणा नी छडया, तां कोई भी उना जो सजा ला नी बचाई सकदा। 3 मैं ऐ बोलदा है क्योंकि तुसां इदा सबूत चांदे न, की मसीह मेरे जरिये बोलदा है, कने मसीह तुहांजो सुधारदा है, तां ऐ साबित होँदा है की सै कमजोर नी है; पर तुहाडे बिच शक्तिशाली है। 4 सै कमजोरिया दिया बजा ने सूली पर तां चढाया गया, पर परमेश्वरे दिया शक्तिया ला जिन्दा है, असां भी तियां ही कमजोर न, जियां मसीह था; पर परमेश्वरे दिया शक्तिया ने जडी तुहाडे ताई है, असां उदे सोगी जीणा। 5 अपने आपे जो परखा, की तुहाडा भरोसा सच्चा है की नी; क्या तुहांजो ऐ अनुभव नी होँदा है की यीशु मसीह तुसां च है। अगर नी होँदा है तां तुसां निक्कमे निकलयो न। 6 पर मेरी आस है, की तुसां जाणी लेणा है की असां निक्कमे नी न। 7 कने असां अपने परमेश्वरे ला प्राथना करदे न, की तुहांजो ला कोई गलती ना हो। ऐ दसणे ताई नी की साडी सेबकाई सफल रेई है, पर असां चांदे न की तुसां खरे कम्म करन, चाहे असां अपु निक्कमे ही लगन। 8 क्योंकि असां सचाइया दे खिलाफ कुछ नी करी सकदे न, पर सचाइया ताई ही करी सकदे न। 9 असां अपने कमजोर होणे कने तुहाडे भरोसे च ताकतबर होणे पर असां खुश होँदे न। कने ऐ प्राथना भी करदे न की, तुसां भरोसे च सिद्ध होँदे जा। 10 इसा बजा ला मैं तुहाडे बाल ओणे ला पेहले तुहांजो ऐ गल्लां लिखा दा है, ताकि मिंजो तुहांजो सजा देंगे दे हके जो इस्तेमाल करणे दी जरूरत ना पोऐ, जडा मिंजो प्रभुऐ दितया है। पर मैं इना हका दा इस्तेमाल तुहाडे भरोसे जो मजबूत करणे ताई करणा चांदा है ना की नाश करणे ताई। 11 हे मसीह भाईयों, खुश रिया, सिद्ध बणदे जा, सबर रखा, इक दुज्जे जो उत्साहित करा, इक ही मन रखा, मिल्ली जुली करी रिया कने शांति देणेबाले परमेश्वरे तुहाडे सोगी रेणा। 12 इक दुज्जे जो गल्ले लगी करी मसीह दे प्यार च नमस्कार करा। 13 सारे पबित्र लोक तुहांजो नमस्कार करदे न। 14 मैं प्राथना करदा है की प्रभु यीशु मसीह दा अनुग्रह कने परमेश्वरे दा प्यार कने पबित्र आत्मा दा साथ तुहाडे सोगी रे।

गलातियों

1 मैं, पौलस, तुहांजो ऐ चिट्ठी लिखा दा है, कने मैं इक प्रेरित है, मिजो प्रेरित होणे ताई कुनी खास समूह या कुनी माणुऐ नी चुण्या, पर यीशु मसीह कने परमेश्वरे पिता दे जरिये चुण्या है, जिनी यीशु मसीह जो मर्यां चे जिन्दा किता। **2** कने मैं ऐ चिट्ठी गलातिया प्रदेशे दिया सारिया कलीसिया जो उना सारे मसीह भाईयां दिया तरफा ला लिखा दा है जडे मेरे सोगी न। **3** मैं प्राथना करदा है की साडा पिता परमेश्वर कने प्रभु यीशु मसीह तुहांजो अनुग्रह कने शांति दे। **4** साडे पिता परमेश्वर दी इच्छा दे अनुसार यीशु मसीह अपने आपे जो साडे पापां दिया बजा ने बलिदान करी दिता ताकि असां इस संसार दे लोकां दे बुरे प्रभाव ला बचाई सके। (aiōn g165) **5** मैं प्राथना करदा है की परमेश्वर दी महिमा युगां-युगां दीकर होंदी रे। आमीन। (aiōn g165) **6** मिजो इसा गल्ला दी हेरानी होंदी है, जिनी परमेश्वरे तुहांजो मसीह दे अनुग्रह दे जरिये अपने लोक होणे ताई सदया है, उसला तुसां इतणी जल्दी फिरी करी कुसी होर ही शिक्षा जो मण्णा लगी पे। **7** पर सिर्फ इक ही सच्चा शुभसमाचार है, पर असल गल्ल ऐ है की कुछ लोक मसीह दे शुभसमाचार दी शिक्षा जो बिगाडना चांदे न कने उना लोकां ही तुहांजो भटकाई दिता है। **8** पर अगर असां चे कोई या स्वर्गदूतां चे कोई भी इस शुभसमाचार जो छडी करी जडा असां तुहांजो सुणाय है, कोई होर शिक्षा दा प्रचार करे तां, परमेश्वरे उसयो सजा देणी। **9** जियां असां पेहले ही बोलया है, तियां ही मैं हणु फिरी बोलदा है, की उस शुभसमाचार जो छडी करी जिसयो तुसां अपनाया है, कोई होर शिक्षा दा प्रचार करे तां, परमेश्वरे उसयो सजा देणी। **10** मैं पक्के तौर पर लोकां दी नी मंदा है पर परमेश्वरे दी मंदा है, मैं लोकां जो खुश करणे दी कोशिश नी करा दा है, पर परमेश्वरे जो खुश करणा चांदा है। अगर मैं हले दीकर माणुऐ जो खुश करदा रेंदा तां मैं मसीह दा सेवक नी होंदा। **11** हे मसीह भाईयो, मैं तुहांजो दसी दिन्दा हे की, जडा शुभसमाचार मैं सुणाय है, सै माणुऐ दा बणाय नी है। **12** क्योंकि मैं ऐ अपने पूर्वजां या धार्मिक गुरूआं ला नी सिखया है, बल्कि खुद यीशु मसीह शुभसमाचारे जो मिजो पर प्रगट कितया है। **13** तुसां जाणदे न की मैं यहूदी धार्मिक नियमा दे अनुसार जिन्दगी जिन्दा था, तां मेरे मते साथी जडे मेरिया उमरा दे थे, सै भी यहूदी नियमा दा पालन करदे थे, पर मैं उना सारयां ला जादा बदीकरी कने पुरे दिले ला अपने पूर्वजां दे रीती रिबाजां जो मंदा था। कने उस बकत मैं यीशु मसीह पर भरोसा करणे बालयां जो सतांदा था कने उना जो मारणे दी कोशिश करदा रेंदा था। **15** पर तालू परमेश्वरे ऐ फेसला किता की अपने पुत्रे जो मिजो पर प्रकट करे, ताकि मैं होर जातियां बिच यीशु मसीह दा प्रचार करी सके। परमेश्वर ही है जिनी मिजो मेरे पैदा होणे ला पेहले ही चुणी लिया कने अपने अनुग्रह ने मिजो अपणी सेवा ताई सदया। जालू यीशुऐ अपने आप जो मिजो पर प्रगट किता, तालू मैं सलाह लेणे ताई कुसी बाल नी गया, **17** कने ना ही जडे मिजो ला पेहले प्रेरित थे, उना जो मिलणे ताई यरूशलेम गया, पर झट अरब नाए दे इलाके जो चली गया, कने फिरी ओथु ला दमिशक शेहरे च दुबारा बापिस आई गया। **18** फिरी तिन्ना सालां बाद मैं पतरसे ने मिलणे ताई यरूशलेम

शेहरे जो आया, कने उदे बाल पन्दरा रोज रिया। **19** कने मैं प्रभु यीशु दे भाई याकूब जो छडी करी कने कुसी भी होर प्रेरिते ने नी मिल्ला। **20** परमेश्वर मेरा गबाह है की तुहांजो जडियां गल्लां मैं लिखदा है, उस च कुछ भी झूठ नी है। **21** यरूशलेम शेहरे च मैं उना प्रेरितां ला मिलणे बाद सीरिया कने किलिकिया प्रदेशां च आया। **22** पर यहूदिया प्रदेशे च मसीह पर भरोसा करणे बाले लोकां मिजो कदी नी दिखया था। **23** पर उना भरोसा करणे बालयां मेरे बारे च ऐं सुणाय था, की जडा पेहले सांझो मसीह पर भरोसा करणे ने सतांदा था, सै हणु इसी भरोसे दा प्रचार करदा है, इसला पेहले सै उना लोकां जो मारणे दी कोशिश करदा था जडे मसीह पर भरोसा करदे थे। **24** इस ताई सै परमेश्वरे दी महिमा करदे न क्योंकि उनी मिजो इक सताणे बाले ला मसीह दा इक चेला बणाई दिता।

2 चौदा साल बाद मैं बरनबास सोगी यरूशलेम शेहर गया कने तीतुस जो भी सोगी लेई गया। **2** मैं ओथु गया क्योंकि परमेश्वरे मिजो जाणे ताई बोलया कने जालू मैं ओथु था, तां मैं कुछ बड़े अगुवां ने एकांत च मिलया कने उना जो उस शुभसमाचार दे बारे च दसया जिसदा मैं होर जातियां च प्रचार करा दा था। ताकि इयां ना हो, की मेरी इस बकते दी, या पिछली मेहनत बेकार होए। **3** मेरा साथी तीतुस कने सै इक यूनानी है; उदा खतना कदी नी होया। पर यरूशलेम शेहरे दी कलीसिया दे अगुवां उसयो अपनाई लिया कने उना उसयो खतना करणे ताई मजबूर भी नी किता। **4** तीतुस दा खतना नी होणे दा ऐ मामला कुछ झूठे भाईयां ताई इक मुदा बणी गया, जडे साडिया मंडलिया च चोरिया ला आई गियो न कने उसा अजादिया जो खत्म करणे दी कोशिश करा दे थे जडे साडे उधारकर्ता यीशु मसीह दितियो है, ताकि सै सांझो फिरी ला यहूदी व्यवस्था दा गुलाम बणाई सकन। **5** पर असां थोडे बकते ताई भी उना दियां गल्लां ने सेहमत नी होए, ताकि तुसां लगातार सच्चे शुभसमाचार दी सचाई पर भरोसा करदे रेन। **6** यरूशलेम शेहरे दिया कलीसिया दे उना बड़े अगुवां मेरी शिक्षा च कुछ भी नी जोडया, मैं इसा गल्ला दी कोई चिंता नी करदा की सै अगुवे कुण न क्योंकि परमेश्वर बाहरी रूप दिखीकरी न्याय नी करदा। **7** पर जालू अगुवां दिखया की, जियां परमेश्वरे यहूदी लोकां ताई शुभसमाचार प्रचार करणे दा कम्म पतरसे जो दितया है तियां ही होर जातियां जो शुभसमाचार प्रचार करणे दा कम्म मिजो दितया है। **8** क्योंकि जिनी परमेश्वरे पतरसे जो यहूदी लोकां बिच प्रेरित होणे ताई चुण्या, उनी ही मिजो भी होर जातियां बिच प्रेरित होणे ताई चुण्या है। **9** कने जडे लोक कलीसिया दे खम्बे समझे जांदे थे, मतलब की पतरस, याकूब, कने यहून्ना, उना अनुग्रह दे उस बरदान जो पछेणी लिया जडा मिजो मिलया है। उना मिजो कने बरनबास जो अपना साथी समझीकरी सांझो हिस्सेदार बणाय। सै इसा गल्ला ताई राजी होऐ की असां होर जातियां बाल जान कने सै यहूदियां बाल जान। **10** उना सांझो ने ऐं विनती किती की यरूशलेम शेहरे दे गरीब बिश्वासियां दी सहायता करनयो, कने ऐ सेई कम्म था जिसयो मैं करणा चांदा था। **11** पर जालू इक दिन पतरस अन्ताकिया शेहर च आया, तां मिजो लोकां सामणे उसयो फटकार लाणा पेई क्योंकि सै सही कम्म नी करा दा था। **12** पतरस पेहले होर जातियां सोगी खाणा खांदा था पर

जालू याकूब दे भेजयो कुछ विश्वासी यस्शलेम शहर च आये तां उना सोगी मिलणा-जुलणा कने खाणां खाणा बंद करी दिता क्योंकि सै उना यहूदियां ला डरदा था, जडे चांदे थे की सारियां होर जातियां दा खतना होणा चाईदा। 13 कने उदे सोगी अन्ताकिया शहर दे कुछ यहूदी विश्वासी भी ऐथू दीकर की बरनबास भी उना ला डरदा था कने उनी भी होर जातियां सोगी मिलणा-जुलणा बंद करी दिता। 14 पर जालू मै दिखया, की उना दा चाल चलण सियुदा नी है, जदिया शुभसमाचार सिखांदा है, तालू मै सारयां सामणे पतरसे जो फटकार लाईकरी बोलया, “तू इक यहूदी होईकरी भी, होर जातियां दे रीती रबाजां जो मन्ना दा है,” कने यहूदियां दे रीती रबाजां जो नी मन्ना दा है, अगर तू इक यहूदी होईकरी ऐसा कितया है। तां तू फिरी होर जातियां जो असां यहूदियां दे रीती रबाजां जो मणने ताई कजो मजबूर करदा है? 15 असां जडे जन्म ला ही यहूदी न कने होर जाति नी न जिना जो यहूदी पापी बोलंदे न। 16 असां यहूदी विश्वासी जाणंदे न की मूसा दी व्यवस्था जो मन्नी करी कोई भी माणु धर्मी नी बणदा है, इस ताई असां भी यीशु मसीह पर भरोसा किता, असां मूसा दी व्यवस्था दा पालन करी के नी पर यीशु मसीह च भरोसा करणे ने धर्मी होए; इस ताई की मूसा दी व्यवस्था दे कम्मा ने कोई भी माणु धर्मी नी होंदा। 17 कुछ यहूदी सोचंदे न की असां पाप कितया है, क्योंकि असां व्यवस्था दा पालन करणे दिया बजाए, धर्मी होणे ताई मसीह पर भरोसा करंदे न, इदा मतलब ऐ है की मसीह सांझो पापी बणांदा है, नी बिलकुल भी नी। 18 पर असल च मै पाप करणा अगर मै इसा गल्ला जो दुबारा ला अपनाई लेंदा है की इक माणु व्यवस्था जो मणने ने ही परमेस्वरे दिया नजरा च सही होंदा है। 19 मै समझदा है की मिजो मूसा दिया व्यवस्था जो मणने ने मै धर्मी नी बणी नी सकदा। इस ताई मै ऐसा मनदा है की मै व्यवस्था दे बारे च मरी गया ताकि मै परमेस्वरे ताई जिन्दा रेई सके। 20 ऐ इयूदा है जियां जालू मसीह सूली पर मरी गया, तां मै भी मसीह सोगी सूली पर मरी गया। हुण मै जिन्दा नी है, पर मसीह मेरे अंदर जिन्दा है। हुण मै परमेस्वरे दे पुत्रे पर भरोसा करिरी जी दा है, जडा मिजो ने इतणा प्यार करदा है की उनी मेरे ताई अपनी जान देई दिती। 21 मै इसा गल्ला ला मना नी करी सकदा की परमेस्वरे अपनी दया दिया बजा ने सांझो बचाया। क्योंकि अगर लोक मूसा दी व्यवस्था जो मन्नी करी धर्मी बणी सकदे, तां मसीह जो मरणे दी जरूरत नी थी।

3 हे गलातिया शेहरे दे लोकों, तुहाडे दिमाग खराब होई गियो न, तुहांजो कुनी भटकाई दितया है, क्योंकि मै तुहांजो बडे अच्छे तरीके ने समझाया की यीशु मसीह सूली पर कजो मरया कने उनी कुस कम्मे जो पूरा किता। 2 मिजो इक गल्ल दस्सा, तुहांजो पबित्र आत्मा कियां मिलया? क्या मूसा दी व्यवस्था जो मन्नी करी तुहांजो पबित्र आत्मा मिलया? नि बिलकुल भी नी! तुहांजो पबित्र आत्मा इस ताई मिलया क्योंकि तुसां शुभसमाचार सुणी कने उस पर भरोसा किता। 3 क्या तुहाडा दिमाग खराब होई गया की, तुसां पबित्र आत्मा दे जरिये नोई जिन्दगी शुरू करिरी क्या अपणिया ताकता ला इदा अंत करणा चांदे न? 4 विश्वासी बणने बाद तुसां बडे दुख झेले। मै सच्ची आशा करदा है की ऐ सब कुछ बेकार नी था! 5 जडा तुहांजो उदारता ला पबित्र आत्मा दिन्दा है कने तुहांजो च चमत्कार दे कम्म करदा है, क्या ऐ इसा

बजा ने है की तुसां मूसा दी व्यवस्था दा पालन किता या मसीह दे बारे च शुभसमाचार सुणया कने उस पर भरोसा किता? 6 “हुण अब्राहम दे बारे च ही सोचा, उनी परमेस्वरे पर भरोसा किता, कने इसी ने ही परमेस्वरे अब्राहमे जो धर्मी बणाया।” 7 तां तुहांजो ऐ समझणा चाईदा की जडे लोक अब्राहम साई परमेस्वरे पर भरोसा करंदे न, सै अब्राहम दे सच्चे बंशज न। 8 कने परमेस्वरे पबित्र शास्त्र च बडे पेहले बोलया की, परमेस्वरे होर जातियां जो भरोसे करणे ने धर्मी बणाणा, परमेस्वरे पेहले ही ऐ शुभसमाचार अब्राहमे जो सुणाई दितिया था, की “तेरे जरिये सारे देशां दे लोकों जो आशीष मिलणी।” 9 परमेस्वरे अब्राहमे जो उदे भरोसे दिया बजा ला आशीष दिती, तियां ही जडा कोई भी मसीह पर भरोसा करदा है उसयो पक्का ही अब्राहमे सोगी परमेस्वरे आशीष देणी। 10 पर मूसा दी व्यवस्था च लिखया है, जडा कोई धर्मी होणे ताई व्यवस्था दे नियमा पर भरोसा रखदा है, परमेस्वरे दा श्राप उस पर होंदा है। इस ताई उना सारे लोकों पर श्राप आई गया जडे व्यवस्था जो मन्नी करी परमेस्वरे सामणे धर्मी बणने दी कोशिश करंदे न। क्योंकि कोई भी हर बकत उस व्यवस्था दा पूरी तरीके ने पालन नी करी सकदा। 11 पर ऐ गल्ल सच्च है, की मूसा दी व्यवस्था दा पालन करणे ने कोई भी परमेस्वरे दिया नजरा च धर्मी नी बणी सकदा, क्योंकि पबित्र शास्त्र च लिखया है, “पर अगर कोई भी परमेस्वरे पर भरोसा करदा है, तां परमेस्वरे उसयो धर्मी बणाणा कने हमेशा दी जिन्दगी देणी।” 12 मूसा दी व्यवस्था दा पालन करिरी जिना कने परमेस्वरे पर भरोसा करिरी जीणा दोनो इकोदिया नी है, पर जियां की पबित्र शास्त्र च लिखया है की, जडा कोई इसा व्यवस्था दा पालन करदा है, उनी जिन्दा रेणा। 13 पर मसीह सांझो उस श्राप ला छुड़ाया है जडा व्यवस्था नी मणने दिया बजा ने होंदा है, जालू सूली पर मसीह दी मौत होई तां उनी सांझे पापां दिया बजा ने अपने उपर श्राप जो लेई लिया। क्योंकि पबित्र शास्त्र च लिखया है की जडा कोई सूली पर मरदा है, सै श्रापित है। 14 मसीह ऐसा इस ताई किता, की अब्राहम दी सारी आशीष यीशु मसीह दे जरिये होर जातियां दे लोकों दीकर पुज्जे, कने मसीह पर भरोसा करणे ने सांझो परमेस्वरे दी पबित्र आत्मा मिल्ले, उसा जो देणे दा बायदा परमेस्वरे कितया है। 15 हे मसीह भाईयो, मै इक आम जिन्दगी ला उदाहरण दिन्दा है, जालू दो लोक इक समझौता करंदे न, कने दोनों उस समझौते पर हस्ताक्षर करंदे न, तां ऐसा कोई माणु नी जडा उसयो बदली सके। 16 परमेस्वरे अब्राहम ने बायदा किता की हर कुसी जो तेरे इक बंश दे जरिये आशीष मिलणी, पबित्र शास्त्र च ऐ नी लिखया, की “तेरे बंशजो को” जियां की मते लोकों ताई बोलया, पर ऐ इक माणुऐ दे बारे च गल्ल करदा है, जालू ऐ बोलदा है की “तेरे बंशजो” कने ऐ माणु यीशु मसीह है। 17 मै जडा तुहांजो समझाणा चांदा है सै ऐ ऐ है; की परमेस्वरे अब्राहम सोगी बायदे दे 430 साल बाद मूसा दी व्यवस्था दिती। पर असां ऐ नी बोली सकदे की क्योंकि हुण व्यवस्था है इस ताई परमेस्वरे दे बायदे दी कोई कीमत नी। परमेस्वर दा बायदा हुण भी अटल है कने परमेस्वरे इसयो पूरा करणा। 18 क्योंकि अगर परमेस्वरे लोकों जो मूसा दी व्यवस्था दा पालन करणे दिया बजा ने आशीष दितियो होंदी, तां उनी बायदे जो हटाई देणा था, पर परमेस्वरे अब्राहम जो सै आशीष इस ताई दिती क्योंकि उनी पेहले उसला बायदा

कितया था। 19 तां फिरी व्यवस्था दा क्या कम्म है? मूसा दी व्यवस्था जो तालू दीकर बणी रेणा था, की जालू दीकर की अब्राहम दा बंशज नी आया, जिसदे बारे च परमेश्वरे बायदा कितया था, परमेश्वरे व्यवस्था स्वर्गदूतां दे जरिये मूसा जो दिती, जडा परमेश्वर कने लोकां दे बिच बिचोला था। 20 जालू दो लोकां बिच समझौता होंदा है, तालू समझौता करने बाले दी जरूरत होंदी। पर परमेश्वर इक ही है, कने जालू उनी अब्राहमे ला बायदा किता तां उदे बिच कोई भी बिचोला नी था। 21 तां क्या इदा मतलब ऐ है की मूसा दी व्यवस्था परमेश्वरे दे बायदे दे खिलाफ है? नी कदी भी नी! क्योंकि अगर व्यवस्था सांझो हमेशा दी जिन्दगी देई सकदी, तां असां इदा पालन करिरी परमेश्वरे सामणे धर्मी होई सकदे थे। 22 पर पबित्र शास्त्र ऐ बोलदा है की इस संसारे दे लोक पाप दी शक्ति दे गुलाम न, ताकि परमेश्वरे जडा बायदा कितया है, सै उना लोकां जो देई सके जडे यीशु मसीह पर भरोसा रखदे न। 23 पर मसीह दे ओणे ला पेहले कने उस पर भरोसा करने ला पेहले असां यहूदी लोक मूसा दिया व्यवस्था दे अधीन थे, कने मूसा दे नियम कानून साडी रखवाली करदे थे, कने मूसा दे नियम कनुना सांझो तालू दीकर जेला च रखया जालू दीकर की परमेश्वरे सांझो पर मसीह जो प्रगत नी किता। 24 मसीह दे ओणे दीकर व्यवस्था साडा मार्गदर्शन करने तांई कने साडी देखभाल करने तांई दितियो थी, ताकि असां यीशु मसीह च भरोसा करने ने परमेश्वरे सामणे धर्मी बणी सकन। 25 पर हुण जालू असां मसीह पर भरोसा करदे न, तां हुण सांझो मार्गदर्शन तांई मूसा दे नियम कनुना दी जरूरत नी है। 26 क्योंकि तुसां सारयां मसीह च बपतिस्मा लिया कने मसीह दी जिन्दगी दे अनुसार चलदे न। इस तांई तुसां सारे यीशु मसीह च भरोसा रखणे ला परमेश्वरे दे पुत्र बणी गियो न। 28 मसीह च इक यहूदी या होर जाति या इक गुलाम या इक अजाद माणुऐ च कोई अंतर नी। कने ना कोई मर्द है, ना कोई जनानी है। 29 अगर तुसां सारे यीशु मसीह च इक न, तां हुण तुसां अब्राहम दे परिबारे दा हिस्सा न कने तुसां जो सै सब कुछ मिलणा जिदा परमेश्वरे अब्राहम ने बायदा किता।

4 मेरे बोलणे दा मतलब ऐ है, की पुत्र अपने पिता दिया धन दौलत दा मालिक होंदा है, पर जालू दीकर सै इक छोटा बच्चा ही है तालू दीकर उदे च कने इक गुलाम च कोई फर्क नी होंदा। उदा हले दीकर इस पर हक नी है पर उनी सारे केसी दा मालिक बनणा जडा उदे पिता दा है। 2 सै तालू दीकर घरे बालयां कने देखभाल करने बालयां दे अधिकारां दे थले रेंदा है जालू दीकर सै उसा उमरा दीकर नी पुज्जी जांदा जालू उनी मालिक बणी जाणा। सै उमर उदा पिता तय करदा है। 3 तियां ही असां भी, परमेश्वरे जो जाणने ला पेहले जालू असां बचयां सांई थे, तालू असां इस संसारे दे कुछ रीती रिबाजां दा पालन गुलामा सांई करा दे थे। 4 पर जालू सै सही बकत आई गिया जिसदी परमेश्वरे योजना बणाईयो थी, तां परमेश्वरे अपने पुत्रे जो इस संसार च भेजया, कने इकी जनानिया उसयो पैदा किता, सै इक यहूदी दे रूप च पैदा होया था कने मूसा दी व्यवस्था जो मनदा था। 5 ताकि सै सांझो अजाद करी सके, जडे मूसा दी व्यवस्था दे गुलाम थे। कने उनी सांझो गोद लेईकरी अपने बच्चे बणाई लिया। 6 असां उदे बच्चे न, क्योंकि परमेश्वरे अपने पुत्रे दी पबित्र

आत्मा जो साडे दिले च भेजया है, जडी आत्मा परमेश्वरे जो “मेरा पिता” बोली करी पुकारदा है। 7 इस तांई हुण असां गुलाम नी न, पर असां परमेश्वरे दे बच्चे बणी गियो न; क्योंकि तू परमेश्वरे दा बच्चा है, तां तिजो सै सारा कुछ मिलणा है जडा परमेश्वरे अपने बचयां जो देणे दा बायदा कितया है। 8 जालू तुसां परमेश्वरे जो नी जाणदे थे, उस बकत तुसां उना दे गुलाम थे जडे असल च परमेश्वर है ही नी। 9 पर हुण जालू तुसां परमेश्वरे जो जाणी लिया है या मिजो ऐ बोलणा चाईदा की परमेश्वरे सांझो अपने बच्चे दे रूप च अपनाया है, तां फिरी तुसां कजो कमजोर कने उना बेकार पूराणी शिक्षां दे गुलाम होणे तांई बापस जा दे न? क्या तुहांजो दुबारा उना दे ही गुलाम बणने दी इच्छा है? 10 मै ऐ सुण्या की, तुसां जडे होर जातियां दे भरोसा करने बाले न, यहूदी लोकां दे खास दिना च, मिनयां, मौसमा कने सालां जो ऐ सोची करी मंदे न की इना ला परमेश्वर खुश होंदा है। 11 जडा कुछ तुसां करा दे न उदिया बजा ने चिंता करा दा है, की तुहाडे बिच सेवा कितियो है सै बेकार ना होई जाए। 12 हे मसीह भाईयो, मै तुहांजो ने बिनती करदा है, तुसां सियुदा ही व्यवहार करा जदिया व्यवहार मै करदा है, क्योंकि मै व्यवस्था ला तियां ही अजाद है जियां तुसां होर जाति दे लोक न; तुसां मेरी अच्छे ने देखभाल किती। 13 पर तुहांजो याद होणा, ऐ इक बिमारिया दिया बजा ला था कि मै पैली बरी तुहाडे बाल शुभसमाचार दा प्रचार करणा आया। 14 मेरी बिमारी तुहाडे तांई इक परेशानी थी, पर फिरी भी तुसां मिजो ला नफरत नी किती कने ना ही मिजो दूर जाणा दिता। तुसां मिजो उसी तरीके ने अपनाया जियां तुसां परमेश्वरे दे इक स्वर्गदूत जो या यीशु मसीह जो अपनांदे न। 15 उस बकत तुसां बडे खुश थे! तुहाडी सै खुशी हुण कुथु है, मिजो पूरा यकीन है की, तुसां मेरे तांई सब कुछ बलिदान करी दिन्दे, “ऐथू दीकर की अपणी हखी भी कडी करी मिजो देई दिन्दे।” 16 तां क्या तुसां सोगी सच्च बोलणे दिया बजा ला मै तुहाडा दुशमण बणी गिया? 17 झूठे गुरु तुहांजो अपने सोगी शामिल करने दी पूरी कोशिश करा दे न, पर ऐ भले मकसद तांई नी है; उना दा मकसद तुहांजो मिजो ला लग करणा है, ताकि तुसां उना दे चले बणी जान। 18 हमेशा ही खरे मकसद तांई उत्साही होणा खरा होंदा है कने सिर्फ उस बकत ही नी, जालू मै तुहाडे सोगी होंदा है। 19 हे मेरे बच्चयो, जियां इक जनानी बच्चा जमदे बकत पीडा महसूस करदी है, तियां ही मै इक बरी फिरी तुहाडे तांई दुख झेला दा है। तुहांजो मसीह च मजबूत होई जाणे दीकर, मै इसा पीडा च रेणा चांदा है। 20 मेरी बडी इच्छा है की हुण तुहाडे सोगी रें ताकि मै तुसां ने प्यारे ने गल्ल करी सके, क्योंकि मै असल च नी जाणदा की मै तुसां जो क्या बोलें। 21 जडे मूसा दी व्यवस्था दे गुलाम रेणा चांदे न, बिचार करा की मूसा दे लेख सांझो क्या दसदे न। 22 पबित्र शास्त्र च लिखया है, की अब्राहम दे दो पुत्र थे; उदा इक बच्चा हाजिरा ला पैदा होया, सै इक नोकराणी थी। कने दुज्जा बच्चा सारा ला पैदा होया था, सै उदी घरे बाली थी। 23 अब्राहम दा पुत्र, जडा उसयो नोकराणी हाजिरा ला पैदा होया था, सै सिर्फ माणुऐ दिया योजना ने पैदा होया था। पर अब्राहम दा दुज्जा पुत्र जडा सारा ला पैदा होया था, उदा जन्म परमेश्वरे दे बायदे जो पूरा करने तांई होया था। 24 इना दोनों जनानियां दी तुलना दो बाचां ने करी सकदे न, सै बायदा जडा परमेश्वरे इस्राएल दे लोकां सोगी सीनै पहाडे च

किता था, सै हाजिरा साई है। सै उना बचयां जो पैदा करदी है जडे गुलाम बणदे न। 25 हाजिरा सैने पहाड जो द्रशांदी है जडा अरब देश च है। सै अज दे यरूशलेम शेहर साई है जिदे लोक अपने बचयां समेत मूसा दिया व्यवस्था दे गुलाम न। 26 पर स्वर्गीय यरूशलेम अब्राहम दी घरे बाली सारा साई है, कने उदे बच्चे मूसा दिया व्यवस्था दे गुलाम नी न। ऐ यरूशलेम साडी मां साई है, जडी भरोसा करदी है। 27 क्योंकि पबित्र शान्न च लिखया है, “हे जनानियों तुसां जिना दे कदी बच्चे नी होऐ,” कने जिना कदी बच्चे जमणे दी पीडा जो कदी महसूस नी किता, चिल्ला कने खुश होआ! क्योंकि छडियो जनानिया दे बच्चे, उसा जनानिया दे बचयां ला जादा न जडी अपने घरे बाले सोगी रेंदी है। 28 हे मसीह भाईयो, असां भी अब्राहम दे पुत्र इसहाक साई न, जडे परमेश्वरे दे बायदे दे अनुसार पैदा होयो न कने परमेश्वरे दी ओलाद बणी गे। 29 पर हुण तुहांजो सै लोक सतांदे न जडे लोक चांदे न की तुसां व्यवस्था जो मन्ना, तियां ही जियां शरीर दिया इच्छा ने पैदा होऐ इश्माएले आत्मा दी इच्छा ने पैदा होऐ इसहाक जो सताया था। 30 पर पबित्र शान्न च लिखया है, “गुलाम जनानी कने उदे पुत्रे जो दूर भेजी दे, क्योंकि गुलाम जनानिया दे पुत्रे जो पिता दी धन दौलत चे कुछ नी मिलणा चाईदा; ऐ पिता दी घरे बालिया दे पुत्रे जो मिलणा चाईदा।” 31 इस ताई हे मसीह भाईयो, असां गुलाम जनानिया दे बच्चे नी न, जिना जो मूसा दे नियम कनुना जो मण्णा जरूरी है। पर असां उसा जनानिया दे बच्चे न, जडी पिता दी घरे बाली है।

5 मसीह सांझो बचाई लिया है ताकि सांझो मूसा दिया व्यवस्था दा पालन करणे ताई गुलामा साई जिणे दी जरूरत नी है। इस ताई अजाद बणी रिया कने व्यवस्था जो मण्णे ताई अपने आप जो दुबारा ला गुलाम बणना मत दिया। 2 मै पैलुस तुहांजो जडा बोलदा है, उसयो सुणा की परमेश्वरे दे सामणे धर्मी होणे ताई अगर खतना करांगे, तां मसीह जडा कुछ कितया है, उसला तुहांजो कोई फायदा नी होणा। 3 मै दुबारा चेताबनी करी बोलदा है, की हर इक माणु जडा ऐ सोची करी खतना करवांदा है, की परमेश्वरे दिया नजरा च धर्मी बणी सके, तां उसयो मूसा दिया व्यवस्था दे हर इक हुकमे जो मण्णा चाईदा। 4 तुसां जडे मूसा दी व्यवस्था जो मन्नी करी धर्मी बणना चांदे न, तां तुसां अपने आप जो मसीह कने उदे अनुग्रह ला लग करा दे न, जिसला परमेश्वर तुहांजो बचाई सकदा है। 5 क्योंकि सांझो पबित्र आत्मा दिया तरफा ला पूरी उम्मीद है, की परमेश्वरे सांझो धर्मी दे रूपे च अपनाई लेणा क्योंकि असां परमेश्वरे पर भरोसा करदे न। 6 अगर तुसां यीशु मसीह दे चले न, तां इसा गल्ला ला कोई फर्क नी पोंदा की तुहाडा खतना होया है या नी, जडी गल्ल मायने रखदी सै ऐ है की असां मसीह पर भरोसा कने परमेश्वरे कने दुज्जे लोकां ताई प्यार रखदे न। 7 तुसां तां मसीह सोगी अपने रिशते च अच्छे ने अग्रे बदा दे थे, हुण तुसां जो मसीह दी सच्ची शिक्षा पर भरोसा करणे ला कुसी जो भी रोकणा नी देणा चाईदा था। 8 ऐसी झूठी शिक्षा परमेश्वर नी दिन्दा, जिनी तुहांजो अपने बच्चे होणे ताई चुण्या है। 9 ऐसी झूठी शिक्षा इयां फेला दी है, जियां की इक कहाबत है, “की थोडा दिया खमीर पुरे गुनयो आटे जो खमीर करी दिन्दा है।” 10 मै परमेश्वरे पर भरोसा करदा है की उनी तुहांजो झूठी शिक्षा पर भरोसा करणे ला बचाई रखणा है। बल्कि तुसां मेरियां शिक्षां जो

मण्णा है। क्योंकि जडे तुहाडे ताई परेशानी खडी करदे न सै कोई भी कनी हो परमेश्वरे उसयो सजा देणी। 11 पर हे मसीह भाईयो, मै ऐ प्रचार करदा है, की खतना जरूरी नी है, कने इसा बजा ने ही यहदी लोक मिजो सतांदे न, अगर मै ऐ प्रचार नी करे की उद्धार सिर्फ यीशु मसीह दी सूली ने ही है, तां कुनी भी नराज नी होणा। 12 खरा होंदा, की जडे तुसां जो झूठी शिक्षा दिन्दे न, सै अपने आपे जो नामद बणाई लेंदे। 13 हे मसीह भाईयो, तुहांजो परमेश्वरे दे जरिये अजाद होणे ताई चुण्या था, इस ताई सांझो मूसा दी व्यवस्था जो मण्णे दी जरूरत नी है। पर अपनी आजादी जो शरीर दिया इच्छा जो पूरा करणे दा जरिया मत बणा, पर इक दुज्जे ने प्यार कने सेवा करा। 14 क्योंकि सारी व्यवस्था दा निचोड इकी ही हुकमे च पूरा होई जांदी है, “तू अपने पड़ोसियां ने अपने साई प्यार रख।” 15 पर अगर तुसां इकी दुज्जे जो डंगरा साई मारदे बडदे न, तां तुसां जो ध्यान देणा चाईदा की कुथी तुसां इक दुज्जे दा सत्यानाश नी करी देन। 16 पर मै तुहांजो बोलदा है, की तुहांजो पबित्र आत्मा दी अगुवाई ने जिणे दी जरूरत है, ताल तुसां सै बुरे कम्म नी करणे जिना कम्मा जो तुहाडा पापी सभाव कराणा चांदा है। 17 क्योंकि सै कम्म जडे साडा पापी सभाव सांझो ला करबाणा चांदा है, ऐ सेई चीजां न जडी पबित्र आत्मा नी चांहदी की असां नी करन, क्योंकि ऐ दोनों इक दुज्जे दे दुश्मन न; इस ताई हमेशा उना खरे कम्मा जो नी करी सकदे जडे असां करबाणा चांदे न। 18 कने अगर तुसां पबित्र आत्मा दी अगुवाई ला जिन्दगी जिन्दे न, तां तुसां मूसा दिया व्यवस्था दे गुलाम नी न। 19 तुसां दिखी सकदे न की पापी सभाव क्या-क्या करदा है, मतलब की व्यभिचार, गंदे कम्म, लुचापन। 20 मूर्तिपूजा, टूणा, बैर, लडाई, जलन, गुस्सा, बिरोध, फूट, अधर्म। 21 डाह, नशे च मतवाले होणा, ऐश मस्ती, कने ऐसे होर भी बडे कम्म करदे न, इना कम्मा दे बारे च मै चैताबनी दे दा है जियां मै पेहले भी तुहांजो दिती थी, की ऐसे कम्मा करणे बालयां जो परमेश्वरे दे राज्य दे वारिस नी होणे। 22 सै गुण जडे परमेश्वरे दी आत्मा दे जरिये पैदा होंदे न, सै न प्यार, खुशी, शांती, सबर, कने दया, भलाई, दुज्जयां ताई भरोसेमंद, 23 दीनता, कने संयम; ऐसे व्यवहार पर रोक लाणे ताई कोई भी व्यवस्था नी है। 24 सै लोक जडे यीशु मसीह ने रिशता रखदे न, उना अपनी पाप भरी जिन्दगिया दिया बुरियां इच्छां जो सूली पर चढाई दितया है। 25 क्योंकि परमेश्वरे दिया पबित्र आत्मा सांझो इक नोई जिन्दगी दितियो है, इस ताई सांझो पबित्र आत्मा दी अगुवाई ने जिना चाईदा। 26 सांझो घमंड नी करणा चाईदा, कने इक दुज्जे ला जलन नी करणी चाइदी।

6 हे मसीह भाईयो, अगर कुनी माणुऐ कोई पाप किता है, तां तुसां जडे पबित्र आत्मा दी अगुवाई ने चलदे न, उसयो प्यारे ने सही रस्ते पर बापस लोणे ताई उदी सहायता करा, ध्यान रखा की कुथी तुसां अपु ही उस पाप च ना पेई जान। 2 मुश्किलां दा सामणा करदे बकत इक दुज्जे दी सहायता करा। इयां करिरी तुसां मसीह दी व्यवस्था जो मंदे न। 3 अगर तुहांजो लगदा है कुसी दी सहायता करणे ताई तुसां बडे जरूरी न तां तुसां सिर्फ अपने आप जो सुख बणा दे न। तुसां इतणे भी जरूरी नी न। 4 पर हर इक माणु अपने कम्मा जो परखे की क्या सै खरे न, अगर खरे न तां अपने कम्मा पर घमंड करी

सकदा है। पर उसयो अपने कम्मा दी तुलना दुज्जे लोकां दे कम्मे सोगी नी करणी चाइदी। 5 सांझो चे हर इक जणा अपने कम्मा दा अपु जिम्मेबार है। 6 ऐ जरूरी है की जडे लोक परमेश्वरे दे बचन जो सिखांदे न, उना दे लोकां जो उना ला खांणे कने पैसे दी सहायता मिलणी चाइदी। 7 अपने आप जो धोखा मत दिया, कोई भी कदी भी परमेश्वरे जो धोखा नी देई सकदा है क्योंकि माणु जडा रांदा है सेई बडदा है। 8 क्योंकि अगर कोई माणु सै करदा है जडा उदा पापी सभाव चांदा है, उसयो हमेशा दी मौत मिलणी है पर जडा माणु पबित्र आत्मा दी इच्छा जो पूरा करदा है, उसयो पबित्र आत्मा हमेशा दी जिन्दगी देणी। (aiōnios g166) 9 असां खरे कम्म करणे च हिम्मत ना छडन, क्योंकि अगर असां कदी हार नी मनगे, तां परमेश्वरे अपने बक्ते पर सांझो इनाम देणा। 10 इस तांई जालू भी सांझो मोका मिल्ले सारे लोकां सोगी भलाई करणी चाइदी; खासकर विश्वासी भाई बेहणा सोगी। 11 ध्यान दिया की कियां बड़े-बड़े अखरां च मै तुहांजो अपने हथां ला ऐ लिखया है। 12 इस तांई की यहदी तुहांजो अपनाई लेन, सै तुहांजो खतना करबाणे तांई बोलदे न, सै ऐसा इस तांई करदे न ताकि लोक उना जो ऐ प्रचार करणे दिया बजा ने तंग ना करन की परमेश्वर लोकां जो सिर्फ इस तांई बचांदा है क्योंकि सै भरोसा करदे न की मसीह सूली पर मरया। 13 क्योंकि ऐथू दीकर की यहदी विश्वासी भी मूसा दी व्यवस्था जो नी मंदे, पर सै चांदे न की तुहाडा खतना होऐ ताकि सै दुज्जे यहदियां सामणे घमंड ने ऐ बोली सकन की तुहाडा खतना उना दिया बजा ने होया है। 14 अगर मै घमंड करदा तां मै इसा गल्ला पर घमंड करदा की साडा प्रभु यीशु मसीह साडे तांई सूली पर मरया। जडा कुछ भी उनी कितया है, उदी बजा ने संसार दियां कुसी भी चिजा दा बश नी रिया, कने मिजो च हुण धरती दे कम्मा जो करणे दी कोई इच्छा नी है। 15 क्योंकि ना खतना, कने ना जिसदा खतना नी होया कुछ मायने रखदे न, जरूरी ऐ की क्या असां इक नोई सृष्टि च बदल्यो न। 16 परमेश्वर उना सारे लोकां पर दया करे कने अपनी शांति दे, जडे इस नियम जो मंदे न, कने उना जो आशीष देणी क्योंकि सै परमेश्वर दे चुणयो लोक न। 17 अगो जो मिजो कोई दुख ना दे, क्योंकि मेरे शरीर च जडे दाग न सै दसदे न की मै यीशु दा सच्चा सेवक है। 18 हे मसीह भाईयो, मै प्राथना करदा है की साडे प्रभु यीशु मसीह दा अनुग्रह हमेशा तुसां सबना पर होँदा रे। आमीन।

इफिसियों

1 मैं पौलुस, परमेश्वर दिया इच्छा ने यीशु मसीह दा प्रेरित है, ऐ चिट्ठी इफिसस शहर च रेणेबाले परमेश्वर दे पबित्र लोकां जो लिखा दा है। **2** मैं प्राथना करता है की साडा पिता परमेश्वर कने प्रभु यीशु मसीह तहांजो पर अनुग्रह कने शांति बणाई रखे। **3** साडे परमेश्वर कने प्रभु यीशु मसीह दे पिता दी महिमा हो, जिनी सांझो मसीह दे जरिये स्वर्ग ला मिलणे बालियां हर तरा दियां आत्मिक आशीषां दीतियां न। ऐ साडी मसीह सोगी एकता दिया बजा ला होया है। **4** मसीह सोगी इक होई जाणे दिया बजा ने परमेश्वर सांझो इस संसारे जो बणाणे ला पेहेले ही चुणी लिया है, ताकि असां उदे सामणे पबित्र कने निर्दोष होई सकन। **5** क्योंकि परमेश्वर सांझो ला प्यार किता इस ताई परमेश्वर बडे पेहेले फेसला लिया की यीशु मसीह दे जरिये सांझो परमेश्वर दी ओलाद होणे ताई गोद ले। परमेश्वर ऐ अपणिया इच्छा ला कने खुशिया ला किता। **6** परमेश्वर ऐसा इस ताई किता की असां उदे अदभुत अनुग्रह ताई उदी स्तुति करन, जडा उनी सांझो मुफ्त च देई दिता क्योंकि असां उदे प्यारे पुत्रे ने जुडयो न। **7** यीशु मसीह दे खून बहाणे दिया बजा ने असां अजाद होयो न। मतलब की साडे पाप माफ किते न, परमेश्वर दा अनुग्रह बडा महान है जडा उनी सांझो पर दसया। **8** जिसयो परमेश्वर अपणे ज्ञान कने समझ ने सांझो पर दसया। **9** परमेश्वर सेई किता, जडा उनी गुप्त रखया था, कने उस गुप्त योजना दे बारे च दसया जडी उनी पेहेले ला ही मसीह दे जरिये पूरा करणे दा फेसला लिया था। **10** जालू इस योजना जो पूरा करणे दा सही बकत ओगा, तालू परमेश्वर स्वर्ग कने धरती दी सारियां चीजां जो मसीह दे अधीन करणा, ताकि सब कुछ मसीह दे हक च हो। **11** परमेश्वर असां यहूदियां जो भी मसीह सोगी जोडी करी अपने लोक होणे ताई चुणी लिया क्योंकि शुरू ला उदी ऐई योजना थी। परमेश्वर सब कुछ अपणिया इच्छा ने ही करता है। **12** असां यहूदी पेहेले लोक न, जिना मसीह पर आस रखी, कने सांझो इस ताई चुणया था की असां परमेश्वर दी महिमा कने स्तुति करन। **13** तुसां सच्चा संदेश सुणया है, जडा इस बारे च दसदा है की परमेश्वर कियां तुहाडा उद्धार किता जालू तुसां यीशु मसीह पर भरोसा किता था, तां परमेश्वर तहांजो पबित्र आत्मा दीती जडा उनी अपने लोकां जो देणे दा वायदा कितया था। ऐ दसणे ताई की तुसां परमेश्वर दे न। **14** परमेश्वर सांझो पबित्र आत्मा दिता, जडा इसा गल्ला जो पक्का करता है की परमेश्वर जडियां होर अच्छी चीजां दा वायदा कितया है, सै भी सांझो देणियां, ऐ तालू होणा जालू परमेश्वर अपने लोकां जो पूरी तरहा ने छुटकारा करणा, परमेश्वर दी महिमा कने स्तुति हो। **15** इसा बजा ने, जालू ला मैं यीशु मसीह पर तुहाडे भरोसे कने परमेश्वर दे लोकां ताई तुहाडे प्यार दे बारे च सुणया, **16** तालू ला मैं तुहाडे ताई परमेश्वर दा धन्यावाद करता है कने अपणिया प्राथना च तहांजो याद करता है। **17** मैं प्राथना करता है की परमेश्वर जडा साडे प्रभु यीशु मसीह दा महिमामय पिता है, तहांजो आत्मिक ज्ञान कने समझ दे जिसने तुसां परमेश्वर जो अच्छे ने जाणी सकन। **18** कने मैं ऐ भी प्राथना करता है की सै सच्च जो समझणे ताई तुहाडी सहायता करे ताकि तुसां उस आस दे बारे च जाणी सकन जडी तहांजो दीती थी जालू

परमेश्वर तहांजो चुणया था, कने तुसां उना महिमामय आशीषां जो समझी सकन जिसदा वायदा परमेश्वर अपने लोकां ने कितया था। **19** मैं चांदा है की तुसां उदी महानता कने उदी शक्तिया दे बारे च जाणी सका, जडी परमेश्वर बाल साडे ताई है जडे यीशु मसीह पर भरोसा रखदे न। ऐ सेई महान शक्ति है। **20** जिनी मसीह जो मरयां चे जिन्दा किता कने स्वर्गीय जगा च सजे कने आदर बालिया जगा च बठाया। **21** ओशु परमेश्वर उसयो हर तरा दी प्रधानता, हक कने शक्ति, कने प्रभुता, कने उदी उपादी हर इक अधिकारिये दिया उपादिया ला उपर है, जडी ना सिर्फ इस लोक च पर ओणे बाले लोक च भी उपर ही रेणी। (aiōn g165) **22** कने परमेश्वर इना सारियां चीजां जो यीशु मसीह दी शक्ति दे अधीन करी दिता कने ऐ सेई है जिसयो परमेश्वर सारे भरोसा करणे बालयां पर अगुवा बणाई दिता। **23** असां भरोसा करणे बाले मसीह दे शरीर दे अंगा साई न, कने मसीह साडे बिच पूरी शक्ति दा इस्तेमाल करता है, जियां सै अपनी शक्तिया दा इस्तेमाल पूरी दुनिया च करता है।

2 जालू तुहाडे बाल परमेश्वर दिया तरफा ला नोई जिन्दगी नी थी, तालू तुसां बुरे कम्मा कने पापां दिया बजा ने मरयो लोकां साई थे। **2** उस बकत तुसां संसारे दे लोकां साई चलदे थे, जडे परमेश्वर जो नी जाणदे थे कने तुसां शैताने दे हुकमा जो मंदे थे, मतलब की उस प्रधान दा जडा अम्बरे च बुरियां आत्मा पर शासन करता है, जडा हुण भी उना लोकां दे मने च कम्म करा दा जडे परमेश्वर दे हुकमा जो नी मंदे। (aiōn g165) **3** असां भी उना साई ही जिन्दे थे कने अपने पापी सभाब दियां इच्छा जो पूरा करदे थे कने जडियां भी साडे शरीर दियां इच्छां कने बुरे बिचार सांझो ला करबाणा चांदे थे, असां सेई करदे थे कने बाकी सारयां साई असां भी बुरे थे कने परमेश्वर दी सजा दे अधीन थे। **4** पर परमेश्वर बडा दयालू है। अपने उस बडे प्यार दिया बजा ने जिसने उनी सांझो ने प्यार किता; **5** जालू असां मसीह पर भरोसा नी कितया था, तालू असां बुरे कम्मा कने पापां दिया बजा ने मरयो लोकां साई थे। तालू परमेश्वर सांझो जिन्दगी दीती जालू उनी मसीह जो मरयां चे जिन्दा किता; परमेश्वर दे अनुग्रह ने ही तुहाडा उद्धार होया है। **6** क्योंकि यीशु मसीह सोगी जुडे होणे दिया बजा ने, परमेश्वर सांझो मरयां चे जिन्दा किता, कने सांझो स्वर्गीय जगां च मसीह सोगी बेठाया। **7** परमेश्वर ऐसा इस ताई किता ताकि ओणे बाले दिना च संसारे दे लोकां जो दस्सी सके की उदा अनुग्रह किताणा महान है, उस कम्मे दिया बजा ने जडा यीशु मसीह साडे ताई किता है। (aiōn g165) **8** क्योंकि जालू तुसां भरोसा किता तां परमेश्वर अपने अनुग्रह ने तहांजो बचाई लिया है, कने तुसां अपने आप जो नी बचाया पर ऐ परमेश्वर दा दान है; **9** कने ना ही तुहाडे किते भले कम्मा दिया बजा ने है कने इस ताई तुहाडे बाल घमंड करणे दी कोई बजा नी है। **10** क्योंकि सांझो परमेश्वर नोए लोकां दे रूप च बणाया है ताकि असां यीशु मसीह दे उना भले कम्मा जो करन जिना जो परमेश्वर पेहेले ला साडे ताई तैयार कितया है। **11** इसा बजा ने याद रखा, की तुसां होर जातियां दे रूप च पैदा होयो न, कने यहूदी लोक तहांजो ऐ बोली करी मजाक उडायी की तुसां खतना नी करबांदे न कने असां करबांदे न। पर उना दा ऐ रिबाज सिर्फ उना दे शरीरां करदे न। **12** तुसां लोक उस बकत यीशु मसीह जो नी जाणदे न कने परमेश्वर दे चुणयो होयो इस्लामी लोकां च शामिल नी थे

कने तुसां उना चीजां दे हिस्सेदार नी थे, जिना दा वायदा परमेस्वर दे यहदियां ने कितया था, कने तुहाड़े बाल कोई आस नी थी कने इस संसारे च बिना परमेस्वर दे रेंदे थे। 13 पर हण तुसां मसीह सोगी इक न कने यीशु मसीह च उदे खून बहाणे दे जरिये नेड़े आयो न। 14 क्योंकि यीशु मसीह दिया बजा ने साड़े बिच शांति होई। पेहले ऐसा जियां इकी दिबारा यहदियां कने होर जातियां जो लग करी दितया था। सै इक दुज्जे ला नफरत करदे थे, पर हण मसीह उसा दिबारा जो डाई दितया है कने यहदियां कने होर जातियां जो इक करी दितया है। 15 अपणी मौत दे जरिये उनी मूसा दी व्यवस्था दे सारे नियमा कने रिबाजां जो खत्म करी दिता है ताकि सै यहदियां कने होर जातियां दे बिच शांति करी सके ताकि इक नोआ झण्ड बनाई सके, 16 कने अपणी मौत दे जरिये मसीह यहदियां कने होर जातियां जो इक करी दिता कने उना जो परमेस्वर मिलाई दिता, इयां करिके इना दोनो जातियां दिया नफरत जो खत्म करी दिता। 17 कने मसीह आई करी होर जातियां जो जड़े परमेस्वर ला दूर थे, कने यहदियां जो जड़े उदे नेड़े थे, उना जो मेल जोल दा शुभसमाचार सुणया। 18 यीशु मसीह दिया बजा ने ही असां सारे इक ही पबित्र आत्मा ने पिता परमेस्वर बाल आई सकदे न। 19 इस तांई होर जातियो, तुसां हण परदेसी या मुसाफिर नी रे, पर हण तुसां परमेस्वर दे लोकां सांई स्वदेसी कने परमेस्वर दे परिवारे दे लोक बणी गियो न। 20 कने प्रेरितां कने परमेस्वर दे संदेश देणेबालयां दी नियां पर तुसां इक घरे सांई न जिसदा कुंणे दा पथर यीशु मसीह अपु ही है। 21 यीशु मसीह ही है जडा घरे जो इक सोगी जोड़ी करी रखदा है कने इसयो परमेस्वर तांई इक पबित्र मंदिर दे रूप च बणादां है, 22 हे होर जाति दे विश्वासियो क्योंकि तुसां मसीह सोगी इक न, इस तांई तुहांजो भी होर लोकां ने जोड़या जा दा है। ताकि तुसां इक ऐसा घर बणी जान जिथू परमेस्वर दी आत्मा रेंदी है।

3 इसा बजा ने, मैं पौलुस तुहाड़े तांई प्राथना करदा है। मैं जेला च कैद है क्योंकि मैं होर जातियां च प्रभु यीशु मसीह दा शुभसमाचार दा प्रचार किता। 2 तुसां पक्का सुणया है की परमेस्वर अपने अनुग्रह दे जरिये तुहांजो शुभसमाचार दा प्रचार करणे दी जिम्मेदारी मिजो दितियो है। 3 जियां की मैं पेहले तुहांजो थोड़े अखरां च लिखया था, की परमेस्वर मिजो अपु ही उस गुप्त योजना जो दसया है। 4 जियां ही तुसां चिड़ी पढगे, तालू ही तुहांजो पता लगणा की मैं उस गुप्त योजना जो कितणी अच्छे तरिके ने समझदा है। 5 इसा गुप्त योजना दे बारे च पुराणे बक्ते दे लोकां जो नी दसया था, पर हण परमेस्वर पबित्र आत्मा दे जरिये अपने प्रेरितां कने परमेस्वर दे संदेश देणेबालयां जो खुलासा किता है। 6 परमेस्वर दी गुप्त योजना ऐ है, की यीशु मसीह दे शुभसमाचार दे जरिये होर जातियां भी उसा ही विरासत च हिस्सेदार होणा जडी विरासत यहदियां बाल होणी, कने सै इक ही शरीर दे हिस्से कने परमेस्वर दे उना वायदयां दे हिस्सेदार होणे जड़े उनी यहदियां ने किते। 7 कने परमेस्वर जडा मिजो मुफ्त अनुग्रह दा तोफा दितया है, जिसने मिजो सौभाग्य मिलया की मैं उदे शुभसमाचार सुणाने दी सेवा करूं। 8 मैं परमेस्वर दे सारे लोकां च सारयां ला घट काबिल है, पर परमेस्वर दे अनुग्रह ने मिजो ऐ

सौभाग्य मिलया की मैं होर जातियां जो मसीह दी उस हमेशा दी आशीष दा शुभसमाचार सुणाई सके जडा साड़ी सोच ला बाहर है, 9 कने हर कुसी जो ऐ गुप्त योजना समझाई सके, जिसयो परमेस्वर जडा सारियां चिजां जो बणाने बाला है, शुरू ला ही गुप्त रखया था। (aiōn g165) 10 परमेस्वर दा मकसद था, की हण कलीसिया दे जरिये परमेस्वर दी अनन्त बुद्धि दा ज्ञान उना प्रधाना कने अधिकारियां पर प्रगट हो जड़े अम्बरे दे अणदिखियां जगां च राज करदे न। 11 परमेस्वर संसार जो बणाने ला पेहले इसदी योजना बनाईयो थी, जिसयो उनी यीशु मसीह दे जरिये पूरा किता। (aiōn g165) 12 मसीह सोगी जुड़ने दिया बजा ला कने उस साड़े भरोसे दिया बजा ला हण असां परमेस्वर दिया हजुरी च हिम्मत कने भरोसे ला आई सकदे न। 13 इस तांई मैं बिनती करदा है की जड़े दुख मिजो तुहाड़े तांई होआ दे न, उना दिया बजा ला सांझो होसला नी छडणा चाईदा क्योंकि ऐ सब कुछ तुहाड़े फायदे तांई है। 14 इस तांई मैं पौलुस गोड़े भार बेईकरी तुहाड़े तांई पिता परमेस्वर ला प्राथना करदा है। 15 सै सेई है जडा मसीह पर भरोसा करणे बाले परिवारां दा पिता है, जडा स्वर्ग च है कने धरती पर है, 16 मैं प्राथना करदा है की सै अपणिया महिमामय आशीषां च तुहांजो ऐ दान देई सके की उदिया आत्मा दिया शक्तिया ने तुसां अपणी आत्मा जो मजबूत करन, 17 भरोसे दे जरिये मसीह तुहाड़े अंदर बसे। मैं प्राथना करदा है की परमेस्वर कने तुहाडा इक दुज्जे तांई प्यार तुहांजो मजबूत बणाए कने तुहांजो पोणे ला बचाये। 18 कने परमेस्वर दे सारे लोकां सोगी, तुहांजो ऐ पता लगणा की मसीह सांझो ने कितणा प्यार करदा है, जिसदी कोई सीमा नी। 19 कने मैं प्राथना करदा है की तुहांजो मसीह दे उस प्यारे दा पता लग्गे जडा माणुआं दिया समझा ला बाहर है, ताकि तुहाडा चरित्र परमेस्वर दे चरित्र सांई बणी सके। 20 परमेस्वर दी शक्ति सोगी जडा सांझो च कम्म करा दा है, साड़े मंगणे या सोचणे ला भी जादा परमेस्वर करी सकदा है। 21 उदी महिमा कलीसिया च कने मसीह यीशु च हमेशा कने केई पिढियाँ-पिढियां दीकर होंदी रे। आमीन। (aiōn g165)

4 इस तांई मैं जडा प्रभु यीशु दी सेवा करणे दिया बजा ला जेला च केदी है, तुहांजो ने बिनती करदा है, की जिसा बुलाहट सोगी परमेस्वर तुहांजो अपने लोक बणने तांई सदया है, उसा दे काबिल अपणी जिनदगी जीन, 2 मतलब की सारिया दया ने कने प्यारे ने, कने सबर रखीकरी इकी दुज्जे दे व्यवहार जो सेहन करा, 3 ऐसा करणे की कोशिश करदे रिया ताकि तुसां लगातार इक दुज्जे ने मिली झूली करी रेन, क्योंकि तुसां परमेस्वर दिया आत्मा जरिये इक कितयो न। 4 असां सारे विश्वासी इक ही शरीर दे अंगा सांई न, कने असां सारयां जो इक ही पबित्र आत्मा मिलया है। जियां तुहांजो इक आस दिती थी, जालू तुहांजो परमेस्वर दे लोक बणने तांई चुणया था। 5 असां सबना दा इक ही प्रभु है, असां सिर्फ यीशु मसीह पर ही भरोसा करदे न, असां सारयां जो इक ही बपतिस्मा मिलया है, 6 कने इक ही परमेस्वर है जडा सब लोकां दा पिता है, सै असां सारयां पर राज करदा है, सै असां सारयां दे जरिये कम्म करदा है, कने सै असां सारयां च रेंदा है। 7 पर मसीह सांझो चे हर इकी जो उदे माफ दे अनुसार या उदारता दे कम्म करणे तांई लग-लग कने खास काबलियां दितियां न। 8 इस तांई पबित्र शास्त्र च लिखया है, “सै

उचिया जगा च चढ्या, कने सै अपने सोगी केई कैदियां जो लेई गिया, कने माणुऐ जो दान दिते।” 9 जालू पबित्र शास्त्र बोलदा है की, सै उचिया जगा च चढ्या, इदा मतलब सिर्फ ऐ है की, सै धरतिया दे सबते निचलिया जगां च उतरया भी था। 10 इस ताई मसीह जडा थले आया, कने सै सेई है जडा स्वर्ग च सबना ला उच्चि जगा पर जाई करी बेई गिया। ताकि सै हर जगा होई सके। 11 ऐ मसीह था जिनी ऐ जिम्मेदारी कलीसिया जो दिती: उनी थोडयां जो प्रेरित बनाया, कने केईयां जो परमेश्वरे दा संदेश देणेबाला बनाया, कने केईयां जो शुभसमाचार सुणाने बाला, कने केईयां जो रखबाला, कने शिक्षक बनाया। 12 इना दी जिम्मेबारी ऐ है, की सै परमेश्वरे दे लोकां जो उदा कम्म करणे ताई तैयार करन कने मसीह दा शरीर जडा विस्वासियां दी मंडली है, सै मजबूतिया ला बददी जाए। 13 ऐ तालू दीकर होंदा रेणा जालू दीकर की असां अपने भरोसे कने परमेश्वरे दे पुत्रे दे बारे च अपनी समझ च इक होई जांदे न। तालू असां काबिल होई जाणा, जियां की मसीह है कने असां पूरी तरा ने उदे सांई होई जाणा। 14 ताकि असां हुण बचयां सांई नी रेन, हुण असां उना किस्तियां सांई नी होन जिना जो लेहरां अग्रे पिच्छे धकेलदियां कने जिस पासे होआ चलदी उस पासे चली पोंदिया न। इदा मतलब है की सांझो धोखेबाज लोकां दी उना झूठी शिक्षा च नी फसणा चाईदा, जडियां सच्च लगदियां न। 15 पर प्यारे ने सच्च बोली करी कने सांझो हर तरहा ने काबिल होणा चाईदा ताकि असां मसीह सांई होई जान, जडा अपना शरीर दा, मतलब की कलीसिया दा सर है। 16 असां सारे जडे मसीह पर भरोसा करदे न, उदे शरीर दे अंगा सांई न। जियां इक माणुऐ दा शरीर उदे सारे जोडा ने इक सोगी जुडी करी रेंदा है, कने जालू शरीर दा हर इक अंग ठीक तरीके ने कम्म करदा है तां शरीर बड्दा कने मजबूत होंदा है; तियां ही जालू सांझो च हर इक उस कम्मे जो करदा है जडा मसीह सांझो दितया है तां असां मजबूत कने काबिल बनना कने इक दुज्जे ने होर जादा प्यार करणा। 17 इस ताई उस अधिकारे सोगी जडा मिजो प्रभुऐ दितया है, मै तहांजो ऐ दसदा है, की भरोसा नी करणे बाले लोकां सांई, तुसां बेकार बिचारां सोगी अपनी जिन्दगी मत जिया। 18 क्योंकि सै समझणे दे काबिल नी न, कने उना दी नासमझी दिया बजा ने जडी उना च है कने सुणने ला मना करणे दिया बजा ने सै उस जिन्दगी ला लग होई गियो न जडा परमेश्वर दिन्दा है; 19 क्योंकि उना जो हुण शर्म नी ओदी, इस ताई उना बुरे कम्म करणे ताई अपु जो बदली लिया है, सै लगातार हर तरा दे बुरे कम्म करदे रेंदे न, कने सै कदी भी इना चीजां जो छडणा नी चांदे न। 20 पर तुसां इस तरा दा व्यवहार करणा नी सिखया जालू तुसां मसीह दे बारे च सिखया। 21 जडा कुछ तुसां यीशु मसीह दे बारे च सुणया है कने जडा कुछ तुहाडे गुरूआं तहांजो सिखाया है, सै पक्का ही उदा सच्चा संदेश है। 22 तुहाडे गुरूआं तहांजो उस तरिके जो छडणे दी शिक्षा दिती, जिसदे अनुसार तुसां व्यवहार करदे थे। तुहाडियां बुरियां इच्छा तहांजो धोखा दिता कने तुहाडी जिन्दगी खराब करी दिती। 23 हुण तहांजो परमेश्वरे जो तुहाडे सोचणे दे तरीके जो बदलना देणा चाईदा, 24 कने परमेश्वरे तहांजो इक नोआ माणु बनाया है। इस नोऐ माणुऐ जो परमेश्वरे सांई बणने ताई बनाया है। मतलब की उसयो असल च धर्मी कने पबित्र होणे ताई बनाया है। 25 इसा बजा ने

झूठ बोलणा छडी करी हर इक अपने साथी विस्वासी ने सच्च बोले, क्योंकि असां सारे इक ही शरीर दे अंग न। 26 अगर गुस्सा होई जान, तां ध्यान रखा की तुसां पाप ना करन: दिन मुकणे ला पेहले तुसां गुस्सा होणा बंद करी दिया। 27 कने तुसां शैताने जो धोखा देणे दा मौका मत दिया। 28 चोरी करणे बाला फिरी चोरी न करे; पर उसयो अपने हथां ने इमानदारिया ने कम्म करणा चाईदा, ताकि गरीब लोकां दी सहायता करणे ताई उस बाल कुछ हो। 29 कोई गंदी गल्ल तुहाडे मुऐ ला ना निकले, पर उना गल्लां जो बोला जडियां लोकां तांई जरूरी न, जडियां की उना जो भरोसे च मजबूत करणे च सहायता करन। तालू तुसां जडा कुछ भी बोलगे उनी तुहाडे सुणने बालयां दा भला करणा। 30 अपने कम्मा दे जरिये परमेश्वरे दिया पबित्र आत्मा जो दुखी मत करा जडा तुहाडे छुटकारे तांई बयाने दे स्पे च दितया है। 31 हर तरा दी कडवाट कने कोप कने गुस्सा, रोष, कने बैरभाव, कने निंदा तुहांजो ला दूर होई जा। 32 इक दुज्जे पर कृपा कने दया करा, कने जियां परमेश्वरे मसीह च तुहाडे पाप माफ किते, तियां ही तुसां भी इक दुज्जे दे पाप माफ करा।

5 तुसां परमेश्वरे दे प्यारे बच्चे न, इस ताई तुसां उदे सांई बणने दी कोशिश करा। 2 तुहाडा सभाब दुज्जयां तांई प्यार भरया हो जियां यीशु मसीहे तहांजो ने प्यार किता कने तुहाडे पापां दी माफी तांई अपने आपे जो बलिदान करी दिता। परमेश्वर इस बलिदान ला खुश था, क्योंकि ऐ बलिदान उदे तांई खुशबू बाले इत्र सांई था। 3 जदिया की परमेश्वरे दे लोकां तांई सही है, तियां तुसां भी व्यभिचार, कने कुसी भी तरा दे बुरे कम्म, या लालचे दियां गल्लां दी चर्चा मत करदे। 4 कने ना ही अशलील गल्लां करा, कने ना बेकार गल्लां, कने ना ही अशलील मजाक करा, क्योंकि ऐ गल्लां शोभा नी दिदिया कने सही नी न, पर सिर्फ तुहाडे मुऐ ला धन्याबाद ही निकले। 5 क्योंकि तुसां ऐ अच्छी तरा ने जाणदे न की कुसी व्यभिचारी दी, बुरे या लालची माणुऐ दी, जडा मूर्ति पूजणे बाले सांई है, जडा इस संसारे दी चीजां दी अराधना करदा है। इना मसीह कने परमेश्वरे दे राज्य दा हिस्सा नी बणना। 6 उना लोकां दियां गल्लां ने मुर्ख मत बणा जडे इना पापां जो करणे तांई बहाने बणाणे दी कोशिश करदे न; क्योंकि इना ही कम्मा दिया बजा ने परमेश्वरे दा गुस्सा हुकम नी मनणे बालयां पर भडकदा है। 7 इस ताई तुसां इना पाप भरे कम्मा जो करणे च उना सोगी मत जुडा। 8 तुसां अंधे च रेणेबाले लोकां सांई होंदे थे, पर हुण तुसां लौई च रेणेबाले लोक न, क्योंकि तुसां प्रभु दे लोक न। इस ताई लौई च रेणेबाले लोकां सांई कम्म करा। 9 क्योंकि अगर कोई माणु लौई च है, तां उदा चाल चलन अच्छा कने धार्मिक होंदा है कने उस पर भरोसा करी सकदे न, 10 कने ऐ सिखणे दी कोशिश करा की प्रभु जो क्या खुश करदा है। 11 कने तुसां इना पाप भरे कम्मा जो करणे च उना सोगी मत जुडा, बल्कि लोकां जो दस्सा की ऐ कम्म बुरे न। 12 क्योंकि अविस्वासी लोकां दे गुप्त कम्मा दी चर्चा भी सरमा दी गल्ल है। 13 पर जालू कुसी चिजा पर लौ चमकदी है तां हर कोई दिखी सकदा है, की सै चीज कदेई है क्योंकि जालू कुसी चिजा पर सै पोंदी है, तां चीज खुद लौ बणी जांदी है। 14 इसा बजा ने लोक बोलदे न, “हे सोंणे बालयो जागी जा कने मरयां ला जिन्दे होई जा; मसीह तहांजो पर लौ चमकाणी।” 15 इस ताई ध्याने ने दिखदे रिया की तुसां कदेई जिन्दगी जी

दे न। बेअकलयां सांई नी पर ज्ञानिया सांई जिन्दगी जिया। 16 कने भलाई करणे दे हर इक मौके दा अकला ने इस्तेमाल करा क्योकि दिन बुरे न। 17 इस बजा ने अज्ञानी मत बना, पर ध्याने ने समझा की प्रभु तहांजो ला क्या करवाणा चांदा है। 18 कने शराब पी करी मतबाले मत बणी रिया, क्योकि इसला लोक असभ्य कने दुज्जयां ने बुरा व्यवहार करदे न, पर पबित्र आत्मा जो अपने आप पर काबू करणा दिया, 19 अगर तुसां पबित्र आत्मा दे काबू च न, तां तुसां इयां ही करणा; जालू तुसां अपु चे मिटे होंगे तां भजन कने स्तुति करा कने उना होर गाणयां जो गा जडा पबित्र आत्मा तहांजो दिन्दा है। 20 कने जडा कुछ साडे प्रभु यीशु मसीह किता उदी बजा ने हमेशा सारियां गल्लां तांई साडे पिता परमेश्वर दा धन्यावाद करदे रिया। 21 असां मसीह तांई श्रदा कने भक्ति रखणे दिया बजा ने इक दुज्जे दे अधीन रिया। 22 हे घरे बालियों, अपने-अपने घरे बालयां दे अधीन रिया, जियां तुसां प्रभु दे अधीन रेंदियां न। 23 क्योकि घरेबाला तां घरे बालिया दा सिर है, जियां की मसीह कलीसिया दा सिर है; मसीह कलीसिया दा उद्धारकर्ता है, जडी उदा अपना शरीर है। 24 जियां कलीसिया मसीह दे अधीन न, तियां ही घरे बालियां भी हर गल्लां च अपने-अपने पति दे अधीन रें। 25 हे पतियो, अपणिया-अपणिया घरे बालिया ने प्यार रखा, जियां मसीहे कलीसिया ने प्यार करिके साडे तांई अपनी जिन्दगी देई दिती। 26 ताकि उदा बचन कलीसिया दे लोकां पर प्रगट होईकरी उना जो पाप ला शुद्ध करे, जियां कोई माणू कुसी जिचा जो धोई करी शुद्ध करदा है; 27 सै अपने लोकां तांई मरी गया ताकि सै अपने लोकां जो सिद्ध बनाई सके, कने सै सांझो अपनी ऐसी महिमामय कलीसिया बनाई करी पेश करी सके, जिना च कोई दोष या पाप या होर कोई बुरी गल्ल नी होणी बल्कि सै पबित्र कने सिद्ध होणे। 28 इयां होणा चाईदा, की पति अपणिया-अपणिया घरे बालिया ने अपने शरीर सांई प्यार करे, जडा अपणिया घरे बालिया ने प्यार करदा है, सै अपने आप ने प्यार करदा है। 29 क्योकि कुनी भी अपने शरीर ने बैर नी किता बल्कि उदी देखभाल करदा है, जियां मसीह कलीसिया दी देखभाल करदा है, तियां ही इक माणू खुद दी देखभाल करदा है। 30 क्योकि असां सारे मसीह दे शरीर दे अंगा सांई न। 31 जियां की पबित्र शास्त्र च लिखया है, “इसा बजा ने माणू अपने माता पिता जो छडी करी अपणिया घरे बालिया ने मिल्ली के रेंणा, कने उना दोनो इक तन होणा।” 32 ऐ इक कीमती कने गेहरी शिक्षा है, कने मै इदी तुलना मसीह कने उस पर भरोसा करणे बालयां सोगी करदा है। 33 पर तुसां पर भी लागू होंदा है, की हर इक अपणिया घरे बालिया ने अपने सांई प्यार करे, कने घरे बाली भी अपने घरे बाले दी इज्जत करे।

6 हे बच्चो, पबित्र शास्त्र च लिखया है; “अपणे माता पिता दी इज्जत करा, तालू तेरे सोगी सब भला होणा कने धरती पर तू जादा दिन जिणा।” ऐ पेहला हुकम है जिसयो परमेश्वरे इक वायदे सोगी दितया है। इस तांई हे बच्चो तुसां जडे प्रभु पर भरोसा करदे न, तुसां तांई ऐई ठीक है की तुसां अपने माता पिता दी गल्ल मन्ना। 4 हे माता पिताओ, अपने बचयां जो अपने व्यवहार ने गुस्सा ना चढा पर प्रभु दी शिक्षा, कने चेतावनी देईकरी, उना दी देखभाल करा। 5 हे नोकरो, जडे लोक संसारे दे अनुसार तुहाडे मालिक न, उना दा

इमानदारी कने सच्चाई ने हुकमा जो मन्ना, जियां यीशु मसीह दा मदे न। 6 ऐ सब सिर्फ दिखबे तांई कने लोकां जो खुश करणे तांई मत करा, तुसां मसीह दे सेवक न, इस तांई तहांजो अपने घरे मने ने सेई करणा चाईदा जडा परमेश्वर चांदा है की तुसां करा। 7 तुसां खुशिया ने अपने सेबा दे कम्मा जो करदे रिया, जियां मन्ना तुसां लोकां दी नी पर प्रभु दी सेबा करा दे न। 8 क्योकि तुसां जाणदे न, की जडा कोई जदिया खरा कम्म करगा, चाऐ सै नोकर हो, चाहे सै अजाद हो, प्रभुऐ उसयो उदा इनाम देणा है। 9 इयां ही हे मालिको, तुसां उना जो धमकियां नी देणिया चाईदियां, पर तहांजो अपने नोकरां सोगी सियुदा ही व्यवहार करणा चाईदा, जियां मै उना ने बोलया है की सै तुसां ने करन। क्योकि तुसां जाणदे न की, उना दा कने तुहाडा दोनो दा मालिक स्वर्गे च है, कने सै कुसी दा पक्ष नी लेंदा। 10 आखरी च, आत्मिक रूप च प्रभु दी अपार शक्तिया ने मजबूत बना। 11 असां माणूआं दे खिलाफ लडाईं नी लडा दे न। असां प्रधाना कने अधिकारियां कने अंधेरे दे हाकिमा ने कने आत्मिक संसारे दिया शक्तिया दे खिलाफ लडा दे न। इस तांई सारे हथियार पेहनी लिया जडा परमेश्वर दिदा है कने जालू सै बुरा दिन ओणा है तालू तुसां शैताने दियां चालां ने अपने आप जो बचाई सकदे न। कने जालू ऐ लडाईं खत्म होई जाणी तालू भी तुसां मजबूतिया ने खडे रेई सकणा। (aiōn g165) 14 इस तांई जियां की इक सिपाई लडाईं तांई तैयार होणे तांई अपनी कम्रा च बेल्ट बनदा है, तियां ही परमेश्वरे दी सच्चाईया जो बेल्टा सांई बन्नी लिया, कने जियां झिलम सिपाइये दी लडाईया च रक्षा करदी है, तियां ही जालू शैतान तहांजो पर हमला करदा है तालू तुहाडा धार्मिक व्यवहारे तुहाडी रक्षा करणी है। 15 कने परमेश्वरे दी शांति दा शुभसमाचार सुणणे तांई तुहाडी इच्छा ठीक तियां ही होणी चाईदी, जियां की इक सिपाई लडाईं तांई तैयार होणे तांई जूते पेहनदा है; 16 कने इक होर गल्ल है, जियां इक सिपाई दुशमणे दे तीरां ला बचणे तांई ढाल लेदां है, तियां ही मसीह पर पक्का भरोसा रखा ताकि मसीह तहांजो शैतान दे नुकसान करणे बाले जल्दे तिरां ला बचाई रखे। 17 जियां इक सिपाई अपने सिरे जो लडाईं च बचणे तांई टोप लगाई रखदा है, तियां ही परमेश्वरे तहांजो शैताने ला बचाणा। जियां इक सिपाई अपने बचाब तांई इक तलबार पकडदा है, तियां ही अपने बचाब तांई परमेश्वरे दे बचने दा इस्तेमाल करा। 18 कने हर बक्ते जियां पबित्र आत्मा अगुवाई करदा है तियां प्रार्थना करा कने बिनती करदे रिया, कने जागदे रिया कने हमेशा पबित्र लोकां तांई प्रार्थना करदे रिया, 19 कने तुसां मेरे तांई भी प्रार्थना करा की परमेश्वर मिंजो बोलणे तांई शब्द दे, ताकि मै हिम्मत ने शुभसमाचार दे बारे च जडा सारे लोकां तांई है, उदियां गुप्त गल्लां उना जो समझाई सके, 20 इस तांई मै जजिरा च जकडयो होऐ राजदूत सांई सेबा करा दा है। प्रार्थना करा की जियां मिंजो बोलणा चाईदा तियां ही हिम्मत ने शुभसमाचार दा प्रचार करी सके। 21 कने तुखिकुस जडा प्यारा भाई कने प्रभु च भरोसे झोगा सेवक हे, उनी तहांजो सारियां गल्लां दस्सी देणियां ताकि तुसां जांणी सकन की मेरी हालत क्या है कने क्या करा दा है। 22 उसयो मै तुहाडे बाल इस तांई भेजया हे, की तुसां साडिया हालत जो जाणन, कने सै तहांजो उत्साहित करी सके। 23 मै प्रार्थना करदा है की पिता परमेश्वर कने प्रभु यीशु मसीह तुसां भरोसा करणे बालयां जो

शांति दे, ताकि इसा बजा ने तुसां इक दुज्जे ने प्यार करन कने लगातार प्रभु
यीशु मसीह पर भरोसा करन। 24 परमेश्वर तुसां सारयां पर अनुग्रह करे जड़े
उस प्यार ने प्रभु यीशु मसीह जो प्यार करदे न जड़ा प्यार कदी खत्म नी
होदा।

फिलिपियों

1 मैं पौलुस तीमुथियुस सोगी ऐ चिट्ठी लिखा दा है कने असां यीशु मसीह दे सेबक न। मैं ऐ चिट्ठी फिलिप्पी शेहे च रेणे बाली कलीसिया दे अगुवां जो कने सेवकां समेत परमेश्वर दे पबित्र लोकां ताई लिखा दा है। **2** मैं ऐ प्राथना करदा है कि, साडे पिता परमेश्वर कने प्रभु यीशु मसीह दी तरफा ला तुहांजो अनुग्रह कने शांति मिलदी रे। **3** पेहले दिने ला तुसां यीशु मसीह दे शुभसमाचार पर भरोसा किता, कने शुभसमाचार जो फेलाणे च साडे हिस्सेदार रे। इसा बजा ला मैं जालू भी तुहाडे बारे च सोचदा है, तां परमेश्वरे दा धन्यवाद करदा है, कने मैं खुशिया सोगी तुहाडे सारयां ताई उदी सहायता ताई प्राथना करदा है। **6** मिंजो इसा गल्ला दा भरोसा है की परमेश्वरे तुसां च खरा कम्म शुरू कितया है, उनी यीशु मसीह दे दुबारा मुडी ओणे दीकर उसयो पूरा भी करणा। **7** ठीक है कि मैं तुसां सारयां ताई ऐसा ही बिचार करे, क्योंकि मेरे मने च तुहाडे ताई खास जगा है, क्योंकि जालू मैं केद च है, ऐ शुभसमाचार दी सच्चाईया ला जबाब देणे ताई तुसां मेरे सोगी परमेश्वर दे अनुग्रह च साथी न। **8** इदे च परमेश्वर मेरा गबाह है कि मैं यीशु मसीह साईं प्यार करिरी तुसां सारयां जो मिलणे दी इच्छा करदा है। **9** मैं ऐ प्राथना करदा है, की तुसां पूरी समझ कने ज्ञान ला इक दुज्जे सोगी लगातार प्यार च बढे जा, **10** इस ताई की तुसां जडियां खरियाँ गल्लां न उना जो अपनाई करी योग्य बणी जा, ताकि मसीह दे मुडी ओणे दीकर सच्चे कने निर्दोष बणी रेई सकन। **11** कने मसीह यीशु दे जरिये पैदा होणे बाले धार्मिकता दे कम्मा ला अपने जो भरी लिया, जिसला परमेश्वरे दी महिमा कने स्तुति होदी रे। **12** है मसीह भाईयो, मैं चांदा है, की तुसां सारे भी ऐ जाणी लिया जडा मिंजो पर बितया है, उसने मतयां लोकां शुभसमाचार पर भरोसा किता है। **13** ऐथू दीकर की महाराजा कैसरे दे राज्य दी सारी सेना कने बाकी सारे लोकां जो भी ऐ पता चली गया कि मैं मसीह दे शुभसमाचार ताई जेला च है। **14** कने हुण मेरे केद च होणे दिया बजा ला, प्रभु यीशु च जडे भाई न, उना चे केई पुरे भरोसे सोगी परमेश्वरे दा बचन बिना कुसी डरे दे कने हिम्मत ला सुणा दे न। **15** कुछ लोक तां जलन कने लडाईया दिया बजा ला मसीह दा प्रचार करदे न कने कुछ भली सोच ला प्रचार करणे च मेरी सहायता करदे न। **16** जडे भली सोचा सोगी प्रचार करदे न, सै ऐ इस ताई करदे न क्योंकि सै मिंजो सोगी प्यार करदे न कने सै जाणदे न कि मैं शुभसमाचारे दे जबाब देणे ताई जेला च रखया है। **17** पर जडे लोक जलन रखदे न, सै अपनी मतलबी इच्छा दिया बजा ला मसीह दा प्रचार करदे न पर इमानदारिया ला नी करदे, ऐ समझीकरी की सै जेला च मेरी परेशानियां जो बधाई सकन। **18** तौ क्या होया? बस इतणा ही, की हर तरीके ला चापे झुठिया बजा ला चापे सच्चाईया ला, मसीह दा शुभसमाचार सुणाया जांदा है, कने मैं इसला खुश है, कने हमेशा खुश रेणा। **19** क्योंकि मैं जाणदा है की तुहाडिया प्राथना ला, कने पबित्र आत्मा ला जडी यीशु मसीह भेजियो है, उदी सहायता न कैदा ला अजाद होई जाणा। **20** मेरी दिले दी इच्छा कने आस है, की कदी भी मैं कुसी भी हालात च शरमिंदा न होऐ, पर मिंजो मसीह दे बारे च बोलणे दी हिम्मत होदी है, जियां मैं पेहले किता था, चापे मैं जिंदा रे या

मरी जां, मैं अपनी पूरी जिन्दगी ने मसीह दा आदर करदे रे। **21** क्योंकि अगर मैं जिंदा रे, तां सिर्फ मसीह ताई है, कने अगर मरी जां तां ऐ मेरे ताई होर जादा ठीक होणा क्योंकि तालू मैं मसीह सोगी रेणा। **22** पर अगर शरीर च जिन्दा रे तां मैं मसीह ताई कम्म करी सकदा है, पर मैं नी जाणदा की कुसयो चुणे। **23** मन तां करदा की मरी जां, कने मसीह बाल जाई करी रे, क्योंकि ऐ बडा ही अच्छा है। **24** पर मेरा जिन्दा रेणा होर भी जरूरी है, क्योंकि तुहांजो मेरी सहायता दी जरूरत है। **25** कने इस ताई की मिंजो इदा भरोसा है। की मिंजो पता है की मैं जिंदा रेणा है, कने तुसां सबना सोगी रेणा, मैं तुहांजो भरोसे च मजबूत होणे च कने खुश रेणे च तुहाडी सहायता करगा। **26** कने जालू मैं दुबारा ओगा, तां मेरिया बजा ने तुहाडे बाल यीशु मसीह पर घमंड करणे दी होर भी बजा होणी। **27** ध्यान रखा की तुहाडा सभाब मसीह दे शुभसमाचार दे अनुसार हो। चापे मैं आई करी तुहांजो ने मिल्ले या नी, मैं तुहाडे बारे च ऐई सुणे की तुसां इक ही भाव च, कने इक मन होईकरी शुभसमाचार दे भरोसे ताई सोगी मेहनत करदे न। **28** कने कुसी भी गल्ला ताई अपने विरोधियां ला डरदे नी। तुहाडी हिम्मत उना ताई खात्मे दा साफ चिन्ह है, पर तुहाडे ताई उद्धारे दा, कने ऐ परमेश्वरे दिया तरफा ला है। **29** क्योंकि परमेश्वर तुहांजो ऐ मोका दितया है, की ना सिर्फ तुसां मसीह पर भरोसा करा, पर उस ताई दुख झेलणे ताई बरदान भी मिलया है। **30** कने तुहांजो तियां ही मेहनत करणी है, जियां तुसां मिंजो फिलिप्पी शेहे च करदे दिखया है, कने जिना दुखां दे बारे च तुसां सुणदे न जडे मिंजो जेला च हुण भी न।

2 अगर तुसां मसीह च होणे दिया बजा ला उत्साहित न, या उदे प्यार ला अराम मिलया हो, पबित्र आत्मा सोगी संगती हो क्योंकि मसीह तुहाडे ताई कष्णामय कने दयालु है। **2** तां मेरी ऐ खुशी पूरी करा की इक मन रिया, कने इक ही प्यार, इक ही चित, कने इक ही इच्छा रखा। **3** मतलब कने घमंड सोगी कुछ मत करा, पर दीनता ला इक दुज्जे जो अपने ला खरा समझा। **4** हर कोई अपने ही फायदे दी नी, पर दुज्यां दे फायदे दी भी चिंता करा। **5** जदेया यीशु मसीह दा सबाब था तदिया ही तुहाडा भी हो; **6** यीशु मसीह पूरी तरह ला परमेश्वर था, पर उनी इस प्रभुता पर अपना हक नी रखणा चाया। **7** पर उनी अपना सारा ईश्वरीय हक छडी दिता कने इक दास साईं बणी गया, कने इक आम माणु बणी गया। **8** कने माणु बणी करी अपने आपे जो दीन किता कने सै परमेश्वरे दा इतणा आज्ञाकारी रिया कि सै मरणे ताई भी तैयार होई गया, हां, उनी सूली दी मौत जो भी इक अपराधी साईं सेहन करी लिया। **9** इसा बजा ला परमेश्वरे उसयो सारयां ला उच्चे आदर दिया जगा च बैठाया कने उसयो सै ना दिता जडा सारयां ना ला बंदिया है, **10** कि जडे स्वर्ग च कने धरतिया पर न कने जडे धरतिया दे थले न; सै सारे यीशुऐ दे ना जो आदर देणे ताई गोडे टेकन, **11** कने परमेश्वर पिता दी महिमा ताई हर कोई मनी ले की यीशु मसीह ही प्रभु है। **12** इस ताई हे मेरे प्यारो, जालू मैं तुहाडे सोगी था तालू तुसां हमेशा परमेश्वरे दे हुकमा जो मनया है। हुण जालू मैं तुहांजो ला दूर होई गया है, तां तुहांजो होर भी गल्ल मनणा चाईदी। डरदे कने कम्मे होऐ तुसां सारयां जो उना चीजां जो करणा चाईदा जडियां उना लोकां ताई सही न जिना जो परमेश्वरे बचाया है। **13** क्योंकि परमेश्वर

ही है, जडा तहांजो च कम्म करा दा है, कने तहांजो करणे दी इच्छा कने शक्ति दे दा है, जडा उसयो खुश करदा है। 14 सारे कम्म बिना बुड-बुडाए कने बिना बेहसा ला करा, 15 ताकि तसां इस बुरे कने पापी संसारे च परमेश्वरे दी सिद्ध ओलादी साईं पबित्र कने निर्दोष जिन्दगी जिया, इस संसारे दे लोकां बिच तसां अम्बरे दे तारयां साईं चमका, जियां तसां उना जो बचन सुणादे न जडा अनन्त जिन्दगी दिन्दा है। 16 कने जालू यीशु मसीह दुबारा मुडी करी ओणा तां मिंजो घमंड होणा की मेरी कोशिश कने मेरी मेहनत बेकार नी गेई। 17 कने जालू मैं तहांजो शुभसमाचार सुणाया, तसां प्रभु यीशु पर भरोसा किता कने तसां सेबा ताईं अपनी जिन्दगी देई दिती है। इस ताईं, भले ही मिंजो शुभसमाचार सुणाणे दिया बजा ला मारी दिया, तमी मैं तुहाड़े सोगी खुश रेणा। 18 मेरी विनती है की तसां भी इयां ही खुश रिया कने मेरिया खुशिया च शामिल होई जा। 19 मिंजो प्रभु यीशु मसीह च आस है की मैं तीमथियुस जो तुहाड़े बाल तोल्ली भेजगा, ताकि तुहाडा हाल सुणीकरी मिंजो उत्साहित होई जां। 20 क्योंकि मेरे बाल ऐसे सबाभे दा कोई नी है, जडा सच्चे मने ला तुहाड़ी चिंता करे। 21 क्योंकि सारे अपने-अपने फायदे दे बारे च सोचते रेंदे न, ना की यीशु मसीह दे बारे च। 22 पर तसां जाणदे न की तिमोथियोसे कियां दसया की सै बफादार है, उनी शुभसमाचार दे प्रचार च मेरा इस तरिके ला साथ दिता, जियां इक पुत्र अपने पिता दा साथ दिन्दा है। 23 इस ताईं मिंजो आस है की जियां ही मिंजो पता लगगा की मेरी क्या हालत होंगी, तियां ही मैं उसयो तोल्ली भेजी दिगा। 24 कने मिंजो प्रभु च भरोसा है की मैं अपु भी तोल्ली ओणा है। 25 पर मैं इफ्रुदितुस जो तुहाड़े बाल भेजणा जरूरी समझया। जडा मेरा भाई है, कने साथी कने सोगी लडणे बाला, तुहाडा संदेश मेरे बाल पुजाणे बाला, कने जरूरी गल्लां च मेरी सेबा टहल करणे बाला है। 26 उदा मन तसां सारयां च लगया था, इस ताईं सै बेचेन रेंदा था, क्योंकि तसां उदिया बमारिया दा हाल सुणया था। 27 कने पक्का ही सै बिमार तां होई गया था, ऐथू दीकर की मरणे वाला भी था, पर परमेश्वरे उस पर दया करिके उसयो ठीक किता। परमेश्वरे सिर्फ उस पर ही नि, पर मिंजो पर भी दया किती ताकि मैं पेहले ला भी जादा दुख सेहन ना करे। 28 इस ताईं मैं उसयो भेजणे ताईं होर भी जादा उत्सुक है कि तसां उसयो दुबारा दिखीकरी खुश होई जान कने तुहाड़े बारे च मेरी चिंता भी घटी जा। 29 इस ताईं तसां प्रभु च उस सोगी बडिया खुशिया ला मिलनयो, कने तहांजो उदा कने ऐसे लोकां दा आदर करणा है। 30 क्योंकि सै मसीह दे कम्मा ताईं अपने प्राण खते च पाई करी मौत दे इतणे नेडे आई गया था, ताकि सै मेरी सहायता करी सके, क्योंकि तसां मेरी सहायता दूर होणे दिया बजा ला नी करी सकदे न।

3 इस ताईं हे मेरे मसीह भाईयो, प्रभु यीशु च खुश रिया। सेई गल्लां तहांजो बार-बार लिखणे च मिंजो कोई तकलीफ नी होंदी, पर मैं तहांजो झूठे गुरूआं ला बचाणा चांदा है। 2 बुरे लोकां ला साबधान रिया जडे कृतयां साईं न कने उना लोकां ला भी साबधान रिया जडे बोलदे न की उद्धार ताईं तहांजो खतना करणा जरूरी है। 3 क्योंकि सै बोलदे न की असां ही परमेश्वरे दे सच्चे लोक न, जडे परमेश्वरे दी भक्ति उदी आत्मा ला करदे न, कने अपनी जिन्दगी च यीशु मसीह सोगी इक होईकरी खुश होंदे न, कने अपनीयां खुद

दियां कोशियां पर भरोसा नी करदे न। 4 पर मिंजो बाल अपणिया खुद दी कोशियां पर भरोसा रखणे दी खरी बजा है, अगर कोई इयां सोचदा है, की उदे बाल अपने आपे पर भरोसा रखणे दी खरी बजा है, तां मेरे बाल उसला भी बदीकरी बजा है। 5 जालू मैं अंदां रोजां दा होया तां परमेश्वरे दे हुकमा ला मेरा खतना होया, मैं जमीदा ही इस्राएली है, कने बिन्यामीन दे गोत्र दा है, मेरे माता पिता इब्रानी थे; मैं भी पक्का इब्रानी है; फरीसी होणे दिया बजा ने मैं सकती ला मूसा दी व्यवस्था जो मनया। 6 अगर मैं अपनी जलन दे बारे च बोलें, तां मैं कलीसिया जो तंग करणे बाला था; कने यहूदी व्यवस्था दा पालन करणे च, मैं इक धार्मिक माणू था कने सारी व्यवस्था दा पालन करदा था। 7 पर जडियां गल्लां मेरे फायदे दियां थियां, मैं उना जो मसीह दिया बजा ला नुक्सान समझया। 8 क्योंकि प्रभु यीशु मसीह जो जाणना बाकी सारियां चीजां जो जाणने ला बदीकरी है, कने मैं बाकी सारियां चीजां जो बेकार समझदा है। जियां बजा ला मैं सब कुछ छडी दिता कने मैं उना जो कूडा समझदा है, ताकि मसीह जो होर भी गहराई ला जाणे। 9 ताकि मैं उसी सोगी एकता च रेई सके, मेरी धार्मिकता मूसा दी व्यवस्था दे हुकमा पर आधारित नी है, पर ऐ सै धार्मिकता है, जडा सिर्फ परमेश्वर उना जो दिन्दा है, जडे मसीह पर भरोसा करदे न, 10 मैं ऐ चांदा है की मसीह जो होर जाणी लें कने उदे मरयां च जी उठणे दी शक्ति जो जाणी सके कने उदे दुखे च शामिल होईकरी उदी मौत च उदे साईं बणी जां, 11 ताकि मैं भी मरयां च फिरी जिन्दा होणे दा अनुभव करी सके। 12 मैं ऐ दाबा नी करदा की, मिंजो ऐ सब पेहले ही मिल्ली गया है, पर मैं कोशिश करी के अगे बदा दा है, की मिंजो सै मिल्ली जाऐ, जिस ताईं प्रभु यीशु मसीह मिंजो चुणया है। 13 मेरे मसीह भाईयो, मैं ऐ दाबा नी करदा की मिंजो मेरा लक्ष्य मिल्ली गया है; पर ऐ इक ही कम्म करदा है, की जडियां गल्लां होई गियां न, उना जो भुली करी अगे क्या होणा उस मकसदे ताईं बडी मेहनत करा दा है, 14 कने निशाने पासे दोडदा जान्दा है, ताकि मैं स्वर्ग जाणे दा इनाम पाई सके, जिदे ताईं परमेश्वरे मिंजो प्रभु यीशु दे जरिये स्वर्ग जो सदया है। 15 इस ताईं असां च जितणे भी आत्मिक स्ने च समझदार न, सै सारे इक मन रखन, कने अगर कुसी गल्ला च तुहाडा होर ही बिचार हो, तां परमेश्वरे उसयो भी तहांजो पर प्रगट करी देणा। 16 इस ताईं जिथू दीकर परमेश्वरे सांझो पर सच्चाई जो प्रगट कितया है, उसी दे अनुसार ही सांझो चलणा भी चाईदा। 17 हे मसीह भाईयो, तसां मेरे साईं व्यवहार करा कने उना लोकां पर ध्यान दिया जडे मेरे साईं व्यवहार करदे न, कने जदिया व्यवहार तसां सांझो करदे दिखया जालू असां तुहाड़े सोगी थे। 18 क्योंकि मते न जिना दे बारे च मैं पेहले भी अच्छे ने दसया है, कने हुण भी रोई-रोई करी दस्सा दा है, की ऐथू केई लोक न जडे ऐसी जिन्दगी जिन्दे न, जिसने पता चलदा है की सै मसीह दी सूली पर मौत दे खिलाफ न। 19 नाश होणा ही उना दा अंत है, सै शरिर दियां इच्छा जो पूरा करणे ताईं जिन्दे न, कने अपने शर्मनाक कम्मा पर घमंड करदे न कने हमेशा संसारे दियां चीजां दे बारे च सोचदे रेंदे न। 20 पर असां स्वर्ग दे निबासी न, कने असां अपने उद्धारकर्ता प्रभु यीशु मसीह दी स्वर्ग ला बापस ओणे दा इंतजार करा दे न। 21 यीशु मसीह अपणिया उसा शक्तिया ने, हर इक चीजा

जो अपने बसे च कितया है, कने साडे कमजोर, संसारिक शरीर दा रूप बदली कर, अपनी महिमा दे शरीर साईं बनाई देणा है।

4 इस ताई हे मेरे प्यारे मसीह भाईयो, मिजो तुसां लोकां ने मिलणे दी बडी इच्छा है। तुसां, जडे मेरी खुशी कने मुकुट न, प्रभु च लगातार टिकी रिया। 2 मैं यहदिया कने सुन्तुखे दोनों बेहणा ला विनती करदा है, की प्रभु च इकी दुज्जे ला मिली जुली करी रिया। 3 हे सच्चे साथी सुन्तुखे, मैं तिजो ला भी विनती करदा है, कि तू उना जनानिया दी सहायता कर की सै मेल मिलाप करी लेन, क्योंकि उना मेरे सोगी शुभसमाचार प्रचार करणे च, क्लेमस कने मेरे उना होर साथियां सोगी बडी मेहनत किती, जिना दे ना जिनंदगी दी कताबां च लिखयो न। 4 प्रभु च हमेशा खुश रिया; मैं फिरी बोलदा है, खुश रिया। 5 सारे लोक तुहाडे कोमल सभाब जो जाणी सकन। प्रभु यीशु दा ओणा नेडे है। 6 कुसी भी गल्ला दी चिंता मत करा; पर हर इक हालात च तुहाडे निवेदन, प्रार्थना कने विनतिया दे जरिये धन्याबाद सोगी परमेश्वरे सामणे रखे जान। 7 तालू परमेश्वरे दी शांति, जड़ी माणुआं दी समझा ला परे है, तुहाडे दिले कने तुहाडे बिचारां जो मसीह यीशु च संभाली करी रखगी। 8 इस ताई हे मसीह भाईयो, अंत च, जडियां-जडियां गल्लां सच्च न, कने जडियां-जडियां गल्लां आदरणीय न, कने जडियां-जडियां गल्लां धर्मी न, कने जडियां-जडियां गल्लां पबित्र न, कने जडियां-जडियां सुंदर न, कने जडियां-जडियां गल्लां प्रशंसा दे काबिल न, जडियां-जडियां गल्लां उत्तम कने आदर दियां गल्लां न, उना पर ही तुहाडा मन लगी रे। 9 जडियां गल्लां तुस्सां मिजो ला सिखियां, कने ग्रहण कितियां, कने सुणियां, कने मिजो च दिखियां उना दा ही पालन करा, तां शांति दे परमेश्वरे तुसां लोकां सोगी रेणा। 10 मैं प्रभु च बडा खुश है, की हुण तुहांजो इतणे दिना बाद मिजो पैसे भेजणे दे बारे च फिरी बिचार आया है; पक्का तुहांजो शुरू च भी इदा बिचार था, पर तुहांजो मौका नी मिल्ला। 11 ऐ नी की मिजो कुसी जरूरत दिया चिजा दी कमी है क्योंकि मैं हर तरा दे हालतां च खुश रेणा सिखया है। 12 मैं बडे थोडे च भी जीणा जाणदा है, कने जरूरत ला जादा च भी रेणा जाणदा है; हर इक गल्ला च कने सारे हालतां च मैं रजणा कने जालू मेरे बाल खाणे ताई बडा कुछ होंदा है, कने जालू मेरे खाणे ताई बडा घट होंदा है, तां मैं दोनों हालतां च रेणा सीखी लिया है। 13 मसीह दे जरिये, जडा मिजो शक्ति दिन्दा है, उदे च मैं सब कुछ करी सकदा है। 14 तमी तुसां खरा किता कि मेरे इना मुश्किलां दे दिना च पैसे भेजी करी मेरी सहायता किती कने मेरे उना दुखां च मेरे साथी होऐ। 15 हे फिलिप्पी शहर दे लोकों, तुसां तां अपु ही जाणदे न जालू मैं तुहांजो यीशु मसीह दा शुभसमाचार सुणाया था कने जालू मैं तुहाडी जगा ला मकिदुनिया प्रदेश जो गिया, तालू तुहांजो छडी होर कुनी भी कलीसिया च लेणे-देणे दे बारे च मेरी सहायता नी किती। 16 इयां ही जालू मैं थिस्सलुनीके शहर च था, तालू भी तुसां मेरी सहायता जो पूरा करणे ताई इक बरी नही पर दो बरी मिजो पैसे भेजे थे। 17 मैं ऐ इस ताई नी बोलदा की मैं पैसा चांदा है की इसयो उना अच्छी चिजां दी सूची च शामिल करा, जिना जो तुसां पेहले ही करी बैठयो न, कने जिस ताई परमेश्वरे तुहांजो इनाम देणा। 18 मेरे बाल सब कुछ है, कने बडा जादा भी है; जडियां चीजां तुसां इफ्रुदितुस दे हथे ला भेजियां थियां

फिलिप्पियों

उना जो पाई करी मैं रजी गिया है, ऐ इक तोफे साईं है, जिदे च मिठी खुशबू ओआ दी है, जिसयो सै ग्रहण करदा है कने ऐ परमेश्वर जो खुश करदा है। 19 मेरा परमेश्वर भी उस धने दे अनुसार जडा महिमा सोगी यीशु मसीह च है, तुहाडी हर इक घाटे जो पूरा करगा। 20 साडे पिता परमेश्वरे दी महिमा युगां-युगां दीकर होंदी रे। आमीन। (aiōn g165) 21 यीशु मसीह च सारे पबित्र लोकां जो मेरा नमस्कार बोला। जडे मसीह भाई मेरे सोगी न, तुहांजो नमस्कार बोलदे न। 22 सारे पबित्र लोक, खासकर जडे महाराजा कैसेरे दे घराने दे न, तुहांजो नमस्ते करदे न। 23 मैं प्रार्थना करदा है की साडे प्रभु यीशु मसीह दा अनुग्रह हमेशा तुसां सारयां सोगी रे।

कुलस्सियों

1 मैं, पौलुस ऐ चिट्ठी लिखा दा है, जडा परमेस्वरे दी इच्छा ने चुण्या होया
यीशु मसीह दा प्रेरित है कने मसीह भाई तीमथियुस दिया तरफा ला, 2
मसीह च उना पबित्र कने भरोसे दे काबिल मसीह भाईयां दे ना जडे कुलुस्से
शेहर चरेंदे न। साडे पिता परमेस्वरे दिया तरफा ला तुसां सारयां जो अनुग्रह
कने शांति मिलदी रे। 3 जालू असां तुहाडे ताई प्राथना करदे न, असां अपने
प्रभु यीशु मसीह दे पिता मतलब की परमेस्वरे दा धन्यवाद करदे न। 4 क्योंकि
असां सुणया है, की यीशु मसीह पर तुहाडा भरोसा है, कने सारयां पबित्र
लोकां ला प्यार करदे न; 5 क्योंकि तुसां उम्मीदा दिया बजा ला ऐसा करदे न,
जडी परमेस्वरे स्वर्ग च तुहाडे ताई रखया है। जिदे बारे च तुसां पेहले ही सुणी
बैठयो न जालू लोक पैली बरी तुहाडे बाल आये कने तुहांजो यीशु मसीह दे
बारे च शुभसमाचार सुणया, जडा की परमेस्वरे दा सच्चा संदेश है। 6 ऐ
शुभसमाचार सारे संसार च फेला दा है कने मते भरी लोक यीशु मसीह पर
भरोसा करा दे न। ऐ हर जगा जिनदगी बदला दा है, ठीक तियां ही जियां तुसां
पेली बरी सुणया था, कने सच्चाई जो समझया था की परमेस्वर उना लोकां दे
पापां जो माफ करदा है, जडे यीशु मसीह च भरोसा करदे न। 7 उदी ही शिक्षा
तुसां साडे प्रिय साथी इफ्रस ला सीखी है, जडा साडे ताई मसीह दा भरोसे दे
लायक सेवक है। 8 उनी सान्द्रो दुज्जे लोकां ताई तुहाडे प्यार दे बारे च
दसया है, जडा पबित्र आत्मा तुहांजो दितया है। 9 इस ताई जिस दिने ला ऐ
सुणया है, असां भी तुहाडे ताई हमेशा प्राथना किती, की परमेस्वरे दी आत्मा
तुहांजो अकल कने समझ दे, की उदी इच्छा जो पुरे तरिके ला समझी सकन।
10 असां ऐ प्राथना करदे न ताकि तुसां ऐसी ही जिनदगी जी न जदिया परमेस्वरे
दे लोकां दा होणा चाईदी, कने तुसां परमेस्वरे जो खुश करी सकन कने तुसां
लगातार भले कम्मा जो करदे रिया जिसने तुसां परमेस्वर जो जाणने च बदे
जा। 11 कने असां ऐ भी प्राथना करदे न की परमेस्वर अनोखी शक्तिया ला
बडा जादा मजबूत बणाए, ताकि तुसां सबर कने खुशिया ला मुशकिलां जो
सेहन करी सकन। 12 कने पिता परमेस्वर दा धन्यवाद करदे रिया, जिनी
सांझो अपनी विरासत च हिस्सेदार होणे दे काबिल बणया, जिसयो उनी अपने
पबित्र लोकां ताई स्वर्ग च तैयार कितया है। 13 क्योंकि ओई सांझो शैताने
दिया शक्तिया ला छुड़ाई करी अपने प्यारे पुत्रे दे राज्य च लेईकरी आया है।
14 परमेस्वरे अपने पुत्रे दा बलिदान करिरी सांझो शैताने दिया शक्तिया ला
अजाद किता कने साडे पापां जो माफ किता। 15 कोई भी परमेस्वरे जो नी
दिखी सकदा है, जालू उदा इकलोता पुत्र माणु बणी गया तां, उनी लोकां दे
सामणे परमेस्वर जो प्रगट किता कने सारा कुछ बणाणे ला पेहले सै मौजूद था
कने परमेस्वरे जडा कुछ बणया उस पर उदा सारयां ला बडा हक है। 16
क्योंकि सै मसीह था जिनी सारा कुछ बणाणे ताई परमेस्वरे सोगी कम्म किता,
स्वर्ग दी हो, या धरती दी हो, दिखियो हो या अणदिखयो हो, क्या सिंहासन,
क्या प्रभुताएँ, क्या प्रधानताएँ, क्या हक, सारियां चिजां उनी ही बणाईयां कने
उदे ताई ही बणियां न। 17 कुछ भी बणने ला पेहले, मसीह पेहले ला ही था,
कने सारियां चीजां उदी बणाईयो व्यवस्था ला ही कम्म करदियां न। 18

मसीह कलीसिया दी अगुवाई करदा है, जियां सर माणुऐ दे शरीर जो काबू च
रखदा है; सैई आदि है कने मरी के जी उठणे बालयां लोकां च पेहला है, कने
सारियां गल्लां च सैई प्रधान बणे। 19 क्योंकि पिता परमेस्वर दी खुशी इसी च
ही है, की परमेस्वर दा पूरा सभाव यीशु मसीह च हो। 20 परमेस्वरे अपना पुत्रे
जो भेजणे दा फेसला लिया, जिनी अपना खून बहाया कने सूली पर उदी मौत
होई। परमेस्वरे ऐ अपने कने सारियां चीजां बिच मेल मिलाप करणे ताई
किता, इयां करणे ला उनी अपने कने स्वर्ग च शामिल कने धरती च शामिल
सबना च शांति बणाई। 21 इसला पहले तुसां परमेस्वरे ला बडे दूर थे। तुसां
परमेस्वरे दे दुश्मण थे क्योंकि तुहाडे बिचार कने तुहाडे कम्म बुरे थे। 22 पर
हुण पिता परमेस्वरे अपने पुत्रे जो माणु बणाई करी मरणे ला तुहाडा भी मेल
करी लिया है, ताकि तुहांजो अपने सामणे पबित्र, निष्कलंक कने निर्दोष
बणाई करी पेश करी सके। 23 तुहाडा भरोसा मजबूत रेणा चाईदा, जियां की
घर इक पक्की नी पर बणया जांदा है, हुण साडे बाल आस है क्योंकि असां
शुभसमाचार पर भरोसा करदे न, जिसदा प्रचार सारी धरतिया पर कितया है,
कने जिस शुभसमाचार दा सेवक मैं, पौलुस बणया। 24 हुण मैं तुसां लोकां ताई
दुख झेलदा है, इदी बजा ला खुश है। कने मैं लगातार अपने शरीर च दुख
सेहन करा दा है, जियां यीशु मसीह सेहन किते थे, कने ऐ दुख मैं मसीह दी
कलीसियां ताई अपने शरीर च सेहन करा दा है, जडा उदा शरीर है। 25 इसा
कलीसिया ताई तुहाडे ताई परमेस्वरे दी दितियो सेवा ताई सेवक चुण्या है,
ताकि मैं परमेस्वर दे शुभसमाचार जो पुरे तरीके ने प्रचार करी सके। 26
मतलब की उस भेद जो जडा पिछली पीढियां दे लोकां ला गुप्त रिया, पर हुण
परमेस्वरे दे उना पबित्र लोकां पर प्रकट होया है। (aiōn g165) 27 जिना पर
परमेस्वरे प्रकट करणा चाया क्योंकि परमेस्वर चांदा की इस भेद जो जाणन
की मसीह दी महिमा दी क्या कीमत है, जडा सारयां ताई है, ऐ भेद यीशु
मसीह खुद है, जडा तुसां च है, ऐई साडी इकलोती आस है जिसने महिमा
होणी। 28 असां मसीह दे बारे च सारयां जो दसदे न, सारयां जो चेताबनी दिन्दे
कने सारयां जो पुरिया समझा ला सिखादे जडा परमेस्वरे सांझो दितया है,
ताकि ऐ पक्का करी सकन की हर कोई मसीह च सिद्ध होई सके जालू सै
परमेस्वरे दे सामणे खडे होंगे। 29 ऐई बजा है की मैं इतनी मेहनत करदा है। मैं
ऐसा करणे ताई परेशानियां दा सामणे करदा है जडा की मसीह दिया शक्तिया
ला ही होंदा है, जडा मेरे अंदर कम्म करदा है।

2 मैं चांदा है की तुसां जाणी लिया की तुहाडे कने उना दे जडे लौदीकिया
शेहरे च न, कने उना सबना ताई जिना ला मैं नी मिलया है, मैं कडी
मेहनत इस ताई करदा है, 2 मैं ऐसा इस ताई करदा है क्योंकि मैं उना जो तेरे
भरोसे च मजबूत करणा चांदा है, सै इक सोगी प्यार च शामिल होई जान, कने
मैं चांदा है की उना जो पूरा भरोसा हो क्योंकि उना जो परमेस्वर दे भेद दी
योजना दे बारे च पूरी समझ है, जडा अपु मसीह है। 3 ऐ सै है जडा परमेस्वरे
दी अकल कने ज्ञान जो जाणदा है, जडा की उस खजाने साई है, जिसयो
लुकाया गया था। 4 ऐ मैं इस ताई बोला दा है, की कोई भी माणु तुहांजो उना
दी झूठी शिक्षा पर भरोसा करणे ताई राजी करी के धोखा ना दे। 5 क्योंकि मैं
तुहाडे सोगी नी है, फिरी भी मैं लगातार तुहाडे बारे च सोचदा है, मिंजो खुशी

है की तुसां इक न कने तुसां अपने भरोसे च जडा मसीह पर है, जिन्दगी जिन्दे रिया। 6 इस ताई, जियां तुसां प्रभु यीशु मसीह जो प्रभु मन्नी करी अपनाई लिया, तियां ही उदे पिच्छे चलदे रिया। 7 तुसां मसीह दे भरोसे च मजबूत बणी रिया, जियां इक सख जड पकड़दा कने इक घर इक नीयां पर मजबूत रेंदा है, इयां ही तुसां भी अपने भरोसे च बददे जा, कने जादा ला जादा धन्यवाद करदे रिया। 8 साबधान रिया की कोई तुहांजो संसारिक ज्ञान कने बेकार गल्लां ने मुर्ख नी बणाई ले, ऐ गल्लां सुणने जो तां ज्ञान बालियां लगदियां न, पर ऐ गल्लां सिर्फ संसार दे लोकां दिया तरफा ला न, ना की मसीह दिया तरफा ला। 9 इयां ना हो की ऐ लोक तुहांजो धोखा देन, क्योंकि जालू मसीह माणु बणया, तालू भी सै पूरी तरह परमेश्वर था। 10 यीशु मसीह ही सारी शक्तियां कने अधिकारां दा प्रधान है, इस ताई अगर तुसां मसीह सोगी जुडयो न तां तुसां उदे च सिद्ध बणा। 11 जालू तुसां मसीह पर भरोसा किता, तालू तुहाडा खतना कुसी माणुऐ ला नी होया है, जियां यहूदी लोक करदे न, पर मसीह दे जरिये तुहाडा सै खतना होया है, जडा तुहाडे पाप करणे बाले सभाव जो दूर करदा है। 12 कने तुसां बपतिस्मा लिया, ऐ इसा गल्ला जो दसदा है की तुहाडा पापी सभाव मसीह सोगी कबरा च दबी दिता है कने जालू तुसां नोऐ सभाव ने पाणिऐ ला बाहर आये। ऐ इस ताई होया क्योंकि तुसां भरोसा किता की परमेश्वरे अपनी शक्तिया ने मसीह जो मरयां चे जिन्दा किता। 13 जालू परमेश्वरे तुहांजो भी मसीह सोगी जिन्दा किता, जडे अपने अपराधां कने अपने पापी सभाव ला अजाद नी थे, कने साडे सारे अपराधां जो माफ किता। 14 ऐ इयां था जियां परमेश्वरे साडे पापां दे दस्ताबेज जो खत्म करी दिता, जिना च साडे खिलाफ दोष लिखयो थे। जालू मसीह जो सूली पर चढ़ाया तालू उनी उस देस्ताबेज जो पुरे तरीके न खत्म करी दिता। 15 परमेश्वरे मसीह दे सूली पर मरणे ने संसार दी सारी शक्तियां कने अधिकारां जो हराई करी उना जो सबना सामणे बेइज्जत किता, कने उना जो हराई करी खुशी मनाई। 16 इस ताई तुहांजो कोई धोखा ना दे, कने कोई तुहाडे खाणे पीणे जो लेई करी, या त्योहारे, या नोआ चंद्रमा, या सब्ब दे दिना दे बारे च तुहाडा कोई न्याय ना करे। 17 क्योंकि ऐ सारे नियम कने कानून इक छोआं दे साई है, पर हकीकत मसीह च ही है। 18 कलीसिया इक शरीर है यीशु मसीह उस शरीर दा सर है, उसी ने ही शरीर दे सारे हिस्सयां दी देख रेख होंदी है कने जालू इना जो इक सोगी जोड़दे न, तां सै बददे न जियां परमेश्वर चांदा है की सै बदे। कोई माणु दीनता कने स्वर्गदूतां दी भक्ति करिके तुहांजो दौड़ दे इनामे च दूर ना करे। ऐसे माणु दिखियां गल्लां दा दाबा करदे न, जिसने सै घमंड ने भय्यो रेंदे न, कने जडे मसीह जो छडी दिन्दे न। 20 जालू तुहाडा पापी सभाव मसीह सोगी मरी गया, तां तुहांजो होर भी जादा इस संसारे दियां शिक्षां जो नी मनणा पोणा। इस ताई कजो अजे भी इस संसारे दे नियमा जो मंदे न जियां अजे भी संसार तुहांजो काबू करा दा है। 21 सै ऐसे नियम बणादे न की तुसां ऐ मत छुंदे, ऐसा मत खांदे, ऐ मत खांदे। 22 क्योंकि ऐ सारे नियम कुसी कम्मे दे नी, क्योंकि ऐ माणुआं दे हुकमा कने शिक्षा दे अनुसार न। 23 इना शिक्षां च अपनी इच्छा दे अनुसार बणाई भक्ति दे रिबाज, कने जुठी दीनता, कने अपने शरीर सोगी कठोर बर्ताब करणा ही इक ज्ञानी होणे दा डोंग

करदा है, पर हकीकत च ऐ नियम लोकों जो उना दिया बुरियां जो रोकणे च मदद नी करदे।

3 जियां परमेश्वरे यीशु मसीह जो मरयां चे जिन्दा किता तियां ही तुहांजो जिन्दा किता है, इस ताई उना चीजां दिया तोपा च लगी रिया जडियां स्वर्गे च रखियां न जिथू मसीह परमेश्वरे दे बखे सबते आदर बालिया जगा पर बैठया है। 2 धरतिया दियां चीजां नी स्वर्गे दियां चीजा पर ध्यान ला, 3 क्योंकि तुसां अपने पाप बाले सभाव ताई मरी गियो न, कने तुहाडी नोई जिन्दगी मसीह सोगी परमेश्वरे च लुकियो है। 4 जालू मसीह जडा तुहांजो नोई जिन्दगी दिन्दा है, बापस इसा धरती पर ओगा, तालू तुसां भी उदे सोगी कने उदी महिमा च भागिदार होई जाणा। 5 इस ताई तुसां बुरे कम्मा जो छडी दिया जडे तुहाडे पापी सभाव ला जुडया न। जियां, व्यभिचार, अशुद्धता, दुष्कामना, बुरी लालसा, कने लालच जो जडा मूर्तिपूजा दे बराबर है। 6 क्योंकि लोक इना बुरे कम्मा जो करदे न कने परमेश्वर उना जो सकत सजा देणी। 7 कने तुसां भी, जालू इना बुराइयां च जिन्दगी कटदे थे, तां तुसां भी ऐ कम्म करदे न। 8 पर हुण तुसां भी इना सबना जो मतलब की गुस्सा, रोष, बैरभाव, निंदा, कने गालियां बकणा, तुसां ऐ कम्म करणा छडी दिया। 9 इक दुज्जे सोगी झूठ मत बोला क्योंकि तुसां पुराणे पापी सभाव कने हुण सारे बुरे कम्मा जो छडी दितया है। 10 हुण तुसां इक नोऐ माणु बणी गियो न, ऐ नोआ सभाव जडा अपने सृष्टिकर्ता साई जादा ला जादा बणदा जांदा है ताकि तुसां उसयो होर भी अच्छे ला समझी सकन। 11 इसा बजा ला नोईया जिन्दगिया च ना तां कोई होर जाति दा रिया, ना यहूदी, ना खतना, ना बिना खतने बाला, ना जंगली, ना विदेशी, ना गुलाम कने ना अजाद बस मसीह ही है जडा सब कुछ है कने तुसां सारयां दे अंदर रेंदा है। 12 इस ताई परमेश्वर तुहांजो प्यार करदा है कने उनी तुहांजो अपने पबित्र लोक होणे ताई चुण्या है, इस ताई तुसां लोकां जो, कर्णा, भलाई, दीनता, कने नम्रता, कने सेहनशीलता बाला बणना चाईदा। 13 अगर कुसी जो कुसी पर दोष लागे दी कोई बजा हो, तां इक दुज्जे दी सेहन करी लिया, कने इक दुज्जे दे अपराध माफ करा: जियां प्रभुऐ साडे अपराध माफ किते, तियां ही तुसां भी माफ करा। 14 कने इना सारयां ला जरूरी गल्ल ऐ है की इक दुज्जे ला प्यार करा, इयां करणे ला तुसां पुरे तरीके ला इक जुट होई जाणा। 15 मसीह तुहाडे मना च शांति दे, तुसां सब इक ही शरीर दे हिस्से न, इस ताई तुसां इक दुज्जे सोगी जडी शान्ति मसीह दिदा है उसा शांतिया ला रेणे ताई सदयो न, कने तुसां धन्यवादी बणी रिया। 16 मसीह दे बचना दे बारे च हर बकत सोचा, ताकि ऐ सब केसी जो काबू करे जडा तुसां सोचदे कने करदे न; सिद्ध ज्ञान ला इक दुज्जे जो सिखा, कने चेताबनी दिया, कने अपने-अपने मने च धन्यवाद सोगी परमेश्वरे ताई भजन, स्तुतिगान कने आत्मिक गीत गा। 17 जडा भी तुसां बचना ला बोलदे न या जडा भी कम्म करा सब प्रभु यीशु दे नाऐ ला करा, कने उसला प्रभु परमेश्वरे दा धन्यवाद करा। 18 हे पत्रियों, अपने-अपने घरे बालयां दे अधीन रिया क्योंकि मसीह दे पिच्छे चलणे बालयां ताई ऐ ही ठीक है। 19 हे घरे बालयो, अपनी-अपनी लाडियां ने प्यार रखा, कने उना सोगी प्यारे ला बर्ताब करा। 20 हे बच्चो, सबना गल्लां च अपने-अपने माता-पिता दे हुकमा जो मन्ना

करा, क्योंकि प्रभु इसला खुश होंदा है। 21 हे माता पिताओं, अपने बचपन जो बार-बार डांटी करी तंग मत करा, इयां ना हो की उना दा दिल टूटी जा। 22 हे सेबकों, जडे इस संसारे च तुहाडे मालिक न, सारियां गल्लां च उना दे हुकमा दा पालन करा, माणुओं जो खुश करणे बालयां सांई दिखावे तांई नी, पर मने दिया सच्चाई कने परमेश्वरे दे डरे ने करा। 23 जडा कुछ तुसां करदे न, पुरे मने ने करा, ऐ सोची करी की माणुओं तांई नी पर प्रभु तांई करा दे न। 24 क्योंकि तुसां जाणदे की तुसां जो इदे बदले च प्रभु ला सै आशीष मिलणी है जडी परमेश्वरे तुहाडे तांई रखियो है। तुसां जिस मालिक दी सेवा करा दे न, सै मसीह है। 25 क्योंकि जडा कोई बुरा करदा रेंदा है, उसयो परमेश्वरे ला सजा मिलणी क्योंकि परमेश्वर कुसी दा पक्षपात नी करदा।

4 हे मालिकों, स्वर्ग च तुहाडा भी मालिक है, ऐ समझीकरी, अपने-अपने दासां सोगी न्याय कने इकोदिया व्यवहार करा। 2 लगातार प्रार्थना करदे रिया, कने जालू तुसां प्रार्थना करन तां सतर्क रिया कने हमेशा परमेश्वरे दा धन्यवाद करदे रिया। 3 कने इदे सोगी-सोगी साडे तांई भी प्रार्थना करदे रिया, की परमेश्वर साडे तांई बचन दा प्रचार सुणाने दा मोका दे, की असां मसीह दे उस भेद जो पुरे तरीके ला सुणाई सकन, इसा ही बजा ला मैं जेला च है। 4 कने प्रार्थना करा दा की मैं साफ तरीके ला कने खुलेआम मसीह दे बारे च दस्से। 5 हर मोके दा अच्छे ला इस्तेमाल करा ऐ दसणे तांई की तुसां विश्वासी न, कने जडे लोक यीशु मसीह पर भरोसा नी करदे उना सोगी समझदारिया ला बर्ताव करा। 6 उना ला हमेशा प्यारभाव ला गलबात करा, कने एसियां गल्लां करा जिसला सै तुहाडियां गल्लां च रूची लेन, अगर तुसां ऐसा करदे न, तां तुहांजो पता लगणा की उना जो कियां जबाब देणा है, जडे तुहाडे भरोसे दे बारे सबाल च उठादे न। 7 प्यारे मसीह भाई कने भरोसे दे लाइक सेवक, तुखिकुस जडा प्रभु यीशु मसीह च मेरा साथी है, मेरियां सारियां गल्लां उनी तुहांजो दस्सी देंगियां न। 8 उसयो मैं इस तांई तुहाडे बाल भेजया है, ताकि तुहांजो पता लगी सके की साडे क्या हलात न, कने सै तुहांजो भरोसे च मजबूत करी सके। 9 उदे सोगी उनेसिमस जो भी भेजया है; जडा भरोसे दे लाइक कने प्यारा मसीह भाई कने सै तुहाडे ही शेहरे दा है, उना तुहांजो ऐथू दियां सारियां गल्लां दे बारे च दसी देणा। 10 अरिस्तर्खुस जडा मेरे सोगी कैदी है, कने बरनबास दा भांजा मरकुस तुहांजो नमस्कार बोलदा है। जिदे बारे च तुहांजो पहले ही चिट्ठी मिली बेठियो है की अगर से तुहाडे बाल ओऐ, तां उसला ढंगे ला व्यवहार करनयो। 11 कने यीशु जिसयो युस्तुस बोलदे न, तुहांजो नमस्कार करदा है। यहूदी लोकां च बस ऐई तिन परमेश्वरे दे राज्य तांई मेरे साथी कने मिंजो उत्साहित करणे बाले न। 12 इपफ्रास जडा तुहाडे ही शेहरे ला है, कने मसीह यीशु दा दास है, तुहांजो नमस्कार करदा है। कने हमेशा तुहाडे तांई प्रार्थना करदा है, ताकि परमेश्वर तुहांजो भरोसे च मजबूत कने सिद्ध करे की तुसां परमेश्वरे दी इच्छा दा पालन करा। 13 मैं उदा गबाह है, कि सै तुहाडे तांई कने लौदीकिया शेहरे कने हियरापुलिस शेहरे दे लोकां तांई लगातार प्रार्थना करदा है। 14 प्यारे वैघ लूका कने देमास दा तुहांजो नमस्कार बोलदे न। 15 लौदीकिया शेहर दे मसीह भाईयां कने बेहणा जो कने नुमफास कने उदी घरे दी कलीसिया जो नमस्कार बोलनयो। 16 जालू ऐ

चिट्ठी तुहाडे ऐथू पढी जांगी, तां ऐसा करनयो की लौदीकिया शेहरे दिया कलीसिया च भी इसयो पढनयो, कने जडी चिट्ठी लौदीकिया ला ओणी उसयो तुसां भी पढनयो। 17 फिरी अरखिप्पुसे ला बोलनयो की “जडी सेवा प्रभु च तिजो दितियो है, उसा सेवा जो अच्छे तरीके ने पूरी करनयो।” 18 मैं, पौलुस तुहांजो नमस्ते करणे तांई चिट्ठी दा ऐ हिस्सा तुहांजो अपने हथे ने लिखा दा है, याद रखणा की मैं जेला च है, कने मेरे तांई प्रार्थना करनयो, तुसां पर परमेश्वरे दा अनुग्रह होंदा रे। आमीन।

1 थिस्सलुनीकियों

1 ऐ चिट्ठी मैं पौलुस, सिलवानुस कने तीमुथियुस दिया तरफा ला थिस्सलुनीकिया शेहर दिया कलीसिया दे ना लिखा दा है, जडे पिता परमेस्वर कने प्रभु यीशु मसीह च न। मैं प्रार्थना करता है की पिता परमेस्वर तुहांजो पर अपना अनुग्रह कने तुहांजो शांति दे। **2** असां अपणियां प्रार्थना च तुहांजो याद करदे कने हमेशा तुसां सबना दे बारे च परमेस्वरे दा धन्यवाद करदे न, **3** कने जालू असां अपने पिता परमेस्वरे ने प्रार्थना करदे न, तालू असां तुहाडे उना कम्मा जो याद करदे न, जडे तुसां भरोसे दिया बजा ला करदे न, कने जडिया सकत मेहनता ने तुसां मसीह भाईयां दी सहायता करदे न क्योंकि तुसां उना ने प्यार करदे न कने दुख तकलिफा जो सेहन करदे न क्योंकि तुहांजो आस है, की प्रभु यीशु मसीह जल्दी बापस ओणे बाला है। **4** हे मेरे मसीह भाईयो, तुहांजो ने परमेस्वर बड़ा प्यार करता है, असां जाणदे न, की परमेस्वरे तुहांजो अपने लोक होणे ताई चुण्या है। **5** क्योंकि प्रभु यीशु मसीह दा शुभसमाचार तुहाडे बाल सिर्फ अखरां च ही नी पर पबित्र आत्मा दिया शक्तिया, कने पूरी मजबुतिया ने तुहाडे बाल पूज्या है, तुहांजो पता है की तुहाडे उद्धार ताई तुसां बिच साडा चाल चलन कदिया था। **6** तुसां बडे भरी दुखां च थे पर तुसां पबित्र आत्मा दी दीतियो खुशिया सोगी शुभसमाचार जो अपनाई करी साडे उदाहरण कने प्रभु दे उदाहरण दा अनुसरण किता। **7** ऐथू दीकर की तुसां मकिदुनिया प्रदेश कने अखाया प्रदेशे दे सारे विस्वासियां ताई आदर्श बणीं गे। **8** क्योंकि तुहाडे ऐथू ला ना सिर्फ मकिदुनिया प्रदेश कने अखाया प्रदेशे च प्रभु दा बचन सुणया, पर तुहाडे भरोसे दी चर्चा हर पासे फेली गेई जडा परमेस्वरे पर है, हर जगा जिथू असां गे, ओथू सांझो लोक मिल्ले जिना सांझो तुहाडे भरोसे दे बारे च दसया, जडा परमेस्वरे पर है, इस ताई सांझो तुहाडे बारे च कुछ बोलणे दी जरूरत नी है। **9** क्योंकि सै लोक अपु ही दुज्जयां जो दसदे न की तुसां साडा स्वागत किता जालू असां तुहाडे बाल आऐ; कने तुसां कजो मूर्तियां ला दूर होईकरी परमेस्वरे बाल आऐ ताकि तुसां जिन्दे कने सच्चे परमेस्वरे दी सेवा करन। **10** कने तुसां स्वर्ग ला परमेस्वरे दे पुत्रे दे ओणे दी आस रखा दे न, जिसयो परमेस्वरे मरयां चे जिन्दा किता, मतलब की यीशुऐ जो, जडा सांझो परमेस्वरे दे ओणे बाले गुस्से ला बचादां है।

2 हे मसीह भाईयो, तुहांजो अपु ही पता है, साडा तुहाडे बाल ओणा फायदेमंद होया। **2** तुसां अपु ही जाणदे न की तुहाडे बाल ओणे ला पेला असां फिलिप्पी शेहरे च कितणे दुख झेले। फिर भी परमेस्वरे सांझो इतणी हिम्मत दिती, की तुहाडे शेहरे दे लोकां ला साडा इतणा बिरोध होणे बाद भी असां परमेस्वरे दा शुभसमाचार तुहांजो सुणया। **3** क्योंकि साडा उपदेश ना तां धोखा था, कने ना ही गलत इरादे ने, कने ना ही छलावा है। **4** परमेस्वरे सांझो काबिल समझीकरी शुभसमाचार दितया है, इस ताई असां माणुआं जो नी, पर असां मना जो परखणे बाले परमेस्वरे जो खुश करणे ताई उपदेश दिन्दे न। **5** तुहांजो पता है, की असां कदी भी चापलूसी दियां गल्लां नी करदे थे, क्योंकि असां ना ही कदी पैसे दे लालचे दे इरादे ने कुछ किता, परमेस्वर इसा गल्ला

दा गबाह है की असां ऐसे नी थे। **6** असां ना माणुऐ ला, ना ही तुहाडे ला कने ना ही कुसी होरसी ला आदर नी चांदे थे। पर मसीह दे प्रेरित होणे दिया बजा ला तुसां ला सहायता मंगणा साडा हक था। **7** पर जियां माता-पिता अपने बचयां जो पालदे न, तियां ही असां भी तुहाडे बिच रेई के इयुदी दीनता दसियो है। **8** असां तुहांजो सोगी इतणा प्यार करदे न की सिर्फ परमेस्वरे दा शुभसमाचार सुणे ताई ही नी पर तुहाडे ताई अपनी जान देणे ताई भी तैयार थे। इस ताई की असां तुहाडे सोगी बडा प्यार करदे थे। **9** हे मसीह भाईयो, तुसां साडी मेहनत कने प्यारे जो याद रखदे न, की असां इस ताई रात दिन कम्म धंधे करदे होये परमेस्वरे दे शुभसमाचारे दा प्रचार तुहाडे च किता, ताकि असां अपनी जरूरत ताई तुसां कुसी पर भी कोई बोझ ना बणन। **10** तुसां अपु भी कने परमेस्वर भी गबाह है, तुसां विस्वासियां सोगी साडा सभाव कितणा सच्चा, धर्मी कने निर्दोष था। **11** तुहांजो पता है, की जियां पिता परमेस्वर अपने बचयां सोगी बर्ताब करता है, तियां ही असां भी तुसां सबना जो उपदेश, कने प्रोत्साहित करदे, कने समझादे थे। **12** की तुसां अपनी जिन्दगी इस तरीके ला जिया जड़ी परमेस्वरे जो खुश करे, जडा तुहांजो अपने राज्य कने माहिमा च हिस्सेदार होणे ताई सददा है। **13** इस ताई असां भी हमेशा परमेस्वरे दा धन्यावाद करदे न; की जालू तुसां परमेस्वरे दा संदेश सुणया जडा असां प्रचार किता, तां तुसां उसयो माणुऐ दा नी पर परमेस्वरे दा सच्चा संदेश समझी के अपनाया, सै ही संदेश तुसां च कम्म करता है, जडे यीशु मसीह पर भरोसा रखदे न। **14** हे मसीह भाईयो, इस ताई तुसां भी परमेस्वरे पर भरोसा करणे बाले लोकां साई न, जडे यहूदी प्रदेश च रेदे न कने मसीह च न, क्योंकि तुहांजो भी अपने लोकां ला तदिया ही दुख मिल्ला जदिया यहूदी मसीह लोकां जो यहूदियां ला मिल्ला था। **15** उना यहूदियां जिना प्रभु यीशुऐ जो, कने परमेस्वरे दे संदेश देणेबालयां जो मारी दिता कने सांझो तंग किता, कने परमेस्वर उना ला खुश नी है, कने सै सारे माणुआं दा बिरोध करदे न। **16** सै सांझो होर जातियां जो ऐ दसणे ला रोकणे दी कोशिश करा दे थे की परमेस्वर उना जो किया बचाई सकदा है कने सै अपने पाप पर पाप जोडदे जांदे न; कने हुण अंत च परमेस्वर उना जो पक्का सजा देणेबाला है। **17** हे मेरे प्यारे मसीह भाईयो, जालू असां थोड़ी देरा ताई मने ला नी पर, असां शारीरक रूप ला तुहाडे सोगी नी थे, तां असां बडी इच्छा ला तिजो दिखणे ताई होर भी जादा कोशिश किती। **18** इस ताई असां (मतलब की मैं पौलुसे) इक बरी नी, पर केई बरी तुहाडे बाल ओणे दी सोची, पर शैतान सांझो तुहाडे बाल ओणे ताई रोकदा था। **19** साडी आस, खुशी या बडाई दा मुकट कुण है? ऐ तुसां ही होणे जालू साडे प्रभु यीशु मसीह फिरी मुडी करी ओणा है। **20** साडी बडाई कने खुशी तुसां ही न।

3 आखरी च जालू असां तुहांजो मिलयो बिना नी रेई सके, तां मैं पौलुस कने सिलासे एथेंस शेहरे च किल्ले रेणे दा फेसला किता। **2** कने असां तीमुथियुस जो जडा मसीह दे शुभसमाचारे च साडा भाई है, कने परमेस्वरे दा सेवक है, उसयो इस ताई तुहाडे बाल भेजया की सै तुहांजो प्रोत्साहित करे कने तुहाडे मसीह पर भरोसे जो मजबूत करे। **3** ताकि कोई इना दुखां दिया

बजा ला भरोसे च कमजोर ना होई जाऐ; क्योंकि तूसां अपु ही जाणदे न, की सांझो मसीह च दुख झेलणे पोणे न। 4 जालू असां तुहाडे ओथु रेंदे थे, उस बकत तुहांजो बोलदे थे कि, सांझो लोकां ला दुख झेलणे पोणे न, कने इयां ही होया, कने तूसां जाणदे भी हेन। 5 इसा बजा ला जालू मिंजो ला तुहांजो मिलयो बिना नी रिया गिया, तां मै तूसां लोकां दे भरोसे दा हाल जाणने ताई तीमुथियुस जो भेजया, क्योंकि असां डरदे थे, कुथी इयां ना हो की परिक्षा करणे बाले शैताने तुहाडी परिक्षा लेई हो, कने साडी मेहनत बेकार होई गेई हो। 6 पर हण तीमुथियुसे तुहाडे बखे ला आई करी तुहाडे भरोसे कने प्यार दा शुभसमाचार सुणाया। कने ऐ भी सुणाया, की तूसां हमेशा प्यारे ला मिजो याद करदे न, कने सांझो दिखणे दी इच्छा रखदे न, जियां असां तुहांजो दिखणे दी इच्छा रखदे थे। 7 इस ताई हे मसीह भाईयो, असां अपनी सारी दुख तकलिफां च जालू तीमुथियुस ला सुण्या की तूसां भरोसे च मजबूत न, तां सांझो बडी शांति मिल्ली। 8 क्योंकि हण तूसां प्रभु च टिकी रेंगे, तां इसला सांझो नोई जिंदगी मिलदी है। 9 कने जदेई खुशी तुहाडिया बजा ला सांझो अपने परमेश्वरे सामणे है, इसा खुशिया ताई तुहाडे बारे च असां कियां परमेश्वरे अगे धन्यावाद करन? 10 असां लगातार ऐई प्रार्थना करदे रेंदे न, की तुहांजो सोगी दुबारा मिली सकन, कने जडा जरूरी है तुहांजो सिखाई सकन, ताकि तूसां पुरे तरीके ला प्रभु यीशु मसीह पर भरोसा करी सकन। 11 साडी ऐ प्रार्थना है, की साडा पिता परमेश्वर कने प्रभु यीशु मसीह, तुहाडे ऐथू औणे ताई साडी सहायता करे की असां आई सकन। 12 असां ऐ भी प्रार्थना करदे न की प्रभु यीशु मसीह ऐसा करे कि, जियां असां तुहांजो ने प्यार करदे न, तियां ही तूसां भी इक दुज्जे ने प्यार करा, कने सारयां लोकां सोगी तुहाडा प्यार होर भी बदे कने बददा ही जा, 13 कने असां प्रार्थना करदे न ताकि सै तुहाडे मना जो ऐसा मजबूत करे, की जालू साडा प्रभु यीशु अपने सारे पबित्र लोकां सोगी बापस ओऐ, तां सै साडे पिता परमेश्वरे सामणे पबित्रता च निर्दोष साबित होन।

4 आखरी च हे मेरे मसीह भाईयो, असां प्रभु यीशु मसीह दे नाऐ ला तुहांजो ला बिनती करदे न, की तूसां इस तरिके ला जिंदगी जिया, जडी परमेश्वरे जो खुश करे, जियां असां तुहांजो सिखाया, कने तूसां तियां जिंदगी जिंदे भी हेन कने असां तुहांजो ऐसा करणे ताई होर भी उत्साहित करदे न। 2 तूसां जाणदे न कि प्रभु यीशु मसीह सांझो जडा अधिकार दितया है, उदे जरिये असां तुहांजो निर्देश दितयो न। 3 परमेश्वरे दी इच्छा ऐ है, की तूसां पबित्र बणन कने व्यभिचार मत करा, 4 तूसां चे हर इक माणु अपने शरीर पर काबू रखणा सीखी करी अपने शरीर जो पबित्र बणाई रखे कने उदी इज्जत करे। 5 कने तूसां जो ऐ कम्म होर जातियां सांई वासना दी इच्छा ला नी करणे चाह्दे, जडियां परमेश्वरे जो नी जाणदियां न। 6 ऐसे कम्म करणे ला सै अपने मसीह भाई दे खिलाफ पाप करदा है, कने ना ही कोई उस सोगी चलाकी करा, क्योंकि प्रभुये इना सारयां जो सजा देणी है, जडे इयुदियां चीजां करदे न; जदिया असां तुहांजो पेहेले भी बोलया कने समझाया था। 7 क्योंकि परमेश्वरे सांझो अपबित्र जिन्दगी जिणे ताई नी पर पबित्र जिन्दगी जिणे ताई सदया है। 8 इस ताई जडा इना हुकमा जो नी मनदा है, सै साडे हुकमा जो नी, पर

परमेश्वरे दे हुकमा जो नी मनदा है, जिनी अपनी पबित्र आत्मा तुहांजो दितियो है। 9 पर मसीह भाईयां दे प्यारे दे बारे च ऐ जरूरी नी है, कि मै तुहांजो कुछ लिखें, क्योंकि इक दुज्जे सोगी प्यारे ला रेणा तूसां अपु ही परमेश्वरे ला सिखया है; 10 कने सारे मकिदुनिया प्रदेशे दे मसीह भाईयां सोगी प्यार रखया है, पर हे मसीह भाईयो, असां तुहांजो ला ऐ बिनती करदे न की तूसां होर भी अगे बदे जा, 11 कने जदिया असां तुहांजो समझाया है, तियां ही शान्ति ने जिन्दगी जिया कने ना ही दुज्जयां दे कम्मा च दखल दिया कने अपने हथां ला कमाणे दी कोशिश करा। 12 ताकि जडे लोक यीशु मसीह पर भरोसा नी करदे, सै दिखी सकन की तुहाडा व्यवहार कदिया है, कने लोक तुहाडी इज्जत करन, कने तुहांजो कुसी भी जरूरतां ताई दुज्यां पर निर्भर ना होणा पोऐ। 13 हे मसीह भाईयो, असां चांदे न, की तूसां ऐ जाणी लिया की जडे मसीह च मरी गियो न, इना सोगी क्या होणा; इयां नी हो की तूसां दुज्यां सांई शोक करा जिना जो आस नी है की मरणे बाद भी जिन्दगी है। 14 असां भरोसा करदे न की यीशु मरया, कने जिन्दा होया, तां तियां ही परमेश्वरे उना जो भी जडे यीशु च सोई गियो न, यीशु मसीह सोगी बापस लेई ओणा है। 15 असां प्रभु यीशु मसीह दे बचना दे अनुसार तुहांजो ऐ बोलदे न, की असां जडे जिंदे न, कने प्रभु यीशु मसीह दे बापस ओणे दीकर बची रेंगे, तां जडे लोक पेहेले यीशु मसीह च मरी गियो न, उना पेहेले यीशु मसीह ने मिलणा। 16 क्योंकि प्रभु यीशु मसीह अपु ही स्वर्ग ला उतरणा; उस बकत प्रभु यीशुऐ जेरे ने हुकम देणा, कने प्रधान स्वर्गदूतां जेरे ला बोलाणा, कने परमेश्वरे दी तरही बजाणी; कने उस बकत जडे पेहेले यीशु मसीह पर भरोसा करदे होऐ मरी गियो न, उना मरयां चे जी पोणा है। 17 तालू इदे बाद असां जडे जिन्दे कने बचयो रेंगे, उना सोगी बदला च चुकी लेई जाणे, ताकि बदलां च प्रभु यीशु मिलन, कने उस बकते ला असां हमेशा प्रभु सोगी रेणा। 18 इना गल्लां ला इक दुज्जे जो दिलासा दिया करा।

5 हे मेरे मसीह भाईयो, तुहांजो ऐ दसणे दी जरूरत नी है, की प्रभु यीशु मसीह कालू ओणा है। 2 क्योंकि तूसां अपु जाणदे न की जियां राती जो चोर अचानक आई जांदा है, तियां ही प्रभु यीशु मसीह दा आगमन भी अचानक होणा। 3 जालू लोक बोलगे, ठीक ठाक है, कने कोई डर नी, तालू उना जो इकदम दुख तकलिफां दा सामणा करणा पोणा है, जियां गर्भवती जो इकदम पीड पौदी; तालू सै कुथी भी नदी नी सकदी, तियां ही सै उसा बडिया मुसीबता ला कुसी भी तरीके ला नी बची सकणा। 4 पर हे मसीह भाईयो, तूसां जडे नेहरे च नी न कने सै दिन तुहाडे पर चोरां सांई आई पोऐ जिस दिन यीशु मसीह बापस ओणा। 5 क्योंकि तूसां सारे जडे ज्योति ने रिशता रखदे न, कने दिने दी ओलाद न, असां ना तां राती ने, कने ना ही नेहरे ने रिशता रखदे न। 6 इस ताई सांझो अविश्वासियां सांई सोंदे नी रेन, पर जागदे कने सावधान रिया। 7 क्योंकि जडे सोंदे न, सै राती ही सोंदे न, कने जडे मतवाले होंदे न, सै राती ही मतवाले होंदे न। 8 पर असां तां दिने दी ओलाद न, इस ताई सांझो अपने पर काबू रखणा चाईदा। साडी भरोसा कने प्यार साडी रक्षा करे जियां कबच इकी सिपाइये दी रक्षा करदा है, कने साडे बाल उद्वारे दी आस है, कि असां हमेशा दिया सजा ला बची गियो न, जियां टोप सिपाइये जो बचादां है।

9 क्योंकि परमेश्वरे सांझो सजा देणे ताई नी चुणया है, पर इस ताई रखया की असां अपने प्रभु यीशु मसीहे ला उद्धार पाई सकन। 10 प्रभु यीशु मसीह साडे ताई इस बजा ने मरया, की असां चाऐ जिन्दे रेन, या मरी जान, जालू प्रभु यीशु मसीहे बापस ओणा तालू असां हमेशा उदे सोगी रेई सकन। 11 इसा बजा ने इक दुज्जे जो प्रोत्साहित करा, कने इक दुज्जे जो भरोसे च मजबूत होणे ताई सहायता करा, कने ऐसा तुसां करदे भी हेन। 12 हे मसीह भाईयो, असां तुसां ने विनती करदे न, की जडे तुहांजो चे बडी मेहनत करदे न, कने प्रभु च तुहाडे अगुवे न, कने तुहांजो शिक्षा दिन्दे न, उना दे हुकम मन्ना। 13 क्योंकि जडा सै तुहाडे ताई करदे न, उस ताई उना दी अच्छे ने इज्जत कने प्यार करा कने अपु चे मिली झुली की रिया। 14 हे मसीह भाईयो, असां तुहांजो ने विनती करदे न, उना जो चेतावनी दिया, जडे बडे आलसी न, डरफोकां जो हौसला दिया, जडे कमजोर न उना दी सहायता करा, सबना जो सेहनशीलता दस्सा। 15 ऐ ध्यान रखा! कोई कुसी ने बुराईया दे बदले बुराई ना करे; तुसां हमेशा इक दुज्जे कने सारयां ताई भले कम्म करणे च लगी रिया। 16 हमेशा खुश रिया। 17 लगातार प्राथना करदे रिया। 18 अपने हर हालातां च परमेश्वरे दा धन्यावाद करा; क्योंकि यीशु मसीह च तुहाडी ताई परमेश्वरे दी ऐई इच्छा है। 19 पबित्र आत्मा दे कम्मा जो लोकां दी जिन्दगी च होणे ला मत रोका। 20 ऐ मत सोचा की जडियां भविष्यवाणियां परमेश्वरे अपने लोकां जो दितियां सै कुसी कम्मे दियां नी न। 21 पर हर इक गल्ला दी परख करा ऐ जाणने ताई की सै परमेश्वरे दा संदेश है की नी, जडियां गल्लां खरियां न उना गल्लां जो ही अपना। 22 सारियां बुराईयां ला बची के रिया। 23 परमेश्वर जडा शांति दिन्दा है, तुहांजो हर तरा ने पबित्र करे; कने तुहाडी आत्मा, प्राण कने शरीर साडे प्रभु यीशु मसीह दे बापस ओणे दीकर पूरे निर्दोष कने ठीक रेन। 24 तुहांजो सदणे बाला भरोसे दे काबिल है, क्योंकि सै तुहांजो पबित्र होणे ताई सददा है, कने उनी पबित्र बणने दे काबिल भी बणाणा है। 25 हे मसीह भाईयो, साडे ताई प्राथना करा। 26 सारे मसीह भाईयां जो प्यारे ने नमस्ते करा। 27 मै तुहांजो प्रभु दा हुकम दिन्दा है, की ऐ चिठी सारे मसीह भाईयां जो पढी करी सुणा। 28 मै प्राथना करदा है की साडे प्रभु यीशु मसीह दा अनुग्रह हमेशा तुसां सारयां पर होंदा रे।

2 थिस्सलुनीकियों

1 ऐ चिट्ठी मैं पौलस सिलवानस कने तीमुथियुस दिया तरफा ला थिस्सलुनीकिया शेहरे दिया कलीसिया दे ना लिखा दा है, जडे पिता परमेश्वर कने प्रभु यीशु मसीह च न, 2 असां प्राथना करदे न की परमेश्वर तुसां पर अनुग्रह करे कने तुसां जो शांति दे। 3 हे मसीह भाईयो, तुहाड़े बारे च सांझो लगातार परमेश्वरे दा धन्यवाद करणा चाईदा। कने ऐ साडे ताई ठीक भी है, की तुहाडा भरोसा यीशु मसीह पर बददा जा दा है, कने तुहाडा प्यार भी इक दुजे ताई बददा जा दा है। 4 इस ताई परमेश्वरे दिया कलीसिया च तुहाड़े बारे च घमंड करदे न, की चाहे तुसां पर जितणे दुख तकलीफ आऐ, पर तुसां लगातार सबर ने उना दा सामणा किता कने प्रभु यीशु मसीह पर भरोसा करदे रे। 5 तुहाडा दुखां जो सेहणा तुसां जो इस काबिल बणादा है की तुसां परमेश्वरे दे राज्य जा जाई सकन, ऐ ही सच्चा सबूत है, की परमेश्वर सच्चा न्याय करदा है। 6 क्योंकि परमेश्वर हमेशा सही न्याय करदा है, परमेश्वरे उना जो जस्र दुख देणे, जडे तुहांजो दुख दिन्दे न। 7 कने उनी तुसां जो सुख देणा जडे हुण दुखे च न, कने सांझो भी सुख चैन देणा, ऐ उस बकत होणा जालू प्रभु यीशु मसीह अपणे शक्तिशाली स्वर्गदां सोगी स्वर्गे ला धधगती होई अग्नी के प्रगट होणा। 8 कने जडे परमेश्वरे जो नी पछेणदे, कने जिना साडे यीशु मसीह दे शुभसमाचारे जो नी मनया, परमेश्वरे इना जो सजा देणी। 9 परमेश्वरे उना जो अपणी मोजुदगी ला बाहर कडी देणा कने परमेश्वरे उना जो अपणिया शक्तिया कने महानता जो जाणने दी अनुमति नी देणी, कने उना जो हमेशा दी सजा देणी। (aiōnios g166) 10 ऐ उस रोजे होणा, जालू यीशु मसीह अपणे पबित्र लोकां च महिमा कने इज्जत पाणे ताई बापस ओणा, जडे लोक उस पर भरोसा रखदे न, तुसां भी उना लोकां सोगी होणा है जिना प्रभु यीशु दी महिमा करणी है, क्योंकि तुसां साडी गबाइया पर भरोसा किता। 11 इस ताई असां लगातार तुहाड़े ताई रोज प्राथना भी करदे न, की परमेश्वर तुहांजो उसा जिन्दगी जो जिणे दे काबील बणाऐ जिस ताई तुहांजो सदया है, कने सै तुहाडी हर इक भली इच्छा जो पूरा करे, कने हर उस कम्मे जो सफल करे जडा तुहाड़े भरोसे दा नतीजा है। 12 असां ऐ प्राथना करदे न की लोक तुहाडिया बजा ने प्रभु यीशु मसीह दी महिमा करन, कने तुसां जो भी इज्जत मिलणी क्योंकि तुसां उदे न। ऐ सब कुछ परमेश्वरे कने यीशु मसीह दे अनुग्रह ने होणा।

2 हे मसीह भाईयो, असां प्रभु यीशु मसीह दे बापस ओणे दे बारे च कुछ बोलणा चांदे न, जालू असां सबना उसला मिलणा है। 2 कोई भी भविष्यवाणी, या बचन, या उसा चिट्ठिया दिया बजा ने अपणे मना जो दुखी कने बेचेन मत होणा दिन्दे, जिना चिट्ठिया जो साडी लिखियो समझदे होन, कने उसा च दसया हो की प्रभु यीशु मसीह बापस आई गया है, कने तुसां घबरादे मत। 3 उना लोकां दा कोई भरोसा मत करदे जडे इना चीजां दे बारे च बुरा बोलदे न, क्योंकि प्रभु यीशु मसीह दे बापस ओणे ला पेहले लोकां परमेश्वरे दा बिरोध करणा है, कने सै पापी माणु जिसयो परमेश्वरे नरक च नाश करणा, उनी जस्र प्रगट होणा। 4 उनी परमेश्वरे दा कने उना सारियां मूर्तियां दा कने बाकी सारियां चिजां दा जिना जो लोक पूजदे न कने प्रभु बोलदे न,

बिरोध करणा है, कने उनी सारयां ला बडा होणे दा दाबा करणा, ऐथु दीकर की उनी पापी माणुऐ परमेश्वरे मंदरे च जाई करी बेई जाणा कने अपने आप जो परमेश्वर होणे दा दाबा करणा। 5 तुहांजो याद होणा है, जालू मैं तुहाड़े सोगी था, तां तुहांजो मैं केई बार ऐ गल्ल बोली थी। 6 हले दीकर सै बुरा माणु प्रगट नी होया है, क्योंकि कुछ ऐसा है जिनी उसयो रोकी रखया है, कने तुहांजो जस्र याद होणा सै क्या है जिनी उसयो रोकया है, फिरी जालू परमेश्वरे दा तय कितया बकत होणा तालू सै बुरा माणु प्रगट होणा। 7 क्योंकि बुरे माणुऐ दी शक्ति पेहले ला ही इस संसारे च कम्म करा दी है, पर कोई इक है जडा उदी शक्तिया जो रोकदा है। कने उनी इसयो लगातार रोकी रखणा जालू दीकर सै अपणे रस्ते ला ना हटी जाए। 8 तालू सै बुरा माणु प्रगट होणा, पर इदे बाद प्रभु यीशु मसीह ओणा है, कने यीशु मसीह उसयो अपणे हुकमे ने जडा यीशुऐ दे मुऐ ने निकलदा है कने अपणे तेज ने भस्म करी देणा है। 9 बुरे माणुऐ शैताने दिया शक्तिया सोगी ओणा है, कने उनी हर तरा दे झूठे चमत्कार, कने अनोखे कम्म करणे न, कने इना चमत्कारां जो दिखीकरी लोकां सोचना की ऐ सारे परमेश्वर करा दा है। 10 कने उनी बुरे माणुऐ हर तरा दे बुरे कम्म करणे न कने उना सारयां लोकां जो धोखा देणा जडे हमेशा दी मौत दे रस्ते पर चलदे न; क्योंकि उना उसा सच्चाईया पर भरोसा नी किता जिसा ने उना जो हमेशा दी जिंदगी मिलणी थी। 11 इसी बजा ला परमेश्वरे उना च भ्रम पैदा करी देणा ताकि सै बुरे माणुऐ दियां गल्लां पर भरोसा करन जडा उना जो सचाई ला भटकाई दिता। 12 परमेश्वरे उना सारयां जो सजा देणी, जिना प्रभु यीशु मसीह दे संदेश पर भरोसा नी किता कने बुराई दे रस्ते पर चले। 13 हे मसीह भाईयो, तुहाड़े ताई परमेश्वरे सामणे सांझो हमेशा धन्यवाद देणा चाईदा, तुसां प्रभु दे प्यारे न, क्योंकि परमेश्वरे शुरू ला पबित्र आत्मा दे जरिये तुहांजो पाप ला लग करी के कने सच्चाई पर तुहाड़े भरोसे दिया बजा ने तुहांजो उद्धार ताई चुपी लिया है। 14 परमेश्वरे तुसां जो बचाणे ताई शुभसमाचारे दा इस्तेमाल किता जिसदा असां प्रचार करदे न, ताकि तुसां प्रभु यीशु मसीह दी महिमा च हिस्सेदार होई सकन। 15 इस ताई हे मसीह भाईयो, टिकी रिया; कने लगातार साडी शिक्षा पर भरोसा करा, जडी असां तुसां जो दिती जालू तुहाड़े सोगी थे कने जडी चिट्ठिया च लिखी करी भेजी। 16 असां अपणे प्रभु यीशु मसीह ला प्राथना करदे न, कने साडे पिता परमेश्वरे जडा सांझो ला प्यार करदा है, उना दे अनुग्रह ला सांझो हमेशा शांति, प्रोत्साहन कने सच्ची आस मिल्ली है। (aiōnios g166) 17 मैं प्राथना करदा है की परमेश्वर तुहाड़े मना जो हिम्मत दे कने तुसां जो भले कम्मा कने बचन च मजबूत बणाऐ।

3 आखरी च मेरे मसीह भाईयो, साडे ताई प्राथना करा की, प्रभु यीशु मसीह दा बचन जल्दी ही सारियां जगा च फैली जाए, कने जडा इसयो सुणे सै इसयो मन्ने जियां तुसां बचन जो मनया। 2 कने ऐ भी प्राथना करा की परमेश्वर सांझो टेडे कने बुरे लोकां ला बचाये, क्योंकि मते सारे लोक न जडे यीशु मसीह दे बचना पर भरोसा नी करदे। 3 पर प्रभु सच्चा कने भरोसे लायक है; उनी तुहांजो शक्ति देणी कने उस शैताने ला तुहांजो बचाणा। 4 सांझो प्रभु च तुहाड़े पर पूरा भरोसा है, कने असां जडा-जडा कुछ तुहांजो करणे जो बोलया है, तुसां सिधुदा ही करा दे न कने करदे रेणा है। 5 असां प्राथना करदे

न की परमेश्वर तुसां जो इस काबिल बणाई दे की तुसां समझी सकन की परमेश्वर अपने लोकां ने कितणा प्यार करदा है कने कियां बचांदा है। 6 हे मसीह भाईयो, असां तुहांजो हुकम दिन्दे न जडा सांझो प्रभु यीशु मसीहे दितया है; कने अपने उना मसीह भाई बेहणा ने कोई रिशता मत रखा, जडे सुस्त कने उना शिक्षा जो नी मंदे जडियां असां तुहांजो दीतियां। 7 क्योंकि तुसां अपु ही ढंगे ने जाणदे न, की तुसां जो तियां ही जिंदगी जिणा चाईदी जियां असां जिया दे न; क्योंकि असां तुहाडे सोगी रे दे थे, तां असां सुस्त नी पर कम्म करदे थे। 8 कने कुसी ला रोटी मुफ्त नी खादी, पर मेहनत कने तकलिफा ने रात दिन कमांदे थे, ताकि असां अपनी कुसी भी जुर्रतां ताई तुसां पर निर्भर नी होणा पोए। 9 असां जादा मेहनत, इस ताई नी किती, की सांझो तुसां ला कुछ मंगणे दा कोई हक नी है; पर इस ताई किती की असां अपने आपे जो तुहाडे ताई आदर्श बणाई सकन, जिसने तुसां साडे साई जिन्दगी जीन। 10 कने जालू असां तुहाडे सोगी रेदे थे, तां तालू भी तुहांजो ऐई हुकम दिन्दे थे, की अगर कोई कम्म नी करणा चांदा, उसयो खाणा भी ना मिल्ले। 11 असां सुणदे न, की कितणे ही लोक तुहाडे बिच सुस्त कने कोई कम्म नी करदे न, कने होरनी दे कम्मा च दखल दिन्दे रेदे न। 12 ऐसे लोकां जो असां उस हक ने हुकम दिन्दे न, जडा प्रभु यीशु मसीहे सांझो दितया है, की चुपचाप ने अपना कम्म करिके अपनी रोटी खा। 13 कने हे मसीह भाईयो, चाहे तुसां जो कितणे भी दुख तकलीफ होन तुहांजो भले कम्म करणे दी कोशिश नी छडणी चाईदी। 14 अगर कोई साडिया इसा चिट्ठिया दे संदेश जो नी मन्ने, तां उस पर नजर रखा की सै कुण है, कने उदे सोगी संगती छडी दिया, जिसने उसयो शर्मिंदगी महसूस हो। 15 उसने इयां बताव मत करा की जियां सै तुहाडा दुशमण है, पर उसयो समझा जियां तुसां अपने भाईऐ जो समझादे न। 16 असां प्राथना करदे न की प्रभु यीशु मसीह जडा शांति दा दाता है, अपु ही तुहांजो हमेशा कने हर तरा ने शांति दे, प्रभु हमेशा तुसां सारयां सोगी रे। 17 मै पौलुस अपने हथे ने नमस्ते लिखदा है; हर चिट्ठिया दे आखरी च इयां ही लिखदा है, इस ताई की सारयां जो पता चली जाए की ऐ चिट्ठी मेरिया तरफा ला है। 18 मै प्राथना करदा है की साडे प्रभु यीशु मसीह दा अनुग्रह हमेशा तुसां सारयां पर होंदा रे।

1 तीमथियुस

1 मैं पौलुस जडा साडे उद्धारकर्ता परमेश्वर दे हके ला, प्रभु यीशु मसीहे, जिस पर साडी आस है, जिना मिंजो प्रेरित होणे ताई चुण्या, 2 तीमथियुस मैं ऐ चिट्ठी तिजो लिखा दा है, तू मेरे अपने पुत्रे साई है क्योंकि तू भी प्रभु यीशु मसीह पर भरोसा करदा है। मैं ऐ प्राथना करदा है की पिता परमेश्वर, कने साडा प्रभु यीशु मसीह, तिजो हमेशा अनुग्रह, दया कने शांति दिन्दा रे। 3 तीमथियुस जियां की तू जाणदा है, की इफिसुस शेहरे च कुछ ऐसे लोक न जडे झूठी शिक्षा दिन्दे न, सै लगातार झूठी कहाणियां कने पूर्वजां दियां लम्बियां सूचियां दे बारे च सिखांदे न। जालू मैं इफिसुस शेहरे ला मकिदुनिया प्रदेश दिया जगा जो जाणे जो तैयार था, तां मैं तिजो इफिसुस शेहरे च ही स्कणे ताई बोलया ताकि तूसां उना लोकां जो बोली सकन की ऐसी शिक्षा मत दिया। जालू सै ऐसी शिक्षा दिन्दे न, तां लोक बेहस करदे न, जिसदा नतीजा ऐ निकलदा है, की सै गुरु सै नी करदे जडा परमेश्वरे उना जो करणे ताई बोलया है, जिसयो सै परमेश्वरे पर भरोसे करणे ने ही करी सकदे न। 5 तिजो हुकम देणे दी बजा ऐ है की तू हर इक जणे ताई भले मने ने, खरी अंतरात्मा ने, कने सच्चे भरोसे ने प्यार पैदा हो। 6 झूठे गुरुओ इना सारियां चीजां जो करणा बंद करी दितया है, जडे बेकार दियां गल्लां बोलदे न, 7 ऐ झूठे गुरु उना व्यवस्था जो सिखाणे बालयां साईं बणना चांदे न, जडे मूसा दिया व्यवस्था जो अच्छे ला जाणदे न, पर सै असल च कुछ भी नी जाणदे न कि सै दुज्जयां जो क्या सिखाणे की कोशिश करा दे न कने इतणे आत्मविश्वास सोगी उस पर अड्डी रेदे न। 8 असां जाणदे न की मूसा दी व्यवस्था अच्छी है अगर कोई इसा जो ढंगे ने सिखावे तां। 9 सांझो पता है की मूसा दी व्यवस्था धर्मी लोकां ताई नी पर अधर्मियां, निरकुशां, भक्तिहीनां, पापियां, अपबित्र कने अशुद्ध लोकां, माता-पिता जो मारणे बाले, हत्यारे, 10 व्यभिचारियां, पुष्पगामियां, माणुऐ जो बेचणे बाले, कने झूठ बोलणे बाले, कने झूठी कसम खाणे बाले, कने इना जो छडी करी खरे उपदेशां दे सारे विरोधियां ताईं बणाईयो है। 11 ऐ शिक्षा धन्य परमेश्वरे दी महिमा दे शुभसमाचारे पर आधारित है, जिनी मिंजो दुजयां जो सुणाने ताईं शुभसमाचार दितया है। 12 मैं अपने प्रभु यीशु मसीह दा धन्यावाद करदा है, जिना मिंजो शक्ति दिती, कने मिंजो भरोसे दे काबिल समझीकरी अपनी सेवा ताईं चुण्या। 13 मेरे विश्वासी बणने ला पेहले, मैं यीशु मसीह दी बुराई करदा था, विश्वासियां जो मारदा कुटदा था, कने उना ने बड़ा बुरा बर्ताब करदा था; तमी मिंजो पर दया होई, क्योंकि मैं तालू दीकर यीशु मसीह पर भरोसा नी कितया था, इस ताईं नी समझदा था की जडा मैं करा दा है सै गलत है। 14 कने साडे प्रभुये लगातार अपना अनुग्रह मिंजो पर किता, कने उनी मिंजो भरोसा कने प्यार दिता क्योंकि मैं यीशु मसीह सोगी इक होई गया था। 15 ऐ गल्ल सच्च है कने मनणे कने भरोसे दे काबिल है, की प्रभु यीशु मसीह पापियां दा उद्धार करणे ताईं इस संसारे च आया, कने उना चे सारयां ला बहू पापी मैं है। 16 पर यीशु मसीह दया मिंजो पर इस ताईं किती, क्योंकि सै दसणा चांदा था की मिंजो माफ करणे ला सै किठणा सेहनशील है, जिनी सबना ला जादा पाप कितयो थे, मेरी जिन्दगी दुज्जयां ताईं उदाहरण है, जिना

बादे च यीशु मसीह पर भरोसा करणा है, कने हमेशा दी जिन्दगी जो हासिल करणी है। (aiōnios g166) 17 हुण युगां-युगां दे राजा दी, कदी नी नाश होणे बाले कने कदी नी दिखयो कने इकलोते सच्चे परमेश्वरे दी इज्जत कने महिमा युगां-युगां दीकर होंदी रे। आमीन। (aiōn g165) 18 हे पुत्र तीमथियुस, मैं तिजो ऐ हुकम दिन्दा है, की तू उना भविष्यवाणियां जो याद कर जडियां परमेश्वरे दे संदेश देणेबालयां तेरे ताईं कितियां थियां, तू इना गल्लां जो झूठे गुरुआं दे खिलाफ हथियारे साईं इस्तेमाल कर। 19 तुसां जो लगातार यीशु मसीह पर भरोसे च बणी रेणा कने साफ अंतरात्मा रखणी चाईदी। पर केई लोकां अपनी अंतरात्मा जो खराब करी दितया है कने उना मसीह पर भरोसा करणे की काबलियत जो खत्म करी दितया है, ठीक तियां ही जियां इक जाज कुसी चिजा ने भजी करी डुबी जांदा है। 20 उना चे ही हमिनयुस कने सिकंदर न, मैं उना जो कलीसिया ला बाहर कडी दिता कने शैताने दिया शक्तिया दे हवाले करी दिता, की सै परमेश्वरे दी बुराई करणा ना सिखन।

2 सारयां ला जरूरी बिनती ऐ है की, प्राथना, निवेदन कने धन्यावाद सारे माणुऐ ताईं करा। 2 कने राजयां कने सारे उच्चे पदां दे अधिकारियां ताईं प्राथना करा, की असां सुख शान्ति कने सुरक्षा ने अपनी जिन्दगी जी सकन, ताकि असां परमेश्वरे दी भक्ति करी सकन कने साडा बर्ताब दुज्जयां ताईं अच्छा होई सके। 3 लोकां ताईं इशुदियां प्राथना करणा साडे उद्धारकर्ता परमेश्वरे जो खरा लगदा है, 4 क्योंकि परमेश्वर चांदा है, की सारयां लोकां दा उद्धार हो कने सै यीशु मसीह दी सच्ची शिक्षा दा ज्ञान पाई सकन। 5 क्योंकि सिर्फ इक ही परमेश्वर है, कने इक ही माणु है जडा परमेश्वर कने माणुऐ जो मिलादां है, सै माणु प्रभु यीशु मसीह है जडा माणुऐ दे स्मे च पैदा होया, 6 यीशु मसीह अपने आपे जो सारयां लोकां दे पापां कने हमेशा दी मौत छुटकारे ताईं बलिदान करी दिता, ऐ करिरी परमेश्वरे सही बक्ते पर साबित किता की, सै चांदा है की सारे लोक बच्ची जान। 7 इसा बजा ने, परमेश्वरे मिंजो शुभसमाचार दा प्रचारक कने इक प्रेरित होणे ताईं चुण्या है। उनी मिंजो होर जातियां ताईं भरोसे दा सच्चा संदेश देणे ताईं चुण्या, मैं झूठ नी बोलदा, सच्च बोला दा है। 8 मैं चांदा है की, जालू तूसां परमेश्वरे दी अराधना करणे ताईं गिठे होंदे न, कने सै मर्द जडे पबित्र जिन्दगी जिन्दे न, बिना गुरुसे कने पूरी शरदा ने अपने हथ उपर चुकी करी प्राथना करा। 9 इयां ही मसीह जनानिया जो भी सही ढंगे दे कपडे पांणा चाईदे, जडे तुहाडे शरि जो ढंगे ने ढकी सकन, ना की ऐसे होन की सै मर्दा जो आकर्षित करन; कने तुहाडे बालां दा अंदाज ऐसा ना हो की लोकां जो आकर्षित करे, 10 पर अपने आपे जो दुज्जयां ताईं भले कम्म करी के छेल बणा, क्योंकि परमेश्वरे दी भक्ति करणे बालियां जनानिया ताईं ऐई सही है। 11 जालू मर्द विश्वासी लोकां जो सिखा दे होन, तां सारी जनानियां जो चुपचाप कने बडी इज्जता ने सुणना कने सिखणा चाईदा। 12 मैं बोलदा है, की जनानिया मर्दा जो शिक्षा ना देन कने ना ही उना पर हुकुम चलान जालू सै यहदी जंज घर च गिठे होंदे न, पर जनानिया चुपचाप रेन। 13 ऐ मैं इस ताईं बोलदा है क्योंकि परमेश्वरे पेहले मर्द बणाया जिसदा ना आदम था, उदे बाद जनानी बणाई जिसा दा ना हव्वा था। 14 कने इक होर बजा ऐ है, सै हव्वा ही थी जिसयो शैताने बहकाया था,

आदम नी था। ऐसा करिके हव्वा परमेश्वरे दा नियम तोडया। 15 पर परमेश्वरे जनानिया जो बच्चे पैदा करणे दिया बजा ने बचाई लेणा है, अगर उसा दा मन शुद्ध है कने मसीह च अपने भरोसे ला भटकदी नी है, होर लोकां ने प्यारभाव रखदी, कने इक निर्दोष जिन्दगी जिन्दियां न।

3 ऐ गल्ल सच्ची कने भरोसे दे काबिल है, की जडा कलीसिया दा अगुवा बनना चांदा है, तां सै इज्जतदार कम्मा दी इच्छा रखदा है। 2 इस तांई ऐ जरूरी है की अगुवा निर्दोष हो, इक ही घरे बाली हो, सेहनशील, अच्छा हो, इज्जतदार हो, परोंणया दा इज्जत करणे बाला, कने परमेश्वरे दा बचन सिखाणे च काबिल हो। 3 शराबी या मारकुटाई करणे बाला ना हो; पर दयालु हो, शान्तिप्रिय हो, कने ना पैसे दा लालची हो। 4 अपने घर परिवार जो ढंगे ने सम्भालदा हो, कने अपने बचयां जो आदर ने अपना केहणा मण्णा सिखांदा हो। 5 अगर कोई अपने ही घर परिवारे जो सम्भालना नी जाणदा हो, तां सै परमेश्वरे दी कलीसिया जो भी नी सम्भाली सकदा है। 6 कने ऐसा ना हो की जिनी नौआ-नौआ भरोसा कितया हो, सै घमंडी होई जाए कने उसयो शैताने सांई सजा मिल्ले। 7 कने संसारिक लोकां च भी उदी अच्छी इज्जत हो, इयां ना हो की लोक उदी बुराई करदे होन कने शैताने दे फंदे च फंसी जा। 8 इयां ही कलीसिया च सेवक भी इयोदे होन जिना दी लोक इज्जत करन, कने इमानदार होऐ, शराबी नी होऐ, सै ऐसा माणु नी होणा चाईदा जडा पैसे तांई कुछ भी करे; 9 कने उस बाल साफ अंतरात्मा हो, जिसने सै लगातार ऐ भरोसा करे की परमेश्वरे जडी शिक्षा दितियो है सै सच्ची है। 10 कने ऐ भी सेवक बणने ला पहेले परखणे चाइदे, अगर कोई भी इना अंदर दोष नी तोपी सके, तां सै सेवकां दे कम्म करन। 11 इयां ही सेवका दियां घरे बालियां भी इयुदियां होणा चाईदियां जिना दी लोक इज्जत करन, दोष नी लाणे बाली हो, अकली ने कम्म करणे बाली हो कने सारियां गल्लां च भरोसे दे काबिल होणी चाइदी। 12 कलीसिया दे सेवक अपनी घरे बालिया ला बफादार हो कने अपने बाल-बचयां कने अपने परिवारे जो ढंगे ने सम्भालने बाला हो। 13 क्योंकि जडे सेवके दा कम्म अच्छे ने करी सकदे न, उना जो लोकां ला अच्छी इज्जत मिलदी है, सै हिम्मत ना येीशु मसीह पर भरोसे दे बारे च बोली सकदे न। 14 मै तेरे बाल तोल्ले ओणे दी आस रखीकरी भी ऐ गल्लां तिजो इस तांई लिखा दा है, 15 अगर मेरे ओणे च देर होईया तां तिजो इसा गल्ला दी जानकारी रे की, परमेश्वरे दे परिवारे दे लोकां दा बर्ताब कदिया होणा चाईदा। परमेश्वर दा प्यार जिन्दे परमेश्वर दी कलीसिया है, ऐ इयां ही सच्ची शिक्षा दा साथ दिन्दे न कने बणाई रखदे न, जियां इक मजबूत नि कने खम्बे घरे जो मजबूत करदे न। 16 इंदे च कोई शक नी की जडी शिक्षा परमेश्वरे प्रगट कीती सै सच्ची है, जिसयो मना नी करी सकदे मतलब की, येीशु मसीह माणु बणी करी आया कने, पबित्र आत्मा ला साबित होया की परमेश्वरे दा पुत्र है, कने स्वर्गदां जो मिल्ला, कने महिमा दे स्वर्ग च चुकी लिया, कने चेलयां उदा शुभसमाचार हर जगा प्रचार किता कने, मते सारे संसारे दे लोकां उस पर भरोसा किता।

4 पबित्र आत्मा साफ-साफ बोलदी है, की आखरी बकते च कुछ लोकां मसीह शिक्षा पर भरोसा करणा छडी करी उना बुरियां आत्मा दियां शिक्षा पर भरोसा करी के अपनाई लेणा जिना उना जो भटकाई देणा। 2 झूठे गुरु धोखेबाज न, उना जो नी पता लगणा की सै जडा करा दे न सै सही है की नी, क्योंकि उना दी अंतरात्मा जडी सही कने गलत च फेसला करदी है, सै मरी गियो है, जियां कि इक गर्म लोहे ला उना जो फुकी दितया हो, 3 इयोदे लोक सिखांदे न की बियाह करणा कने खाणे दियां केई-केई चिंजा खाणा गलत है, पर परमेश्वरे हर तरा दा खाणा मसीह पर भरोसा करणे बालयां तांई बणाया है, जडे प्रार्थना दे बाद धन्यवाद करिके खाणे दी सच्ची शिक्षा जो जाणदे न। 4 क्योंकि परमेश्वरे दी बणाईयो हर इक चीज खरी है, अगर असां परमेश्वरे जो धन्यवाद करी के खान तां असां हर तरा खाणा खाई सकदे न, 5 क्योंकि परमेश्वरे दे बचन कने प्रार्थना ला हर तरा दा खाणा शुद्ध होई जांदा है। 6 अगर तू मसीह भाई बेहणा जो लगातार ऐ शिक्षा याद दिलांदा रे, की जडी शिक्षा मै तिजो दिती, कने तू मनी भी है कने तू भरोसे दे संदेश कने अच्छी शिक्षा ला मजबूत होया है, तां तू येीशु मसीह दा अच्छा सेबक है कने इसला तेरा पालन-पोषण हमेशा होंदा रे। 7 बणी बणाईयां कहाणियां च बकत खराब मत करा, जिना ला परमेश्वरे जो इज्जत नी मिलदी, तुहांजो अपने आपे जो लगातार सिखांदे रेणा चाईदा की अपनी जिन्दगी ने कियां परमेश्वरे जो इज्जत देई सकदे न। 8 क्योंकि व्यायाम करणे ने शरीर जो घट फायदा होंदा है, पर परमेश्वरे दी भक्ति सारियां गल्लां तांई फायदेमंद है, क्योंकि ऐ माणुऐ जो इनाम देंगे दा बायदा करदा है जालू सै इसा धरती च जिन्दा रेंदा है कने मरणे बाद भी ऐ इनाम मिलणा। 9 ऐ गल्ल सच्च कने भरोसा करणे दे काबिल है। 10 असां जादा मेहनत कने कोशिश इसी तांई करदे न की असां उसा जिन्दगी जो पाई सकन, जिदे तांई साडी आस जिन्दा परमेश्वरे पर है, जडा सारयां दा परमेश्वर है कने जडे उस पर भरोसा करदे न उना दा उद्धारकर्ता है। 11 भरोसा करणे बालयां जो इना गल्लां दा हुक्म देईकरी सिखा की सै इना गल्लां जो मनन। 12 इस ढंगे ने जिन्दगी जिया की कोई भी तेरी बेईजती ना करे; पर तुसां दे बचन, तुहाडा बर्ताब, तुहाडा दुज्जयां तांई प्यार, तुहाडा मसीह पर भरोसा कने तुहाडी निर्दोष जिन्दगी उना भरोसा करणे बालयां तांई इक आदर्श बणा चाईदी, जडे तुसां जो अगुवा मंदे न। 13 जालू दीकर मै तुहाडे बाल नी ओंदा तालू दीकर पबित्र शास्त्र लोकां जो पढ़ने, कने मतलब दसणे च कने सिखाणे च लगी रे। 14 उना गल्लां जो याद रख जालू अगुवां तिजो पर हथ रखे, कने परमेश्वरे उना जो इक संदेश दितया है की तिजो तेरी खास योग्यता दे बारे च दस्से, जडी परमेश्वरे तिजो दितियो है, इसा योग्यता जो भुलदा मत। 15 इना गल्लां पर लगातार ध्यान ने अभ्यास कर, कने अपने आपे जो इना गल्लां तांई पुरे तरीके ने समप्रित करी दे, ताकि हर कोई दिखी सके की तुसां अपने भरोसे च बदा दे न। 16 ध्यान रखा की तुसां कियां जिया दे न कने क्या सिखा दे न, इना गल्लां पर टिकी रिया, क्योंकि अगर तू ऐसा करदा रेंगा, तां तू खुद जो कने जडे तिजो सुणदे न दोनों जो न्याय बाले दिने बचाई लेणा है।

5 कुसी भी सियाणे माणुऐ दी बेजती करणे दे इरादे ने मत झिडकां दिन्दे; उसयो इज्जता ने समझा जियां की सै तेरा अपना पिता है, कने अपने ला

छोटयां जो इयां समझा जियां की सै तेरा अपने भाई है; 2 बजुर जनानिया जो इयां समझा जियां की सै तेरी अपनी माता है, कने जवान बेहणा जो पूरी पबित्रता ने समझा जियां की सै तेरी अपनी बेहण है। 3 उना विधवां जनानियां दी इज्जत कने उना दी देखभाल करा जिना दी देखभाल करने बाले कोई नी है। 4 अगर कुसी विधवा दे बच्चे, या नाती-पोते होन, तां सै पेहले अपने घर परिवारे दी जिम्मेदारी पूरी करे, जियां इक मसीह भरोसा करने बालयां जो करणा चाईदा, कने अपने माता-पिता जो उना दा हक देणा सिखे, क्योंकि ऐ सब परमेस्वर जो पसंद है। 5 जिसा विधवा दा कोई देखभाल करने बाला नी है, सै परमेस्वर पर ही आस रखदी है, कने दिन रात बिनती कने प्रार्थना करिरी परमेस्वर ला सहायता मंगदी है। 6 पर जड़ी विधवा अपना सारा बक्त एशो अराम च करदी है, सै शरीरिक स्पे च तां जिन्दा न, पर आत्मिक रूप च मरी गियां न। 7 भरोसा करने बालयां जो इना गल्लां दा हुकम दे, ताकि उना पर कोई दोष नी लाई सके। 8 अगर कोई अपण्यां रिश्तेदारां दी, कने खासकर अपने परिवारे दी देखभाल ना करे, तां उनी अपना भरोसा छडी दितया है, कने भरोसा नी करने बालयां ला भी बुरा बणी गिया है। 9 उना ही विधवा दे नां दर्ज करा जडियां सठा सालां ला जादा उमरा दिया होन, कने सै अपने घरे बाले ला बफादार रियो हो, 10 कने अपने भले कम्मा दिया बजा ला उदा ना हो, जिना अपने बाल बचयां दा अच्छे ने पालन-पोषण कितया हो; कने प्रोण्यां दी ठीक ठाक सेवा कीतियो हो, कने भरोसा करने बालयां दी सेवा इक दासिया साईं किती हो, दुखी लोकां दी सहायता कितियो हो, कने हर इक भले कम्मा च मन लाया हो। 11 पर जवान विधवां दे ना दर्ज मत करदे, क्योंकि जाल् उना दी शारीरिक इच्छां इक विधवा दे स्पे च मसीह दी सेवा करने दे वायदे ला जादा बदी जां दियां न, तां सै मसीह ला दूर होईकरी के दुज्जा बियाह करणा चां दिया न, 12 दुज्जा बियाह करिके सै अपने आपे जो दोषी बणाई दिन्दी है, क्योंकि उना अपना पेहला बायदा पूरा नी किता। 13 इदे सोगी सै घरे-घरे फिरी करी सुस्त होणा सिखदियां न, कने सिर्फ सुस्त होणा ही नी, पर दुज्जां दे बारे च चुगली निंदा करदियां न कने दुज्जां दे कम्मा च दखल भी दी दियां न, कने बुरियां गल्लां बोलदियां न, कने ऐसियां गल्लां करदियां जडियां इना जो नी करणा चाई दियां। 14 इस ताई मै ऐ सलाह दिन्दा है, की जवान विधवां जो बियाह करी लेणा चाईदा; कने बच्चे जमन कने घरबार संभालन, कने कुसी भी दुश्मणे जो, इना जो बदनाम करने दा मौका नी दे। 15 मै ऐ इस ताई बोलदा है क्योंकि केई बिधवां ऐसियां न जिना परमेस्वर दे हुकमा जो मनणा छडी दीतिया है, कने तियां ही करदियां न जियां शैतान चांदा है की सै करन। 16 अगर कुसी मसीही परिवारे च कोई विधवा हो, तां सेई उसा दी सहायता करन ताकि उसा दा भोज कलीसिया पर ना ओए, ताकि कलीसिया ऐसी विधवां दी देखभाल करी सके जिना दी देखभाल करने बाला कोई नी है। 17 जडे अगुवे अपना कम्म अच्छे ने करदे न, सै दो गुणा इज्जत कने मजदूरी दे काबिल समझे जान, खासकर सै जडे परमेस्वर दे बचन जो मेहनता ने सिखादे कने प्रचार करदे न। 18 ऐ पबित्र शास्त्र लिखया है, की गांण गांदे बेले दांदे दा मुं मत बनदे, होर ऐ भी लिखया है, “की इक मजदूर जो उदी मेहनत दी मजदूरी लेणे दा हक है।” इस ताई कलीसिया जो अपने अगुवे

जो मजदूरी देणी चाईदी। 19 अगर अगुवे पर कोई दोष लगांदा है तां तुसां तालू दीकर उस दोषे जो मत मन्ना जालू दीकर दो या तिन गबाह बोलन की असां इसयो खुद गलत कम्म करदे दिखया है। 20 तुसां जो उस भरोसा करने बालयां जो जडा पाप करदा है, सारयां सामणे डांटी करी समझाई दिया, ताकि होर भरोसा करने बाले लोक पाप करने ला भी डरन। 21 परमेस्वर, कने मसीह यीशु, कने स्वर्गदूतां दी मोजदगी च, मै तिजो चेतावनी दिन्दा है, की तू कुसी इकी दा पक्ष मत ले, साबना ने इकोदिया बर्ताब कर। 22 कुसी पर भी तालू दीकर हथ रखीकरी अगुवा नियुक्त मत करा जालू दीकर सै साबित नी करे की सै प्रभु यीशु सोगी बफादार है, अगर तू इयां करदा है तां तू भी उदे पापां दा हिस्सेदार है; अपने आपे जो पापां ला दूर रखा। 23 भविष्य च बस पाणी ही पिणे बाला मत बणदा, पर अपने पटे ताई कने बार-बार बीमार होणे दिया बजा ने थोडा कदी-कदी दाखरस दवाई साईं पी लिया करा। 24 मै, जल्दबाजी च कुसी जो अगुवा नी बणाणे ताई इस ताई बोलया क्योंकि कुछ लोकां दे पाप तां जल्दी सामणे आई जांदे न, कने न्याय होणे ला पेहले ही सै सारे भरोसा करने बालयां सामणे दोषी न, पर कुछ लोकां दे पाप बडे बकते बाद सामणे ओदे न। 25 तियां ही कुछ भले कम्म करदे न, सै कम्म दुज्जे भरोसा करने बालयां दे सामणे ओदे न, अगर ऐ कम्म भरोसा करने बालयां सामणे नी ओदे न, फिरी भी उना इना कम्मा जो जाणी लेणा।

6 जितणे भी भरोसा करने बाले गुलाम न, इना जो अपने-अपने मालिकां दी इज्जत करणी चाईदी, ताकि दुज्जे लोक परमेस्वर दी कने साडी शिक्षा दी बुराई ना करन। 2 जिना दे मालिक भरोसा करने बाले न, उना जो मसीह भाई होणे दिया बजा ला पूरी इज्जत दिया, कने उना दी होर भी जादा सेवा करा, क्योंकि जडे सेवा ला फायदा लेंदे न, सै उना ला मसीह भाई साईं प्यार करदे न। इना गल्लां दा उपदेश करदे रिया कने लोकां जो भी करणे जो बोला। 3 अगर कोई झूठी शिक्षा दिन्दा है, कने साडे प्रभु यीशु मसीह दे संदेश कने परमेस्वर दी भक्ति दी शिक्षा जो नी मनदा है, 4 तां सै घमंडी है, कने सै कुछ नी समझदे न, पर सै अखरां दे मतलब जो लेईकरी दुज्यां सोगी बेहस कने झगडा करणा चांदे न, जिसा बजा ने जलन, लड़ाई, दुज्यां दी निंदा, 5 कने दिमागे च बेकार शक भई जांदा है, कने जडे सच्च ला भटकी गियो न उना माणुआं च लड़ाईयां होई जां दियां न, कने ऐ सै न, जडे परमेस्वर दी भक्ति जो कमाईया दा जरिया समझदे न। 6 पर साडे ताई ऐई खरा है की, असां सै कम्म करन जडे परमेस्वर जो खुश करदे न, कने उस च खुश रिया जडा परमेस्वर सांझो दितया है। 7 क्योंकि असां इस संसारे च कुछ भी लेईकरी नी आयो न, इस ताई ना ही कुछ लेईकरी जाई सकदे न। 8 अगर साडे बाल खाने पीणे कने पाणे ताई है, तां इसी पर सांझो खुश रेणा चाईदा। 9 कने जडे बडे अमीर होणा चांदे न, सै लोक असानिया ला पाप दे जाले च फसी जांदे न, जियां इक जानवर फंदे च फसी जांदा है, सै ऐसियां चीजां करणा चांदे न जडियां बेकार कने नुकसानदायक न, इना इच्छा उना जो बर्बाद कने खत्म करी देणा। 10 क्योंकि पैसयां दा लालच सारियां बुराईयां दी जड है, केई लोक मसीह दियां शिक्षा पर भरोसा करणा छडी दिन्दे न, क्योंकि सै बडे

जदा अमीर होणा चांदे न, कने सै बडे दुखां च पेई जांदे न, जियां इकी माणुऐ अपने आपे जो हथियारे ने बिनी लियो हो। 11 पर तू, तीमुथियुस जडा परमेश्वरे दा सेवक है, तू इना सारियां गल्लां ला दूर रे; कने धर्म, भक्ति, भरोसा, प्यार, सबर, कने नम्रता दा पिच्छा कर। 12 जियां इक अच्छा सिपाई लडाईया दे बकत कदी भी हार नी मनदा; तियां ही तू भी परमेश्वरे पर भरोसा करणे कने उदे हुकम मनणे च कदी हार मत मन, कने हमेशा दी जिन्दगी जो पकड़ी रख, जिदे ताई तिजो सदया कने मतयां गबाह दे सामणे तू प्रभु यीशु मसीह जो मनया है। (aiōnios g166) 13 पिता परमेश्वर जो गबाह मनी करी, जडा सारयां जो जिन्दगी दिन्दा है, कने यीशु मसीह जो गबाह मनी करी जिनी पुन्तियुस पिलातुस दे सामणे अपने बारे च सच्च बोलया, इना जो गबाह मन्नी करी तिजो ऐ हुकम दिन्दा है। 14 कि तू उना सारे कम्मा जो करी सके जिना जो करणे ताई परमेश्वरे हुकम दितया है। इस ताई की साडे प्रभु यीशु मसीह दे दुबारा मुडी ओणे दिकर कोई तिजो पर दोष ना लाई सके। 15 परमेश्वर, इकलोता राजा है जडा महिमा दे काबिल है, जडा राजयां दा राजा है कने प्रभुआं दा प्रभु है, उनी सही बकते पर प्रभु यीशु मसीह जो प्रगट करणा है, 16 कने इक सै ही है जिनी हमेशा जिदां रेणा है, कने सै ऐसी चमकदी लौई च रेदा है इस ताई कोई भी इदे बाल नी जाई सकदा है, कने उसयो ना कदी कुनी माणुऐ दिखया कने ना ही कदी दिखी सकदा है। उदी महिमा कने शक्ति युगां-युगां तक रेणी है। आमीन। (aiōnios g166) 17 इस संसारे दे सारे अमीरां जो हुकम दे की सै घमंड ना करन कने अपणी धन धोलता पर भरोसा मत रखा जडी थोडे दिना ताई है, पर परमेश्वरे पर भरोसा रखा जडा सांझो सब कुछ दिन्दा है, जिसदा असां सुख लेई सकदे न। (aiōn g165) 18 कने उना जो बोला की भलाई करा, कने मते सारे भले कम्म करा, कने दयालु बणा कने सहायता करणे ताई हमेशा अगगे रिया, 19 ऐ सब करणे ला तुसां अपने ताई स्वर्गे च धन गठेरदे न, कने ऐ चोरी नी होंदा कने परमेश्वरे उना जो सच्ची जिन्दगी देणी, जिसदा मतलब हमेशा दी जिन्दगी। 20 हे तीमुथियुस, तुसां सैई कर जडा परमेश्वरे करणे दा हुकम दितया है, कने बेकार गल्लां कने उना शिक्षा ला दूर रे, जडियां परमेश्वरे दी शिक्षा दे खिलाफ न, जिसयो सै गलती ने ज्ञान बोलदे न। 21 केई लोकां इसा गलत शिक्षा जो अपनाई लिया, कने इयां करणे ने सै मसीह दी शिक्षा ला भटकी जांदे न। मै ऐ प्राथना करदा है की परमेश्वरे दा अनुग्रह तुसां पर होंदा रे।

2 तीमथियुस

1 मैं पैलुस जडा साडे पिता परमेश्वरे दिया तरफा ला प्रभु यीशु मसीह दा प्रेरित होणे तांई चुणया है। ताकि मैं प्रचार करी सके, की यीशु मसीह पर भरोसा करणे पर हमेशा दी जिन्दगी देणे दा परमेश्वरे बायदा कितया है, **2** मैं ऐ चिट्ठी तीमथियुस जो लिखा दा है, जडा मेरे अपने प्यारे पुत्रे सांई है। मैं प्राथना करता है की पिता परमेश्वर कने साडे प्रभु यीशु मसीह दिया तरफा ला तिजो अनुग्रह, दया कने शांति मिल्ले। **3** मैं परमेश्वरे दा धन्यवाद करता है, जिसदी सेवा मैं शुद्ध अंतरात्मा ला किती जियां मेरे पूर्वज करदे थे, जालू भी मैं प्राथना करता है, तां प्राथना च तिजो हमेशा याद करता है, **4** मिंजो याद है की तू कितणा रोया था, जालू मिंजो तिजो छडी करी जाणा पिया था, कने तेरे आंसूआं जो याद कारिरी दिन रात तिजो ने मिलणे दी इच्छा रखदा है, की मैं खुशिया ला भई जां। **5** मैं यीशु मसीह च तेरे भरोसे जो भी याद करता है, जडा सारयां ला पेहले तेरी नानी लोइस, कने तेरी माता यूनीक च था, कने मिंजो यकीन है की सेई भरोसा तेरे अंदर भी है। **6** इस तांई मैं तिजो याद दिलादां है कि तू उना बरदाना जो देबारा ला जगा कर जडे परमेश्वरे तिजो उस बकत दितयो थे जालू मैं तेरे सिरे पर हथ रखे। **7** क्योंकि परमेश्वरे सांझो डरफोक नी बणया है, पर परमेश्वरे दी आत्मा साडे मना जो मजबूत करदी है, कने दुज्जयां ने प्यार करणे च सहायता करदी है, कने सांझो सबर रखणा सिखांदी है। **8** इस तांई ना तां साडे प्रभु दे बारे च गबाई देणे च शर्म करा, कने ना मिंजो ला शर्म करा, जडा यीशु मसीह दी सेवा करणे तांई जेला च है, पर उस परमेश्वरे दी शक्तिया ला शुभसमाचारे तांई दुख झेलणे तांई मेरे सोगी जुडी जा। **9** परमेश्वरे ही साडा उद्धार कितया है, कने पबित्र जिन्दगी तांई सांझो सदया है, कने उनी सांझो इस तांई नी चुणया की असां खरे कम्म किते न; पर संसार दे बणाने ला पेहले परमेश्वरे यीशु मसीह जो इस संसार च भेजणे दे जरिये अपना अनुग्रह दसणे दी योजना बणाई। (aiōnios g166) **10** पर हुण साडा उद्धारकर्ता प्रभु यीशु मसीह आई गिया है, कने उनी मौत दी शक्ति जो हराई दिता है, कने शुभसमाचारे दे जरिये सांझो हमेशा दी जिंदगी दा रस्ता दसया है। **11** कने परमेश्वरे मिंजो इस शुभसमाचार दा प्रचार करणे कने प्रेरित बणने तांई कने लोकां जो उपदेश देणे तांई चुणयां है। **12** इसा ही बजा ने मैं दुखां जो भी झेलदा है, कने शरमांदा नी है, क्योंकि मैं यीशु मसीह जो जाणदा है जिस पर मैं भरोसा किता; कने मिंजो पक्का पता है, की यीशु मसीह उस दिने दीकर जालू दीकर से बापस नी ओंगा, उदी रक्षा करणे च सक्षम है, जडा उनी मिंजो दितया है। **13** जडी सच्ची शिक्षा तू मिंजो ला सुणियो है, इसा जो उस भरोसे कने प्यारे ला जडा यीशु मसीह च बसया है, उना जो अपना आदर्श बणाई कर रख। **14** पबित्र आत्मा दिया सहायता ला जडा सांझो च रेंदा है, सच्चाई दी रखबाली करा जडी परमेश्वरे सांझो दिती थी। **15** तू जाणदा है की मते सारे आसिया प्रदेश दे भरोसा करणे बालयां मिंजो छडी दितया है, जिना च फूगिलुस कने हिरमुगिनेस न। **16** उनैसिफुरुस दे घरे पर प्रभु दया करे, क्योंकि सै मिंजो ने बडी बरी मिलणे जो आया कने मेरी सहायता किती, कने सै जेला च भी मिंजो ने मिलणे तांई शर्मिदा नी होया। **17** पर जालू सै रोम

शेहरे च आया, तां उनी मिंजो हर जगा च तोपया कने मिंजो ने मिल्ला। **18** प्रभु करे, की न्याय दे दिने उस पर बडी दया करे। कने जडी सेवा उनी मेरी इफिसुस शेहरे च किती है, उसा जो तू अच्छे ने जाणदा है।

2 इस तांई हे मेरे पुत्र तीमथियुस, ऐ जाणी करी तू अपने आपे जो मजबूत बणा की परमेश्वरे तिजो अनुग्रह दितया है जडा सिर्फ यीशु मसीह दिया तरफा ला मिलदा है। **2** तू मिंजो मतयां लोकां दे सामणे मसीह दे बारे च शिक्षा दिन्दे सुणया है, इस तांई मैं चांदा की तू भी भरोसा करणे बालयां जो इस शिक्षा जो सिखा, जडे बाकियां जो भी सिखाणे दे काबिल न। **3** यीशु मसीह दे अच्छे सिपाई सांई मेरे सोगी सबर ने दुखां दा सामणा कर। **4** अगर कोई सिपाई जडा सेना च है, तां सै होर कोई कम्म धंधा नी करता क्योंकि सै अपने बड़े अधिकारियां जो खुश करणा चांदा है। **5** इयां ही अगर कोई पेहलवान कुश्ती दे अखाडे च हिस्सा लेंदा है, कने नियमा दे अनुसार नी लडदा है, तां सै जीत दा इनाम नी जीती सकदा है। **6** जडा किसान मेहनत करता है, फसल दा पेला हिस्सा उसयो ही मिलणा चांदा है। **7** इना उदाहरणा दे बारे च सोच की ऐ क्या सिखाणा चांदे न, कने प्रभु तिजो इना गल्लां जो समझणे च सहायता करे। **8** हमेशा यीशु मसीह दे बारे च सोचदा रे, जडा राजा दाऊदे दे वंशे ला था, कने परमेश्वरे उसयो मरयां चे जिन्दा किता; कने ऐ ही सै शुभसमाचार है, जिसदा मैं प्रचार करता है। **9** इसी शुभसमाचारे दिया बजा ने मैं जेला च इक अपराधी सांई दुख झेला दा है, पर परमेश्वरे दे शुभसमाचार जो प्रचार करणे ला कोई नी रोकी सकदा है। **10** इस तांई मैं परमेश्वरे दे चुणयो लोकां दे फायदे तांई सारे दुखां जो सेहन करता है, ताकि सै यीशु मसीह पर भरोसा करन कने बची सकन कने उना जो हमेशा दी महिमा मिल्ली सके। (aiōnios g166) **11** ऐ गल्ल सच्च है कने भरोसा करणे दे काबिल है, की अगर असां यीशु मसीह सोगी मरी गियो न, तां उदे सोगी जिंदा भी होणे। **12** अगर असां यीशु मसीह दिया बजा ने दुख झेलणे, तां असां उदी बजा ने राज भी करणा है; अगर असां बोलणे की असां यीशु दे चले नी न, तां उनी बोलणा की मैं इना जो नी जाणदा। **13** अगर असां मसीह सोगी बफादार नी न, फिरी भी सै साडे सोगी बफादार है, क्योंकि सै खुद अपने सभाव दे खिलाफ नी जाई सकदा है। **14** बार-बार इना गल्लां दी शिक्षा भरोसा करणे बालयां जो दिया, जडियां मैं तहांजो सिखाईयां न, कने प्रभु जो गबाह बणाई करी उना जो चेताबनी दिया की अखरां दे मतलब पर बेहस मत करा, इयां करणे ने कोई फायदा नी होंदा; पर सुणनेवाले लोकां तांई नुकसान है। **15** तहांजो जितना जादा होई सके मेहनत करणी चांईदी की परमेश्वर तहांजो ऐसा कम्म करणे बाला साबित करी दे, जडा कदी भी शर्मिदा ना होन, कने जडा परमेश्वरे दे बचना जो ठीक तरीके ने सिखांदा हो। **16** पर संसारिक गल्लां कने बेकार गल्लां ला बची रिया, क्योंकि जडे लोक इशुदियां गल्लां च हिस्सा लेंदे न, सै होर भी जादा परमेश्वरे ला दूर होई जांदे न। **17** उना दी झूठी शिक्षा फैलीकरी लोकां दे भरोसे जो तोडी दिन्दी है, जियां खूला सडया होया जखम माणुऐ जो खत्म करी दिन्दा है: हुमिनयुस कने फिलेतुस भी उना चे ही न, **18** उना सच्चाई पर भरोसा करणा छडी दितया है, सै ऐ बोलदे न की परमेश्वरे मरी गियो भरोसा करणे बालयां जो पेहले ही हमेशा दी जिन्दगी तांई जिन्दा करी दितया है,

जिसदी बजा ने सै कुछ विस्वासियां जो यीशु मसीह पर भरोसा करणे ला भटकाई दिन्दे न। 19 पर परमेश्वरे दे लोक उसा पक्कीनियां सांई न जडी कदी हिलदी नी, उसा पक्कीनियां पर खोदी करी लिखया है की, “प्रभु अपने लोकां जो जाणदा है” कने “जडा कोई प्रभु दी भक्ति करदा है, सै बुराई ला बर्चीरैदा है।” 20 बहु घरे च सिर्फ सोने या चांदी दे ही नी, पर लकड़ी कने मिट्टी दे भांडे भी होंदे न, कुछ भांडयां दा इस्तेमाल खास मौकयां तांई होंदा है, कने कुछ भांडयां दा इस्तेमाल आम कम्मा तांई होंदा है। 21 इस तांई अगर कोई अपने आपे जो गंदगी ला साफ करगा, तां सै उस आदर दे भांडे सांई होई जाणा जिसयो आदर तांई इस्तेमाल करदे न, उदी जिन्दगी पबित्र होणी कने मालिक उसयो इस्तेमाल करी सकदा है। 22 इस तांई उना पापी इच्छां ला बची रिया जडियां जवान लोकां जो अपने पाससे खिचदियां न; कने उना लोकां दी संगती करा, जडे धार्मिकता, भरोसा, प्यार कने शांत सभाव कने जडे साफ मने ला परमेश्वरे दी भक्ति करदे न। 23 कने मुखता कने फालतू गल्लां ला दूर रिया, क्योंकि तू जाणदा है की इना ला झगडे होंदे न। 24 कने प्रभु दे दासे जो लड़ाका नी होणा चाईदा, पर उसयो सबना ने प्यारभाव ने गल्ल बात करणे बाले, कने परमेश्वरे दी शिक्षा जो अच्छे ने सिखाणे बाला, कने सेहनशील होणा चाईदा। 25 कने जडे लोक इना दा बिरोध करदे न, उना जो प्यारभाव ने सच्ची शिक्षा जो समझादां हो, क्या पता परमेश्वर उना दा मन बदली दे, जिसला उना जो यीशु मसीह दी सच्चाईया जो जाणने दा मौका मिले। 26 कने ताकि सै जागरूक होई जान कने शैताने दे बशे ला बाहर निकली सकन, जिनी उना जो धोखा दिता कने सेई करवाया जडा सै चांदा था।

3 तीमुथियुस, मैं चांदा की तू ऐ जाणे, की यीशु मसीह दे दुबारा मुडी करी ओणे दे आखरी रोजां च ऐसा बुरा बकत ओणा है। 2 क्योंकि लोक मतलबी, लालची, डींगमार, घमंडी, निंदा करणे बाले, माता-पिता दी गल्लां जो नी मनणे बाले, मतलबी, अपबित्र, 3 दुज्जयां ने प्यार नी करणे बाले, माफ नी करणे बाले, दोष लागे बाले, अपणियां इच्छां पर काबू नी रखणेबाले, झगडालू, अच्छाई ला नफरत करणे बाले, 4 भरोसा तोड़ने बाले, डीठ, घमण्डी, परमेश्वरे जो नी पर अपने ऐशो अराम जो प्यार करणे बाले होंणे न। 5 इयोदे लोक दिखणे च तां परमेश्वर दे भक्त लगदे न, पर ऐ उसा शक्ति जो नी मदे, जडी उना जो परमेश्वर दा भक्त बणाई सकदी है, ऐसे माणुआं ला दूर ही रेनयो। 6 इना चे ही कुछ लोक ऐसे भी न, जडे धोखे ला लोकां दे घरां च बडी जांदे न, कने उना मुख जनानिया जो वशे च करी लेंदे न, जिना दा मन पापां दे भोज ने दबूईया कने हर तरा दी वासना दे वशे च फसियां न। 7 कने सै हमेशा नोईयां शिक्षां जो सिखदियां रैदियां न पर यीशु मसीह दी सच्ची शिक्षा जो कदी नी समझी सकदी। 8 कने ऐ झूठे गुरु न, जडे यीशु मसीह दियां सच्चियां शिक्षा दा बिरोध करदे न, जियां यन्नेस कने यम्ब्रेसे मूसा दा बिरोध किता था, इना दी अकला जो कीडे पेई गियो न कने, प्रभु यीशु मसीह पर भरोसा नी करदे न। 9 सै लम्बे बकते दीकर लोकां जो धोखा नी देई सकदे, क्योंकि जियां लोकां यन्नेस कने यम्ब्रेसे दिया मुखता जो पछेणी लिया था, तियां ही सारयां जाणी लेणा की ऐ भी मुख न। 10 पर हे तीमुथियुस, तू अच्छे

ने जाणदा है की मैं क्या सिखादां, कने मैं कियां जिन्दगी जिन्दा है, कने मेरियां क्या योजना थियां कने मेरा क्या भरोसा है। तू जाणदा है की मैं कितणा सेहनशील कने दुज्जयां ने प्यार करदा है, कने दुख मुसीबतां जो सेहन कितया है, 11 कने तू उना भयानक दुखां दे बारे च जाणदा है, जडे अन्ताकिया कने इकुनियुम कने लुखा दे शेहरां दे लोकां मिजो दिते कने मैं उना दुखां जो कियां झेलया, पर प्रभुऐ मिजो इना ला छुड़ाई लिया। 12 जितणे भी लोक परमेश्वर जो खुश करणा चांदे न कने यीशु मसीह पर भरोसा करदे न, उना सारयां जो दुख कने परेशानियां झेलणियां पोणियां। 13 पर बुरे लोकां कने धोखा देणेबाले लोकां होर भी जादे बुरे कम्म करणे, उना लोकां जो धोखा देणा कने उना अपु भी होर लोकां ला धोखा खाणा। 14 पर हे तीमुथियुस, उना गल्लां पर जडियां तू मिजो ला सिखियां न, कने जिना पर तू भरोसा किता है, इना जो तू लगातार भरोसे ने मनदा रे। क्योंकि तू जाणदा है की तिजो ऐ सच्चाईयां कुनी सिखाईयां न। 15 तालू ला जालू तू इक छोटा बच्चा था, तू पबित्र शास्त्र जो सिखया है, जडा तिजो ऐ समझणे च सहायता करदा है कि जालू तू यीशु मसीह पर भरोसा करदा है तां परमेश्वर तिजो बचांदा है। 16 सारा पबित्र शास्त्र सै बचन है जिसयो परमेश्वरे अपने पबित्र लोकां दे मने च पाया कने उना इस बचने जो इस तांई लिखया है, ताकि असां इदा इस्तेमाल लोकां जो सच्ची शिक्षा सिखाणे, कने जडे लोक गलत करदे न उना जो समझाणे, कने लोकां जो दसणे तांई की कियां अच्छी जिन्दगी जि सकदे न, 17 ताकि परमेश्वरे दे लोक तैयार होई जान कने हर इक भले कम्म करणे दे काबिल होई जान।

4 जालू यीशु मसीहे राजे सांई राज करणा ओणा है, तालू उनी उना दोनो दा न्याय करणा है, जडे लोक जिन्दे न कने उना दा भी जडे मरी गियो न, इस तांई पिता परमेश्वरे कने प्रभु यीशु मसीहे जो गबाह मन्नी करी मैं तिजो आदेश दिन्दा है। 2 की हर तरा दे हालातां च तू परमेश्वर दे बचना दा प्रचार करणे तांई तैयार रे, चाहे हालत अच्छे होन या हालात बुरे होन, तिजो लोकां जो दसणा है की उना क्या गलत किता, कने उना दे पापां तांई उना जो समझा, पर तिजो उना लोकां जो उत्साहित भी करणा है, जालू तू उना जो सबर ने सिखांदा है। 3 क्योंकि ऐसा बकत भी ओणा, की जालू लोकां सच्चिया शिक्षा जो नी मनणा है, पर उना अपणी ही इच्छा दे अनुसार चलणा, कने उना ऐसे होर मते गुरूआं जो तोपणा है, जडे सेई सिखांदे न जडा सै सुणना चांदे न। 4 ऐसे लोक परमेश्वरे दिया सच्चाई जो सुणना नी चांदे पर उना झूठ कने माणुआं दी बणी बणाईयां कहाणियां ही सुणनियां न। 5 पर तू सारियां गल्लां च शांत कने साबधान रे चाहे तिजो दुख तकलिफां जो झेलणा पोऐ, कने शुभसमाचारे दे प्रचार तांई मेहनत कर, कने परमेश्वरे दा सेवक होणे दे नाते न तू सै सारे कम्म करणे न जडे तिजो दितयो न। 6 मैं ऐ हुकम इस तांई दिन्दा है, क्योंकि परमेश्वरे तांई मेरी जिन्दगी कने मेरे कम्म करणे दी ताकत घटा दी है, क्योंकि मैं जाणदा है मैं जल्दी मरणे बाला है। 7 जियां इक सच्चा सिपाई लड़ाईया बकते हार नी मनदा तियां ही मैं भी कदी मसीह तांई मेहनत करणे ला हार नी मन्नी, मैं उना सारे कम्मा जो पूरा किता जडे यीशु मसीहे मिजो करणे जो दिते, मैं आखरी दीकर बफादार रिया। 8 प्रभु यीशु मसीहे मिजो धार्मिकता दा ताज देणा, जडा सच्चा न्याय करदा है, कने ऐ इनाम मिजो उस रोज मिलणा जालू

उनी दुबारा मुडी ओणा है, कने ऐ इनाम सिर्फ मिजो ही नी पर उना सारे लोकां जो मिलणा है जडे चांदे न की यीशु मसीह दुबारा मुडी ओऐ। 9 तिमथियुस, तू मेरे बाल जल्दी औणे दी कोशिश कर। 10 क्योंकि देमास उना चीजां ने प्यार करदा है जडियां इस संसारे दियां न, कने मिजो छडी करी थिस्सलनीके शेहरे जो चली गया है, भाई क्रेसकेस गलातिया प्रदेशे जो कने भाई तीतुस दलमतिया शेहरे जो चली गया है। (aiōn g165) 11 सिर्फ लूका मेरे सोगी है, कने जालू तू ओगा तालू मरकुस जो सोगी लेई ओयां; क्योंकि सै मेरी सेबकाई ताई बडे कम्मे दा बन्दा है। 12 तुखिकुस जो मैं इफिसुस शेहरे च भेजया है। 13 जालू तू ओगा, तां मेरा गर्म कोट लेई ओयां जडा मैं त्रोआस शेहरे च करपुस दे घरे छडी आया है, कने सोगी मेरी चिठिया जो लेई ओयां, खासकर उसा चिठिया जो जडी भेडा दी खली ने बणियो है। 14 सिकंदर जडा तांबे दे भांडे बणादा था, उनी मिजो बडे दुख दिते, प्रभुऐ उसयो उदे बुरे कम्मा दे अनुसार फल देणा। 15 तू भी अपने आपे जो उसला बचाई रख, क्योंकि उनी यीशु मसीह दिया शिक्षा दिया बजा ने साडा बडा बिरोध कितया है। 16 पैली बरी जालू मैं अपने बचाव ताई रोम शेहरे दी कचेरी च गया, तां कोई भी मेरे सोगी नी था, कने सारे मिजो छडी गे, परमेश्वरे इना दे इस कम्मे जो इना दे खिलाफ ना गिणे, मैं प्राथना करदा है की परमेश्वर इना जो माफ करी दे। 17 पर प्रभुऐ मेरी सहायता किती कने मिजो शक्ति दिती, ताकि मैं होर जाति दे लोकां जो, जडे उस बकत कचेरी च थे, उना जो प्रभु यीशु दा प्रचार साफ-साफ सुणाई सके; कने उनी मिजो मौत ला बचाई लिया। 18 कने प्रभुऐ मिजो हर इक बुरे कम्मा ला बचाणा, कने मिजो स्वर्ग दे राज्य च लेई जाणा है: कने उदी महिमा युगां-युगां दीकर होंदी रे। आमीन। (aiōn g165) 19 प्रिस्का कने अक्विला जो, कने उनेसिफुरुस दे परिवार जो मेरा नमस्कार। 20 इरास्तुस कुरिन्थुस शेहरे च रेई गया, कने मैं नुफिमस जो मीलेतुस शेहरे च छडी दिता क्योंकि सै बीमार था। 21 सर्दियां ला पेहले औणे दी कोशिश कर। यूबलुस, कने पर्टेस, कने लीनुस कने क्लौदिया, कने सारे मसीह भाईयां दिया तरफा ला जडे ऐथू न तिजो नमस्कार। 22 मैं प्राथना करदा है की प्रभु तैरे सोगी कने उदा अनुग्रह भी तैरे सोगी रे।

तीतुस

1 मैं, पौलुस ऐ चिट्ठी तिजो लिखा दा है, मैं पिता परमेश्वर दा सेवक कने यीशु मसीह दा प्रेरित है, मिंजो परमेश्वर दे चुणयो लोकां दे भरोसे जो मजबूत करने कने उना जो सच्ची शिक्षा जो जाणने च सहायता करने ताई चुनया है। ताकि सै ऐसी जिन्दगी जीन जड़ी परमेश्वर जो खुश करदी हो। **2** जिदी बजा ने सै परमेश्वर सोगी हमेशा दी जिन्दगिया दी आस रखन, क्योंकि परमेश्वर जड़ा कदी झूठ नी बोलदा है। उनी ही संसार बणने ला पेहले ऐ बायदा कितया की परमेश्वर दे लोकां जो हमेशा दी जिन्दगी मिलणी है। (aiōnios g166) **3** पर हुण बिलकुल सही बकते च, परमेश्वर ऐ शुभसमाचार सांझो पर प्रगत किता, कने असां सबना जो इदा प्रचार करदे न, साडे उद्धारकर्ता परमेश्वर मिंजो ऐ जिम्मेदारी दिती की मैं उदे ताई ऐ कम्म करी सके। **4** मैं चिट्ठी तीतुस जो लिखा दा है, तू मेरे अपने पुत्रे साईं है क्योंकि तू मसीह पर भरोसा करदा है जियां मैं करदा है: मैं प्रार्थना करदा है की पिता परमेश्वर कने साडे उद्धारकर्ता मसीह यीशु तिजो हमेशा अनुग्रह, दया कने शांति दिन्दा रे। **5** मैं इस ताई तिजो क्रेते टापू च छडी आया था, ताकि तू ओथु पर साडे बचयो कम्मा जो पूरा करी सके, कने क्रेते टापू दे हर इक शेहरे च अगुवां जो नियुक्त करे, जियां करणे ताई तिजो मैं हुकम दितया है। **6** इक अगुवे जो निर्दोष, कने अपनी घरे बालियां ला बफादार, सेहनशील, जिना दे बच्चे भरोसा करणे बाले होन, कने शरीर दी इच्छा पर नी चलणे बाले हो, कने माता-पिता दी इज्जत करणे बाले होन। **7** क्योंकि अगुवे जो परमेश्वर दा भंडारी होणे दिया बजा ला निर्दोष होणा चाईदा। ना हठी, ना गुस्से बाला, ना शराबी, ना मारकुटाई बाला, कने पैसे दा लालची हो। **8** पर परोपण्यं दी इज्जत करणे बाला हो, भलाई ने प्यार करणे बाला हो, अपने उपर सयम रखणे बाला हो, धर्मी हो, पबित्र हो, समझदार हो; **9** कने उसयो यीशु मसीह दे बारे च भरोसे दे काबिल संदेश पर मजबूतिया ला भरोसा करणा चाईदा, जड़ा असां उसयो सिखाया है, ताकि सै दुज्जयां जो सही शिक्षा मणने ताई उत्साहित करी सके कने उना दियां गलतियां जो सही करी सके। **10** मैं ऐसा इस ताई बोलदा है, क्योंकि मते लोक सही शिक्षा दा बिरोध करदे न, जडे बकवास करदे, कने दुज्जयां जो धोखा दिन्दे न। खासकर यहूदी लोक जडे विश्वासी बणी गियो न कने उद्धार ताई खतना करणे पर जोर दिन्दे न। **11** तिजो इना लोकां जो शिक्षा देणे ला रोकणा चाईदा क्योंकि जालू सै ऐसी शिक्षा दिन्दे न, तां मतयां परिवारां दा भरोसा खत्म होई जांदा है, सै ऐ कम्म सिर्फ पैसा कमाणे ताई करदे न। **12** उना चे ही इकी माणुऐ जड़ा क्रेते टापू ला है, जिसयो सै अकलमंद माणु मदे न, उनी ही बोलया है, “क्रेते टापू दे लोक हमेशा झूठ बोलदे न, सै डंगरा साईं बर्ताब करदे न, कने आलसी कने खान्दू लोक न।” **13** ऐ गल्लां क्रेते टापू दे लोकां ताई अज भी सच्च न, इस ताई उना जो सकती ने चेतावनी दिया कर की सै यीशु मसीह दी शिक्षा पर भरोसा करन। **14** कने सै यहूदियां दी झूठी शिक्षा कने झूठी कहाणियां पर कने इना माणुआं दे हुकमा पर मन न लगान, जडियां सच्च दी शिक्षा ला भटकादियां न। **15** ऐसे लोक जिना दे मना च बुरे बिचार नी न, उना ताई सारियां चीजां शुद्ध न, पर सै लोक जडे बुरे न कने यीशु मसीह पर भरोसा

नी करदे, कने ना ही कोई अच्छा कम्म करदे न क्योंकि उना दे दिल कने दिमाग दोनों ही पुरे गंदे होई गियो न। **16** ऐ झूठे शिक्षक बोलदे न की असां परमेश्वर जो जाणदे न, पर इना दे कम्मा कने चाल चलन ने पता लगदा है, की ऐ यीशु मसीह जो नी जाणदे न, क्योंकि सै नफरता ने भस्यो होया न कने आज्ञा नी मणने बाले न, कने कुसी भी खरे कम्म करणे दे काबिल नी न।

2 पर तीतुस तिजो भरोसा करणे बालयां जो सेई सिखाणा है, जड़ा यीशु मसीह दी शिक्षा ने सहमत है। **2** बजुरां मर्द अपने उपर काबू रखणेबाले होन, दुज्जयां ने ऐसा बर्ताब करणे बाले होन की लोक इना दी इज्जत करन, इना दा भरोसा प्रभु पर मजबूत हो, कने दुज्जयां ने प्यार करणे बाला कने सबर रखणे बाला होन। **3** कने इयां ही बजुरां जनानिया दे चाल चलण कने जड़ा सै करदियां न उसला प्रभु जो इज्जत मान मिल्ले, दोष नी लाणे बालियां होन, कने शराबी नी होन, कने दुज्जयां जो खरियां गल्लां सिखाणे बालियां होन। **4** ताकि सै जवान जनानिया ताई इक अच्छी मिसाल बणन, कने उना जो अपने घरे बालयां कने अपने बचयां सोगी प्यार करणे दी सलाह देन, **5** कने अपने उपर काबू रखणे बाली हो, अपने घरे बाले ला बफादार हो, घर परिवार जो सम्भालने बाली होन, कने अपने-अपने घरे बालयां दे अधीन रेणे बालियां होन, ताकि परमेश्वर दे बचने दी बुराई नी होई सके। **6** इयां ही जवान मर्दा जो भी समझाया कर, की सै अच्छे ने बर्ताब करन। **7** सारियां गल्लां च तू अपने आपे जो दुज्जयां ताई आदर्श बणा, ताकि सै भी इयां ही करन; कने जालू तू भरोसा करणे बालयां जो यीशु मसीह दे बारे च शिक्षा दे, तां तेरा सिखाणे दा मकसद अच्छा हो, ताकि लोक तिजो होर इज्जत देन, **8** कने तेरिया शिक्षा च ऐसी सच्चाई होणी चाईदी, की कोई भी उसा जो बुरा नी बोली सके, ताकि साडे बिरोधी शर्मिदा होन क्योंकि कुछ भी बुरा नी होणा, जड़ा की सै साडे खिलाफ कुछ बोली सकन। **9** जडे दास गुलाम न उना जो सिखा की अपने-अपने मालिकां दी गल्ल मन्ना, कने उना जो ऐसा करणे ताई बोला जड़ा मालिकां जो खुश करे, कने मालिक उना दी शिकायत ना करन; **10** चोरी चलाकी ना करन, पर अपने आप जो साबित करा की इमानदार न, की लोक उना दा अच्छा बर्ताब दिखीकरी कने सै जड़ा कुछ भी करदे न, उसला लोकां जो परमेश्वर दे बारे च संदेश सुणने दी इच्छा होणी। **11** क्योंकि परमेश्वर अपना अनुग्रह किता, कने साडे ताई इक रस्ता कडया, ताकि सारे लोक उद्धार पाई सकन। **12** कने इस अनुग्रह ला परमेश्वर सांझो सिखाया की, उस तरीके ला बर्ताब करणा बंद करा जड़ा परमेश्वर जो खुश नी करदा, कने उना चीजां दा लालच करणा बंद करी दिया जिना दी इच्छा भरोसा नी करणे बाले लोक करदे न, कने असां हले दीकर इसा धरती पर ही न तां बुद्धिमानी ला कने धार्मिकता सोगी इस तरीके ला कम्म करा जडे परमेश्वर जो खुश करदे न। (aiōn g165) **13** असां ऐसा बर्ताब करदे न, जालू असां उम्मीद कने उस महान दिने दी नियाल रखदे न, जिस दिन साडे महान परमेश्वर कने उद्धारकर्ता यीशु मसीह दुबारा मुडी करी इसा धरती पर ओणा है। **14** यीशु मसीह साडे फायदे ताई मरी गया, ताकि सांझो सारे पापां ला अजाद करे कने शुद्ध करी सके ताकि असां उदे बडे खास लोक बणी जान। जडे भले कम्म करणे ताई पुरे तन मन ला समर्पित होन। **15** इस ताई तीतुस, मैं चांदा की तू ओथु दे भरोसा करणे

बालयां जो इना गल्लां दे बारे च सिखा जड़ियां मैं तिजो दसियां न। कने लोकां जो इना गल्लां जो करणे ताई प्रोत्साहित कर, जिथू जरूरी हो ओथु उना जो सही कर, तिजो ऐसा करणे दा पूरा हक है, पक्का कर की तू जडा सिखांदा है, उसयो कोई भी तुच्छ नी समझे।

3 मसीह पर भरोसा करणे बालयां लोकां जो याद दिलांदा रे, की हाकिमां कने अधिकारियां दे अधीन रिया, कने उना दी गल्ल मन्ना कने इज्जत करा, कने हर इक खरे कम्मे ताई तैयार रिया, 2 सै कुसी जो भी बदनाम ना करन, लड़ाई झगड़े करणे बाले ना होन, पर दयालु सभावे दे होन, कने सारे लोकां सोगी बडे प्यारे ने रेन। 3 क्योंकि असां यीशू मसीह पर भरोसा करणे ला पेहले मुख कने परमेश्वरे दे हुकम नी मनणे बाले थे, कने लोकां ला धोखा खणे बाले थे, असां बुरियां इच्छां कने संसारे दियां चीजां दे गुलाम थे, कने जलन करी के जिन्दगी कटदे थे, कने लोकां ला नफरत कने इक दुज्जे सोगी दुशमणी रखदे थे। 4 पर फिरी भी साडे उद्धारकर्ता परमेश्वरे अपणी दया कने प्यार सांझो लोकां पर दस्सी। 5 तां उनी सांझो साडे पापां दी सजा ला बचाया कने ऐ धर्म दे कम्मा दिया बजा ने नी, जडे असां अपु किते, पर उनी अपणी दया दे अनुसार, उनी साडे पापां जो धोई करी दूर किता, कने पबित्र आत्मा ला सांझो नोआ सभाब कने नोई जिन्दगी दिती है। 6 साडे उद्धारकर्ता प्रभु यीशू मसीहे जडा किता उदे जरिये परमेश्वरे सांझो पबित्र आत्मा दितया है, ताकि सै सांझो च सामर्थ बाले कम्म करी सके। 7 जिसने असां उस हमेशा दी जिन्दगी दी आस रखी सकन जडी परमेश्वरे सांझो अपणी ओलाद दे स्पे च देणे दा बायदा कितया है। कने उदे बारे च असां जाणी सकदे न क्योंकि परमेश्वरे अपने अनुग्रह दे जरिये सांझो अपने सोगी सही बनाया है। (aiōnios g166) 8 ऐ गल्ल सच्चि है, जड़ी मैं हुणी दस्सी है कने मैं चांदा है, की तू भरोसा करणे बालयां जो इना गल्लां दे बारे च मजबूती ने सिखा। इस ताई की जिना परमेश्वरे पर भरोसा रखया है, सै खरे-खरे कम्मा जो करणे च अपना बकत देणे च ध्यान लगान, ऐ गल्लां सारायां ताई खरियां न, कने फायदेमंद न। 9 पर मुख गल्लां दी बेहसा ला दूर रिया, पूर्वजां दी लम्बियां सुचियां पर अपना बकत बर्बाद मत करा, कने बैर बिरोध, कने उना झगडयां ला बची के रिया जडे मूसा दे नियमा दे बारे च न, क्योंकि इना गल्लां दा कोई फायदा नी है। 10 जडे लोक कलीसिया च फुट पांदे न, तिजो उना लोकां जो कम्म से कम्म दो बरी चेतावनी देणी चाईदी, की सै ऐसा करणा बंद करी देन। उदे बाद उना पर होर बकत बर्बाद मत करदे कने उना ला दूर रेणा चाईदा। 11 तुसां ऐ पक्का करी लिया की ऐसा माणु जडा जाणी बुझी करी बुरे रस्ते पर चलदा है, तां उदे खुद दे बुरे कम्म ही साबित करदे न की सै दोषी है। 12 जालू मैं तेरे बाल क्रेते टापू पर अरतिमास कने तुखिकुस जो भेजगा, तालू तू मेरे बाल निकुपुलिस शहर औणे दी कोशिश करयां, क्योंकि मैं ओथु ही सर्दियां कटणे दी सोचियो है। 13 जालू जेनास व्यवस्था जो सिखाणे बाला कने अपुल्लोस अपणी यात्रा ताई निकलगे, तां इना दी सहायता करणे ताई जडा कुछ तू करी सकदा है, सै तू करयां। कने ऐ ध्यान रखयां की उना जो कुसी भी चीजा दी कमी ना हो। 14 सिर्फ इतणा ही नी, पर तिजो भरोसा करणे बालयां जो सिखांदे भी रेणा चाईदा की भले कम्म करणे ताई लगातार मेहनत करदे

रिया, ताकि उना लोकां दियां जरतां पुरियां होई सकन जिना बाल कुछ नी है, ऐ भरोसा करणे बालयां दी सहायता करदा है की, सारे इक ही मकसद ने जिन्दगी जी सकन। 15 मेरे सोगी ऐथू दे सारे भरोसा करणे बाले तिजो नमस्कार करदे न। ओथु क्रेते टापू च साडे भरोसा करणे बाले साथियां जो जडे सांझो ने प्यार करदे न, उना जो भी मेरी तरफा ला नमस्ते बोलयां। मैं प्राथना करदा है की, प्रभु तुसां सारायां पर अनुग्रह करे।

फिलेमोन

1 मैं, पौलुस इसा चिठिया जो लिखा दा है। मैं यीशु मसीह दिया सेवा ताई जेला च बन्द है। मैं कने साड़ा मसीह भाई, तीमथियुस तुहांजो नमस्कार करदे न। कने मैं ऐ साडे प्यारे मित्र कने सोगी कम्म करणे बाले फिलेमोन जो लिखा दा है। **2** कने मैं साड़ी मसीह बेहण अफफिया कने मसीह भाई अरखिप्पुस, जडा योधा साई परमेश्वरे दी सेवा करदा है कने उसा कलीसिया दे ना जडी तुहाडे घरे गिठी होंदी है उसा जो भी लिखा दा है। **3** मैं प्राथना करदा है की साडे पिता परमेश्वर कने प्रभु मसीह यीशु दिया तरफा ला तुहांजो अनुग्रह कने शांति मिलदी रे। **4** क्योंकि मैं जालू भी तिजो ताई प्राथना करदा है, मैं हमेशा तेरे ताई परमेश्वरे दा धन्यवाद करदा है कने अपनी प्राथना च भी तिजो याद करदा है। **5** मैं प्रभु यीशु मसीह च तेरे भरोसे दी कने परमेश्वर दे सारे लोकां ताई तेरे प्यार दी चर्चा सुणदा है। **6** मैं प्राथना करदा है की तू अपने भरोसे च मजबूत होई जाऐ कने उना सारी अच्छी चिजां जो समझी सके जिना जो परमेश्वरे सांझो दितया है, इसी बजा ने लोकां मसीह दी महिमा करणी है। **7** क्योंकि हे मसीह भाईयो, तुहाड़ी इक दुज्जे ताई प्यारे दी भावना ने मैं बड़ा खुश है कने उत्साहित है, इस ताई की तेरे जरिये परमेश्वरे दे लोक उत्साहित न। **8** इसा बजा ला मैं तिजो मसीह च इक भरोसा करणे बाला होणे दे नाते खरे कम्म करणे ताई बडे हके सोगी हुकम देई सकदा है। मैं बजुर्ग पौलुस, जडा हुण यीशु मसीह दी सेवा करणे दिया बजा ला इक केदी भी है, फिर भी तिजो बडे प्यार ला बिनती करदा है। **10** मैं उनेसिमस ताई बिनती करदा है, जडा मेरे ताई पुत्रे साई है। जालू सै जेला च था तालू सै मसीह च मेरा पुत्र बणी गया। **11** सै तां पेहले तेरे कुसी कम्मे दा नी था, पर हुण तेरे कने मेरे दोनो ताई बडे कम्म दे दा है। **12** चाहे मैं उनेसिमस सोगी बड़ा प्यार करदा है, पर मैं उसयो तुहाडे बाल भेजा दा है। **13** मैं उसयो अपनी मदद ताई अपने बाल ही रखणा चांदा था, जबकि मैं शुभसमाचारे दा प्रचार करणे ताई जेला च था। सै ऐथू मेरी मदद करणे ताई है तेरी जगा लेई सकदा है, क्योंकि मिजो पता है की तू मेरी मदद करणा चांदा है। **14** अगर तू सेहमत नी है तां मैं उसयो ऐथू नी रखगा, मैं चांदा है की तू अपणिया खुशिया ला मेरी मदद करे क्योंकि इस ताई नी की मैं तिजो ऐ करणे ताई मजबूर किता है। **15** शायद ऐई बजा है की परमेश्वरे उनेसिमस जो थोड़े बकते ताई तिजो ला दूर जाणे दा हुकम दिता ताकि सै मसीह पर भरोसा करे, इसा बजा ला तू उसयो अपने बाल रखणा है। (aiōnios g166) **16** तू उसयो दास ना समझन पर सै दास ला भी बदीकरी है, सै हुण विश्वासी साथी है कने प्यारा भी है कने तुहांजो उसयो होर भी जादा प्यार करणा है, कने मैं उसयो बड़ा प्यार करदा है, पर तिजो उसयो दासे दे स्ने च होर भी जादा प्यार करणा चाईदा क्योंकि सै मसीह च इक भाई है। **17** अगर तू मिजो अपना साथी समझदा है, जालू उनेसिमस बापस तेरे बाल ओगा तां उदा खुशिया ला स्वागत करयां जियां मेरा स्वागत करदे न। **18** अगर उनी तेरा कुछ नुकसान कितया या उस पर तेरा कोई कर्ज है तां उसयो मेरे नां लिखी दे। **19** मैं पौलुस अपने हथे ने लिखदा है की मैं उदा कर्ज भरी दिगा; हालांकि तुसां पेहले ला ही जाणदे न की, अगर मैं तुहाड़ी मदद नी कितियो होंदी तां

तुहांजो खुद कोई जिन्दगी नी मिलियो होंदी इस ताई तुसां अपनी जिन्दगी ताई मेरे कर्जदार न। **20** मेरे प्यारे मित्र, ऐ खुशी मिजो प्रभु च तेरिया तरफा ला मिल्ले, कने इक साथी विश्वासी दे स्ने च मिजो उत्साहित करे। **21** जियां की मैं तुहांजो लिखया है, मिजो यकीन है की तुसां तियां ही करणा जियां मैं करणे जो बोलया। मिजो पता है की उसला भी बदीकरी करणा जितणा मैं तुहांजो बोलया। **22** इक होर गल्ल कने मेरे ताई अपने घरे च इक कमरा तैयार करा क्योंकि मैं उम्मीद करदा है की परमेश्वरे तुहाड़ी प्राथना दा जबाब देणा की मैं दुबारा तुहाडे बाल ओऐ कने मिली सके। **23** इपफ्रास, जडा यीशु मसीह दा प्रचार करणे दिया बजा ला मेरे सोगी जेला च है कने मसीह च तुहांजो नमस्कार करदा है। **24** कने मरकुस, अरिस्तर्खुस, देमास, लूका जडे मेरे सोगी प्रभु दा कम्म करदे न, इना दी तरफा ला तुहांजो नमस्कार। **25** मैं प्राथना करदा है की साड़ा प्रभु यीशु मसीह तुहांजो पर अनुग्रह करे। आमीन।

इब्रानिया

1 परमेश्वरे पराणे जमाने च परमेश्वरे दे संदेश देणेबालयां दे जरिये बडी बरी बडे तरिक्यां ला साडे पूर्वजां सोगी गल्लां कितियां, 2 पर इना आखरी रोजां च परमेश्वरे साडे सोगी अपने पुत्रे जरिये गल्लां कितियां। परमेश्वरे अपने पुत्रे जरिये सारियां चीजां जो बणाया कने उसयो सारे संसारे दा बारिस बणाया। (aiōn g165) 3 पुत्र ही परमेश्वरे दी महिमा दी लौ, कने बिलकुल उदे साईं ही है, कने अपने शक्तिशाली बचना ला सारे संसारे जो चलादां है। उनी लोकां जो उना दे पापां ला शुद्ध किता, कने इदे बाद स्वर्गे च महिमाय परमेश्वरे दे सजे पासे जाई बैठा। 4 इस ताईं परमेश्वरे अपने पुत्रे जो ऐसा ना दिता जडा स्वर्गदूतां ला जादा महान है, इसला सांझो पता चलदा है की पुत्र उना ला कितणा जादा महान है। 5 क्योंकि पबित्र शास्त्र च ऐ कुथु भी नी लिखया है की परमेश्वरे अपने कुसी स्वर्गदूते ला ऐसा कदी नी बोलया जडा उनी अपने पुत्रे ने बोलया, “तू मेरा पुत्र है; अज मैं घोषणा करदा है की तू मेरा पुत्र है।” कने उनी फिरी कदी भी कुसी स्वर्गदूते ने ऐ नी बोलया की, “मैं तेरा पिता होणा, कने तू मेरा पुत्र होणा।” 6 परमेश्वरे अपने बडे महान पुत्रे जो संसारे च भेजणे ला पेहले बोलया की, “उदे सारे स्वर्गदूत उसयो अराधना करना।” 7 कने स्वर्गदूतां दे बारे च ऐ बोलदा है, “परमेश्वर अपने स्वर्गदूतां जो होआ साईं बणादां है, कने अपने सेवकां जो बलदी अगी साईं बणादा है।” 8 पर पुत्रे दे बारे च बोलदा है, “हे परमेश्वर तेरा राज युगां-युगा दीकर बणी रेणा तू लोकां पर न्याय ला राज करना। (aiōn g165) 9 तू भले कम्मा ला प्यार कने पाप दे कम्मा ला दुश्मणी रखी; इसी ताईं तुहाडे परमेश्वरे, तेरे साथियां बीचे ला तुहांजो चुणया, कने बडिया खुशिया ला उना ला लग करिरी नियुक्त कितया।” 10 पबित्र शास्त्र ऐ भी बोलदा है की, “शुरूआत च तू धरती जो बणाया, कने तू सै सब कुछ भी बणाया जडा अम्बरे च है। 11 इना तां सारयां खतम होई जाणा; पर तू युगां-युगां दीकर बणी रेणा; कने उना सारयां कपडयां साईं पुराणे होई जाणा। 12 कने तू उना जो चादरा साईं बटोलणा, कने उना जो कपडयां साईं बदलणा: पर तू हमेशा इकोदिया रेणा कने तू हमेशा जिन्दा रेणा।” 13 कने परमेश्वरे कदी कुसी स्वर्गदूते जो ऐसा नी बोलया, “जालू दीकर मैं तेरे सारे दुश्मणा जो हराई ना दे, तालू दीकर तू मेरे सजे पासे बैठी रे कने इज्जत ले।” 14 तां स्वर्गदूतां दा क्या कम्म है? सै सिर्फ परमेश्वरे दे सेवक न, कने परमेश्वर उना जो उना लोकां दी देखभाल करणे ताईं भेजदा है, जिना दा उद्धार होणा है।

2 इस ताईं, जरूरी है की असां जडियां गल्लां सिखियां न, उना जो मनणे पर जादा ध्यान देन, तां असां सच्चाईया ला नी भटकणा। 2 क्योंकि जडी व्यवस्था स्वर्गदूतां दे जरिये बोलियो थी, सै हमेशा सच्च साबित होई, कने जडे इसा व्यवस्था जो नी मंदे थे, उना जो परमेश्वरे ला सजा मिलदी थी। 3 तां सांझो भी सजा मिलणी, अगर असां इस महान उद्गारे जो नी मनगे। कने इस उद्धार दे बारे च सारयां ला पेहले प्रभुऐ अपु बोलया था, कने जिना लोकां इस उद्गारे दे संदेश दे बारे च सुणया उना सांझो साबित किता की ये सच्च है। 4 कने जालू भी परमेश्वरे दी इच्छा होई तालू उनी चिन्न कने लग-लग

चमत्कारां जरिये कने पबित्र आत्मा दे जरिये लोकां जो बरदान देईकरी इस उद्धार दे संदेश जो साबित किता है। 5 परमेश्वरे उस ओणे बाले संसार जो जिदे बारे च असां बोला दे न, अपने स्वर्गदूतां दे अधीन नी कितया पर अपने पुत्र यीशु मसीह दे अधीन कितया है। 6 पर पबित्र शास्त्र च कुथी ऐ लिखया है की, माणु क्या न, की परमेश्वर तू उदी चिंता करदा है या देखभाल करदा है? सै माणुऐ ला जादा होर कुछ नी है। 7 तू उसयो स्वर्गदूतां ला घट शक्ति दितियो है; तू उसयो राजे साईं महिमा कने इज्जत दिती कने उसयो अपने हथां दे कम्मा पर हक दिता। 8 तू सारियां चीजां पर उसयो हक दिता ताकि सै सारयां पर राज करे, इस ताईं ऐसा लगदा है की परमेश्वरे सारा कुछ माणुऐ दे बशे च करी दितया है। मतलब की ऐसा कुछ नी है, जडा उदे काबू च ना हो। पर असां दिखी सकदे न, की हले दीकर भी सारा कुछ माणुऐ दे बशे च नी है। 9 पर असां यीशुऐ जो दिखदे न! उसयो थोडे बकते ताईं स्वर्गदूतां ला घट दर्जा दितया था, ताकि परमेश्वरे दे अनुग्रह ला सै सारे लोकां ताईं मरी जाए। इस ताईं उनी दुख झेले कने मरी गया कने परमेश्वरे उसयो महिमा कने इज्जत दिती। 10 परमेश्वरे सारा कुछ बणाया कने सारियां चीजां जो अपने ताईं सम्भाली रखया है। इसा बजा ला, की लोकां जो अपनी महिमा च हिस्सेदार बणाऐ, परमेश्वरे ऐ फेसला लिया की, ऐ सही होणा की प्रभु यीशु मसीह दुख झेली करी इक ऐसा माणु बणी जाए जडा चरित्र च सिद्ध है। क्योंकि यीशु ही है जडा उना दा उद्धार करी सकदा है। 11 क्योंकि सै जडा लोकां दे पापां जो माफ करदा है, कने सै जिना दे पाप माफ होंदे न, उना दोना दा पिता इक ही है, इसा बजा ला यीशु उना जो भाई कने बेहन बोलणे ला नी शरमांदा। 12 कने इदे बारे च यीशु मसीह परमेश्वरे ला बोलदा है, “मैं अपने मसीही भाईयां जो दसणा की तू मेरे ताईं कितणे खरे कम्म किते, कने जालू सै तेरी अराधना करणे ताईं गिटे होंगे तालू मैं तेरी महिमा उना सारे लोकां बिच करगा।” 13 सै दुबारा बोलदा है की, “मैं परमेश्वरे पर भरोसा रखणा।” कने सै दुबारा बोलदा है की, “मैं उना लोकां सोगी है जिना जो परमेश्वरे मिंजो दितया है।” 14 क्योंकि परमेश्वरे दे बच्चे माणु न, मतलब की जडे मास कने खूने दे बणयो न, कने पुत्र भी इक माणु बणी गया, क्योंकि इक माणु बणी करी ही सै मरी सकदा था, कने मरणे जरिये ही सै शैतान जो हराई सकदा था, जिदे बाल मौत दी शक्ति है, 15 कने इस तरीके ला प्रभु यीशुऐ उना सारयां जो अजाद करी दिता जडे अपनी पूरी जिन्दगी मौत दे डरे च होईकरी गुलामा साईं जी दे थे। 16 क्योंकि प्रभु यीशु तां स्वर्गदूतां जो नी बल्कि अब्राहम दे वंशा दी सहायता करदा है। 17 इस बजा ला उस ताईं जरूरी था की, यीशु हर तरीके ला बिलकुल साडे साईं बणी जाए, कने इस तरीके ला सै परमेश्वरे दा सच्चा कने दयालु महायाजक बणया। कने जडा बलिदान सै उना ताईं करदा है ताकि उदे जरिये लोकां जो उना दे पापां ला माफी मिलली सके। 18 क्योंकि यीशु मसीह मुशकिलां कने दुखां जो सेहन किता इस ताईं सै उना लोकां दी सहायता करी सकदा है जडे मुशकिलां कने दुखां जो सेहन करा दे न।

3 इस ताईं हे मसीह भाईयो जडे परमेश्वरे ला रिश्ता रखदे न, तुहांजो स्वर्ग दी जिन्दगिया च हिस्सेदार बणने ताईं सदया है। यीशु मसीह पर ध्यान दिया जिसयो असां मंदे न, जडा साडे ताईं परमेश्वरे दे शुभसमाचार दा दूत

कने महायाजक है। 2 यीशु मसीह सै सारा कुछ किता जडा परमेस्वरे उसयो करणे ताई बोलया, बिलकुल तियां ही जियां मूसा परमेस्वरे दे परिबारे दे सारे लोकां दी सेवा करणे च भरोसे दे लायक था। 3 घर बणणे बाले जो घरे ला जादा इज्जत मिलदी है। इयां ही यीशु मूसा ला जादा आदर दे काबिल है। 4 क्योंकि हर इक घरे जो बणाने बाला कोई न कोई होंदा है, पर जिनी सब कुछ बणाया है सै परमेस्वर है। 5 मूसा परमेस्वरे दे परिबारे दे सारे लोकां दी सेवा करणे च भरोसे दे लायक रिया। जडा मूसे किता सै उना गल्लां पासे इशारा करा दा था, जडा परमेस्वर बादे च बोलणे बाला था। 6 पर मसीह इक पुत्रे सांई परमेस्वरे दे परिबारे दे लोकां च भरोसे दे लायक है, अगर असां अपनी हिम्मत कने उस आसा पर मजबूतिया ला आखरी दीकर टिकी रेंदे न, तां असां परमेस्वरे दे लोक न। 7 जियां पबित्र आत्मा पबित्र शास्त्र च बोलदी है, “अज जालू तूसां परमेस्वरे जो बोलदे सुणदे न, 8 तां तूसां उदे हुकम मनणे ला मना मत करदे, जियां तूसां दे पूर्वजां सुनसान जगा च परिक्षा बेले परमेस्वरे दे खिलाफ किता।” 9 ओथु तुहाडे पूर्वजां चालियां सालां दीकर मेरे महान कम्मा जो दिखणे बाद भी, चुनौती देईकरी मिंजो परखया। 10 इसा बजा ला मै उस बक्ते दे लोकां सोगी गुस्सा रिया, कने बोलया, हमेशा ही उना दा मन मिंजो ला दूर होई जांदा है, कने जडा करणे दा हुकम मै दिता उसयो करणे ला मना करी दिता। 11 तालू मै गुस्से च आई करी कसम खादी की, उना उस जगा च दाखल नी होणा जिथू मै उना जो आराम देणा। 12 हे मसीह भाईयो, ध्यान रखा, की तूसां चे कुसी दा पापी कने बेबसआसी मन ना हो, जिसने तूसां जिन्दगी देणेबाले परमेस्वरे जो मनणे ला मना करी देन। 13 तूसां इक दुज्जे जो हर रोज प्रोत्साहित करदे रिया, ऐसा ना हो की पाप दे धोखे च आई करी तुहाडे मन ढीठ बणी जाए। इस ताई जालू दीकर असां “अज” बोली सकदे न, तालू दीकर इक दुज्जे जो हर रोज प्रोत्साहित करदे रिया। 14 जडा भरोसा साडा मसीह जो अपनाणे दे बकत था, अगर असां अपने उस भरोसे च आखरी दिने दीकर हिम्मत सोगी टिकी रेंगे, तां असां मसीह सोगी हिस्सेदार बणी जाणा। 15 तियां ही जियां पबित्र शास्त्र च लिखया, “अगर अज तूसां परमेस्वरे दी अबाज सुणगे, तां तूसां मने च ढीठ मत बणदे, जियां तुहाडे पूर्वजां बणे च परमेस्वरे दा बिरोध किता था।” 16 भला सै कुण लोक न जिना परमेस्वरे दी अबाज सुणीकरी भी उसयो मनणे ला मना करी दिता? क्या सै ऐ लोक नी थे जिना जो मूसे मिस्र देशे ला बाहर कडया था? 17 कने परमेस्वर चालियां सालां दीकर कुना लोकां पर गुस्सा रिया? ऐ इस्राएली ही थे जिना सुनसान जगा च पाप किता कने बणे च मरी गे। 18 कने परमेस्वरे कुना लोकां सोगी कसम खादी थी, की तूसां उसा जगा च दाखल नी होणा जिथू मै उना जो आराम देणा? सै पक्का उना लोकां दे बारे च बोला दा था जिना उदा हुकम नी मनया था। 19 सांझो पता चली गिया की, सै लोक भरोसा नी करणे दिया बजा ला उसा आराम दिया जगा च नी जाई सके।

4 परमेस्वरे बायदा कितया है की असां अरामे दिया जगा च जाणा, इस ताई अराम दिया जगा च जाणे दा बायदा अजे भी है, तां सांझो इसा गल्ला दा होर भी ध्यान रखणा चाईदा। तूसां चे कुसी जो भी उस आराम वाली जगा पर जाणे दा मौका नी छडणा चाईदा। 2 क्योंकि जियां असां मसीह दे बारे च

शुभसमाचार सुणया, इयां ही इस्राएल दे लोकां अराम दी जगा दा शुभसमाचार सुणया, पर उना भरोसा नी किता। इस ताई उना जो इस शुभसमाचार ला कोई फायदा नी होया। 3 असां परमेस्वरे दियां बोलियां गल्लां पर भरोसा कितया है, इस ताई असां अराम दिया जगा च दाखल होणा; जियां परमेस्वरे दुज्जयां ताई बोलया है, “मै गुस्से च कसम खादी थी की उना मेरे अरामे बालिया जगा च दाखल नी होई सकणा।” पर परमेस्वरे ऐ इस ताई नी बोलया था की हले दीकर अराम दी जगा तयार नी थी, ऐ संसारे जो बणने ला पेहले ही तयार होई गियो थी। 4 क्योंकि सतमे रोजे दे बारे च पबित्र शास्त्र च इयां लिखया है, “परमेस्वरे सतमे रोजे अपने सारे कम्मा जो पूरे करिरी अराम किता।” 5 कने असां ऐ भी पढया की बादे च उनी बोलया, “उना मेरे अरामे दिया जगा च दाखल नी करी सकणा है।” 6 कने इस्राएले दे लोकां जिना सारयां ला पेहले ऐ शुभसमाचार सुणयां, सै अराम दिया जगा च दाखल नी होई सके, क्योंकि उना परमेस्वरे दे हुकम नी मन्ने, पर बाकियां ताई अराम दिया जगा दा रस्ता हले दीकर खुलया है। 7 इस ताई परमेस्वरे अपने अराम दिया जगा च दुबारा दाखल होणे ताई इक होर बकत तय किता, कने सै बकत अज है। साडे पूर्वजां दे विद्रोह करणे दे केईयां सालां बाद, परमेस्वरे राजा दाऊद ला इना बचना जरिये बोलया, जडे पेहले भी बोलयो थे की, “अगर अज तूसां परमेस्वरे दी अबाज सुणगे, तां तूसां अपने मने जो कठोर मत करदे।” 8 कने असां ऐ भी जाणदे न की परमेस्वरे जिस अराम दिया जगा दा बायदा कितया है, सै कनान नी है, जिथू जाणे ताई यहोशुऐ उना दी अगुवाई किती थी। अगर ऐ कनान देश होंदा तां परमेस्वर बादे च ऐ नी बोलदा की इदे ताई इक होर बकत था। 9 परमेस्वरे दे लोकां ताई हुण भी इक जगा तयार है, जिथू सै पूरे तरीके ला अराम करी सकदे न। उना तियां ही अराम करणा है जियां परमेस्वरे सतमे रोजे अराम किता। 10 परमेस्वरे अपना कम्म पूरा करिरी अराम किता था। कने सारे लोकां ताई ऐ इकोदिया है जडे परमेस्वरे बाल अराम करणा जांदे न। उना अपना कम्म पूरा करणे बाद अराम करणा। 11 इस ताई सांझो भी उस अराम बालिया जगा च दाखल होणे ताई जादा मेहनत करणी चाईदी। ऐसा ना हो की कोई उना लोकां सांई परमेस्वरे दे हुकम नी मनणे दिया बजा ला उस अराम दिया जगा च दाखल नी होऐ। 12 क्योंकि परमेस्वरे दा बचन जिन्दा कने असरदार है, सै कुसी भी दोधारी तलवारा ला भी पेना है। जडा साडी आत्मा, प्राण, जौड़ा जो कने गुरदयां जो बिनी दिन्दा है, कने सै मना दे बिचारां कने मने दी भावना जो जाणी लेंदा है। 13 परमेस्वरे दिया नजरा ला इस संसारे दा कोई भी माणु लुकया नी है, सांझो सारे कम्मा दा लेखा उसयो देणा पोणा है। उदे सामणे सारियां चीजां खुलियां कने प्रगट न। 14 परमेस्वरे दा पुत्र यीशु जडा साडा सारयां दा महायाजक है, स्वर्गे च परमेस्वरे बाल चली गिया। इस ताई ओआ जिस भरोसे जो सारयां सामणे मनया था, उस भरोसे च असां मजबूतिया ला टिकी रेंन। 15 क्योंकि ऐ महायाजक जडा यीशु मसीह है, जडा साडियां हर इक कमजोरियां जो समझदा है। शैताने सै हर गल्ला च साडे सांई परखया, तमी उनी पाप नी किता। 16 इस ताई ओआ, असां बिना डरयो परमेस्वरे सामणे ओन, तालू परमेस्वरे सान्झो पर दया कने अनुग्रह करणा, कने जालू सांझो जरूरत होणी तालू उनी साडी सहायता करणी।

5 परमेश्वरे हर इक महायाजके जो इस्राएल दे लोकां च चुण्या। सै लोकां दी भलाई ताई परमेश्वरे दिया तरफा ला कम्म करणे ताई चुण्या जांदा है; सै इस ताई भेंट कने बलि चढांदा है ताकि परमेश्वर लोकां दे पापां जो माफ करी दे। 2 इक माणु होणे दे नाते सै अपु भी केई सारियां चीजां च कमजोर है। इसा बजा ला सै मुख कने भटकणे बाले लोकां ला प्यारे ला निपटी सकदा है। 3 इक महायाजक होणे दे नाते उसयो अपने पापां जो कने लोकां दे पापां जो दूर करणे ताई बलियां चढाणियां चाईदियां। 4 कोई भी माणु अपु महायाजक होणे दी पदवी अपने उपर नी लेई सकदा। जियां परमेश्वरे हासने जो पहले महायाजके दे स्पे च सदया कने चुण्या था, तियां ही परमेश्वर दुज्जे महायाजकां जो सददा कने चुणदा है। 5 तियां ही मसीहे भी अपु जो महायाजक बणने ताई चुणी करी अपु अपना आदर नी किता। पर परमेश्वरे यीशु मसीहे जो ऐ बोली करी चुण्या जडा उनी होर कुसी महायाजक जो कदी नी बोलया था, जडा की पबित्र शास्त्र च भजनकारे लिखया है, “तू मेरा पुत्र है, अज मैं ऐ घोषणा करता है की मैं तेरा पिता है।” 6 इयां ही परमेश्वरे दुज्जिया जगा च दुबारा उसयो बोलया, “इयां ही जियां मलिकिसिदक इक याजक था, तियां ही तुमी हमेशा याजक बणी रेणा।” (aiōn g165) 7 जालू यीशु इस संसारे च जिन्दा था, तालू उनी जोर-जोरे कने रोई-रोई के परमेश्वरे सामणे प्राथना कने बिनतियां कितियां जडा उसयो मौता ला बचाई सकदा था, कने इस बडे आदर कने अपने आपे जो परमेश्वरे जो सौपणे दिया बजा ला परमेश्वरे उदियां प्राथना कने बिनतियां सुणियां। 8 यीशु मसीह परमेश्वरे दा पुत्र होणे पर भी, उनी दुख सेहन करिरी सै करणा सीखी लिया जडा परमेश्वर उसला चांदा था। 9 परमेश्वरे मलिकिसिदक साई उसयो इक महायाजक दी इज्जत दिती, कने उसयो सिद्ध बणाया कने सै उना सारयां लोकां ताई उद्धार दी बजा बणी गया जडे उदे हुकमा जो मंदे थे। (aiōnios g166) 11 इदे बारे च बोलणे ताई बडियां सारियां गल्लां न, पर इना गल्लां जो समझणा बडा मुश्किल है, क्योंकि तुसां परमेश्वरे दा बचन सुणने च सुस्त होई गियो न। 12 तुसां इतणे लम्बे बकते ला भरोसा करदे न, तुहांजो तां हण बाकियां जो सिखाणे बाला होणा चाईदा था। पर तुहांजो हले भी ऐसे माणुऐ दी जस्तरत है जडा तुहांजो दुबारा नोए सिरे ला परमेश्वरे दिया शिक्षा जो सिखाए। तुहांजो अनाज नी पर बचयां साई दुधे दी जस्तरत है। 13 क्योंकि जडे लोक दूध पिंदे न, सै उना बचयां साई न जडे असल च परमेश्वरे दिया नजरा च सही जिन्दगी जिणे दे बारे च नी जाणदे न। 14 पर अनाजे दी रोटी उना ताई है जडे भरोसे च पक्के न, जिनी अपने अनुभव ला भले बुरे च फर्क करणा सीखी लिया है।

6 इस ताई जडा सारयां ला पहले असां मसीह दे बारे च सिखाया था, उना बुनियादी शिक्षां जो बार-बार दोहरादे मत रिया, कने हण अग्रे बदीकरी उच्च शिक्षां दे बारे च सोच बिचार करा। बुनियादी शिक्षां साई मत बणा, जियां की पाप करणा छडी देणे दे बारे च, परमेश्वरे पर भरोसा करणे दे बारे च, 2 कने बपतिस्मा देणे दे बारे च, कुसी पर हथ रखीकरी आशीष देणे दे बारे च, मरयां दा जिन्दा होणे देणे दे बारे च, कने हमेशा दी सजा देणे दे बारे च कने आखरी न्याय दिया शिक्षा दी नीई दुबारा ला पांणे दी जस्तरत नी है। (aiōnios g166) 3 कने अगर परमेश्वरे मौका दिता तां, मैं तुहांजो उच्च शिक्षा दियां

गल्लां सिखाणियां। 4 जिना अपना भरोसा गवाई दितया उना दा अपने पापां जो छडी करी दुबारा मुडी ओणा मुश्किल है। क्योंकि सै इक बरी परमेश्वरे दी लौइ च रेई बैठयो न, कने स्वर्गे दे वरदान लेई बैठयो न, कने उना जो होर लोकां सोगी पबित्र आत्मा मिली बैठया है, 5 उना अनुभव कितया था की परमेश्वरे दा बचन खरा है, कने ओणे बालिया शक्तिया जो अनुभव किता जालू परमेश्वरे राज करणा। (aiōn g165) 6 ऐसे लोकां जो परमेश्वरे बाल बापस लोणे दा कोई रस्ता नी है; क्योंकि सै खुद परमेश्वरे दे पुत्रे जो दुबारा ला सूली पर चढांदे न कने उसयो शर्मिंदा करदे न जिसा बजा ला होर लोक मसीह दा मजाक उडांदे न। 7 सै लोक जीना जो खरी शिक्षा मिलियो है, सै उसा जमिना साई न जिसा पर बार-बार बरखा होंदी है। अगर जमीन खरी है तां ऐ किसाने जो फायदे वाली फसल दिन्दी है, कने इस पर परमेश्वरे दी आशीष होंदी है। 8 कने होर लोक उसा जमिना साई न जडी झिल्ल, जाड-बसुंट उगांदी है, जडा की कुसी कम्मे दा नी। इसा पर परमेश्वरे दा श्राप होणे दा खतरा है कने इदे च पैदा होणे बालियां बेकार चीजां जो अग्गी च फुकी देणा। 9 पर हे प्यारे भाईयो, तुसां खरे कम्म करा दे न, क्योंकि परमेश्वरे तुहांजो पहले ही बचाई लिया है। ऐ चेताबनियां तुहाडे ताई नी न। 10 तुसां परमेश्वरे दे खातिर परमेश्वरे दे लोकां दी सेबा बडे प्यारे ला करदे थे कने करा दे भी न, परमेश्वरे तुहाडे इना कम्मा जो नी भूलणा। क्योंकि परमेश्वर अन्याय करणे बाला नी है। 11 तुसां सुस्त मत बणा। पर कडी मेहनत करणे बालयां साई आखरी दीकर सबर कने भरोसे सोगी पक्की आस रखीकरी इना प्यार भरे कम्मा जो करदे रेणा चाईदा, ताकि सांझो परमेश्वरे दे बायदे मिली सकन। 13 कने परमेश्वरे अब्राहमे ला वायदा करदे बेले अपने नाऐ दी कसम खादी क्योंकि उसला बडा ऐसा कोई नी, जिदा ना लेईरी कसम खाई सकन, कने उनी बोलया, 14 “मैं सच्ची तिजो बडी आशीष देणी, कने मैं तिजो मते बंश देणे।” 15 अब्राहमे बडे लम्बे बकते दीकर सबर रखया। तां जाई करी उसयो सै मिल्ला जिदा परमेश्वरे उसयो बायदा कितया था। 16 कसम खांदे बकत लोक हमेशा अपने ला बड़े कुसी माणुऐ दी कसम खांदे न। कसम खाणे ला ऐ यकीन होंदा है की जडा सै बोला दे न सै सचच है, कने ऐ सारयां झगडयां जो खत्म करी दिन्दी है। 17 जालू परमेश्वरे अपने लोकां जो ऐ गल्ल बिलकुल साफ दसणा चाई की सै अपने कितयो बादयां जो कदी नी भुलदा; तां उनी बायदे सोगी अपने ना दी कसम जोड़ी। इसला पता चलदा है उदे बायदे सच्ची पुरे होणे न। 18 तां ऐथू फिरी दो गल्लां न परमेश्वरे दा बायदा कने उदी कसम, जडी कदी नी बदली सकदी जिना दे बारे च परमेश्वर कदी झूठ नी बोली सकदा। इस ताई असां परमेश्वरे बाल बचणे ताई आयो न, कने जडी आस उनी सांझो दितियो है, उसा जो पकडी रखा कने जादा उत्साहित रिया। 19 जियां इक बडे किले ला बनियो रस्सी किस्तिया जो टिकाई रखदी है, तियां ही है आस साडिया जिन्दगिया जो टिकाई कने मजबूत बणाई रखदी है। जिदे च साडी आस है सै यीशु मसीह है, जडा स्वर्ग च बडिया पबित्र जगा च परमेश्वरे बाल गया। 20 यीशु सांझो ला अग्रे कने साडे ताई स्वर्ग च गया है। सै याजक मलिकिसिदक साई हमेशा ताई महायाजक बणी गया है। (aiōn g165)

7 ऐ मलिकिसिदक शालेम शेहरे दा राजा था, कने परम प्रधान परमेश्वरे दा याजक था, सारयां ला पेहले उदे नाए दा मतलब है, “धार्मिकता दा राजा” कने उदा ना “शालेम शेहरे दा राजा” जिदा मतलब है की शांति दा राजा। जिदा ना पिता, ना मां, ना खानदान दा कोई पता था, कने ना उदे जमणे दी कने ना मरणे दी खबर थी, फिरी भी सै परमेश्वरे दे पुत्रे साईं हमेशा ताईं याजक बणी रेंदा है; मलिकिसिदक अब्राहम ने तालू मिल्ला जालू सै राजयां जो हराई करी मुडी करी ओआ दा था, कने उसयो आशीष दिती कने अब्राहमे उसयो हर चिजा दा दसमा हिस्सा दिता जडा उनी अपने दुशमणा लिया था। 4 हुण इसा गल्ला पर ध्यान दिया की मलिकिसिदक कितणा महान था, जिसयो साडे पूर्वज अब्राहमे अपने दुशमणा ला लुटयो माले दा दसमां हिस्सा देई दिता था। 5 मूसा दी व्यवस्था दसदी है की लेवी दे बंशे च जडे याजक बणदे न, उना जो हुकम मिलया है, की सै इस्राएले दे लोकां ला दसमा हिस्सा लेन। पर सै याजक कने होर लोक भाईयां साईं न क्योकि सै सारे अब्राहम दे बंशे दे न। 6 पर फिरी भी मलिकिसिदक जडा लेवी दे बंशे दा नी था, उनी अब्राहम ला दसमा हिस्सा लिया, कने उनी अब्राहम जो आशीष दिती, हालांकि अब्राहम तां सै माणू था जिसयो परमेश्वरे बायदा दितया था। 7 कने असां पक्का जाणदे न की जडा आशीष दिन्दा है, सै आशीष लेणेवाले ला बढा होंदा है। 8 कने लेवी बंशे दे याजक जडे दसमा हिस्सा ले दे थे, कने ऐसे लोक थे जिना इक ना इक रोज मरी जाणा। पर मलिकिसिदक जिनी अब्राहम ला दसमां हिस्सा लिया, सै हल्ले भी जिंदा है, जियां की पबित्र शास्त्र च लिखया है। 9 तां असां बोली सकदे न, की लेवी जडा लोकां ला दसमा हिस्सा लेंदा था सै अब्राहम दा बंशज था। इस ताईं अब्राहम जालू मलिकिसिदक ला मिलया कने उसयो दसमां हिस्सा दिता, तां असां ऐ बोली भी सकदे न की लेविए भी अब्राहमे जरिये मलिकिसिदक जो दसमां हिस्सा दिता। 10 क्योकि जिस बेले मलिकिसिदक अब्राहम ला मिल्ला, उस बकत तां लेवी जम्या भी नी था, पर सै तां अपने पिता दे शरीर च था। 11 लोकां जो उना याजकां दे आधार पर व्यवस्था मिलियो थी, जडे लेवी गोत्र दे हास्न ला आयो थे। पर उना जो इसा व्यवस्था जरिये सिद्ध नी बणाई सके, इस ताईं इक होर याजके दी ओणे दी जरूरत थी, इक ऐसा याजक जडा हास्न साईं नी पर मलिकिसिदक साईं हो। 12 क्योकि जालू इकोदे याजक नी रेंदे, तां व्यवस्था जो बदलणा भी जरूरी होई जांदा है। 13 क्योकि असां ऐ गल्लां मसीह दे बारे च बोला दे न, जडा इक लग गोत्रे ला था। कने उस गोत्रे च कदी भी कुनी भी याजके दे स्पे च वेदिया पर सेबा नी कितियो थी। 14 सारे जाणदे न की, साडा प्रभु यीशु यहूदा दे बंशे ला था कने मूसे इस यहूदा दे बंश दे लोकां दा याजक बणने दे बारे च कुछ नी बोलया, कने ना ही यहूदा बंश दा कोई याजक बणया था। 15 हुण तुसां समझी सकदे न की मै कुस बारे च बोला दा है। इस ताईं ऐ गल्ल होर भी साफ है की मूसा दी व्यवस्था कने याजक दोनों जो साडे महायाजके ताईं बदली दितया है, जडा मलिकिसिदके साईं याजक है। 16 यीशु कुसी खास माणू मतलब की लेवी दे बंशज दे नियमा कने विधियां दिया बजा ला याजक नी बणया, पर यीशु अपनी कदी खत्म नी होणे बाली जिन्दगिया दिया शक्तिया दिया बजा ला याजक बणया। 17 क्योकि परमेश्वर उदे बारे च पबित्र

शास्त्र ऐ गबाई दिन्दा है की, “तू मलिकिसिदके साईं युगां-युगां दीकर याजक बणी रेणा है।” (aiōn g165) 18 इस ताईं मूसा दी व्यवस्था सै नी करी सकी जडा उसा जो करणा चाईदा था कने कुसी कम्मे दी नी थी इसा बजा ला बदली दिती। 19 इस ताईं की मूसा दी व्यवस्था कुसी भी गल्ला जो सिद्ध नी बणाई सकी, कने उदिया जगा पर साडे बाल इक आस है, जडी यीशु मसीह च है, जिदे जरिये असां परमेश्वरे दे नेडे जाई सकदे न। 20 इदे बाद जालू परमेश्वरे यीशु मसीह जो याजक बणया तां उनी इक कसम खादी। 21 क्योकि लेवी दे बंश बगेर कसमा दे याजक बणाए, पर यीशु मसीह कसमा सोगी परमेश्वरे दिया तरफ ला याजक बणया। परमेश्वरे यीशु मसीह दे बारे च बोलया, “मै परमेश्वर, मै ऐ कसम खांदा है, मै अपना फेसला कदी नी बदलणा, की तू युगां-युगां दीकर मलिकिसिदका साईं इक याजक है।” (aiōn g165) 22 इस ताईं यीशु मसीह ही सै है, जडा इक खरी बाचा दे पूरा होणे दी बजा बणदा है। 23 ऐथू यीशु मसीह दा याजक होणे दा इक होर फायदा है, सै तां बडे जादा याजक बणदे आए, क्योकि उना चे हर इक याजके दी मौत होई गेई कने इसा बजा ला सै अपना कम्म जारी नी रखी सकी। 24 पर यीशु युगां-युगां दीकर जिन्दा है, इस ताईं उनी हमेशा याजक बणी रेणा, पर होर कोई उदा याजक होणे दा पद नी लेई सकदा। (aiōn g165) 25 इसी ताईं जडे यीशु जरिये परमेश्वरे बाल ओदे न, सै उना दा पूरा-पूरा उद्धार करी सकदा है, क्योकि सै उना ताईं हमेशा विनती करणे ताईं जिन्दा है। 26 क्योकि ऐसा ही महायाजक साडियां जरूरतां जो पूरा करी सकदा है, जडा पबित्र, जिस पर कोई दोष ना हो, शुद्ध हो, पापियां ला लग रेंदा हो, कने जडा स्वर्गे ला भी उच्चा हो। 27 कने सै महायाजक जडे हास्न दे बंशे दे थे, उना साईं यीशुऐ ताईं जरूरी नी है, की सै पेहले अपने पापां कने फिरी लोकां दे पापां ताईं बलिदान चढाए; क्योकि यीशुऐ तां इक बरी सारे लोकां ताईं अपने आपे जो बलि चढाई दितया। 28 क्योकि मूसा दी व्यवस्था तां कमजोर लोकां जो महायाजक बणांदी है; पर जडी कसम मूसा दी व्यवस्था दे बाद आई सै परमेश्वरे दे पुत्रे जो बडा याजक बणांदी है। कने सै हमेशा ताईं साडे ताईं इक सिद्ध महायाजक बणी गिया है। (aiōn g165)

8 हुण जडियां गल्लां असां करा दे न, उना चे सारयां ला बढी गल्ल ऐ है, की साडे ताईं इक ऐसा महायाजक है, जडा स्वर्ग च उस महिमामय परमेश्वरे दे सिंहांसने दे सजे पासे जाई बैठा है। 2 कने साडा महायाजक स्वर्गे च सच्चे मिलाप दे तम्बूऐ च बडिया पबित्र जगा च सेबा करदा है जडी स्वर्ग च है, जिसयो परमेश्वरे बणया ना की कुनी माणुऐ। 3 क्योकि हर इक महायाजक जिसयो इस ताईं चुणदे न की सै लोकां दी माफी ताईं भेंट कने बलिदान चढाए। इस ताईं साडे महायाजक यीशु ताईं भी ऐ जरूरी था की उस बाल भी कुछ चढाने ताईं हो। 4 कने अगर मसीह धरतिया पर होंदा तां कदी भी याजक नी होंदा, क्योकि मूसा दी व्यवस्था दे अनुसार भेंट चढाने ताईं पेहले ला ही याजक हेन। 5 जडे ऐ याजक करदे न, सै सिर्फ उदी इक नकल कने परछाई है जडा स्वर्ग च है। क्योकि जालू मूसा मिलाप दा तम्बू बणाणा चलया था, तालू परमेश्वरे उसयो ऐ चेतावनी दिती की, “तू हर चीज तियां ही बणायां जदिया उदाहरण तिजो पहाडे पर दसया था।” 6 पर जडा याजकां दी

सेबा दा कम्म साडे महायाजक यीशुए जो मिलया, सै याजकां ला बदीकरी है। क्योंकि सै जिस बाचा दा बिचोलिया है, सै पराणिया बाचा ला खरी है कने खरियां चीजां दे बायदे पर अधारित है। 7 क्योंकि अगर पेहलिया बाचा च कमियां नी होंदिया तां दूजिया बाचा दी जरूरत ही नी होंदी। 8 पर परमेस्वरे लोकां पर दोष लाईकरी बोलया, “सै दिन ओआ दे न की, मै इस्राएल दे लोकां सोगी कने यहदा दे लोकां सोगी नोई बाचा करणी है। 9 ऐ बाचा उस बाचा सांई नी होणी है, जडी मै उना दे पूर्वजां सोगी कितियो थी, जालू मै उना जो मिश्र देशे ला कडी लेई आया था, क्योंकि सै मेरी बाचा पर टिकी नी रे, कने मै उना दी चिंता करणा बंद नी करी दिता, प्रभु ऐई बोलदा है। 10 फिरी प्रभु बोलदा है की, जडी नोई बाचा मै ओणे बाले दिना च इस्राएल दे लोकां सोगी करणी, सै ऐ है की मै उना जो मेरी व्यवस्था दे बारे च सोचना देणा, कने उना उसा जो अपने मना च रखणा, कने मै उना दा परमेस्वर बणना, कने उना मेरी अराधना करणी। 11 फिरी कुनी भी इस्राएल दे लोकां अपने देशे बालयां जो, कने अपने रिशतेदारां जो ऐ शिक्षा देणे दी जरूरत नी पोंणी, की तुसां प्रभु जो मन्ना, क्योंकि छोटे ला लेईकरी बड़े लोकां दीकर सारयां मन्नी लेणा की मै उना दा परमेस्वर है। 12 क्योंकि मै उना दे पाप माफ करी देणे, कने मै उना दे पापां जो दुबारा फिरी याद नी करणा।” 13 परमेस्वरे इसयो नोई बाचा बोलया, इस तांई उनी पेहले बालिया बाचा जो पूराणा करी दिता। जडा कुछ भी पूराणा है कने घिस्या-पिटया है, सै खत्म होई जाणा।

9 उसा पैली बाचा जो जडी बड़े पेहले, मूसा दे जरिये इस्राएल दे लोकां जो दीतियो थी। उदे च परमेस्वरे दी अराधना करणे दे सारे नियम कने कनून थे कने इसा धरती पर अराधना तांई लोकां दा बणाया मिलाप दा इक पबित्र तम्बू भी था। 2 ऐ तम्बू जानवरां दिया खल्ली ला बणया था, उस तम्बूऐ बिच उना इक पर्दा लटकाई दिता कने दो कमरे बणाई दिते, पेहले कमरे च इक धूपदान, कने मेज थी जिसा पर परमेस्वरे जो चढ़ाईयां रोटियां रखदे थे, कने इस कमरे जो पबित्र जगा बोलदे थे। 3 कने तम्बूऐ दे दुज्जे कमरे जो जडा परदे पिच्छे था, उसयो परम पबित्र जगा बोलदे न। 4 उस दुज्जे कमरे च सोने दी धूपदानी थी, कने चारो पासे ला सोने दा मढ़या सन्दुक था जिसयो बाचा दा सन्दुक बोलदे न। कने उदे च सोने दे भांडयां च मन्ना भरीरी रखया था, कने हासून दा डंडा भी था जिदे पर खिलयो पते लगयो थे, आखरी च इदे च दो पथरे दियां पटियां थियां, जिना पर परमेस्वरे सै दस हुकम लिखयो थे, जडे मूसा जो दितयो थे। 5 इदे इलाबा सन्दुके प्राला दो फंगा बाले कस्ब बणयो थे, जडे इसा गल्ला दा संकेत था की परमेस्वर उस जगा पर था। उना अपने फंगा ला उसा जगा जो ढक्या था, जिस पर महायाजक खून छिड़कदा था, ताकि लोकां दे पाप माफ होई सकन। पर हुण असां इना चीजां दे बारे च इक-इक करिरी दस्सी नी सकदे। 6 इस तरीके ला उना इना सारियां चीजां जो तम्बूऐ दे दों कमरयां च तैयार किता। याजक हर रोज उस पेहले कमरे च जाई करी अपनी धार्मिक बिधियां जो पूरा करदा था। 7 पर दुज्जे कमरे च मतलब की उस बड़ी पबित्र जगा च सिर्फ महायाजक साले च इक ही बरी जांदा था। कने सै अपने सोगी जानवरां दे खूने जो लेई जांदा था, जिसयो सै अपने तांई कने लोकां दे अनजाणे च कितयो पापां दी माफी तांई चढ़ांदा था। 8 इना विधियां

जरिये पबित्र आत्मा सांझो ऐ समझांदा है, की जालू दीकर इसा धरती पर मिलाप बाले तम्बू कने इना दियां विधियां जो मंदे न, तालू दीकर स्वर्ग च परमेस्वरे दे परम पबित्र जगा च जाणे दा रस्ता हल्ले दीकर नी खुलया है। 9 ऐ सारियां चीजां सिर्फ इना गल्लां दा उदाहरण थियां, जडियां हुण मसीह दे जरिये पुरियां होआ दियां न। क्योंकि सै चढ़ाबे कने बलिदान जडे लोक परमेस्वरे जो चढ़ां दे थे, जडे उदी अराधना करदे थे। सै लोकां दे मना कने दिलां जो शुद्ध करणे दे काबिल नी थे। 10 क्योंकि ऐ लोकां दे खाने पीणे दियां गल्लां दे बारे च, कने भौंती-भौंती दियां नोहणे दियां बिधियां दे बारे च दसदे न जिना ला लोक बाहरी तौर ला साफ होई जांदा न। इना विधियां जो तालू दीकर मनणा था जालू दीकर की परमेस्वर नोई बाचा जो शुरू नी करी दिंदा। 11 पर हुण मसीह महायाजक सांई आया है, जडा नोईया बाचा दियां सारियां खरियाँ-खरियाँ चीजां दिन्दा है। सै होर भी जादा महान कने सिद्ध तम्बूऐ च दाखल होया। ऐ तम्बू माणुआं नी बणाया था मतलब की इस संसारे दा नी था। 12 यीशु मसीह परम पबित्र जगा च इक बकरी या बछड़े दा खून लेईकरी नी गया, पर सै अपने ही खूने सोगी गया। उनी सै सिर्फ इक बरी ही किता, कने इसयो दुबारा करणे दी जरूरत नी होणी। उदे जरिये सांझो हमेशा दा उद्धार मिलया। (aiōnios g166) 13 मूसा दी व्यवस्था अनुसार जडे लोक अशुद्ध होंदे न, सै परमेस्वरे दी अराधना करणे दे काबिल नी होंदे। पर अगर उना पर बकरयां कने दांदा दा खून कने बछड़ायां दी राख छिड़की जाए तां सै शुद्ध होई जांदा न। अगर इदे च माणुआं दे शरीर जो शुद्ध करणे दी शक्ति है, 14 तां जरा सोची की दिखा की मसीह दे खूने ला साडे दिलां जो उना कम्मा ला कितणा शुद्ध करणा जडे मौत दे पासे लेई जांदा न, ताकि असां जिन्दे परमेस्वरे दी अराधना करी सकन। क्योंकि अनन्त आत्मा दिया शक्तिया दे जरिये मसीहे साडे पापां तांई अपने आपे जो निर्दोष बलिदान दे स्पे च परमेस्वरे जो भेंट चढ़ाई दिता। (aiōnios g166) 15 इसा बजा ला यीशु मसीहे लोकां सोगी इक नोई बाचा बन्नी, ताकि जिना लोकां जो परमेस्वरे सदया है, उना जो हमेशा दियां आशीषां मिली सकन जिदा परमेस्वरे बायदा कितया था। क्योंकि यीशु मसीह उना जो उना दे पापां दिया सजा ला अजाद करणे तांई मरी गया, जडे उना पैली बाचा दे अधीन रेईकरी कितयो थे। (aiōnios g166) 16 असां जाणदे न की अगर कोई माणु अपनी मौत ला बाद अपनी जमीन जयादाद जो बंडणे तांई बसियत लिखदा है, तां उस बटबारे जो करणे तांई उदा मरणा जररी है। 17 क्योंकि उसा बसियत दी कोई कीमत नी जालू दीकर जयादाद दा मालिक हल्ले जिन्दा है। उसा बसियत दी कीमत तालू ही है जालू उस मालिके दी मौत होई जांदी है। 18 इस तांई ऐथू दीकर परमेस्वरे दे जरिये दितियो पैली बाचा जो भी पक्की होणे ला पेहले इक बलि दिती थी। 19 सारयां ला पेहले मूसा सारयां लोकां जो व्यवस्था दे हुकम दे बारे च दसया। इदे बाद उनी बछड़ायां दा खून लेईकरी पाणिऐ च घोलया कने इदे बाद उनी इसयो लोकां कने व्यवस्था दिया कताबा च छिड़कणे तांई लाल ऊन, कने जूफा नाऐ दे बूटे दियां डालियाँ दा इस्तेमाल किता। 20 कने जालू मूसा ऐ बोला दा था, उनी लोकां ने बोलया, “ऐ खून उस बाचा जो शुरू करदा है, जिसा जो मनणे दा हुकम परमेस्वरे तुहांजो दितया है।” 21 कने इयां ही मूसे

तम्बूए च कने अराधना दियां सारियां चीजां पर खन छिडकया। 22 कने मूसा दी व्यवस्था बोलदी है की सारियां चीजां जो खून छिडकी करी शुद्ध करणा चाईदा, कने बिना खने बहाए, परमेश्वर लोकां जो उना दे पापां ताई माफ नी करी सकदा। 23 इस ताई मिलाप बाले तम्बूए कने उदियां सारियां चीजां जो विधिया अनुसार बलि देईकरी शुद्ध करणा जरूरी था, ऐ स्वर्गे दियां चीजां दी नकल है। पर स्वर्गे दियां चीजां जो विधिया अनुसार शुद्ध करणे ताई, जानवरां दे खूने ला भी खरे बलिदाने दी जरूरत थी। 24 इसा बजा ला मसीह उस पबित्र जगा च नी गया जिसा जो माणुआं अपने हथां ला बणाया है, जडी सच्ची पबित्र जगा दी इक प्रतीक है। पर सै साडे फायदे ताई परमेश्वरे सामणे ओणे ताई सीधा स्वर्गे जो गया। 25 कने मसीह अपने आप जो बार-बार बलि चढाणे ताई स्वर्गे च नी गया, जियां महायाजक हर साल जानवरां दे खूने सोगी परम पबित्र जगा च जांदा है, क्योंकि अगर इयां होंदा तां फिरी उसयो संसारे दे शुरू होणे ला ही बडे सारे दुख झेलणा पोंदे। पर मसीह इस संसार दे आखरी बकत च अपने आप जो बलिदान करणे ताई सिर्फ इक बरी आया ताकि पाप दा अंत होई सके। (aiōn g165) 27 क्योंकि ऐ पक्का है की असां सारे लोकां इक बरी मरणा, कने उदे बाद साड़ा न्याय होणा। 28 तियां ही मसीह भी सारे लोकां दे पापां जो माफ करणे ताई इक ही बरी बलिदान होया। पर उनी जालू दुबारा इसा धरती पर ओणा, तां उनी साडे पापां ताई बलिदान होणे ताई नी ओणा, पर उना लोकां जो बचाणे ताई ओणा जडे लोक उसयो नियाला दे न।

10 मूसा दी व्यवस्था तां सिर्फ अगे भविष्य च ओणे बालियां खरियां चीजां दी परछाई है, पर उना खरियां चीजां दा असली रूप नी है, जडियां मसीहे साडे ताई कितियां न। इस ताई व्यवस्था जो मनणे बाले लोक हर साल इकोदियां बलियां चढादें न, पर ऐ बलिदान उना लोकां जो कदी सिद्ध नी करी सकदे जडे परमेश्वरे दी अराधना करणे ताई उदे नेडे ओंदे न। 2 अगर परमेश्वरे दी अराधना करणे बाले इना बलिदाना दिया बजा ला सिद्ध होई जांदे, तां सै अपने आप जो दोषी नी मंदे। तां फिरी हुण बलिदान चढाणे दे बारे च गल्ल नी होंदी। 3 पर जानवरां दियां बलियां दा खून उना दे पापां जो दूर नी करी सकदा, पर ऐ हर साल उना जो उना दे कितयो पापां जो याद करांदा है। 5 इसा बजा ला जालू मसीह इस संसारे च आया तां उनी परमेश्वरे ला बोलया था, “तू नी चांदा की लोक तिजो बलियां चढान, पर तू मिजो इक आदमी बणाई दिता।” 6 कने ना सै बलियां जिना च जानवरे जो पूरा फूकी करी चढादें न कने ना ही पापां दिया माफिया ताई चढाईयां बलियां ला तू खुश होंदा है। 7 तालू मसीहे परमेश्वरे ने बोलया, “हे परमेश्वर, मैं तेरी इच्छा पूरी करणे ताई आई गया है, पबित्र शास्त्र च मेरे बारे च ऐई लिखया है।” 8 मूसा दी व्यवस्था सिखांदी है बलियां कने भेटा पाप दिया बजा ला चढाणियां चाईदियां। पर मसीहे इना गल्लां दे बारे च कजो बोलया की परमेश्वरे इना ला खुश नी होंदा? 9 फिरी मसीह ऐ भी बोलदा है, “दिख, मैं सेई करणा आया है, जडा तू चांदा है।” तालू परमेश्वर बलियां बाली पैली व्यवस्था जो खत्म करी दिन्दा है, ताकि सै नोई व्यवस्था शुरू करी सके। इसी बजा ला असां उस बलिदान दे जरिये पबित्र होई गियो न जडा यीशु मसीहे अपने शरीर जो चढाई

करी दिता। 11 हर इक यहूदी याजक रोज ही वेदिया सामणे खडा होंदा है कने लोकां दे पापां जो दूर करणे दियां बिधियां जो पूरा करदा है। कने हमेशा ही इकोदे बलिदाना चढादां रेंदा है, जडे कदी भी उस माणुए दे पापां जो दूर नी करी सकदे न, जडे उनी कितयो न। 12 पर यीशु मसीहे साडे पापां दी माफी ताई अपने आप जो परमेश्वरे सामणे इक ही बरी कने हमेशा ताई बलिदान करी दिता कने। सै परमेश्वरे दे सजे पासे कने सिंहासने पर सारयां ला जादा इज्जता बालिया जगा च हमेशा ताई जाई बैठा। 13 क्योंकि मसीहे अपने आप जो सिर्फ इक बरी ही बलिदान दे रूपे च परमेश्वरे जो देई दिता कने इस बजा ला उदे लोकां जो पबित्र करी दितया है कने सै सच्ची हमेशा ताई धर्मी बणी गियो न। कने ओथु सै अपने सारे दुशमणा जो पुरे तरीके ला अपने अधीन करणे ताई परमेश्वरे दा इंतजार करा दा है। 15 कने पबित्र आत्मा भी सांझो ऐ दसदा है की, ऐ गल्ल सच्च है। कने प्रभु परमेश्वरे दे बायदे जो याद करा जिदे बारे च उनी पेहले ही बोलया था, 16 “प्रभु बोलदा है; की जडी बाचा मैं ओणे बाले दिनां च उना सोगी करणी है, की मैं उना जो अपनी व्यवस्था दे बारे च सोचना देणा कने उना उसा जो अपने मना च रखणा।” 17 फिरी परमेश्वर ऐ बोलदा है, “मैं उना दे पाप माफ करी देणे, कने मैं उना दे पापां जो दुबारा फिरी याद नी करणा।” 18 कने परमेश्वर साडे पापां जो माफ करदा है, तां हुण कोई भी होर बलिदान देंगे दी जरूरत नी है। 19 इस ताई हे मसीह भाईयो, जालू की यीशु मसीहे साडे ताई अपनी जिन्दगी बलिदान करी दिती, हुण असां हिम्मत सोगी स्वर्गे दिया परम पबित्र जगा च बिना डरयो जाई सकदे न। 20 जालू मसीह मरया तां उनी साडे ताई इक नोआ रस्ता खोली दिता ताकि असां ऐसी जिन्दगी जी सकन जिदा कोई अंत ना हो। उनी ऐ रस्ता पर्दे ला निकली करी खोली दिता, मतलब की अपने शरीर जो बलिदान करिरी रस्ता खोली दिता। 21 क्योंकि साडा ऐसा महान याजक है जडा परमेश्वरे दे सारे लोकां पर राज करदा है, 22 तां ओआ असां, मसीह दे खूने जो छिडकी करी अपने मना जो शुद्ध करिरी कने साफ पाणिए ला अपने शरीर जो धोई करी साफ करिरी कने सच्चे मने कने पक्के भरोसे सोगी परमेश्वर दे नेडे जान। 23 कने असां बिना कुसी शक दे अपनी उस आस पर टिकी रेन, जिसा जो असां अपनाया है क्योंकि असां परमेश्वर पर उदे बायदयां जो पूरा करणे ताई भरोसा करी सकदे न। 24 ओआ असां इक दुज्जे सोगी प्यारभाव कने भले कम्मा जो करणे ताई इक दुज्जे जो प्रोत्साहित करन। 25 कने असां परमेश्वरे दी अराधना करणे ताई गिटे होणा बंद ना करन, जियां केई लोक करा दे न, पर ओआ असां इक दुज्जे जो होर भी जादा प्रोत्साहित कने समझान क्योंकि असां जाणदे न की प्रभु जल्दी मुडी करी ओणे बाला है। 26 सांझो इना कम्मा जो करणा चाईदा क्योंकि यीशु मसीहे दे शुभसमाचार दी सच्चाई जो जाणने बाद अगर असां जाणी बुझी करी पाप करदे न, तां कोई होर बलिदान नी है जडे साडे पापां जो माफ करी सके। 27 बल्कि डरीकरी परमेश्वरे दा इंतजार करणा है की उना दा न्याय करे कने अग्नी च भस्म करी दे क्योंकि सै उदे दुशमण न। 28 जडा कोई मूसा दी व्यवस्था जो नी मंदा है, उस पर बगेर दया कितयो दो या तीन लोकां दी गबाई पर उसयो मारी दिन्दे न। 29 अगर मूसा दी व्यवस्था च ऐसी सजा थी, तां उस माणुए दी सजा बडी बड़ी

होणी चाईदी जडा परमेश्वरे दे पुत्रे दी बेईजती करदा है कने परमेश्वरे दे पुत्रे जो अपने पैरां थले गरेची दिन्दा है, कने मसीह दे खूने जो पबित्र नी मंदा जिदे जरिये परमेश्वरे उसयो पबित्र करणे ताई नोई बाचा शुरू किती थी कने पबित्र आत्मा दी बेईजती किती जिदे जरिये उसयो अनुग्रह मिलया था। 30 क्योंकि असां जाणदे न की परमेश्वरे बोलया, “बदला लेणा मेरा कम्म है, मैं ही बदला लेणा।” कने उनी फिरी ऐ भी बोलया की, “प्रभुऐ अपने लोकां दा न्याय करणा।” 31 जिन्दे परमेश्वरे दे हथां ला सजा मिलणा इक बडी भयानक गल्ल है। 32 पर उना दिनां दे बारे च याद करा, जालू तुसां पैली बरी मसीह पर भरोसा किता था। तुसां बडे भरी दुख तकलिकां जो झेलया, पर तुसां भरोसे च पक्के बणी रे। 33 कदी-कदी तां इयां भी होया की तुसां लोकां ला बेईजती कने अत्याचार झेली करी सारायां सामणे तमाशा बणी गे, कने केई बरी तुसां मसीह भाईयां दा साथ दिता जडे तुहाडे साईं दुख मुसीबतां च थे। 34 तुसां कैदियां दे दुखां च भी दुखी होए, कने जालू होरनी लोकां तुहाडी धन-दौलत जो लटया तां तुसां उना जो लटणा दिता। क्योंकि तुसां जाणदे न की तुहाडे बाल हल्ले भी सारियां चीजां न, जिना दा परमेश्वरे बायदा कितया है, कने सै हमेशा ताई न। 35 इस ताई अपने भरोसे जो मत छडा चाहे कुछ भी होई जा। कने उस इनाम जो याद रखा जडा परमेश्वरे तुहांजो देणा। 36 हुण तुहांजो सबर रखीकरी सेहन करणे दी जरूरत है, ताकि तुसां परमेश्वरे दी इच्छा जो पूरा करी सकन। तां तुहांजो सै सारा कुछ मिलणा जिदा उनी बायदा कितया है। 37 क्योंकि जियां पबित्र शास्त्र च मसीह दे बारे च लिखया है की, “हुण बडा ही घट बकत रेई गया है, जालू की ओणे बाले ओणा है, कने देर नी करणी थोडे।” 38 कने मेरे धर्मी लोकां मिंजो पर भरोसा करणे ला ही जिदे रेणा, कने अगर सै मिंजो पर भरोसा करणे ला पिच्छे हटी जांगे तां मैं उना ला खुश नी होणा। 39 पर असां उना लोकां चे नी न जडे परमेश्वरे ला पिच्छे हटी जांदे न, कने खत्म होई जांदे न। पर असां उना लोकां चे न जडे भरोसा रखदे न कने बची जांदे न।

11 हुण जडे लोक परमेश्वरे पर भरोसा रखदे न, उना जो पक्का ही परमेश्वरे सारा कुछ देणा जिदी सै आस रखदे न; उना जो यकीन है की जिना चीजां जो उना दिखया नी है सै असली च हेन। 2 साडे पूर्वजां दा भी ऐसा भरोसा था कने इसी ताई परमेश्वर उना ला खुश था। 3 क्योंकि भरोसा करणे ला ही असां जाणी लेंदे न, की सारे संसार जो परमेश्वरे अपने बचना ला बणाया है। इस ताई असां जडा भी दिखदे न, सै उना चीजां ला नी बनयो न जिना जो दिखी नी सकदे न। (aiōn g165) 4 भरोसा करणे दिया बजा ला ही आदमे दे पुत्र हाबिले अपने बड़े भाई कैन ला बदिया बलिदान परमेश्वरे ताई चढाया, कने उदे बलिदाने दे जरिये ही परमेश्वरे गबाई दिती की हाबिल धर्मी है, कने परमेश्वर उदे बलिदान ला खुश था। हाबिल अपनी मौत ला बाद भी सांझो सिखा दा है की भरोसा कदिया होणा चाईदा। 5 भरोसे दिया बजा ला ही परमेश्वरे हनोक नापे दे माणुऐ जो स्वर्ग च जिन्दा चुकी लिया, कने सै इस ताई मरया नी कने कुसी जो भी उदी लाश नी मिल्ली, क्योंकि स्वर्ग च जाणे ला पेहले हनोके परमेश्वरे जो खुश किता, जियां पबित्र शास्त्र च लिखया है। 6 परमेश्वरे पर भरोसा करिरी ही असां उसयो खुश करी सकदे न, क्योंकि

परमेश्वरे बाल ओणे बाले लोकां जो पक्का भरोसा होणा चाईदा की, परमेश्वर है, कने सै उना जो इनाम दिन्दा है जडे उसयो जाणदे दी कोशिश करदे न। 7 भरोसा करणे दिया बजा ला ही नूह नापे दे माणुऐ जो बाढ दे बारे च चेतावनी मिल्ली जडी उनी कदी नी दिखियो थी। तां परमेश्वरे दा हुकम मन्नी करी अपने परिवार जो बचाणे ताई जाज बणाया, कने जिना लोकां भरोसा नी किता सै सारे दोषी होऐ कने सारे पाणिऐ च डूबी करी मरी गे। क्योंकि नूहे परमेश्वरे पर भरोसा किता इसा बजा ला सै परमेश्वरे दिया नजरा च धर्मी बणया। 8 भरोसे दिया बजा ला ही अब्राहम नापे दे माणुऐ जो परमेश्वरे इक ऐसी जगा च जाणे ताई सदया जिसा जगा जो परमेश्वर बादे च उसयो विरासत च देणेबाला था। कने सै ऐ नी जाणदा था की कुथयो चलाया है, पर फिर भी परमेश्वरे दा हुकम मन्नी करी सै उस देशे जो चली गया। 9 परमेश्वरे जिस जगा दा बायदा कितया था, अब्राहम उस देशे च परदेसियां सांई तम्बूआं च रेंदा था, उदे सोगी उदा जागत इसहाक कने पोत्रू याकूब भी तम्बूआं च रेंदे थे, जिना जो परमेश्वरे ला ऐई बायदा मिलया था। 10 क्योंकि सै स्वर्ग च इक ऐसे शहरे च रेणे दी उम्मीद रखदे थे, जिनी हमेशा बणी रेणा है, जिसयो बणाने बाला कने रचणे बाला परमेश्वर है। 11 भरोसे दिया बजा ला ही अब्राहम दी घरे बालिया सारा बुढ़ी होई के भी गर्भ धारण किता, क्योंकि उसा जो भरोसा था की परमेश्वरे जडा बायदा कितया है सै उनी पूरा करणा। 12 कने इसा बजा ला जालू अब्राहम बडा बुढा होई गया था की मरणे ही बाला था, फिरी भी अम्बरे दे तारयां सांई कने समुंद्रे कंडे दे रेंते सांई उदे अणगिनत वंश पैदा होए। 13 ऐ सारे लोक जिना परमेश्वरे पर भरोसे किता, सै उना चीजां जो मिलयो बिना ही मरी गे, जिदा बायदा परमेश्वरे कितया था। सै उना चीजां जो दूरे ला दिखीकरी खुश होए, कने उना ऐ गल्ल मन्नी लेई की असां इसा धरती पर परदेसी कने अजनबी न। 14 सै लोक जडे ऐसा बोलदे न की असां परदेसी कने अजनबी न, सै इक ऐसे देशे दी मिलणे दी उम्मीद रखदे न जडा उना दा अपना होणा। 15 अगर सै उस देशे दे बारे च सोचदे, जिथू ला सै आयो थे, तां सै मुडी करी जाई सकदे थे। 16 पर उना जो इक खरे देश जाणे दी इच्छा थी मतलब की स्वर्ग, इस ताई परमेश्वर उना दा परमेश्वर बोलया जाणे ला खुश था, क्योंकि उनी उना ताई इक शहर तैयार कितया है। 17 भरोसे दिया बजा ला ही अब्राहम अपने पुत्रे दी बलि चढाणे ताई तैयार होई गया था, जालू परमेश्वरे उदी परिक्षा लेई। परमेश्वरे अब्राहमे ला इस पुत्रे दे बारे च बायदा कितया था की, “इसहाक ला ही तेरा वंश बढणा है।” फिरी भी सै अपने इकलोते पुत्रे जो बलि चढाणे ताई तैयार था। क्योंकि उसयो पूरा भरोसा था की अगर इसहाक मरी भी जांगा तां परमेश्वर उसयो जिन्दा करी सकदा है। इस तरीके ला अब्राहमे जो उदा अपना पुत्र इसहाक जिन्दा मिली गया था। 20 भरोसे दिया बजा ला ही इसहाके अपने दो पुत्रां मतलब की याकूबे कने एसाब जो ओणे बाली जिन्दगी ताई जडा बायदा कितया था उदे बारे च आशीष दिती। 21 भरोसे करणे ला ही याकूबे मरदे बकत यूसुफे दे पुत्रां जो इक-इक करिरी आशीष दिती, कने अपणिया सोठिया दे सारे ला झुकी करी परमेश्वरे दी अराधना किती। 22 भरोसा करणे ला ही यूसुफ नापे दे माणुऐ जालू सै मरणे बाला था, तां उनी बडे भरोसे ला इसा गल्ला जो बोलया था की

इस्त्राएल देशे दे लोकां मिश्र देशे जो छडी करी कनान देशे जो चली जाणा। कने उनी ऐ हुकम भी दितया की जालू सै कनान देशे जो जांगे तां उदियां हड्डियां जो भी कनान देशे लेई जाना। 23 जालू मिश्र देशे दे राजे ऐ हुकम दिता की इस्त्राएलियां दे सारे जमदे जागतां जो मारी दिया, तालू भरोसा करणे ला ही मूसा दे माता-पिता उसयो पैदा होणे बाद तिन्न महीने दीकर लुकाई रख्या, क्योंकि उना दिखया की ऐ खास बच्चा है, कने सै राजे दे हुकम नी मनणे ला नी डरे। 24 मिश्र देशे दे राजे दिया कुडिया मूसे जो पालया था। कने जालू मूसा बड़ा होया तां उनी भरोसा करणे ला ही राजे दिया कुडिया दा पुत्र होणे ला मना करी दिता। 25 ऐ इस ताई होया की मूसे पाप दे थोडे बकते दे सुखां दा आनंद लेणे दे बजाऐ परमेश्वरे दे लोकां सोगी दुख झेलणा जादा खरा समझया। 26 कने उनी मसीह ताई बेईजत होणा, मिश्र देशे दे धन दौलत ला भी जादा बदीकरी समझया, क्योंकि सै अपना इनाम मिलणे दा इतजार करा दा था, जडा परमेश्वरे उसयो देणा था। 27 भरोसा करणे दिया बजा ला ही सै मिश्र देशे दे राजे दे गुस्से ला नी डरया कने उनी मिश्र देश जो छडी दिता, क्योंकि सै समझी गया था कने मन्ना ऐ ऐसा था की जियां उनी परमेश्वरे जो दिखी लिया था, जिसयो कोई दिखी नी सकदा। 28 भरोसा करणे ला ही मूसे इस्त्राएल देशे दे लोकां दी पेहली ओलादी जो हुकम दिता की दरबाजे पर बकरे दा खूने छिड़की करी फसह दा त्योहारे मना, ताकि पैली ओलादा जो खत्म करणे बाला दूत इस्त्राएलियां दिया पेलिया ओलादा जो छुई ना सके। 29 भरोसा करणे ला ही इस्त्राएल दे लोकां लाल समुन्द्र इयां ही पार करी लिया, जियां की सै सुकियां जमिना पर चलयो न, पर जालू मिश्र देशे दे लोकां इयां करणा चाया तां सै सारे डुबी करी मरी गे क्योंकि समुंद्र पलटी गया। 30 भरोसा करणे ला ही इस्त्राएल देशे दे लोकां परमेश्वरे दा हुकम मन्नी करी यरीहो शेहरे दिया कन्दा दे चारो पासे सतां दिनां दीकर चक्कर लांदे रे, तां सै कन्द डेई गेई। 31 भरोसा करणे ला ही रहाब वैश्या परमेश्वरे दे हुकम नी मनणे बाले लोकां सोगी खत्म नी होई, क्योंकि उना इस्त्राएली गुप्तचरां दा स्वागत किता था जडे यरीहो शेहर दा भेद लेणा आयो थे। 32 हुण मिंजो कुछ होर बोलणे दी जरूरत नी है, क्योंकि हुण मेरे बाल बकत नी रिया की, मै, गिदोन, बराक, शिमशोन, यिफतह, दाऊद, शमूएल, कने परमेश्वरे दे संदेश देणेबालयां दे भरोसे दे बारे च तुहांजो दर्से। 33 इना भरोसा करणे ला ही राज्य जिते; सही कम्म किते; कने इना जो बायदा कितियां चीजां मिलियां; कने शेर इना जो खाई नी सके, 34 अग्ग उना जो फुकी नी सकी, तलबारा दी धार उना जो मारी नी सकी, जालू इक बरी कमजोर होए तां दुबारा सै मजबूत बणे, लडाईया च वीर निकले, कने उना अपने दूशमणा दी सेना जो मारी दितया। 35 कुछ जनानियां अपने मरयां लोकां जो फिरी ला जिन्दा दिखया, कितणे तां मार खांदे-खांदे मरी गे, कने अपना भरोसा नी छडया ताकि उना जो जेला ला छुटकारा मिली जा; इस ताई की उना जो मरयां चे जिन्दे होई जाणे बाद इक खरी जिन्दगी मिलले। 36 केईयां दा मजाक उडायो, केईयां जो कोडे खाणा पे, केईयां जो सुंगला ला बन्नी करी जेला च पाई दिता। 37 केईयां जो पथर मारी करी मारी दिता, कने ओरे ला चिरी करी दो फाड करी दिते, तलबारा ने मारी दिते। सै गरीब थे, उना जो दुख दिते कने उना सोगी बुरा बर्ताब किता। कने सै भेडां बकरियां दी

खली जो ओडी करी स्त्रां-परां भटकदे रे। 38 कने बंगा, पहाडा, गुफां च कने धरती दी दारां च भटकदे फिरे। संसार इना भरोसा करणे बाले लोकां दे काबिल नी था। 39 कने भरोसे दे जरिये ही इना लोकां दी परमेश्वरे उना दी तारीफ कितियो, तमी उना जो सै चीजां नी मिलियां जिना दा परमेश्वरे उना ला बायदा कितया था। 40 क्योंकि परमेश्वरे बाल सांझो कुछ खरा देणे योजना है ताकि उना जो सिद्ध बनाई सके, पर सिर्फ साडे सोगी मिली करी ही।

12 साडे अखे-बखे इयोदे लोक बडे भरी न, जिना दिया जिन्दगिया ला सांझो पता लगदा है की भरोसे दा क्या मतलब होँदा है। तां ओआ, असां हर इक रोकणे बाले कने उलझणे बाले पापां जो दूर करिरी, असां उस रस्ते पर चलन जिस पर सांझो जरूर चलणा चाईदा। 2 सांझो यीशु मसीह पास्से दिखदे रेणा चाईदा, जडा सांझो अग्गे बदांदा है कने साडे भरोसे जो पूरा करदा है। जिनी उसा खुशिया ताई जडी उसयो बादे च ओणे बाले बकते च मिलणी थी, बेईजती दी कोई परबाह नी करिरी सूली दे दुखे जो सेहन किता कने मरी गया; कने हुण सै परमेश्वरे दे सिंहासने दे सज्जे पासे जाई बैठया है। 3 इस ताई यीशु दे उदाहरण दे बारे च सोचा, जिनी पापियां दे दितयो बडे बडे दर्द जो इस ताई सेहन करी लिया ताकि तुसां हारी करी हिम्मत ना छडी देन। 4 तुसां बुराईया दियां ताकता दे खिलाफ लडदे होऐ, तुसां हल्ले दीकर ऐसी लडाई नी लडी होणी जिसा च तुहाडी मौत होई गेई हो। 5 कने तुसां उस हिम्मत दियां गल्लां जो भूली गियो न जडियां परमेश्वरे तुहांजो अपने पुत्र समझीकरी बोलियां थियां: “हे मेरे पुत्र, जालू प्रभु तिजो ऐहसास कराऐ की तू गलत कितया है तां उस पर पूरा ध्यान दिया, कने जालू प्रभु तिजो झिडकां दे तां दिखयां हिम्मत छडदा।” 6 क्योंकि प्रभु जिसला प्यार करदा, उसयो सुधारदा भी है, कने जिसयो अपना पुत्र बनाई लेंदा है, उसयो कोडे भी मारदा है। 7 जडा दुख तुसां झेला दे न उसयो परमेश्वरे दी सजा समझीकरी सेहन करी लिया। परमेश्वर तुहांजो पुत्र समझीकरी तुहाडे सोगी बर्ताब करदा है। सै कुण दिया पुत्र है जिसयो उदा पिता सुधारदा नी है? 8 अगर परमेश्वर तुहांजो नी सुधारे जियां से अपने पुत्रे जो सुधारदा है, तां तुसां उदे असली बच्चे नी न। 9 फिरी जालू की साडे शरीरिक पिता भी सांझो सुधारणे ताई सजा दिन्दा है, असां फिरी भी उदी सुणदे कने इज्जत करदे न, इस ताई ऐ होर भी जादा जरूरी है की जालू साडा स्वर्गे दे पिता सांझो सुधारे तां तालू असां उदी सुणन ताकि सांझो हमेशा दी जिन्दगी मिलले। 10 साडे शरीरिक पिता तां अपनी-अपनी समझा दे साबे ला जडा उना जो ठीक लग्गे, थोडे रोजां ताई सांझो सुधारदे थे, पर परमेश्वर साडिया भलाईया ताई सांझो सुधारदा है, ताकि असां भी उस साई पबित्र होई जान। 11 जिस बकत सै सांझो सुधारदा है, उस बकत सै सुधार सांझो खरा नी लगदा है, बल्कि बडा बुरा लगदा है, पर जालू बादे च असां इसला सिख लेंदे न, तालू सांझो शांति मिलदी है, क्योंकि असां सही तरीके ला जिणा शुरू करी दिन्दे न। 12 इना सारियां गल्लां दिया बजा ला मजबूत बना कने प्रोत्साहित रिया। 13 स्त्रां-परां दिखणे दिया बजाऐ, तुसां यीशु मसीह बाल जाणे बाले रस्ते पर जा, ताकि जडे साडे बिच आत्मिक रूप च कमजोर न, सै भटकी ना जान पर उना दा भरोसा मजबूत होई जाए। 14 सारयां सोगी मिली-जुली करी रिया, कने पबित्र जिन्दगी जिणे दी कोशिश

करदे रिया। इदे बिना कोई भी प्रभु जो नी दिखी सकदा है। 15 कने ध्यान रखा की, ऐसा ना हो की कोई भी परमेश्वरे दे अनुग्रह ला छूटी जाए, कने तुहाडे बिच पेशानी खडी करी दे। ऐसा माणु तुहाडे चे मतयां जो बर्बाद करी सकदा है। 16 ऐसा ना हो, की कोई भी जणा व्यभिचारी, या अब्राहमे दे पोत्र एसाब साईं अधर्मी हो। क्योंकि सै जेठा पुत्र था, पर उनी अपने पेहला पुत्र होणे दे सारे हकां जो अपने छोटे भाई याकूब जो इक बकते दिया रोटिया ताईं बेचीं दिता। 17 तुसां जाणदे न की बादे च जालू सै अपने पिता ला आशीष पांणा चांदा था, पर उसयो ऐ नी मिली, कने रोई-रोई करी भी उनी आशीष मंगी पर उसयो अपनी गलती सुधारणे दा दुबारा मौका नी मिलया। 18 तुसां सनै पहाडे साईं असली पहाडे पर नी आयो न, जिसयो छुई कने दिखी सकदे न। ऐथु कोई भखदी अग्न या काले बदल या तूफान नी है, कने लोक इक ऐसिया ही जगा च थे जालू परमेश्वरे उना जो अपनी व्यवस्था दिती। 19 कने ना ही तुरही दिया अब्राजा कने बोलेणे बाले दे बखे नी आयो न, जिसयो सुणने बालयां विनती किती की हुण साडे ला जादा गल्लां मत करा। 20 उना ऐसा इस ताईं बोलया क्योंकि सै उस हुकमे जो सेहन नी करी सके जडा परमेश्वरे बोलया, “अगर कोई जानवर भी उस पहाडे जो छुंगा तां उसयो पत्थर मारा।” 21 कने सै दर्शन इतणा डरावणा था, की मूसे भी बोलया, “मैं बडा डरा दा कने कमा दा है।” 22 पर तुसां सिध्दो पहाडे पर आईं गियो न जडा जिन्दे परमेश्वरे दा स्वर्गीय यरूशलेम शहर है, जिथु लखां स्वर्गदूत त्योहारे कने खुशिया मनादे न। 23 तुसां परमेश्वरे दे पहिलौठां दिया सभा च आयो न, जिना दे ना स्वर्ग च लिखयो न। तुसां अपु परमेश्वरे बाल आयो न जडा सारियां चीजां दा न्याय करणे बाला है, सै स्वर्ग च उना धर्मी लोकां दियां आत्मा न जिना जो हुण सिद्ध बनाया है। 24 तुसां यीशु मसीह बाल आयो न जडा लोकां कने परमेश्वरे बिच नोई बाचा दा बिचोलिया है। कने छिडकयो खने बाल आयो न, जडा हाबिले दे खूने साईं न्याय ताईं विनती करणे दे बजाए पापां दी माफी दी गल्ल करदा है। 25 ध्यान रखा कने उस परमेश्वरे दी मन्ना जडा तुहाडे ने गल्ला करा दा है, क्योंकि इस्राएल दे लोक परमेश्वरे दिया सजा ला नी बची सके जालू उना मूसा दी गल्ल नी मन्नी, इस ताईं साडे ताईं होर भी जादा बुरा होणा अगर असां परमेश्वरे दिया गल्लां जो सुणने ला मना करी दिगे जडा स्वर्गे ला चेतावनी दिन्दा है। 26 जालू परमेश्वरे सनै पहाडे पर खडोई करी बोलया तां उदिया अब्राजा ला धरती हिली पेई थी, पर हुण उनी ऐ बायदा कितया है की, “मैं इक बरी फिरी सिर्फ धरती जो नी, पर अम्बरे जो भी हिलाई देणा है।” 27 कने ऐ गल्ल इक बरी फिरी इसा गल्लां जो दसदी है, की सारियां बनाईयां चीजां हिलाईयां कने हटाई जाणियां न, ताकि सै चीजां जडियां हिलाई नी जान्दियां न सै टिकी रेन। 28 इस ताईं सांझो जडा राज्य मिलया सै हिलाया नी जाई सकदा, इसा गल्ला ताईं सांझो परमेश्वरे दा धन्यवाद करणा चाईदा। कने इज्जत कने डरे सोगी, परमेश्वरे दी ऐसी अराधना करन, जिसला सै खुश होंदा। 29 क्योंकि जियां अग्न भस्म करदी है, तियां ही साडा परमेश्वर अपने दूश्मणा जो खत्म करदा है।

13 इक दुज्जे सोगी अपना भाई कने बेहण समझीकरी प्यार करा। 2 अजनबी लोकां दी भी इज्जत कने खातिरदारी करदे रिया, क्योंकि

ऐसा करणे ला केईयां लोकां अनजाणे च स्वर्गदूतां दी इज्जत कने खातिरदारी कितियो है। 3 केदियां दा इयां हाल चाल पुछदे रिया, जियां मन्ना तुसां भी उना सोगी जेला च न, कने जडे दुख सेहन करा दे न, उना दा भी ऐ समझीकरी हाल चाल पुछदे रिया, जियां तुसां भी उना सोगी उना दे दुखे च शामिल न। 4 बियाये दा रिश्ता सारयां ताईं आदरनीय हो, कने लाडा-लाडी इक दुज्जे सोगी बफादार रिया। क्योंकि परमेश्वरे व्यभिचारियां कने नाजायज रिश्ते रखणे बालयां दा न्याय करणा है। 5 अपणिया जिन्दगिया जो पैसयां दे लालचे ला दूर रखा, कने जडा तुहाडे बाल हो तुसां उसी च ही खुश रिया; क्योंकि परमेश्वरे अपु ही बोलया है, “मैं तिजो कदी भी नी छडगा कने ना ही कदी त्यागणा है।” 6 इस ताईं असां बिना डरयो बोलदे न, “प्रभु, मेरी सहायता करदा है, मैं नी डरणा; माणु मेरा क्या बगाडी सकदा है।” 7 जडे तुहाडे अगुवे न, कने जिना तुहांजो परमेश्वरे दा बचन सुणया है, उना जो याद रखा; कने ध्याने ने उना दिया जिन्दगिया जो दिखा की, कियां उना अपनी जिन्दगी जी कने मरणे दीकर भरोसे च बफादार रे, तियां ही तुसां भी परमेश्वरे पर भरोसा दस्सा जियां उना दसया था। 8 यीशु मसीह कल कने अज कने यूगां-यूगां दीकर इकोदिया है, क्योंकि यीशु मसीह कदी नी बदलदा। (aiōn g165) 9 इस ताईं सांझो इना सारियां नोईयां कने लग-लग शिक्षां जो नी मनणा चाईदा, जडियां तुहांजो गलत रस्ते पर लेई जान्दियां न। तुहाडे मना ताईं ऐ ही खरा है की सै अनुग्रह दे जरिये पक्के बनन, ना की उना खाणे बालियां चीजा दे रिबाजां जो मनणे ला, क्योंकि इना गल्लां जो मनणे ला उना दा कोई फायदा नी है जडे इना गल्लां जो मंदे थे। 10 साडे बाल इक ऐसी वेदी है, जिसा चे मिलाप दे तम्बूरे दे याजकां जो खाणे दा कोई हक नी है। 11 क्योंकि पैली बाचा अनुसार हर साल महायाजक जिना जानवरां दा खून पापां दी माफी ताईं परम पबित्र जगा पर लेई जांदा था, उना दे शरियां जो जिथु सै रेंदे ओथु ला बार लेईजाई करी फूकदे न। 12 इसी बजा ला, यीशुऐ भी लोकां जो अपने ही खूने ला पबित्र करणे ताईं यरूशलेम शहर ला बाहर दुख झेले कने मरी गिया। 13 इस ताईं ओआ, असां यहूदी रीतियां जो छडी करी, छावनी दे बार जान, कने यीशु मसीह पर भरोसा करदे होऐ जियां यीशुऐ बेईजती सेहन किती, तियां ही असां भी बेईजती सेहन करन। 14 क्योंकि इसा धरती पर साडे बाल हमेशा रेणे ताईं कोई घर नी है, बल्कि असां तां उस स्वर्गे दे घरे दा इंतजार करा दे न जडा हमेशा ताईं है। 15 इस ताईं असां यीशुऐ जरिये लगातार अपने ओठां ला परमेश्वरे दा गुणगान करन। ऐई उदे ताईं साडा बलिदान है। 16 पर भलाई करणा कने जरूरतमंद लोकां दी सहायता करणा कदी मत भुलदे; क्योंकि परमेश्वर ऐसे बलिदाना ला खुश होंदा है। 17 अपने अगुवां दा हुकम मन्ना, कने उना दे अधीन रिया, क्योंकि तुहाडियां आत्मा दी रखबाली करणा उना दा कम्म है, उना जो तुहाडे बारे च परमेश्वरे जो लेखा देणा पौणा है। तुसां उना दी मन्ना ताकि सै इस कम्मे जो खुशिया ला करन, ना की दुखी होईकरी, क्योंकि दुखी होईकरी सेवा करणे दा कोई फायदा नी होणा। 18 साडे ताईं प्राथना करदे रिया; क्योंकि सांझो इसा गल्ला दा पक्का पता है, की साडी अंतरात्मा शुद्ध है, कने असां हर बकत खरा ही करणा चांदे न जिदे जरिये परमेश्वरे जो इज्जत मिल्ले। 19 तुहाडे ला मेरी ऐ खास विनती है की प्रार्थना

करा की मैं तुहांजो ला मिलणा तोली आई सकें। 20 कने हण परमेस्वर जडा तुहांजो शांति दिन्दा है, कने जिनी साडे प्रभु यीशु जो मरयां चे जिन्दा किता, सै तुहांजो सारियां चीजां दे जिना दी जरूरत तुहांजो उदी इच्छा जो पूरा करणे ताई है। कने यीशु मसीह दिया शक्तिया जरिये सै तुहांजो हर इक खरिया गल्ला जो सिद्ध करे जडियां उसयो खुश करदियां न। यीशु मसीह सनातन बाचा दे जरिये भेडां दा महान पुहाल बणया, जिस पर उदे खने ला हस्ताक्षर कितया है। उदी महिमा हमेशा होंदी रे। आमीन। (aiōn g165, aiōnios g166)

22 हे मसीह भाईयो, मैं तुहाड़े ला विनती करदा है, इस चिठिया दियां गल्लां जो सबर रखीकरी सुणी लिया, ऐ मैं तुहांजो होंसला देणे ताई लिखियां न। मैं इसा चिठिया च बडियां जादा गल्लां नी लिखियां न। 23 तुसां ऐ जाणी लिया की तीमुथियुस साडा मसीह भाई जेला ला छुटी गया है, कने अगर सै तौली मेरे बाल आई गया तां मैं उदे सोगी तुहांजो ने मिलगा। 24 अपने सारे अगुवां जो कने परमेस्वरे दे सारयां लोकां जो नमस्कार बोला। इतालिया प्रदेशे दे भरोसा करणे बाले मसीह भाई कने बेहणा तुहांजो नमस्कार बोलदे न। 25 मैं प्राथना करदा है की, परमेस्वर दा अनुग्रह तुसां सारयां पर होंदा रे। आमीन।

1 मैं, याकूब इसा चिठिया जो लिखा दा है, मैं परमेश्वर दा कने प्रभु यीशु मसीह दा सेवक है। मैं ऐ चिठी इस्राएल दे लोकां जो लिखा दा है, जडे बाहरां गोत्रों चे न कने दुनिया भर रूआं परां बिखरयो न, कने उना जो नमस्कार बोलदा है। 2 हे मेरे मसीह भाईयो, जालू तुहांजो पर लग-लग तरा दियां पेशानिया ओन, तां इसयो पूरी खुशिया दी गल्ल समझनयो, 3 क्योंकि तूसां जाणदे ही न, की तुहाडे भरोसे जो परखे जाणे ला होर जादा सबर बददा है। 4 परमेश्वरे पर भरोसा करिरी सबर ला पेशानिया दा सामणा करदे रिया, ताकि तूसां आत्मिक स्पे ला पूरे समझदार कने सिद्ध होई जान कने तुहाडे च कुसा भी गल्ला दी कमी ना रे। 5 पर अगर तूसां चे कुसयो भी अकला दी कमी है, तां परमेश्वरे ला मंगा, जडा बिना दोष दितयो सबना जो प्यारे ला दिन्दा है; कने परमेश्वरे तुहांजो भी देणा है। 6 जालू तूसां परमेश्वरे ला मंगे, तां पूरा भरोसा करिके मंगनयो कने परमेश्वरे पर कोई भी शक मत करदे, क्योंकि शक करणे बाले समुन्द्रे दियां लैहरां सांई बदलदे रेंदे न, जडियां होआ ने चलदियां कने उटकदियां न। 7 ऐसा माणु ऐ आस बिलकुल छडी दे, की उसयो प्रभु ला कुछ मिलगा, क्योंकि इदा मन घडी-घडी बदलन्दा रेंदा कने लोक इस पर भरोसा नी करी सकदे। 9 जडे विस्वासी भाई गरीब न, उना जो खुश होणा चाईदा की परमेश्वरे उसयो कडेंई इज्जत दिती। 10 जडे विस्वासी भाई अमीर न, उसयो खुश होणा चाईदा, की परमेश्वरे उसयो दीन किता, क्योंकि उदी अमीरी नाश होणे बाले जंगली घाए सांई है दे फुलां सांई झडी करी खत्म होई जांदी है। 11 क्योंकि सूरज निकलदे ही जारे दी धूप पौंदी कने सारा घा सुकी जांदा है, कने उसा दे सारे फुल झडी जांदे न, कने उना दी शोभा मुकी जांदी है; तियां ही अमीर विस्वासिये भी मरी जाणा अगर सै अपने ही कम्मा च लग्गी रेंगा। 12 धन्य है सै माणु, जडा परख च टिकी रेंदा है, क्योंकि जालू सै परख च खरा निकली जांदा है, तां उसयो अनन्त जिंदगी दा सै मुकुट मिलणा जिसदा बायदा परमेश्वरे अपने प्यार करणे बालयां तांई कितया है। 13 जालू कुसी दी परख हो, तां सै ऐ ना समझे, की मेरी परख परमेश्वरे करा दा है, क्योंकि ना तां बुरियां गल्लां ने परमेश्वरे दी परख होई सकदी है, कने ना ही परमेश्वर कुसी दी परख अपु लेंदा है। 14 पर हर माणु अपणियां ही बुरिया इच्छा च फसी करी परख च पौंदा है, जियां इक डंगर खांणे दे लालचे आई करी फाईया च फसी जांदा है। 15 फिरी सै बुरी इच्छा गर्भवती होई के पापे जो जन्म दिन्दी है, कने जालू पाप बदी जांदा है, तां सै हमेशा दी मौत दा रस्ता है। 16 मेरे प्यारे मसीह भाईयो, धोखा च मत रिया। 17 क्योंकि हर इक खरा वरदान कने हर इक खरा दान स्वर्गे ला ही है, कने ज्योतियां दे पिता ला ही मिलदा है, सै हमेशा इकोदिया रेंदा कने ना ही छाया पौंदी है। 18 उनी अपणी ही इच्छा ने सांझो सच्चे बचना ने नोई जिन्दगी दितियो है, ताकि असां उदी बणाईयो दुनिया दे सारयां ला जरूरी हिस्सा बणन। 19 हे प्यारे मसीह भाईयो, ऐ गल्ल तूसां जाणी लिया हर इक माणु सुणने तांई हमेशा तैयार कने बल्ले बोलणे बाला कने घट गुस्से बाला हो। 20 क्योंकि जालू माणु गुस्सा करदा है तां, सै धार्मिक जिन्दगी नी जी सकदा, जडा परमेश्वरे जो खुश करदा है। 21

इस तांई मने दी सारी मेला जो कने दुशमणिया जो मुकाई करी परमेश्वरे दे बचने जो प्यारे ने अपनाई लिया, जडा तुहाडे दिले च रखया है, कने जडा तुहाडे प्राणा दा उद्धार करी सकदा है। 22 पर परमेश्वरे दे बचना दी शिक्षा दा पालन करणे बाला बणा, ना की सिर्फ सुणणे बाले, जडे अपने आपे जो धोखा दिन्दे न। 23 क्योंकि अगर कोई बचन दी शिक्षा जो सिर्फ सुणनेबाला है, पर मनदा नी है, तां सै उस माणुए सांई है, जडा अपना मुं शीशे च दिखदा है। 24 इस तांई की सै अपने आपे जो दिखीकरी चली जांदा है, कने झट भूली जांदा है, की मैं कदिया था। 25 पर जडा माणु परमेश्वरे दी पूरी व्यवस्था दा ध्याने ने अध्ययन करदा है, जडी लोकां जो पापां ला अजाद करदी है, सै इसयो सुणी के भुलदा नी है, पर इसदी शिक्षा दा पालन करदा है, उसयो अपने कम्मा पर परमेश्वरे ला आशीष मिलणी। 26 अगर कोई अपने आपे जो भक्त समझे, कने बुरियां गल्लां बोलणे च काबू नी रखे, तां सै अपने आपे जो धोखा दिन्दा है कने उदी भक्ति बेकार है। 27 साडे पिता परमेश्वर दिया नजरा च शत्रु कने सच्ची भक्ति ऐ है, की अनाथां कने विधवां दे दुखां च उना दा हाल चाल पुच्छन, कने अपने आपे जो संसारे दे बुरे कम्मा ला बचाई रखा।

2 हे मेरे प्यारे मसीह भाईयो, तूसां साडे महिमामय प्रभु यीशु मसीह दे चले न, इस तांई तूसां च भेदभाव ना हो। 2 मन्नी लिया, अगर इक माणु सोने दे छल्ले कने छेल कपडे पाई करी तुहाडिया कलीसिया च ओए कने इक गरीब माणु मैले कपडे पाई करी आए। 3 कने तूसां उस छेल कपडे बालयो बडिया इज्जता ला बोलन, की तू ओथु खरिया दिया जगा च बैठ, कने तू उस गरीबे जो बोले, तू ऐथू खडोई रे, “या मेरे पैरां बाल बैठ।” 4 तां क्या तूसां इना दोनों च भेदभाव नी किता कने तूसां बुरे बिचारे ला न्याय करणे बाले नी बणी गे? 5 हे मेरे प्यारे मसीह भाईयो सुणा; इसा गल्ला पर ध्यान दिया, क्या परमेश्वरे इस संसारे दिया नजरा च गरीब लोकां जो भरोसे च अमीर होणे तांई नी चुणया? परमेश्वरे उना जो स्वर्ग राज्य च वारिस बणने दा भी वायदा कितया है जडे उसयो प्यार करदे न। 6 पर तूसां उस गरीबे दी बेसती किती। तूसां जाणदे न अमीर लोक तूसां पर जल्म करदे न कने सै तुहांजो कचेरिया च घसीटी-घसीटी के लेई जांदे न। 7 सै सेई न जडे यीशु मसीह दे आदर योग्य नाए दे खिलाफ बुरियां गल्लां करदे न, जिना सोगी तूसां रिश्ता रखदे न। 8 अगर तूसां पबित्र शास्त्रे दे इस बचने दे अनुसार की “तू अपने पडोसियां सोगी अपने सांई प्यार कर,” सच्ची उस राज्य दी व्यवस्था जो पूरा करदे न तां खरा करदे न। 9 पर अगर तूसां भेदभाव करदे न, तां पाप करदे न; कने व्यवस्था दे अनुसार तूसां दोषी न। 10 क्योंकि जडा कोई सारी व्यवस्था दा पालन करदा है, पर उदे इक हुकम जो तोड़दा है, तां सै भी उसी सांई दोषी है जिनी सारिया व्यवस्था दा पालन नी किता। 11 इस तांई परमेश्वरे ऐ बोलया, तू व्यभिचार मत करदा, उनी ही ऐ भी बोलया की, “तू हत्या मत करदा” इस तांई अगर तू व्यभिचार नी किता, पर हत्या कितियो है, तां तू व्यवस्था दे अनुसार दोषी है। 12 इस तांई तुहाडा बचन बोलणा कने उना जो मनणा, उना लोकां सांई होऐ, जिना दा न्याय उसा व्यवस्था दे अनुसार होणा है, जडी सांझो अजाद करदी है। 13 क्योंकि जडा कोई दुज्जयां पर दया नी करगा, तां परमेश्वरे भी उस पर दया नी करणी। पर जडा कोई दुज्जयां पर दया करगा, तां परमेश्वरे भी

उस पर दया करणी, जालू उनी न्याय करणा। 14 हे मेरे प्यारे मसीह भाईयो, अगर कोई बोले की मिंजो यीशु मसीह पर भरोसा है, पर सै दुज्जयां ताई भले कम्म नी करदा हो, तां इसला क्या फायदा? क्या ऐसा भरोसा उदा उद्धार करी सकदा है? 15 अगर कुसी मसीह भाई या बेहणा बाल जरूरी कपडे ना होन, कने उना जो खाणे जो घट मिलदा हो, 16 कने तुसां चे कोई उना जो बोले कि, “प्रभु तुहांजो आशीष दे कने तुहांजो गर्म रखे कने खाणे जो रोटी दे,” पर जडियां चीजां साडे शरीर ताई जरूरी न, अगर सै उना जो ना देन, तां इसला उदा कोई फायदा नी होणा। 17 तियां ही भरोसा भी, अगर भले कम्मा सोगी नी हो तां उदा भरोसा बेकार है। 18 “कोई बोलदा है की मैं यीशु मसीह पर भरोसा करदा है, कने दुज्जा माणु बोलदा है की मैं भले कम्म करदा है।” पर मैं बोलदा है, “क्या तुसां बिना भले कम्म करिरी मिंजो ऐ साबित करी सकदे न की तुसां यीशु मसीह पर भरोसा करदे न? मैं अपने भले कम्मा करणे दे जरिये ऐ साबित करी सकदा है की मैं यीशु मसीह पर भरोसा करदा है।” 19 तिजो भरोसा है, की इक ही परमेश्वर है; ऐ अच्छी गल्ल है: बुरियां आत्मा भी भरोसा रखदियां न, कने डरदियां न। 20 पर मुख माणु क्या तू ऐ भी नी जाणदा, की भले कम्म बिना भरोसा बेकार है? 21 जालू साडे पूर्वज अब्राहमे अपने पुत्र इसहाक दी बलि वेदिया पर चढ़ाई, तां उनी जडा भला कम्म किता, उसला ही सै परमेश्वरे दे सामणे धर्मी बणया था। 22 तू दिखी लिया की भरोसे उदे कम्मा सोगी मिली के प्रभाव पाया है, कने उदे कम्मा दे जरिये उदा भरोसा पूरा होया। 23 कने पबित्र शास्त्रे दा ऐ बचन सच्च होया, अब्राहमे परमेश्वरे पर भरोसा किता, कने उदे भरोसे दिया बजा ला उसयो धर्मी माणु मनया, कने उसयो परमेश्वरे दा मित्र बोलया गया। 24 तां तुसां दिखी लिया की माणु सिर्फ भरोसे ला ही नी पर भले कम्मा दिया बजा ला इक माणु धर्मी बणदा है। 25 तियां ही रहाब वैश्या भी, जालू उना संदेश देणेवाले दूतां जो अपने घरे रेणे दी जगा दिती कने दुज्जे रस्ते ला विदा किता, तां सै भी अपने इस भले कम्मे दिया बजा ला धर्मी मन्नी गई। 26 जियां साडा शरीर बिना सां दे मरया होया है, तियां ही भरोसा भी भले कम्मा दे बिना बेकार है।

3 हे मेरे मसीह भाईयो, तुहाडे चे कलीसिया दे मते गुरु मत बणदे, क्योंकि तुसां जाणदे न, की असां गुरुआं दा न्याय होर भी जादा सकतिया ला होणा है। 2 असां सारे बडी बरी गलतियां करी दिन्दे न; पर अगर कोई माणु जडा कुछ सै बोलदा है, उस च कोई गलती ना करे, तां सेई सिद्ध माणु है, कने अपने आपे जो पूरी तरह बसे च रखी सकदा है। 3 अगर असां घोडयां जो अपने वशे च करणे ताई उना दे मुंऐ च लगाम लांदे न, तां असां उना दे सारे शरीर जो कुसी भी पासे घुमाई सकदे न। 4 दिखा, जाज भी कितणे बड़े होंदे न, कने तेज होआ ने चलाऐ जांदे न, तमी इक छोटी दिया पतवारा ने माँझी अपणिया मरजिया ला मोड़ी दिंदा है। 5 तियां ही जीभ भी साडे शरीर दा इक छोटा दिया अंग है, कने बडियां-बडियां गल्लां करदी है: दिखा कियां, इक छोटी देई चिंगारी कितणे बड़े बणे च अग्न लगाई सकदी है। 6 ऐ छोटी जीभ भी इक चिंगारी साई है; ऐ शरीर दा सबते बुरा हिस्सा है, जडा इक माणुऐ दी सारी जिन्दगी जो नरके दी अग्नी च नाश करी दिन्दी है। (Geenna g1067) 7 हर तरा दे बणे दे जानवर, पंछी, कने रंगेणवाले जानवर कने पाणिऐ च रेहणे

बाले तां माणुऐ दे वशे च होई सकदे न, कने होई भी गियो न। 8 पर जीभा जो कोई भी माणु वशे च नी करी सकदा; सै इक ऐसी बला है, जडी कदी भी स्कदी ही नी है; कने जहरिले सांप्पे सांई खतरनाख है। 9 इसा जीभा ला ही असां प्रभु यीशु कने पिता परमेश्वर दी स्तुति करदे न, कने इसा जीभा ला ही माणुआं जो श्राप दिन्दे न, जिना जो परमेश्वरे अपने स्वरूप च बणाय है। 10 इक ही मुंऐ ला श्राप कने धन्याबाद दोनो निकलदे न। हे मेरे मसीह भाईयो, ऐसा नी होणा चाईदा। 11 पाणिऐ दे इकी ही खुऐ ला कोडा कने मिठा पाणी दोनो सोगी कदी नी निकली सकदे। 12 हे मेरे मसीह भाईयो, इयां ही अंजरी दे स्खे च जैतून, या दाखा दिया बेला च अंजरी कदी नी लगी सकदे। इयां ही पाणिऐ दे इकी ही खुऐ ला कोडा कने मिठा पाणी दोनो सोगी कदी नी निकली सकदे। 13 तुसां च ज्ञान बाला कने समझदार कुण है? अगर तुसां हेन, तां तुहांजो इसयो अच्छी जिन्दगी की करी साबित करणा चाईदा कने शांत सभाब जडा तुहाडे ज्ञान ला ओदा है, अपने भले कम्मा दे जरिये साबित करणा चाईदा। 14 अगर तुसां अपने मने च कड़वाट, जलन कने मतलबीपन रखदे न, तां इदा घमंड मत करदे, कने ना ही सच्च दे खिलाफ कोई झूठ बोलनयो। 15 ऐ ज्ञान सै नी है, जडा स्वर्ग ला मिलदा है, ऐ तां शारीरिक, संसारिक, कने शैतानी है। 16 क्योंकि जिथू जलन कने मतलबी हुंदा है, ओथु बखेडा कने हर तरा दे बुरे कम्म भी होंदे न। 17 पर जडा ज्ञान स्वर्ग ला मिलदा है, सै पेहले तां पबित्र होंदा है, फिरी मिलनसार, कोमल, कने प्यारभाव, दया ला भस्या, खरे कम्मा ला लदुया कने बिना कुसी भेदभाव कने बिना कुसी कपट दे होंदा है। 18 कने जडे मेल मिलाप करणे बाले न, उना शान्ति दा बी राणा कने धार्मिकता दा फसल बडणी।

4 तुसां च ऐ लडाई कने झगडे कुथु ला ओदे न; ऐ उना इच्छा ला ओदे न जडियां तुहाडे अंदर लडदियां न। 2 तुसां कुछ चांदे न, पर जालू तुसां जो सै मिलदा नी है; इस ताई तुसां हत्या करणे ताई तैयार होई जांदे न, की तुहांजो सै मिली जाए, पर कुछ हासिल नी हुंदा ताई तां तुसां लडदे झगडदे न, तुहांजो इस ताई कुछ नी मिलदा क्योंकि तुसां परमेश्वरे ला कुछ नी मंगदे न। 3 तुसां मंगदे न फिरी भी तुहांजो नी मिलदा, क्योंकि तुसां बुरिया इच्छा ला मंगदे न, ताकि अपने बुरे कम्मा च उडाई दे। 4 हे व्यभिचारियों सांई वेविश्वासी लोको, क्या तुसां नी जाणदे, कि संसारे दियां चीजां ला मित्रता करणे दा मतलब परमेश्वरे ला बैर करणा है, जडा संसारे दा मित्र बणना चांदा है, सै अपने आपे जो परमेश्वरे दा बैरी बणाई लेंदा है। 5 क्या तुसां ऐ समझदे न, की पबित्र शास्त्र च जडा लिखया है सै बेकार है, “जिसा पबित्र आत्मा जो उनी साडे अंदर बसाया है, सै ऐ चांदा है की असां परमेश्वरे दी ही अराधना करना।” 6 पर परमेश्वर सांझो होर भी जादा अनुग्रह दिन्दा है ताकि असां बुरियां इच्छां दे खिलाफ खडे होई सकन, इस बजा ला पबित्र शास्त्र च ऐ भी लिखया है कि, “परमेश्वर घमंडियां दा बिरोध करदा है, पर दीन लोकां पर अनुग्रह करदा है।” 7 इस ताई परमेश्वरे दे अधीन होई जा; कने उना कम्मा जो करणे ला मना करा जडा कि शैतान चांदा है की तुसां करा, तालू उनी तुहाडे सामणे ला नसी जाणा। 8 परमेश्वरे दे नेडे ओआ, तां उनी भी तुहाडे नेडे ओणा, ओ पापियो, अपने मना जो शुद्ध करा। लगातार सोच बदलने बाले

लोको, अपने दिले जो पबित्र करा। 9 अपने पापां दिया बजा ला दुखी होआ, शोक करा, कने रोआ: तुहाड़ी हंसी रोणे च कने खुशी उदासिया च बदली जा। 10 प्रभुऐ दे सामणे दीन बना, तां उनी तुहांजो उच्चा उठाणा। 11 हे मसीह भाईयो, इक दुज्जे दी निंदा मत करा, जडा अपने भाईयां दी निंदा करदा है, या भाई पर दोष लांदा है, तां से व्यवस्था दी निंदा करदा है, कने व्यवस्था पर दोष लांदा है, तां त व्यवस्था पर चलणे बाला नी, पर उस पर न्याय करणे बाला होया। 12 परमेस्वर ही है जडा व्यवस्था देणेबाला कने न्याय करणे बाला है से नाश करणे बाला कने बचाणे बाला है; तुसां कुण होंदे न, जडे अपने पड़ोसिए पर दोष लांदे न? 13 तुसां जडा ऐ बोलंदे न, “अज या कल असां दुज्जे शेहरे च जाईके इक साल ओथु रंगे, कने व्यापार करिरी फायदा करगे।” 14 पर ऐ नी जाणदे न की कल क्या होणा है। तुसां सुणा! की तुहाड़ी जिन्दगी हे ही क्या? तुसां तां मन्ना की धुंधा सांई न, जडी थोड़ी देर मिलदी है, फिरी उडी जांदी है। 15 इस तांई तुहांजो ऐ बोलणा चाईदा, “अगर प्रभु दी मजीं होंगी, तां असां जींदे रेणा है, कने ऐ या सै कम्म भी करगे।” 16 पर हुण तुसां अपणी बडियां-बडियां योजना पर घमंड करदे न; ऐसा सारा घमंड बुरा होंदा है। 17 इस तांई जडा कोई भलाई करणा जाणदा है कने नी करदा, उदे तांई ऐ पाप है।

5 हे अमीरों, सुणा; तुसां लोकां जो रोणा कने ज़ोर-ज़ोर ला चिलाणा चाईदा, क्योंकि मुसीबतां तुहाड़े पर ओणे बालियां न। 2 तुहाड़ी धन दौलत नाश होई जाणी कने तुहाड़े कपड़यां जो कीड़े लगी गिया है। 3 तुहाड़ा सोना चांदी बेकार होई गिया है; जिस धन दौलत पर तुसां भरोसा करदे न उनी तुहांजो अग्गी सांई फुकी देणा: तुहाड़ा गठेरया धन दौलत न्याय दे दिने तुहाड़े खिलाफ सबूत दे स्पे च खडा होई जाणा। 4 दिखा, जिना मजदुरां तुहाड़े खेतर बड़े, उना दी मजदूरी जडी तुसां उना जो नी दिती, उना दी नी दीतियो मजदूरी परमेस्वरे दे सामणे तुहाड़े खिलाफ चिलाई-चिलाई करी गबाई दे दी है, कने मजदूरानां दी दुहाई स्वर्गीय सेना दे प्रभुऐ सुणी लेई है। 5 तुसां धरतिया पर भोग-विलास करणा लगी रे, कने बडा भरी सुख भोगया; तुसां तां उस जानवरे सांई होई गे, जिसयो मारणे ला पेहले खुआई पियाई करी मोटा करदे न, इयां ही तुसां भी नी जाणदे न, की तुसां नाश होआ दे न। 6 तुसां भोले लोकां जो दोषी बोली करी मारी दिता, कने सै तुहाड़े खिलाफ लडी ही नी सके। 7 इस तांई हे मसीह भाईयो, प्रभुऐ दे ओणे दीकर सबर रखा, जियां किसान धरतिया दे किमती फसल दी आस रखीकरी पैली कने आखरी बरखा होणे दीकर सबर रखदा है। 8 इयां ही तुसां भी सबर रखा, कने आस मत छडा, क्योंकि प्रभु ओणे बाला है। 9 हे मसीह भाईयो, इक दुज्जे पर दोष मत ला, ताकि तुहाड़े पर भी दोष ना लग्गे, दिखा, न्याय करणे बाला ओणे तांई तैयार है। 10 हे मसीह भाईयो, जिना परमेस्वरे दे संदेश देणेबालयां प्रभु दे नां ला गल्लां कितियां न, उना जो दुख झेलणे कने सबर रखणे दा इक आदर्श समझा। 11 दिखा, असां धीरज रखणे बालयां जो धन्य बोलंदे न। तुसां प्रभु दे सेवक अय्यूब दे सबर दे बारे च सुणया ही है, कने तुसां ऐ भी जाणदे न की प्रभुऐ आखरी च उदी कियां सहायता किती, उसला प्रभु दी बडी कृपा कने दया प्रगट होंदी है। 12 पर हे मेरे मसीह भाईयो, सारायां ला बडी गल्ल ऐ है,

कदी भी कसम मत खांदे, ना ही स्वर्गे दी, ना ही धरतिया दी, ना ही कुसी होर चीजा दी, पर तुहाड़ी गल्ल हां दी हां, कने ना दी ना हो, ताकि तुहांजो परमेस्वरे ला सजा ना मिल्ले। 13 अगर तुहाड़े च कोई दुखी हो तां सै प्राथना करे, अगर कोई खुश हो तां सै स्तुति दे भजन गाऐ। 14 अगर तुसां चे कोई रोगी हो, तां सै कलीसिया दे अगुवां जो सदे, कने सै प्रभु दे नाऐ ला उस पर तेल मली करी उदे तांई प्राथना करा। 15 कने भरोसे दिया प्राथना ला मरीजे दे सारे रोग दूर होई जाणे, कने प्रभुऐ उसयो ठीक करी देणा; अगर उनी पाप भी कितयो होंगे, तमी परमेस्वरे उसयो माफ करी देणा। 16 इस तांई तुसां अपु चे इक दुज्जे दे सामणे अपने-अपणे पापां जो मनी लिया; कने इक दुज्जे तांई प्राथना करा, जिसला तुसां ठीक होई जान; इक धर्मी जणे दी प्राथना बडी सामर्थी है कने अदभुत नतीजे निकलंदे न। 17 परमेस्वरे दा संदेश देणेबाला एलियाहा भी तां साडे सांई दुख-सुख भोगी माणु था; कने उनी पुरे दिले ला गिडगिडाई करी प्राथना किती, की बरखा ना हो, कने साडे तिन्ना सालां दीकर धरती पर बरखा नी होई। 18 फिरी उनी प्राथना किती, तां अम्बरे ला बरखा होई, कने धरती हरी बरी होई। 19 हे मेरे मसीह भाईयो, अगर तुसां चे कोई परमेस्वरे दे सच्च दे रस्ते ला भटकी जा, कने कोई तुसां चे उसयो बापस फेरी लेई ओऐ। 20 तां तुसां समझी लिया, जडा कोई परमेस्वरे दी सच्ची शिक्षा ला भटकयो पापिये जो बापस लेई ओगा, उनी इक आदमिये दे प्राणा जो मौत ला बचाणा है, कने परमेस्वरे उदे केई पापां जो माफ करी देणा।

1 पतरस

1 मैं, पतरस जड़ा यीशु मसीह दा प्रेरित है, ऐ चिट्ठी मेरिया तरफा ला है। मैं ऐ चिट्ठी परमेस्वरे दे चुणयो लोकां जो लिखा दा है जडे पुन्तुस, गलातिया, कप्पदूकिया, आसिया, कने बितूनिया प्रदेशां दे लग-लग शेहरां च परदेसियां सांई रेंदे न। **2** कने पिता परमेस्वरे बडे पेहले ही तुहांजो अपने लोक होंगे तांई कने पबित्र आत्मा दे कम्मे दे जरिये तुहांजो चुणी लिया है। उनी ऐसा इस तांई किता ताकि तुसां यीशु मसीह दे हुकमा जो मनन कने उदे खूने ला शुद्ध होई सकन। मैं प्राथना करदा है की परमेस्वर तुसां जो अनुग्रह कने शांति दिन्दा रे। **3** साडे प्रभु यीशु मसीह दे पिता कने परमेस्वरे दा धन्यवाद हो। परमेस्वरे सांझो अपणी दया ला इक नोई जिन्दगी दिती है, क्योंकि परमेस्वरे यीशु मसीह जो मरयां चे जिन्दा करिरी सांझो बडे आत्मविश्वास सोगी जिणे दे काबिल बणाया है; मतलब की असां उना चीजां जो मिलणे दी उम्मीद करी सकदे न जडियां उनी सांझो देणे दा बायदा कितया है। **4** असां उना खरियां चीजां दा मिलणे दा इंतजार करदे न जडियां परमेस्वरे साडे तांई तैयार कितियां न। कोई भी कदी भी इना चीजां दा नाश नी करी सकदा। उना कदी भी पुराणिया कने उना दी सुन्दरता घट नी होणी। परमेस्वरे तुहाडे तांई स्वर्ग च उना चीजां जो रखया है। **5** परमेस्वर अपणिया शक्तिया ला तुहाडी रक्षा करदा है, क्योंकि तुसां यीशु मसीह पर भरोसा करदे न। उनी तुहांजो आखरी दिने दीकर जालू यीशु मसीहे मुडी करी ओणा है बचाई रखणा है। तालू तुहांजो पता लगी जाणा की परमेस्वरे तुहांजो पाप कने मौत ला पुरे तरीके ला बचाई लिया है। **6** तुहांजो इना सारियां चीजां दे बारे च खुश होणा चाईदा, चाहे हुण थोडे बकते तांई लग-लग तरा दियां परेशानियां तुहांजो दुखी करदियां न। **7** कने ऐ परेशानिया इस तांई होदिया न की ताकि पता लगी सके की तुहाडा भरोसा परमेस्वर पर है की नी। यीशु मसीह पर तुहाडा भरोसा सोने ला भी जादा कीमती है। जियां नाश होई जाणे बाले सोने जो अग्नी च परखया जांदा है कने शुद्ध होंदा है, इयां ही तुहाडा भरोसा भी अगर परेशानियां होणे बाद भी मजबूत रेंदा है, तां इसला तुहाडी बडी तारीफ कने महिमा कने इज्जत होणी जालू यीशु मसीहे फिरी इस संसारे च मुडी ओणा है। **8** तुसां यीशु मसीह जो कदी नी दिखया है, फिरी भी तुसां उसयो प्यार करदे न। तुसां हुण उसयो नी दिखा दे न, पर फिर भी तुसां उस पर भरोसा करदे न। इस तांई तुसां खुशी कने महिमा ला जादा खुश होआ जिसयो अखरां च ब्यान नी करी सकदे न, **9** क्योंकि परमेस्वर तुहांजो पाप दिया सजा ला बचांदा है। ऐ यीशु मसीह पर तुहाडे भरोसे दा फल है। **10** ऐ उद्धार कुछ ऐसा था जिदे बारे च परमेस्वरे दे संदेश देणेबाले होर जाणना चांदे थे। उना दसया की कियां परमेस्वरे तुहांजो बचाणे तांई अपणी दया तुहाडे पर किती जिदे तुसां काबिल नी न, उना उस जबाब जो तोपणे तांई बडी मेहनत किती। **11** मसीह दी आत्मा परमेस्वरे दे संदेश देणेबालयां च था, जडा मसीह दे दुखां कने उना दुखां बाद मिलणे बाली महिमा दे बारे च उना जो पेहले ला दस्सा दा था। परमेस्वरे दा संदेश देणेबालयां ऐ जाणने दी कोशिश किती की आत्मा उना जो क्या दस्सा दा था, ऐ सारियां गल्लां कालू होंणियां कने ऐ कियां पुरियां होणियां। **12** पर परमेस्वरे इना परमेस्वरे दे संदेश देणेबालयां

जो दसया की उना दे संदेश अपु अपने तांई नी न बल्कि तुहाडे तांई थे। सै संदेश यीशु मसीह दे बारे च शुभसमाचार है जडा तुसां हुण सुणया है। परमेस्वरे स्वर्ग ला पबित्र आत्मा भेजया ताकि तुहांजो शुभसमाचार प्रचार करणे तांई सहायता करे। ऐ सब इतना अनोखा है की ऐशू दीकर की स्वर्गदूत भी बडिया गौर ला इना गल्लां जो होंदे होए दिखदे न। **13** इस तांई अच्छे तरीके ला सोचा कने अपने आप पर काबू करणे दी कोशिश करा। कने उस उद्धार दी आस अनुग्रह पर लाई रखा जडा तुहांजो तालू मिलणा है जालू यीशु मसीह दुबारा इस संसारे च मुडी करी ओणा है। **14** परमेस्वरे दिया आज्ञा दा पालन करा जियां अच्छे बच्चे अपने पिता दिया आज्ञा दा पालन करदे न। कने उना बुरे कम्मा जो मत करा जिना दी तुसां इच्छा रखदे थे, जालू तुसां परमेस्वरे दिया सच्चाईया जो नी जाणने थे। **15** पर हुण तुहांजो हर कम्मा च जडे तुसां करदे न पबित्र होणा चाईदा, जियां की परमेस्वर पबित्र है, जिनी तुहांजो अपने बच्चे होंगे तांई चुणया। **16** क्योंकि पबित्र शान्न च लिखया है की, “तुहांजो पबित्र होणा चाईदा क्योंकि मैं पबित्र है।” **17** कने जालू तुसां प्राथना करदे न, तां तुसां परमेस्वरे जो अपना पिता बोलंदे न। पर तुसां याद रखा की सै भेदभाव नी करदा है, कने हर कुसी जो उदे कम्मा दे अनुसार न्याय करदा है। इस तांई जालू की तुसां इसा धरती पर इक परदेसी होईकरी रेंदे न तां तुहांजो परमेस्वरे दी बडी इज्जत करणी चाईदी। **18** क्योंकि तुहांजो पता है की तुसां पेहले इक बेकार तरीके ला जिन्दगी जिया दे थे, इक ऐसा तरिका जडा तुहाडे पूर्वजां दे बकत ला चली ओआ दा था। पर तुहांजो उस बेकार जिन्दगी ला बचाई लिया। तुहांजो सोने या चांदिया सांई खत्म होंगे बालियां चीजां ला नी खरीदया है, पर मसीह दे बडे कीमती खूने ला खरीदया, जडा इक शुद्ध कने सिद्ध मेमने सांई था। **20** इस संसारे जो बणने ला पेहले, परमेस्वरे पेहले ला ऐ फेसला करी लिया था की यीशु मसीह छुड़ाणे बाला होणा। पर सै इना आखरी दिना च तुहाडी सहायता करणे तांई इस संसारे च प्रगट होया। **21** जडा कुछ भी मसीहे किता है उदिया बजा ला तुसां परमेस्वरे पर भरोसा करदे न। परमेस्वर सेई है जीनी यीशु मसीह जो मरयां चे जिन्दा किता, कने उसयो बडी जादा महिमा दिती। इस तांई तुसां भरोसा करदे न कने परमेस्वर पर तुहाडी उम्मीद पक्की है। **22** क्योंकि सच्चाईया जो मनणे ला ही तुहांजो तुहाडे पापां ला शुद्ध कितया है, हुण तुहांजो अपने साथी मसीह भाई बेहणा सोगी इमानदारी कने साफ मने ला प्यार करदे रेंणा चाईदा। **23** तुहांजो इक दुज्जे ला प्यार करणा चाईदा क्योंकि तुहांजो परमेस्वरे दिया तरफा ला इक नोई जिन्दगी मिलियो है। तुहांजो ऐ जिन्दगी कुसी ऐसिया चिजा ला नी मिलियो है, जिना खत्म होई जाणा, पर हमेशा टिकी रेणेबाले बचन दे जरिये नोई जिन्दगी मिलया है। (aiōn g165) **24** क्योंकि पबित्र शान्न ऐ बोलदा है, “हर इक माणु घाए सांई है, कने उदी सारी शोभा घाए दे फुलां सांई है। घाए सुकी जाणा है, कने फुलां झडी जाणा है।” **25** पर परमेस्वरे दा बचन हमेशा बणी रेंदा है। कने ऐ बचन मसीह दे बारे च शुभसमाचार है जडा तुहांजो च प्रचार कितया था। (aiōn g165)

2 इस तांई हर तरा दा बुरा व्यवहार छुट्टी दिया, दुज्जयां जो धोखा मत दिया, पाखंडी मत बणा, दुज्जयां ला जलन मत रखा, कुसी जो बदनाम मत

करा, 2 जियां नोए जम्बो बच्चे अपनी माता दे दुधे दी इच्छा रखदे न, तियां ही तहांजो परमेश्वरे दे बचन सिखणे दी इच्छा रखणी चाईदी ताकि तूसां आत्मिक रूप च मजबूत बणी सकन। तां आखरी च, परमेश्वरे तहांजो इस संसारे दियां बुरियां चीजां ला पुरे तरीके ला बचाई लेणा। 3 क्योंकि जियां पबित्र शास्त्र च लिखया है की, “तूसां अपने अनुभव ला जाणया है की प्रभु भला है।” 4 प्रभु यीशु दी तुलना इक जिन्दे पत्थरे ला कितियो है। उस पत्थरे जो माणुआं फेंकी दितया था क्योंकि उना बोलया की ऐ बेकार था। पर परमेश्वरे दिया नजरा च, सै अनमोल है, कने परमेश्वरे उसयो नियां दे मुख्य पत्थरे दे स्मे च चुण्या। हे मेरे मसीह साथियों तूसां भी मसीह बाल ओआ, ताकि तहांजो भी उदे जरिये जिन्दे पत्थरां सांई बणाया जाए जडे परमेश्वरे दी अराधना दा घर बणाणे तांई लगाए जांदे न। उनी तहांजो भी पबित्र याजक बणाया है। क्योंकि जियां याजक परमेश्वरे जो चढावा चढांदे न, तियां ही तूसां भी चढावे दे स्मे च अपना दिल परमेश्वरे जो चढाया है। कने सै चढावा परमेश्वरे जो खुश करदा है, क्योंकि तूसां यीशु मसीह दे न। 6 ऐ तियां ही है जियां परमेश्वरे पबित्र शास्त्र च बोलया है, “दिखा, मैं कुसी जो यस्शलेम शेहरे च कुणे दे पत्थरे सांई रखा दा है। सै इक बडे कीमती पत्थरे सांई है जडा नियां तांई चुण्या। जडा उस पर भरोसा करदा है कने निराश नी होंदा।” 7 ऐ पत्थर तुहाडे तांई बडा कीमती है जडे यीशु मसीह पर भरोसा करदे न। पर जडे लोक उस पर भरोसा नी करदे उना दे बारे च पबित्र शास्त्र बोलदा है की, “जिस पत्थरे जो राजमिस्त्रियां बेकार बोली करी लाणे तांई मना करी दितया था, सै घरे दिया नियां च सारयां ला जरूरी पत्थर बणी गया।” 8 कने फिरी पबित्र शास्त्र च ऐ भी लिख्या है, “इनी पत्थरे लोकां दी ठोकर खाणे दी बजा होणा, ऐ इक चट्टान है जडी उना दे डेई पोणे दी बजा होणी।” क्योंकि सै परमेश्वरे दे संदेश जो नी मनणे दिया बजा ला ठोकर खांदे न। परमेश्वरे उना सोगी ऐसा ही होणे दी योजना बणाईयो है। 9 पर तूसां ऐसे नी न क्योंकि तूसां परमेश्वरे दे चुणयो लोक न, तूसां परमेश्वरे दे याजक न, राजे न, तूसां परमेश्वरे दी सेबा करणे तांई सम्पित न कने परमेश्वरे दी अपनी निज सम्पति न। उनी तहांजो नेहरे ला बार अपनी अनोखी लौई च सदया है, ताकि तूसां परमेश्वरे दे अनोखे कम्मा दे बारे च दस्सी सकन। 10 (परमेश्वरे दे संदेश देणेवाले होशे जडा लिख्या है सै तुहाडे बारे च सच्च है।) इक बकत था जालू तूसां परमेश्वरे दे लोक नी थे, पर हुण तूसां परमेश्वरे दे लोक न। पेहले तूसां परमेश्वरे दिया दया जो नी जाणदे थे पर हुण तूसां इसा जो जाणदे न क्योंकि उनी पेहले ला ही तुहाडे पर अपनी दया दस्सी है। 11 प्यारे मसीह भाईयो तूसां इस संसारे च परदेशियां कने यात्रियां सांई रे दे न। मैं तहांजो ला विनती करदा है की उना सारियां बुरियां शरीरिक इच्छां ला बचा क्योंकि सै हमेशा तुहाडिया अपणिया आत्मा दे खिलाफ लड़दियां न। 12 केई बरी ऐसे लोक होंदे न जडे प्रभु जो नी जाणदे न कने सै तहांजो पर ऐ बोली करी गलत इल्जाम लांदे न की तुहाडे कम्म बुरे न। इस तांई इक अच्छी जिन्दगी जिया ताकि सै उना भले कम्मा जो दीखन जडे तूसां करदे न कने उस दिन परमेश्वरे जो महिमा देन जिस दिन यीशु मसीह मुडी करी ओणा है। 13 प्रभु यीशु दी इज्जत मान करणे तांई तहांजो उना सारे हुकमा जो मनणा चाईदा जडे इस संसारे दे अधिकारी न;

मतलब की राजा दे अधीन जडा सारयां ला बडा कने जरूरी अधिकारी है, 14 कने राज्यपालां दे अधीन रिया क्योंकि सेई ही है जिदा उपयोग राजा उना लोकां जो सजा देणे तांई करदा है, जिना दे कम्म बुरे न कने उना लोकां दी तारीफ करणे तांई जिना दे कम्म अच्छे न। 15 क्योंकि परमेश्वरे दी ऐ इच्छा है, की साडे भले कम्मा करणे ला, जडे लोक परमेश्वरे जो नी जाणदे, सै अगो जो सांझो पर गलत तरीके ला इल्जाम लाणे दी हिम्मत ना करन, क्योंकि ऐ गल्ल साफ-साफ पता है की उना दे झूठे इल्जाम सच्च नी न। 16 तुहाडे तांई ऐसा कोई भी नी है जडा तहांजो सै करणे तांई रोकी सके जडा तूसां करणा चांदे न क्योंकि तूसां साडे प्रभु यीशु मसीह दे जरिये पेहले ही अजाद होई गियो न। पर बुरे कम्म करणे तांई इसयो भाना मत बणा। तहांजो अपने कम्मा ला दसणा चाईदा की तूसां सच्ची परमेश्वरे दे सेवक न। 17 सारयां दी इज्जत करा, अपने मसीह भाईयां सोगी प्यार करा, परमेश्वरे ला डरा, राजा दी इज्जत करा। 18 हे सेबकों, तूसां जडे घरां च कम्म करदे न कने भरोसा करणे बाले न, तहांजो अपने मालिके दे हुकम मनणा चाईदे कने हमेशा उना दी इज्जत करणी चाईदी। इयां हर तरा दे मालिकां सोगी करा चाहे सै दयालु होन या सही होन, या जालिम होन। 19 क्योंकि अगर असां दुख सेहन करदे न चाहे साडी गलती ना हो, पर असां सिर्फ इस तांई सेहन करदे न क्योंकि असां परमेश्वरे दे बारे च सोचदे न, तां परमेश्वर सांझो ला खुश होंदा है। 20 पर अगर तहांजो गलत करणे तांई मार पोंदी है, तां सजा मिलणे पर सबर रखणे च तुहाडी तारीफ करणे दी कोई बजा नी है। पर अगर भलाई करणे दिया बजा ला तूसां दुख सेहन करदे न कने सबर रखदे न, तां परमेश्वर खुश होंदा है। 21 कने परमेश्वरे दे जरिये तहांजो सढ़णे दी बजा चे इक बजा ऐ भी है की तूसां उदे तांई भले करदे होए दुख सेहन करी लेणा। यीशु मसीह जिनी तुहाडे तांई दुख सेहन किते, सै तुहाडे तांई इक उदाहरण है। इस तांई तहांजो सेई कम्म करणे चाईदे जडे मसीह किते। 22 पबित्र शास्त्र च लिखया है, “उनी कदी पाप नी किता। उनी कदी झूठ नी बोलया।” 23 जालू लोकां यीशु ऐ दी बेइजती किती, उनी पलटी करी उना दी बेइजती नी किती। जालू लोकां उसयो दुख दिता, तां उनी उना ला बदला नी लिया। बल्कि उनी अपनी सहायता तांई परमेश्वरे पर भरोसा किता, क्योंकि सै जाणदा था की परमेश्वर हमेशा लोकां दा सही न्याय करदा है। 24 जालू मसीह मरया, तां साडे पापां दिया बजा ला सूली पर उदे शरीर जो सजा दिती। उनी ऐसा इस तांई किता ताकि असां पाप करणा बंद करी देन। कने उना जखमा दिया बजा ला जडे उनी सेहन किते, असां ठीक होई गे। 25 इक बकत पेहले तूसां भेडां सांई थे, जडियां गलत रस्ते पर जा दियां थियां। पर हुण तूसां यीशु मसीह बाल बापस आई गियो न जडा तुहाडिया आत्मा दा पुआल कने रखवाला है।

3 हे घरे बालियों, तूसां भी अपने घरे बालयां दे अधीन रिया। ताकि अगर उना चे कोई भी परमेश्वरे दे बचना पर भरोसा करणे ला मना करदा है, तां तहांजो ऐ दसणे दी जरूरत नी होणी की उना जो भरोसा करणा चाईदा। जालू उना दिखणा की कियां तूसां पबित्र जिन्दगी जिया दे कने परमेश्वरे दी इज्जत करदे न, तां उना मसीह पर भरोसा करी लेणा। 3 तुहाडी सुन्दरता दिखावटी

ना हो, जियां की बाल संवारना, कने सोने दे गेहणे पेहनणा, या भौंती-भौंती दे मंगे-मंगे कपडे पाणा। 4 जडा तुहाडे दिले च है, सेई है जडा तुहांजो सुंदर बणादां है। साडा व्यवहार प्यार भरा कने शांत हो, जडा की परमेश्वरे ताई बडा कीमती है। 5 कने बडे पहले जडियां जनानियां परमेश्वरे पर भरोसा रखदियां थियां, कने उस पर अपनी आस रखदियां थियां, सै अपने घरे बाले दा हुकम मन्नी करी अपने आपे जो सुंदर बणादियां थियां। 6 जियां सारा अब्राहम दे हुकमा जो मंदी कने उसयो स्वामी बोलदी थी। अगर तुसां दुज्जयां सोगी भलाई करन कने तुहांजो कोई भी चिंता कने डर ना हो, तां तुसां सारा दे बचयां सांई बणणा। 7 तियां ही हे पतियो, तुहांजो अपणिया-अपणिया घरे बालिया सोगी समझदारिया ला रेंणा चाईदा, कने तुहांजो याद रखणा चाईदा सै तुसां ला कमजोर न, इस ताई तुहांजो उना दी इज्जत करणी चाईदी। क्योंकि तुसां दोनो ही हमेशा दी जिन्दगिया दे बरदाने दे हिस्सेदार न जडा परमेश्वरे बडे अनुग्रह ला दितया है। इयां करा ताकि जालू तुसां परमेश्वरे ला प्राथना करन तां सै तुहाडी सुणे। 8 आखरी च, मै तुसां सारयां ला ऐ बोलणा चांदा है की, तुसां सारयां दा इक ही मन हौणा चाईदा कने इक दुज्जे सोगी प्यारभाव ला रिया कने घमंड मत करा कने नम्र बणा। 9 बुराईया दे बदले बुराई मत करा कने ना गाली दे बदले गाली दिया; इदे बदले उना जो आशीष दिया क्योंकि परमेश्वरे तुहांजो इसी ताई सदया है की तुसां दुज्जयां जो आशीष देई सकन। अगर तुसां ऐसा करदे न तां परमेश्वरे भी तुहांजो आशीष देंगी। 10 क्योंकि पबित्र शास्त्र च लिख्या है, अगर कोई माणु अपनी जिन्दगी दी खुशी लेंणा चांदा है, कने खरे दिन दिखणा चांदा है, तां उसयो ध्यान देणा चाईदा की सै बुरियां गल्लां ना बोले। कने उसयो एसियां गल्लां करणा बंद करी देणा चाईदा जडियां सच्च नी है। 11 उसयो पक्का ही बुरे कम्म करणा छडी देणा चाईदे। कने इदे बजाए उसयो सेई करणा चाईदा जडा भला है। दुज्जयां सोगी शान्ति ला रेणे दी कोशिश करा। 12 क्योंकि प्रभु उना लोकां दी देखभाल करदा है जडे भले कम्म करदे न, कने सै हमेशा उना दी प्राथना सुणने ताई कने उना दा जबाब देंगे ताई तैयार है। पर परमेश्वर बुराई करणे बाले लोकां दे खिलाफ कम्म करदा है। 13 अगर तुसां हमेशा भले कम्म करणे दी कोशिश करदे न, तां कोई भी असल च तुहाडा नुक्सान नी करी सकदा। 14 पर अगर जडा सही है सै करणे दिया बजा ला असां दुख झेलदे न, तां असल च असां धन्य होणा। इस ताई अगर कोई लोक सांझो डरान, तां डरदे मत कने ना ही घबरानयो, 15 पर मसीह जो अपने मना च प्रभु दे स्ने च इज्जत दिया। कने अगर कोई तुहांजो ला उस आसा दे बारे च पुच्छे जडी भरोसा करणे बाले हौणे दे नाते तुसां सारयां च है, तां हमेशा उसयो समझाणे ताई तैयार रिया। 16 कने अपनी अंतरात्मा भी शुद्ध रखा, इस ताई की जिना गल्लां दे बारे च तुहाडी बदनामी हौंदी है उना दे बारे च सै, जडे मसीह च तुहाडे खरे चाल-चलण दी बेइजती करदे न, शर्मिंदा होन। 17 अगर सांझो अपने भले कम्मा दिया बजा ला दुख मिलदा है, तां ऐ साडे ताई खरा है, अगर परमेश्वरे दी ऐई इच्छा है। ऐ तां बुरे कम्मा दिया बजा ला दुख झेलणे ला साडे ताई खरा है। 18 मै इस ताई बोला दा है क्योंकि यीशु मसीह भी साडे पापां दिया बजा ला दुख सेहन किता कने मरी गया। सै सिर्फ इक ही बरी मरया उसयो दुबारा मरणे दी जरूरत नी है। सै

इक धर्मी माणु था जडा पापी माणुआं ताई मरी गया ताकि सै सांझो परमेश्वरे दे नेडे आणी सके। उना उदे शरीर जो तां मारी दिता पर परमेश्वरे उसयो पबित्र आत्मा दिया शक्तिया ला दुबारा जिन्दा करी दिता। 19 तालू उदिया आत्मा जाई करी उना आत्मा जो शुभसमाचार प्रचार किता जडियां उसा जगा पर केद कितियां न, जिथू मरयां लोकां दियां आत्मा न। 20 ऐ उना लोकां दियां आत्मा थियां जिना बडे बकत पेहले जालू न्ह अपना जाज बणा दा था, तालू इना परमेश्वरे दे हुकम जो नी मनया था, तालू परमेश्वर बडे सबर ला इंतजार करा दा था की क्या सै लोक पश्चाताप करगे। पर जालू पाणिऐ संसारे दा नाश करी दिता, तालू सिर्फ अठ लोक बचे जिना जाजे च प्रवेश किता था। 21 पुराणे बकत च उना दा उद्धार हुण साडे उद्धार दा इक उदाहरण है जालू असां बपतिस्मा लेंदे न। जिस पाणिऐ च असां बपतिस्मा लेंदे न, सै साडे शरीर ला मेल नी साफ करदा, पर ऐ इक निशान है की असां परमेश्वरे ला माफी मंगी है ताकि अगे जो साडा मन परेशान ना रे। सांझो माफी मिली सकदी है क्योंकि यीशु मसीह मौत दे बाद फिर जिन्दा होया है। 22 कने सै स्वर्गो जो चली गया। हुण सै ओथु पर परमेश्वरे दे सज्जे पासे कने सारयां ला बडिया जगा पर जाई करी बेई गया, कने सै स्वर्गदूतां कने सारे अधिकारियां कने सारियां शक्तियां पर राज करदा है।

4 इस ताई जियां मसीहे शरीर च रेईकरी दुख सेहन किता, तुहांजो भी उस सांई ही दुख सेहन करणे ताई तैयार रेंणा चाईदा। क्योंकि अगर तुसां मसीह ताई दुख सेहन करणे ताई तैयार न, तां तुसां पाप नी करणे दा फेसला करी लिया है। 2 कने इसा बजा ला सै माणु इस संसार च रेईकरी उना बुरे कम्मा जो नी करदा है, जिना जो लोक अक्सर करणा चांदे न, पर उनी सेई करणा जडा परमेश्वर चांदा है की सै करे। 3 क्योंकि तुसां अपणिया पुराणिया जिन्दगिया च बडा बकत बर्बाद करी दिता जालू तुसां होर जातियां सांई, बुरे कम्मा च, बासना च, खांणे पीणे च, दास-बाजी च कने असभ्य देवतयां कने उना दियां मुर्तियां दी पूजा करदे थे, जिना ला परमेश्वर नफरत करदा है। 4 इस ताई तुहाडे पूराणे मित्र हेरान होई जांदे न, जालू तुसां उना सोगी बुरियां चीजां च शामिल नी होंदे जडे सै करदे न। इस ताई सै तुहाडे बारे च बुरा बोलदे न। 5 पर इक दिन जस्र उना परमेश्वरे दे सामणे न्याय ताई खडे होणा, कने परमेश्वरे उना ला हर इक कम्मे दे बारे च पृच्छणा जडा उना धरती पर कितया। परमेश्वरे जिन्दे कने मरयो दोनो लोकां दा न्याय करणा। 6 क्योंकि ऐई बजा है की मरयो लोकां भी मसीह यीशु दे बारे च शुभसमाचार सुणया। उना दे शरीरां जो सारयां सांई मरणा पिया, पर सै हुण आत्मा च हमेशा परमेश्वरे सोगी रेंदे न। 7 सारियां गल्लां दा अंत जल्दी हौणे बाला है; इस ताई ध्याने ला सोचा कने अपने आपे जो काबू च रखा कने प्राथना ताई तैयार रिया। 8 सारयां ला जरूरी गल्ल ऐ की, इक दुज्जे ला इमानदारिया ला प्यार करा, क्योंकि अगर तुसां लोकां ला प्यार करगे तां तुसां हमेशा कुसी भी बुरे कम्मे जो माफ करणे ताई तैयार रेंणा जडे उना कितयो न। 9 लोकां दा अपने घरे स्वागत करा कने बिना कोई शिकायत कितयो करा। 10 हर इक माणुऐ जो परमेश्वरे दिया तरफा ला बरदान मिलया है, उसयो उस बरदाने दा इस्तेमाल दुज्जयां दी सहायता करणे ताई करणा चाईदा। उना जो परमेश्वरे दे अच्छे

सेबकां दे स्पे च अपने बरदाना दा इस्तेमाल करणा चाईदा जडे परमेश्वरे उना जो अनुग्रह ला दितयो न। 11 अगर तुहाड़े बाल प्रचार करणे दा बरदान है, तां तुहांजो परमेश्वरे दे बचना दा प्रचार करणा चाईदा, अगर तुहाड़े बाल दुज्जे लोकां दी सहायता करणे दा बरदान है, तां सै इस कम्मे जो उस शक्तिया ला करन जड़ी परमेश्वर तुहांजो दिन्दा है। तां फिरी जडा कुछ भी तुसां करणा उसला यीशु मसीह दे जरिये परमेश्वरे जो महिमा मिलणी। सारी महिमा कने शक्ति यूगां-यूगां दीकर उदी है! आमीन। (aiōn g165) 12 हे प्यारे मसीह भाईयो, उना दुख देणे बालियां चीजां दे बारे च हेरान मत होआ जिना दियां बजा ला तुहांजो दुख झेलणा पोआ दा है क्योंकि तुसां मसीह दे चले न। पर ऐ चीजां ऐ दसणे ताई होआ दियां न की क्या तुसां सच्ची परमेश्वरे पर भरोसा करदे न। इस ताई ऐ मत सोचा की तुहाड़े सोगी कुछ अजीब घटना होआ दियां न। 13 बस ऐ सोची करी खुश रिया, क्योंकि तुहांजो उना दुखां चे इक हिस्सा मिलया है, जडे मसीह जो मिलयो थे। इसा बजा ला जालू मसीहे सारयां लोकां जो अपणी महिमा दसणे ताई दुबारा मुडी करी ओणा है तां तुहांजो होर जादा खुशी होंणी है। 14 फिरी अगर मसीहे दे नाऐ दिया बजा ला तुहाड़ी बुराई होंदी है, तां तुसां धन्य न, क्योंकि परमेश्वरे दी महिमा बाली आत्मा तुहांजो च बास करदी है। 15 तुहाड़े चे कोई भी माणु चोरी, खून करणे ला या बुरे कम्म करणे ला, या दुज्जयां दे कम्मे च हथ पाणे दिया बजा ला दुख न झेले। 16 पर अगर मसीही होणे दिया बजा दुख झेलणा पोऐ, तां तुसां इसयो शर्मिंदगी दी गल्ल मत समझदे, पर इसा गल्लां ताई परमेश्वरे दी महिमा करा की तुसां इस ताई दुख सेहन करा दे न क्योंकि तुसां यीशु मसीह दे चले न। 17 क्योंकि न्याय करणे दा बकत आई गया है, परमेश्वरे पेहले असां भरोसा करणे बालयां दा न्याय करणा है, इस ताई उना भयानक चीजां दे बारे च सोचा जडियां उना लोकां सोगी होंणियां न जडे परमेश्वरे दे दितयो शुभसमाचारे जो नी मंदे। 18 जियां की पबित्र शास्त्र च लिखया है, “अगर इक भले माणुऐ दा बचाया जाणा इतणा मुश्किल है, तां बुरे लोकां दा कने पापियां दा क्या होणा जडे परमेश्वरे दे शुभसमाचारे पर भरोसा नी करदे?” 19 इस ताई जडे लोक परमेश्वरे दिया इच्छा दे अनुसार दुख झेलदे न, उना जो परमेश्वरे पर भरोसा करदे रेंणा चाईदा, जिनी उना जो बणाया है। परमेश्वर हमेशा सै करदा है जडा उनी करणे दा बायदा कितया था कने इस ताई जडा खरा है सै करदे रेंणा चाईदा।

5 कुछ एसियां गल्लां न जडियां मैं ओशु दे कलीसिया दे अगुवां ला बोलणा चांदा है क्योंकि मैं भी तुहाड़े साई इक अगुवा है। मैं खुद उना दुखां जो दिखया है जडे बडे पेहले यीशु मसीहे सेहन किते। जालू उनी दुबारा मुडी करी ओणा है, तां मैं उदिया महिमा च हिस्सेदार बणना है। हुण मैं तुहांजो ला बिनती करदा है, 2 जियां इक पुहाल अपणियां भेडा दी रखबाली करदा है, तियां ही तुहांजो भी हर इकी जणे दी देखभाल करणी चाईदी जिसयो परमेश्वरे तुहाडिया देखभाला च दितया है। इस कम्मे जो अपणिया इच्छा ला करा, ना की कुसी मजबूरिया दिया बजा ला क्योंकि परमेश्वर ऐई चांदा है की तुसां ऐसा करन। ऐ कम्म इस ताई मत करा की तुसां पैसा कमाणे चांदे न, पर परमेश्वरे कने लोकां दी सेवा करणे दी इच्छा ला करा। 3 उना लोकां दे उपर

इक शासक साई हुकम मत दिया जिना ताई तुसां जिम्मेवार न, पर उना ताई इक अच्छा उदाहरण बणा। 4 जालू यीशु मसीहे, जडा साडा प्रधान पुहाल है, उनी मुडी करी ओणा है, तालू तुहांजो इक सुंदर मुकुट मिलणा है जिदी चमक कदी नी घटणी। 5 इयां ही तुसां जवान लोकां जो बूढ़े मर्दा दे हुकम मनणा चाईदे। तुसां सारयां जो प्यारभाव ला इक दुज्जे दी सेवा करणी चाईदी, क्योंकि पबित्र शास्त्र च लिखया है की, “परमेश्वर घमण्डियां दा बिरोध करदा है, पर नम्र लोकां ताई भला है।” 6 इस ताई अपने आपे जो परमेश्वरे सामणे नम्र बणा जडा सारयां ला शक्तिशाली है, ताकि सै सही बकत ओणे पर तुहांजो बडी जादा इज्जत दे। 7 परमेश्वरे जो अपणी सारी चिंता कने परेशानिया दस्सा क्योंकि सै तुहाड़ी परवाह करदा है। 8 ध्यान रखा, कने जागदे रिया, क्योंकि शैतान तुहाडा दुशमण तुहांजो पर हमला करणा चांदा है, ताकि तुसां परमेश्वरे दे हुकमा जो नी मनन। सै धहाडने बाले रेंरे साई फिरदा कने दिखदा रेंदा है की कुसयो खाई सके। 9 तुहांजो अपने पक्के भरोसे सोगी शैताने दा बिरोध करणा चाईदा। याद रखा की तुहाड़े मसीह भाई-बेहन जडे पुरे संसार च रे दे न, ऐदे ही दुखां जो सेहन करा दे न जियां तुसां सेहन करा दे न। 10 परमेश्वरे जडा अनुग्रह ला पूरा भस्या है, उनी साडे मसीह सोगी रिश्ते दिया बजा ला स्वर्गे च उदी हमेशा दी महिमा च हिस्सेदार होंणे ताई चुणया है। तुहांजो थोडे बकते दीकर दुख झेलणे बाद परमेश्वरे तुहांजो अच्छा बणाई देणा ताकि तुहांजो च फिरी कोई दोष ना रे ताकि तुहाडा भरोसा मजबूत हो कने डगमगाणे बाला ना हो। (aiōnios g166) 11 उनी हमेशा ताई शक्तिशाली स्पे ला शासन करणा। आमीन। (aiōn g165) 12 मैं ऐ छोटी देई चिट्ठी सिलवानुस दिया सहायता ला लिखियो है कने तुहांजो भेजी है। जिसयो मैं मसीह च भरोसे दे काबिल भाई मंदा है। मेरा इसा चिट्ठिया जो लिखणे दा मकसद तुहांजो उत्साहित करणा है कने तुहांजो भरोसा दिलाणा है की जडा कुछ भी तुसां सिखा दे न सै असल च तुहाड़े ताई परमेश्वरे दे अनुग्रह दा हिस्सा है। इस अनुग्रह च टिकी रिया। 13 जडे बाबेल शेहरे दे यीशु पर भरोसा करणे बाले लोक तुहांजो नमस्कार करदे न, जिना जो परमेश्वरे चुणया है, जियां उनी तुहांजो चुणया था। मरकुस जडा मेरे ताई इक पुत्रे साई है, सै भी तुहांजो नमस्कार करदा है। 14 इक दुज्जे जो गले लाईकरी नमस्कार करा। मैं प्राथना करदा है परमेश्वर तुसां सारयां जो शांति दे जडे प्रभु यीशु मसीह सोगी रिश्ता रखदे न।

2 पतरस

1 मैं, शमौन पतरस, जडा यीशु मसीह दा सेबक कने प्रेरित है। मैं तुसां सारायां ताई ऐ चिठी लिखा दा है जडे सांझो साईं उसी कीमती भरोसे जो साझा करदे न, जडा भरोसा सांझो साडे परमेश्वर कने उद्धारकर्ता यीशु मसीह जरिये मिलया है, जडा सांझो परमेश्वरे दिया नजरा च सही बणादां है। 2 मैं प्राथना करदा है की परमेश्वर तुहांजो जादा ला जादा अनुग्रह कने शांति दे जियां-जियां तुसां परमेश्वर कने साडे प्रभु यीशु मसीह दे ज्ञान च बढ़दे जान। 3 परमेश्वरे अपनी शक्तिया ला सांझो सै सब दितया है, जडा सांझो इक ऐसी जिन्दगी जिणे ताई चाईदा जडी परमेश्वरे जो खुश करदी है। ऐ इस ताई होया क्योंकि असां परमेश्वरे जो जाणदे न कने सै सेई है जिनी अपनी अच्छाई कने महिमा दिया बजा ला सांझो अपने लोक होंगे ताई सदया है। 4 कने उदिया महिमा कने अच्छाईया दिया बजा ला, उनी सांझो बडे महान कने कीमती बायदे दितयो न। ताकि इना बरदाना दा इस्तेमाल करिरी असां इस संसारे च जडियां बुरियां इच्छा न उना ला बची सकन कने परमेश्वरे दे सभावे च साझी बणी सकन। 5 क्योंकि तुसां परमेश्वरे दे सभावे च साझी होंगे ताई न इस ताई तुहांजो सिर्फ मसीह पर भरोसा ही नी करणा चाईदा, बल्कि तुहांजो हमेशा सेई करणे दी कोशिश करणी चाईदी जडा दुज्जयां ताई खरा है। तुहांजो ना सिर्फ सै करणा चाईदा जडा खरा है, बल्कि तुहांजो ऐसे लोक बणना चाईदा जडे समझदारिया ला व्यवहार करणा जाणदे न। 6 तुहांजो ना सिर्फ ऐ जाणना चाईदा की समझदारिया ला कियां व्यवहार करणा है, बल्कि तुहांजो अपने आपे जो भी काबू करणा चाईदा। तुहांजो ना सिर्फ अपने पर काबू रखणा चाईदा, बल्कि तुहांजो मुसीबतां च सबर भी रखणा चाईदा। ना सिर्फ तुहांजो सबर रखणा चाईदा, बल्कि तुहांजो ऐसे तरीके ला जीणा चाईदा जडा परमेश्वरे जो खुश करदा है। 7 ना सिर्फ तुहांजो इस तरीके ला जिणा चाईदा जडा परमेश्वरे जो खुश करदा है, बल्कि तुहांजो इक दुज्जे मसीह भाई बेहणा जो अपने खुद दे परिबारे साईं प्यार करणा चाईदा। ना सिर्फ तुहांजो इक दुज्जे सोगी अपने परिबारे साईं प्यार करणा चाईदा, बल्कि तुहांजो सारे लोकां सोगी प्यार भी करणा चाईदा। 8 क्योंकि अगर ऐ सारियां गल्लां तुसां च हेन कने बदा दियां न, तां इना साडे प्रभु यीशु मसीह दा होर जादा ज्ञान लेंगे च तुहांजो बेकार कने असफल नी होणा देणा। 9 पर जिदे च ऐ गुण नी है, सै उस माणुऐ साईं जिदी नजर इतणी कमजोर है की सै दिखी नी सकदा कने भूली गया है की परमेश्वरे उसयो उदे पुराणे पापां ला पबित्र करी दितया है। 10 इस बजा ला हे मसीह भाईयो, अपने आपे जो कने होर लोकां जो ऐ दसणे ताई होर भी अच्छा व्यवहार करणे दी कोशिश करा की परमेश्वरे सच्ची चुणया है कने तुहांजो अपने लोक होंगे ताई सदया है। अगर तुसां ऐसा करगे तां पक्का ही तुसां कदी भी परमेश्वरे ला लग नी होंगा। 11 कने परमेश्वरे तुहाडा उस राज्य च बडे आदर सोगी स्वागत करणा, जिथु साडा प्रभु कने उद्धारकर्ता यीशु मसीह हमेशा ताई राज करणा। (aiōnios g166) 12 मैं तुहांजो इना गल्लां दे बारे च बार-बार याद दिलाणा चांदा है, हालांकि तुसां पेहले ला ही इना गल्लां जो जाणदे न कने पूरा भरोसा करदे न की सै सच्चियां न। 13 साडे प्रभु यीशु

मसीह मिंजो साफ-साफ दस्सी दितया है की मैं जल्दी ही मरी जाणा है। इस ताई मिंजो लगदा है की मेरे ताई ऐई खरा है की जालू दीकर मैं जिन्दा है तालू दीकर मैं तुहांजो याद दिलांदा रे। 15 इस ताई मैं तुहांजो ऐ गल्लां दसणे ताई इतणी मेहनत करा दा है, ताकि मेरिया मौता ला बाद तुसां हर बकत इना गल्लां जो याद रखन। 16 जालू असां प्रेरितां तुहांजो साडे प्रभु यीशु मसीह दी शक्ति कने मुडी ओणे दे बारे च संदेश दितया, तां असां तुहांजो कोई चलाकिया ला मन घडन्त कहाणियां नी सुणाईयां न, बल्कि असां उदिया महिमा जो अपनी हखी ला दिखया है। 17 असां उदे सोगी उस पबित्र पाडे पर थे, जालू पिता परमेश्वरे उसयो महिमा कने इज्जत दिती थी। उस बकत परमेश्वरे दिया तरफा ला यानी की महिमा ला उस ताई अबाज आई, “ऐ मेरा अपना प्यारा पुत्र है, जिसला मैं खुश है!” असां खुद स्वर्ग ला ओदी अबाज जो सुणया। 19 कने असां जाणदे न की मसीह दे बारे च परमेश्वरे दे संदेश देणेबालयां जडे बचन लिखयो थे, सै सच्चे न, कने जडा असां तुहांजो यीशु मसीह दे दुबारा मुडी ओणे दे बारे च सिखाया था, सै इसा गल्ला जो सच्च साबित करदे न। तुहांजो उना बचना जो ध्याने ला सुणना चाईदा, क्योंकि जियां नेहरे च इक चमकदा दितया लोकां जो सही रस्ता दसणे च सहायता करदा है, तियां ही इना बचना तुहांजो ऐ जाणने ताई सहायता करणी की सच्च क्या है। प्रभु यीशु मसीह दे दुबारा मुडी करी ओणे दीकर तुहांजो उना बचना जो ध्याने ला सुणना चाईदा, उदा मुडी करी ओणा नोऐ दिने दिया भयागा साईं रौशनी लोंणा है, कने सै भयागा दे तारे साईं होणा। उस बकत उदी लौ तुहाडे दिलां च चमकणी कने तुहाडे सामणे परमेश्वरे जो साफ-साफ प्रगट करणा। 20 पर ऐ बडा जरूरी है की तुसां इसा गल्ला जो समझन की परमेश्वरे दा संदेश देणेबालयां दे बचन जडे तुसां पबित्र शास्त्र च पढदे न, सै सिर्फ उना दे अपने बिचार नी न। 21 क्योंकि पबित्र शास्त्र च दीतियो कोई भी भविष्यवाणी कदी भी माणुऐ दिया मरजिया ला नी होंदी है। पर पबित्र आत्मा उना दे मना च पांदा है, जालू उना परमेश्वरे दिया तरफा ला आयो संदेशो जो बोलतया।

2 जियां बडे बकत पेहले, ऐथु इस्राएली लोकां बिच झूठा संदेश देणेबाले गुरु थे, तियां ही तुहाडे बिच भी झूठी शिक्षां दे झूठे गुरु होंगे। सै झूठी शिक्षां जो चुपके ला फेलाई दिन्दे न, कने जडियां लोकां जो मसीह पर भरोसा करणे ला रोकदियां न। इना झूठे गुरुआं मसीह जो अपना मालिक मनणे ला मना करी देणा जडा उना दा मालिक है कने जिनी उना जो पाप दिया शक्तिया ला अजाद कितया है। ऐसा करिरी उना अचानक अपने आप दा नाश करवाई लेणा है। 2 परमेश्वरे दे मतयां लोकां इना गुरुआं दे बुरे कम्मा दी नकल करणी है, कने जडा कुछ भी सै करदे न उदिया बजा ला लोकां परमेश्वरे पासे जाणे बाले रस्ते दे बारे च बुरियां-बुरियां गल्लां करणियां। 3 ऐ गुरु लालची होंगे, कने उना बणियां-बणाईयां कहाणियां सुणाई करी तुहांजो धोखा देणा ताकि तुहांजो ला पैसा कमाई सकन। परमेश्वरे बडे पेहले ही फेसला करी लिया था की सै उना जो सजा दे कने सै ऐसा करणे ताई तैयार है। उनी पक्का ही उना दा नाश करी देणा। 4 तुसां जाणदे न की बडे बकत पेहले जालू कुछ शैताने दे दूतां परमेश्वरे दे हुकमा जो नी मनया था, तां परमेश्वरे उना स्वर्गदूतां जो सजा दिती। उनी उना जो नरक च फेंकी दितया, कने उना जो नेहरे च केद करिरी

उस दिने दीकर रख्या है जालू उनी उना दा न्याय करणा कने सजा देंणी है। (Tartaroḥ g5020) 5 तुसां ऐ भी जाणदे न की जालू बड़े बकत पेहले रेणे बालयां लोकां परमेस्वरे दा डर नी मनया तां उनी उना दे बुरे कम्मा जो नजरअंदाज नी किता जडे सै करा दे थे। बल्कि उनी पुरिया धरतिया पर पांणी भरी करी ऐसी सजा दिती की सै सारे डूबी करी मरी गे। पर परमेस्वरे नूह समेत अंठां लोकां जो बचाई लिया, जिना परमेस्वरे सोगी सही रेणे दे बारे च बिचार किता। 6 परमेस्वरे सदोम कने अमोरा शेहरां जो सजा दिती, कने उना जो ऐसा भस्म करी दिता की सै फकुई करी राख बणी गे। परमेस्वरे इना लोकां जो सजा देईकरी चेताबनी दिती की जडे लोक परमेस्वरे दे हुक्मा जो नी मंदे न उना सोगी क्या होणा है। 7 पर इसला पेहले की परमेस्वर सदोम कने अमोरा शेहेरे दा नाश करदा, उनी लूत जो ओथु ला निकाली दिता कने बचाई लिया, सै इक धर्मी माणु था। लूत बडा दुखी था क्योंकि सदोम शेहेरे दे लोक कुसी भी नियम जो नी मंदे थे कने बड़े ही शर्मशार कम्म करदे थे। 8 सै उना बुरे लोकां बिच रेंदा था, कने सै हर रोज उना बुरे कम्मा जो दिखदा था जडे सै करदे थे कने उना दियां बुरियां गल्लां जो सुणदा था, कने सै इना सारियां गल्लां ला बडा दुखी था, क्योंकि सै इक धर्मी माणु था। 9 ऐ सारे कम्म जडे परमेस्वरे अतीत च किते, सै सांझो ऐ दसणे ताई न की जडे लोक परमेस्वरे जो खुश करणे बाली जिन्दगी जिन्दे न, जालू सै मुसीबता च होंदे न तां परमेस्वर उना दी पक्का रक्षा करदा। कने असां ऐ भी यकीन करी सकदे न की परमेस्वरे उस दिने दीकर लगातार अधर्मियां जो सजा दिन्दे रेंणा जालू दीकर सै सारे लोकां दा न्याय नी करदा। 10 परमेस्वरे उना झूठे गुरुआं जो पक्का ही सजा देंणी है जडे अपणी बुरियां इच्छा दे मुताबिक कम्म करदे न, कने अपणे उपर परमेस्वरे दे अधिकारे जो नी मंदे न। सै ढीठ कने घमण्डी न। सै महिमामय स्वर्गे दे प्राणियां दे बारे च बुरा भला बोलणे ला नी डरदे न। 11 पर स्वर्गदूत जडे इना झूठे गुरुआं ला जादा शक्तिशाली न, सै भी उना दी बेइज्जती नी करदे जालू सै परमेस्वरे सामणे उना पर दोष लांदे न। 12 पर ऐ झूठे गुरु जंगली जानवरां सांई कम्म करदे न, जडे सेई करदे न जदिया उना दा शरीर चांदा है कने जडे इस तांई पैदा होंदे न की लोक उना जो फसाई करी मारी सकन। ऐ झूठे गुरु उना चीजां दी बेईज्जती करदे न, जिना दे बारे च सै असल च कुछ नी जाणदे। परमेस्वरे उना जो तियां ही नाश करी देणा जियां लोक जानवरां जो मारदे न। 13 उना दा विनाश उस नुक्सान दा फल है जडा उना कितया है। उना जो दिन दोपहरी अनैतिक खांणा-पिणा पसंद है। सै तुहाडे बिच इक कलंक कने धब्बे न। सै धोखा देंणे च खुशी मंदे न, कने सै तुहाडे तांई धामा च तुहाडे सोगी खांदे पिंदे न। 14 सै हर इक जनानिया सोगी व्यभिचार करणा चांदे न, जिसा जो भी दिखदे न। सै पाप करणे दे मौके तोपदे रेंदे न। सै उना लोकां जो धोखा दिन्दे न जिना दा मसीह पर भरोसा कमजोर होंदा है, कने सै उना जो पाप पासे लेई जांदे न। कने उना दे होर जादा-जादा चीजां पाणे दे हमेशा बददे लालचे दिया बजा ला ही परमेस्वरे उना जो सजा देंणी। 15 उना सही कम्म करणा बंद करी दितया है, कने उना सियुदा ही कम्म करणा शुरू करी दितया है, जदिया बओरे दे पुत्र बिलामे बडे पेहले कितया था। उनी गलत कम्म करिरी पैसा कमाणा पसंद किता। 16 पर

परमेस्वरे बिलामे जो उदे बुरे कम्मा तांई उदिया गदिया दे जरिये फटकार लाई। भले ही गधे बोलंदे नी न, पर उना गदिया बिलामे ला इन्साना सांई गल्ल किती, जालू बिलाम राजे जो मिलणे तांई गदिया जो लदी करी लेई चलया था कने परमेस्वरे उस बकत बिलामे जो बेवकूफिया बाला कम्म करणे ला रोकी दिता। 17 ऐ झूठे गुरु उना पाणिऐ दे झरनया सांई बेकार न, जडे सुकी गियो न। सै उना बदला सांई बेकार न, जिना जो बरखा होणे ला पेहले तेज होआ उडाई करी लेई जांदी है। परमेस्वरे उना तांई इक ऐसी जगा तैयार कितियो है जिथू सिर्फ काला नेहरा ही है। 18 जालू सै लोकां जो शिक्षा दिन्दे न, तां सै बेकार कने घमंडी गल्लां दा इस्तेमाल करदे न। सै लोकां जो दसदे न की सै उना शर्मनाक कम्मा जो करी सकदे जडा उना दा शरीर करणा चांदा है, कने सै उना लोकां जो दुबारा पाप करणे तांई भटकाई दिन्दे न, जिना थोडे बकत पेहले ही यीशु मसीह पर भरोसा किता था। 19 झूठे गुरु लोकां जो दसदे न की सै जडा कुछ भी करणा चांदे न, सै करणे तांई उना जो अजादी है, हालांकि सै खद गुलाम न क्योंकि उना दा अपना पापी सभाव उना जो बुरे कम्म करणे तांई मजबूर करदा है। क्योंकि जडा कुछ भी तुहांजो काबू करदा है, तुसां उदे गुलाम बणी जांदे न। 20 लोक संसारे दिया बुराईया ला बची गे जालू उना प्रभु यीशु मसीह जो उद्धारकर्ता मन्नी लिया, पर हुण फिरी दुबारा उना बुरे कम्मा च फसी गियो न, कने सै बुरे कम्म सान्झो काबू करदे न, इस तांई हुण यीशु मसीह जो छडणे बाद उना दी हालत पेहले ला भी बुरी होई गियो है, जालू उना भरोसा नी कितया था। 21 मेरा ऐ मतलब है, क्योंकि परमेस्वरे उना लोकां जो होर भी जादा सकत सजा देंणी जडे प्रभु यीशु मसीह जो छडी दिन्दे न, बजाए उना दे जिना कदी प्रभु यीशु मसीह जो अपनाया ही नी। उना तांई ऐई खरा होणा था की सै कदी ऐ जाणदे नी की जिन्दगी जो धर्मी तरीके ला जिणे दा क्या मतलब होंदा है। हुण सै जाणदे न की सही क्या है पर उना परमेस्वरे दे हुक्मा मण्णा बंद करी दितया है जडे असां प्रेरितां सिखायो थे। 22 उना सोगी जडा होंदा है सै दसदा है की ऐ कहाबतां सच्चियां न; सै कुतयां सांई न जडा अपणिया उलटिया जो चटणे तांई बापस ओदा है, कने सै सुअरां सांई न जिसयो धोया जांदा है कने सै दुबारा चिकडे च लोटणे तांई चली जांदा है।

3 हे प्यारे मसीह भाईयो, हुण मै तुहांजो ऐ दुज्जी चिडी लिखदा है, मै तुहांजो ऐ दोनों चिठियां इस तांई लिखियां न, ताकि जडिया गल्लां तुसां पेहले ला ही जाणदे न, उना दे बारे च तुहांजो याद दिलाई करी तुहाडे मना च साफ बिचार पैदा करी सकें। 2 मै ऐसा इस तांई करा दा है क्योंकि मै चांदा है की तुसां उना बचना जो याद रखा, जडे परमेस्वरे दे संदेश देणेबालयां बडे पेहले बोलयो थे, कने साडे उद्धारकर्ता, साडे प्रभु यीशु मसीह दियां शिक्षां जो याद रखा जडियां तुहांजो उना प्रेरितां सिखाईयां थियां जडे तुहाडे बाल आये थे। 3 सारयां ला जरूरी गल्ल ऐ है जडी तुहांजो पता होणा चाईदी की मसीह दे दुबारा मुडी ओणे ला पेहले आखरी दिना च ऐसे लोक होणे न जिना तुहाडिया इसा गल्ला दा मजाक उडाणा की मसीहे दुबारा मुडी करी ओणा है। उना अपणिया बुरियां आदतां ला मजबूर होईकरी बुरे कम्म करणे जिना ला उना

जो खुशी मिलदी है। 4 कने उना बोलणा, “उदे ओणे दा बायदा सच्च नी है! उनी कदी नी ओणा है, क्योंकि सारयां ला पेहले साडे अगुवे थे, सै सारे मरी गियो न, पर फिरी भी कुछ नी बदलया है। सारियां चीजां तियां ही होंदिया आईयां न जालू ला परमेश्वरे इस संसारे जो बणाया है।” 5 सै जाणी बुझी करी इसा गल्ला जो नजरअंदाज करदे न की संसारे दिया शुस्आत च, परमेश्वरे बोलया कने अम्बर बणी गिया। अपने बचने ला उनी धरतिया जो पांणिया ला लग किता, कने पांणिए ला सुकी जमिना जो बाहर लेई आया। 6 इस पांणिए ला ही उनी उस संसारे जो खत्म करी दिता जडा उस बकत था। उनी इक भारी बरखा किती कने सारिया धरतिया पर बाढ आई गेई कने सारे जिन्दे प्राणी डुबी करी मरी गे। 7 जियां परमेश्वरे धरती कने अम्बरे जो बणाणे दा हुकम दिता था, तियां ही उनी इस हुणे दे युगे जो तालू दीकर बणी रेणे दा हुकम दिता जालू दीकर उसयो अग्गी च ना फुकी दे। परमेश्वर उना जो उस रोजे दीकर रखा दा है जालू उनी सारे लोकां दा न्याय करणा कने उना लोकां दा नाश करणा जडे उदी इज्जत नी करदे। 8 हे मेरे प्यारे मसीह भाईयो, तुसां इसा इकी गल्ला जो कदी मत भुला की परमेश्वरे तांई इक दिन हजार सालां सांई है कने हजार साल इक दिन सांई है। उदे तांई इक दिन कने इक हजार साल सब इक बराबर है। 9 कुछ लोक सोचा दे न की प्रभु बापस मुडी ओणे दे बायदे जो पूरा करणे च देरी करा दा है पर प्रभु देरी नी करा दा है बल्कि सै तुहाडे सोगी सबर रखा दा है। क्योंकि सै कुसी जो भी नाश नी करणा चांदा है। परमेश्वर चांदा है की हर कोई अपने मने जो फिराए कने गलत कम्मा जो करणा बंद करी दे कने उदे बाल आई जा। 10 पर प्रभुए पक्का ही बापस ओणा है। कने उनी अचानक ही मुडी करी ओणा है जियां कोई चोर अचानक आई जांदा है। उस दिने अम्बरे च बडे गडाकयां दा शोर होणा है। कने अम्बरे लोप होई जाणा। अम्बरे च सारा कुछ मतलब की सुरज, चाँद, तारे सब कुछ अग्गी च खत्म होई जाणा। उस दिन परमेश्वरे उना सारे कम्मा जो प्रगट करी देणा है जडे लोकां कितयो न, ताकि उना दा न्याय होई सके। 11 परमेश्वरे पक्का ही इना सारियां चीजां दा नाश करी देणा है, जियां मै हण बोलया है, इस तांई तुहांजो पबित्र चाल चलन कने भक्ति च जिन्दगी जिणा चाईदी जडी परमेश्वरे जो खुश करे। 12 जियां की तुसां उस दिने दा इंतजार करा दे न जालू परमेश्वरे संसारे दे लोकां दा न्याय करणे तांई ओणा है, तां उस दिने दे जल्दी ओणे तांई अपनी तरफा ला पूरी कोशिश करा। उस दिन अग्गी भडकी पौणा है कने अम्बरे जो भस्म करी देणा है, उसा गर्मियां ला अम्बरे दा सब कुछ पिघली जाणा। 13 पर असां उम्मीद करा दे न की परमेश्वरे इक नोआ अम्बर कने नोई धरती बणाणी जिदा उनी बायदा कितया था। ओथु सिर्फ धर्मी लोक ही रेदे न। 14 इस तांई हे प्यारे मसीह भाईयो, जालू तुसां इना गल्लां दा होणे दा इंतजार करा दे न, इस तांई तुहांजो ऐसी जिन्दगी जिणे दी हर इक कोशिश करणा चाईदी जडी पबित्र कने परमेश्वरे जो खुश करदी हो कने इक दुज्जे सोगी शांतिया सोगी रिया। 15 साडे प्रभु दे सबर जो इक ऐसा मौका समझा, जडा सै तुहांजो ओणे बाले न्याय ला बचणे तांई दे दा है। ऐ सब कुछ साडे प्यारे मसीह भाई पौलुसे भी परमेश्वरे दे दितयो ज्ञाने ला इक चिठिया च लिखया है, जडा मै तुहांजो दसया है। 16 उनी अपणियां सारियां चिठियां

च, जडियां उनी यीशु मसीह पर भरोसा करणे बालयां जो लिखियां न, उना च एसियां ही गल्लां करदा है जदियां तुहांजो लिखियां न। पर कुछ गल्लां जडियां सै लिखदा है, उना जो समझणा मुशकिल है। जिना लोकां खरी शिक्षा नी लियो है कने जिना दा मसीह पर भरोसा कमजोर होंदा है, सै इना मुशकिल गल्लां दा मतलब गलत समझादे न, तियां ही जियां सै पबित्र शास्त्र दे कुछ हिस्सयां जो गलत तरीके ला दसदे न। इयां करिरी ला खुद ही अपना नाश करी लेंदे न। 17 इस तांई हे मसीह भाईयो, तुसां पेहले ला ही जाणदे न की ऐ गल्लां होणियां न। इस तांई इसा गल्ला दा ध्यान रखा की जडे लोक नियमा जो नी मंदे सै तुहांजो झूठ बोली करी भटकाई ना देंन। अगर तुसां सच्चाई पर भरोसा करणा बंद करी दिगे जिस पर तुसां इक बकत पर बडा जादा भरोसा था। 18 पर तुसां साडे प्रभु, कने उद्धारकर्ता यीशु मसीह दे अनुग्रह जो होर जादा ला जादा अनुभव करणा चाईदा, कने ऐ की तुसां होर अच्छे तरीके ला जाणी सकन। उदी महिमा हण कने हमेशा होंदी रे। आमीन। (aiōn g165)

1 यूहन्ना

1 असां तुहांजो इक माणुए दे बारे च लिखा दे न जडा जीवन दा बचन है, कने सै शुरूआत ला ही था, जिसयो असां सुणया, जिसयो असां ध्याने ने अपणी हखी ने दिखया कने हथां ने छुता। **2** ऐ माणु जडा जिन्दगी दिंदा है सै धरती पर आया है, कने असां उसयो दिखया, कने उदी गबाई दिन्दे न, कने तुहांजो हमेशा दी जिन्दगी दे बारे च दसदे न, जिसयो पिता परमेश्वरे सांझो दसया। (aiōnios g166) **3** जडा कुछ असां यीशुए मसीह दे बारे च दिखया कने सुणया है, उदी गबाई तुहांजो भी दिन्दे न, इस तांई की तुहाड़ी संगती साडे सोगी हो: कने साड़ी ऐ संगती पिता परमेश्वर सोगी, कने उदे पुत्र यीशु मसीह सोगी है। **4** कने ऐ गल्लां असां इस तांई लिखदे न, की तुहाड़ी खुशी पूरी होई जा। **5** जडा शुभसमाचार असां यीशुए ला सुणया है, सै ऐ है, की परमेश्वर अच्छा है कने ज्योति सांई पबित्र है कने उदे च कोई भी बुराई नी है। **6** अगर असां बोलन, की परमेश्वरे सोगी साड़ी हिस्सेदारी है, कने असां फिरी भी बुराई करदे रेंदे न, तां असां झूठ बोलदे न कने सच्चाई ने नी जिन्दे न। **7** तुसां सै ही करा जडा सही है जियां परमेश्वर सिद्ध स्पे च सही है, तियां ही असां भी लौई च जी न, तां परमेश्वरे कने इक दुजे ने हिस्सेदारी रखे न, कने उदे पुत्र यीशु मसीह दा खून सांझो साडे सारयां पापां ला शुद्ध करदा है। **8** अगर असां बोलन की असां कोई पाप नी किता, तां असां अपने आपे जो धोखा दिन्दे न, कने जडी सच्चाई परमेश्वर बोलदा है इस पर भरोसा नी करदे। **9** अगर असां परमेश्वरे सामणे अपने पापां जो मन्नी लेन, तां सै सांझे पापां जो माफ करणे कने सांझो सारे अधर्म ला शुद्ध करणे च भरोसे दे काबील कने धर्मी है। **10** अगर असां बोलन की असां पाप नी किता, तां असां परमेश्वरे जो झूठा बणादे न, कने असां परमेश्वर दे बचन जो नी समझदे न कने सै जडा बोलदा है उदा पालन नी करदे।

2 हे मेरे बच्चो, मैं ऐ गल्लां तुहांजो इस तांई लिखा दा है, की तुसां पाप ना करन; कने अगर कोई पाप करे तां पिता परमेश्वर बाल साडा इक सहायक है सै यीशु मसीह है कने सांझो माफ करणे तांई पिता परमेश्वरे ला प्राथना करदा है कने सै धर्मी है। **2** कने उनी ही सांझे पापां दी माफी तांई अपणा बलिदान दिता: कने सिर्फ सांझे ही नी पर संसारे दे सारे लोकां दे पापां तांई भी। **3** अगर असां परमेश्वरे दे हुकमा जो मन्नी लेंगे, उसला ही सांझो पता चलणा की असां उसयो जाणदे न। **4** जडा कोई ऐ बोलदा है, मैं परमेश्वरे जो जाणी गया है, पर उदे हुकमा जो नी मनदा, सै झूठा है; कने परमेश्वरे दे सच्च दे अनुसार जिन्दगी नी जिन्दा है। **5** पर जडा कोई परमेश्वरे दे बचना जो मनदा है, उदे च सची परमेश्वरे दा प्यार सिद्ध होया है, सांझो इसी ने ही पता चलदा है, की असां उदे सोगी बणी रेंदे न। **6** जडा कोई ऐ बोलदा है की असां यीशु मसीह च टिकयो न, तां सै यीशु मसीह सांई ही चाल चलन रखन। **7** हे प्यारो, मैं तुहांजो कोई नोआ हुकम नी लिखदा, पर सेई पुराणा हुकम जडा शुरू ला तुहांजो मिलया है; ऐ पुराणा हुकम सै बचन है, जिसयो तुसां तालू सुणया जालू यीशु मसीह पर भरोसा किता। **8** फिर भी जडा हुकम मैं तुहांजो लिखदा है, सै नोआ हुकम है, कने इदी सच्चाई यीशु मसीह च कने तुसां च

भी मिलदी है; क्योंकि हुण बुराई खत्म होदी जा दी है कने सच्चाई कने पबित्रता बदा दी है। **9** जडा कोई ऐ बोलदा है, की मैं अच्छाई कने भलाई ने जी दा है; पर अपने मसीह भाईयां ने बैर रखदा है, सै हल्ले दीकर भी बुराई च ही है। **10** जडा कोई अपने मसीह भाईए ने प्यार रखदा है, सै भलाई ने जिन्दगी जिंदा है, कने उदे अंदर ऐसा कुछ नी है जडा कुसी दे पाप करणे दी बजा बणे। **11** पर जडा कोई अपने मसीह भाइये ने बैर रखदा है, सै बुराई च जी दा है कने बुराई च चलया है, कने नी जाणदा है की कुथु चलया है क्योंकि बुराईया उदियां हखी अनिया करी दितियां न। **12** हे बच्चो, मैं तुहांजो इस तांई लिखा दा है, की यीशु मसीह दे नाए ने तुहाडे पाप माफ होऐ न। **13** हे पिताओ, मैं तुहांजो इस तांई लिखा दा है, क्योंकि तुसां मसीह जो जाणदे न, जडा शुरू ला है। हे जवानो, मैं तुहांजो इस तांई लिखा दा है, की तुसां उस शैताने पर जित हासिल किती है: हे बचयां, मैं तुहांजो इस तांई लिखया है, की तुसां पिता परमेश्वरे जो जाणी गियो न। **14** हे पिताओ, मैं तुहांजो इस तांई लिखया है, क्योंकि तुसां मसीह जो जाणदे न, जडा शुरू ला है। हे जवानो, मैं तुहांजो इस तांई लिखया है, की जौरे बाले होआ, कने परमेश्वरे दा बचन तुसां च बणी रेंदा है, कने तुसां उस शैताने पर जित हासिल किती है। **15** तुसां ना तां संसारे ला कने ना तां संसारे दिया चीजां ने प्यार रखा अगर कोई संसारे ने प्यार रखदा है, तां उदे च पिता परमेश्वरे दा प्यार नी है। **16** क्योंकि जडा कुछ संसारे च है, मतलब की शरीर दी पापी इच्छा जो पूरा करणा, कने चीजां जो दिखणा कने उना जो पांणे दी इच्छा रखणा कने जडा उदे बाल है कने जडा सै करदा है उदा घमंड करणा, सै पिता परमेश्वरे दिया तरफा ला नी, पर संसारे दिया तरफा ला है। **17** संसार कने उदी बुरी इच्छा दोनो खत्म हुंदे जांदे न, पर जडा परमेश्वरे दिया इच्छा दे अनुसार चलदा है, सै हमेशा बणी रेंदा है। (aiōn g165) **18** हे बच्चो, ऐ मसीह दा मुडी करी ओणे दा बकत है, जियां तुसां सुणया है, की मसीह दा बिरोधी ओणे बाला है, उदे अनुसार हुण भी बडे भरी मसीह दे बिरोधी आई गियो न; इसला असां जाणदे न, की मसीह दे मुडी करी ओणे दा बकत है। **19** सारे जडे मसीह दा बिरोध करदे न सै निकलयो तां सांझो ला ही न, पर सांझो चे नी थे; क्योंकि अगर सांझो चे होंदे, तां सांझे सोगी रेंदे, पर उना सांझो छडी दिता क्योंकि उना चे कोई भी साडा नी था। **20** पर तुहांजो तां यीशु मसीह दे जरिये पबित्र आत्मा मिलया है, कने तुसां सब सच्च जाणदे न। **21** मैं तुहांजो इस तांई नी लिखया, की तुसां सच्च जो नी जाणदे न, पर इस तांई लिखया है, की तुसां उसयो जाणदे न, कने इस तांई की कुसी भी झूठ दा जन्म सच्च ला नी होंदा है। **22** झूठा कुण है? सिर्फ सै जडा यीशु जो मसीहा होणे जो मना करदा है; कने मसीह दा बिरोधी सेई है, जडा पिता परमेश्वर दा कने पुत्र यीशु जो नी मनदा है। **23** जडा कोई पुत्रे जो नी मनदा है उदे बाल पिता परमेश्वर भी नी: जडा पुत्र यीशु जो मन्नी लेदां है, उदे बाल पिता परमेश्वर भी है। **24** जालू तुसां मसीह पर भरोसा किता कने जडा सच्चाई दा बचन तुसां सुणया, सै ही तुसां च बणी रे। अगर सै तुसां च बणी रे, तां तुसां भी पुत्रे च, कने पिता परमेश्वर च बणी रेणा। **25** हमेशा दी जिन्दगी सै बायदा है जडा पिता परमेश्वरे सांझो ने कितया है। (aiōnios g166) **26** मैं तुहांजो उना लोकां दे बारे च चिताबनी दे दा

है जडे तुहांजो गलत शिक्षा ने धोखा देणे दी कोशिश करा दे न। 27 पर तुहांजो तां पबित्र आत्मा यीशु मसीह दे जरिये मिलया है, सै तुहाडे च हमेशा बणया रे; इस तांई तुहांजो सच्चाई दे बारे च कुसी माणुए जो सिखाणे दी जरूरत नी है, बल्कि पबित्र आत्मा तुहांजो उना सरियां चीजां दे बारे च जाणने च मदद करणी है जिना दी तुहांजो जरूरत है, जडा पबित्र आत्मा तुहांजो सिखाणा सै सच्च है, उस च कुछ झूठ नी है: इस तांई यीशु मसीह सोगी बणी रिया जियां की पबित्र आत्मा करणे तांई बोलया है। 28 हे बच्चों मसीह सोगी बणी रिया; की जालू उनी दोबारा प्रगट होणा, तां सांझो हिम्मत हो, कने असां उदे ओणे पर उदे सामणे शर्मिंदा ना होन। 29 क्योंकि तुसां ए जाणदे न, की यीशु मसीह धर्मी है, तां ऐ भी जाणदे न, की जडे कोई धर्म दे कम्म करदे न, सै परमेश्वर दे बच्चे न।

3 बिचार करा की पिता परमेश्वरे साडे ने कितणा प्यार किता है, की सांझो परमेश्वर दे बच्चे बोलन, कने सच्ची असां परमेश्वर दे बच्चे न। इस संसारे दे लोक ऐ नी जाणदे न की असां परमेश्वर दे बच्चे न क्योंकि सै पिता परमेश्वर जो नी जाणदे। 2 हे प्यारो, हुण असां परमेश्वरे दी ओलाद न, कने हल्ले दीकर ऐ प्रगट नी होया, की असां भविष्य च क्या बणी जाणा। इतणा पता है की जालू उनी प्रगट होणा है, तां असां भी उदे सांई होणा, क्योंकि उसयो तदिया ही दिखणा जियां सै है। 3 कने जडा कोई यीशु मसीह पर आस रखदा है, सै अपने आपे जो तदेया ही पबित्र करदा है, जदेया सै पबित्र है। 4 जडे कोई लगातार पाप करदे न, सै परमेश्वरे दी व्यवस्था जो नी मंदे कने पाप करणा व्यवस्था जो तोडणा है। 5 कने तुसां जाणदे न, की सै इस तांई आया है की साडे पापां दिया सजा जो दूर करी दे; कने उदे च कोई पाप नी है। 6 जडा कोई उदे च बणी रेंदा है, सै लगातार पाप नी करदा; जडा कोई पाप करदा है, सै नी जाणदा की यीशु मसीह कुण है, कने ना ही उसयो जाणया है। 7 हे बच्चो, कुसी दे बेहकाबे च मत ओदे। जडा धार्मिकता दे कम्म करदा है, सेई यीशु मसीह सांई धर्मी है। 8 जडा कोई लगातार पाप करदा है, सै शैताने दिया तरफ ला है, क्योंकि शैतान शुरू ला ही पाप करदा आया है, परमेश्वरे दा पुत्र इस तांई आया, की शैताने दे कम्मा जो खत्म करे। 9 जडा कोई परमेश्वरे दे बच्चे न सै लगातार पाप नी करदा; क्योंकि परमेश्वर दा सभाब उदे च है: कने सै पाप नी करी सकदा, क्योंकि सै परमेश्वरे दा बच्चा है। 10 इसी ने परमेश्वरे दे बच्चे कने शैताने दे बच्चे जाणे जांदे न; जडा कोई धर्म दे कम्म करदा, सै परमेश्वरे दिया तरफ ला है, कने जडा कोई अपने मसीह भाईऐ ने प्यार करदा है सै भी परमेश्वरे दिया तरफ ला है। 11 जडा समाचार तुसां शुरू ला सुणया है, से ऐ है, की असां इक दुज्जे ने प्यार रखिए। 12 कने आदम दे पुत्र कैन सांई मत बणदे, जडा उस शैताने दा बच्चा था, जिनी अपने भाईऐ दी हत्या किती, कने उनी उदी कुसा बजा ने हत्या किती? उनी इस तांई हत्या किती क्योंकि उदे अपने कम्म बुरे थे, कने उदे भाईऐ दे कम्म धर्म दे थे। 13 हे मसीह भाईयो, अगर संसारे दे लोक तुहांजो ने बैर रखदे न तां हेरान मत होंदे। 14 सांझो पता है, की असां मौत दी शक्ति ला अजाद होई गियो न कने हुण साडे बाल परमेश्वरे दिया तरफ ला हमेशा दी जिंदगी है; क्योंकि असां मसीह भाईयां ने प्यार रखदे न, कने जडा प्यार नी रखदा है सै हले भी मौत दिया

शक्तिया दे अधीन है। 15 जडा कोई अपने भाईयां ने बैर रखदा है, सै हत्यारा है; कने तुसां जाणदे न, की कुसी भी हत्यारे च हमेशा दी जिन्दगी नी रेंदी। (aiōnios g166) 16 असां प्यार जो यीशु मसीह ला ही जाणया, की उनी साडे तांई अपने प्राण दिते; इस तांई सांझो भी मसीह भाईयां तांई प्राण देणा चाईदे। 17 पर जिसदे बाल संसारे दी धन सम्पत्ति हो कने सै अपने मसीह भाईये जो कंगाल दिखीकरी उस पर तरस ना खा, तां उदे च परमेश्वरे दा प्यार नी होई सकदा। 18 हे मेरे प्यारे बच्चो, सांझो बचना कने गल्लां ला ही नी, पर उना दी सहायता करी के सच्चा प्यार करणा चाईदा। 19 जालू असां दुज्जयां ने प्यार करगे इसला ही सांझो पता चलणा है, की असां सच्च दी ओलाद न। कने जालू कदी साडा मन सांझो पर दोष ला, तां असां परमेश्वरे दे सामणे अपने मने जो दिलासा देई सकदे न। 20 क्योंकि परमेश्वर साडे मने ला बड्डा है; कने सब कुछ जाणदा है। 21 हे प्यारो, अगर साडा मन सांझो दोष नी ला, तां असां परमेश्वरे सामणे हिम्मत होंदी है। 22 कने जडा कुछ असां परमेश्वरे ला मंगदे न, सै सांझो उसला मिलदा है, क्योंकि असां उदे हुकमा जो मंदे न; कने जडा परमेश्वरे जो खुशी दिन्दा है असां सेई करदे न। 23 कने उदा हुकम ऐ है की असां उदे पुत्र यीशु मसीहे पर भरोसा करन कने जियां उनी सांझो हुकम दितया है तियां ही अपु के प्यार रखन। 24 जडा उदे हुकमा जो मनदा है, सै परमेश्वर च रेंदा है कने परमेश्वर उना च रेंदा है। कने इसी ला ही उसा पबित्र आत्मा ला जडी उनी सांझो दिती है, असां जाणदे, की सै सांझो च रेंदा है।

4 हे प्यारो, हर इक कुसी पर भरोसा मत करा जडा बोले उस बाल पबित्र आत्मा है, पर उना जो परखा, की सै परमेश्वरे दिया तरफ ला हेन की नी; क्योंकि बडे भरी झूठे संदेश देणेवाले इस संसारे च आयो न, जडे बोलंदे न की असां पिता परमेश्वरे दिया तरफ ला बोलंदे न। 2 परमेश्वरे दी आत्मा जो तुसां इसा रीतिया ने पछेणी सकदे न, की जडा कोई माणु ऐ मनी लेंदा है, की यीशु मसीह माणु बणी करी आया है, सै परमेश्वरे दिया तरफ ला है। 3 कने जडा कोई माणु यीशुऐ जो नी मंदा है, सै परमेश्वरे दिया तरफ ला नी है; कने सेई मसीह दे बिरोधी दी आत्मा है; जिसदी चर्चा तुसां सुणी बैठयो न, की सै औणे बाला है, कने हल्ले भी संसारे च है। 4 हे बच्चों, तुसां परमेश्वरे दिया तरफ ला झूठे संदेश देणेवालां जो हरया; क्योंकि जडा पबित्र आत्मा तुहाडे च है, सै शैताने ला बडा है जडा संसार च है। 5 सै परमेश्वर दिया तरफ ला झूठे संदेश देणेवाले संसारे दे न, इस तांई सै संसारे दियां गल्लां करदे न, कने संसार दे लोक उना दी सुणदे न। 6 असां परमेश्वरे दिया तरफ ला न, जडे परमेश्वरे जो जाणदे न, सै साडी सुणदा है; जडा परमेश्वरे जो नी जाणदा है सै साडी नी सुणदा है इस तरीके ने असां सच्च दी आत्मा कने झूठ दी आत्मा जो पछेणी लेंदे न। 7 हे प्यारो, असां अपु के प्यार रखन; क्योंकि प्यार परमेश्वर ला है कने जडा कोई दुज्जयां सोगी प्यार करदा है, सै परमेश्वरे दा बच्चा है कने परमेश्वरे जो जाणदा है। 8 जडा दुज्जयां जो प्यार नी करदा सै परमेश्वरे जो नी जाणदा है, क्योंकि परमेश्वर प्यार है। 9 जडा प्यार परमेश्वर साडे ला रखदा है, सै इसा गल्ला ने प्रगट होया है की पिता परमेश्वरे अपने इकलोते पुत्रे जो संसार च भेजया है ताकि सांझो उसला हमेशा दी जिन्दगी मिल्ले। 10

सच्चा प्यार ऐ नी है की असां परमेश्वरे ने प्यार किता, पर उनी सांझो ने प्यार किता है, पर परमेश्वरे साझे पापां जो माफ करणे ताई अपने पुत्रे जो बलिदान होणे ताई भेजया है। 11 हे प्यारो, जालू परमेश्वरे सांझो ने ऐसा प्यार किता, तां सांझो भी अपु चे ऐदिया ही प्यार रखणा चाईदा। 12 परमेश्वरे जो कदी भी कुनी नी दिखया है; अगर असां अपु चे प्यार रखिए, तां परमेश्वर सांझो च बणी रेंदा है; कने उदा प्यार सांझो च सिद्ध होई गया है। 13 इसी ने सांझो पता चलदा है, की असां परमेश्वर च रेंदे न, कने परमेश्वर सांझो च रेंदा है; क्योंकि उनी अपनी पबित्र आत्मा सांझो दितया है। 14 असां पुत्रे जो दिखया है कने गबाई भी दिन्दे न की पिता परमेश्वरे अपने पुत्रे जो संसारे दे लोकां दा उद्धारकर्ता बणाई के भेजया है। 15 जडा कोई ऐ अपनाई लेंदा है की यीशु परमेश्वरे दा पुत्र है, परमेश्वर उदे च रेंदा है, कने सै परमेश्वरे च रेंदा है। 16 असां जाणदे न कने भरोसा करदे न की परमेश्वर सांझो ने प्यार करदा है, उसयो असां जाणी गे न, कने सांझो उदा भरोसा है; परमेश्वर प्यार है जडा प्यार च बणया रेंदा है परमेश्वर उदे च रेंदा है, कने सै परमेश्वरे च रेंदा है। 17 इसी ला ही प्रेम सांझो च पूरा होया कि, न्याय दे दिने सांझो हिम्मत मिल्ले की सै सांझो नी दिगा, क्योंकि मसीह साई इक दुज्जे सोगी प्यार करदे न कने इसा दुनिया च मसीह साई रेंदे न। 18 प्यार च डर नी होंदा, सिद्ध प्यार डरे जो भी दूर करी दिन्दा है, क्योंकि जडा डरदा है सै सजा ला डरदा है। जडा डरदा है सै प्यारे च सिद्ध नी होया है। 19 परमेश्वरे सांझो ला पेहले प्यार किता इस ताई असां परमेश्वर कने दुज्जयां सोगी प्यार करदे न। 20 अगर कोई बोले, मैं परमेश्वरे ने प्यार करदा, पर अपने मसीह भाईऐ ने दुशमणी रखे; तां सै झूठा है; क्योंकि जडा अपने मसीह भाईऐ ने जिसयो उनी दिखया है उसला प्यार नी रखदा है, तां सै परमेश्वरे ने भी प्यार नी रखी सकदा है, जिसयो उनी दिखया भी नी है। 21 कने उसला सांझो ऐ हुकम मिलया है, की जडा कोई परमेश्वरे ने प्यार रखदा है, सै अपने मसीह भाई ने भी प्यार रखे।

5 जिदा ऐ भरोसा है की यीशु ही मसीह है, सै जन परमेश्वरे दी संतान है कने जडा कोई पिता परमेश्वरे ला प्यार करदा है, तां सै उदी संतान ला भी प्यार करदा है। 2 जालू असां परमेश्वरे ने प्यार करदे न, कने उदे हुकमा जो मदे न, तां इसी ने सांझो पता चलदा है, की परमेश्वरे दी ओलाद ने प्यार रखदे न। 3 परमेश्वरे ने प्यार करणे दा मतलब है की असां उदे हुकमा जो मनन; कने उदे हुकमा जो मनणा बडा कठिन नी न। 4 क्योंकि जडे कोई परमेश्वरे दे बच्चे न, सै संसारे पर जित हासिल करदे न, कने सै जीत, जिसने संसारे जो रांदा है, सै साडा भरोसा ही है। 5 संसारे पर जीत पाणे बाला कुण न? सिर्फ सेई जिसदा भरोसा है, की यीशु ही परमेश्वरे दा पुत्र है। 6 ऐ यीशु मसीह है, जिसयो परमेश्वरे इस संसार च भेजया है, कने उसयो पाणिए ने बपतिस्मा दितया था, कने बाद च जालू सै मरी गया तां उदा खून बेह गया। सै सिर्फ बपतिस्मा लेणे ताई नी आया था पर सूली पर अपना खून बहाइ करी मरया भी। पबित्र आत्मा दसदा है की यीशु मसीह परमेश्वरे ला आया, कने पबित्र आत्मा हमेशा सेई दसदा है जडा सच्च है। 7 गबाई ऐ है की यीशु मसीह साडे पापां ताई बलिदान होया, ऐ तिन्न गल्लां इसदी गबाई दिन्दियां न। 8 पबित्र आत्मा, पाणी, कने खून; तिन्ने इक ही गल्ल बोलदियां न। 9 जालू असां

माणुऐ दी गबाई मन्नी लेंदे न, तां परमेश्वरे दी गबाई तां उसला भी बदीकरी है कने परमेश्वरे दी गबाई ऐ है, की उनी अपने पुत्रे दे बारे च गबाई दितियो है। 10 जडा परमेश्वरे दे पुत्रे पर भरोसा करदा है, सै अपने मने च ही गबाई रखदा है; जिनी परमेश्वरे पर भरोसा नी रखया, उनी परमेश्वरे जो झूठा बणया; क्योंकि उनी उसा गबाइया पर भरोसा नी किता, जडी परमेश्वरे अपने पुत्रे दे बारे च दिति है। 11 कने सै गबाई ऐ है, की परमेश्वरे सांझो हमेशा दी जिन्दगी दितियो है कने सांझो ऐ हमेशा दी जिन्दगी परमेश्वरे दे पुत्रे ला मिल्ली है। (aiōnios g166) 12 जडा पिता परमेश्वरे दे पुत्र यीशु मसीह जो अपनांदा है, उदे बाल हमेशा दी जिन्दगी है; कने जडा परमेश्वरे दे पुत्रे जो नी अपनांदा है, उदे बाल हमेशा दी जिन्दगी भी नी है। 13 मैं तुहांजो ऐ सब इस ताई लिखया है की तुसां, जडे परमेश्वरे दे पुत्रे पर भरोसा करदे न, की तुहांजो पता लग्गे की हमेशा दी जिन्दगी तुहाडी है। (aiōnios g166) 14 कने सांझो परमेश्वरे सामणे जडी हिम्मत होंदी है, सै ऐ है; की अगर असां उदी इच्छा ने कुछ मंगदे न, तां सै साडी सुणदा है। 15 कने जालू असां जाणदे न, की जडा कुछ असां परमेश्वरे ला मंगदे न, सै साडी सुणदा है, तां ऐ भी जाणदे न, की जडा कुछ असां मंगया है सांझो मिल्ला भी है। 16 अगर कोई अपने मसीह भाईऐ जो ऐसा पाप करदे दिखे, जिदा परिणाम मौत न हो, तां सै उदे ताई परमेश्वरे ला प्रार्थना करा तां परमेश्वरे उदिया जिन्दगिया दी रक्षा करणी। क्योंकि इक पाप ऐसा भी होंदा है जिदा नतीजा मौत है; मैं इदे बारे च परमेश्वरे ला प्रार्थना करणे ताई नी बोलदा। 17 हर तरा दा अधर्म तां पाप है, पर ऐसा पाप भी है, जिदा नतीजा मौत है। 18 सांझो पता है, की जडा कोई परमेश्वर दा बच्चा है, सै लगातार पाप नी करदा; क्योंकि परमेश्वरे दा पुत्र यीशु मसीह उदी रक्षा करदा है कने शैताने उसयो छुई नी सकदा। 19 असां जाणदे न, की असां परमेश्वरे ला न, कने सारे संसारे दे लोक उस शैताने दे वशे च पियो न। 20 कने ऐ भी जाणदे न, की परमेश्वरे दा पुत्र यीशु मसीह इस संसार च आया कने उनी सांझो समझ दिति, की असां उस सच्चे परमेश्वरे जो पछेणन। असां सच्चे परमेश्वरे सोगी करीबी रिश्ते च न क्योंकि साडा उदे पुत्र यीशु मसीह सोगी करीबी रिश्ता है। सच्चा परमेश्वर कने हमेशा दी जिन्दगी ऐई है। (aiōnios g166) 21 हे बच्चों, अपने आपे जो हर इक ऐसी चिजा ला दूर रखा जडी तुहाडे दिले च परमेश्वरे दी जगा ले।

2 यूहन्ना

1 मैं यूहन्ना कलीसिया दा अगुवा, मैं ऐ चिट्ठी उसा आदरणीय जनानिया जो कने उसा दे बच्चयों जो लिखा दा है, जिना जो परमेश्वरे चुणया है। मैं सच्ची तुहांजो ने प्यार करदा है, कने सिर्फ मैं ही नी पर सै सारे भी प्यार करदे न, जड़े परमेश्वरे दी सच्चाईया पर भरोसा रखदे न। **2** असां तिजो ला इस ताई प्यार करदे क्योंकि सच्ची शिक्षा साडे मना च बणियो है सै हमेशा साडे सोगी बणी रेणी है। (aiōn g165) **3** परमेश्वर पिता कने उदे पुत्र यीशु मसीह दिया तरफा ला अनुग्रह, दया कने शांति असां सारयां सोगी बणी रे। जड़े सच्च जो मंदे कने इक दुज्जे ने प्यार करदे न। **4** मैं बड़ा खुश होया जालू मैं तेरे कुछ बचयां दे बारे च सुणया की सै सचाई ने जिन्दगी जी दे न, सै बिलकुल सै ही करा दे न जडा साडे पिता परमेश्वरे करणे जो बोलया। **5** हुण हे आदरनीय जनानी, मैं तिजो ला विनती करदा है, की सांझो इक दुज्जे ने हमेशा प्यार करणा चाईदा। ऐ कोई नोआ हुकम नी है पर सेई हुकम है जिसयो असां उस बक्ते ला जाणदे न जालू असां मसीह दे पिच्छे चलणा शुरू कितया था। **6** सच्चा प्यार सै है जडा असां तालू करदे न जालू असां परमेश्वर दे हुकमा जो मंदे न, जालू ला असां मसीह दे पिच्छे चलणा शुरू कितया है, तालू ला असां सुणया है की परमेश्वरे तुहांजो हुकम दितया है की तुहांजो हमेशा इक दुज्जे ने प्यार करदे रेणा चाईदा। **7** मैं ऐ इस ताई बोला दा है क्योंकि केई लोक न जड़े झूठे उपदेश दिन्दे न सै मतियां जगां च गियो न, सै बोलदे न की यीशु मसीह माणुऐ दे स्पे च इसा दुनिया च नी आया है। जडा कोई ऐ नी मंदा की यीशु माणुऐ दे स्पे इसा धरती च नी आया है तां सै माणु मसीह दा बिरोधी है कने लोकां जो हमेशा धोखा दिदा है। **8** इस ताई तुसां ऐ ध्यान रखा की ऐ लोक तुहांजो धोखा ना देन, ताकि परमेश्वरे दी सेबा ताई कितियो मेहनत बेकार ना होई जा कने परमेश्वरे तुहाड़ी सेबकाई ताई तुहांजो पूरा इनाम देणा। **9** जड़े लोक सच्ची शिक्षा ला भटकी जांदे न कने मसीह दी शिक्षा जो नी मंदे न, सै परमेश्वरे सोगी संगती च नी न। जड़े लोक यीशु मसीह दी शिक्षा जो मंदे न सै परमेश्वरे सोगी कने उदे पुत्र यीशु सोगी संगती च न। **10** अगर कोई तुहाडे बाल आए कने कुछ सिखा दा है, जडा मसीह यीशु दी शिक्षा ला लग है। ना तां उदी मेहमान नबाजी करा, कने ना ही उसयो नमस्ते करा। **11** क्योंकि जडा कोई ऐसे माणुआं दा स्वागत करदा है, सै उदे बुरे कम्मा च हिस्सेदार होदा है जडा सै करदा है। **12** मैं होर भी मतियां गल्लां तुहांजो दसणा चांदा है, पर मैं उना जो इयां चिठिया च नी लिखणा चांदा है, पर मिजो आस है, की मैं तुहाडे बाल ओऐ, कने आमणे सामणे होईकरी गल्लां करे तालू असां पूरी तरा ला खुश होणा। **13** ऐथू तुहाडियां बेंहणा दे बच्चे, जिना जो परमेश्वरे चुणयां है सै तुहांजो नमस्कार करा दे न।

3 यहन्ना

1 मैं यहन्ना कलीसिया दा अगुवा इसा चिठिया जो अपने प्यारे भाई गयुस जो लिखदा है, मैं तिजो ला सच्चा प्यार करदा है। **2** हे प्यारे, मेरी ऐ प्राथना है, जियां तुसां भरोसे च मजबूत होंदे जांदे न, ठीक तियां ही बाकी होर कम्मा च भी तरकी करा कने स्वस्थ रिया। **3** क्योंकि कुछ विश्वासी भाईयां आई करी, मिंजो दसया की तुसां अपनी जिन्दगी इमानदारिया ने सच्चाई च जी दे न, तां मिंजो बड़ी खुशी होई। **4** जालू भी मैं ऐ सुणदा है की सै लोक जडे मेरे बचयां सांई न, सै उसी तरीके ने जी दे न, जड़ा सच्ची परमेश्वरे सांझो दसया है, इसला मिंजो होर भी जादा खुशी होंदी है। **5** हे प्यारे, तू बडिया इमानदारिया ने साडे मसीह भाईयां दी मदद किती जडे शुभसमाचार प्रचार तांई यात्रा करा दे थे, चाहे सै तुहाडे तांई अनजाण ही थे। **6** उना चे केई लोकां ऐथू दे विश्वासियां जो कलीसिया च दसया है की तू अपने मसीह साथियां ने कितणा प्यार करदा है। हुण मैं तिजो ने बोलदा है तिजो ऐसे मसीह साथियां दी मदद करदे रेणा चाईदा जडे मसीह दा शुभसमाचार प्रचार करणे तांई यात्रा करदे न क्योंकि ऐ परमेश्वरे जो खुश करदा है। **7** क्योंकि सै मसीह दा शुभसमाचार सुणाणे तांई निकलयो न, कने भरोसा नी करणे बालयां ला कोई मदद नी लेंदे। **8** इस तांई ऐसयां दा अपने घरे ओणे पर स्वागत करा कने जडी उना दी जरूरत है सै दिया, जिसने असां भी सच्ची सेबा दे हिस्सेदार बणन। **9** मैं कलीसिया दे ना इक चिठी लिखी; पर दियुत्रिफेस उनी मेरियां गल्ला जो मनणे ला मना करी दिता क्योंकि सै खुद हमेशा ला ही कलीसिया दा अगुवा बणना चांदा है। **10** इस तांई जालू मैं ओणा, तां तुहाडे सामणे उदे कम्मा जो जड़ा सै करा दा कने जड़ा साडे बारे च बुरियाँ-बुरियाँ गल्लां बोलदा है सारा कुछ दसगा; कने इतणा ही नी, सै अपु तां शुभसमाचार प्रचार करणे बाले मसीह भाईयां जो स्वीकार नी करदा है कने ना ही कलीसिया दे लोकां जो ऐसा करणा दिन्दा है कने जडे करणा चांदे न, उना जो मना करदा है, कने कलीसिया ला निकाली दिन्दा है। **11** हे प्यारे, उना माणुआं दी नकल मत करदे जडे बुरे कम्म करदे न, पर उना माणुआं दे पिच्छे चलनयो जडे अच्छे कम्म करदे न। जालू कोई अच्छा कम्म करदा है, तालू सै ऐ साबित करदा है, की मैं परमेश्वरे दा पुत्र है कने जड़ा बुराई करदा है उनी परमेश्वरे जो नी दिखया। **12** दिमेत्रियुस दे बारे च कलीसिया दे सारे लोक बोलदे न की बड़ा अच्छा बन्दा है क्योंकि सै सच्चाई ने जिन्दगी जिन्दा है, सच्च भी अपु उदी गबाई दिंदा है: कने असां भी बोलदे न, की सै बड़ा अच्छा बन्दा है कने तू जाणदा है, असां सच्च बोलदे न। **13** मैं होर भी मतियां गल्लां तुहांजो दसणा चांदा है, पर मैं उना जो इयां चिठिया च नी लिखणा चांदा है। **14** पर मिंजो आस है, की मैं तुहाडे बाल ओऐ, कने आमणे सामणे होईकरी गल्लां करे तालू असां पूरी तरा ला खुश होणा। मैं प्राथना करदा है की परमेश्वर तिजो शांति दे। ऐथू दे मसीह मित्र तिजो नमस्कार करदे न ओथू दे दोस्तां दे ना लेई-लेई के नमस्कार बोली दियां।

यह्दा

1 मैं, यह्दा तुहांजो ऐ चिड़ी लिखा दा है। मैं यीशु मसीह दा सेबक कने याकूबे दा छोटा भाई है। मैं तुसां लोकां जो लिखा दा है, जिना जो परमेस्वर अपणे उपर भरोसा करणे ताई सदया है। साडा पिता परमेस्वर तुहांजो ने प्यार करदा है कने तुहाडी रक्षा करदा है। **2** मैं प्रार्थना करदा है की परमेस्वर तुहांजो दया, शांति कने प्यार बडा जादा दे। **3** हे प्यारे मसीह भाईयो, मैं तुहांजो उसा नोई जिन्दगी दे बारे च लिखणे दी हर इक कोशिश करा दा है कने जडी यीशु मसीह दे जरिये परमेस्वर दिया तरफा ला होंदी है कने जिसा च असां सारे हिस्सेदार न। पर हुण मिंजो इसा चिठिया जरिये तुहांजो प्रोत्साहित करणे दी जरूरत महसूस होआ दी है ताकि तुसां मसीह पर भरोसे च टिकी रेणे ताई कोशिश करा। परमेस्वर अपणे लोकां ताई ऐ भरोसा इक ही बरी हमेशा ताई दितया है, कने इसयो बदली नी सकदे। **4** मैं तुहांजो इस ताई लिखा दा है क्योंकि कुछ ऐसे लोक न जडे भरोसा करणे दा दिखावा करदे न, कने परमेस्वर दी इज्जत नी करदे न कने तुहाडिया कलीसिया च शामिल होई गियो न, कने गलत शिक्षा दिन्दे न क्योंकि परमेस्वर अपणे अनुग्रह ला साडे पापां जो माफ करी दिन्दा है, इस ताई असां बुरे कम्म कने पाप करी सकदे न, जडा साडा इकलोता मालिक कने साडा प्रभु है। बडे बकत पेहले ला, पबित्र शास्त्र च लिख्या है की परमेस्वर ऐसे लोकां जो सजा देंगी है। **5** हालांकि तुसां इना सारियां गल्लां दे बारे च जाणदे न, फिरी भी मैं तुहांजो इना गल्लां दी याद दिलाणा चांदा है, की परमेस्वर इस्त्राएलियां जो गुलामी ला अजाद कराया कने मिस्र देशे ला कडी लेई आया, पर बादे च उनी सारियां जो मारी दिता, जिना रेगिस्तान च उस पर भरोसा नी किता। **6** याद करा की परमेस्वर उना शैताने दे दूतां जो कियां सजा दिती, जिना अपणिया जिम्मेदारियां जो नी निभाया, कने उना अपणे पदां जो छडी दिता। परमेस्वर इना स्वर्गदूतां जो नेहरे च रखया है, कने ऐसे सुंगला ला बनया है जिना जो कोई नी तोडी सकदा ताकि उस महान न्याये बाले दिने उना दा न्याय होई सके। (aiōnios g126) **7** इस ताई इना इस्त्राएली कने स्वर्गदूतां साई, उना लोकां जो भी याद रखा जडे सदोम कने अमोरा शहरां च कने उना दे अखे-बखे दे गां च रेदे थे, की उना सोगी क्या होया था। सै लोक व्यभिचारी होई गियो थे, कने हर तरा दे नाजायज यौन रिशतयां च पेई गियो थे, इस ताई परमेस्वर उना जो अग्नी ने मारी दिता। उना सोगी जडा होया सै झूठे गुरूआं ताई इक चेताबनी है की उना जो भी कदी नी बुझणे बालिया अग्नी दी सजा मिलणी है। (aiōnios g166) **8** इना उदाहरणा दे बारे च जाणने बाद भी, ऐ भरोसा होणे दा दिखावा करणे बाले माणु इयां ही पाप करदे न कने बोलदे न की उना दर्शन दिखया है। सै अपणे शरीर जो पाप करणे ताई इस्तेमाल करदे न, कने परमेस्वर दे अधिकारां जो नी मंदे न, कने महिमामय स्वर्गदूतां जो बदनाम करदे न। **9** पर ऐथू दीकर की प्रधान स्वर्गदूत मीकाइले भी ऐसियां बुरियां गल्लां नी कीतियां जदियां गल्लां ऐ झूठे गुरू करदे न। पर जालू उनी शैताने सोगी बेहस किती कने मूसा परमेस्वर दा संदेश देणेबाले दिया लाशा जो लेई जाणे ताई अपणे अधिकारे जो चुनौती दिती, तां मीकाइले ऐ नी सोचया की उदे बाल बुरियां गल्लां बोली करी शैताने पर बुरा

दोष लागे दा हक है। बल्कि उनी बोलया, “प्रभु तिजो ला सकताईया ला गल्ल करे।” **10** पर सै लोक जडे परमेस्वर दी अराधना नी करदे, सै ऐसिया गल्लां दा बिरोध करणे ताई उना दे बारे च बुरा भला बोलदे न, जडियां उना जो समझ नी ओदियां; कने सै जंगली जानवरां साई व्यवहार करदे न, कने जिना कम्मा दे बारे च सै जाणदे नी न, उना जो बिना सोचयो समझे करदे न, परमेस्वर उना जो सजा देंगी है। **11** उना दा बडा बुरा होंणा है! की सै कैन साई बुराई दे रस्ते पर चलदे न, जिनी अपणे भाई दी हत्या करी दिती थी, क्योंकि सै भाईऐ ला जलदा था, क्योंकि परमेस्वर उदे भाईऐ दे बलिदान जो अपनाई लिया था पर उदे बलिदाने जो नी। उना जल्दबाजी च सेई गलती किती जडी बिलामे होर लोकां जो पाप पासे लेई जाणे दी किती ताकि पैसे कमाई सके। जियां मूसा दे खिलाफ जाणे ला कोरह दा नाश होई गया, तियां ही उना लोकां दा भी नाश होई जाणा जडे परमेस्वर दे खिलाफ जांदे न। **12** जियां पाणिऐ अंदर लुकियां चट्टाना समुंद्री जाजां ताई खतरनाख न, तियां ही ऐ लोक तुहाडे सोगी धामा च तुहाडे ताई खतरनाख न। चाहे सै प्रभु भोज च शर्मनाक कम्म करदे न पर सै इना कम्मा दिया बजा ला कोई भी शर्म महसूस नी करदे। सै उना पुहाला साई न जडे अपणी ही देखभाल करदे न; सै दुज्यां लोकां दी सहायता नी करदे। सै उना बदला साई न जिना जो सुकी होआ बिना बरखा कितयो उडाई लेई जांदी है। सै बायदे तां बडे करदे न, पर कुछ दिन्दे न। फसल दे बकते दे स्वां साई न जिना पर कोई फल नी होंदा है जिना जो उखाडी दिन्दे न, मतलब की सै मारी गियो न। **13** समुन्द्रे दियां भारी लेहरां साई जडियां गंदा झाग बणादियां न, ऐ लोक भी शर्मनाक कम्म करदे न। सै कुछ तारयां साई न जडे इक सीधे रस्ते पर नी चलदे, कने सही रस्ता नी दसदे। प्रभु उना ताई इक जगा रखा दा है जडा जिथू पूरा नेहरा ही है जिथू उना जो हमेशा ताई रेंणा पोंणा है। (aiōn g165) **14** कने हनोक जडा पेहले माणु आदम ला बाद सतमी पीडियां च जमया था, उनी इना अधर्मी लोकां दे बारे च भविष्यवाणी किती, “सुणा! परमेस्वर पक्का ही अपणे अणगिनत स्वर्गदूतां सोगी ओणा। **15** सारे लोकां दा न्याय करणे ताई, उना सारे बुरे कम्मा ताई उना पर दोष लागे ताई जडे उना परमेस्वर दे खिलाफ कितयो न कने उना सारियां भड़ी गल्लां ताई जडे उना उदे खिलाफ बोलियां न।” **16** ऐ लोक हमेशा परमेस्वर दे खिलाफ बोलदे न कने दुज्यां लोकां च गलती तोपदे न। सै लगातार उना बुरे कम्मा जो करदे न जडे उना दे दिल करणा चांदे न। सै अपणे बारे च घमंड ला दाबा करदे न कने खुद दे फायदे ताई दुज्यां लोकां दी चापलूसी करदे न, उना जो पिता परमेस्वर दिया तरफा ला सजा मिलणी। **17** पर हे प्यारे मसीह भाई, तुसां उना गल्लां जो याद रखा; जडे साडे प्रभु यीशु मसीह दे प्रेरित बडे पेहले बोली बैठयो न। **18** सै तुहांजो ला बोलदे थे, “साडे प्रभु यीशु मसीह दे मुडी करी बापस ओणे ला पेहले, ऐसे लोकां होंणा है जिना प्रभु कने उदे लोकां दा मजाक उडाणा। ऐ सेई लोक न जिना दिया जान्दियां च बुरी इच्छां दा काबू है।” **19** ऐ सै लोक न, जडे तुहांजो च फुट पांदे न, उना दिया बुरियां इच्छा उना जो काबू करदियां न, कने उना च पबित्र आत्मा नी है। **20** पर हे प्यारे भाईयो तुहांजो इक दुज्जे दी सहायता करदे रेणा चाईदा ताकि उना पबित्र सच्चाईयां च जिना पर तुसां भरोसा करदे न, इक

दुज्जे जो बधाई सकन। तुहांजो पबित्र आत्मा दिया अगुवाई च प्राथना करणी चाईदी। 21 तुहांजो इस भरोसे सोगी जीणा चाईदा की परमेश्वर सांझो ला प्यार करदा है। हालांकि तुसां उस दिने दा इंतजार करदे न जालू साडे प्रभु यीशु मसीहे बापस मुडी करी ओणा ताकि तुहांजो हमेशा दी जिनंदगी मिल्ले क्योंकि उनी सांझो पर दया किती है। (aiōnios g166) 22 उना लोकां ताई दयालु बणा जडे ऐ नी जाणदे कुस पर भरोसा करन। 23 कुछ होर लोक जिना जो तुसां जाणदे न, अगर सै नरख पास्से जा दा दे न, तां उना जो उस हमेशा दिया अग्गी ला झट खिची करी बचाई लिया। कने दुज्जयां पर दया दस्सा। पर सियुदा ही पाप करणे ला बचणे ताई साबधान रिया। ऐथू दीकर की उना कपड़यां ला भी नफरत करा जिना पर पाप दे कम्मा दे दाग न। 24 इकलोता परमेश्वर ही है जडा तुहाडी रक्षा करी सकदा है, जालू सै तुहांजो अपणिया महिमा च अपने सामणे खरेडदा है। उनी सांझो साडे प्रभु यीशु मसीह दे जरिये बचाया है। महिमा, गौरव, शक्ति, अधिकार बकत दी शुरूआत ला ही उदे थे, हुण भी उदे न, कने हमेशा ताई उदे ही रेणे। आमीन। (aiōn g165)

प्रकाशितवाक्य

1 इसा कताबा च उना गल्लां जो लिख्या है जडिया परमेश्वरे यीशु मसीह जो दसियां न। परमेश्वरे इस ताई उसयो दसियां ताकि सै अपने सेबकां जो उना घटना दे बारे च दस्सी सके जडियां जल्दी ही होणियां न। यीशु मसीह ई संदेश मिजो, अपने सेबक यहून्ना बाल स्वर्गदूते जो भेजी करी दसया, 2 इस ताई, मैं सै सब कुछ लिख्या जडा मैं दिखया। मैं इसा कताबा च परमेश्वरे दा बचन कने सै सच्चियां शिक्षां लिखियां न जिना दे बारे च यीशु मसीह मिजो दसया। 3 परमेश्वरे हर उस माणुऐ जो आशीष देणी जडे इसा भविष्यवाणियां जो दुज्जयां जो पढी करी सुणादां है, कने उनी हर उस माणुऐ जो आशीष देणी जडे उसयो सुणदे न कने इसयो मंदे न। क्योंकि ऐ चीजां जल्दी ही होणियां। 4 ऐ चिट्ठी यहून्ना दिया तरफा ला आसिया प्रदेशे दिया सत्तां कलीसियां ताई है: मैं प्रार्थना करदा है की परमेश्वर तुहांजो पर अनुग्रह कने शांति दे। सै सेई परमेश्वर है, जडा बकत दिया शुरूआत ला लेईकरी हुणे दीकर कने हमेशा ताई नी बदलदा। कने उना सत्तां आत्मा दिया तरफा ला, जडियां परमेश्वरे दे सिहांसने दे सामणे न, 5 कने यीशु मसीह दिया तरफा ला जिदे बचना पर भरोसा करी सकदे न, सै सेई ही है जडा मरी करी दुबारा ला जिंदा होणे बालयां चे पेहला है कने सै इस संसारे दे सारे राजयां दा शासक है। कने यीशु मसीह सांझो ला प्यार करदा है। सै साडे ताई मरी गया कने उनी साडे पापां दिया सजा जो खत्म करी दितया है। इसा बजा ला असां याजकां दा इक परिवार बणी गियो न, जडे उदे पिता परमेश्वरे दी सेवा करदे न। इस ताई यीशु मसीह जो महिमा कने शक्ति हमेशा मिलदी रे। आमीन। (aiōn g165) 7 सुणा, सै बदलां सोगी ओणे बाला है; कने हर इक जणे उसयो दिखणा, जडे लोक उदिया मौता ताई जिम्मेबार थे, उना भी उसयो ओदे दिखणा। कने धरतिया दे सारे लोकां जौरे-जौरे ला रोंणा जालू उना उसयो दिखणा। हों ऐसा ही होणा! आमीन। 8 प्रभु परमेश्वर बोलदा है, “मैं अलफा कने ओमेगा है, मतलब की मैं ही है जिनी सारियां चीजां दी शुरूआत कीती, कने मैं ही है जिनी सारियां चीजां जो खत्म करणा, कने मैं ही है जडा हमेशा ला था, कने जडा ओणे बाला है, मैं सारयां ला शक्तिशाली है।” 9 मैं यहून्ना, तुहाडा साथी मसीह भाई, मैं भी तुहाडे साईं दुख सेहन किता। मैं परमेश्वरे दे राज्य दा इक नागरिक है जियां की तुसां न, कने मिजो भी अपणियां पेरशानिया जो तियां ही सबर सोगी सेहन करणा चाईदा जियां तुसां करदे न। मैं परमेश्वरे दे बचन दा प्रचार करणे कने यीशु दे बारे च दसणे दिया बजा ला पतमुस दे टाप्पे पर केदी बनाई करी भेजी दितया था। 10 तुओरे जो जडा परमेश्वरे दा दिन है, परमेश्वरे दी आत्मा मिजो पर आई। कने मैं अपने पिच्छे ला कुसी जो बोलदे सुणया जडा तुरही साईं उच्चा कने साफ अबाजा च बोला दा था। 11 उनी मिजो बोलया जडा कुछ तू दिखदा है, उसयो कताबा च लिखी करी उना सत्तां कलीसियां जो भेजी दे जडियां इफिसस, स्मरना, पिरगमून, थुआतीरा, सरदीस, फिलदिलफिया, कने लौदीकिया शहरां च न। 12 तालू मैं ऐ दिखणे ताई पिच्छे मुडया की कुण मिजो ला गल्लां करा दा है, कने मैं सोने दे सत्त दिव्ये दिखे; 13 कने उना दिव्यां बिच इक प्राणी दिखया जडा माणुऐ साईं

लग्गा दा था। उनी इक लम्बा चौला पाया था जडा उदे पैरां दीकर पुजदा था। उनी अपणिया छतिया दे चारो पास्से इक सोने दा पटका पाया था। 14 उदे सिरे दे बाल चीटिया उना साईं चिट्ठे या बर्फा साईं थे। कने उदियां हखी अग्गी दिया लौई साईं चमका दियां थियां। 15 उदे पैर पीतलू साईं चमका दे थे, जियां पितलू जो भटिया च तपा दे होन, कने जालू उनी बोलया तां उदी अबाज बडी जोर दी थी, जियां केई झरनया ला पाणी पोणे दी अबाज होंदी है। 16 उनी अपने सजे हथे च सत्त तारे लियो थे, कने उदे मुंऐ ला तेज दोधारी तलवार निकलदी थी; उदा मुं उतणा ही चमका दा था जियां सूरज दोपेरा बडिया धूपा च चमकदा है। 17 जालू मैं उसयो दिखया, तां झट उदे पैरां च मरयो माणुऐ साईं पेई गया। पर उनी मिजो पर सजा हथ रखीकरी बोलया, “डर मत; मैं ही है जिनी सारियां चीजां दी शुरूआत कीती, कने मैं ही है जिनी सारियां चीजां जो खत्म करणा कने मैं सै है जडा हमेशा जिन्दा है, 18 चाहे मैं मरी गया था। पर हुण मैं जिन्दा है कने हमेशा जिन्दा रेणा; मैं युगां-युगां दीकर जिन्दा है; कने मेरे बाल मौत कने अधोलोक पर अधिकार है जडा मरयो लोकां दी जगा है। (aiōn g165, Hadēs g86) 19 इस ताई तू इना सारियां गल्लां जो लिखी ले, जिना जो तू दिखदा हा है, कने ऐ चीजां पक्का ही बादे च होणियां न।” 20 हुण मैं तिजो दसणा की मेरे सजे हथे दे सत्तां तारयां दा क्या मतलब है जडा पेहले पता नी था। इदा मतलब ऐ है की सत्त तारे उना स्वर्गदूतां जो दसदे न जडे सत्त कलीसियां दी रखवाली करदे न कने सत्त दिव्ये सत्त कलिसियां जो द्रुशांदे न।

2 उनी मिजो ऐ भी बोलया, इफिसस शेहरे दिया कलीसिया दे अगुवे जो ऐ संदेश लिख: मैं सेई है जडा अपने सज्जे हथे च सत्त तारे लेई रखदा है, कने सोने दे सत्त दिव्यां दे बिच चलदा है, मैं तिजो ला ऐ बोलदा है: 2 मैं जाणदा है की तू क्या करदा है, कने कितणी मेहनत करदा है कने कदी हार नी मंदा। मैं ऐ भी जाणदा है की तू बुरे लोकां दियां झुठियां शिक्षा जो सेहन नी करदा। तू उना लोकां जो जांचया परखया जडे बोलदे न की सै प्रेरित न पर असल च सै प्रेरित नी न कने सै सारे झुठे निकले। 3 तू सबर रखीकरी दुखां जो सेहन कितया है क्योंकि तू मिजो पर भरोसा करदा है, कने फिरी भी तू मेरी सेवा करणा बंद नी कीती। 4 पर हुण मिंझो तिजो ला ऐ शिकायत है की: हुण तू मिजो ला सियुदा प्यार नी करदा जदिया प्यार तू मिजो ला तालू करदा था जालू तू पैली बरी मिजो पर भरोसा किता था। 5 इस ताई याद कर की तू शुरूआत च मिजो ला कदिया प्यार करदा था कने हुण तू मिजो ला सियुदा प्यार नी करदा। इसा गल्ला जो मन्नी ले कने मिजो ला सियुदा ही प्यार करणा शुरू करी दे जदिया तू शुरूआत च किता था। अगर तू मन बदलगा नी, तां मैं तेरे बाल ओणा कने जिथू तेरा दिव्या रखया है उसयो ओथु ला हटाई करी तिजो सजा देणी। 6 पर मैं तिजो ला खुश भी है क्योंकि तू उना लोकां ला नफरत करदा है जडे नीकोलस दियां गल्लां मंदे न, तियां ही जियां मैं उना दे कम्मा ला नफरत करदा है। 7 हर कुसी जो जडा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है। सै लोक जडे बुरियां शक्तियां जो हरांदे न, उना जो मैं जिन्दगी देणेबाले स्खे ला फल खाणे दी इजाजत देणी जडा परमेश्वरे

दे स्वर्गे दे बगीचे च है। 8 स्मरना शेहरे दिया कलीसिया दे अगुवे जो ऐ लिख: मैं ही है जिनी सारियां चीजां जो शुरू कितया है, कने मैं ही सै है जिनी सारियां चीजां दा अंत करणा; चाहे मैं मरी गया था कने हण जिन्दा है कने हमेशा जिन्दा रेणा मैं तिजो ला ऐ बोलदा है; 9 मैं जाणदा है की तिजो दुख तकलीफ होए कने तू गरीब है। पर तू दिले ला अमीर है। मैं उना लोकां दे बारे च जाणदा है, जडे ऐ यकीन कने बोलदे न की सै परमेस्वरे दे चुणयो लोक न, मतलब यहदी लोक, पर हे नी न। सै तैरे बारे च बुरियां गल्लां बोलदे न, पर असलियत च सै शैताने दिया मंडलिया दे बंदे न। 10 उना दुखां ला मत डरा जडे तिजो मिलणे न। शैताने लोकां ला तुसां च कुछ लोकां जो गिरफ्तार करणा कने तुहांजो जेल कराई देणी ताकि सै तुहाड़ी परिक्षा करी सके। तुसां दस दिना दीकर बड़ियां मुरीबतां जो झेलणा। पर मिंजो पर भरोसा करणा कदी मत छडदे चाहे तुहांजो मरणा पोए, क्योंकि मैं तुहाडिया जिता तांई इनाम च हमेशा दी जिन्दगी देणी। 11 हर कुसी जो जडा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है: जडे लोक बुराई जो हराई करी जित हासिल करदे न, उना जो उसा दुज्जी मौत ला कोई नुकसान नी होणा, जालू परमेस्वरे आखरी न्याय करणा। 12 पिरगमुने शेहरे दिया कलीसिया दे अगुवे जो ऐ लिख: मैं ही है जिदे बाल तेज दोधारी तलवार है, मैं तुहांजो ला ऐ बोलदा है: 13 मैं जाणदा है, की तेरा शेहर शैताने दे काबू च है, पर इदे बावजूद भी मिंजो पर भरोसा करणा नी छडया कने मेरियां शिक्षां जो मनणा नी छडया। तू उस बकत भी भरोसा करणा नी छडया जालू उना अन्तिपास जो ओथू मारी दिता। सै मेरे बचना दा प्रचार करणे च भरोसे दे काबील था, इस तांई उसयो तेरे शेहरे च मारी दिता जडा शैताने दे काबू च है। 14 पर मिंजो तेरे बारे च कुछ शिकायतां न, क्योंकि तू उना गल्लां दा बिरोध नी करदा जडे झूठी शिक्षा दिन्दे न, जियां परमेस्वरे दा संदेश देणेबाले बिलामे बडे पहले दीतियां थियां। बिलामे राजा बालाक जो सिखाया की इस्त्राएल दे लोकां जो पाप करणे तांई उकसाणे तांई क्या करणा चाईदा। उनी उना जो मूर्तियां अग्रे चढाईयां चीजां जो खाणे कने व्यभिचार करणे तांई सिखाया। 15 तियां ही तुहाडे बिच कुछ लोक न जडे नीकुलइयां दे दलां दियां शिक्षां जो मंदे न। 16 इस तांई पाप करणा छडी दिया, अगर तू ऐसे कम्म करणा बंद नी करगा तां मैं जल्दी ही ओणा, कने उना लोकां दे खिलाफ उसा तलबारा ला लडना, जडी मेरे मुंए ला निकलदी है जडा मेरा बचन है। 17 हर कुसी जो जडा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है; सै लोक जडे बुराई जो हरादे न, मैं उना जो उस मन्ने च देणा जिसयो कुनी लुकाया है। मैं उना च हर इक जो इक चिट्ठा पथर देणा, जिस पर इक नोआ ना लिख्या होणा। जिस माणुए जो सै मिलगा उसयो छडी करी कोई भी उस नोए जो नी जाणी सकदा। 18 थुआतीरा शेहरे दिया कलीसिया दे अगुवे जो ऐ लिख: परमेस्वरे दे पुत्रे दिया तरफा ला ऐ संदेश है जियेयां हखी अग्गी दिया लौई सांई चमका दियां थियां, कने जिदे पैर पीतलू सांई चमका दे थे, जियां पीतलू जो भटिया च तपा दे होन, सै ऐ बोला दा है: 19 मैं तुहाडे कम्मा जो जाणदा है की तुसां इक दुज्जे ला प्यार करदे न कने

तुसां पक्का भरोसा करदे न। मैं जाणदा है की तुसां इक दुज्जे दी सहायता किती, कने तुहाड़ी सेहनशक्ति जो भी जाणदा है। मैं जाणदा है की तुसां हण पेहेले ला जादा भले कम्म करदे न जालू तुसां पेहेले मिंजो पर भरोसा किता था। 20 पर मिंजो तेरे बारे च कुछ शिकायतां न, राणी इजेबेल जडी बडी पेहेले रेंदी थी, उसा सांई इक जनानी तुहाडे बिच है। सै अपने आप जो परमेस्वरे दा संदेश देणेबाली बोलदी है पर मेरे चेलयां जो गलत शिक्षा दिन्दी है। सै मेरे दासां जो व्यभिचार करणे कने मूर्तियां अग्रे चढाईयां चीजां जो खाणे दी शिक्षा दिन्दी है। 21 मैं उसा जो अपने पापां ला पश्चात्ताप करणे दा मौका दिता है, पर सै उना बुरे कम्मा जो बंद करणे ला मना करदी है। 22 मैं उसा जो रोगी बणाई देणा। कने जडे उसा सोगी व्यभिचार करदे न, अगर सै भी उसा सांई पाप करणा नी छडगे तां मैं उना जो भी बडे दुखां च पाई देणा। 23 मैं उना लोकां जो मारी देणा है जडे उदिया शिक्षां जो मंदे न; तालू सारियां कलीसियां जो पता चली जाणा की मैं हर इक जणे दे बिचारां कने मकसदां जो परखदा। मैं तुहांजो सबना जो तुहाडे अपने कम्मा दे अनुसार इनाम देणा है। 24 पर थुआतीरा शेहरे च तुसां बाकी लोकां उसा झूठी शिक्षा जो नी मन्य्या। तुसां उना गल्लां च हिस्सा नी लिया जिसयो उदे चले शैताने दियां बडी जरूरी गल्लां बोलदे न। मैं तुहांजो बोलदा है, की मैं तुहाडे पर होर कोई जरूरी हुकम नी थोपणा, सिवाए इदे की जालू दीकर मैं नी आई जांदा तालू दीकर मिंजो पर पक्का भरोसा करदे रेनयो। 26 सै लोक जडे बुराईयां जो हराई दिन्दे न, कने संसारे दे अंत दिकर मेरे हुकम मंदे रेंदे न, मैं उना जो देशां पर राज्य करणे दा हक देणा। 27 मैं उना जो राज्य करणे दा सेई हक देणा जियां मेरे पिता मिंजो दिता है। उना दा राज्य लोए सांई मजबूत होणा जडा टूटदा नी है, उना दे दुशमणा टुटयो भांडया सांई होणा। 28 कने मैं उसयो अपनी जीत दसणे तांई ब्यागा दा तारा देणा। 29 हर कुसी जो जडा मेरे संदेश जो समझणा चांदा है, उसयो इसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है।

3 सरदीसे शेहरे दिया कलीसिया दे अगुवे जो लिख: ऐ संदेश उदिया तरफा ला है जिनी सत तरायां जो अपने हथां च रखया है कने जडा परमेस्वरे दियां सत आत्मा जो भेजदा है। सै ऐ बोलदा है, की मैं तेरे कम्मा जो जाणदा है: तू मिंजो च भरोसे दे लायक लगदा है, पर असल च तू मेरे हुकमा जो नी मंदा। 2 इस तांई साबधान होई जा, कने मिंजो पता लग्गा है की विश्वासी होणे दे नाते जेई जिन्दगी जिणे तांई परमेस्वरे बोलया है सियुदी जिन्दगी तुसां नी जिया दे न। इस तांई आत्मिक निद्रा ला जागी जा, कने जडे मसीह गुण तुहांजो च हण भी बचयो न उना जो नोए करा इसला पेहला की सै गायब होई जान। 3 इस तांई उसा शिक्षा जो याद कर, जडी तू बडे पेहेले सुणियो थी कने भरोसा किता था, कने जडा तिजो सिखाया था उसयो मन, कने गलत कम्मा जो छडी करी पापां जो मनी ले। अगर तू ऐसे गलत कम्म करणा नी छडदा है, तां मैं चोरी छुपे ओणा, जियां राती चोर ओंदा है, कने तू उस बकत जो नी जाणी सकदा जालू मैं तिजो सजा देणे तांई ओणा। 4 पर सरदीस च तुहाडे बिच कुछ ऐसे लोक न जिना पाप नी कितया है, जिना विश्वासी होणे दे नाते इक पबित्र जिन्दगी जि है। उना चिट्ठे कपडे पाई करी मेरे सोगी रेणा है,

क्योंकि सै भरोसे दे लायक न। 5 सै जडे जीत हासिल करदे न, उना जो भी उना साईं ही चिट्टे कपडे पहनाणे न। मै उना दे ना उसा कताबा ला कदी नी हटाणे न जिसा च परमेखरे उना लोकां दे ना लिखयो न जिना जो हमेशा दी जिनंदगी मिलणी। मै अपने पिता दे सामणे कने उदे स्वर्गदूतां दे सामणे ऐ घोषित करणा की सै मेरे न। 6 हर कुसी जो जडा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है। 7 फिलिदिलफिया शेहरे दिया कलीसिया दे अगुवां जो ऐ लिखः ऐ संदेश उदिया तरफा ला है जडा पबित्र कने सच्च है, सै जिदे बाल दाऊद दे राज्य दा अधिकार है। अगर सै दरबाजा खोलदा है, तां कोई भी उसयो बंद नी करी सकदा। अगर सै उसयो बंद करी दे, तां कोई भी उसयो खोली नी सकदा। मै तुसां जो ऐ बोलदा है की, 8 मै तेरे कम्मा जो अच्छे ला जाणदा है। मै जाणदा है की तिजो च थोड़ी ही ताकत है, पर फिर भी तू मेरियां बोलियां गल्लां पर भरोसा किता कने तू इसा गल्ला ला मना नी किता की तू मिजो पर भरोसा करदा है। इस ताईं मै तिजो ताईं इक दरबाजा खोलया है, जिसयो कोई बंद नी करी सकदा। 9 सै लोक जडे इक ऐसे झुंडे दे सदस्य न जडे शैताने ला रिशता रखदे न, कने बोलदे न की सै यहूदी न पर सै सच्चे यहूदी नी न कने सै झूठ बोलदे न। दिख मै ऐसा करणा है, की जिसला उना आई करी तेरे पैरां च पेई जाणा, कने उना जो पता लगी जाणा है की मै तिजो ला प्यार रखदा है। 10 तू मेरे संदेशे दा पालन किता ताकि जालू तू दुख झेले तां उसयो सबर रखीकरी सेहन करी सकन। इस बजा ला, मै तेरी परिक्षा दे बकत तेरी रक्षा करणी। जडी इस संसारे दे सारे लोकां पर ओणी है। 11 मै जल्दी ही ओणे बाला है; इस ताईं तिजो मिजो पर भरोसा करदे रेंणा चाईदा ताकि कोई भी तिजो तेरी जित दा इनाम लेंणा ला ना रोकी सके जडा मुकुटे साईं है। 12 सै जडे जीत हासिल करदे न, जियां इक खम्बा घरे जो मजबूत बणादा है, तियां ही उना भी हमेशा ताईं परमेखरे दे मंदरे च रेंणा। मै उदे पर मेरे परमेखरे दा नां लिखणा कने परमेखरे दे शेहर यरूशलेम दा ना लिखणा। कने ऐ सेई शेहर है जडा स्वर्ग च है, मतलब की मेरे परमेखरे दिया तरफा ला थले ओणा। मै उदे पर मेरा नोआ ना लिखणा। 13 हर कुसी जो जडा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है। 14 लौदीकिया शेहरे दिया कलीसिया दे अगुवे जो ऐ लिखः ऐ संदेश उदिया तरफा ला है जडा अमीन है। कने भरोसा दिया काबलियता ला परमेखरे दे बारे च सच्च जो प्रगट करदा है, कने मै सेई है जिदे जरिये परमेखरे सारियां चीजां जो बणाया है। 15 मै जाणदा है की तू क्या करदा है, तू कितणी मेहनत करदा है कने कदी हार नी मंदा। कने ना तां तू मिजो पर भरोसा करणे ला मना करा दा है कने ना ही मिजो पुरे मने ला प्यार करदा है। मै चांदा है की या तां तू मिजो मनणे ला मना करी दे या मिजो ला पुरे मने ला प्यार कर। 16 इस ताईं की तू मिजो पर भरोसा करणे ला मना करा दा है कने ना ही मिजो पुरे मने ला प्यार करदा है, क्योंकि तिजो मिजो पर अधा-अधुरा भरोसा है, इस ताईं मै तिजो पूरी तरह ला हटाणे ताईं तैयार है। 17 तू सोचदा है की तू अमीर है, कने तेरे बाल सै सब है जिदी तिजो जरूरत है, पर तू नी जाणदा की इदा सच्च ऐ है की, तिजो पर तरस ओणा चाईदा। क्योंकि

सच्च ऐ है की तू गरीब है, तेरे बाल कपडे नी न, कने तू अन्ना है। 18 इस ताईं मै तिजो सलाह दिन्दा है की तिजो मिजो ला शुद्ध सोना खरीदणा चाईदा ताकि तू सच्ची दा अमीर बणी सके। तिजो मिजो ला अपने पांणे ताईं चिट्टे कपडे भी खरीदणे चाईदे ताकि तेरा शरीर डक्की रे कने तू शर्मिंदा ना हो। कने तिजो अपनी हखी दा लाज करणे ताईं दवा भी मिजो ला खरीदणी चाईदी ताकि तू दिखी सके। 19 मै जिना-जिना ला भी प्यार करदा है, उना जो मै सिखांदा है कने सजा दिन्दा है ताकि सै खरे बणन। इस ताईं अच्छाई करणे च लगगी रिया, कने पापी कम्म करणा बंद करी दिया। 20 मै तुहाडे दिले च बसणे ताईं, मै उस बंदे साईं है जडा घरे बाहर खडोतया है कने दरबाजे जो खटखटा दा है। अगर तुसां मेरिया अबाजा जो सुणदे न कने मेरे ताईं अपना दिल खोलदे न तां मै अंदर ओणा कने असां इक दुज्जे सोगी संगती करणी। 21 सै जडे जीत हासिल करदे न, उसयो मै अपने सोगी उदे सिंहासने पर बांणे दा हक देणा। ऐ बिलकुल मेरे साईं ही होणा, जियां मै जित हासिल कितियो हो कने अपने पिता दे बखे आसन मिलया हो। 22 हर कुसी जो जडा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है।

4 मै इना सारियां गल्लां जो दिखणे बाद स्वर्ग च खुलया दरबाजा दिखया। कने कोई मिजो सोगी गल्लां करा दा था कने गल्लां करणे बाला सेई था जिसयो मै पेहले भी सुणया था, जिदी अबाज तुरही जो बजाणे दिया अबाजा साईं थी। कने उनी मिजो बोलया, “मेरे बाल ऐथू उपर आई जा; कने मै सै गल्लां तिजो दसणियां न, जिना दा इना गल्लां बाद पूरा होणा जरूरी है।” 2 तालू ही झट परमेखरे दी आत्मा मिजो पर आई, “कने मै स्वर्ग च इक सिंहासन दिखया कने उस सिंहासने पर कुसी जो बैठया दिखया।” 3 जडा उस पर बैठया था, उदा चेहरा बेशकीमती अनमोल पथरे साईं चमकदा था जिसयो यशब कने लाल कीमती पथर बोलदे न। कने उदे सिंहासने दे चारो पासे इक इन्द्रधनुष था, जडे सेले कीमती पथरे साईं मिल्ला दा था। 4 उस सिंहासने दे चारो पासे होर चोबी सिंहासन थे; कने इना सिंहासना पर चोबी अगुवे चिट्टे कपडे पायी करी बैठयो थे, कने उना दे सिरां पर सोने दे मुकुट थे। 5 उस सिंहासने ला बिजली कने गडाकयां दी अबाज निकला दी थी कने सिंहासने दे सामणे अग्नी दे सत दिये बलयो थे, कने जडियां परमेखरे दियां सत आत्मा थियां, 6 कने उस सिंहासने सामणे इक फर्श था जडा समुंद्रे साईं चौडा था कने शिशे साईं साफ था। कने सै सिंहासन उना सबना दे बिच था कने उदे चारो पासे चार जिन्दे प्राणी दिखे, जिना दे पुरे शरीर हखी ला डकुयो थे। 7 उना चारां जिन्दे प्राणिया चे प्राणी शेरे साईं मिल्ला दा था, कने दुज्जा प्राणी बछडे साईं था, तिजे प्राणिये दा मुं माणुऐ साईं था, कने चौथे दा उडदे बाजे साईं था। 8 कने उना चारां जिन्दे प्राणियां दे छे-छे फंग थे, कने उना दे शरीर पर हखी थियां, ऐथू दीकर की उना दे फंगा हेठ भी; कने सै रात-दिन बिना अराम कितयो ऐ बोलदे रेंदे थे, “पबित्र, पबित्र, पबित्र प्रभु परमेखर, सारयां ला शक्तिशाली, जडा बकत दिया शुरूआत ला लेईकरी हुणे दीकर कने हमेशा ताईं नी बदलदा कने जडा ओणे बाला है।” 9 जडा सिंहासने पर बैठया है, कने सै सेई है जडा हमेशा-हमेशा दीकर जिन्दा रेंदा है, जालू भी सै जिन्दा

प्राणी उसयो आदर कने धन्यावाद दिन्दे न। तां सै चौबी अगुवे जडे सिहासने पर बैठयो न, उदे सामणे झुकी जांदे न कने उदी अराधना करदे न। सै ऐ बोली करी सिहांसने दे सामणे अपणे-अपणे मुकुटां जो रखी दिन्दे थे। (aiōn g165) 11 ऐ साडे प्रभु परमेश्वर, तू सारियां चीजां जो बनाया है, तेरिया इच्छा अनुसार सै बनाईयां न। इसा बजा ला तुसां महिमा कने आदर कने शक्ति देणे दे काबिल है।

5 जडा सिहासने पर बैठया था, मैं उदे सजे हथे च इक कताब दिखी, कने सै कताब दोनो पासयां ला लिखियो थी, कने सै सत्त मुहरां लाई के बंद कितियो थी। 2 फिरी मैं इक शक्तिशाली स्वर्गदूते जो दिखया कने सै जौरे-जौरे ला ऐ प्रचार करा दा था की, “इसा कताबा जो खोलने दे कने इसा दियां मोहरां जो तोड़ने दे काबील कुण है?” 3 पर ना तां स्वर्ग च, ना ही धरती पर, ना ही धरतिया दे थले चे कोई इसा कताबा जो खोलणे कने उसा जो पढ़ने दे काबिल निकलया। 4 तालू मैं बडे जौरे-जौरे ला रोया, क्योंकि उसा कताबा जो खोलणे बाला कने नां ही कोई पढ़ने दे काबिल है। 5 इसा गल्ला पर उना अगुवां चे इकी मिंजो ला बोलया, “मत रो; दिख, सै जिसयो यहदा दे गोत्रे दा शेर बोलदे न, कने जडा राजा दाऊदे दा बंशज है, उनी उसा कताबा जो खोलणा कने सै उसा दियां मोहरां जो तोड़ी सकदा है, उनी शैताने जो हराई दिता।” 6 तालू मैं उस सिहासने कने चारों जिन्दे प्राणियां कने उना चौबी अगुवां दे बिच इक छेलुये जो खडोतयो दिखया था। कने उस छेलुये दे शरीर पर ऐसे निशाण थे की उसयो मारी दितया था। उदे सत्त सिंग कने सत्त हखी थियां; ऐ परमेश्वर दियां सत्त आत्मा न, जडियां सारिया धरतिया पर भेजियां न। 7 उनी छेलुऐ आईके उदे सजे हथे ला कताब लेई ली, जडा सिहासने पर बैठया था। 8 जालू उनी कताब लेई ली, तां सै चारों जिन्दे प्राणी कने चौबी अगुवे उस छेलुये अगो पेई गे; कने हर इकी अगुवे हथे च वीणा कने धूपे ने भस्म्या सोने दा कटोरा लिया था, उस धूपे दी खुशबु उना लोकां दी प्राथना दा निशाण है जडे परमेश्वरे दे सेवक न। 9 कने सै ऐ नोआ गीत गाणा लगे, तू इसा कताबा जो खोलणे कने इदिया मोहरां जो खोलणे दे काबील है; क्योंकि उना तेरी बलि दिती कने तू अपणे खूने ला हर इक कुले, भाषा, लोकां, कने जातियां चे परमेश्वरे तांई लोकां जो खरीदी लिया। 10 कने तू उना जो ऐसे लोक बनाई दितया है जिना पर साडा परमेश्वर राज करदा है कने याजक बनाया जडे उदी सेबा करदे न, कने उना धरतिया पर राज करणा। 11 जालू मैं फिरी दिखया, तां मैं अचानक उस सिहासने कने उना जिन्दे प्राणियां कने चौबी अगुवां दे चारो पासे ला स्वर्गदूतां दियां अबाजा सुणियां, जिना दी गिणती नी करी सकदे थे। 12 कने सै जौरे ला गांदे दे थे, “धन्य है, सै छेलू जिसयो मारी दितया था, सै महिमा दे काबिल है। उदा अधिकार महान है। उदा ज्ञान गेहरा है। सै बडा शक्तिशाली है कने बडा अमीर है। ओआ असां उदा आदर करन। ओआ असां उदी स्तुति करन।” 13 फिरी मैं स्वर्ग च, कने धरतिया पर, कने धरतिया दे थले, कने समुन्द्रे दियां बनाईयां सारियां चीजा जो, कने सै सब केसी जो जडा उना चे है, उना जो ऐ बोलदे सुणया, “की ओआ असां उदी स्तुति करन जडा सिहासने पर बैठया है। ओआ असां हमेशा तांई छेलुये दी महिमा करन कने उसयो आदर देन क्योंकि सै सारयां ला

जडा शक्तिशाली है।” (aiōn g165) 14 कने चारों जिन्दे प्राणियां, “आमीन” बोलया, कने सै अगुवे झुकी करी उदी अराधना करणा लगे।

6 फिरी मैं दिखया की छेलुये उना सत्तां मुहरां चे इकी जो खोलया; कने मैं चारों जिन्दे प्राणियां चे इकी जो पुकारदे सुणया। उदी अबाज गडक्यां सांई तेज थी। उनी बोलया, “हुण जा, अगो बदा।” 2 तालू ही मिंजो इक चिट्टा घोडा मिल्ला, कने उदे पर सवार होयो माणुऐ धनुष लिया था; कने उसयो इक मुकुट भी दितया था, कने सै इक विजेता सांई जित हासिल करणा निकलया कने दुबारा ला उनी ही जितणा। 3 जालू छेलुये दुज्जी मोहर खोली, तां मैं दुज्जे जिन्दे प्राणिए जो ऐ बोलदे होऐ सुणया, “हुण जा, अगो बदा।” 4 फिरी इक चमकदार लाल घोडा उसा जगा ला बार आया जिथू सिहांसन रख्या है। परमेश्वरे उस पर बैठयो जो धरती दे लोकां जो अपु चे लडाणे दी शक्ति दिती, ताकि सै लडाईया दे बकत इक दुज्जे जो मारी देंन। इस कम्मे तांई परमेश्वरे इस सवारे जो इक बड़ी तलबार भी दितियो थी। 5 जालू छेलुये तिजी मोहर खोली, तां तिजे जिन्दे प्राणिए जो ऐ बोलदे होऐ सुणया, “हुण जा, अगो बदा।” कने तालू मैं दिखया की इक काला घोडा बाहर आया है कने उस पर सवार बंदे दे हथे च इक तरकडी थी। 6 कने मैं सुणया की उना चारों जिन्दे प्राणिया चे कोई बोला दा था, ऐ माणुऐ सांई अबाज थी की, “ओणे बाले दिना च धरतिया पर अकाल पोंणा। इस तांई इक किलो कणक कने तिन किलो जौं दी कीमत पुरे इक दिने दिया ध्याडिया बराबर होंणी। पर तेले कने अंगरा दे रस्सां दी कीमत नी बदलणी।” 7 जालू छेलुये चौथी मोहर खोली तां मैं चौथे जिन्दे प्राणिए जो ऐ बोलदे सुणया, “हुण जा, अगो बदा।” 8 तालू मैं फीका पिया हरे रंगे दा घोडा दिखया; कने उस पर सवार बंदे दा नां मौत था; कने अधोलोक उदे पिच्छे-पिच्छे ओआ दा था। कने उसयो धरतिया पर रेणेबाले इक चौथाई लोकां जो मारणे दा हक है। उनी उना जो भूखा ला, उना जो बुरियां-बुरियां बिमारियां जो, कने उना जंगली जानवरं ला मारी दिता। (Hadēs g86) 9 जालू छेलुये पंजमी मोहर खोली, तां मैं वेदिया दे थल्ले उना लोकां दिया आत्मा थियां जिना जो मारी दितया था क्योंकि उना परमेश्वरे दे बचना दा प्रचार कितया था कने प्रभु यीशु पर भरोसा करणे ला पिच्छे नी हटे की यीशु उना दा प्रभु है। 10 कने उना जौरे ला पुकारी करी परमेश्वरे ला बोलया, “हे पबित्र कने सच्चे परमेश्वर; तू धरतिया पर रेणेबाले उना बुरे लोकां जो सजा देणे च इतणा लम्बा इंतजार कजो करदा है?” असां बिनती करदे न की तू उना लोकां दे व्यवहारे जो बदला ले जिना सांझो मारी दितया था। 11 कने उना चे हर इकी जो चिट्टे कपडे दितयो। कने परमेश्वरे उना जो बोलया, “हुणे तांई अराम करा, क्योंकि हल्ले भी कुछ सोगी कम्म करणे बाले कने तुहाडे साथी मसीह भाई न, जिना जो तुहाडे सांई मारी देणा है। जालू दीकर तुहाडे मसीह साथियां दे मरणे दी संख्या पूरी होई जांगी, तालू ही मैं बदला लेंणा।” 12 जालू मैं उसयो छेमी मोहर खोलदे दिखया, तां मैं दिखया की इक बडा बडा हिलण होया, कने सूरज दा रंग काले कम्बले सांई काला होई गया कने पूरे चन्द्रमे दा रंग खूने सांई लाल होई गया। 13 कने अम्बरे दे तारे धरतिया पर इयां पेई गे जियां तूफाने ला सखे ला कच्चे फल पेई जांदे न। 14 अम्बर उस कागजे सांई गायब होई गया जिसयो लपेटी दितया

हो कने सारे पाड कने समुंद्रे के सारे टापूआं अपनी जगा बदली दिती। 15 इदा नतीजा ऐ होया की, तालू धरतिया दे राजे, कने प्रधान, कने सरदार, कने अमीर कने सामर्थी लोक, कने हर इक सेवक, कने जडे गुलाम नी न, सारे पाडां दियां गुफां च कने पथरां थल्ले जाई लुकयो न; 16 कने पाडां कने पथरां ला बोलणा लग्गे, “साडे पर पेई जा; कने सांझो उसला बचाई लिया जडा सिंहासने पर बैठया है कने छेलुऐ दिया सजा ला बचाई लिया।” 17 क्योंकि सै भयानक दिन आई गया है जालू परमेख्वरे कने छेलुऐ सारयां जो सजा देंगी कने कोई भी इसा सजा ला नी बची सकदा।

7 इदे बाद मैं धरतिया दे चारों कुणा च चार स्वर्गदूतां जो खडोतया दिखया। कने उना स्वर्गदूतां जो परमेख्वरे हक दितया है की सै संसारे दे लोकां जो दुख परेशानिया च पाई करी उना दा नुक्सान करन, चाहे सै धरती च होन या समुंदर च। उना संसारे दे चारो कुण्यां ला होआ जो रोकी दिता, ताकि समुंद्रे च धरती च या बणे च होआ ना चले। मैं इक होर स्वर्गदूते जो पूर्व दिशा पास्से ला प्रगत होंदे दिखया, उदे बाल जिंदे परमेख्वरे दी मोहर थी। उनी स्वर्गदूते उच्चिया अबाजा ला उना चार स्वर्गदूतां जो पुकारी करी बोलया; 3 “जालू दीकर असां अपने परमेख्वरे दे सेवकां दे मथयां च मोहर नी लागे, तालू दीकर धरती कने समुन्द्र कने सखां दा नाश मत करदे, ताकि सै उना दुख परेशानिया च नी पोंन।” 4 जालू स्वर्गदूतां मोहर लागे दा कम्म पूरा करी लिया। तां कुनी मिजो दसया की सै लोक जिना दे मथे पर स्वर्गदूतां परमेख्वरे दी मोहरा दा निशाण लाया है, उना दी गिणती 1,44000 थी। ऐ लोक इस्त्राएल दे बारां गोत्रां च थे: 5 स्वर्गदूतां यहूदा दे गोत्रां च बारह हजार पर परमेख्वरे दी मोहर लाई, खेने दे गोत्रे चे बारा हजार पर, गाद दे गोत्रे च भी बारा हजार, 6 आशेर दे गोत्रे च भी बारा हजार, नप्ताली दे गोत्रे च भी बारा हजार; मनश्शे दे गोत्रे च भी बारा हजार, 7 शमौने दे गोत्रे च बारा हजार पर, लेवी दे गोत्रे चे बारा हजार पर, इस्राकार दे गोत्रे च बारा हजार, 8 जबलूने दे गोत्रे च बारा हजार, यूसुफे दे गोत्रे चे बारा हजार, कने बिन्यामीन दे गोत्रे चे बारा हजार पर मोहर दिती है। 9 इदे बाद मैं दिखया की लोकां दी इक इतणी बडी भीड थी की कोई भी उना सारयां जो गिणी नी सकदा था। सै संसारे दिया हर इक जाति, कने कुल, भाषा च थे। सै सारे सिंहासने कने छेलुऐ सामणे खडोतयो थे। उना चिट्टे कपडे पायो थे कने उना सारयां हथे च खजूरी दियां डालियां पकड़ियां थियां कने जडा इक त्योहारे दा प्रतीक है; 10 कने जोरे ला पुकारी करी बोला दे थे, “साडे परमेख्वरे दी स्तुति हो, जडा सिंहासने पर बैठया है, कने छेलुऐ दी जै-जै कार करा! सिर्फ तू ही है जडा उद्धार करदा है।” 11 कने सारे स्वर्गदूत, उस सिंहासने दे चारो पासे कने अगुवां दे कने चारों जिन्दे प्राणिनां दे चारों पासे खडोतयो थे। फिरी सै सिंहासने दे अग्रे दण्डवत होई गे कने उना परमेख्वरे दी अराधना किती। 12 “आमीन, असां हमेशा तेरी महिमा करदे न, तिजो धन्यवाद कने इज्जत दिन्दे न! असां मंदे न कने तू ज्ञानवान, कने शक्तिशाली है, जडा हमेशा ताई सारे कम्मा जो करणे दे काबिल है! परमेख्वरे दा धन्यावाद कने महिमा करदे न।” (aiōn g165) 13 उना चे इकी अगुवे मिजो ला पुच्छया, “ऐ जिना चिट्टे कपडे पायो थे सै कुण है? कने कुथु ला आयो न?” 14 मैं उसयो बोलया, “हे मालिक, मैं नी जाणदा पर तू जाणदा

है।” उनी मिजो बोलया, “ऐ सै लोक न जिना बडा दुख झेलया है। उना अपने कपडयां जो छेलुऐ दे खूने ला धोई लिया है कने हुण सै चिट्टे होई गियो न, इदा मतलब ऐ है की उना दे पाप मिटाई दितयो न।” 15 इसा ही बजा ला सै परमेख्वरे दे सामणे खडोतयो न, कने हर बकत दिन रात परमेख्वरे दे घरे च उदी सेवा करदे न। कने सै जडा सिंहासने पर बैठया है, उनी उना बिच रेणा कने उना दी रक्षा करणी। 16 “उना फिरी भूखे कने प्यासे नी होणा; कने ना ही सूरजे उना जो धुपा ला जलाणा कने ना ही गर्मियां ला उना जो जलन होणी। 17 क्योंकि छेलू जडा सिंहासने बिच है, उनी उना दी देखभाल करणी, तियां ही जियां इक पुआल अपणियां भेडां दी देखभाल करदा है कने उनी उना जो ताजा पाणिए बाल लेई जाणा जडा लोकां जो जिन्दगी दिन्दा है कने परमेख्वरे उना दिया हखी ला सारे आंसू पूंजी देणे।”

8 जालू छेलुऐ सतमी मोहर खोली, तां सै सारे जडे स्वर्ग च थे अथे घटे ताई शांत होई गे। 2 तालू मैं उना सतां स्वर्गदूतां जो दिखया जडे परमेख्वरे दे सामणे खडोतयो रेंदे न, कने उना जो सत तुरहियां दितियां। 3 फिरी ओथु ला, इक होर स्वर्गदूत सोने दा इक धूपदान लेई करी आया कने वेदिया बखे खडोई गिया। कने उसयो सारयां लोकां दियां प्राथना समेत बालने ताई बडा भरी धुप दिता। उनी धूप कने प्राथना जो उस सोने दिया बेदिया उपर बाली दिता, जडी परमेख्वरे दे सिंहासने दे सामणे है। 4 जालू उनी ऐसा किता, तां धूपे दा धुआं पबित्र लोकां दियां प्राथना समेत स्वर्गदूते दे हथे ला उठी करी परमेख्वरे दे सामणे गिया। 5 तालू स्वर्गदूते धूपदाने जो वेदिया दिया अग्गी चे अंगारे भरी दिते, कने धरतिया पर फेंकी दिते, कने फिरी गडाके, बिजली, कने अबाजां, कने हिलण होणा लग्गे। 6 कने सै सतां स्वर्गदूत जिना बाल सत तुरहियां थियां उना जो बजाणे ताई तैयार होऐ। 7 पेहले स्वर्गदूते तुरही बजाई कने खूने ला मिलयो ओले कने अग्ग पैदा होई, कने धरतिया पर पेई गे। इसा बजा ला धरतिया दा इक तिहाई हिस्सा फकोई गिया, कने सखां दी इक तिहाई भी फकोई गे, कने सारा सेला घा भी फकोई गिया। 8 दुज्जे स्वर्गदूते तुरही बजाई, तां इक अग्ग लागयो बडे बड़े पाडे सांई कोई चीज समुंदरे च पेई गेई, कने इसा बजा ला समुंदर भी इक तिहाई हिस्सा खूने सांई होई गिया, 9 कने समुंदरे च रेणेबाले इक तिहाई प्राणी मरी गे। इसला समुंद्रे दे इक तिहाई जाज खत्म होई गे। 10 तीजे स्वर्गदूते तुरही बजाई, कने इक बडा बडा तारा मशाला सांई बलया होया स्वर्ग ला टूटया, कने नदियां दे इक तिहाई हिस्से पर, कने ताजा पाणिए दे तलाबां पर जाई पिया। 11 उस तारे दा नां कौडा है। इदिया बजा ला सै सारा इक तिहाई पाणी कौडा कने जरिला होई गिया, कने उस पाणिए जो पीणे बालयां दी मौत होई गेई। 12 चौथे स्वर्गदूते तुरही बजाई, तां सूरजे दा इक तिहाई, चन्द्रमे दा इक तिहाई कने तारयां दे इक तिहाई पर कोई चीज टकराई, इसा बजा ला दिने दे इक तिहाई बकते दीकर सूरज नी चमकया कने चन्द्रमा कने तारे राती दे इक तिहाई बकते दीकर नी चमके। 13 जालू मैं फिरी दिखया, तां अम्बरे च इक बाजे जो बडे उच्चा उडदे दिखया कने जोरे ला ऐ बोलदे सुणया की, “जालू आखरी तिन्ना स्वर्गदूतां उना तुरही जो बजाणा जडियां उना जो दितियां न, तालू संसारे पर ओणे बालियां मुसीबां बडियां भयानक न। धरतिया पर रेणे बालयां पर, हाय, हाय, हाय।”

9 जालू पंजमे स्वर्गदूते तुरही बजाई, तां मैं स्वर्गे ला धरतिया पर इक तारा पोंदा दिखया, कने उसयो अथाह कुंडे दी चाबी दितियो थी। (Abyssos g12) 2 उनी अथाह कुंडे जो खोलया, कने कुंडे ला बड़ी बडिया भटिया साईं धुंआ निकलया, कने कुंडे दे धुएँ ला सूरज कने बाताबरन काला होई गया। (Abyssos g12) 3 उस धुएँ च धरतिया पर टिड्डियां निकलियौं, कने उना जो बिछुआं साईं लोकां जो डंग मारणे दी शक्तियाँ दितियां थियां। 4 जियां कुसी जो बिच्छुएँ दे डंग मारणे ला पीड होंदी है, तियां ही इना टिड्डियां जो पंज मिने दीकर उना दा नुकसान करणे दा हुकम दितया है जिना दे मथे पर परमेश्वर दिया मोहरा दा निशान नी था। पर उना जो ना तां धरती दे घा जो, ना कुसी बूटे जो कने ना कुसी स्वे दा नुकसान करणा था। 6 उना पंज मिनयां च लोकां मरणे दे तरीके तोपणे न, पर उना मरी नी सकणा है। उना जो मरणे दी इच्छा होणी, पर उना ला मरी नी होणा। 7 ऐ टिड्डियां दिखणे च लडाईया ताईं तैयार घोडयां साईं लगदियां थियां, कने उना अपने सिरां पर सोने दे मुकुट साईं कुछ पाया था। कने उना दे मुह माणुआं साईं थे। 8 कने उना दे बाल जनानिया दे बालां साईं लम्बे थे। कने उना दे दंद शेर दे दंदा साईं पक्के थे। 9 उना अपणिया छातिया पर लोहे दा कवच पाया था। जालू सै उडदे थे, तां सै सियुदी अबाज करदे थे, जियां मते घोड़े लडाईया च जाणे बाले रथां जो खिचदे बेले करदे न। 10 उना दियां बिछुआं साईं पंछा कने डंग थे। कने उना दिया पंछा च डंक थे, कने उना जो पंज मिने दीकर माणुएँ जो दुख देणे दी शक्ति मिलियो थी। 11 इक राजा है जडा उना जो काबू करदा है। सै सेई शैताने दा दूत है जिनी अथाह कुंडे जो खोलया था, उदा ना इब्रानी भाषा च अबद्रोन है, कने यूनानी भाषा च अपुल्लियोन है, जिदा मतलब है की सै जडा नाश करदा है। (Abyssos g12) 12 पंज मिने बाद सै मुसीबत खत्म होई जाणी। पर इदे बाद भी होर दो मुसीबतां ओणे बालियां न। 13 इदे बाद जालू छेमे स्वर्गदूते अपनी तुरही बजाई। जालू उनी उसयो बजाया तां मैं परमेश्वर दे सामणे धूप बोलने बालिया वेदिया दे चोरो कुणा ला इक अबाज सुणोई, 14 उना अबाज छेमे स्वर्गदूते ला बोलया, “उना चार शैताने दे दूतां जो खोली दे जडे फराता नाए दिया खड्डा दे बखे बनयो न।” 15 इस ताईं तालू सै चारों शैताने दे दूत खोली दिते। सै पेहले ला ही तैयार थे कने उना जो बोलया था की इस मिने, इस दिन, इस साल ताईं इंतजार करा कने हुण ऐ बकत आई गया था। उना जो संसारे दे इक हिस्सा लोकां जो मारणा था। 16 ओथु घोड़े पर सवार सेनिका दी फौज गिठी होई, जिना दी गिणती मैं 20 करोड सुणी। 17 सै घोड़े कने उना दे सवार जिना जो मैं दर्शन च दिखया, सै उना दे रक्षा करणे बाले कवच अम्गी साईं लाल, गाड़ी नीली कने गंधक साईं पिली थी। घोडयां दे सिर शेरं दे सिरा साईं लगदे थे, उदे मुएँ ला अग्ग, धुंआ कने गंधक निकला दे थे। 18 इना उना मुसीबतां ला, जडियां घोडयां दे मुआं ला निकलने बाली अग्ग, धुंआ, कने गन्धक थी, इना ला इक तिहाई लोक मारी दिते। 19 पर उना घोडयां बाल लोकां जो मारणे ताईं दो लग चीजां थियां, पेली तां सै उना दे मुएँ ला निकलदी थी, दुज्जी उना दिया पुछां च थी। क्योंकि उना दियां पंछा सप्पां साईं थियां, कने उना च लोकां जो कटणे ताईं सिर थे। 20 पर बाकी लोक जडे उना मुसीबतां ला पेहले नी मरयो थे, उना हल्ले भी अपने

बुरे कम्म करणा नी छडे। उना हत्या करणा, टूणा-टोटका, नाजायज रिश्ते, चोरी करणा नी छडया। उना बुरियां आत्मा कने अपने हथां ला बणियां चीजां दियां पूजा करणा भी नी छडया, जियां की सोने या चांदी या पितल या पत्थर या लकडिया ला बणियां मूर्तियां, जडियां ना तां दिखी सकदियां, कने ना सुणदियां, कने ना ही चलदियां न।

10 फिरी मैं इक होर शक्तिशाली स्वर्गदूते जो स्वर्गे ला उतरदे दिखया कने इक बदल उदे चारो पासे था। कने इक इन्द्रधनुष उदे सिर चारो पासे था, कने उदा मुं सूरजे साईं चमकदा था कने उदियां जंगा अग्गी दे बलदे खम्बयां साईं थियां। 2 उदा सज्जा पैर समुंद्रे पर रखया, कने उदा खबा पैर जमिना पर रखया। उदे हथे च इक छोटा दिया कागज था। 3 उनी स्वर्गदूते जोरे ला पुकारया कने उदी अबाज शेर दे गर्जणे साईं थी। जालू सै चीखया, तां सत तेज अबाजां उसयो जबाब दिता, जडी गडाकया दिया अबाजा साईं थियां। 4 जालू सत्तो गर्जणे दियां अबाजां बंद होई गियां, तां मैं जडा सुणया उसयो लिखणा लग्गा, पर मैं स्वर्गे ला ऐ अबाज सुणी, “जडियां सत गल्लां तू गर्जणे ने सुणियां न, उना जो छुपाई रख कने लिख मत।” 5 जिस स्वर्गदूते जो मैं दिखया था, सै समुंदरे कने धरतिया पर खडोतयो था, उनी अपना सज्जा हथ कसम खाणे ताईं स्वर्गे पासे चुकया। 6 कने जडा हमेशा-हमेशा दीकर जिन्दा रेंदा है, जिनी स्वर्ग, धरती कने समुंद्रे कने उना च रेणे बालियां सारियां चीजां जो बणाया है, उदे नाए दी कसम खाई करी उनी बोलया की, “हुण कुसी भी गल्ला ताईं होर जादा इंतजार नी करणा पोंणा। हुण सै सारियां पुरियां होई जाणियां।” (aion g165) 7 सतमें स्वर्गदूते जो तुरही बजाणे दे दिनां च, जालू उनी तुरही बजाणी है, तालू उनी जल्दी कम्म करणा है, उनी अपणिया गुप्त योजना जो पूरा करणा, जियां की उनी अपने सेबक परमेश्वर दे संदेश देणेबालयां जो इदा शुभसमाचार दितया था। 8 तालू मैं फिरी सै अबाज सुणी जिनी स्वर्गे च मिंजो ला गल्ल किती थी। अबाजा मिंजो ला बोलया, “जा, उसा छोटिया दिया कताबा जो लेई ले जडी स्वर्गदूते दे हथे खुलियो है जडा स्वर्गदूत समुंदर कने धरतिया पर खडोतया है।” 9 मैं स्वर्गदूते बाल जाई करी बोलया, “ऐ छोटी देई कताब देई दे।” कने उनी मिंजो ला बोलया, “ले इसयो खाई ले; इसा दा स्वाद तां मखिरे साईं मीठा है,” पर बादे च इदिया बजा ला तैरे पेटे च तकलीफ होणी। इस ताईं मैं सै कताब लेई लि जडी स्वर्गदूते पकडियो थी कने खाई लेई कने सच्ची इदा स्वाद शेहदे साईं मीठा था, पर जालू मैं इसयो निगली लिया, तां मेरा पेट दुखणा लग्गा। 11 तालू मिंजो ला ऐ बोलया, “लग-लग झुंडा कने देशां कने लग-लग भाषा बोलणे बालयां लोकां जो कने राजयां जो इक बरी फिरी ला दरस, जडा परमेश्वर तिजो बोलणे ताईं बोलदा है।”

11 फिरी मिंजो नापणे ताईं इक सोटी दिती कने परमेश्वर मिंजो बोलया, “उठ, जा कने मेरे मंदरे कने वेदिया दा नाप ले, कने उना लोकां दी गिणती कर जडे ओथु मेरी आराधना करा दे न।” 2 पर मंदरे दे बाहरे दे अंगणे जो मत नाप; उसयो रेणी दे क्योंकि सै लोक जडे परमेश्वर जो नी जाणदे उना जो दितया है, कने उना पबित्र शहर यरूशलेम जो बयाली मिनयां दीकर

बरबाद करते हैं। 3 “कने मैं अपने दो गबाहां जो ऐ हक देणा की सै टाट ओढी करी इक हजार दो सो सठ दिनां दीकर भविष्यवाणी करना।” 4 ऐ सेई दो जैतून खूब कने दो दिये न जडे धरतिया दे प्रभुऐ दे सामणे खडोतया न। 5 कने अगर कोई उना दा कोई नुकसान करणा चांदा है, तां उदे मुऐ ला अग्न निकलदी है कने उना दे दुश्मणा जो भस्म करी दीदी है, कने अगर कोई उना जो नुकसान करणा चांगा, तां सै पक्का इसी तरीके ला मारी देणा। 6 उना जो हक है की अम्बरे जो बंद करन, ताकि उना दी भविष्यवाणियां दे दिनां च कोई बरखा ना हो; कने उना जो सारे पाणिऐ पर हक है, की उसयो खून बणान, कने जालू-जालू सै चांगे तालू-तालू सै धरतिया पर मुसीबतां जो लेई ओन। 7 जालू उना दो गबां परमेस्वरे दे संदेशे दा प्रचार करी बौणा है, तालू सै जंगली जानवर जडा अथाह कुंडे ला निकलना है, उनी दो लोकां सोगी लडणा, कने उना जो हराई देणा कने मारी देणा। (Abyssos g12) 8 कने उना दियां लाशां बडे शहर यरूशलेमे दियां सडकां पर रेंगियां न, जिथू उना दा प्रभु भी सूली पर चढाया था। इस शहरे जो निशाण दे स्पे च सदोम कने मिस्र देश बोलदे न। क्योंकि इस शहरे दे लोक सदोम कने मिस्र देशे दे रेणे बालयां लोकां सांई बडे बुरे थे। 9 कने सारे लोक, कने कुल, कने भाषा, कने जातियां सारे लोकां उना जो साढे तिन दिनां दीकर दिखदे रेंगा है, पर उना कुसी दिया भी लाशां जो दफनाणा नी देणा है। 10 कने इस संसारे दे लोकां उना दे मरणे पर खुश होणा कने मगन होणा कने इक दुज्जे जो तोफे भेजणे न, क्योंकि इना दोनो परमेस्वरे दे संदेश देणेबालयां संसारे दे लोकां जो दुखी कितया था। 11 पर साढे तिन दिनां दे बाद परमेस्वरे उना च अपना सा पाया कने सै जिन्दे होई गे, कने सै खडोई गे, कने जिना लोकां उना जो दुबारा ला जिन्दे दिखया, सै डरी गे। 12 इदे बाद उना दो लोकां स्वर्ग ला इक बदे जो बोलदे सुणया, जिनी उना जो जेरे ला पुकारया कने बोलया, “ऐथू उपर ओआ।” जालू दुश्मण दिखा दे थे, तालू सै इक बदले ला डकुई करी स्वर्ग जो चली गे। 13 फिरी तालू ही यरूशलेम शहरे च इक बडा बडा हिलण होया, कने शहरे दियां इमारतां दा दसमां हिस्सा पेई गया, कने उस हिलणे ला सत जार लोक मरी गे कने जडे लोक बची गियो थे, सै डरे ला रौणा लगे कने उस परमेस्वरे दी महिमा करणा लगे जडा स्वर्ग च है। 14 ऐ दुज्जिया मुसीबता दा खात्मा था; पर हल्ले इक होर है जडी तोल्ली औणे बाली है। 15 जालू सतमे स्वर्गदूते तुरही बजाई, तां मैं स्वर्ग ला तेज अबाजां जो पुकारदे सुणया: “संसारे च हण होर कोई नी है जडा राज करे, सिर्फ साडा परमेस्वर कने उदा चुणया मसीहे राज करणा कने उनी हमेशा तांई राज करणा।” (aion g165) 16 कने चौबियां अंगुवां जडे परमेस्वरे सामणे अपने-अपने सिंहासने पर बैठयो थे, उना परमेस्वरे अगे दण्डवत करिरी, 17 ऐ बोलणा लगे, “हे सारयां ला शक्तिशाली प्रभु परमेस्वर, कने तू सेई परमेस्वर है, जडा बकत दी शुरूआत ला लेई करी हणे दीकर कने हमेशा तांई नी बदलदा, असां सच्ची तेरा धन्यावाद करते न, क्योंकि तू हण अपनी महान सामर्थ्य दस्सी कने हण तू धरती पर अपना राज्य शुरू करी दिता है। 18 कने जीना देशां दे लोक तिजो पर भरोसा नी करते सै बडे गुस्सा न, कने बकत आई गया है की तू अपना गुस्सा दस्से कने उना सारयां दा न्याय करणे दा बकत आई गया है जडे मरी गियो न। कने

हण सै बकत भी है जालू तू उना परमेस्वरे दा संदेश देणेबालयां जो इनाम देणा जडे तेरी सेवा करते न कने उना सारे लोकां जो जडे तेरी इज्जत करते न, हालांकि तू उना दा नाश करी देणा है जिना धरती दा नाश कितया है।” 19 कने परमेस्वरे दा जडा मंदर स्वर्ग च है, सै खोली दिता, कने उदे मंदरे च उदी बाचा दा संदूक मिल्ला, कने बिजली लग्गी, गडाके होए, हिलण होऐ, कने बड़े-बड़े ओले पे।

12 जालू सै मुकी गया, तां ओथू इक अनोखा निशाण था, जिसयो अम्बरे च दिखी सकदे थे। क्योंकि चन्द्रमे पर इक खडोतियो जनानी प्रगट होई जिना ऐसे कपडे पायो थे जडे सूरजे सांई चमकदे थे। कने उसा दे सिरे पर मुकुट लाया था, जिदे उपर बारा तारे थे। 2 सै जनानी गर्भवती थी, उसा दा बच्चा पैदा करणे दा बकत आई गया। कने सै बच्चा जमणे दिया पीडा ला रोआ दी थी। 3 इक होर निशाण अम्बरे च मिल्ला, इक बडा बडा लाल अजगर था, जडा शैतान है। उदे सत सिर थे कने दस सिंग थे, कने उदे सतों सिरा पर सत मुकुट थे। 4 कने उदिया पंछा अम्बरे दे इक तिहाई तारयां जो खिची करी धरतिया पर सूटी दिता, सै अजगर उसा जनानिया दे सामणे जाई खडोता, ताकि जालू सै बच्चा जम्मे तां उसा दे बच्चे जो खाई जा। 5 तालू उना जनानिया जागते जो पैदा किता, पर उसयो अजगर नी खाई सकया क्योंकि उसयो झट खोई लिया कने परमेस्वरे दे सिंहासने सामणे लेई ओदा। उनी जागते इक लोहे दे डंडे सोगी सारे देशां दे लोकां पर राज करणा। 6 कने सै जनानी उसा सुनसान जगा जो नठी गेई, जडा परमेस्वरे उस तांई तैयार कितया था ताकि सै ओथू इक हजार दो सो सठ दिनां दीकर पली सके। 7 फिरी स्वर्ग च लडाई होई, तां परमेस्वरे दे मुख्य स्वर्गदूतां च इकी जिदा ना मीकाईल है, उनी अपने अधीन स्वर्गदूतां सोगी अजगरे पर हमला किता। कने अजगर कने शैताने दे दूतां मीकाईल दे खिलाफ लडाई लडी। 8 अजगर लडाई हरी गया, कने उसयो कने उदे दूतां जो स्वर्ग ला कडी दिता। 9 इस तांई उसयो कने उदे दूतां जो धरतिया पर फैकी दिता। ऐ बडा अजगर सेई है जडा बडे पेहले सपे दे स्पे च मिल्ला था, जिसयो शैतान या दोष लांणे बाला बोलदे न। ऐ सेई है जडा इस संसारे दे लोकां जो धोखा दिन्दा आया है। 10 फिरी मैं स्वर्ग ला ऐ जेरे ला अब्राज सुणी, हण साडे परमेस्वरे अपने लोकां जो बचाणा! हण उनी अपणिया शक्तिया दा इस्तेमाल करणा कने राजे दे स्पे च राज करणा! हण उदे मसीहे संसार पर अपने अधिकारे दा दाबा करणा! हण शैताने साडे परमेस्वरे दिया हजुरी च खडोई करी साडे साथी सेबकां पर दिन रात दोष नी लाणा, क्योंकि उसयो स्वर्ग ला बार फैकी दितया है! 11 कने साडे भरोसा करणे बालयां शैताने जो राई दिता। उना उसया छेलुये दे खूने दिया शक्तिया ला हराया है, जडा उना जो पापां ला छुडाणे तांई मरी गया था। क्योंकि उना भरोसा करणा नी छडया की छेलू उना दा प्रभु है। हालांकि उना जो दुख तकलीफ होई, ऐथू दीकर की उना जो मारी भी दिता पर सै अपने उस भरोसे ला पिच्छे नी हटे। 12 इस तांई तुसां सारयां जो खुश होणा चाईदा जडे ऐथू स्वर्ग च रेंदे न। पर तुसां जडे धरती पर न कने जडे समुंद्रे च न तुहांजो पर तरस खाणा चाईदा, क्योंकि बुरियां आत्मा दा अंगुवा थले तुहाडे बाल आई गया है। असल च सै बडा जादा गुस्सा है क्योंकि सै जाणदा है की

जल्दी ही उदा अंत होई जाणा। 13 जालू अजगरे समझी लिया, की उसयो धरतिया पर सुटी दितया है, तां उनी उसा जनानिया दा पिच्छा किता जिना पुत्र जमया था। 14 पर परमेश्वरे उसा जनानिया जो बाजे दे दो फंग दितयो थे, ताकि सै उडी करी सुनसान जगा च जा जडी उसा ताई तैयार कितियो था। कने ओथु उसा दी साडे तिन्ना सालां दीकर देखभाल किती ताकि अजगर उसा दीकर ना पुज्जी सके। 15 तालू अजगरे उसा जनानिया पर अपने मुंए ला खड्डा साई पाणी फेंकया ताकि बाड उसा जो झडाई लेई जा। 16 पर धरतिया उसा जनानिया दी सहायता करणे ताई पाणिऐ जो निगली लिया जडा अजगरे अपने मुंए ला निकला था। 17 इस बजा ला, अजगर उसा जनानिया पर बडा गुस्सा होया, इस ताई उनी जनानिया दे बंशजा दे खिलाफ लडाईया दी घोषणा करी दिती। मतलब की उना लोकां दे खिलाफ जडे परमेश्वरे दे हुकमा जो मंदे न कने यीशु मसीह दियां सिखाईयां शिक्षा जो मंदे रेंदे न।

13 तालू सै अजगर चली गया कने समुंद्रे दे कंडे पर खड्डोई गया। तां मैं इक जानवरे जो समुंदरे ला निकलदे दिखया, जिसदे दस सिंग कने सत सर थे। उदे सिगां पर दस राजमुकुट थे, कने उदे हर इक सिरे पर परमेश्वरे दे खिलाफ इक ना लिखया था। 2 जडा जानवर मैं दिखया, सै चिते साई था; उदे पैर भालुऐ साई थे, कने मुं शेर साई था। अजगरे अपनी शक्ति इस जानवरे जो देई दिती कने उसयो धरती पर राज करणे दा हक देई दिता। 3 मैं जानवरे दे सिरां चे इकी सिरे च इक डुगे जखमे दा निशाण था, जडा उदिया मौता दी बजा बणी सकदा था, पर उदा जखम खरा होई गया था, इस ताई धरतिया दे लोक हेरान थे कने सै उदे चेले बणी गे। 4 सारयां लोकां अजगरे दी पूजा किती क्योंकि उनी जानवरे जो अपना हक देई दितया था। उना उस जानवरे दी भी पूजा किती। उना बोलया, “कोई भी इस जानवरे ला जादा शक्तिशाली नी है कोई भी उसला लडी नी सकदा है।” 5 परमेश्वरे उस जानवरे जो अपने बारे च बडाई कने परमेश्वरे दी बुराई करणे दा हक दिता। कने परमेश्वरे उसयो बयाली मिनयां दीकर ऐ हक रखणे दा हुकम दिता। 6 कने जानवरे परमेश्वरे दी बुराई करणा शुरू किती, उनी उदे नां दे खिलाफ कने उसा जगा दे खिलाफ बोलया मतलब की स्वर्गे दे खिलाफ जिथू परमेश्वर रेंदा है, कने ओथु रेणेबाले लोकां दे खिलाफ बुराई करणा शुरू किती। 7 उस जानवरे जो ऐ हक दितया है की सै परमेश्वरे दे लोकां ला लडे, कने उना जो राई दे, कने उसयो हर इक कुल दे लोकां, जातियां, भाषा पर हक दितया है। 8 धरतिया पर रेणेबाले सारे लोक जानवरे दी पूजा करणा लग्ये, मतलब की सै सारे लोक जिना दे नां संसारे दिया शुरूआत ला छेलुऐ दिया जिन्दगिया दिया कताबा च नी लिखयो न। छेलू सेई है जडा मारी दिता था। 9 हर कुसी जो जडा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है। 10 जिना दा जेला च जाणा तय है, उना जो पक्का जेल हौणी, जिना लोकां दा तलबारा ला मरणा तय है, उना पक्का ही तलबारा ला मरणा है। इस ताई परमेश्वरे दे लोकां जो दुख सेहन करणे च सबर रखणा चाईदा कने उस पर भरोसा करदे रेणा चाईदा। 11 फिरी मैं इक होर जानवरे जो धरतिया ला निकलदे होऐ दिखया, उदे छेलुये साई दो सिंग थे। पर

जालू सै बोलणा लग्या तां उदी अबाज अजगरे साई थी। 12 ऐ दुज्जा जानवर उस पेहले बाले जानवरे दे सारे हकां दा इस्तेमाल करदा था। कने धरतिया दे लोकां जो उस पेहले जानवरे दी जबरदस्ती पूजा करांदा था, जिदा सै जखम ठीक होई गया था। 13 सै दुज्जा जानवर बड़े-बड़े चमत्कार दसदा था, ऐथू दीकर की सै लोकां दे दिखदे-दिखदे अम्बरे ला अग्गी दी बरखा कराई दिन्दा था। 14 दुज्जे जानवरे जो पेहले जानवरे दिया हजुरिया च चमत्कार दसणे दी इजाजत है। इना चमत्कारां दिया बजा ला सै धरती दे लोकां जो भटकाई सकदा था। उनी उना जो पेहले जानवरे दी मूर्ति बणाणे दा हुकम दिता, जडा तलबारा ला घायल होणे बाद भी जिन्दा रिया था। 15 कने दुज्जे जानवरे जो उस पेहले जानवरे दी मूर्ति बणाई करी उसा जो जिन्दा करणे दी हक मिलिया था, ताकि मूर्ति बोली सके कने उना लोकां जो मराई दे जडे उस जानवरे दिया मूर्तिया दी पूजा नी करगे। 16 दुज्जे जानवरे छोटे-बड़े, अमीर-गरीब, मालिक या जडे गुलाम न मतलब की सारयां लोकां जो मजबूर किता की सै पेहले जानवरे दे नाऐ दी छाप अपने सजे हथे पर या मथे पर लाई लेन। 17 उनी ऐसा इस ताई किता ताकि कोई भी माणु जिदे पर पेहले जानवरे दी छाप ना हो तां सै कोई भी समान खरीदी बेची नी सकदा था। 18 इसा छापा दे बारे च समझणे ताई तुहांजो ज्ञान दी जरूरत है। पर जिस बाल ज्ञान है, सै ऐ पता लाई सकदा है की इस जानवरे दिया संख्या दा क्या मतलब है। क्योंकि ऐ इक माणुऐ दा ना है। ऐ संख्या छेसो छयासठ है।

14 मैं फिरी दिखया की, सै छेलू सिय्योन पहाडे पर खडोतया है, कने उदे सोगी इक लख चौवाली जार लोक न, जिना दे मथे पर उदा कने उदे पिता दा नां लिखया होया है। 2 कने मैं स्वर्गे च कुसी दी अबाज सुणी जडी इक झरने दिया तेज अबाजा साई थी। जडी अबाज मैं सुणी, सै अबाज उसा अबाजा साई थी, जियां लोक तार बाले यंत्रा जो बजांदे निकलदे न। 3 कने इक लख चुताली हजार लोक सिहांसने, चार जिन्दे प्राणियां कने अगुवां सामणे खडोतयो थे; सै इक नोआ गीत गा दे थे, जिसयो सेई सीखी सकदे थे, जिना जो परमेश्वरे धरतिया पर रेणेबाले लोकां बिच ला छुडायया था। 4 ऐ सै न, जडे पबित्र जिन्दगी जिन्दे न। ऐ उना लोकां साई न जिना इक बरी भी नाजायज रिशता नी बणाया है कने ना ही इना कुसी चिजा दी पूजा कितियो है, ऐ सिर्फ छेलुये दी ही पूजा करदे न, जिस पासे छेलू जांदा है, ऐ भी उदे पिच्छे चली पोंदे न। ऐ सै न जिना जो धरतिया दे सारे माणुआं ला लग कितया है, जियां लोक खेतारं दियां फसला दा सारयां ला खरा हिस्सा परमेश्वरे जो दिन्दे न, तियां ही ऐ लोक अपणिया जिन्दगिया जो पुरिया पबित्रता सोगी परमेश्वर कने छेलुये जो दिन्दे न। 5 कने उना कदी भी झूठ नी बोलया है, उना च कुछ भी गलत नी है। 6 फिरी मैं इक होर स्वर्गदूते जो अम्बरे च उच्चा उडदे दिखया। उनी स्वर्गदूते उस शुभसमाचार जो लिया था जडा कदी नी बदलदा, उनी संसारे च रेणेबाले लोकां, हर इक देश, हर इक गोत्र, कने सारियां भाषां च इदी घोषणा किती। (aiōnios g166) 7 कने उनी बडे ज़ोरे ला बोलया, “परमेश्वरे ला डरा, कने उदी महिमा करा, क्योंकि उदा हण लोकां दा न्याय करणे दा बकत है। कने उदी आराधना करा क्योंकि सेई है जिनी स्वर्ग, धरती, समुंदर कने पाणिऐ दे तलाबां जो बणाया है।” 8 ओथु इक होर स्वर्गदूत

था जड़ा पेहले दे पिच्छे आया कने बोलया, “बाबेल देश दा सर्वनाश होई गया! बड़े बाबेल देश दा सर्वनाश होई गया! बाबेल देशे सारिया माणुआं दिया जातिया जो अपणिया शराबा दे नशे च दूत करी दिता, उदा बड़ा ही बुरा व्यवहार ऐ है जड़ा उनी सारिया धरतिया कने माणुआं दिया जातिया जो सिखाया क्योकि उनी उना जो मूर्तिपूजा करणा सिखाया।” 9 फिरी इदे बाद इक होर स्वर्गदूत बड़े जोंरे ला बोलदा होया आया, “जड़ा कोई उस जानवरे कने उदिया मूर्तिया दी भक्ति करगा, कने अपने मथे कने अपने हथे पर उदी छाप लांगा, 10 तां उनी परमेश्वरे दे प्रकोपे दिया शराबा जो जड़ी बिना मिलावटा दी है, उदे गुस्से बाले कटोरे च पाईयो है, पिणा कने पबित्र स्वर्गदूतां दे सामणे कने छेलुये दे सामणे अग्गी कने गन्धका दिया पीड़ा च पोणा। 11 अग्गी ला निकलदा धुंआ जड़ा उना जो सतांदा है सै हमेशा उपर उठदा रेंदा है। दिन रात उना दा सताया जाणा स्कदा नी है क्योकि उना उस जानवरे दी कने उदिया मूर्तिया दी पूजा किती, कने उना उस जानवरे दी छाप लाई।” (aiōn g165) 12 इस तां ऐ जसरी है की परमेश्वरे दे लोक उना सारे दुखां जो सेहन करन जिना चे होईकरी सै गुजरदे न। उना सेई करणा जड़ा परमेश्वर हुकम दिन्दा है कने उना जो यीशु मसीह पर भरोसा करणा बंद नी करणा चाईदा। 13 कने फिरी मैं स्वर्गे ला कुसी जो बोलदे सुण्या, “इना गल्लां जो ऐथू लिख।” हुणे ला सै लोक सोभाग्यशाली न जड़े परमेश्वरे पर भरोसा करदे मरी जांदे न। तालू पबित्र आत्मा इसा गल्ला ला राजी होया, उनी बोलया, “ऐ सच्च है। सै सोभाग्यशाली न क्योकि उना जो अपणिया कड़िया मेहनता ला अराम मिलणा कने जड़े कम्म उना कितयो न उदे तांई उना जो इनाम मिलणा।” 14 मैं फिरी इक चिट्टे बदले जो दिखया, कने मैं उस बदले पर कुसी जो बैठया दिखया जड़ा माणुऐ सांई लग्गा दा था, कने उस पर माणुऐ दे पुत्रे सांई कोई बैठया है, जिसदे सिरे पर सोने दा मुकुट कने हथे च पेनी दराटी थी। 15 तालू ही फिरी इक होर स्वर्गदूत परमेश्वरे दा संदेश लेईकरी स्वर्गे दे मंदरे ला बार आया, ऐ चौथा स्वर्गदूत था। उनी बदले पर बैठयो माणुऐ जो जोर देईकरी बोलया, “धरतिया दी फसल तैयार है, फसला जो बडणे दा बकत आई गया है। इस तांई अपणी दराटी चला कने फसला दी बडाई कर।” 16 इसा बजा ला सै माणु जड़ा बदले पर बैठया था, सै अपणिया धराटिया ला धरतिया पर बडणा लग्गा उनी पुरिया धरतिया दिया फसला दी कटाई किती। 17 फिरी पजमा स्वर्गदूत उस मंदरे ला निकलया, जड़ा स्वर्गे च है, कने उदे बाल भी पेनी दराटी थी। 18 तालू इक होर स्वर्गदूत वेदिया ला बार आया, जड़ा अग्गी ला धुप बालने दी जिम्मेदारी निभान्दा है। उनी जोंरे ला उस स्वर्गदूते ला जिनी पेनी दराटी लियो थी उसयो बोलया, “धरतिया पर अंगूरा दे गुच्छे पक्की गियो न! उना जो अपणिया दराटिया ला बड़ी ले।” 19 तालू उनी स्वर्गदूते अपणिया दराटिया ला उना अंगूरा जो बड़ी दिता जड़े धरती पर थे कने उना जो गटेरया। ताकि उना जो निचोड़ी सकन, इदा मतलब ऐ है की परमेश्वरे बड़ी खतरनाख सजा देंगी। अंगूरा जो शेहे ला बार निचोडया। ओथु जिथू अंगूरा जो निचोडया था ओथु ला जड़ा खन निकलया सै इतणा डुगा था, जितणा की इक घोडे दा सिर होंदा है जालू उसयो लगामा ला पकड़दे न कने तिन सौ किलो मीटर दीकर चली गया।

15 इदे बाद मैं अम्बरे च जड़ा नोआ नोखा चमत्कार दिखया कने सै बड़ा डराने बाला था। ओथु सत स्वर्गदूत थे जिना सत लग-लग मुसीबतां पकड़ियां थियां। ऐ मुसीबतां आखरी न क्योकि जालू उना मुकी जाणा तालू परमेश्वरे दा गुस्सा भी पूरा होई जाणा। 2 तालू मैं कुछ दिखया जड़ा समुन्द्रे सांई लगदा था कने शीशे सांई चमकदा था कने उदे च अग्न भी मिलियो थी। मैं उना लोकां जो भी दिखया जिना उस जानवरे जो हराया था क्योकि उना उदिया मूर्तिया दी अराधना नी कितियो थी कने उना पर जानवरे दी छाप नी लगियो थी। 3 कने सै परमेश्वरे दे दास मूसा दा गीत गांदे थे, जड़ा छेलुये दे बारे च गीत है। सै गांदे थे की, “हे सारयां ला शक्तिशाली प्रभु परमेश्वर, जड़ा कुछ तू कितया है सै कीमती कने अनोखा है।” तू सारयां देशां दा राजा है, तू जड़ा भी करदा है सेई सच्च कने धर्मी है। 4 “हे प्रभु, सारे लोक तेरी इज्जत करदे न, सै सारे तेरे नाऐ दी इज्जत करदे न, क्योकि सिर्फ तू ही पबित्र परमेश्वर है। हर इक जातिया दे लोक तेरे बाल ओंदे न, कने सै तेरी अराधना करदे न क्योकि तेरे धर्मे दे कम्म सारे लोक अच्छे ला जाणदे न।” 5 इदे बाद जालू सै गीत गाई बैठे, तालू मैं दिखया की स्वर्गे दा मंदर खुलया था। जड़ा मिलाप बाले तम्बुऐ सांई है। 6 कने सै सत्तों स्वर्गदूत जिना बाल सत्तों मुसीबतां थियां, उस मंदरे ला बार निकले। उना चमकदार कपडे पायो थे कने उना दिया छातिया दे चारो पासे सोने दिया पटियां भी थियां। तालू उना चार जिन्दे प्राणिनां चे इकी उना सत स्वर्गदूतां जो परमेश्वरे दिया तरफा ला जड़ा हमेशा जिन्दा है, गुस्से दा भस्या इक-इक सोने दा कटोरा दिता। (aiōn g165) 8 कने मन्दिर परमेश्वरे दिया महिमा कने सामर्थ्य ला ओणे बाले धुऐ ला भरई गया। कने तालू दीकर कोई भी मंदरे च नी जाई सके जालू दीकर उना सत स्वर्गदूतां दे जरिये नियोरियां सतो मुसीबतां मुकी नी जान।

16 फिरी मैं उदे बाद मंदरे ला इक उचिया अबाजा जो सत्तों स्वर्गदूतां जो ऐ बोलदे सुण्या, “जा, कने परमेश्वरे दिया तरफा ला सजा जो जड़ी उना सत्तों कटोरयां च है, धरतिया दे लोकां पर नियोरी दिया।” 2 इस तांई पेहले बाले स्वर्गदूते जड़ा उदे कटोरे च था सै धरती पर नियोरी दिता। फिरी उना लोकां जो जिना पर उस जानवरे दी छाप थी, या जिना उदिया मूर्तिया दी पूजा कितियो थी, उना जो बड़े बड़े जखम होई गे जिना च बड़ी जादा पीड़ा होंदी थी। 3 दुज्जे स्वर्गदूते जड़ा उदे कटोरे च था उसयो उनी समुंदरे च नियोरी दिता। कने तालू ही समुंद्रे दा रंग मरयो माणुऐ दे खूने सांई होई गया, कने समुंद्रे च रेणे बाली हर इक प्राणी दी मौत होई गेई। 4 तिजे स्वर्गदूते जड़ा उदे कटोरे च था उसयो उनी खड्ग कने पाणिए दे झरनया पर नियोरी दिता, कने सै खून सांई बर्णी गे। 5 तालू मैं उस स्वर्गदूते जो जिसया पाणिए पर हक है, परमेश्वरे ला ऐ बोलदे होऐ सुण्या, “हे पबित्र परमेश्वर, जड़ा बकत दी श्रुआत ला लेईकरी हुणे दीकर कने हमेशा तांई नी बदलदा, तू जड़ी सजा दितियो है, सै सही है।” 6 क्योकि उना तेरे लोकां कने परमेश्वरे दे संदेश देणेबालयां जो मारी दिता, इस तांई तू हुण उना जो खून पिणे तांई दिन्दा है। ऐई उना तांई खरा है। 7 मैं फिरी वेदिया ला कुसी जो बोलदे सुण्या, “हों, हे सारयां ला शक्तिशाली प्रभु परमेश्वर, ऐ सच्च है की जियां तू लोकां दा न्याय करदा है सै सही है।” 8 चौथे स्वर्गदूते जड़ा उदे कटोरे च था उनी सूरजे पर

नियोरी दिता, कने सूरजे जो अपणी गर्मी बदाणे दी इजाजत दिती, इसा बजा ला लोक जादा गर्मियां दिया बजा ला फकुईं गे, 9 इस ताई उना परमेवरे जो श्राप दिता था, क्योंकि सेई था जिदे बाल सजा देणे दा हक था। उना हल्ले भी अपणे पापां ला पञ्चाताप नी किता कने परमेवरे दी निंदा किती, उना हल्ले दीकर परमेवरे दिया महानता जो नी मनया। 10 पंजमे स्वर्गदूते जडा उदे कटोरे च था उनी उस जानवरे दे सिंहासने पर नियोरी दिता, कने जिस राज्य पर जानवर राज करदा था उस पर नेरा छाई गया; कने लोक अपणिया जीभा जो चबाणा लग्गी पे क्योकि सै उना दुखां कने जखमा जो सेहन नी करी सका दे थे जडे उना जो होआ दे थे। 11 कने अपणियां पिंडा कने फोडयां दिया बजा ला स्वर्ग दे परमेवरे दी बुराई किती; भले ही उना दे हालात इयोदे थे पर अपणे बुरे कम्मा ला पञ्चाताप नी किता कने ना ही उना बुरे कम्मा जो करणा छडया जडे सै करा दे थे। 12 छेमे स्वर्गदूते जडा उदे कटोरे च था उनी सै बडी बड्डी नदी फरात च नियोरी दिता, इसा बजा ला उसा दा पाणी सुकी गया कने पूर्व दिशा दे राजे अपणिया सेना लेईकरी उसा नदिया जो पार करी सके। 13 कने मै इदे बाद तिन बुरी आत्मा जो दिखया जडियां दिखणे च मेंढके साईं थियां। इक उस अजगरे दे मुऐ ला बार आई, कने दुज्जी पेहले जानवरे दे मुऐ ला बार आई कने तीजी उस दुज्जे जानवरे दे मुऐ ला बार आई जिनी झूठा संदेश दितया था। 14 इना बुरियां आत्मा बाल चमत्कार करणे दी शक्ति थी कने उना जाई करी उना लोकां जो गठेरया जडे इस संसारे दे सारे देशां पर राज करदे न ताकि सै सारयां ला शक्तिशाली परमेवरे दे उस महान दिने पर उदे खिलाफ लडाई लडने ताई जान। 15 “उना बुरियां आत्मा राज कने उना दिया सेना जो उसा जगा पर गिठा किता जिसया इब्रानी भाषा च हर-मगिदोन बोलदे न।” इस ताई प्रभु यीशु मसीह बोलया है, “ऐ गल्ल सुणा। मै चोरे साईं अचानक ओणा है। सोभाग्यशाली है सै माणु जडा मेरे ओणे पर जागदा है कने अपणे कपडे तैयार रखदा है। तालू उना नंगे नी होणा कने शर्मिंदा नी होणा जालू उना लोकां बिच जाणा।” 17 कने सतमे स्वर्गदूते जडा उदे कटोरे च था उनी होआ च नियोरी दिता, कने मै सुणया, ओथु सै था जडा स्वर्ग दे मंदरे दे अंदरे ला परमेवरे दे सिंहासने ला बोला दा था, “सब कुछ होई गया।” 18 कने उसी बकत बिजलियां कने गडगडात बदलां दे गडाके होणा लगे कने इक ऐसा भयानक हिलण होया, इसला पेहले लोकां कदी भी इतणे जोरे ला हिलण महसूस नी कितया था। 19 इसला बाबेल दा सै बड़ा शहर तिन हिस्सयां च बंडूई गया। क्योकि परमेवरे अपना वायदा पूरा किता जडा उनी बाबेल शहरे दे लोकां जो सजा देंगे दे बारे च कितया था। इसयो परमेवरे बडी कठोर सजा देंगी। ऐ इयां ही होणा जियां उना बिना पाणी पायो शराब पि लियो है, जिसया परमेवरे अपु गलासे च पाया है, जडा उदे गुस्से जो दसदा है। 20 कने उस बकत समुंद्रे दे सारे टापू गायब होई गे, कने पाइ भी गायब होई गे। 21 अम्बरे ला लोकां पर बड़े-बड़े ओले पे, हर इकी ओले दा बजन लगभग 50 किलो था। ऐ मुसीबत बडी भरी बड्डी थी, इसा बजा ला लोकां परमेवरे दी बुराई किती।

17 जिना सत स्वर्गदूतां बाल सै सत कटोरे थे, उना चे इक जणे आई करी मिंजो ला ऐ बोलया, “मै तिजो दसणा की परमेवरे कियां उसा बडिया

बेश्या जो सजा देंगी, जडी ऐसिया जगा पर बोंदी है जिथू ला मतियां खड्ग न।” 2 जिसा सोगी धरती दे राजयां व्यभिचार किता, बाबेल दे बुरे कम्मा धरतिया दे सारे देशां जो भ्रष्ट करी दिता। ऐ ऐसा था जियां उनी उना जो शराब पिणे ताई दिती, कने इसा बजा ला परमेवरे उना जो सजा देंगी। 3 तालू स्वर्गदूत मिंजो पबित्र आत्मा दिया सहायता ला सुनसान जगा च लेई गया, आत्मा मिंजो अपणे काबू च लेई लिया, कने मै ओथु इक जनानिया जो दिखया जडी इक लाल रंगे दे जानवरे पर बेठियो थी, जिसादे सत सिर कने दस सिंग थे। उदा शरीर परमेवरे दे खिलाफ लिखयो ना ला भस्या था। 4 इना जनानिया बैगणी, कने लाल रंगे दे कपडे पायो थे। उना अपणे शरीर जो सोने दे मंगे मणियां कने मोतियां ला सजाया था। कने उसा दे सज्जे हथे च शराबा ला भस्या सोने दा गलास पकडया था, जडा उसा दे बुरे कम्मा कने गंदे यौन कम्मा जो दसदा है। 5 कने उसा दे मथे पर इक ना लिखया था जिदा इक गुप्त मतलब है, “मै महान शोहर बाबेल है। मै सारियां बेश्यां दी मां है कने संसारे दे सारे बुरे कम्मा दा जरिया है।” 6 कने मै दिखया की जनानी परमेवरे दे लोकां दे खूने दे नशे च थी, जिना जो लोकां मारी दितया था क्योकि सै यीशुऐ पर भरोसा करदे थे। कने उसयो दिखीकरी मिंजो बडी हेरानी होई। 7 उनी स्वर्गदूते मिंजो ला बोलया, “तू हेरान मत हो। मै तिजो इसा जनानी, कने उस जानवरे दा, कने जिस पर सै बेठियो है, जिदे सत सिंग न कने दस सर न, गुप्त भेद समझांगा।” 8 जडा जानवर जिसया तू हुण दिखया, इक बकत पेहले जिन्दा था, पर हुण नी है, कने सै हुण अथाह कुंडे ला बार ओणे बाला है कने परमेवरे पुरे तरीके ला नाश करी देणा। धरती पर रेणेबाले लोक जिना दे ना परमेवरे संसार शुरू होणे ला पेहले जिन्दया दिया कताबा च नी लिखयो, उना सारयां हेरान होई जाणा जालू उना इस जानवरे जो दिखणा। इक बकत पेहले सै जिन्दा था; हुण सै जिन्दा नी है; पर उनी फिरी बापस मुडी ओणा। (Abyssos g12) 9 ऐ समझणे ताई तूहांजो ज्ञान दी जरूरत है: जानवरे दे सत्तो सर उस शोहेरे जो द्रुशांदे न जिस पर ऐ जनानी राज करदी है। कने सै सत राजयां जो भी द्रुशांदे न। 10 कने सै जडे सत राजा न, उना चे पंज तां पेहले ही मरी गियो न; उना चे इक हुण राजा है कने आखरी बाला हल्ले दीकर आया नी है, पर जालू उनी ओणा तां उनी थोडे बकते ताई राज करणा। 11 सै जानवर जडा बडे पेहले रेंदा था कने हुण नी है, सै अठमा राजा है। पर सै अठमा राजा पेहले सत राजयां चे इक है। आखरी च उस राजे जो पक्का ही हमेशा ताई सजा मिलणी। 12 जडे दस सिंग तू पेहले दिखे थे, सै उना दस राजयां जो द्रुशांदे न जिना हल्ले दीकर राज करणा शुरू नी कितया है। उना दस राजयां जो उस जानवरे सोगी मिलिकरी थोडे दे बकते ताई राज करणे दा अधिकार मिलणा। 13 इना सारयां राजयां दा इक ही मकसद है, कने उना अपणी-अपणी शक्ति कने अधिकार जानवरे जो देई देणा। 14 “जानवर कने इना दसां राजयां छेलुये दे खिलाफ युद्ध करणा, पर छेलुये उना जो हराई देणा, क्योकि सै प्रभुआं दा प्रभु, कने राजयां दा राजा है। उनी उना जो अपणे सदयो, चुणयो कने भरोसे दे काबील चेलयां सोगी हराई देणा।” 15 स्वर्गदूते भी मिंजो ऐ भी बोलया, “जडा पाणी तू पेहले दिखया था, जिस पर सै बेश्या बेठियो थी, सै सारे संसारे दे लोक न, जडे सारियां जातियां, धर्म, देश दे कने

लग-लग भाषा बोलने वाले न।” 16 सै बकत औणा जालू जानवर उना दस राजयां सोगी जडे उदे सोगी न, उस बेश्या ला नफरत करणी जड़ी उस पर बेठियो है। उना उस पर हमला करणा, उसयो गंगा करणा, उना उदे मिटे दा हिस्सा खाई जाणा, कने बाकियां जो उना फुकी देणा। 17 सै जनानी जिसया तू दिखया था, सै बड़ा शेर है जडा धरती पर सारे राजयां पर शासन करता है। ऐ चीजां उदे सोगी होई ना, क्योंकि परमेस्वरे अपने मकसदे जो पूरा करणे ताई उना दे मना दा मार्गदर्शन किता है। ऐई बजा है की उना अपना अधिकार जानवरे जो देई दिता ताकि सै राज करे, जालू दीकर सै पूरा नी होई जा जडा परमेस्वरे बोलया था।

18 इदे बाद मै इक होर स्वर्गदूते जो स्वर्ग ला उतरदे दिखया। उदे बाल बड़ा अधिकार था कने उदिया चमका दिया बजा ला सारिया धरतिया पर लौ होई गई। 2 उनी जौरे ला पुकारी करी बोलया, “बाबेल देश दा सर्वनाश होई गया! बड़े बाबेल देश दा सर्वनाश होई गया।” कने सै बुरियां आत्मा दा घर, कने हर इक अशुद्ध आत्मा दा अडा, कने हर इक अशुद्ध कने बुरे पंछियां दा अडा होई गया। 3 ऐ इसा बजा ला होणा क्योंकि उना जनानिया जड़ी बाबेल शहर है, उना हर इक देशे दे सारे लोकां जो सै शराब पियाईयो है जड़ी उसा दी मूर्तियां दी पूजा है। सारिया धरतिया दे राजा उदे गंदे कम्मा च शामिल होयो न। धरतिया दे व्यपारी उसा जनानिया दिया मेगियां-मेगिया चीजां दिया इच्छा दिया बजा ला अमीर बणी गे। 4 फिरी मै स्वर्ग ला इक हर अबाज सुणी, “हे मेरे लोको, उस शेहरे ला निकली जा। उना लोकां सोगी मिली करी पाप मत करा, ताकि तुहांजो उना सोगी सजा ना मिल्ले।” 5 क्योंकि उना दे पाप बडे बड़े न, जिना दा ढेर अम्बरे दीकर लग्गी गया है, कने परमेस्वर उसा बुराई जो कदी नी भुलदा है जड़ी उना कितियो है। 6 इस ताई मै बोलदा है, उस शेहरे सोगी भी सियुदा ही कर जियां उनी दुज्जयां सोगी कितया है, उदे सारे बुरे कम्मा ताई उसयो दो गुणा बदला दे। उस शेहरे ताई दैगुनी शक्तिशाली यातना दी तैयारी कर जदियां यातना सोगी उनी दुज्जयां लोकां सोगी जुलम कितया था। 7 तू उसयो पक्का ही बड़ी जादा पीड कने दुख देंगी जडा उदे जिन्दगी जिणे दे तरीके कने उदे अपने आपे दे घमंडे दे बराबर है। उनी अपने आपे ला बोलया, “मै इक राणिया साईं लोकां साईं राज करणा।” इक बिधवा नी है कने मिंजो कदी दुख नी होणा। 8 उदे अपनी बड़ाई करणे दिया बजा ला उस अचानक मुसीबतां आई पोंणियां। सिर्फ इकी ही दिने च बिमारी कने शोक कने अकाल उस पर इक सोगी आई जाणा। कने उसयो अग्नी च भस्म करी देणा, क्योंकि प्रभु परमेस्वर शक्तिशाली है, कने उनी उसयो सजा देणी। 9 कने राजे शेहरे जो फकुंदा दिखणा तां उना उदे ताई रोणा कने दुख मनाणा। 10 कने सै उसा सजा ला डरदे न जडा उसा जो पीड दिन्दा है, बड़े शेर, बाबेल। हे मजबूत शेर, हाय। हाय। थोड़े दे बकत च, परमेस्वरे तेरा न्याय करी दिता कने सजा दिती। 11 धरती दे व्यपारियां उदे ताई रोणा कने दुख मनाणा है, क्योंकि हुण कुनी भी उना दा माल नी खरीदणा है। 12 उना दा माल केईयां तरा दा था। उदे च सोना, चांदी, रतन, मोती थे। उदे च बडे छेल कने मेगे धागे चमकीले लाल बैजणी, रेशमी, कपडे दे बणायो थे। उदे च खुशबुदार लकड़िया ला बणियां चीजां, हाथिये दे दंदा ला बणियां चीजां थियां, होर भी

बाकी चीजां थियां जडियां मेंगी लकड़िया या पीतल, लोहा, या संगमरमर दियां बणियां थियां, 13 कने लोक दालचीनी, मसाले, धूप, इत्र, लोबान, शराब, तेल, मैदा, गाय-बैल, भेड-बकरियां, घोडे, रथ, कने दास कने माण्डे दे प्राण नी खरिददे थे। 14 व्यपारियां उसला बोलणा, सै सारियां चीजां जिना दी तू इच्छा रखदी थी हुण नी न। हुण सारियां छेल खुशबुआ बालियां चीजां जडियां तिजो पसंद थियां, सै सारियां चीजां जिना जो तू अपने शरीर जो सुंदर बणांदी है, सै सारियां गबाची गियां न, हुण नी मिलदियां। 15 इना चीजां दे व्यपारी जडे उदे जरिये अमीर होई गियो थे, उसा दी पीडा दे डरे ला उना दूर खडोणा कने रोंदे-रोंदे बोलणा, 16 हाय! हाय! ऐ बडा शेर जिनी मलमल कने लाल रंग दे कपडे पायो थे, कने सोने कने मोतियां ला सजया था; 17 घडिया च ही उदा सारा धन खतम होई गया। जाजे दे सारे कप्तान कने सै सारे जडे जाजे पर यात्रा करते न, कने सै सारे जडे समुंदरे ला अपना गुजारा करते न, बाबेल शेहरे ला बडे दूर खडोई करी दिखदे रे। 18 कने जालू उना शेहरे जो फकुंदा कने अग्नी ला निकलदे धुंए जो दिखणा कने चिल्लाणा, इस साईं महान शेर होर कोई नी होया! 19 कने उना अपना दुख दसणे ताई अपने-अपने सिरां पर धुड पाणी है, कने रोंदे-रोंदे कने चीलाई करी बोलणा, हाय। हाय। ऐ बडा शेर जिदिया संपतिया ला समुंद्रे दे सारे जाजां बाले अमीर होई गियो थे, सै घडिया च ही सारा उजड़ी गया। 20 तू जडा स्वर्ग च रेंदा है, कने हे परमेस्वरे दे लोको, कने प्रेरितां, कने परमेस्वरे दे संदेश देणेबालयां, जडा उस सोगी होया उस पर खुश होआ, क्योंकि परमेस्वरे बाबेल शेहरे जो उना गल्लां च दोषी बणाया है जडियां उनी तुहाडे सोगी कितियां न। 21 फिरी इक जौरे बाले स्वर्गदूते बडिया चककिया दे चकके दे बराबर इक पथर चुकया, कने ऐ बोली करी समुंदरे च सुटी दिता, “जियां इस पथरे जो समुंदरे च फेकदे न,” कने सै दोबारा नी मिलदा है, तियां ही सै महान शेर बाबेल ही इक ही बरी च खतम होई जाणा, कने दुबारा नी बणाणा। 22 बाबेल शेर तेरियां गलियां च फिरी कदी भी गाणा बजाणा नी सुणोणा, कोई भी गायकां, बंसरी बजाणे बालयां, कने तुरही बजाणे बालयां दा संगीत नी होणा। तुहाडे सारे माहिर कर्मचारी गायब होई जाणे, कने तुहाडियां मिलां बाल पिणे ताई कोई अनाज नी होणा। 23 कने उदियां राती नेरियां होणियां, ऐथू दीकर की इक भी दिय्या नी बलना। ओथू कुसी भी लाडा लाडिये दिया खुशिया दी गल्ल नी होणी। ऐसा इस ताई होणा क्योंकि उदे व्यपारियां जडे दुनिया भर च सारयां ला बड़े थे उना अपने जादू टोणे ला देशां जो धोखा दिता है। 24 परमेस्वरे बाबेल जो इस ताई सजा दिती क्योंकि सै परमेस्वरे दे संदेश देणेबालयां जो, कने होर सारे लोकां जो जडे परमेस्वरे दे न, कने धरती दे लोकां जो मारणे दा दोषी था।

19 जालू सै जौरे बाला स्वर्गदूत बोली बैठा तां इदे बाद मै जडा सुण्या सै इयां था जियां मते लोक गा दे होन, “परमेस्वरे दी महिमा हो! तू ही है जडा उद्धार करता है, कने सामर्थ्य साडे परमेस्वरे दी ही है।” 2 उदी स्तुति करा क्योंकि उदे सारे फैसले सही कने सच्चे न। उनी बदनाम बेश्या दा न्याय करिरी बदला लिया क्योंकि उना संसारे दे लोकां जो पाप करणे ताई भरमाया। परमेस्वरे उसा वेश्या दा न्याय करिरी बदला लिया क्योंकि उना अपने दास मारयो थे। 3 फिरी दूजी बरी उना बोलया, “हालेलूयाह! बाबेल

जो नाश करणे बालिया अग्गी ला निकलणे बाला धुंआ उठदा रेणा कने कदी बंद नी होणा।” (aion g165) 4 कने चोबियाँ अगुवां कने चारों जिन्दे प्राणियां गोडे भार बेईकरी परमेस्वरे जो दण्डवत किता, जडा सिंहासने पर बैठया था, कने बोलया, “आमीन! परमेस्वरे दी स्तुति हो।” 5 कने फिरी मैं कुसी जो बोलदे सुणया, कने ऐसा लगया की जियां ऐ अबाज परमेस्वरे दे सिंहासने ला आई हो। उनी बोलया, “साडे परमेस्वरे दे सेबकों कने तुसां जडे उदा डर मंदे न, चाहे बड़े दर्जे दे होन या छोटे दर्जे दे होन तुसां सारे परमेस्वरे दी स्तुति करा।” 6 इदे बाद, फिरी मैं ऐ भी सुणया जडा बडे जादा लोकां दे चिलाणे सांई था। उना दा चिल्लाणा मते पाणिऐ दिया अबाजा सांई था, कने बदलां दे गडाकयां दिया अबाजा सांई था। मैं उना जो ऐ बोलदे सुणया; परमेस्वर साडा प्रभु, ओआ असां उदी स्तुति करन। क्योंकि उदे बाल हर जगा राज करणे दी शक्ति है। 7 ओआ, असां खुश कने मगन होई जान, कने उदी स्तुति करन, क्योंकि छेलुये दा बियाह होणेबाला है, उदी लाडी शृंगार करिरी कने अपने आपे सजाई करी उदे तांई तैयार है। 8 छेलुये उसयो साफ चमकदार मलमल ला बणयो कपडे पाणे तांई दिते न, जडे शुद्ध न, जडा भरोसा करणे बालयां दे भले कम्मा दा प्रतीक है। 9 तालू स्वर्गदूते मिंजो ला बोलया, “ऐ लिख, धन्य सैं न, जिना जो छेलुये दे बियाये दा जशन मनाणे तांई धामा च सदया है।” फिरी उनी मिंजो बोलया, “ऐ बचन परमेस्वरे दे सच्चे बचन न।” 10 जालू मैं सुणया तां जडा मिंजो ला गल्लां करा दा था, मैं उस माणुऐ सामणे झुकी गया, क्योंकि मैं उदी अराधना करा दा था। उनी मिंजो बोलया, मेरी अराधना मत कर, मैं भी तेरे सांई परमेस्वरे दा सेबक है कने तेरे भाईयां सांई जडे यीशु मसीह दियां सच्ची शिक्षां पर भरोसा करदे कने मंदे न। तिजो परमेस्वरे दी ही अराधना करणी चाईदी। क्योंकि परमेस्वर आत्मा है जडी परमेस्वरे दे लोकां जो यीशु मसीह दी दसियो सच्चाईयां दी घोषणा करणे दे काबिल बणादां है। 11 फिरी मैं स्वर्ग की खुलया होया दिखया, कने ओथु मेरे सामणे इक चिट्ठा घोडा था; कने उस पर इक सवार था, सै परमेस्वरे दा सच्चा कने भरोसेमंद सेबक था; सै धार्मिक तरीके ला उदे दुशमणा दा न्याय करदा है कने उना दे खिलाफ लड़ाई करदा है। 12 उदियां हखी अग्गी दियां लपटा सांई चमकदियां थियां, कने उदे सिरे पर मते भरी राजमुकुट थे। उदा इक ना उस पर लिखया था, पर सिर्फ सेई उस नाऐ दा मतलब जाणदा था। 13 उनी खूने च डोबया कपडे पायो थे, कने उदा ना परमेस्वरे दा बचन था। 14 कने स्वर्ग दी सेना उदे पिच्छे-पिच्छे थी। सै भी चिट्ठे घोडयां पर सवार थे कने उना चिट्ठे मलमले दे कपडे पायो थे जिना च कोई भी दाग नी था। 15 उदे मुंऐ ला इक पैनी तलवार निकली जिसला उनी देशां जो हराई देणा। जडा उदे अधिकारां जो नी अपनांदा उनी उना जो पुरे तरीके ला सजा देंगी। उनी सारयां ला शक्तिशाली परमेस्वरे दे भयंकर गुस्से जो इयां ही छडी देणा जियां इक रस्सकुंड ला अंगरा दा रस्स निकलदा है। 16 कने उदिया पोशाका कने उदिया सजिया जंघा पर ऐ ना लिखया है: “राजयां दा राजा कने प्रभुआं दा प्रभु है।” 17 फिरी मैं इक स्वर्गदूते जो सूरजे पर खडोतयो दिखया, कने उनी अम्बरे च उच्चे उडदे मांस खाणे बाले सारे पंछियां जो जोंरे ला पुकारया, “ओआ, उसा बडिया धामा तांई गिटे होई जा जडी परमेस्वरे तुहाडे तांई तैयार कितियो है।”

18 ओआ कने राजयां, सेना दे अगुवां, ताकतबर सेनिका, घोडयां कने उना से सवारां दा मास खाओ। तुसां हर तरा दे मरयो लोकां दा मास खाई सकदे न, मतलब की गुलाम कने अजाद, बड़े कने छोटे, सारयां दा मास खा। 19 फिरी मैं उस जानवरे जो दिखया जडा समुंद्रे ला बार आया था, कने धरती दे राजयां कने उना दियां सेना जो दिखया। सै घोडे पर बोणे बाले कने उदिया सेना दे खिलाफ लड़ाई लडने तांई इक सोगी आऐ। 20 कने सै पैला जानवर, कने उदे सोगी सै झूठा परमेस्वरे दे संदेश देंणे बाला पकड़ोई गया, झूठे संदेश देणेबाले जानवरे दिया तरफा ला चमत्कारी चिन्न दस्से कने उना सारे लोकां जो भटकाया, जिना अपने मथे पर छाप लाईयो थी कने जडे उदिया मुर्तिया दी पूजा करदे थे। ऐ दोनो जींदे जी उसा अग्गी दिया झिला च पाई दिते, जडी गन्धक ला बलदी है। (Limnē Pyr g3041 g4442) 21 तालू चिट्ठे घोडे दे सवारे उस जानवरे दे सारे सेनिका जो मारी दिता, उनी उना जो उसा तलबारा ला बडी दिता जडी उदे मूऐ ला निकली थी। तालू अम्बरे दे सारे पंछी मरयो लोकां दा मास खाणे तांई आई गे जालू दीकर की उना दा पेट भरई नी जा।

20 फिरी मैं इक स्वर्गदूते जो स्वर्ग ला उतरदे दिखया, जिंदे हथे च डुगे कुंडे दी चाबी थी, कने इक बडी जंजीर थी। (Abyssos g12) 2 कने उनी उस पूराणे अजगरे जो झपटी करी पकड़ी लिया। जिसयो शैतान भी बोलदे न, उनी उसयो बन्नी करी डुगे कुंडे च फेंकी दिता कने दरबाजा बंद करी दिता कने उस पर मोहर लाई दिती ताकि उसयो इक जार सालां दीकर कोई खोले ना। इना जार सालां च शैताने संसारे लोकां जो धोखा नी देई सकणा। उदे बाद उसयो थोडे बकते तांई छडी देणा। (Abyssos g12) 4 फिरी मैं कुछ सिंहासन दिक्खे, कने जडे लोक उना सिंहासना पर बैठयो थे उना जो राज करणे दा हक दितया था। मैं उना लोकां दियां आत्मा जो भी दिखया जिना दे सिरां जो बड़ी दितया था क्योंकि उना ऐ मन्नी लिया था की यीशु उना दा प्रभु है, कने सै परमेस्वरे दे बचने पर भरोसा करदे थे। उना जानवर या उदिया मुर्तिया दी पूजा नी कितियो थी कने इना अपने मथे कने हथां पर जानवरे दी छाप नी लाईयो थी। ऐ लोक दुबारा ला जिन्दे होई गे कने इना इक हजार सालां दीकर मसीह सोगी राज किता। 5 मरयां चे जिन्दे होणे बालयां चे ऐ सारयां ला पेहले थे कने ऐ बडे जादा सोभाग्यशाली कने पबित्र न। दूजी मौत दा उना पर कोई अधिकार नी है। सै परमेस्वरे दे कने मसीह दे याजक होणे कने उना सोगी इक हजार साल दीकर राज करणा। इना इक हजार सालां ला पेहले कुसी भी भरोसा करणे बालयां जो जडे मरी गियो थे जिन्दा नी कितया। 7 जालू हजार साल पुरे होई जाणे तां स्वर्गदूते शैताने जो ओथु ला जिथू सै बन्नया था अजाद करी देणा कने उनी उना देशां जो धोखा देणे तांई बार आई जाणा जडे पुरे संसारे च खिंडयो न। इना देशां जो गोग कने मागोग बोलदे न। शैताने उना सारयां जो इकी जगा पर गठेरी देणा जिथू उना लड़ाई करणी। उना समुंदरे दे बखे दिया रेत बराबर होणा की कुनी उना जो गिणी नी सकणा। 9 कने सै सारिया धरतिया पर हर जगा गे। उना उस शेहरे जो घेरी लिया, जिसयो परमेस्वर प्यार करदा है, जिथू उदे लोक रेंदे थे। परमेस्वरे दिया तरफा ला कने स्वर्ग ला अग्ग आई उना पुरिया सेना जो भस्म करी दिता। 10 इदे बाद शैतान पकड़ोई जाणा, जिनी हर देशे दे लोकां जो भटकाया कने

उसयो गन्धक दिया अग्गी च फेंकी देणा, मतलब की उसा अग्गी च जड़ी झीला साईं बड़ी है। जिदे अंदर उस जानवरे जो कने परमेस्वरे झूठे संदेश देणेबालयां जो पेहले ही फेंकी दितया था। उसा अग्गी च उना जो हमेशा ताईं दिन रात सताया जाणा है। (aiōn g165, Limnē Pyr g3041 g4442) 11 फिरी मैं इक चिट्ठा सिंहासन दिखया जिस पर परमेस्वर बिराजमान था। पर ओथु जिथु परमेस्वर बिराजमान था, ओथु ला धरती कने स्वर्ग सारा गायब होई गया कने फिरी कुनी भी उना जो नी दिखया। 12 फिरी मैं मरयो लोकां जो उस सिंहासने सामणे खडोतयो दिखया मतलब की उना जो जडे खास न कने आम लोक न। सै लोक जडे समुंद्रे च डूबी करी मरी गियो थे कने कबरां दे सारे मरयो लोक, कने सै सारे लोक जडे मरयां दिया जगा पर थे, सै सारे उस सिंहासने सामणे खडोते। कने कताबां च लिखियां गल्लां दे अनुसार, जडा-जडा उना कितया उदे अनुसार उना दा न्याय होणा। (Hadēs g86) 14 सै सारे लोक जिना दे ना जिन्दगिया दिया कताबा च नी लिखयो थे, उना जो अग्गी दिया झिला च फेंकी दिता। इदे बाद मौत नी है, हुण मरयां दी कोई जगा नी है क्योंकि सै सारे लोक जिना दे ना जिन्दगिया दिया कताबा च नी लिखयो थे उना जो अग्गी दिया झिला च फेंकी दिता, इसा जो ही दुज्जी मौत बोल्दे न, जडा की अग्गी दिया झिला च सजा है। (Hadēs g86, Limnē Pyr g3041 g4442)

21 फिरी मैं नोआ स्वर्ग कने नोई धरती दिखी, क्योंकि पूराणी धरती कने स्वर्ग हुण नी थे। कने हुण कोई समुन्द्र भी नी था। 2 फिरी मैं पबित्र नोए शेहर यस्शलेमे जो भी दिखया, जडा स्वर्ग ला परमेस्वरे दिया तरफा ला थले ओआ दा है। उस शेहरे जो नोईया लाडिया साईं तैयार कितया था, जिसा जो कपडे पहनाई करी कने श्रृंगार कितया है जडी लाडे सोगी बियाह करणे ताईं तैयार है। 3 फिरी मैं इक अबाज सुणी जडी परमेस्वरे दे सिंहासने ला जोंरे ला बोली, “दिख, हुण परमेस्वरे लोकां बिच अपना घर बणाणा।” उनी उना सोगी रैणा, कने सै उदे लोक होणे, उनी अपु उना जो अपने लोकां दे स्ने च अपनाणा कने उनी उना सोगी रैणा कने उना भी उसयो परमेस्वरे दे स्ने च अपनाई लेणा। 4 परमेस्वरे उना दियां हखी ला सारे आंसू पूंज्जी देंगे, कने इदे बाद कुसी भी माणुए जो दुख नी सेहणा पोंणा, रोणा नी पोंणा, दर्द महसूस नी होणा, ना ही कूदी मौत होणी क्योंकि पूराणे संसारे दियां सारियां चीजां गायब होई गियां न। 5 कने जडा सिंहासने पर बैठया था, उनी बोलया, “दिख, मैं सब कुछ नोआ करी दिन्दा है।” फिरी उनी बोलया, “लिखि ले, क्योंकि जडा मैं बोलदा है उदे पर भरोसा करी सकदा है। ऐ गल्लां पक्का ही होणियां।” 6 फिरी उनी मिंजो बोलया, सब कुछ मुकी गिया है। मैं अलफा कने ओमेगा, कने शुरूआत कने अंत है। जडा कोई प्यासा है, मैं उसयो उस पाणिऐ ला मुफ्त पाणी पिणे ताईं देणा जडा हमेशा दी जिन्दगी दिन्दा है। 7 जडा शैताने जो हराई दिन्दा है, उसयो मिंजो ला सै ऐ सारियां आशीषां मिलणियां; कने मैं उदा परमेस्वर होणा कने सै मेरा पुत्र होणा। 8 पर जडे मिंजो पर भरोसा नी रखदे, उना जो जोर लाईकरी गंधक बालिया उसा झिला च पाई देणा, जडी दुज्जी मौत है। कने सेई अंजाम उना दा भी होणा, जडे लोकां दे सामणे मिंजो अपनाणे ला डरदे न, बुरे कम्म करदे न, जडे हत्यारे न, गंदे कम्म करदे न, जादू टोणा करदे न, मूर्तियां दी पूजा करदे न, या झूठ बोल्दे


न। (Limnē Pyr g3041 g4442) 9 फिरी उना सत्तां स्वर्गदूतां चे इकी जिना माणुए दिया जाति पर सत आखरी मुसीबतां ला भरयो कटोरे न्योरे थे, मिंजो सोगी गल्ल कितरी कने उनी बोलया, “ऐथू ओआ, मैं तिजो लाडी दसणी जिदा जल्दी ही छेलुये सोगी बियाह होई जाणा है।” 10 तालू परमेस्वरे दिया आत्मा इक दर्शण दसया। उस दर्शने च स्वर्गदूत मिंजो इक बडे बड्डे पाडे पर लेई गिया। कने पबित्र शेहर यस्शलेम दसया, जडा परमेस्वरे दिया तरफा ला स्वर्ग ला थले उतरया था। 11 शेहर परमेस्वरे ला मिलणे बालिया लौई ला चमका दा था, कने उदी ज्योति बडे कीमती पथर मतलब की यशब नाए दे बेशकीमती पथरे साईं चमका दी थी, कने शीशे साईं साफ थी। 12 शेहरे दियां चारो पासे दियां दिबारां बडिया उच्चिया थियां, कने शेहरे च बारा दरबाजे थे कने उना सारे दरबाजां च इक स्वर्गदूत पेहरा दे दा था कने उना दरबाजां पर इस्राएलियां दे बारा गोत्रां दे ना लिखयो थे। 13 शेहरे दिया चारों दिशां च तिन दरबाजे थे: पूर्व, पश्चिम, उत्तर कने दक्षिण च। 14 उना शेहरे दियां दिबारां बारा बड्डे-बड्डे पथरां उपर बणायां थियां, कने उना हर इक पथरे पर छेलुये दे बारह प्रेरितां दे ना लिखयो थे। 15 सै स्वर्गदूत जडा मिंजो सोगी गल्लां करा दा था, उदे बाल दरबाजां कने उदियां दिबारां जो नापणे ताईं इक सोने दा गज था। 16 उस शेहरे दे चार सिरे थे कने चारो सिरे इकोदे थे। स्वर्गदूते उस सोने दे फीते ला शेहरे जो नापया; इदी लम्बाई दो हजार चार सौ किलो मीटर थी। इदी चौडाई कने उच्चाई लम्बाईया बराबर ही थी। 17 इदे बाद स्वर्गदूते दिबारां दी उच्चाई नापी। उनी इसयो भी इयां ही नापया जियां लोक चीजां जो नापदे न। दिबार छियासठ मीटर उच्ची थी। 18 शेहर खरे सोने ला बणया था जडा शीशे साईं चमकदा था कने उदियां दिबारां यशब नाए दे कीमती पथरे ला बणियां थियां। 19 उस शेहरे दियां नियां कीमती बारा बड्डे-बड्डे पथरां पर बणियां थियां; पैली नी यशबे दी, दुज्जी नीलमणी दी, तीजी लालडीऐ दी, चोथी मरकते दी, 20 पंजमी गोमेदके दी, छेमी माणिक्ये दी, सतमी पीतमाणिए दी, अठमी पेरोजे दी, नौमी पुखराजे दी, दसमी लहसनिये दी, गयारमी धूम्रकांते दी, कने बारमी याकूबे दी थी। 21 बारा दरबाजे भी इक-इक कीमती मोतियां ला बणयो थे, कने शेहरे दियां सडकां खरे सोने दियां बणियां थियां जडियां शीशे साईं चमकदियां थियां। 22 मैं इस शेहरे च कोई मंदिर नी दिखया क्योंकि सारयां ला शक्तिशाली प्रभु परमेस्वर कने छेलू उस शेहरे च है। इस ताईं ओथु मंदरे दी कोई जरूरत नी है। 23 उस शेहरे च ना सूरजे दी कने ना चन्द्रमे दी जरूरत है, क्योंकि सै शेहर परमेस्वरे कने छेलुये दिया रोशनिया ला रोशन है। 24 उस शेहरे च चमक संसारे च रेणे बालयां सारे लोकां जो रौशनी दिन्दी है कने संसारे दे सारे राजयां अपणिया-अपणिया दौलता जो उस शेहरे च लेई ओणा है। 25 उस शेहरे दे दरबाजे दिन भर खुले रेंदे न। सै कडी कदी भी बंद नी होई क्योंकि ओथु कदी भी रात नी होई। 26 संसारे दे लोकां संसारे दियां सारियां खूबसूरत चीजां जो कने लोकां दिया धन दौलता जो उस शेहरे च लेई ओणा है। 27 पर जडे कुछ भी गंदा था या सै लोक जडे बुराई करदे न या झूठ बोल्दे न, उना जो पक्का ही उस शेहरे च अंदर ओणे दी इजाजत नी है। ओथु सिर्फ सेई लोक अंदर जाई सकदे न जिना दे ना छेलुये दिया जिन्दगिया दिया कताबा च लिखयो थे।

22 तालू स्वर्गदूते मिंजो इक नदी दस्सी जिदे च जिन्दगी दा पांणी था।

पांणी शीशे साईं चमका दा था। ऐ नदी परमेश्वर कने छेलुये दे सिंहासने दे थले ला बेह दी थी। 2 नदी शेहरे दिया सडका दे बिचो बिच ला गुजरदी थी। नदिया दे हर इक किनारे पर जिन्दगी देणेबाले स्ख लगयो थे जडे हर साल बारा बरी फल दिन्दे थे मतलब की हर मिने च इक बरी। संसारे दे लोक उना दे पत्तायां दा उपयोग अपणियां बिमारियां जो ठीक करणे ताई करदे न। 3 उस शेहरे च कुछ भी ऐसा नी है जडा परमेश्वरे दे श्राप दे अधीन है। परमेश्वर कने छेलुऐ दा सिंहासन उस शेहरे च होणा, कने परमेश्वरे दे सेवकां उदी अराधना करणी। 4 उना परमेश्वरे जो आमणे सामणे दिखणा, कने परमेश्वरे दा नां उना दे मथे पर लिखया होणा। 5 कने ओथु फिरी कदी रात नी होणी, कने शेहरे दे लोकां जो रस्ते च चलणे ताई दिव्ये दी जरूरत नी होणी कने ना ही सूजे दिया लौई दी जरूरत थी, क्योंकि परमेश्वरे ही है जडा लोकां जो लौ दिन्दा है। जडे लोक ओथु रेंदे न उना हमेशा ताई राजयां साईं राज करणा।

(aion g165) 6 तालू स्वर्गदूते मिंजो ला बोलया, “ऐ सारियां गल्लां जडियां तिजो दसियां न, सै सच्च न कने पुरे तरीके ला भरोसा करणे दे काबिल न। क्योंकि प्रभु परमेश्वरे जिनी संदेश देणेबालयां दे मना दा मार्गदर्शन करणे ताई अपणा आत्मा दितया था, सेई है जिनी मिंजो, जडा की उदा स्वर्गदूत है, तिजो ऐ दसणे ताई भेजया है जडा जल्दी ही होणा।” 7 “कने दिख, मैं तौली ओणे बाला है; सै धन्य न जडे इसा कताबा च लिखियां भविष्यवाणियां जो मंदे न।” 8 मैं सेई यूहन्ना है जिनी इना सरियां गल्लां जो दिखया कने सुणया है। कने जालू मैं इना गल्लां जो सुणया कने दिखया, तां मैं स्वर्गदूते दी अराधना करणे ताई उदे पैरां च पेई गया। 9 पर उनी मिंजो ला बोलया, “इयां मत कर; क्योंकि मैं तेरा कने तेरे भाई जडे परमेश्वरे दे संदेश देणेबाले न कने इसा कताबां दियां गल्लां जो मनणे बालयां साईं साथी सेबक है, सिर्फ परमेश्वरे दी ही अराधना कर।” 10 फिरी उनी मिंजो बोलया, इसा कताबां दिया भविष्यवाणियां दिया गल्लां जो लोकां ला मत लुका; क्योंकि इना चीजां दा पूरा होणे दा बकत नेडे आई गया है। 11 “जडा कोई भी बुरे कने गंदे कम्म करदा है, उना जो सै बुरे कने गंदे कम्म करदे रेणा चाईदा। कने तियां ही जडे कोई अच्छे कने पबित्र कम्म करदे न, उना जो अच्छे कने पबित्र कम्म करदे रेणा चाईदा।” 12 तालू प्रभु योशुये बोलया, मैं तौली ही ओणे बाला है; कने लोकां जडे-जडे कम्म कितया न, मैं उना जो उना दे कम्मा जो दिखीकरी इनाम कने सजा देणी। 13 “मैं अलफा कने ओमेगा, पेहला कने आखरी, शुरूआत कने अंत है।” 14 धन्य न सै, जडे अपने कपडयां जो छेलुये दे खुने ला धोई लेदे न मतलब की अपने पापां जो खत्म करी दिन्दे न, इस ताई उना जो शेहरे दे दरबाजयां अंदर कने जिन्दगी दे स्खे दे फल खाणे दा हक है। 15 पर जडे बुरे कम्म करदे न, जादू टोणा, व्यभिचारी, खनी, मूर्तिपूजक, कने हर इक झूठ जो पसंद करणे बाले कदी भी अंदर नी जाई सकदे न। 16 मैं, यीशुऐ अपने स्वर्गदूते जो तुहाडे बाल इना गल्लां दी घोषणा करणे ताई भेजया है जडियां परमेश्वरे दिया कलीसिया च होन। मैं राजा दाऊद दा बंशज है, कने मैं ही ब्यागा दे तारे साईं है। 17 कने परमेश्वरे दी आत्मा कने छेलुये दी लाड़ी योशुये ला बोलदे न, “तिजो पक्का ओणा

चाईदा।” हर इक जडा ऐ सुणदा है, उसयो भी ऐ बोलणा चाईदा, “आ!” कने जडा कोई भी प्यासा है, सै ओऐ कने उस पाणिऐ जो पिया जडा जिन्दगी दिन्दा है, जडा की उना सारयां जो मुफ्त मिलदा है जडे उसयो पिणा चांदे न। 18 मैं यूहन्ना है कने मैं तुसां सारयां जो ऐ चेताबनी दे दा है, जडे इसा कताबा दिया भविष्यवाणियां जो सुणदे न, जडियां हुण होआ दियां न कने अग्ने होणे बालियां न, जडियां मैं इसा कताबा च लिखियां न; अगर कोई माणू इना गल्लां च कुछ भी बदांदा है, तां परमेश्वरे उदिया सजा जो भी बधाई देणा। उनी तुहांजो उना मुसीबतां ला मारणा, जडियां मैं इसा कताबा च लिखियां न। 19 अगर कोई ऐसा माणू है जडा इसा कताबा च भविष्यवाणिया दियां गल्लां च कुछ हटाई दिन्दा है, तां परमेश्वरे तुहांजो ला उना आशीषां जो लेई लेणा जडियां मैं इसा कताबा च लिखियां न कने परमेश्वरे उस जिन्दगी दे स्ख ला फल खाणे कने पबित्र शेहरे च रेणे दा हक भी बापस लेई लेणा। 20 ऐ यीशु मसीह दे शब्द न जडा उना सारियां गल्लां दी गबाई दिन्दा है जडियां इसा कताबा च लिखियां न, सै बोलदा है “हां, मैं तोल्ली ओणे बाला है।” मैं यूहन्ना जबाब दिता, “आमीन, हे प्रभु यीशु मसीह आ।” 21 मैं प्राथना करदा है की साडे प्रभु यीशु मसीह दा अनुग्रह हमेशा तुसां सारयां पर होंदा रे। आमीन।



फिरी मैं पबित्र नोए शेहर यरूशलेमे जो भी दिखया, जडा स्वर्गे ला परमेख्वरे दिया तरफा ला थले ओआ दा है। उस शेहरे जो नोईया लाडिया सांई तैयार कितया था, जिसा जो कपडे पहनाई करी कने श्रृंगार कितया है जडी लाडे सोगी बियाह करणे तांई तैयार है। फिरी मैं इक अबाज सुणी जडी परमेख्वरे दे सिंहासने ला ज़ोरे ला बोली, “दिख, हुण परमेख्वरे लोकां बिच अपना घर बणाणा।” उनी उना सोगी रैणा, कने सै उदे लोक होणे, उनी अपु उना जो अपने लोकां दे स्मे च अपनाणा कने उनी उना सोगी रैणा कने उना भी उसयो परमेख्वरे दे स्मे च अपनाई लैणा।

प्रकाशितवाक्य 21:2-3

Reader's Guide

भटियाली at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

भटियाली at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aidios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Bhattiyali---Bhattiyali-Bible/Noted

Aionian Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words but may wrongly imply *eternal* or *Hell*. Note placement is skipped or adjusted for verses with non-standard numbering.

Abyssos

लूका 8:31
रोमियो 10:7
प्रकाशितवाक्य 9:1
प्रकाशितवाक्य 9:2
प्रकाशितवाक्य 9:11
प्रकाशितवाक्य 11:7
प्रकाशितवाक्य 17:8
प्रकाशितवाक्य 20:1
प्रकाशितवाक्य 20:3

aidios

रोमियो 1:20
यहदा 1:6

aiōn

मती 12:32
मती 13:22
मती 13:39
मती 13:40
मती 13:49
मती 21:19
मती 24:3
मती 28:20
मरकुस 3:29
मरकुस 4:19
मरकुस 10:30
मरकुस 11:14
लूका 1:33
लूका 1:55
लूका 1:70
लूका 16:8
लूका 18:30
लूका 20:34
लूका 20:35
यहन्ना 4:14
यहन्ना 6:51
यहन्ना 6:58
यहन्ना 8:35
यहन्ना 8:51
यहन्ना 8:52
यहन्ना 9:32
यहन्ना 10:28
यहन्ना 11:26
यहन्ना 12:34
यहन्ना 13:8
यहन्ना 14:16

प्रेरितां दे कम्म 3:21
प्रेरितां दे कम्म 15:18
रोमियो 1:25
रोमियो 9:5
रोमियो 11:36
रोमियो 12:2
रोमियो 16:27
1 कुरिन्थियों 1:20
1 कुरिन्थियों 2:6
1 कुरिन्थियों 2:7
1 कुरिन्थियों 2:8
1 कुरिन्थियों 3:18
1 कुरिन्थियों 8:13
1 कुरिन्थियों 10:11
2 कुरिन्थियों 4:4
2 कुरिन्थियों 9:9
2 कुरिन्थियों 11:31
गलातियों 1:4
गलातियों 1:5
इफिसियों 1:21
इफिसियों 2:2
इफिसियों 2:7
इफिसियों 3:9
इफिसियों 3:11
इफिसियों 3:21
इफिसियों 6:12
फिलिप्पियों 4:20
कुलस्सियों 1:26
1 तीमुथियुस 1:17
1 तीमुथियुस 6:17
2 तीमुथियुस 4:10
2 तीमुथियुस 4:18
तीतुस 2:12
इब्रानिया 1:2
इब्रानिया 1:8
इब्रानिया 5:6
इब्रानिया 6:5
इब्रानिया 6:20
इब्रानिया 7:17
इब्रानिया 7:21
इब्रानिया 7:24
इब्रानिया 7:28
इब्रानिया 9:26
इब्रानिया 11:3
इब्रानिया 13:8
इब्रानिया 13:21
1 पतरस 1:23

1 पतरस 1:25
1 पतरस 4:11
1 पतरस 5:11
2 पतरस 3:18
1 यहन्ना 2:17
2 यहन्ना 1:2
यहदा 1:13
यहदा 1:25
प्रकाशितवाक्य 1:6
प्रकाशितवाक्य 1:18
प्रकाशितवाक्य 4:9
प्रकाशितवाक्य 4:10
प्रकाशितवाक्य 5:13
प्रकाशितवाक्य 7:12
प्रकाशितवाक्य 10:6
प्रकाशितवाक्य 11:15
प्रकाशितवाक्य 14:11
प्रकाशितवाक्य 15:7
प्रकाशितवाक्य 19:3
प्रकाशितवाक्य 20:10
प्रकाशितवाक्य 22:5

aiōnios

मती 18:8
मती 19:16
मती 19:29
मती 25:41
मती 25:46
मरकुस 3:29
मरकुस 10:17
मरकुस 10:30
लूका 10:25
लूका 16:9
लूका 18:18
लूका 18:30
यहन्ना 3:15
यहन्ना 3:16
यहन्ना 3:36
यहन्ना 4:14
यहन्ना 4:36
यहन्ना 5:24
यहन्ना 5:39
यहन्ना 6:27
यहन्ना 6:40
यहन्ना 6:47
यहन्ना 6:54
यहन्ना 6:68

यहन्ना 10:28
यहन्ना 12:25
यहन्ना 12:50
यहन्ना 17:2
यहन्ना 17:3
प्रेरितां दे कम्म 13:46
प्रेरितां दे कम्म 13:48
रोमियो 2:7
रोमियो 5:21
रोमियो 6:22
रोमियो 6:23
रोमियो 16:25
रोमियो 16:26
2 कुरिन्थियों 4:17
2 कुरिन्थियों 4:18
2 कुरिन्थियों 5:1
गलातियों 6:8
2 थिस्सलुनीकियों 1:9
2 थिस्सलुनीकियों 2:16
1 तीमुथियुस 1:16
1 तीमुथियुस 6:12
1 तीमुथियुस 6:16
2 तीमुथियुस 1:9
2 तीमुथियुस 2:10
तीतुस 1:2
तीतुस 3:7
फिलेमोन 1:15
इब्रानिया 5:9
इब्रानिया 6:2
इब्रानिया 9:12
इब्रानिया 9:14
इब्रानिया 9:15
इब्रानिया 13:20
1 पतरस 5:10
2 पतरस 1:11
1 यहन्ना 1:2
1 यहन्ना 2:25
1 यहन्ना 3:15
1 यहन्ना 5:11
1 यहन्ना 5:13
1 यहन्ना 5:20
यह्ददा 1:7
यह्ददा 1:21
प्रकाशितवाक्य 14:6

eleēsē

रोमियो 11:32

Geenna

मत्ती 5:22
मत्ती 5:29
मत्ती 5:30
मत्ती 10:28
मत्ती 18:9
मत्ती 23:15
मत्ती 23:33
मरकुस 9:43

मरकुस 9:45
मरकुस 9:47
लुका 12:5
याक्व 3:6

Hadēs

मत्ती 11:23
मत्ती 16:18
लुका 10:15
लुका 16:23
प्रेरितां दे कम्म 2:27
प्रेरितां दे कम्म 2:31
1 कुरिन्थियों 15:55
प्रकाशितवाक्य 1:18
प्रकाशितवाक्य 6:8
प्रकाशितवाक्य 20:13
प्रकाशितवाक्य 20:14

Limnē Pyr

प्रकाशितवाक्य 19:20
प्रकाशितवाक्य 20:10
प्रकाशितवाक्य 20:14
प्रकाशितवाक्य 20:15
प्रकाशितवाक्य 21:8

Sheol

Genesis 37:35
Genesis 42:38
Genesis 44:29
Genesis 44:31
Numbers 16:30
Numbers 16:33
Deuteronomy 32:22
1 Samuel 2:6
2 Samuel 22:6
1 Kings 2:6
1 Kings 2:9
Job 7:9
Job 11:8
Job 14:13
Job 17:13
Job 17:16
Job 21:13
Job 24:19
Job 26:6
Psalms 6:5
Psalms 9:17
Psalms 16:10
Psalms 18:5
Psalms 30:3
Psalms 31:17
Psalms 49:14
Psalms 49:15
Psalms 55:15
Psalms 86:13
Psalms 88:3
Psalms 89:48


Psalms 116:3
Psalms 139:8
Psalms 141:7
Proverbs 1:12
Proverbs 5:5
Proverbs 7:27
Proverbs 9:18
Proverbs 15:11
Proverbs 15:24
Proverbs 23:14
Proverbs 27:20
Proverbs 30:16
Ecclesiastes 9:10
Song of Solomon 8:6
Isaiah 5:14
Isaiah 7:11
Isaiah 14:9
Isaiah 14:11
Isaiah 14:15
Isaiah 28:15
Isaiah 28:18
Isaiah 38:10
Isaiah 38:18
Isaiah 57:9
Ezekiel 31:15
Ezekiel 31:16
Ezekiel 31:17
Ezekiel 32:21
Ezekiel 32:27
Hosea 13:14
Amos 9:2
Jonah 2:2
Habakkuk 2:5

Tartaroō

2 पतरस 2:4

Questioned


None yet noted



भरोसे दिया बजा ला ही अब्राहम नाए दे माणुए जो परमेश्वरे इक ऐसी जगा च जाणे ताई सदया जिसा जगा जो परमेश्वर बादे च उसयो विरासत च देणेबाला था। कने सै ऐ नी जाणदा था की कुथयो चलया है, पर फिर भी परमेश्वरे दा हुकम मन्नी करी सै उस देशे जो चली गया। - इब्रानिया 11:8



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt'" Exodus 13:17



मैं ऐ इस ताई बोलदा है क्योंकि मैं, माणुऐ दा पुत्र, इस संसारे च सारायां दी सेवा करणे ताई आया है, मैं इस ताई नी आया कि लोकां ला अपनी सेवा करां।
मैं तां लोकां जो पापां ला छुटकारा करणे ताई अपने प्राण कीमत च देण आया है। - मत्कुस 10:45



ऐ चिट्ठी पौलुस दिया तरफा ला है, जड़ा प्रभु यीशु मसीह दा सेवक है, कने परमेश्वरे उसयो प्रेरित होणे ताई चुणया है, कने परमेश्वरे दा शुभसमाचार दा प्रचार करणे ताई नियुक्त कितया है। - रोमियो 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophecies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Uusher)

Jesus Christ born 4 B.C.

New Heavens and Earth

1956	Christ returns for his people
1830	Jim Elliot martyrd in Ecuador
1731	John Williams reaches Polynesia
1614	Zinzendorf leads Moravian mission
1572	Japanese kill 40,000 Christians
1517	Jesuits reach Mexico
1455	Martin Luther leads Reformation
1323	Gutenberg prints first Bible
1276	Franciscans reach Sumatra
1100	Ramon Llull trains missionaries
1054	Crusades tarnish the church
997	The Great Schism
864	Adalbert martyrd in Prussia
716	Bulgarian Prince Boris converts
635	Boniface reaches Germany
569	Alopen reaches China
432	Longinus reaches Alodia / Sudan
397	Saint Patrick reaches Ireland
341	Carthage ratifies Bible Canon
325	Ulfilas reaches Goth / Romania
250	Niceae proclaims God is Trinity
197	Denis reaches Paris, France
70	Tertullian writes Christian literature
61	Titus destroys the Jewish Temple
52	Paul imprisoned in Rome, Italy
39	Thomas reaches Malabar, India
33	Peter reaches Gentile Cornelius
	Holy Spirit empowers the Church

(Wikipedia, Timeline of Christian missions)

Resurrected 33 A.D.

Where?			When?								
			Innocence		Fallen			Glory			
			Eternity Past	4000 BC Creation	Fall to Sin No Law	1500 BC Moses' Law	Advent of Christ 0-33 AD	Church Age Kingdom Age	Great White Throne	New Heaven and Earth	
Who?	God	Father	God's Perfect Fellowship	God's Perfect Fellowship with Adam in the Garden of Eden	Living in Unapproachable Light, 1 Timothy 6:16			God's Perfectly Restored Fellowship with All Mankind in the Holy City	All Restored Acts 3:21		
		Son			Pre-Incarnate, John 8:58		Incarnate, John 1:14			Paradise, Luke 23:43	
		Holy Spirit			John 10:30		Everywhere, Psalm 139:7			Indwelling Believers, John 14:17	
	Mankind	Living Mankind	Serving the Savior or Satan on Earth, Ephesians 2:1-5								
		Deceased Believing Mankind	Blessed in Paradise, Luke 16:22								
		Deceased Unbelieving Mankind	Punished in Hades until the final judgment, Luke 16:23 and Rev 20:13								
	Angels	Holy Angels	No Creation	No Fall No Death Gen 1:31	Serving Mankind at God's Command, Hebrews 1:14			No Hades No Dead Rev 20:3			
		Imprisoned Angels	No people								
		Fugitive Angels	Gen 1:1	No Fall	Imprisoned in Tartarus, 2 Peter 2:4 and Jude 6			Lake of Fire Prepared for the Devil and his Angels Mat 25:41 Rev 20:10	Fallen Angels Forgiven? Col 1:20 Yes? Heb 2:16 No?		
		First Beast Demon			No Unholy Angels Gen 1:31	Rebelling Against Christ				Thalaasa, Rev 20:13	
		False Prophet Demon				Accusing Mankind				Lake of Fire Revelation 19:20	
		Satan		1 Peter 5:8 and Revelation 12:10		Abyss Revelation 20:2					

Destiny

भटियाली at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, "*the gates of Hades will not prevail*," Matthew 16:18. Paul asks, "*Hades where is your victory?*" 1 Corinthians 15:55. John wrote, "*Hades gives up*," Revelation 20:13.

Jesus comforts us saying, "*Do not be afraid*," because he holds the keys to *unlock* death and Hades, Revelation 1:18. Yet too often our *Good News* sounds like a warning to "*be afraid*" because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, "*out of the frying pan, into the fire?*" Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, "*Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. "*If the first fruit is holy, so is the whole*," Romans 11:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philippians 2:9-11.



इस ताईं तुसां जाई करी सारियां जातियां दे लोकां जो चेले बणा; कने उना जो पिता, पुत्र, कने पबित्र आत्मा दे नाए ने बपतिस्मा दीया। - मत्ती 28:19